


KALEIWAG KWEIVAW



The New Testament in the Muyuw Language of Papua New Guinea

KALEIWAG KWEIVAW

The New Testament in the Muyuw Language of Papua New Guinea
Nupela Testamen long tokples Muyuw long Niugini

Copyright © 1976, 1993 The Bible Society of Papua New Guinea

Language: Muyuw

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents.
For other uses, please contact the respective copyright owners.

2016-08-30

PDF generated using Haiola and XeLaTeX on 4 Mar 2019 from source files dated 20 Dec 2018
517ae3da-6769-54e8-8afd-7d53f958558c

Contents

FRT	1
Matiw	3
Mak	51
Luk	81
Yon	132
Wotet	167
Lom	215
1 Kolinit	236
2 Kolinit	257
Galetiy	270
Epesos	278
Pilipay	285
Kolos	290
1 Tesalonik	295
2 Tesalonik	300
1 Timotiy	303
2 Timotiy	309
Titos	313
Pilimon	316
Min-Ibliw	318
Yemes	333
1 Pita	339
2 Pita	345
1 Yon	349
2 Yon	355
3 Yon	356
Dud	357
Ikamat	359
.	382

Kaleiwag Kweivaw
The New Testament in the Muyuw Language of Papua New
Guinea
Nupela Testamen long tokples Muyuw long Niugini

Kaleiwag Kweivaw

The New Testament in the Muyuw Language of Papua New Guinea
 [myw]

Translation by Wycliffe Bible Translators

© 1976, 1993, The Bible Society of Papua New Guinea

Print publication 1993 by The Bible Society of Papua New Guinea

Web version
 2014, Wycliffe Bible Translators, Inc.
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- Attribution. You must attribute the work to *Wycliffe Bible Translators* (but not in any way that suggests that they endorse you or your use of the work).
- Noncommercial. You may not use this work for commercial purposes.
- No Derivative Works. You may not alter, transform, or build upon this work.
- In addition, you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem yu ken givim kopi long narepela manmeri. Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. Yu mas givim nating. Na tu, yu no ken senisim Tok.

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa.

Sapos yu laik stremt samting i no orait long dispela tok orait, stremt tok, salim Buk Baibel, o tainim Tok bilong God long nupela tok ples, yu ken askim mipela.

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, plis askim mipela.

Buk yiges katanok katanok

MATIW

Yeisuw delen (Luk 3:23-38)

- ¹ Buk towen waseg delen Yeisuw Kelis, tabun kweiboug Deibid, kweiboug tonen tabun Ebelam.
- ² Ebelam natun Aysak. Aysak natun Yekob. Yekob nitun Yud siney tuwan budan.
- ³ Yud nitun Peles son Selak. Ines Temal. Peles natun Eslon. Eslon natun Alam.
- ⁴ Alam natun Amminadab. Amminadab natun Nason. Nason natun Salmon.
- ⁵ Salmon natun Bowas. Bowas inan yagan Leyab. Bowas natun Obed. Obed inan yagan Lut. Obed natun Desiy.
- ⁶ Desiy natun Deibid, mtowen king. Deibid natun Solomon. Solomon inan mtowen Uliyak nakwav. Deibid bo ikow vin manawen.
- ⁷ Solomon natun Lekoboum. Lekoboum natun Ebii. Ebii natun Esap.
- ⁸ Esap natun Yosepat. Yosepat natun Yolam. Yolam natun Usay.
- ⁹ Usay natun Yotam. Yotam natun Akas. Akas natun Esekay.
- ¹⁰ Esekay natun Manas. Manas natun Emon. Emon natun Yosiyak.
- ¹¹ Yosiyak nitun Yekonay siney budan, tutan ikoulups ineis Babilon.
- ¹² Ineis Babilon ikous, Yekonay natun Salatiyel. Salatiyel natun Delububel.
- ¹³ Delububel natun Ebiiyud. Ebiiyud natun Ilayakim. Ilayakim natun Esol.
- ¹⁴ Esol natun Sədok. Sədok natun Ekim. Ekim natun Eliyud.
- ¹⁵ Eliyud natun Eliyesal. Eliyesal natun Mattan. Mattan natun Yekob.
- ¹⁶ Yekob natun Yosep, mtowen Meliy namwan. Meliy natun Yeisuw, mtowen yagan Kelis.
- ¹⁷ Yeisuw delen, tasilamaw Ebelam waseg, tavin Ebelam, tayuwein Ebelam natun, tatounun Ebelam tabun, tavasin Ebelam tabun natun, beibus ee... tutan Deibid waseg, babiweis sinawatan teivas. Tasilamaw Deibid waseg, tavin Deibid son natun, tatounun Deibid tabun, tavasin Deibid tabun natun, beibus ee... tutan min-Babilon ikawes inawes wasiven, babiweis sinawatan teivas. Tasilamaw tutan ineis Babilon tavin ee... tutan Kelis waseg, babiweis sinawatan teivas.

Apwaw Yeisuw Kelis (Luk 2:1-7)

- ¹⁸ Nakabsilamaw Yeisuw Kelis mawan. Inan Meliy nibokes vagan beivays son Yosep. Nag imasis son, tage bo isum-wan; Kululuwan Yowbad isek Meliy mo isum.
- ¹⁹ Namwan Yosep ikin neisum, itilikon, idok kid bipiyev. Taw towen tadicumwal, nag bilivan wavytakon ven; adok vin beivag anmwasin; misinaka bikayeb binoun.
- ²⁰ Ininuway mawan ee... imasis, anmikon waseg Yowbad natakayob ikin neim, idibek, ilana, "Yosep, yakoum Deibid tabun yak, bweina kuvays soum Meliy. Awoum beivag nanoum babaw. Yowbad Kululuwan isek mo isum ikakudapom."
- ²¹ "Igaw mo bikop natun kudataw; e, kudok yagan Yeisuw, mtowen bikatinabwes nagamag sinap kalbaleb waseg." ²² Youd towen ikamat peinan Yowbad anilivan mawan. Napalopit kweiboug nilivnek mamagina:
- ²³ "Nakubukwab igaw naptabod mo bikop natun kudataw, yagan bidokes Imānuwel." Wawun yeg towen 'Yowbad sod tasesus.'
- ²⁴ Yosep imasis ikous, ikit, ikanow aygan Yowbad natakayob, ivays son nakwav.
- ²⁵ Ta-imasis son; tanaban ises ee... mo ikop natun, taman mo idok natun yagan Yeisuw.

Tassinaps nimeis, silmanin biyakawns Yeisuw waseg

- ¹⁻² Tutan inan nikop Yeisuw ven Betelem waseg, wawnuwan ven Yudiy, ven babaw siking Elod. Tassinaps mwasanin siven wanuvid mo imeis Yelusalem, ilansa, "Yakamiy

min-Yudiy miking kweivaw, avanuy mikopweyas? Peinan nakakin anwutun kweivaw neipel, mwana nakam kid bakakulul wamatān."

³ King Elod iligen mamagin, ivag aspw̄ayat siney min-Yelusalem.

⁴ Mapun ilivan v̄agan meivek tasiyas tanuwḡwes lun, sisiyas takatimlakeins kaleiwag, katuyouns bimeis.

Imeis mo ikatugan, ilana, "Kelis avanuy mikopweyas?"

⁵ Ilansa, "WaBetelem, wawnawan ven Yudiy; peinan palopit teitan nilel Yowbad anilivan mamagina:

⁶ 'Yakoum ven Betelem wawnawan ven Yudiy, bo kumug.

Nag kukuyeim Yud guyawaw watiblous, nag.

Peinan takaleiwag bikamat ven Betelem waseg; mtown mo bikaleiwag gungamag Yisleil wasigeis.'

Palopit towen anilivan mamagin."

⁷ Wankuyeim Elod mo idawes bimeis tassinaps, tasiyas mwana nimeis; siney tasiyas illivans, ikatugan, ilana, "Wutun towen nukukines, avei-yam waseg neipel?"

⁸ Ilivans ikous, mo ikayabes bineis Betelem, ilana, "Gwad towen kuneves beibwein; kokin bukubānes, kuyums kumeis, kudibakeigs; yej mo ban akulul wamatān."

⁹ Iliganes aygan King towen, mo inounas ineis. Wutun towen, kweiboug nikines wanuvid, bo imgwayes in, iton wakunuwatan apwaw nabunatum nimsikey-yay.

¹⁰ Ikinis wutun towen, mo imw̄asaws avakaein.

¹¹ E, isiws bunatum wanuwan, ikinis apwaw son inan Meliy, ikululs wamatān, iyākawns waseg. Ikous, mo ikaliyowes siwliyoug isiwyoubus apwaw towen, isekes goul, o pilankisens simasim seikwan, o mul silmanin won takanig biptumis. Imulouls māwan ikous.

¹² Wankuyeim asmikon waseg Yowbad mo ikatimlakes awoum beiyum binekes Elod, mapuna iyums inoyes kadetan ked, ineis wasiven.

Isawls ineis Yidipt

¹³ Wankuyeim Yowbad natakayob teitan mo inek Yosep, Yosep anmikon waseg, ilana, "Kutamanaw, kutokes gwad son inan, kusawls kuneis Yidipt, kusesus ee... tutan balivan mo kuyums. Peinan Elod binineiv gwad towen, biban kid bikatimet."

¹⁴ Yosep ikanow aygan, itamanaw boug waseg, itokes gwad son inan, ineis Yidipt.

¹⁵⁻¹⁸ Elod gog bikayyamat tasiyas tassinaps, ikayyamata ee... nag; nanon ilana, "O bo ikatidavigs." Kapasal nuwan, ikayabes nagamag, beiweiys kid apwaw tasiyas tawaw Betelem o walasin ven wasigeis, ilana, "Tasiyas asibweilim katanok o akweiy kuwaweiysa beikous." Peinan nikatugwan tassinaps wasigeis avei-tut nikop gwad towen.

Idok kid Yeisuw bikatimet, tage Yowbad anilivan kweiboug napalopit Yelemay nilivnek mamagina:

"Ven Lem waseg mo biliganes vālam avakaein.

Lakel o vinay-nen Yisleil bivalams nitsiyas pines.

Ta-māwan bivkakesbeitout ninous, peinan nitsiyas bo imtakous."

Yelemay anilivan kweiboug, bo ikamat tut towen waseg. E, Yosep siney angamag Yidipt waseg isesus ee... ikanig Elod. Peinan kweiboug napalopit nilivnek mamagina:

"Natug waYidipt mo adouw im."

¹⁹⁻²⁰ E, Elod ikanig, Yowbad natakayob mo inek Yosep, anmikon waseg, igaw nises Yidipt, ilana, "Kutamanaw, kutokes gwad son inan, kuneis Yisleil; peinan towen sivinan beiweiy gwad bo ikanig. Kameiliw bo ikous."

²¹ Mtowen Yosep itamanaw, itokes gwad son inan ineis Yisleil. ²²⁻²³ Iligen Elod ikanig, o Elod natun Alkelaw, taman nakaleiwag bo ikow, ikaleiwag ven Yudiy waseg. Yosep anpwayat beiyum ven towen waseg, kweitan sinap ikakin anmikon waseg, mo inoyes kidenen Galiliy, ineis ven Nasalet, isiwas. Mapuna ikamat palopit anilivan mamagina: "Bidokes towen gum-Nasalet."

*Yon tabibaptaysein gamags inageiguy towen
(Mak 1:1-8; Luk 3:1-9, 15-17; Yon 1:19-28)*

¹⁻² Igaw nisesus Nasalet mo Yon isilamaw nageiguy ven Yudiy wanawoud, mtowen tabibaptaysein gamags, ilana, “Bikanavin ninoumiy, sinap kalbaleb kulavewas, peinan Yowbad kakita bisilamaw nakaleiwag.”

³ Palopit towen Isaya kweiboug nilivnek Yon nawotet, ilana, “Aygan bivakaein wanawoud, bilivan, ‘Kukidumwälus daGuyaws inaked; kuväges beibwein.’ ”

⁴ Mtowen Yon anakweim wunuwunun kamel, anawat kaleevin kamel, kan gog kulipaw son kitoul.

⁵⁻⁶ Mo inounas inekes Yon, min-Yelusalem sisiyas Yudiy gimgilis, sisiyas wunsiyas ven wadadan lay yagan Yoldan, ikämats asisinap kalbaleb, Yon mo ibaptäyses tasiyas lay Yoldan waseg.

⁷⁻¹⁰ Ikin tasiyas Palisiy sisiyas tasiyas Sadusiy imimeis vägan bibaptäyses, mo ikanes, ilana, “Mwatet yakamiy, adok teitan tan niguyeimiy mapuna kuwenes Yowbad, amipwayat igaw mo bikatimop amisinap kalbaleb. Adok nag kupiyaves amisinap kalbaleb. Kwatimlakeigs miwotet bwein vägan bakin amisinap kweivaw nukuklawes, bwanabwein. Awoum kuninuways, kulansa, ‘Yakamey bwein, peinan Ebelam delen yakamey.’ Nag gog, Yowbad kadilok dakul tasiyas bivag mo bimlavags Ebelam delen. Ebelem delen mamagina kay. Tut kadilakus mo beiteiy kay kasiyas. Kukin amata kay nag beivag anagin mo beiteiy, bilev bein wäkov.”

¹¹⁻¹² Yon mo ilivan, ilana, “Yey, bo nabaptayseimiy yevagam waseg, peinan bo kulavewas amisinap kalbaleb. Igaw teitan beim, tatawtoun; yey nag kadilok båkew inasandol, peinan guyaw avakaein. Mtowen beim mo bibaptayseimiy Kululuwan Bwanabwein waseg, mamagina kov. Mamagina nakaytuk wanaman biaway anawit, vägan bikow anagin bwanabwein binow waseigous, simwan gog bisen bigigob kov tuta babaw.”

*Ibaptays Yeisuw
(Mak 1:9-11; Luk 3:21-22)*

¹³ Wankuyeim Yeisuw mo ilisow Galiliy in Yoldan, inek Yon, vägan kid bibaptays.

¹⁴ Yon idok kid bisilbwed, ilana, “Kadilok kubaptäyseig yey, awoum yey babaptäyseim yak.”

¹⁵ Iw to Yeisuw, ilana, “Bweina kuvag nagein. Kadiloka sinap babaw bwanabwein bitayakous.” Mo itam.

¹⁶ Ibaptays Yeisuw ikous, igalag, libålab bo itavis, Yowbad Kululuwan mo ikin, ankakin mawana bwabun italbelub im, iton Yeisuw wakunun.

¹⁷ Aygan teitan walbalab mo iligen, ilana, “Towen Natug bwanabwein; singay ibwein nanoug waseg.”

*Iyakwen Yeisuw
(Mak 1:12-13; Luk 4:1-13)*

¹ Yowbad Kululuwan mo itok Yeisuw, inow wanawoud, vägan Seitan biyakwen.

² Ipos sinawavas Yam; ta-kweitan kan ikam Yam waseg o boug waseg, nag. Ikous, mo ivag anamoun.

³ Taykwanein gamags mo isap, ilana, “Magat yakoum Yowbad Natun yak, amlivan kusek dakul tasiyas mo bimlavag bled bukukwam.”

⁴ Yeisuw ikatimop aygan, ilana, “Bukitab waseg livan nises mamagina: ‘Kan makaw nag biyamov gamag; nag. Tage Yowbad anilivan kweitan kweitan mo biyamoves gamags.’ ”

⁵⁻⁶ Ikous sinap towen, Seitan mo itok Yeisuw inow Yelusalem waseg, itamnow Yowbad nabunatum wakunuwatan, idibek, ilana, “Magat yakoum Yowbad Natun yak, kwaspepel kun watinow. Nag aveiyag bivag, peinan livan nises Bukitab waseg mamagina: ‘Bo bisek natakayobs siwotet vagan bimtakavateims, binupeims yak; mata ge dakul iweiy kakeim.’”

⁷ Yeisuw idibek, ilana, “Kweitan livan nises mamagina: ‘Awoum kuyakwen muGuyaw Yowbad.’”

⁸ Sivtounun mo itok Yeisuw, inow koy singay avakaein, ikatimlek vena babaw ikous, ikin vena babaw bwanabweins.

⁹ Yeisuw ikin ikous, Seitan mo idibek ilana, “Kukulul wamatag mo basekeim vena babaw, wunsiyas ven mukwaleiwag yakoum.”

¹⁰ Yeisuw mo ikan Seitan, ilana, “Kusineikik. Bukitab waseg kweitan livan nises mamagina:

‘DaGuyaws Yowbad bukukulul wamatatan;
Towen anmwānet bukutapwāloul waseg.’”

¹¹ Seitan mo ilisow Yeisuw, inoun. Yowbad natakayobs mo imeis, ilabes Yeisuw.

Isilamaw nawotet ven Galiliy waseg

(Mak 1:14-15; Luk 4:14-15)

¹² Wankuyeim kweitan tut gamag mwasanin mo inekes Yeisuw, ilansa, “Bo iyousis Yon inawes wādeil.” Yeisuw iligen mo inoun in Galiliy.

¹³ In Nasalet, ilisow, in Kapaneyum mo isin. Ven towen wakawalaw, kweiboug tasiyas Seblon son Naptal siven.

¹⁴⁻¹⁶ Palopit kweiboug Isaya nilivnek mamagina:
“Seblon son Naptal siven, palata-dadan Yoldan,
yol niweiw, ven towen Galiliy nimeim;
tasiyas igaw dadub misikes.

Kweiboug dadub, kamnat avakaein mo ikines.

Kweiboug ven kanig-nen misikes, kamnat mo isap wasigeis.”

Kweiboug palopit nilivnek, tut towen bo ikamat.

¹⁷ Yeisuw mo isilamaw nageiguy, ilana, “Kulavewas amisinap kalbaleb, peinan Yowbad kakita bisilamaw nakaleiwag.”

Taplapouls asteivas

(Mak 1:16-20; Luk 5:1-11)

¹⁸ Ivayal yevagam towen yagan Galiliy, ikin taw teitan son bwadan iplapouls, mtowen Saymon, kweitan yagan Pita, bwadan Andiluw, peinan siwotet poul-wan.

¹⁹ Yeisuw idibakes, ilana, “Kukikuns waseg yey, mo basekeimiy kweitan miwot, waseg bukukwanes gamag.”

²⁰ Iliganes, ipiyaves wot towen, ikikuns Yeisuw waseg.

²¹⁻²² Inounas, ineis mo ikines tawaw asteiy, Sebidiy nitun, Yemes son bwadan Yon, tasiyas sisiy times wāwag iymyeims siwot. Yeisuw idawes, mo ilisawes wag towen, ilisawes times, mo ikikuns Yeisuw waseg.

Ilabes gamag babaw

(Luk 6:17-19)

²³ Itāvin ven babaw Galiliy waseg, igeiguy buntuman tapwāloul sinagog wasigeis, livan bwanabwein isekes vagan bikakins Yowbad nakaleiwag; takatouns ivag ibweins; tasiyas abes igeg, ilabes mo ibweins.

²⁴ Tasiyas min-Siliy mo iliganes butun Yeisuw, imeyes takatouns, askatoun kweitan kweitan, ivag mo ibweins, tasiyas igidaged wous, tasiyas bwagaw neiweiys, takabalamats, taydagwegs, ivag mo ibweins asibabaw.

²⁵ Gamag babaw mo ikikuns waseg, tasiyas min-Galiliy, min-Dikapolis, min-Yelusalem, min-Yudiy, sisiyas tasiyas palata-dadan Yoldan, ikikuns waseg Yeisuw.

5

Yeisuw igeiguy wakoy

¹⁻² Yeisuw ikin gamag singay babaw, ikatulag, in wəkoy, isin, inavamul inekes, mo isilamaw nageiguy, ikatimlakes mamagina:

Tasiyas tamumwəsaws

(Luk 6:20-23)

³ “Yakamiy waninoumiy kulansa, ‘Nag aveiyag bwanabwein nises wakululuwem,’ bweina kumwəsaws, peinan bukusius Yowbad wanakaleiwag.

⁴ “Kumwəsaws yakamiy tavvəlams, Yowbad bilabeimiy mobeitout ninoumiy.

⁵ “Kumwəsaws yakamiy tammənum, igaw Yowbad mo bisekeimiy youda babaw.

⁶ “Kumwəsaws yakamiy magat biseiw nuwamiy sinap didumwal silmənin, igaw mo bivakaein wasigeis yakamiy.

⁷ “Kumwəsaws yakamiy bukusiyoubus tasiyas abes ige, Yowbad mo bisiwyoubumi yakamiy.

⁸ “Kumwəsaws yakamiy tatoukums, igaw mo bukukines Yowbad.

⁹ “Kumwəsaws yakamiy bukulabes gamag vəgan biyakousis sikameiliw sisiyas, igaw Yowbad bilivan, ‘Nitug yakamiy.’

¹⁰ “Kumwəsaws yakamiy, kukin gamag bikamliweimiy peinan amisinap didumwal, bukusius Yowbad nakaleiwag wanawan yakamiy.

¹¹⁻¹² “Kumwəsaws magat gamag bitawyageimiy, bikamliweimiy, o peinan gungamag yakamiy, siyaweid avakaein bivtokeimiy livan; bweina kumwəsaws avakaein, maysamiy bwanabwein igaw mo bukulivatus walbəlab. Məwan magin gamag nikamliwes tasiyas palopits kweiboug. Yakamiy bo məwan bikamliweimiy.

Livanen sol yayan o livanen kamnat

(Mak 9:50; Luk 14:34-35)

¹³ “Yakamiy mamagina sol silmənin ven babaw sabal-nen yakamiy. Kukin sol sabal-nen bigeg, ta-mawan bitavkek bisabal vayuwein. Peinan bo ige, misinaka bitalev bein watoulan, gamag mo bivvənisan.

¹⁴ “Yakamiy vena babaw sikamnat yakamiy. Magat wunovek ven bibunis koy wakunuwatan, makava kimnəyawl ven towen. Məwan magin gamag babaw bikines mikamnat yakamiy.

¹⁵ “Lamp nigidaged, awoum takow loutan takatugiblikununuwatan tage tasen wateibol mo bimteil bunatum, nakamnat kadilok bunatum.

¹⁶ “Məwan magin yakamiy kummitelis gamag babaw vəgan bikines miwotet bwanabwein, mo biyakawanes Tamads nises wanakaew.

Kaleiwag livanen

¹⁷ “Awoum kudokeigs ye yam tagulekwein Moses nakaleiwag o tasiyas palopit sikaleiwag, awoum. Yey nam vəgan bakatimweis sikaleiwag, bivakaein.

¹⁸ “Mounid adibakeimiy, nag kweitan sikaleiwag beikous tut towen waseg. Tut towen ven watinow son libəlab nisesus. Məwan magin tasiyas Moses siney palopits sikaleiwag bisesus ee... igaw mo bikamat anagin.

¹⁹ “Kavel yak bukulivan, ‘Kaleiwag towen kakit, bweina tanumlaves talavewas,’ yak singay bukubus Yowbad nakaleiwag waseg. Tage bukwanow kaleiwag tasiyas, bukwatimlakes gamag, igaw mo bukumwen Yowbad nakaleiwag waseg.

²⁰ “Taninuways tasiyas takatimlakeins kaleiwag sisiyas Palisiy, gamag babaw idokes asisinap bwein. Tage yakamiy amisinap bwanabwein bivakaein; waseg kwalsawes tasiyas. Kukin gog nag, taməwan bukusius Yowbad wanakaleiwag.

Kameiliw livanen

²¹ “Kukwakins tammwayas sikaleiwag kweiboug mamagina:
‘Awoum kuweiy gamag.

Kukin bukkwatinet gamag, takalleiwags mo biyateleims yak.'

²² Tage yey gunakaleiwag mamagina:

'Kukin yak bukkwamliv soum, takalleiwags mo biyateleims yak.

Kukin bukuyeg soum, tasiyas takaleiwag kawkaveks wasigeis mo biyateleims yak.

Kukin go bukuyeg avakaein, adok Yowbad bilaveim bukun wadiginasim, kov bigabum yak.'

²³⁻²⁴ "Kukin aveiyag bukukow vagan bukulun Yowbad waseg mo kunuw kavel nanon igeg waseg yak, bweina kusem mulun abeilun wadadan, kunoun, kun, kulun gamag towen waseg; beikous, mo kuyum kum, kulun Yowbad waseg.

²⁵ "Kukin kavel soum biyateleim, kadiloka waked kulun amiteiy; kukin gog nag, adok soum towen bitokeim takaleiwag to gabman waseg, gabman mo bidibek plisman, bitokeim binawein wadeil.

²⁶ "Mounid adibakeimiy, bukusesus wadeil ee... bukupayin soum beikous, mo bispuyeim bukun wamnat. Kukin gog nag, bukusesun-wan wadeil.

Livanen kaninavay mav

²⁷ "Kukwakins tammwayas sikaleiwag mamagina:

'Awoum kwanavay mav.'

²⁸ Tage yey gunakaleiwag mamagina:

'Kavel yak bukumet vin, wananoym kid bo kukwanavay soum manawen vin. Amsinap towen igeg.'

²⁹ "Kukin gog matam wamkwatay bikaleiwag mo bukukwalouw, kadiloka kugut kulev bein tanaban. Bweina kuyamkwen matam palatanok; mata ge tamkwalan mo son woum bigob wadiginasim.

³⁰ "Kukin mukwataj bikaleiwag vagan bukukwalouw, kuboub, kulev bein tanaban. Bweina palatanok namam; mata ge bukuyamkwen woum sona tamkwalan wadiginasim.

Livanen peiyaw vinay

(Matiw 19:9; Mak 10:11-12; Luk 16:18)

³¹ "Kukwakins kaleiwag kweitan mamagina:

'Kukin kal yak bukupiyev mukwav, kusek inalet mo kwayeb binoun.'

³² Tage yey gunakaleiwag mamagina:

'Kukin kal yak, nag bukutanid, tage bukupiyev mukwav, mo kuvages tasiyas bikaninavays mav son namwan teivaw.'

Livanen tabudabod

³³ "Kukwakins tammwayas kweitan sikaleiwag kweiboug mamagina:

'Awoum kutabudabod mav. Bukutabudabod, bweina kuvag mawan, daGuyaws silmanin.'

³⁴⁻³⁶ Tage yey gunakaleiwag mamagina:

'Awoum kutatabdabod, misinaka amlivan mounid kusek.

Awoum kutabudabod libalab waseg, peinan Yowbad aban.

Awoum kutabudabod ven watinow waseg, peinan Yowbad nakabvwot kaken.

Awoum kutabudabod Yelusalem waseg, peinan daGuyaws inaven.

Awoum kutabudabod kunum waseg, peinan ta-mawan bukuvkek bipwapwakaw o bigunugoun walitanok kunum, nag.'

³⁷ Kukin bukutam, misinaka kulivan, kulana, 'E!'; o kukin bukupiyev misinaka kulivan, kulana, 'Nag.' Peinan tabudabod babaw meinoy neim Seitan waseg.

Awoum kwatimapus sinap kalbaleb

(Luk 6:29-30)

³⁸ "Kukwakins tammwayas sikaleiwag mamagina:

'Soum matan nukuweiy inalug matam yak beiweiy.

Soum kudun nukwatimoun, inalug kudum bikatimoun.'

³⁹⁻⁴¹ Tage yey gunakaleiwag mamagina:

'Awoum kwatimapus sinap kalbaleb.

Kukin binep silapam wamkwatay, bweina kutouvin binep paliyuwein silapam.
 Kukin soum biyateleim bikow amukweim, bweina kusek-vak musag.
 Kukin soum bikaleiwag, bilana, "Kwanag kukow katanok veit," bweina kutam, mo kukow
 kwayuwein veit.'

⁴² Aveiyag soum bilivan, bweina kusek, o kukin soum binitoug, awoum kwayus.

Kusiwyoubus tasiyas astakameiliws yakamiy
(Luk 6:27-28, 32-36)

⁴³ "Kukwakins tammwayas sikaleiwag mamagina:
 'Kusiwyoubus taliwom, kwamliwes gog tasiyas nikamliweims yak.'
⁴⁴⁻⁴⁵ Tage yey gunakaleiwag mamagina:
 'Kusiwyoubus tasiyas nikamliweimiy; kunitougs Yowbad waseg vagan kid bilabes tasiyas
 iyagageimiy.'
 Bo mawan bukumlavags Tamads nitun yakamiy, peinan mtowen wanakaew nilabes
 takalbailebs sisiyas toubweins, kelas ivag ikal yam katanok katanok wasigeis, o kweis
 isekes asibabaw-wan.
⁴⁶ "Kukin bukuyamanes siwayoub wasigeis tasiyas nisiwyoubumi, adok nag kweitan
 laalan bukubanes, kulataxes gog simiyas tasiyas takaweins takis; peinan tasiyas iyamanes
 siwayoub wasigeis tasiyas nisiwyoubus. Mawana tasiyas, mawana yakamiy.
⁴⁷ "Kukin misinaka simiyas tawlimiyas bukumulouls, amisinap nag bitawtoun, peinan
 tobwag ven gimgilis asisinap mawan.
⁴⁸ "Kadiloka bukuyakousis sinap bwanabwein, mawan magin ansinap mtowen Tamads
 wanakaew.

6

Muloul wasigeis tasiyas tasimavs

¹ "Kukin bukumulouls wasigeis tasiyas tasimavs, awoum gamag babaw bikakins, mo
 bilansa, 'Singay tasiwayoubs tasiyas'; awoum! Magat amisinap mawan, ta-kweitan
 maysamiy bukubanes waseg Tamads, walbalab nises.
² "E, bukumulouls wasigeis tasiyas tasimavs, awoum tayikin bwagig bimgwayeimiy,
 mamagina tayyaweids tasiyas wavytakon ven o buntuman tapwoul waseg ikaypamwes
 butus, vagan kid gamag babaw bikavasis. Mounid adibakeimiy tut towen mayses ibanes,
 tage wanakougwaw bo nag.
³ "Kavel yak bukumuloul wasigeis tasiyas tasimavs, kadiloka kukwawum mumuloul;
 awoum teitan gamag bikakin.
⁴ "Mamagina kusowm mumuloul, Tamads anmwænet bikin, igaw maysam mo
 bisekeim."

Nitoug liveanen
(Luk 11:2-4)

⁵ Yeisuw ilivan, "Gamag mwasanin bo initougs Yowbad waseg, itamanaws itowas
 wabunatum yagan sinagog, o itowas wavtakon ven mo initougs; tayyaweids gog. Peinan
 sivines gamag babaw bikakins, bo kid bilansa, 'O singay tantougin Yowbad tasiyas.'
 Ivavags mav, gamag tasiyas. Mounid adibakeimiy tut towen mayses ibanes; tage igaw
 gog wanakougwaw bo nag.
⁶ "O yakamiy awoum kuvages mawan. Kal yakamiy binitoug, kadiloka beisiw
 wanbunatum waniwan, bikatibog koukwed, anmwænet bikulul wamatan Yowbad, mo
 binitoug. O Tamads bikin anmwænet ininitoug, igaw maysan mo bisek.

⁷⁻⁸ "Kukin bukunitougs, awoum kulivans mawana tamgamegs igaw dadub. Idokes kid
 bibanes youd babaw, peinan asilivan babaw, aveiyov. Awoum kunitougs mawan. E,
 bukunitougs Tamads waseg, bo ikakin nanawan aveiyag sivinamiy.

⁹⁻¹³ "Kadiloka kunitougs mamagina:
 'Timem walbalab,

Yagam bakagoul,
Mukwaleiwag beim.
Aveiyag aw-nanoum sivinam ven watinow bakavag, mawan ivvages walbalab.
Kaem bukusekem nagein.
Kunumlev makalbaleb mawan kanumlev gamag sikalbaleb wasigeis yakamey.
Awoum bukusenam abiyokon waseg.
Igaw kalbaleb waseg kwatinabwem.'

¹⁴ "Bukunumlaves o bukuwidis youd babaw wasigeis gamag tasiyas niyagegeimiy, igaw gog Tamads mo biwid amisinap kalbaleb yakamiy.

¹⁵ "Tage nag bukunumlaves o bukuwidis asisinap tasiyas niyagegeimiy, Tamads gog nag biwid amisinap kalbaleb yakamiy.

Pos livanen

¹⁶ "Igaw tutan bukopos, tapwəloul silmanin, awoum bimmayag mitamiy, awoum beivag amisinap mawan tasiyas tayyaweids, ivag mamagina siwsawoul wous, vagan gamag bikines, bilansa, 'O singay tapsapos tasiyas.' Mounid adibakeimiy, tut towen mayses ibanes, tage tut wanakougwaw bo nag.

¹⁷⁻¹⁸ "Kal yak bukopos tapwəloul silmanin, kuwid magim, kusinat, kuput; mata geg gamag bikakins, anmwanet Tamads bikakin imupos wanuwam, mtownen maysam mo bisekeim.

Liblab wuliyougwan

(Luk 12:33-34)

¹⁹ "Awoum kwatinakus miwliyoug babaw ven watinow waseg. Ven watinow wuliyougwan ipwapooup o man kekel ikamcoums, o gamag mwasanin ikaliyowes bunatum ivveinaws.

²⁰ "Tage libalab wuliyougwan bukwatinakus, nag beipoup, man nag beikoums, ta-kal biven; bwein-wan.

²¹ "Ampalawen muwliyoug kwatinok, mo biseiw nuwam ven towen.

Woun kamnat-nen

(Luk 11:34-36)

²² "Woun kamnat-nen matad. Kukin matam inakaleiwag bwein, woum mo bikamnat.

²³ "Tage kukin matam inakaleiwag kalbaleb, woum bo bidadub. O peinan mukwamnat bo idadub, woum singaya dadub.

Takaleiwag katanok

(Luk 16:13)

²⁴ "Ta-mawan gamag anmwanet bikanow ages natuwaveks asteiy; adok bikamliw natovek teitan, tayuwein gog bisiwyoub; adok bikanaway aygan teitan, tayuwein gog bipiyev. E, ta-mawan gamag bikanow ages takaleiwags asteiy, teitan Yowbad, tayuwein money. Misinaka anmwānet aygan bikanow.

Kubukub nuwn

(Luk 12:22-34)

²⁵ "Mapun adibakeimiy, awoum bikubukub nuwamiy silmanin kaemiy vagan biyamoveimiy, o silmanin amikweim vagan bukusikams. Peinan kan na-ikadilok bigimwel mwamovads, o kweim na-ikadilok bigimwel kaleivids, nag.

²⁶ "Kukines mansiyas man iyoyows wanakaew, ta-isapwes kan, ta-itayoys, ta-isenas waseigous; nag. Tamads wanakaew ituyay mansiyas man, mounid mo bitutuyeimiy yakamiy.

²⁷⁻²⁹ "Nag kavel yākoum bukuninuway mutawtoun waseg vagan ambweilim bibabaw; nag. Aveiyag wawun kuninuwes amikweim? Kukines lālan moloubaw nitatos, na-iwotets, na-ibālals, nag; tage askakin singaya bwanabwein. Mounid adibakeimiy kay kasiyas lālan ikalisow Solomon antubub.

³⁰ “Kay kasiyas nagein nitatos, nubweig beiyakous, bigob kov. Yowbad kay kasiyas isek astubub, mounid mo bisekeimiy amikweim. Adok nag kunmises bwein vagan Yowbad bimtakavateimiy.

³¹⁻³² “Awoum ninoumiy bibabaw; awoum kulansa. ‘Aveiyag bitakams? Aveiyag bitamoums? Aveiyag bitasikams?’ Tasiyas igaw dadub asisinap mawan; yakamiy awoum. Tamads gog wanakaew ikakin sivinamiy youd tasiyas.

³³ “Towen nakaleiwag bimug waninoumiy, o ansinap didumwal bimug waninoumiy, igaw aveiyag sivinamiy mo bisekeimiy.

³⁴ “Nagein kuninuways aveiyag sivinamiy nagein; nubweig mo kuninuways aveiyag sivinamiy nubweig. Yamtan yam mouvitan kweitan; kwayuwein yam mouvitan kweitan.

7

*Awoum kutawyages simiyas**(Luk 6:37-38, 41-42)*

¹ “Awoum kudibek soum, kulana, ‘Yak kalbaleb yak.’ Adok Yowbad mo bidibakeim mawan.

² “Mikaleiwag waseg bukwalawages simiyas, Yowbad mawan mo bikaliwageimiy yakamiy. Magat mukwaleiwag kalbaleb wasigeis simwey. Yowbad mo bikaleiwag mawan waseg yakoum. Kukin gog bwein. Yowbad mo bikaleiwag bwanabwein waseg yakoum.

³⁻⁵ “Adok kukin soum matan musamuson kakit nises, tage nag kukwakin amweilok avakaein wanuwan matam yak nises.

“Kulivan kid, kudibek soum, kulana. ‘O musamuson wamatam nises, bakablev’; tage amweilok avakaein matam tatoneim wanuwan nises.

“Tayyaweid yak! Kwablev amweilok towen wamatam nises. Ikous, wankuyeim mo bukukinbunik vagan bukwablev musamuson towen, soum wamatam.

⁶ “Awoum Yowbad navavag kuvgen kusekes mansiyas awuk, adok bipiyaves mo bigadeimiy. Awoum veigun kulev bwaloud waseg, mata ge bivvanis, bivatunis bikatigayay, bo bigeg.

*Nitoug livanen**(Luk 11:9-13)*

⁷ “Kunitougs, mo bisekeimiy; kuneiveis mo bukuanes. Kugipits, mo bikaliyow nakoukwed pinamiy yakamiy.

⁸ “Tasiyas gog tannitougs ikokews sivavag; tasiyas taninineivs mo bukuanes sivavag, o tasiyas taggipits, mo bikaliyow koukwed pines tasiyas.

⁹ “Adok ta-kal yak, kukin natum binitoug kan mo bukusek dakul; adok nag.

¹⁰ “Adok ta-kal yak, kukin natum binitoug in mo bukusek mwatet; adok nag.

¹¹ “Yakamiy takalbalebs yakamiy kukwakins youd bwein bukusekes nitimiyas; singay gog Tamads wanakaew bisekeimiy youd bwanabwein, magat bukunitougs waseg.

¹² “Aveiyag sivinamiy vagan gamag bivages wasigeis yakamiy, kadiloka kuvanes mawan wasigeis tasiyas. Moses siney kweiboug palopits sikaleiwag mawan.

*Koukwed kabkakit**(Luk 13:24)*

¹³⁻¹⁴ “Kusiws koukwed kabkakit waseg, peinan diginasim kidenen avakaein, awkwedan babayay, gamag babaw isowsiws, inounas waseg; tage mwamov kidenen kabkakit, awkwedan kabkakit, gamag na-ibabaws bisousiws makadewen ked.

*Amweilok anagin**(Luk 6:43-44)*

¹⁵⁻¹⁶ “Kuvnansemiy, awoum kuliganes ages palopit tasiyas tayyaweids, tasiyas igaw bisaps wasigeis yakamiy, askakin mawana sip, tage wanuwes mawana awuk nakananeiy. Igaw bukukines siwotet mo bukukwakins asisinap bwein, o nag, kalbaleb. Peinan gamag mawana kay.

“Adilaboub nag beivag gleip angin, o ayliliweis nag beivag yaveinun angin, nag.

¹⁷ “Kukin amweilok bwein, mo beivag angin bwein; kukin gog kalbaleb, mo kalbaleb angin. Mapun alana, ‘Bukukines siwotet mo bukukwakins asisinap amawan.’

¹⁸ “Ta-mawan kay bwanabwein beivag angin kalbaleb, nag. Ta-mawan kay kalbaleb beivag angin bwein, nag.

¹⁹ “Kay kasiyas nag beivag angis, bo beiteiys bilaves bein wakov.

²⁰ “Gamag tasiyas bo mawan, bukukines angis mogo kukwakins asisinap bwein, o nag, kalbaleb.

Tayyaweids

(Luk 13:25-27)

²¹ “Gamag babaw bidibakeigs, bilansa, ‘MaGuyaw yak,’ tage babaw nag beiwiws Yowbad wanakaleiwag, nag. Misinaka tasiyas takaweins ayan Tamag, nises walbalab.

²² “Igaw Yam towen waseg babaw gamag bidibakeigs, bilansa, ‘Nakageiguy yagam waseg, o nakakawsep bwagaw yagam waseg, o yagam waseg mawotet singay tawtoun.’

²³ “Yey mo bakatimop ages, balana, ‘Tobwag gamag yakamiy, kunounas, kuneis, peinan miwotet kalbaleb.’

Bunatum ankawtun

(Luk 6:47-49)

²⁴⁻²⁵ “Kal yak bukuligen aygag, bukwanow, yakooum mamagina tassinaap teitan; towen niwlul nabunatum dakul wakunuwatan. Iwlul ikous, kweis mo ikweis avakaein, yevagam ilatay, yag avakaein itow, tage nag igulek bwan towen, peinan niwlul dakul wakunuwatan.

²⁶⁻²⁷ “Kal yak bukuligen aygag, bukupiyev, yakooum mamagina takabalawein teitan, towen niwlul nabunatum walekel. Iwlul ikous, kweis mo ikweis avakaein, yevagam ilatay, yag avakaein itow, ikalouw bwan towen, singay nuwanaw angwelek.”

²⁸⁻²⁹ Iyakous Yeisuw anilivan towen, bo isom ninous tababaws tasiyas aniganeg ayan waseg, peinan tawtoun ansinap. Nag mawan tasiyas takatimlakeins kaleiwag, nag; tage Yeisuw ansinap sinap tatonen.

8

Toulepel ivag, mo ibwein

(Mak 1:40-45; Luk 5:12-16)

¹ Koy towen waseg, Yeisuw iwloubus, singay babaw gamag ibukunis.

² Toulepel teitan isineikim, ikulul, ilana, “Guntovek yak, magat sivinam, kadilokeim bukuvag kaleivig beibwein.”

³ Yeisuw isen naman wawon toulepel towen, ilana, “Bo bukubwein,” mo ibwein kaleivin towen.

⁴ Yeisuw mo idibek, ilana, “Awoum kwamtel sinap towen. Awoum teitan gamag kudibek. Misinaka kukwamat tanuwagan lun waseg, kumuloul waseg Yowbad, mawan Moses nakaleiwag; gamag bikineims, bikakins bo kubwein, mo bilansa, ‘O bo ibwein taw.’ ”

Takalikay natouwat Yeisuw ivag, mo ibwein

(Luk 7:1-10; Yon 4:43-54)

⁵⁻⁶ Yeisuw inoun in Kapaneyum, siyas Lom takanaviys sitakalikay mo inek Yeisuw, initoug waseg, ilana, “Guntovek yak, guntouwat ikatoun avakaein, nimmasis wabunatum, ta-mawan bininoun, singaya igidaged won.”

⁷ Yeisuw idibek, ilana, “Yey baw, bavag mo beibwein.”

⁸⁻⁹ Takalikay towen ikatimop ayan, ilana, “Adok nag. Peinan guyaw yakooum, o yey toul, nag kadilok bukusiw wagunbunatum. Misinaka kulivan mo beibwein guntouwat. Yey gunakaleiwag nises wasigeis guntakanaviys, teitan badibek ‘Kunoun’ mo binoun; teitan badibek ‘Kum’ mo beim; guntouwat badibek ‘Kuvag towen’ mo bivag. Kaleiwag akakin; misinaka kulivana beibwein.”

¹⁰⁻¹² Yeisuw iligen, bo isom nanon, itouvin idibakes tasiyas tabkunins, ilana, “Guma-Lom townen singay inamis vagan baleb! Ta-aban gum-Yisleil teitan inasimounid mawana taw townen. Mounid adibakeimiy ven babaw gimgilis beisiws Yowbad nakabkaleiwag waseg, peinan gamag tasiyas wanuvid sisiyas tasiyas wayavat bo beisiws bikaypuls Yowbad wanakabkaleiwag waseg, sisiyas tamumwey tasiyas Ebelam, Aysak, Yekob. Tage Ebelam tibun mwasanin Yowbad biley, bineis watoulan, dadub waseg, bivvalams o bikakikilis kumtus, peinan igeg abes tasiyas.”

¹³ Yeisuw mo idibek takalikay townen, ilana, “Bweina kunoun; musimounid waseg bo bivag mawana nanoum.” E, tut townen waseg, mo ibwein natouwat.

Takatouns babaw ivag, mo ibweins

(Mak 1:29-34; Luk 4:38-41)

¹⁴⁻¹⁵ Yeisuw mo isiw in Pita wanbunatum, ikin yawan ikatoun, itakalon won; ikabkwen naman manawen vin mo iloulun won, itamanaw manawen; ikatineg kan Yeisuw beikam.

¹⁶ Kwayav waseg mo imeyes tasiyas bwagaw nibugawus, ilivan mo ikilaves, o asibabaw takatouns tasiyas ivag mo ibweins.

¹⁷ Wotet townen kweiboug palopit Isaya ilivnek mamagina:
“Im ikow adkatouns, inow, ilavew tanaban, ivageids gog mo tabweins.”

Gamag mwasinis sivines bikabwakuns Yeisuw waseg

(Luk 9:57-62)

¹⁸ Yeisuw ikin gamag singay babaw ikatuyouns nimeis, mapun idibek nagamag, ilana, “Kadiloka tatouws, tadopels, taneis palatan.”

¹⁹ Ilivan mo im takatimlakein kaleiwag teitan, ilana, “Tamwey, bo babwakun waseg yakoum ampalawen bukunoy.”

²⁰ Iwage Yeisuw, ilana, “Awuk bulawud sikabmasis sam wanuwan leg, o mansiyas man iyoyows sibunatum nises wakamweilok; tage Gimilitoun yey ta-ivag gunakabmasis.”

²¹ Inavamul teitan idibek, ilana, “Yey babkunim, guntovek yak; tage bavtameim wanamug ga bayum ban wagunbunatum, bamtakavet tamag, igaw bikanig mo babkunim yak.”

²² Yeisuw ilana, “Awoum. Tut townen kubwakun waseg yey. Bweina takanigs tatineis bidibwanis.”

Bwaw avakaein, Yeisuw ivag mo iniwal

(Mak 4:35-41; Luk 8:22-25)

²³ Yeisuw iginitouw in wawag, navamul itouws wankuyeim, mo ikuks.

²⁴ Ikuks ee... bwaw avakaein ilivatus, kakita bimukuls; tage Yeisuw bo imasis.

²⁵ Navamul aspwayat inekes Yeisuw, iwgunis, ilansa, “Matovek yak, kukit, kwatinabweids, bo bitamukuls.”

²⁶ Ilana, “amipwayat? Adok nag kusimounids waseg yey, ne?” Mo ikit, itamanaw, ikan yag son kaysay, mo idabab, iniwal singay avakaein.

²⁷ Gamag tasiyas ikines, isom ninous, ilansa, “Taw townen kweitana gamag; yag son kaysay iliganes ayan.”

Takabalqwein ven Gadal waseg ivag mo ibwein

(Mak 5:1-20; Luk 8:26-39)

²⁸⁻²⁹ Ikuks ee... ilugs palatan, ven Gadal waseg. Gamag alugwes watakunumwan tawaw asteiy nisesus, yeiluw neiweiys, singay kapasal nuwes; nag kadilok gamag binoyes makadewen ked. Tut townen ilugs tasiyas asteiy ilisawes takunumwan, imekes, iwaks, ilansa, “Awoum aveiyag bukunuwakem yakamey, Yowbad Natun yak. Mata nuwanaw bukuyagagem yakamey.”

³⁰⁻³¹ Ikinies kadiveiyov bwaloud babaw ikamkwams awuyow. Yeiluw tasiyas igilagels, initougs Yeisuw waseg, ilansa, “Bweina kwayabem bakan bakasiw mansiyas bwaloud wasigeis, ke?”

³² Ilana, “Kuneis.” Ineis, isiws mansiyas bwaloud wasigeis, ikabalaweweins, nuwanaw isisawls, papap waseg ikalkalouws, inineis yevagam towen waseg, iwgweles.

³³ Tasiyas tamtakavateins aleis isawls, ineis waven ikəmats sinap towen, peinan yeiluw ilisawes gamag, isiws bwaloud wasigeis, iyagages.

³⁴ Misikena gimgilis asibabaw-wan mo isaps, imekes Yeisuw, initougs waseg, ilansa, “Kadiloka kunoun kulisawem.”

9

*Takatoun teitan ivag, mo ibwein**(Mak 2:1-12; Luk 5:17-26)*

¹ Mapuna itouws wəwag, ikuks, iyums, ineis Yeisuw wanven.

² Gamag mwasanin mo imeyes taw teitan ankatoun avakaein, immasis wakaban, ta-mawan binoun. Yeisuw ikakina tasiyas inamis vəgan bileb, mapuna idibek takatoun towen, ilana, “Kalin nuwag yəkoum; amsinap kalbaleb bo awid.”

³ Takatimlakeins kaleiwag mwasanin bo ikatilutegs, sisiyas illivans, ilansa, “Anilivan waseg ikaypom Yowbad ansinap; singay kalbaleb!”

⁴⁻⁵ Tage Yeisuw ikakin ninous, mapuna idibakes, ilana, “Aveiyag wawun ninoumiy kalbaleb? Bweina balivan, balana, ‘Bawid amsinap kalbaleb beikous,’ o bweina balivan-vak balana, ‘Kutamanaw kunoun.’ Wotet akweiy gagab waseg yey.

⁶ “Kadiloka kukwakins Gimgilitoun yey, o gunakaleiwag nises ven watinow vəgan bawid gamag asisinap kalbaleb, mapuna badibek taw towen bitamanaw binoun.” Yeisuw idibek, ilana, “Kutamanaw, kukow, əbam, kunoun kun wambunatum.”

⁷ Taw towen iligen, itamanaw, inoun in wanbunatum.

⁸ Gamag babaw ikines, igoulus Yeisuw, iyəkawns Yowbad waseg, peinan bo isek kaleiwag towen wasigeis gamag.

*Yeisuw idouw Matiw**(Mak 2:13-17; Luk 5:27-32)*

⁹ Yeisuw inoun in, ikin taw teitan yagan Matiw, isin wakaban, gamag isitakis ikokew; Yeisuw idibek, ilana, “Kukikun waseg yey.” Mtowen iligen, itamanaw, ibukun Yeisuw.

¹⁰ Wankuyeim ikamkwam wanbunatum, takalbalebs babaw imeis, tasiyas takaweins təkis sisiyas takalbalebs mwasanin ikaypuls sisiy Yeisuw siney navamul.

¹¹ Tasiyas Palisiy ikines, idibakes navamul, ilansa, “Aveiyag wawun mitovek ikamkwam siney takalbalebs sisiyas tasiyas takaweins təkis? Bo igak!”

¹²⁻¹³ Yeisuw iligen asilivan, ilana, “Misnaka takatouns sivines doket, toubweins nag. Kadiloka kukwakins silawun Yowbad anilivan mamagina: ‘Sivinag siwayoub; makava lun apiyev.’

Yey nam silmanin takalbalebs, awoum badawes tasiyas toubweins.”

*Pos livanen**(Mak 2:18-22; Luk 5:33-39)*

¹⁴ Yon navamul mo inekes Yeisuw, idibakes, ilansa, “Yakamey kapsapos, tasiyas Palisiy ipsapos; tage mivamul ipiyaves pos. Aveiyag wawun?”

¹⁵ Yeisuw ankabebay isekes, ilana, “Kukin kal beivays son nakwav, o taliven bineis bivages kan silmanin inakamkwam; bimwəsaws-wan; ta-mawan bivalams, nag. Tage tutan anadouw waseg, taw towen binoun, mo bivalams taliven, beipos.”

¹⁶ Ankabebay kweitan isen mamagina, “Kweim sigsagob ta-mawan bitabweil waseg kweim kweivaw; bitabweil bo bitadud avakaein.”

¹⁷ Kwayuwein ankabebay mamagina. “Awoum bitavgog kunasoup kweiboug, waseg wayn kweivaw; igaw beitol, bitavis kunasoup, biyamkwen wayn; tage kunasoup kweivaw bwein, bitavgog wayn kweivaw waseg, bo bisesun bwein, peinan tawtoun.”

*Vinay asteiy Yeisuw ivag, mo ibweins**(Mak 5:21-43; Luk 8:40-56)*

¹⁸ Igawa igeiguy wasigeis, takaleiwag teitan im, ikulul wamatan, ilana, “Natug kudəvin mwana ikanig, kum kusen namam wawan, vagan bukuyamov.”

¹⁹ Yeisuw itamanaw ibukunis taw towen sen navamul.

²⁰⁻²¹ Igaw inounas, vin natan isap watibwelon, buyavin iwtawout yam babaw, bweilim sinawatan akweiy nag beibwein. Nanon ilana, “Bo bakabkwen Yeisuw anakweim, mo babwein;” mapuna watibwelon Yeisuw ikabikon anakweim matan.

²² Yeisuw itouvin, ikin, ilana, “Kalin nuwag yakoum. Nukusimounid waseg yey mapuna bo kubwein.” Mo ibwein tut towen waseg.

²³ Yeisuw inoun in takaleiwag towen wanbunatum, ikin taykiyiks pikolel iykiyiks, tavvalam ivvalams, butus gamag singay avakaein.

²⁴ Yeisuw ikin, ilana, “Kunounas. Nag imat gwad towen, immasis-wan.” Tasiyas gog isibawes, idokes kid Yeisuw takabalawein. ²⁵ Tage Yeisuw ikayabes, ineis watoulan, mo isiw wabunatum, iyous gwad towen naman, mo itamanaw.

²⁶ Butun inawotet towen inganegs ven towen avakaein waseg.

Tawaw ikaw mites, ivag, mo ibweins

²⁷ Yeisuw inoun in, tawaw asteiy ibukunis, ikaw mites, iwkuwaks ilansa, “Yakoum Deibid tabun yakoum, kusiwyoubum.”

²⁸ Isiw wabunatum, tasiyas inekes. Yeisuw ikatiganes, ilana, “Tab kusimounids guntawtoun silmanin wotet towen?” Ilansa, “E, mawan, peinan guyaw yak.”

²⁹ Yeisuw mo ikabkwen mites, ilana, “Peinan nukusimounids waseg yey, mapuna bo bukubweins.”

³⁰ Mo ilal mites. Anilivan tawtoun isekes, ilana, “Awoum kwamteles sinap towen.”

³¹ Tasiyas gog, mo inounas ikamats, vena babaw wasigeis.

Taw teitan anilivan wadadan-wan ivag, mo ibwein

³²⁻³³ Yeisuw siney navamul inounas ineis, gamag mwasanin mo imeyes taw teitan takakon, bwagaw neiweiy anilivan wadadan. Bwagaw towen Yeisuw ikayeb mo ikilev, gamag towen mo ilivan bwein. Gamag babaw ikines, bo isom ninous, ilansa, “Sinap kweitan-wan. Kweiboug nag takines wadavanuys, min-Yisleil yakids, peinan kweivaw sinap towen, tawtoun.”

³⁴ Tasiyas gog Palisiy, ilansa, “Natawtoun, peinan Seitan ileb, Seitan siyas bwagaw sitovek. Seitan ileb mo ikayabes bwagaw.”

Yeisuw inok nuwan

³⁵ Yeisuw itavon ven katanok katanok wasigeis, sisinagog wasigeis ikatimlakes gamag, Yowbad nakaleiwag bwanabwein livanen isekes tasiyas, o takatouns katanok katanok ivages mo ibweins.

³⁶⁻³⁸ Ikin gamag singay babaw mo inok nuwan, peinan kululuwes isiwsawoul, peinan bo ilassulis ked, mawana sip; o ta-kal bimgwayes. Mapuna idibakes navamul, ilana, “Kan babaw bo imatuw, asteiyuy bitayoys; kunitougs daGuyaws Yowbad vagan kid bikayabes tawtotets bilabeids kid mo bitatayawes inabag towen.”

10

Isekes siwotet navamul sinawatan teiy

(Mak 3:13-19; Luk 6:12-16)

¹ Yeisuw mo idawes navamul sinawatan teiy, imeis, mo isekeks sikaleiwag vagan bwagaw bikayyabes, o takatouns bivages beibweins, askatoun kweitan kweitan waseg.

²⁻⁴ Tasiyas sinawatan teiy takaweins livanen Yeisuw yiges mamagina:

Saymon, yagan kwayuwein Pita;

Saymon bwadan Andiluw;

Yemes, mtowen Sebediy natun;

Yemes bwadan Yon;

Pilip son Batolomiw;

Tomas son Matiw, mtowen takawein täkis;
Yemes, mtowen Alpiyow natun, son Tadiw;
kweitan gum-Kenan yagan Saymon,
son Yudas Iskaliyot, mtowen tasikodein Yeisuw.

Yeisuw ikayabes navamul, bineis iwolets

(Mak 6:7-13; Luk 9:1-6)

⁵⁻⁶ Tasiyas sinawatan teiy Yeisuw ikayabes silmanin nawotet; iguyes, ilana, “Misinaka kunekeś sidayas min-Yisleil, mtasiyas ikankanigs peinan ilassulis ked. Awoun kunekeś tobwag ven gimgilis tasiyas ages kweitan; awoum bukuneis ven Samaliy waseg; awoum.

⁷ “Igaw bukunounas, kuguyes gamag, kulansa, ‘Yowbad nakaleiwag kakita bisap.’
⁸ Takatouns kuvages beibwein; takanigs kuymoves; tasiyas toulepel kuvages kalivis beibwein, bwagaw kwayabes binounas bineis tanäban. Peinan Yowbad nisiwyoubumiy, bweina kusiwyoubus tasiyas.

⁹ “Money awoum kuklawes, goul dakul, o silib dakul, o kopa dakul; awoum. ¹⁰ Awoum kunamiy kuklawes waked. Amikweim mwayntanok kusikams; awoum mwaynatan kuklawes; misandol awoum; mikaytuk awoum. Peinan wotet towen bukuklawes, kaeimi mo bukubanes, maysan wotet.

¹¹ “Amata ven waseg bukuneis, kwtugwans gamag wasigeis kavel ansinap bwanabwein, mo kusiw wanbunatum, kusesus ee... mo kunounas.

¹²⁻¹³ “Aw-bunatum bukusiws waseg, kumulouls wasigeis tasiyas, mo livan siwäyoub kusekes. Kukin asisinap bwanabwein, mo bimwasaws tasiyas; kukin gog nag, livan towen bwanabwein mo beiyum wasigeis yakamiy. ¹⁴ Kukin bipiyaveimiy o bipiyaves amilivan, igaw bukulawes ven towen kwatsapis kikeimiy musamusun bein ven towen, mo bikakins asisinap kalbaleb.

¹⁵ “Kweiboug Yowbad iweiys min-Sodom, min-Gomol peinan asisinap kalbaleb; tage wunsiyas ven ipiyaveimiy asisinap singay kalbaleb. Igaw tutan Yowbad bikatukin, kalamwey-nen beiweiys min-Sodom, min-Gomol, tage singaya-wan beiweiys wunsiyas ven nipiylaveimiy.

Gamag mwasanin igaw mo bikamliwes

(Mak 13:9-13; Luk 21:12-17)

¹⁶ “Akayabeimiy silmanin wotet towen. Igaw bukuneis, bukunekes babaw gamag bikamliweimiy. Yakamiy mamagina mansiyas sip tage tasiyas mamagina awuk bulawud biyagageimiy. Kadiloka kuvages amisinap bitawtoun, o kuymanuts mamagina bwabun yakamiy.

¹⁷⁻¹⁸ “Kumtakavateimiy, peinan gamag biyateleimiy yätal avakaein waseg, o sisinagog wasigeis biwaweimiy vatul waseg; biyateleimiy wamtes tasiyas takaleiwags kavkaveks, o king mwasanin wamtes, peinan gungamag yakamiy; mo bukukwamats livaneig. Tasiyas binganegs, sisiyas tobwag ven gimgilis.

¹⁹⁻²⁰ “Igaw biyateleimiy yätal avakaein waseg, awoum ninoumiy bibabaw, awoum kuninuways amawan bukulivans; peinan yätal wanuwan, amilivan tawtoun Yowbad mo bisekeimiy. Nag tatineimiy bukulivans, peinan Tamads Kululuwan bikatipel ansinap, anilivan waseg bukulivans.

²¹ “Tut towen wanakougwaw, tuwan bisilkod bwadan, vagan takaleiwags bikatimates, o taman bisilkod natun vagan takaleiwags bikatimates; o nitsiyas bipiyaves sikaleiwag timsiyas insiyas, bisilkodes vagan gamag mwasanin bikatimates. ²² O peinan kuklawes yagag yey, gamag babaw mo bikamliweimiy yakamiy. Kukin gog bukusimkines gunawotet waseg, igaw mo bukusesus bwein.

²³ “Kukin gamag mwasanin biyagageimiy ven kweitan waseg, kusawls, kuneis kweitan ven. Mounid adibakeimiy, igaw vena babaw Yisleil waseg, bukutitavins ee... Gimilitoun yey mo bayum bam, tage yakamiy igaw-wan; nag bukuyakousis.

²⁴⁻²⁵ “Navamul awoum bimgwey natakatimlakay waseg; natouwat awoum bikaleiwag natovek waseg. Tage gunavamul yakamiy mawan mitakatimlakay yey, o guntouwat yakamiy mawan mitovek yey. Bo idokeigs baloum yey, singay bo bitawyageimiy, peinan gungamag yakamiy.

Livānen pwāyat

(Luk 12:2-9)

²⁶ “Awoum kuwenes gamag tasiyas. Sinap babaw gamag mwasanin nikawwumes, tage igaw gamag babaw mo bikines kamnat waseg, bikakins.

²⁷ “Sinap bo akatamwālag boug waseg, nukuliganes, vagan bukugeiguis wavytakon ven, wudayam waseg.

²⁸ “Awoum kuwenes tasiyas bikatimates kalivimi, peinan nag kadilok bikatimates kululuwami. Tage kadiloka kuwenes towen biyageg kululuwami son kalivimi wadiginasim, ven to kalbaleb waseg.

²⁹⁻³¹ “Adok maysan skwāsik mwanay misinak kweinim toya, tage mwanatan beimat Tamads mo bikakin. Kunukun babewein Tamads bo ivin babewein wakunuds; ansinap tawtoun, bo kadiloka bimtatavateimiy. Awoum kuwenes gamag tasiyas, peinan Tamads imtakavatemiy; maysamiy singay imug mansiyas skwāsik wasigeis.

³² “Kal yak bukwamtel wamtes gamag, bukulana, ‘Yey Yeisuw nagamag yey’, igaw mo bakamtel wamatan Tamag wanakaew, balana, ‘Towen gungamag tonen.’ ³³ Kukin gog kavel yak bukwayaneig wamtes gamag, yey mo bakayaneim wamatan Tamag wanakaew.

Niwal nag, tage naviy silmanin

(Luk 12:51-53; 14:26-27)

³⁴ “Awoum kunuways yey nam ven watinow niwal silmanin; niwal awoum, tage naviy silmanin. ³⁵⁻³⁶ Yey nam vagan magaltawaw mwasanin bivatays wasigeis timsiyas, o magalvinay bivatays wasigeis insiyas o wasigeis yiwsiyas, peinan gamag taliven bo bikamliwes.

³⁷ “Kal yak kusiwyoubus avakaein tamam son inam, tage yey kusiwyoubug kakit, nag kadilok bukusesuna gungamag yakoum. Kal yak kusiwyoubus avakaein nitum, tage yey kusiwyoubug kakit, nag kadilok bukusesuna gungamag yakoum.

³⁸ “Kadilok bukukow amklos, bukwabkunig vagan mo bukukwanig; tage kukin bukupiyev, nag kadilok bukusesuna gungamag yakoum.

³⁹ “Kukin bukwayus mwamovam, bo biyamkwaneim; kukin gog biyamkwen mwamovam peinag yey, igaw mo bukubānes.

Maysamiy

(Mak 9:41)

⁴⁰ “Kukin kal beitam waseg yak, mamagina bo item waseg yey; mo item-vak waseg Yowbad, peinan Yowbad nikayabeig nam.

⁴¹ “Kukin kal yak bukwaveyon waseg palopit teitan, peinan palopit towen, mogo palopit maysan bukukow. Kal yak bukwaveyon waseg tadiendumwal, peinan tadiendumwal towen, mogo maysan tadiendumwal bukukow.

⁴² “Kal yak bukusiwyoub kakit teitan gwad waseg, peinan gunavamul towen, mamagina kwavtanok anasoup bukusek, mounid adibakeim maysam nag biyamkwen.”

Yon ikayeb navamul inekes Yeisuw

(Luk 7:18-35)

¹ Yeisuw anilivan towen, imulis nagamag tasiyas sinawatan teiy. Imulis ikous, inoun in ven babaw, ikitimlakes gamag babaw, igeiguy.

²⁻³ Misumkwey towen Yon nises wadeil, mtowen tabibaptaysein gamags, butun Yeisuw inawotet iligen, ikayeb navamul mwasanin inekes Yeisuw, ikitugans, ilansa, “Yowbad

bikayeb Mesay beim, mtowen yakoum? o nag? tabta teitan bakakayamat igaw beim wankuyeim?”

⁴⁻⁶ Yeisuw ikatimop asilivan, ilana, “Kuneis, kwatimlakes Yon sinap towen nukukines o kuliganes; magina toukwaws mites bo ikiplal, takagayals bo inounas bwein, toulepels bo ibwein kalivis, tasiyas ituy tiges bo iliganes livan, takanigs bo ikits mwasanin, o tasiyas tasimavs inganebs Yowbad anilivan bwanabwein. Kal yak bukusimounid gunawotet waseg, tage ta-kupiyaveig, igaw mo bukumwasaw.”

⁷ Iyums tasiyas, Yeisuw mo ikatiganes gamag babaw peinan Yon, ilana, “Kweiboug kuneis wanawoud, aveiyag silmanin bukukines? Bukukines kay iguwen yag, ne?

⁸ “O bukukines gamag teitan anakweim mwaynamnabwein ne? Nag, adok tasiyas nisesus guyawaw wasibunatum.

⁹ “Tage, kuneis kukines palopit teitan. Mounid mtowen Yon nimgwayes palopit wasigeis.

¹⁰ “Peinan liveñen Yon nises, magina Yowbad anilivan nidibek Mesay, palopit mo ilel Bukitab waseg mamagina:

‘Akayeb guntouwat bimgwayeim, bikidumwal muked beibwein.’”

¹¹ Yeisuw mo ilana, “Mounid adibakeimiy nag kal nikop ven watinow ikalsow mtowen Yon, peinan Yon ikalsawes gamag babaw; tage Yowbad nakaleiwag kweivaw waseg asibabaw ikalsawes Yon.

¹² “Misiyamun Yon inawotet waseg, tasiyas tatawtouns sivines Yowbad nakaleiwag, isilamaws sitawtoun waseg iyyousis ee... nagein bo mawan.

¹³ “Tut kweiboug Moses nakaleiwag o tasiyas palopit, Yowbad nakaleiwag isekes gamag wasigeis ee... wankuyeim mo isap Yon.

¹⁴ “Kukin sivinamiy bukuliganes agulivan towen mo bukukwakins kavel Yon. Town Ilayti vagan bikidumwal Mesay inaked, mtowen mounid Yon.

¹⁵ “Yakamiy tigamiy sam bweina kuliganes.”

¹⁶⁻¹⁷ Yeisuw mo ilivan, ilana, “Amawan bakabebay mo bukukwakins amisinap? Adok yakamiy mamagina gamagal iwliwals wavtakon ven, idibakes sisiyas, ilansa, ‘Kawayay kup, tage nag kusilasals; ikous mo kalloupid, tage nag kuvalams.’

¹⁸⁻¹⁹ “Peinan Yon isap, nag ikamkwam; na-imoum wayn, mo kulansa, ‘Takabalawein towen, peinan baloum iweiy.’ Gimilitoun yey mo asap, akamkwam, amwamoum, mogo kulansa, ‘Tagovek towen, o tamwamwein wayn towen, ikaveiyons siney takalbalebs o tasiyas takaweins takis.’ Ga bukukines aw-wotet bwein, mo silawun bukukwakins, sinap tonen.”

Yowbad bimop ven mwasanin asisinap kalbaleb

(Luk 10:13-15)

²⁰ Ven mwasanin nikines Yeisuw nawotet tawtoun, tage nag ipiyaves asisinap kalbaleb, mapun Yeisuw mo ikanes, ilana:

²¹⁻²² “Kuvalams yakamiy Kolesin o yakamiy Beteseid. Magat kweiboug tasiyas Tayil o tasiyas Sidon bikines mulin naman Yowbad mawana gunawotet nukukines nagein, nuwanaw mo bisimounids, bipiyaves kid asisinap kalbaleb, sona koun sewed bivalams-wan peinan asisinap kalbaleb, mo bipiyaves. Yakamiy gog nag. Mounid adibakeimiy igaw tutan Yowbad bimop vena babaw asisinap, tasiyas bilivatus sikalbaleb kakit, yakamiy gog avakaein.

²³⁻²⁴ “O yakamiy-vak Kapaneyum bukumwens kid wanakaew; nag gog, bukubus watinow, bukuneis waTum. Magat kweiboug tasiyas Sodom bikines mulin naman Yowbad, mawana gunawotet nukukines, mo bivages asisinap kweitan, Yowbad nag beiweiys tasiyas, bisesus ee... tut towen bisigagas. Mounid adibakeimiy igaw tutan Yowbad bimop vena babaw asisinap, tasiyas Sodom bilivatus sikalbaleb kakit, yakamiy gog avakaein.”

Yeisuw ansinap kweitan

(Luk 10:21-22)

²⁵⁻²⁶ Tut gog towen Yeisuw initoug, idibek Taman, ilana, “Tamag yákoum, libálab natovek o ven watinow natovek yákoum. Kalin nuwag yak peinan nukusowm sinap tatonen. Tasiyas tassinaps nag bikakins, tage kukwatimlakes tasiyas mamagina gamagal; mo ikakins tasiyas. Peinan kaleiwag bwein wananoum.”

²⁷ Yeisuw mo ilivan, ilana, “Tamag bo itam youd babaw waseg Natun yey. Tamag anmwānet ikakin Natun yey; o yey agumwanet akakin mtown Tamag. Igaw, kalisyi beivag sivinag mo bakatimlakes; e, tasiyas mo bikakins Tamag.

²⁸ “Yakamiy kunamiy moumouvit o miwotet moumouvit, kumeis waseg yey, mikabiyeiwas silmanin.

²⁹ “Kumeis, kulabeigs kwanag waseg, mo bukukwawes agusinap yagan manum; kululuwamiy mo bibanes sikabiyeiwas.

³⁰ “Peinan kid kwanag gagab, gunawotet bwein.”

12

Yeisuw takaleiwag yam tapwaloul waseg

(Mak 2:23-28; Luk 6:1-5)

¹ Misumkwey towen Yeisuw siney navamul inoyes kweitan ked wanuwan bag, yam tapwaloul waseg; navamul asimoun, ilapes wit anagin, ikams.

² Tasiyas Palisiy ikines, idibakes Yeisuw, ilansa, “Kukin muvamul, nag igoulus Sábat.”

³⁻⁴ Yeisuw ilana, “Adok nag kukwakins livanen Deibid, nises Bukitab wanuwan. Peinan asimoun siney nagamag, isiws Yowbad wanbunatum, ikams bled towen nises Yowbad wamatān. Tanuwgwas lun bo ikitibomes bled towen. Na-ikadilok Deibid beikam; nagamag-vak nag beikams; misinaka tasiyas tanuwgwas lun. Tage tanuwagan lun isek Deibid sen nagamag, mo ikams, peinan singaya asimoun.

⁵ “O adok nag kuvinis Moses nakaleiwag, peinan Sábat waseg tasiyas tanuwgwas lun iwotets lun, Yowbad wanbunatum, tage nag ivag asisinap kalbaleb.

⁶ “Gunakaleiwag towen kweivaw imug-wan Yowbad nabunatum waseg.

⁷ “Livan nises Bukitab waseg, ‘Makava lun apiyev; sivinag kid siwayoub.’ Magat bukukwakins Yowbad anilivan towen, adok nag bukuygages tasiyas toubweins.

⁸ “Peinan Gimilitoun yey, Sábat tanuwagan yey.”

Sábat waseg Yeisuw ileb teitan, naman ipam

(Mak 3:1-6; Luk 6:6-11)

⁹ Yeisuw ilisawes, inoun, isiw sisinagog silmanin tapwaloul.

¹⁰ Sinagog wanuwan teitan nises, naman ipam. Tasiyas sivines biyateles Yeisuw, ikitiganes, ilansa, “Tab kadilok bitavag takatouns beibweins, Sábat waseg?”

¹¹⁻¹² Iwage Yeisuw ilana, “Adok nag teitan yakamiy álen sip bikalivatow bein wáleg Sábat waseg, bilivan, bilana, ‘Deisa bisiw, peinan Sábat.’ Adok nag. Adok biyous, bikatinob, ne? E, gamag singay imgwayes wasigeis aleimiyas. Mapun bweina bitaleb sod Sabat waseg.”

¹³ Yeisuw mo idibek taw towen, ilana, “Kusayel namam palawen neipam.” Iyasel mo ibwein, mawana paliyuwein.

¹⁴ Siyas Palisiy bo igeg ninous, isaps, illivans sisiyas, sivines kid biyagages mtown Yeisuw.

Yowbad natouwat

¹⁵⁻¹⁶ Yeisuw ikakin ninous, inoun in. Gamag babaw ibwákuns Yeisuw waseg; takatouns ivag mo ibweins; idibakes, ilana, “Awoum kwamteles youd towen; awoum!”

¹⁷⁻¹⁸ Mo ikamat Yowbad anilivan palopit towen Isaya nilivnek mamagina: ‘Kukines guntouwat, bo adouw silmanin gunawotet.

Singay ikalin nuwag mtown.

Basek kululuwag, mo bisek nakaleiwag didumwal, ven babaw wasigeis.

¹⁹ Nag biwkuwak, nag bikamniman, gamag nag biliganes aygan wavytakon ven, nag.

²⁰ Kaytuk isasal, nag biwut bilev, nag.
 Wodam nakagidaged kalbaleb, nag bisuwmet, nag.
 Igaw nawotet waseg sinap didumwal mo biton.
²¹ E, tobwag ven gimgilis binmises vagan mtowen bilabes.'

*Ivtokes livan Yeisuw
(Mak 3:20-30; Luk 11:14-23; 12:10)*

²² Wankuyeim itokes teitan gamag, baloum neiwei, imeyes Yeisuw waseg, ankatoun mamagina ikaw matan, o wadon ikapet; ta-mawan bikapwageg bilivan. Inekes Yeisuw, ivag mo ikilev, bo ibwein gamag towen, ikin, ilivan bwanabwein. ²³ Gamag babaw ikines, bo isom ninous, ilansa, "Adok mtowen Deibid tabun, Mesay."

²⁴ Siyas gog Palisiy iliganes, mo ivtokes livan, ilansa, "Siyas baloum sitovek Seitan mtowen ileb Yeisuw, mo ikayabes baloum."

²⁵ Yeisuw ikakin ninous, mapuna idibakes, ilana, "Kukin bod avakaein tawtoun nises; tage bod to gimgilis bikavikuns sisiyas; bilivis, bo beigwey bod towen, beikous. O ven o kum mawan, kukin gamag bilivis bivages bod babaw, bo beigwey ven towen o kum towen.

²⁶ "Mapuna kuninuways Seitan inabod, kukin Seitan bilabeig mo bakayeb Seitan natouwat tasiyas baloum, mogo Seitan inabod bilivis, bo beikous nakaleiwag tonen. Tage nag.

²⁷ "O kuvtokeigs livan, kulansa, 'Seitan ileb mo ikayabes baloum,' o kal ilabes mivamul mo ikayabes baloum? Kuninuways asisinap tasiyas mo bukukwakins bo ibol amilivan.

²⁸ "Kukin gog Yowbad Kululuwan bilabeig mo bakayeb baloum, mapuna Yowbad nakaleiwag bo isap wasigeis yakamiy.

²⁹ "Kweitan sinap kuninuways: Ta-mawan bitasiw tawtoun gamag wanabunatum mo bitaven navavag. Deisa bitayous taw towen, tayawen naman, kaken, vagan nag binoun, mo bitaven navavag, tayakousis.

³⁰ "Kukin kal nag bilabeig gunawotet waseg, gamag towen isilbwed gunawotet. O kalisiy nag bikatikunakus wagunseigous, tasiyas gog bikatigayes.

³¹ "Mapun adibakeimiy, amisinap kalbaleb o amilivan kalbaleb Yowbad biwid babaw beikous; tage kweitan sinap nag. Magat bukuyeg Yowbad Kululuwan, nag biwid sinap towen, nag.

³² "Kukin bukutawyageig Gimilitoun yey, Yowbad biwid amsinap towen; tage bukutawyeg Yowbad Kululuwan Bwanabwein, Yowbad nag biwid, tut towen nag, o tut wanakougwaw nag.

*Kay anagin
(Luk 6:43-45)*

³³ "Magat kay bwein, anagin bwein. Magat kay kalbaleb, anagin kalbaleb. Takin anagin mo takakin kay amawan, bwein o kalbaleb.

³⁴ "Yakamiy takalbalebs magina mwatet yakamiy, ta-mawan bukulivans bwein, peinan ninoumiy kalbaleba singay; mapun amilivan kalbaleb.

³⁵ "Tasiyas toubweins asisinap bwein, mapuna siwotet bwein; tage tasiyas takalbalebs asisinap kalbaleb, mapuna siwotet kalbaleb.

³⁶ "Kukin bukulivans mav, Yowbad mo biyateleimiy, igaw tutan bikatukin sinap babaw gamag wasigeis.

³⁷ "Magat amilivan bwein bo bukunounas bwein, o kukin gog amilivan kalbaleb mo bukulivatus kalbaleb."

*Gamag mwasanin sivines bikines naman mulin
(Mak 8:11-12; Luk 11:29-32)*

³⁸ Wankuyeim takatimlakeins kaleiwag mwasanin sisiy tasiyas Palisiy mwasanin idibakes Yeisuw, ilansa, "Tamwey, sivinem namam mulin bakakin, mo bakasimounid waseg yak."

³⁹⁻⁴⁰ Yeisuw ikatimop, ilana, "Kalbaleb gamag, tapiyaveins Yowbad yakamiy, sivinamiy bukukwakins namag mulin. Nag kweitan sinap bukukwakins; misinaka sinap towen,

peinan palopit towen kweiboug Youna nises uloulas wanuwan, yam kweitoun o boug kweitoun, mawan yey Gimgilitoun yey bo basesun pwepway wanuwan, yam kweitoun o boug kweitoun.

⁴¹ “Min-Ninavek igaw mo bitamanaws yatal waseg, bilivans vagan bukukwakins amisinap kalbaleb, gudwouvaws yakamiy. Peinan tasiyas iliganes Youna nageiguy mo ilaves asisinap kalbaleb; tage kaleiwag nagein nukuliganes ikalsow Youna nageiguy. Kuliganes; nag gog, nag kulaves amisinap kalbaleb.

⁴² “Igaw tutan Yowbad biyat al wasigeis gamag babaw, mo kwin manawen kweiboug inaven wayals mo bilivan vagan bukukwakins amisinap kalbaleb, gudwouvaws yakamiy. Peinan manawen kwin inou in singay kadiveiyov vagan biligen Solomon ansinap; tage sinap towen nagein nukuliganes ikalsow Solomon ansinap waseg.

Gamag ibwein mo ilivet kalbaleb singay

(Luk 11:24-26)

⁴³⁻⁴⁵ “Magat yeiluw bikilev gamag, mo bitavon ven babaw, binineiv nakabiyeiwas. Binineiv nag, bilivan bilana, ‘Bayum ban wagunbunatum to nalisow.’

“Beiyum biban nabunatum makaw, bo itaneivis, youd babaw bo ilivkases bwein; bikalin nuwan, bein ikin siney teinim teiy asisinap singaya kalbaleb, tasiyas asibabaw mo beisiws wabunatum, bisesus bisigagas. Kweiboug gamag towen nakalbaleb peinan yeiluw neisiw, tage nakabiyokous waseg singaya kalbaleb. Gudwouvaws yakamiy mikalbaleb bukulivatus mawan.”

Yeisuw taliven

(Mak 3:31-35; Luk 8:19-21)

⁴⁶ Yeisuw igawa ilivan gamag wasigeis, inan budan itamanaws watoulan gamag babaw, sivines binekes, bilivans sisiy Yeisuw.

⁴⁷ Teitan ilana, “Inamwa budam nitatos watoulan.”

⁴⁸⁻⁴⁹ Yeisuw idibek taw towen, ilana, “Kuninuways kalisiy inag budag,” mo ikatimlek navamul tasiyas nitatos wadadan, ilana, “Mtasiyas-one inag o budag.

⁵⁰ “Kal yak bukukow nanon Tamag walbalab, mounid yakoombwadag o nagut o inag.”

13

Talavein veitun

(Mak 4:1-9; Luk 8:4-8)

¹ Yam towen Yeisuw ilisow nabunatum, iwloubus in wakawalaw, isin.

² Gamag singay babaw inekes, mapuna itouw wawag, isin. Babaw gamag itamanaws itowas wakawalaw. Yeisuw itouvin, ikines gamag babaw, mo ilivan.

³ Tage ansinap babaw-wan livan kabebay waseg isekees gamag tasiyas, ilana, “Teitan taw in wabag ilivelov veitun.

⁴ “Mwasanin ikalkalouw ininein wa^ked, man imeis ikamkwams veitun towen wa^ked.

⁵⁻⁶ “Mwasanin ininein wadikudakul, pwepway nag mananan; nuwanaw isob peinan pwapwayein kakit-wan, tage ivag kalas mo iyag, peinan gidwalin nag beisoul mananan.

⁷ “Mwasanin sisiyas awuyow veitun in wapwepway. Awuyow isobs, ivkuva^kaein, mapuna kan igwey.

⁸ “Mwasanin gog ininein pwepway bwanabwein waseg, isob, ivag anagin bwein, mwasanin lakututan, mwasanin sinawanim, mwasanin sinawatoun.

⁹ “Yakamiy tigamiy sam bweina kuliganes.”

Silawun kabebay

(Mak 4:10-12; Luk 8:9-10)

¹⁰ Wankuyeim gog Yeisuw navamul inekes, ilansa, “Aveiyag silawun mukwabebay wasigeis tasiyas?”

¹¹ Yeisuw ikatimop ages, ilana, “Yowbad itam, sinapun libalab kaleiwag-nen isekeimiy; tasiyas gog nag.

¹² “Kalisiy yakamiy amisinap nises, igaw amisinap bikatimweis, bivakaein; tasiyas gog nag, bo bikow asisinap tasiyas, makava bisesus.

¹³ “Mapuna akabebay wasigeis tasiyas, mo bikines tage nag biwtusis, o bikatiliganes tage nag biliganes bunik vagan bikakins, nag.

¹⁴ “Kweiboug palopit Isaya anilivan bo ikons tasiyas; anilivan mawan:
‘Bukuliganes tage nag bukukwakins.
E, bukukines tage nag bukuwtusis.

¹⁵ Peinan ninous gamag tasiyas bo imouvit;
bo ituy tiges;
bo ikaw mites;
mata ge mites waseg beikins,
o tiges waseg beinegs,
bikakins, mo bikanavin ninous,
bavages kid beibweins tasiyas. Nag gog.’

¹⁶ “Yakamiy bwein, mitamiy ikin, tigamiy ineg.

¹⁷ “Mounid adibakeimiy kweiboug palopit babaw sisiyas tadiumwals sivines bikines sinap towen nagein nukukines, o biliganes kaleiwag towen nagein nukuliganes; sivines kid, tage nag.

Silawun ankabebay towen talavein veitun

(Mak 4:13-20; Luk 8:11-15)

¹⁸ “Kadiloka kuliganes silawun kabebay towen talavein veitun.

¹⁹ “Veitun tasiyas ininein waked mamagina gamag tasiyas iliganes Yowbad nakaleiwag, tage nag bikakins, towen takalbaleb mo bisap, bikow livan towen nises waninous, binow.

²⁰⁻²¹ “Veitun wadikudakul mamagina gamag tasiyas iliganes livan towen, isimounids, imwəsaws waseg, ee... bimwemway nen, gidiwlis nag beisoul manan, gamag mwasanin biyages livanen Yowbad, biyagages tasiyas takaweins Yowbad anilivan, mo bikalkalouws gamag tasiyas.

²² “Veitun tasiyas sisiyas awuyow, mamagina gamag tasiyas iliganes livanen Yowbad, mo inuwes youd babaw ven watinow, sivines kid biguyaws, mo ilisawes ked bwanabwein, mapuna Yowbad nakaleiwag igwey wasigeis tasiyas, nag ivag angis.

²³ “Tage veitun tasiyas pwepway bwanabwein waseg, mamagina gamag tasiyas iliganes livan, ikakins mo ivag angis, teitan lakatutan, teitan sinawananim, teitan sinawatoun.”

Kabebay wit son awuyow

²⁴ Vayuwein Yeisuw ikabebay, idibakes, ilana, “Bakabebay mo bukukwakins Yowbad nakaleiwag; peinan mawana gamag isop veitun bwanabwein wanabag.

²⁵ “Wankuyeim boug waseg, gamag babaw bo immasis, teitan nikamliw tagnibag im wanabag isop awuyow magin mawana kan, tobwag gog. Mo iyum in.

²⁶ “Igaw tut wankuyeim iwuw anagin mo ibanes awuyow tobwag waseg.

²⁷ “Nagamag inekes tagnibag, ilansa, ‘Tamwey, adok muveitun bwein nitasapwes, avanuy meinoy neim awuyow towen kalbaleb?’

²⁸ “Tamwey ilana, ‘Adok towen nikamliweids!’ Nagamag ilansa, ‘Tabta bakan kagut awuyow siyas?’

²⁹⁻³⁰ “Ilana, ‘Nag. Adok bukugutes mwasanin kan sona bukugutes sisiyas awuyow. Babaw bisesus, bimatuw kan, mo badibek tasiyas tatayaweins kan, balana: Wanmugwana awuyow kugutes kwatikunakus, kusinaves, kuklawes, kunawes, kugabus; ikous; mo kan kutayoys, kwatikunakus kunawes wagunseigous.’ ”

Kabebay akweiy, tipol, yist

(Mak 4:30-32; Luk 13:18-21)

³¹⁻³² Kwatounun kabebay isekes, ilana, “Bakabebay mo bukukwakins Yowbad nakaleiwag; peinan mawana veitun kay yagan tipol, gamag isop wanabag, veitun gog singay kekel, tage isob kay kaywen, mo ivakaein, man iyoyows imeis iwlules sibunatum wayayagein, kay-nen avakaein.”

³³ Kwavasin kabebay isekes, ilana, “Bakabebay mo bukukwakins Yowbad nakaleiwag; peinan mawana yist, natan vin ikow yist kakit, isen wanuwan pwalaw kwavitoun, tamkwalan mo ilol.”

*Tut babaw Yeisuw ikabebay
(Mak 4:33-34)*

³⁴⁻³⁵ Sinap tasiyas babaw Yeisuw isekes nakabebay waseg; nag kweitan livan kamnat isekes gamag babaw, nag. Tut towen waseg bo ikamat palopit anilivan towen nilivnek mamagina:

‘Gunakabebay balivan;
magina bakamat sinap misikena kweiboug nikawum.’

Silawun kabebay wit son awuyow

³⁶ Anilivan ikous, ilisawes gamag babaw, inoun in wabunatum. Navamul mo inekes Yeisuw, ilansa, “Kwamtilakem silawun kabebay awuyow wabag.”

³⁷ Yeisuw mo ilik, ilana, “Talavein veitun bwanabwein yey, Gimgilitoun yey.

³⁸ “Abeibag ven towen watinow; veitun bwanabwein, tasiyas itams Yowbad nakaleiwag waseg; awuyow veitun towen takalbaleb inagamag.

³⁹ “Mtowen takammeiliw nisop awuyow, mtowen Seitan; tutan tayoy, nakabiyokous tut; tatayaweins kan tasiyas Yowbad natakyob.

⁴⁰⁻⁴² “Nakabiyokous tut mamagina bikatikunakus awuyow bigabus, peinan Gimgilitoun yey bakayeb min-libalab, gunakabkaleiwag waseg bikatikunakus tasiyas takalbalebs sisiyas tapiyaveins sinap bwein, bilaves bineis kov avakaein waseg, mapuna tasiyas bivvalams-wan, peinan abes singay kalbaleb.

⁴³ “Tut towen wanakougwaw tasiyas tadtidumwals bikannats mawana kelas, wanuwan Tamads nakabkaleiwag. Yakamiy tigamiy sam bweina kuliganes.”

Kabebay kweitoun

⁴⁴ Yeisuw mo ilana, “Bakabebay mo bukukwakins Yowbad nakaleiwag; peinan mawana money singay babaw teitan gog gamag bisown wanabag, bises ee... mo bikanig. Igaw gog kweitan gamag mo biban money towen, bisowm vayuwein, biyamiyis navavag babaw, maysan bikow, bigimwel pwepway towen, singay bikalin nuwan peinan namoney singay babaw pwepway towen waseg.

⁴⁵⁻⁴⁶ “Vayuwein bakabebay mo bukukwakins Yowbad nakaleiwag; peinan mawana takunakun teitan inineiv kun bwanabwein, iban kun kuvakaein imgwayes kuna babaw, inakun babaw mo ilev silmanin kun to kweivaw, peinan singay bwanabwein.

⁴⁷⁻⁴⁸ “Sivtounun bakabebay mo bukukwakins Yowbad nakaleiwag; peinan mawana wot ilaves wayol, ikwanes in kweitan magin kweitan magin. Bo ikalawt wot; ibiteilis, in wanakaew, mo bikatukins, in bwanabweins bidagis bein wanuwan abmavin, siyas gog kalbalebs, yegay, ikawes, ilaves.

⁴⁹⁻⁵⁰ “Tut nakabiyokous waseg bo mawan, bakayeb min-libalab bikawes takalbalebs bilaves bineis kov avakaein waseg, toubweins gog bisesus. Tasiyas takalbalebs mo bivalams avakaein, peinan singaya abes bigeg.”

Yowbad nakaleiwag sinapun

⁵¹ Yeisuw mo ikatiganes, ilana, “Tab kukwakins sinap siyas babaw?” Itams, ilansa, “Oo!”

⁵² Ilana, “Tasiyas gog takatimlakeins kaleiwag mwana nikakins Yowbad nakaleiwag sinapun, tasiyas gog asisinap kweivaw bwanabwein, kweiboug bwanabwein; mawana tanuwagan bunatum nawliyoug babaw bwanabwein, kweiboug o kweivaw.”

*Min-Nasalet ipiyaves Yeisuw
(Mak 6:1-6; Luk 4:16-30)*

⁵³⁻⁵⁴ Yeisuw nakabebay iyakous, inoun in wanven, isiw wanuwan sinagog silmanin tapwaloul, ikatimlakay. Isimasom ninous tasiyas, ilansa, “Ampalawen meinoy neim ansinap singay avakaein o nawotet singay tawtoun?”

⁵⁵⁻⁵⁶ “Adok tawtelein amweilok natun towen; inan Meliy nises; budan nisesus, tasiyas Yemes, Yosep, Saymon, Yudas; o nunet asibabaw nisesus. Ansinap avanuy meinoy neim?”

⁵⁷ Bo igegeg ninous, magina ipiyaves kid Yeisuw. Yeisuw gog mo ikatimop asilivan, ilana, “Vena babaw ivnases palopits, tage wasiven tatineis bo nag; wasibunatum tatineis bo nag.”

⁵⁸ Yeisuw nawotet tawtoun na-ibabaw wanven tatonen, peinan taginvents nag isimounids waseg.

14

*Kweiboug Elod nibob kayob Yon
(Mak 6:14-29; Luk 9:7-9)*

¹⁻² Misiyamun towen gabman yagan Elod iligen butun Yeisuw, mapuna idibakes natouwats, ilana, “Mtowen tabibaptaysein gamags yagan Yon, kweiboug abob kayon, imat, adok bo ikit vayuwein, mapun nawotet tut towen singay tawtoun.”

³⁻⁵ E, kweiboug Elod niyous Yon, iyawen naman, isen wadeil, peinan Elod nikwey bwadan Pilip nakwav Elodiya, Yon nilivan, “Awoum kukwey bwadam nakwav.” Elod sivinan beiwei y mtowen Yon, mapuna iyous, isen wadeil, anpwayat gog beiwei Yon, peinan gamag babaw sivines Yon, idokes palopit teitan.

⁶⁻⁷ Wankuyeim isagal, peinan tutan inan nikop-yay, mtowen Elod ikamkwams siney nagamags. Elodiya natun kudavín isal wamtes tawaw tasiyas, Elod ikalin nuwan, idibek, ilana, “Aveiyag sivinam bo basekeim, tabudabod tamag.”

⁸ Nawen in ikatugwan inan waseg, ilana, “Inag, aveiyag banitoug?” Inan ilana, “Kunitoug busbwesan Yon bisekeim.” Inek Elod, ilana, “Kusekeig busbwesan tabibaptaysein gamags, towen Yon. Bibwabwes kayon, busbwesan bisenas wanuwan abmavin, mo kusekeig.”

⁹ King towen mo igegeg nanon, tage peinan gamag babaw niliganes nitabudabod anilivan, mo itam.

¹⁰⁻¹¹ Itam, ikayeb teitan in wadeil, ibob kayon Yon, busbwesan isen wakabmavin, imey, isek guwávin, ikow inow, isek inan.

¹² Yon navamul iliganes, ineis, ikawes won Yon, inawes idibwanis. Ikous, inekes Yeisuw, ikamteles sinap towen.

*Yeisuw ivakamus gamag kweinim tawsan
(Mak 6:30-44; Luk 9:10-17; Yon 6:1-14)*

¹³ Yeisuw iligen sinap towen, ilisawes gamag babaw, itouw wáwag, ikalávis ineis ven makaw waseg. Gamag babaw iliganes livánen bo itouw, ilisawes siven kweitan, inoys gog wáked, ikikuns Yeisuw waseg.

¹⁴ Yeisuw ilug, ikin gamag singay babaw, ikalin nuwan, takatouns ivag mo ibweins.

¹⁵ Iwwotet ee... kwayav; navamul inekes, ilansa, “Bo ikwayav, kwayabes gamag babaw bineis waven mwasanin biyamiyises kaeis, peinan nawoud towen nag kweitan ven nises.”

¹⁶ Yeisuw gog ikayuses, ilana, “Awoum bineis. Kusekes kaeis beikams.”

¹⁷ Ilansa, “Kan nag. Misinaka bled kweinim, in mwanay.”

¹⁸⁻²⁰ Ilana, “Kumeyes bakin; gamag babaw bisinis awuyow wakunuwatan, beikams.” Ikow bled son in wanaman, ikin wanakaew, ikalin nuwan waseg Yowbad, mo initoug. Ikous mo ikikiv bled issekes navamul, ikawes ivakamus gamag babaw, ikams, ikamuweips. Kan nikambwages isiyavis, idagis in wanuwan kaynad; bo ikalawt kaynad sinawatan kadiney.

²¹ Gamag siyas neikams kwenim tawsan tawaw, sisiyas vinay gamagal babaw.

Yeisuw inoun wakunuwatan yevagam

(Mak 6:45-52; Yon 6:15-21)

²² Ikous, mo idibakes navamul, ilana, “Kutouws kumugwas, kusupels kuneis palatan; yey gog bases bakayabes gamag.”

²³ Ikayabes ikous, ikatulag in wəkoy, anmwənet binitoug Yowbad waseg. Bo iboug anmwənetas ises.

²⁴ Tasiyas gog wəwag kadiveiyov-o wabwanit ikalləvis, bo ikaləlav nimes, peinan yag meinoy neim wamtes.

²⁵ Kakita beiyam, Yeisuw mo inoun wakunuwatan yevagam, bo binekes.

²⁶ Navamul ikines Yeisuw ininoun wakunuwatan yevagam, idokes yeiluw kid, iwkuwaksa aspwayat.

²⁷ Yeisuw ilana, “Bwein-wan! Awoum beivag amipwayat. Yey nases.”

²⁸ Iw to Pita, ilana, “Guyaw, magat mounid yəkoum, kudibakeig baw, mo banoun wakunuwatan yevagam, bawekeim.”

²⁹ Yeisuw ilana, “Kum.” Pita mo ilisow wag, inoun wakunuwatan yevagam binek kid Yeisuw.

³⁰ Igaw ininoun, ikin yag itotow, anpwayat, kaken bo isoun, kakita bo bimukul. Iwak, ilana, “Guyaw kwatinabweig!”

³¹ Yeisuw iyasel naman, iyous, ilana, “Adok nag kusimounid waseg yey. Aveiyag wawun ivag nanoum akweiy?”

³² Iyums asteiy inekes tasiyas wəwag, itouws, yag mo iyenom. ³³ Tasiyas wag aniwnataw mo ikululs wamatana Yeisuw, ilansa, “Mounid Yowbad Natun yak.”

Genesalet gimgilis ivag mo ibweins

(Mak 6:53-56)

³⁴ Isupels, ilugs ven yagan Genesalet.

³⁵⁻³⁶ Min-Genesalet iwtusis Yeisuw, ikayabes sisiyas, ineis vena babaw, idibakes takatouns, ilansa, “Kwatuyouns kunekeis Yeisuw.” Inekes, initougs waseg, sivines kid misinaka bikabkwanes matan anakweim. Itam, ikabkwanes, mo ibweins.

15

Tammwayas sikaleiwag

(Mak 7:1-23)

¹⁻² Tasiyas Palisiy mwasanin sisiyas takatimlakeins kaleiwag mwasanin mo ilisawes Yelusalem, imekes Yeisuw, ilansa, “Aveiyag wawun muvamul isiplaves tammwayas sikaleiwag, peinan beikams kan tage nag iwidis nimes?”

³ Ikatimop asilivan, ilana, “Yakamiy-vak, aveiyag wawun kunuwes amikikun, mo kusiplaves Yowbad nakaleiwag?”

⁴ “Yowbad nakaleiwag mamagina:

‘Kuvnəses tamam inam’, o

‘Kukin kal biyeg taman o inan tonen, mo kuweiys gamag towen.’

⁵ “Tage yakamiy amisinap, kulansa;

‘Aveiyag bukusekes tamam inam, bweina bukwatibom silmanin Yowbad, mo bukwamg-wayes tasiyas.’

⁶ “Amisinap towen waseg kugidamis Yowbad nakaleiwag.

⁷ “Tayyaweids yakamiy! Mounid palopit towen Isaya nilivnek livanen yakamiy, peinan ilel Yowbad anilivan mamagina:

⁸⁻⁹ ‘Gamag siyas wudous waseg ivnaseigs, tage ninous waseg isinaleigs.

Makava itapwəloulis waseg yey, peinan gamag mwasanin asisinap ikatimlakays, tage agusinap yey bo ipiyaves.’”

¹⁰⁻¹¹ Mapuna Yeisuw idawes gamag babaw bimeis. Imekes Yeisuw, ilana, “Kuliganes mo bukukwakins. Aveiyag beisiw awn waseg nag biyageg gamag kululuwan, nag. Misinaka sinap towen bisap wawadon mo biyageg gamag.”

¹² Tut wankuyeim navamul inekes Yeisuw, idibakes, ilansa, “Tabta kukwakin siyas Palisiy asimwasin amlivan to nukulivan?”

¹³⁻¹⁴ Yeisuw ikabebay, ilana, “Tamag walbalab nisop kay bwanabwein; tage kay tobwag nitatos. Tamag mo bigut kay siyas, bilev. Town nakaleiwag, yakamiy nag. Tasiyas mamagina toukwaws imgwayes sisiyas toukwaws, bitokes sisiyas binawes, babaw mo bikalkalouws bineis waleg.”

¹⁵ Pita ilana, “Kulik kabebay towen vagan silawun bakakakin.”

¹⁶⁻¹⁸ Yeisuw ilana, “Adok yakamiy-vak igaw tatagouwaws yakamiy. Tabta kukwakins avei-kan beikoum gamag, kan towen bein watoubun, bininoun ee... igaw simwan mo bisap bein wamnat? Tage aw-sinap gamag binuway wananon, igaw mo bilivan, anilivan towen bisap wawadon mo biyageg gamag kululuwan.

¹⁹⁻²⁰ “Gamag nanon waseg sinap kalbaleb, katumat gamag, subwan, kaylas, veinaw, yaweid, yagay. Sinap siyas gamag wananon bisap mo biyageg gamag towen. Tage nag biwid naman mo beikam, sinap towen nag biyageg gamag, nag.”

Vinen-Kenan inamis Yeisuw waseg (Mak 7:24-30)

²¹ Yeisuw ilisow ven towen, inoun in walasin ven Tayil o Sidon.

²² Natān vin nag vinen-Yudiy, tage vinen-Kenan, isap, iwak, ilana, “O Guyaw, Deibid tabun yak, kusiwyoubug, peinan natug kudāvin yeiliw singay iyageg.”

²³ Yeisuw gog ikāpay, nag ikatimop anilivan, nag. Navamul mo iwekes, ilansa, “Kwayeb nāwen iwkuwak, bo iwegweis wom.”

²⁴ Yeisuw ikatimop ages, ilana, “Yowbad nikayabeig nam silmanin nagamag min-Yisleil, peinan mamagina sip tasiyas, ilassulis ked.”

²⁵ Manāwen vin im, ikulul wamatān, ilana, “O Guyaw, kulabeig.”

²⁶ Yeisuw ikabebay, ilana, “Awoum bakow gamagal kaeis, basekes awuk beikams, awoum.”

²⁷ Iw manāwen vin, ilana, “E, mounid. Tage gamagal beikams, musamusān kan bikalkalouw bininein waskawan teibol, bweina beikams mansiyas awuk puskekkel, waskawan teibol nisesus.”

²⁸ Yeisuw ikatimop aygan, ilana, “Vin yak, singay kunmiseig vagan balabeim. Mukwanitoug waseg yey avanin mo bikamat waseg yak.” Mapuna natun ibwein tut towen waseg.

Takatouns babaw ivag, mo ibweins

²⁹ Yeisuw inoun, in, ivvayal yevagam avakaein yagan Galiliy, mo ikatulag in wākoy, isin.

³⁰ Singay babaw gamag inekes sisiyas takatouns babaw, takagayals, toukwaws, tasiyas ipam kikeis o nimes, o takakons. Takatounsa babaw inawes isewas wamatān Yeisuw, ivag mo ibweins.

³¹ Gamag babaw ikines tasiyas takakons, ivag mo ilivans bwein; tasiyas ipam kikeis o nimes ivag mo idamoms; takagayals ivag mo inounas; toukwaws ivag mo ikins bwein; isom ninous, iyākawns waseg min-Yisleil siYowbad.

Yeisuw ivakamus kweivas tawsan tawaw (Mak 8:1-10)

³² Wankuyeim Yeisuw idawes navamul, inekes, ilana, “Inok nuwag gamag babaw asimoun, kweitoun Yam sigwey tasiyas nitasesus, kaeis nag beikams. Adok awoum bakayabes sona asimoun, bo bisiwsawoul wous wāked.”

³³ Iweis navamul ilansa, “Ven towen makava nawoud, avanuy bakaban kaeis tasiyas babaw gamag beikams?”

³⁴ Yeisuw ikatiganes, “Kweivin amibled?”

Ilansa, "Kweinim kweiy son in mwanay kekel-e."

³⁵⁻³⁶ Idibakes gamag babaw, ilana, "Kusinis." Isinis, ikow bled towen son in, initoug, ikalin nuwan Yowbad waseg, ikikiv, issekes navamul; navamul mo ikawes ivvageins gamag babaw wasigeis.

³⁷ Asbabaw ikams ikamuweips. Kan towen nikambwages isiyavis, gamwat kweinim kweiy bo ikalawt.

³⁸ Asbabaw tasiyas ikamkwams ikamuweips kweivas tawsan tawaw sisiyas vinay gamagal babaw.

³⁹ Ikous, ikayabes gamag babaw, mo itouw w̄awag, ikalavis ineis ven avakaein yagan Magadan.

16

Gamag sivines bikines naman mulin Yeisuw

(Matiw 12:38-41; Mak 8:11-13; Luk 12:54-56)

¹ Wankuyeim siyas Palisiy sisiyas tasiyas Sadusiy inekes Yeisuw iyakwanes, ilansa, "Kwamtilakem mulin naman Yowbad, bakakin."

²⁻³ Ikatimop asilivan, ilana, "Kwayav waseg kulansa, 'Libalab ikayibwel, kalas bo beikal,' o gaboug waseg kulansa, 'Bwaw beim peinan lov magin m̄awana musewun kov.' Yowbad naman mulin tasiyas kuwtusis; tage tut towen waseg Yowbad naman mulin nag kuwtusis.

⁴ "Kalbaleb gamag tapiyaveins Yowbad yakamiy, sivinamiy bukukines mulin naman Yowbad. Nag gog; misinaka sinapun Youna bukukines. Nag kweitan mulin naman Yowbad bukukines." Ilivan ikous, ilisawes, mo inoun.

Tasiyas Palisiy asiyist

(Mak 8:14-21)

⁵ Ikalavis, italags palatan, navamul bo inumlaves asibled.

⁶ Yeisuw idibakes, ilana, "Kumtakavateimiy. Kadiloka kupiyaves tasiyas Palisiy asiyist, o tasiyas Sadusiy asiyist."

⁷ Illivans sisiyas wasigeis, idokes Yeisuw anilivan towen peinan bo inumlaves asibled.

⁸⁻¹¹ Yeisuw go ikakina ninous, ilana, "Adok nag kummiseigs vagan kan basekeimiy bukukwams. Mata kudokes silawun agulivan bled tatonen peinan kunumlaves, nag. Adok nag kunuwas kweinim tawsan tawaw neikams bled kweinim waseg mo kusiyavis kaynad babaw, o nag kunuwas kweivas tawsan tawaw neikams bled kweinim kweiy mo kusiyavis gamwat babaw. Silawun agulivan nag bled tonen. Aveiyag wawun nag kukwakins? Vayuwein badibakeimiy, 'Kadiloka kupiyaves tasiyas Palisiy asiyist, o tasiyas Sadusiy asiyist.'"

¹² Mo ikakins anilivan nag livānen yist tatonen, silawun gog tasiyas Palisiy o Sadusiy sikatimlakay, kadiloka bipiyaves.

Pita ikakin kavel Yeisuw

(Mak 8:27-30; Luk 9:18-21)

¹³ Yeisuw inoun in walasin ven yagan Sisaliy Pilipay, ikatiganes navamul, ilana, "Gimgilitoun yey, gamag mwasanin idokes kavel yey?"

¹⁴ Iweis tasiyas, ilansa, "Mwasanin idokes yākoum tabibaptaysein gamags Yon yākoum, mwasanin gog idokes yākoum kid Ilayti yākoum, mwasanin idokes yākoum Yelemay o teitan palopit kweiboug nukuyum nukum kid."

¹⁵ Ilana, "Tage yakamiy, kudokeigs kavel yey?"

¹⁶ Saymon Pita ikatimop, ilana, "Yākoum Mesay yākoum, Tamwamov Yowbad Natun yākoum."

¹⁷ Yeisuw ilana, "Tammwasaw yākoum Saymon, Youna natun yākoum; bo nukuwtusig, nag ven watinow gimgilis ikatimlakeims, nag; tage Tamag walbalab nikatimlakeim. O yey mo balivan badibakeim:

¹⁸ “‘Yakoum Pita, wawun yagam “Dakul” o dakul towen wakunuwatan mo bawlul agugwamag mamagina gunbunatum yakamiy, o kanig nag bitawtoun wasigeis yakamiy tayakelesiysi.’

¹⁹ “Yowbad nakaleiwag anakiy mo basekeim yak. Aveiyag kuyawen ven watinow, Yowbad mo biyawen walbalab, o aveiyag bukulik ven watinow Yowbad mo bilik walbalab.”

²⁰ Ikous anilivan towen, idibakes navamul, ilana, “Awoum kukwamats sinap towen. Awoum teitan gamag bikakin yey Kelis Mesay, yey. Awoum.”

*Yeisuw nilivnek vagan bikakins bikanig mo beikit vayuwein
(Mak 8:31-9:1; Luk 9:22-27)*

²¹ Tut towen Yeisuw isilamaw anilivan kweitan, vagan navamul bikakins, ilana, “Kadiloka ban Yelusalem, biyagegeigs singay tammwayas sisiyas tanuwgjes lun situwavek o takatimlakeins kaleiwag; ikous mo beiweigs, bakanatoun mo baki vayuwein.”

²² Pita iligen livan towen, itok Yeisuw, ineis palatan, ilana, “Yakoum Guyaw, awoum kulivan mawan. Awoum biyagegeims mawan sinap towen nukulivan.”

²³ Iw to Yeisuw, idibek Pita, ilana, “Kusineikik yakoum Seitan. Awoum kusilbwadeig. Amsinap towen meinoy neim gamag sikanuway waseg; Yowbad ansinap kweitan.”

²⁴ Yeisuw mo idibek navamul, ilana, “Kal yak bukubkunig, kadiloka bukupiyev nanoum tatoneim, bukukow amklos vagan bukukwanig kid, mawan magin yey bo bakanig. E, makadewen ked waseg bukubkunig yey.

²⁵ “Kukin bukwayus mwamovam, bo biyamkwaneim. Kukin gog biyamkwen mwamovam peinag yey, igaw mo bukaban.

²⁶ “Youd babaw bitayous ven watinow, tage mwamovads bigeg, bo bigak! Peinan tamawan gamag bivkek bisen mwamovan sivyuwein.

²⁷ “Igaw Gimilitoun yey mo bakam sigwey guntakayobs, o Tamag inakamnat waseg, mo maysan miwotet basekeimi katanok katanok yakamiy.

²⁸ “Mounid adibakeimiy mwasanin yakamiya-nan nag bukulivatus kanig ee... mo bukukineigs Gimilitoun yey igaw bam, gunakaleiwag mo bisilamaw ven watinow.”

17

*Ankakin Yeisuw ivag kamnat
(Mak 9:2-13; Luk 9:28-36)*

¹ Yam kwenim katanok ikous, Yeisuw itokes Pita siney asteiy, tasiyas Yemes son bwadan Yon; ikatulags ineis wakunuwatan koy avakaein; asteivas isiwas.

² Wamtes ivag ankakin kweitan, magin ikamnat mawana kelas mititeilin, anakweim ilapupwakaw singay gimagim.

³ Mo ikines Moses son Ilaytiy illivans sisiy Yeisuw.

⁴ Iw to Pita, idibek Yeisuw, ilana, “Guyaw, singay bwein tasesus towen. Magat sivinam mo bawlul mibwan bunatoun, bunatan yak, bunatan Moses, bunatan Ilaytiy.”

⁵ Igaw ilivan, lov kweitan singay kamnat mo imteilis, aygan teitan wanuwan lov ilana, “Mtowen Natug bwanabwein, singay ibwein nanoug waseg; kuliganes aygan.”

⁶ Navamul iliganes livan towen, ikalouws kantukovs, singay aspwayat.

⁷ Yeisuw gog im ikabkwen wous, ilana, “Kutamanaws. Awoum beivag amipwayat.”

⁸ Itamanaws, ikinewas, nag ivag gamag, misinaka Yeisuw.

⁹ Igawa iwloubus, Yeisuw mo idibakes, ilana, “Awoum kwamteles sinap towen nukukines. Kwawumes. Igaw Gimilitoun yey bakanig, baki vayuwein, mo kwamteles.”

¹⁰ Navamul ikatiganes, ilansa, “Aveiyag wawun takatimlakeins kaleiwag ilivans, ‘Ilaytiy wanamug beim, Mesay wankuyeim?’”

¹¹⁻¹² Iw to Yeisuw, ilana, “Mounid livan towen ‘Ilaytiy beim mo bikatilow youd babaw’; tage bo neim. Tasiyas gog nag iwtusis; tage sivines beiweiwan, mo iyagages. Igaw mo biyagegeigs yey, Gimilitoun yey, bo mawan.”

¹³ Navamul mo idumwal ninous, peinan ikakins-wan tabibaptaysein gamags towen Yon mamagina llaytiy.

*Gwad takabalawein Yeisuw ivag, mo ibwein
(Mak 9:14-29; Luk 9:37-43)*

¹⁴⁻¹⁵ Ikous, inounas, inekes gamag babaw, teitan taw im, ikulul wamatian Yeisuw, ilana, “Guyaw, binok nuwam natug, peinan ikabalawein, ankatoun avakaein. Tut babaw ikalkalouw ininein wəkov, tut babaw ikalkalouw ininein wayvagam.

¹⁶ “Awey natug muvamul wasigeis; iyokons bo nag.”

¹⁷ Yeisuw idibakes tasiyas, ilana, “Takakons yakamiy, minamis nag. Bo akawgwas amisinap kakon. Kumey gwad towen.”

¹⁸ Yeisuw idibek yeiluw towen neiweiy gwad, mo ikilev. Gwad towen mo ibwein, tut towen waseg.

¹⁹ Navamul mo inekes Yeisuw anmwənet nises, ikatugwans, “na-ikadilokem bakakayeb yeiluw towen?”

²⁰⁻²¹ Iw to Yeisuw, ilana, “Peinan nag kummises Yowbad vagan bivag. Mounid adibakeimiy, magat minamis mamagina tipol veitun, igaw bukudibek koy towen kulana, ‘Kunoun kun kutoun palatan,’ mo binoun; e, sinap babaw mo bikadilokeimiy.”

*Yeisuw ilivnek bikanig, mo beikit vayuwein
(Mak 9:30-32; Luk 9:43-45)*

²²⁻²³ Igaw nisesus Galiliy, Yeisuw idibakes, “Teitan bisilkodeig yey, Gimilitoun yey; gamag mwasanin mo biyousigs, bikatimateigs, yam kweitoun mo bəkit vayuwein.” Iliganes, singay ikalin nuwes.

Simoney ibanes wanuwan in

²⁴ Inounas ineis Kapaneyum. Iweis tasiyas takaweins təkis (təkis towen silmənin Yowbad nabunatum), ikatugans Pita waseg, ilansa, “Tabta mutovek itam natakis issekem, o nag?”

²⁵ Pita itam, ilana, “Oo!”

Pita iyum in wasibunatum. Iw to Yeisuw, ilana, “Saymon, wananoym yak, takaleiwags ven watinow nitsiyas bipayins wasigeis timsiyas? o tobwag gamag bipayins adok?”

²⁶⁻²⁷ Pita ilana, “Tobwag gamag.”

Iw to Yeisuw, ilana, “Mounid. Nitsiyas nag bipayins, nag. Tage bweina bitapayin silmənin Yowbad nabunatum; mata ge bigeg ninous tasiyas. Kun kuksikous, in wanamug bukukous, kukin wanuwan mo bukuban idamoney, bo ikadilok idatakis aditeiy. Kukow kusekes takaweins təkis tasiyas.”

18

*Kal bimug Yowbad nakaleiwag wanuwan
(Mak 9:33-48; Luk 9:46-48; 17:1-2)*

¹ Mitiyamun towen navamul inekes Yeisuw, ilansa, “Kal bimug Yowbad nakaleiwag wanuwan?”

²⁻³ Mapuna Yeisuw idouw gwad teitan beim. Im to gwad, Yeisuw itamnow gwad towen wanuwein, ilana, “Mounid adibakeimiy, kukin bikanavin ninoumiy bukumlavags məwana gwad towen mo bukusius wanuwan Yowbad nakaleiwag. Kukin gog nag, bo nag.”

⁴ “Kal yak bukumənum məwana gwad towen, igaw bukumug Yowbad nakaleiwag wanuwan.”

⁵ “Kukin bukuleb gwad teitan nisimounid waseg yey, magina bo kulabeig yey.

⁶ “Gamagal tasiyas isimounids waseg yey, kukin kal bikatsilakes silmənin bikakins sinap kalbaleb, singay kalbaleb bilouvat gamag towen. Kukin gamag mwasanin bikawes dakul avakaein biyawonis kayon bo bilaves bein wabwanit, biwgwel, nakalbaleb towen kalamwey; tage kukin bisesuna ee... bikatsilek teitan gwad, singaya kalbaleb mo bilouvat.”

⁷ “O bo igak! Peinan tasiyas takalbalebs ikatsilakes gamag ven watinow. Gamag mwasanis bisilbwades sinap bwein, mo gamag babaw bilivatus kalbaleb. Ven watinow inakaleiwag mawan. Tage tasiyas bisilbwades sinap bwein, igaw singay kalbaleb mo bilivatus.

⁸ “Kukin namam o kakeim bikaleiwag amsinap kalbaleb, kubob kulev. Bweina biyamkwen namam o kakeim, igaw mwamovam bukuban; awoum kid namam paleyun-wan o kakeim paleyun-wan igaw bilaveim bukun wanuwan kov towen nakagdaged nag beikous.

⁹ “Mawan-vak matam. Kukin matam bikaleiwag amsinap kalbaleb, kugut kulev. Bweina biyamkwen matam palatanok, igaw mwamovam bukuban; awoum kid paleyun-wan igaw bilaveim bukun wadiginasim, kov nigidaged waseg.

Awoum kwasigumis gamagal

(Luk 15:3-7)

¹⁰ “Awoum kwasigumis gwad teitan peinan igaw takakit; mounid adibakeimiy anelos tasiyas ililabes gamagal tut babaw sisiy Tamag walbalab; ikikines magin. ¹¹ (-)

¹²⁻¹³ “Kuninuways kavel alen sip lakatutan, mwantanok gog bilasisul ked bikanig, adok tanuwagan mtown tamtakavatein bilisawes mansiyas sip sinawanim sinawavas mwananim mwanavas wakoy bisesus, binineiv gog manawen nikanig. Igaw biban, mounid bimwasaw avakaein silmanin; Tage inamwasaw kakit wasigeis mansiyas sip nisesus bwein wakoy. Tanuwagan nag ivag sivinan biyamkwen mwantanok sip.

¹⁴ “Tamag walbalab mawan; nag ivag sivinan biyamkwen gwad teitan, mamagina tasiyas.

Towen soum tayagageim yak

(Luk 17:3)

¹⁵ “Kukin soum biyagageim, kune kwtimlek ansinap kalbaleb. Amiteiy kulivans. Awoum gamag babaw biliganes. Kukin biligen amlivan bo bwein, peinan bukumwas soum bwadam towen.

¹⁶ “Kukin gog nag biligen, soum teitan o simwey asteiy kune kes bwadam towen, kulivans waseg vagan kid bisimounid amlivan meivek-wan.

¹⁷ “Kukin bipiyev amlivan, mo kuneis kudibakes tayakelesiys, tasiyas babaw mo bilivans. Kukin bipiyev tayakalesiys asilivan, bweina kudok gamag towen tadaub, o magina takawein takis, kalbaleb gamag towen.

¹⁸ “Mounid adibakeimiy tayakelesiys yakamiy, aveiyag bukuyawanis ven watinow waseg, Yowbad mo biyawen walbalab. Aw-kaleiwag bukulikus ven watinow, Yowbad mo bilik walbalab.

¹⁹ “Vayuwein adibakeimiy, kukin amiteiy ven watinow kusesus, igaw bukutams aw-youd bukunitougs waseg Tamag walbalab Tamag mo beitam, bisekeimiy youd towen.

²⁰ “Avanuy kwtuyouns amiteiy o amiteitoun silmanin gunawotet, simiy yey mo bitasesus, yey agugwamag yakamiy.”

Teitan nag biwid son nakalbaleb

²¹ Iw to Pita, ikatigan Yeisuw, ilana, “Guyaw, sivavon soug biyagageig, mo bawid ansinap kalbaleb, banumlev? Adok sivanim sivay, ne?”

²² Yeisuw ilana, “Nag sivanim sivay. Deisa lakatunim lakatuy sinawanim sinawey mo sivanim sivay.

²³ “Mapun bakabebay mo bukukwakins Yowbad nakaleiwag; peinan mawana guyaw teitan ititalay wasigeis inagamag.

²⁴ “Itokes teitan gamag imeyes, nakawlavad singay avakaein, sinawatan tawsan kina, ilana, ‘Gunmoney nag. Igaw wanakougwaw mo bamop waseg yak.’

²⁵ “Natovek ilana, ‘Nag. Igaw teitan gamag beim bisekeig maysamiy soum mukwaw o nitum, bitokeimiy bukuneis kuwotets towen nawotet, maysamiy money bo bakow kadilok mukwawlavad.’

²⁶ “Taw towen mo ikulul igilagel, ilana, ‘Binok nuwam yey, igaw mo bamop gunakawlavad babaw, beikous.’

²⁷ “Iyakalin guyaw towen, ilik nagamag, iwid nakawlavad ikous, ilana, ‘Deisa kunoun. Bo awid mukwawlavad.’

²⁸ “Inoun taw towen, iban son, peinan asteiy iwteles sitovek nawotet, ilana, ‘Mukwawlavad waseg yey lakatutan toya.’ Deisa iyous kayon son, ilana, ‘Nuwanaw kusekeig.’

²⁹ “Son mo igilagel, ilana, ‘Binok nuwam yey, igaw mo bamop gunakawlavad babaw, beikous.’

³⁰ “Towen ikayus, itok son, isen wanawan deil, ilana, ‘Deisa kuses wadeil. Igaw bukumop mukwawlavad mo bukun wamnat.’

³¹ “Iliganes sisiyas, tasiyas tawteleins guyaw nawotet, singaya igeg ninous tasiyas, inekes sitovek towen, youd babaw ikamteles ikous.

³²⁻³³ “Sitovek idouw mtowen beim. Im, natovek ilivan, ‘Singay takalbaleb yakoum. Nukugilagel to nawid mukwawlavad meivek-wan. Inok nuwag yak, tage nag inok nuwam soum. Bo igak!’

³⁴ “Kapasal nuwan, idawes tamtakavateins deil, ilana, ‘Kutokes gamag towen, kunawes wadeil, bises oko igaw bimop nakawlavad beikous, mo bein wamnat.’

³⁵ “Tamag walbalab ansinap mawan. Kal yak wananoom ta-bukuwid simwey sikalbaleb waseg yak, Yowbad bo bimop amsinap kalbakeb yakoum.”

19

Peiyaw mikwawas o mimwānas wasigeis

(Mak 10:1-12)

¹ Anilivan tasiyas ikous, Yeisuw ilisow Galiliy, inoun in min-Yudiy siven palata-dadan lay yagan Yoldan.

² Singay babaw gamag ikatukuns waseg; inekes Yeisuw, ven towen nises, takatouns ivages mo ibweins.

³ Tasiyas Palisiy mo inekes Yeisuw, iyakwanes, ilansa, “Tab kadiloka bakapiyev makwawas peinan asisinap mwasanin kalbaleb?”

⁴⁻⁶ Yeisuw ikatimop asilivan, ilana, “Tabta kuvinis livānen Yowbad, peinan kweiboug nibun gamag, kudataw kudāvin, mo ilana. ‘Peinan kudataw kweitan, kudāvin kweitan, kadiloka kudataw bilisow taman inan, bikatuves son nakwav, asteiy bimlavags mamagina wous katanok-wan.’ Peinan Yowbad anilivan mawan, taveivays asteiy wous nag akweiy, bo katanok-wan. Peinan Yowbad bo ilaten, awoum gamag teitan biliv bisenas palatan palatan; awoum.”

⁷ Ilansa, “Magat kaleiwag towen mounid, aveiyag wawun Moses nakaleiwag vagan kid towen tapiyavein nakwav bilel inalet bisek, bikayeb, mo beiyum bein wanven?”

⁸ Iw to Yeisuw, ilana, “Kweiboug nag kweitan ked vagan gamag bipiyev nakwav. Wankuyeim gamag siyas takakons, to Moses isekeimiy miked waseg bukupiyaves mikwawas.

⁹ “Mounid adibakeimiy kukin kal bipiyev nakwav, mo nātan bikow, ansinap towen kalbaleb, magina ikanavaya mav. Misinaka nakwav bimasis son teitan taw, namwan mo bipiyev.”

¹⁰ Navamul ilansa, “Magat veivay kaleiwag-nen bo mawan, adok awoum bitaveivays.”

¹¹⁻¹² Yeisuw ilana. “Gamag babaw nag bikakins kaleiwag towen. Misinaka Yowbad ansinap bisekes gamag mwasanin, mo bikakins. Peinan tawaw mwasanin tutan insiyas nikopwes-yay powes nag, o tawaw mwasanin powes nag peinan gamag ikablaves, o gamag mwasanin ikablaves powes tatineis vagan bikanawes Yowbad nakaleiwag. Kal yak bukukwakin sinap towen, bweina kuligen.”

Yeisuw sivinan gamagal

(Mak 10:13-16; Luk 18:15-17)

¹³⁻¹⁴ Mo imeyes gamagal, sivines Yeisuw bituwanis wanaman, mo binitoug pines. Navamul bikayabes kid, Yeisuw ikayuses, ilana, “Awoum kwayabes. Bweina bimeis waseg yey, peinan Yowbad nakakkaleiwag wanuwan tasiyas babaw asisinap mawana gamagal.”

¹⁵ Bo ituwanis ikous, mo inoun.

*Guyawaw sikabeisiw Yowbad nakakkaleiwag waseg singaya keikay
(Mak 10:17-31; Luk 18:18-30)*

¹⁶ Teitan gamag inek Yeisuw ilana, “Tamwey, aw-wotet bwanabwein bawtel mo baban mwamovag nag beikous?”

¹⁷ Iw to Yeisuw, ilana, “Aveiyag wawun kwtiganeig silmanin sinap bwein? Anmwænet nises ansinap bwein. Magat sivinam mwamovam nag beikous, kadiloka kuvnas nakaleiwag beibwein.”

¹⁸⁻¹⁹ Ilivan, “Aw-kaleiwag?”

Yeisuw ilana, “Tasiyas: Awoum kuweiy gamag; awoum kwanavay mav; awoum kuveinaw; awoum kuyaweid, teitan gamag livanen; kuvnases tamam son inam, kwanow ages; o kuvnas soum mawana kuvnaseim tatoneim.”

²⁰ Toubwat towen ilana, “Kaleiwag siyas babaw bo ayakous. Aveiyag nikabwag waseg yey?”

²¹ Iw to Yeisuw, ilana, “Magat sivinam sinap bwein bukuyakous, kun kuymiyis muvavag babaw, money kukow kunow, kuvgen tasiyas tasimavs wasigeis, igaw Yowbad mo biyamiyiseim walbalab. E, mumoney kuvgen beikous, mo kum kwabkunig yey.”

²² Toubwat towen ikitiligen anilivan, ipiyev, peinan ikayus nawliyoug, singay babaw; bo igeg nanon, inoun.

²³ Yeisuw mo idibakes navamuls, “Singay keikay guyawaw sikabeisiw wanuwan Yowbad nakakkaleiwag.”

²⁴ “Vayuwein badibakeimiy, man avakaen manawen kamel kalamwey keikay beisiw vas wawawun; tage guyawaw singay keikay beisiws wanuwan Yowbad nakakkaleiwag.”

²⁵ Inavamul iliganes, isunasun ninous, ilansa, “Magat tasiyas nag, kalisiy mo beisiws?”

²⁶ Yeisuw ikines tasiyas navamul, mo ilana, “Gamag yakamiy wasigeis nag kadilok, tage Yowbad waseg youda babaw bo ikadiloken-wan.”

²⁷ Pita mo ikatugan, ilana, “Yakamey bo nakapiyev mavavag babaw, tage bo nakabkunim yak, aveiyag yakamey bakalouvat?”

²⁸ Yeisuw ilana, “Mounid adibakeimiy, yakamiy nukubkunigs yey, igaw tut wanakougew, Gimilitoun yey basin abag bwanabwein waseg, yakamiy bukusinis wakabamiy sinawatan akweiy bukwaleiwags wasigeis min-Yisleil adakums sinawatan akweiy.

²⁹ “E, kalisiy yakamiy kulisawes mibunatum, tawlimiyas, timmiyas, inmiyas, nitimiwas, o mipwepway vagan bukuklawes gunawotet, atimapun tasiyas singay babaw bukubanes son mwamovamiy nag beikous.

³⁰ “Gamag babaw nimugwas igaw bikuyeims, o tasiyas nikuyeims igaw bimugwas.

20

Tawteleins bag

¹⁻² “Yowbad nakakkaleiwag mawana teitan taw, inaven avakaen. Iyam gaboug ikit, ilwon wavytakon ven, ilana, ‘Gunawotet nises, gunabag, bukuneis kuwotets katanok yam, maysan wotet katanok kina, igaw mo basekeimiy.’ Itams mwasanin, inounas ineis wanabag.

³⁻⁵ “Wankuyeim, kelas bo italgalaq, in waven, iban gamag mwasanin isimavs. Ilana, ‘Kuneis, kuwotets gunabag. Igaw maysan mo basekeimiy.’ Mo itams, ineis. Wankuyeim, yanay, iban gamag, ilivan mawana, mo ineis, iwotets wanabag. Wankuyeim kelas itageg, iban gamag, ilivan mawana, mo ineis.

⁶ “Babaw gamag iwwotets ee... kakita beiboug, tamwey towen in waven, iban gamag mwasanin, ilana, ‘Aveiyag wawun makava kusesusa bo iboug?’

⁷ “Iweis tasiyas, ilansa, ‘Peinan ta-kal bisekem mawotet.’

Ilana, ‘Yakamiy-vak kuneis, kuwotets gunabag.’

⁸ “Iboug, taginbag idibek natouwat, ‘Kudibakes tawteleins bag bimeis, maysan siwotet kusekes. Kusilamaw kweivaw gamag tasiyas mwana nimeis, mayses kusekes. Ikous, mo tasiyas kwayav nimeis. Mawanabein ee... nakabiyokous tasiyas gaboug nisilamaws.’

⁹ “Tasiyas kweivaw gamag nag bivakaen siwotet, imeis, wotet maysan mo ikawes katanok kina.

¹⁰ “Siyas gog gaboug nisilamaws, idokes kid avakaein mayses bikawes. Nag gog, katanok kina. Meiveka gamag mayses bo katanok kina.

¹¹⁻¹² “Mayses ikawes, ivtokes livan tamwey towen, idibakes, ilansa, ‘Tasiyas nag bivakaen siwotet mayses bo katanoka mawan yakamey. Yakamey gog nakawotet kalas midamed. Gaboug nakasilamaw kawwotet oko iboug.’

¹³⁻¹⁵ “Tamwey ikatimop aygan teitan, ilana, ‘Gwa, nag ayagageim, nag. Gaboug agulivan bo kutams: Katanok Yam katanok kina. Mukina towen-an kukow kunow. Sivinag basekes kweivaw gamag siyas mawan yakamiy. Kadilok yey bakaleiwag gunavavag waseg. Awoum bimouvit dabam peinan agusinap bwein.’

¹⁶ “Siyas nimugwas igaw bikuyeims, o tasiyas gog nikuyeims igaw bimugwas.”

Sivtounun ilivnek bikanig mo bitamanaw vayuwein

(Mak 10:32-34; Luk 18:31-34)

¹⁷⁻¹⁹ Ikous, mo inounas, bikatulags kid bineis Yelusalem. Waked Yeisuw idibakes tasiyas navamul, ilana, “Bo bitakatulags taneis Yelusalem, teitan gamag mo bisilkodeig Gimgilitoun yey, mo biyousigs tasiyas tanuwgjes lun situwāvek sisiyas takatimlakeins kaleiwag, biyateleigs vagan bikatimateigs, igaw mo bitameigs wasigeis tobwag ven gimgilis Yelusalem nisesus; tasiyas bisibawegs, biwaweigs, bikatkaviteigs waklos. Yam kweitoun mo batamanaw vayuwein.”

Yemes son Yon initougs waseg Yeisuw

(Mak 10:35-45)

²⁰ Iweis nāwen Sebediy nakwaw, siney nitun tawaw asteiy, manāwen ikulul wamatan Yeisuw, binitoug waseg.

²¹ Yeisuw ilana, “Aveiyag sivinam?”

Iw manāwen ilana, “Kukwaleiwag vagan kid igaw bukuguyaw, nitug siyas-nan bisinis wadadam, teitan wamkwatay, teitan wamkimaw.”

²² Yeisuw ikatimop asilivan, ilana, “Nag kukwakins mikanitoug towen. Tab kadiloka bukumouums agukwāvīg to bāmoum?”

Ilansa, “Bo kadilokem.”

²³ Idibakes, “Mounid bukumouums agukwāvīg, tage na-ikadilokeig bakaleiwag kavel bisin wagunkatay o wagunkimaw, nag. Tamag gog bo ikatineg abes tasiyas bisinis wagunkatay o wagunkimaw, mtown takaleiwag.”

²⁴ Yeisuw navamul tasiyas sinawatan mo iliganes sikanitoug asteiy son bwadan bo ikawkunes.

²⁵⁻²⁷ Yeisuw gog ikakin asisinap, idawes bimeis. Imeis mo ilivan, “Kukwakins ven babaw guyawuns asisinap, keikay wudos; o sikaleiwag tawtoun wasigeis. Yakamiy gog amisinap kweitan. Kukin kal sivinan biguyaw wasigeis yakamiy, bweina bimlavag mitouwat; o kal sivinan bimug, bweina beibus mawan tasimav, bikokew miwotet.

²⁸ “Yey gog, Gimilitoun yey, agusinap mawan. Yey nam, mata ge kulabeigs; deisa balabeimi. Kaleivig bo atam maysamiy tababaws yakamiy.”

Toukwaws asteiy ivag mo ikins bwein

(Mak 10:46-52; Luk 18:35-43)

²⁹ Wankuyeim waked ininounas, bo ilisawes Yelikow, singay babaw gamag ikatukuns Yeisuw waseg.

³⁰ Tasiyas toukwaws asteiy isinis wadadan ked, bo iliganes livānen Yeisuw, peinan bo neim. Iliganes, mo iwaks, ilansa, “Deibid tabun Mesay yākoum, binok nuwam yakamey.”

³¹ Asibabaw ilansa, “Kukwāpays yakamiy!” Tasiyas gog isimkakinsa waseg, ilansa, “Guyaw, Deibid tabun yak, binok nuwam yakamey.”

³² Yeisuw itoun, mo idawes tasiyas bimeis, mo ilana, “Aveiyag sivinamiy bavag wasigeis yakamiy?”

³³ Ilansa, “Guyaw, kuvag beilal mitem.”

³⁴ Yeisuw inok nuwan tasiyas, mo ikabkwen mites, nuwanawa ikins bwein, mo ibwākuns Yeisuw waseg, inounas.

21

Yeisuw isap ven Yelusalem

(Mak 11:1-11; Luk 19:28-38; Yon 12:12-19)

¹⁻² Inounas ee... kadiykusan-o Yelusalem, koy townen kay siyas oliv nitatos, ven yagan Betepeig; mo ikayeb navamul asteiy, ilana, “Kuneis ven townen palatan, mo bukuñanes donkiy nises, anvatul iyawanis wakayon, son natun nisesus; kulikus, kutokes kumeyes.

³ “Kukin kal bikatugwan wasigeis yakamiy, kwatimapus anilivan, kulansa, ‘Tunuwan sivinan mansiyas donkiy,’ mo beitam townen.”

⁴ Ivages māwan, mo ikamat livānen Mesay, kweiboug palopit nilivnek, ilel māwan:

⁵ “Kudibakes Sayon vinay-nen, ‘Kukines miguyaw bo beiw, Imwen donkiy watapwan; magina tammanum mtownen neiw, Isin donkiy natun watapwan.’”

⁶ Ineis tasiyas asteiy, ikanawes aygan Yeisuw.

⁷ Ibānes donkiy son natun, itokes imeyes; inibwis asikweim, isenas watapwan donkiy, Yeisuw imwen, isin wakunuwatan donkiy.

⁸ Gamag babaw iyaves asikweim wāked; mwasanin gog itateiys amweilok yageivein, iyaves wāked.

⁹ Tammugwas imugwas, takukuyeims ikukuyeims, asibabaw iwkuwaks, ilansa: “Kalin nuwem, Deibid tabun yak.

DaGuyaws nikayabeim, nukum vāgan bukwatinabwem. Kalin nuwem Tamads walbalab.”

¹⁰ Isiw in Yelusalem, taginvens babaw isisawls imimeis silmanin bikines Yeisuw, illivans, “Kavel mtownen?”

¹¹ Tasiyas sisiy Yeisuw ilansa, “Mtowen palopit yagan Yeisuw, gum-Nasalet teitan, inaven wawnuwan Galiliy.”

Ikawsapes tasiyas wanuwan Yowbad nabunatum niggimwals

(Mak 11:15-19; Luk 19:45-48; Yon 2:13-22)

¹² Yeisuw isiw in wanuwan Yowbad nabunatum bunavakaein, mo ikayabes tasiyas niyamiyises sivavag; ikatitan siteibol tasiyas nikatimapus money dakul, o ikatitan abes tasiyas niyamiyises bwabun.

¹³ Idibakes, ilana, “Bukitab waseg livanen Yowbad nabunatum nises mamagina: ‘Gunbunatum bikayuses silmanin nitoug;’ tage nukuvages buntuman veinaw.”

¹⁴ Igaw nises Yowbad wanbunatum, tasiyas toukwaws sisiyas takagayals inekes Yeisuw; ivag, mo ibweins.

¹⁵ Tasiyas gog tanuwgves lun situwāvek sisiyas takatimlakeins kaleiwag ikines Yeisuw, Yowbad wanbunatum, nawotet tawtoun, o gamagal niwkuwaks ilansa, “Kalin nuwem Deibid tabun yak,” singay mo ikawkunes Yeisuw tasiyas.

¹⁶ Ikawkunes, ilansa, “Bo kuligen ages, siyas gamagal?”

Yeisuw itam, ilana, “Oo!” Ilana, “Adok nag kukwakins livānen Yowbad, Bukitab waseg, mamagina:

‘Ninous bo kusekes gamagal sisiyas apwaw, mo iyākawns bwein.’ ”

¹⁷ Mo ilisawes inoun, ilisow ven towen avakaein, inoun in wunkakit, imasis ven towen Betaniy.

Ikawtun yaveinun

(Mak 11:12-14, 20-24)

¹⁸ Iyam-nen gaboug iyum in silmanin wunovek, ivag anamoun.

¹⁹ Wakid iban yaveinun kaytan, iwekey, anagin nag, yageiveina mav, ikawtun ilana, “Igaw nag kweitan anagim beivag waseg yak.” Nuwanaw mo ikaleyag, imat.

²⁰ Navamul ikines, isom ninoos, ilansa, “Nuwanaw bo ikaleyag yaveinun makaywen! Aw-sinap towen?”

²¹ Iw to Yeisuw, ilana, “Mounid adibakeimiy, awoum beivag ninoumiy akweiy. Magat bukunamis Yowbad natawtoun waseg, mo bukuvages mawana yey navag yaveinun; e, bukudibakes koy towen kulansa, ‘Kunoun kun kumukul wayol,’ mo binoun bein bimukul wayol.

²² “Aveiyag bukunitougs Yowbad waseg, kunamis beibwein, mo bisekeimiy.”

Ilansa, ‘Aw-kaleiwag waseg nukuwtel mawan?’

(Mak 11:27-33; Luk 20:1-8)

²³ Ikous, inoun in Yowbad wanbunatum, ikatimlakay. Mo imeis tasiyas tanuwgwes lun situwavek sisiyas tammwayas, ilansa, “Aw-kaleiwag waseg kuwtel mawan, o kal isekeim mukwaleiwag towen?”

²⁴ Yeisuw ikatimop asilivan, ilana, “Kweitan sinap bakatugan wasigeis yakamiy; e, bukulivans kamnat mo basekeimiy livan kamnat vagan bukukwakins silawun gunakaleiwag.”

²⁵⁻²⁶ E, Yeisuw mo ikatiganes, ilana, “Kal isek Yon nakaleiwag mo ibaptyses gamags? Yowbad? o nag? adok gamag mwasanin?”

Bo ibol ninoos tasiyas, illivans sisiyas, ilansa, “Kukin bitalivans ‘Yowbad,’ towen gog mo bilivan ‘Aveiyag wawun nukupiyaves aygan?’ Kukin gog bitalivans ‘Gamag mwasanin,’ bo biyagageids gamag babaw, peinan idokes palopit teitan mtownen Yon.”

²⁷ Idibakes Yeisuw ilansa, “Nag kakakin.”

Iw to Yeisuw ilivan, “Yey-vak nag balivan, nag bakamtilakeimiy kal isekeig gunakaleiwag.”

Kabebay Kunutaw son Bwadan

²⁸ Yeisuw ikabebay, ilana, “Waninoumiy amawan? Tamwey teitan nitun tawaw asteiy. Mo inek kunutaw ilana, ‘Nagein kun gunabag kuwotet.’

²⁹ “Kunutaw ipiyev. Wankuyeim mo ikanavin nanon; inoun in iwotet.

³⁰ “Tamwey towen mo inek tawanay, ilana, ‘Kun kuwotet.’

“Tawanay ilana, ‘Oo! Bo ban awotet.’ Nag gog, ipiyev wotet, isinal.”

³¹ Yeisuw ilana, “Asteiy ikatiliganes aygan times, tage kal ikanaway aygan?”

Ilansa, “Kunutaw.”

Iw to Yeisuw ilana, “Mounid adibakeimiy tasiyas mawana kunutaw mo beisiws wanuwan Yowbad nakakkaleiwag. Peinan tasiyas takalbalebs, takaweins takis sisiyas tasiyas ikarinavays mav bo bimugwas Yowbad nakaleiwag waseg; yakamiy mawana tawanay wankuyeim.

³² “Peinan Yon ikatimlakeimiy ked didumwal, tage nag kusimounids. Takalbalebs tasiyas bo isimounids, tawaw vinay. Yakamiy nukukines tage nag ikanavin ninoumiy; nag kusimounids, nag.

Tawteleins bag

(Mak 12:1-12; Luk 20:9-19)

³³ “Kabebay kweitan kunages: Tamwey teitan isop gleip babaw, bigulen gleip waseg; kay kaytan isop wadadan bag palavas, bo imlavag anakal; wayn kasinen ivkaes ikous; tamtakavatein bag nabunatum iwlul ikous; ivatam wasigeis gamag mwasanin vagan kid bimtakavates inabag; mo inoun in kweitan ven.

³⁴ “Igaw tutan gleip anagin bimwanoug mo ikayabes natouwat mwasanin, binekes tasiyas tamtakavateins bag, idokes tanuwagan bag anagin bikawes.

³⁵ “Nag gog, tasiyas tamtakavateins bag iyagages tamwey natouwat, teitan iwaweiys, tayuwein ikatimates, tatounun iwaweiys dakul waseg, imat.

³⁶ “Wankuyeim tamwey towen ikayabes natouwat kalamwey babaw, mo iyagages tasiyas.

³⁷ “Ikous, mo ikayeb natun, idoki bivnəses natun.

³⁸ “Nag gog, iwtusis natun, ilansa, ‘Mtowen tamwey natun tatonen, kumeis taweiy, mo bitakawes bag towen, dakiyays yakids.’

³⁹ “E, iweis, iyousis, itokes tamwey natun, ilaves in watoulan bag, mo iweiys imat.”

⁴⁰ Yeisuw ikatigan ilana, “Igaw beim tanuwagan bag, amawan bikaleiwag wasigeis tasiyas tawteleins bag?”

⁴¹ Iweis tasiyas, ilansa, “Biyagagesa singay, bikatimates, siwotet gog mo bisekes gamag mwasanin asisinap bwein, tasiyas mo beitams anagin bisekes tamwey bweilim katanok katanok waseg.”

⁴² Yeisuw ilana, “Adok nag kuvinis Bukitab livaneig, mamagina:

‘Wululay towen tawteleins bunatum nipyaves,

Tage bo imlavag anmwamwan bunatum.

DaGuyaws nawotet towen,

bo isom nanouds.’”

⁴³ Yeisuw mo ilivan, “Mapun adibakeimiy Yowbad bigidem nakaleiwag wasigeis yakamiy, bisekes ven mwasanin, igaw tasiyas mo beitams inakaleiwag waseg, mo anagin beivag.

⁴⁴ “Kukin kal bipiyaveig mo kalbaleb bilivet, mamagina bikalivatow wakunuwatan wululay towen mo bigulek won, o kukin gog wululay towen bikalivatow beiweiy gamag teitan mo bikatimimey. Wululay towen yei.”

⁴⁵⁻⁴⁶ Kabebay tasiyas iliganes siyas tanuwgwas lun situwəvek sisiyas tasiyas Palisiy, ikakinsa tatineis askabebay. Sivines kid biyousis Yeisuw. Ta-mawan; iwenes gamags, peinan gamag babaw idokes Yeisuw palopit teitan.

22

Kabebay sagal veivay

(Luk 14:15-24)

¹⁻² Vayuwein Yeisuw ikabebay livanen Yowbad nakaleiwag. Ilana, “Yowbad nakaleiwag mawana guyaw teitan inasagal. Bo isagal peinan natun teitan beivay.

³ “Inasagal avanin ikatineg ikous, ikayabes natouwat mwasanin, idawes gamag bimeis bisagals. Ipiyaves gog.

⁴ “Wankuyeim ikayabes natouwat mwasanin, idawes tasiyas ilansa, ‘Datoveks bo ikatineg kan ikous, bulumakaw kawkəveks bo iweiys ikous, bulumakaw bulaway, askeitub igegeyous, bo iweiys ikous, youd babaw bo ikatinages ikous. Kumeis sagal towen, peinan tamwey natun bo beivay.’

⁵⁻⁶ “Tasiyas gog ipiyaves, issebaws, inounas ineis palatan palatan, teitan in wəbag, teitan in bigimwal, mwasanin gog nisesus waven iyousis tamwey natouwats iyagages. Natouwat tasiyas asimwasin nag bikakit vəgan; mwasanin ge iweiys ikatimates.

⁷ “Guyaw towen iligen, kapasal nuwan, ikayabes takanaviys, ineis iweiys takalbalebs tasiyas ikous, sibunatum babaw igabus kov waseg.

⁸⁻⁹ “Iyums takanaviys; iwage tamwey ilana, ‘Na-ikadilokes tasiyas beikams sagal to nakatineg. Kuneis guntouwat yakamiy, kudawes tasiyas wadadan ked nisesus, kukin kalisiy bukubənes, kudawes bimeis.’

¹⁰ “Inounas palatan palatan, tababaw ibənes mo idawes, mwasanin takalbalebs, mwasanin toubweins. Iliganes, ikatuyouns imeis, bo ikəlawt gamag babaw wasagal.

¹¹⁻¹² “Tamwey towen im bikin gamag babaw-wan, iban teitan ta-isikam sagal kweiman, idibek, ilana, ‘Gwa, amawan nukum, ta-ivag amkweim sagal kweiman?’ Towen isesuna ikikapay.

¹³ “Iw to guyaw, idibakes natouwats ilana, ‘Kuywanis naman kaken taw towen, kulaves bein watoulan, dadub waseg.’ Tasiyas watoulan bivvalams-wan, singaya bigeg ninous.

¹⁴ “Yowbad bo idawes gamag babaw; teyuy-e beisiws bimeis.”

Sisal nataakis

(Mak 12:13-17; Luk 20:20-26)

¹⁵ Siyas Palisiy iliganes, mo ineis, illivans sisiyas, idokes bikatiganes kid mo beibol Yeisuw anilivan.

¹⁶⁻¹⁷ Illivans ee... sinap kweitan mo iton. Ikous mo ikayabes sivamul mwasanin sisiyas Elod nagamag mwasanin, idibakes Yeisuw, ilansa, “Tamwey yak, kakakin amsinap mounid, kakakin Yowbad nakaleiwag kukwatimlakay mounid, o nag kugoulus guyawaw mwasanin, peinan gamag babaw wamatam bo katanok-wan. Wananoum amawan? kadilokeids bitatams Sisal nataakis? o nag? bitapiyaves adok?”

¹⁸⁻¹⁹ Yeisuw gog ikakina asisinap kalbaleb, ilana, “Aveiyag wawun kuyakwaneigs? Tayyaweds yakamiy! Kwatimlakeigs money towen, takis silmanin.” Money katanok mo isekes.

²⁰ Ikow money towen wanaman, ikatimlakes king yagan nises son kululuwan nilel money towen waseg, ikatugan, ilana, “Kavel yagan? kavel kululuwan towen?”

²¹ Ilansa, “Sisal.”

Iw to Yeisuw, ilana, “Sisal navavag bweina kutams Sisal waseg, o Yowbad navavag bweina kutams Yowbad waseg.”

²² Iliganes, isom ninous, iyums ineis wasiven.

Gamag beikits vayuwein

(Mak 12:18-27; Luk 20:27-40)

²³⁻²⁴ Yam towen tasiyas Sadusiy mo inekes Yeisuw. Tasiyas Sadusiy asilivan ilansa, “Gamag nag beikits kanig waseg.” Mapun ikatiganes Yeisuw ilansa, “Tamwey, Moses nakaleiwag mamagina, kukin kal bikanig, nakwaw sam, tage natun nag, kadiloka bwadan beivays son nakwab, igaw mo bikop natun bimlavag tuwan natun.

²⁵ “E, kunutaw teitan wamaven nises, budan teinim tatanok. Kunutaw ivays son nakwaw, natun nag, ikanig, isikein ivays son nakwab.

²⁶ “E, isikein ikanig, natun nag, nakwab ivays son tawanay. Tasiyas tawanay imtamats ikous, nitsiyas nag, oko digumasus mo ivays son nakwab; ikanig, natun nag.

²⁷ “Ikous tawaw babaw, wankuyeim mo ikanig kudavin manawen.

²⁸ “Igaw tutan beikits kanig waseg, vin manawen namwan amtowen? Peinan asibabaw neivays siney.”

²⁹⁻³⁰ Yeisuw gog ikatimop asilivan, ilana, “Ibol ninoumiy, peinan nag kukwakins Bukitab, o peinan nag kukwakins Yowbad natawtoun. Igaw tut wanakougwaw gamag beikits kanig waseg, mo beikous veivay, peinan gamag bimlavags mamagina Yowbad natakayob nisesus walbalab.

³¹⁻³² “E, mounid gamag beikits kanig waseg. Adok nag bukuvinis Yowbad anilivan wasigeis yakamiy, peinan ilana:

‘Yey Ebelam naYowbad yey;

Yey Aysak naYowbad yey;

Yey Yekob naYowbad yey.’

Yowbad nag ikaleiwag takanigs tatuwes wasigeis; nag. Tage tamwamovs wasigeis ikaleiwag.”

³³ Gamag babaw iliganes ansinap, bo isom ninous waseg.

Kaleiwag towen imug

(Mak 12:28-34; Luk 10:25-28)

³⁴⁻³⁶ Tasiyas Palisiy iliganes Yeisuw nikatimop asilivan Sadusiy, nikapays, mo ikatuyouns tasiyas Palisiy, imeis. Palisiy teitan ikatigan Yeisuw, mtowen yatal sinapun ikakin; ikatugan vagan kid biyakwen Yeisuw, ilana, “Dakaleiwags waseg, aw-kaleiwag imug?”

³⁷⁻³⁸ Iw to Yeisuw ilana,
“Kadiloka kusiwayoub daGuyaws Yowbad, kululuwam waseg, kaleivim waseg, o nanoum waseg.”

Kaleiwag towen imug; imgwayes kaleiwag babaw wasigeis.

³⁹ “Kaleiwag tawtoun kwayuwein nises:
‘Kadiloka kuvnases simwey mawana nukuvnaseim tatoneim.’

⁴⁰ “Akweiyuna kaleiwag tasiyas wawun kaleiwag babaw, o wawun siyas palopit asilivan babaw.”

Deibid tabun
(Mak 12:35-37; Luk 20:41-44)

⁴¹⁻⁴² Tasiyas Palisiy ikatuyouns nimeis, Yeisuw mo ikatiganes, ilana, “Waninoumiy Mesay amawan? kavel tabun?”

Iweis tasiyas, ilansa, “Deibid tabun.”

⁴³⁻⁴⁵ Yeisuw mo ikatiganes, ilana, “E, Mesay Deibid tabun; tage kweiboug Yowbad Kululuwan isek Deibid ansinap mo ilivan, idok Mesay inaguyaw tatonen; anilivan mamagina:

‘DaGuyaws idibek gunGuyaw, ilana:

Kusin wagunkatay, vagan bavages beibus siyas astameiliw yak, bukuvnivans wakunutes.’ Peinan Mesay Deibid tabun, amawan Deibid idok tabun naGuyaw tatonen?”

⁴⁶ Bo ikapays tasiyas. Ta-kal bikatimop aygan. Bo iyakous sikatugan waseg Yeisuw. Wankyeim mo igoulus; nag teitan ikatugan waseg, nag.

23

Yeisuw ikanes tasiyas takatimlakeins kaleiwag sisiyas Palisiy
(Mak 12:38-40; Luk 11:37-52; 20:45-47)

¹⁻³ Yeisuw mo idibakes gamag babaw, sisiyas navamul, ilana, “Moses kweiboug ikaleiwag gamag wasigeis, o nagein tut towen siyas takatimlakeins kaleiwag, sisiyas Palisiy, bo ikaliwageids mawan. Mapun kadiloka kukwanawes ages; tage asisinap awoum kukwanawes, peinan nag ivnases kaleiwag tasiyas nisekeids.

⁴ “Sikaleiwag tasiyas mamagina kunamiy singay moumouvit nissekeimiy, tage nag kweitan koun kakit bikawes tatineis.

⁵ “Siwotet iwteles vagan gamag babaw bikines mo bikavasis. Bukitab yageivein mwasanin iyawanis ikaygwagwes wawous vagan gamag bikines, o kweiman tapwoloul issikams vagan gamag babaw bikines.

⁶ “Sivines kid bimgwayes gamag babaw, sagal waseg; o sivines abes wanakaew wanuwan sinagog.

⁷ “Kukin binounas bineis waven sivines kid gamag babaw bikululs wamtes, o bigoulus, billivans, ‘Guntakatimlakay yak.’

⁸ “Awoum gamag bidokeimiy ‘Guntakatimlakay yak,’ awoum; peinan mitakatimlakay anmwanet, o yakamiy katanoka gamag yakamiy. Deisa kulansa, ‘Gwa.’

⁹ “Ven watinow yakkids awoum kudokes teitan, kulansa, ‘Timem,’ peinan Tamads anmwanet nises walbalab.

¹⁰ “Awoum gamag bidokeimiy ‘Guntovek yak,’ peinan mitovek Kelis. Nag tayuwein mitovek nises, nag.

¹¹ “Kukin kal bimlavag mitouwat mtowen mo bimgwayeimiy.

¹² “Kukin kal sivinan bimliguyaw mo beibus; tage kukin kal binib tatonen igaw mo biguyaw.

¹³ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus, peinan kusilbwades Yowbad nakabkaleiwag kidenen; yakamiy nag bukusiws; mogo gamag mwasanin beisiws kid; nag gog, bo kusilbwades. ¹⁴ (-)

¹⁵ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kutavins vena babaw, ikous mo kukuks, bwanit kadiveiyov kudopels. Aveiyag wawun? gamag anmwanet mo bikow mitapwaloul bimlavag gum-Yudiy. Ikous, mo gamag towen kuvages imlavag Seitan angamag, mawana yakamiy, tage bo bilisaweimi ansinap kalbaleb waseg.

¹⁶ “Takatimlakeins gamag yakamiy, bo ibol ninoumiy, singay kalbaleb bukulivatus. Kulivans, ‘Bweina bitatabudabod Yowbad nabunatum waseg, adilivan yaweid, tage bitatabudabod waseg goul towen nises Yowbad wanbunatum, awoum bitayaweid.’

¹⁷ “Bo ibol ninoumiy, amisinap nag. Aveiyag imug? Goul towen imug? O Yowbad nabunatum imug? Mounid Yowbad nabunatum imug, peinan goul nises wanuwan.

¹⁸ “Kulivans-vak, ‘Bweina bitatabudabod abeilun waseg, adilivan yaweid, tage bitatabudabod waseg lun to nises wakunuwatan, awoun bitayaweid.’

¹⁹ “Bo ibol ninoumiy, amisinap nag. Aveiyag imug? lun towen? o dakabeiluns Yowbad wanbunatum, inalun nises wakunuwatan?

²⁰ “Mapun, igaw bukutabudabod abeilun waseg, bo kutabudabod wasigeis youd babaw nisesus wakunuwatan.

²¹ “E bukutabudabod waseg Yowbad nabunatum, bo kutabudabod waseg bunatum son mtowen nises wanuwan.

²² “E, bukutabudabod libalab waseg, bo kutabudabod waseg Yowbad aban son mtowen-vak nissin waseg. Bo ibol ninoumiy yakamiy.

²³ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Gayas siyas kekel minit, dil, kamin, kulagus sinawatan, kalgutan kutams Yowbad waseg, tage Yowbad nakaleiwag avakaiein waseg nag kutams, peinan sinap didumwal kupiyaves, siwayoub kupiyaves, simounid kupiyaves Yowbad waseg. Kadiloka kunuwes sinap siyas avakaiein. Nag gog. Awoum kupiyaves sinap siyas babawan.

²⁴ “Takatimlakeins gamag yakamiy, mitamiy nag. Kwatkakils sinap kakit wasigeis, mamagina pwasigisig wanuwan amivavan mo kupiyaves, tage kamel sona kwanpwanis.

²⁵ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Kwavig o abmin watoulan kwatkakils, kuwidis bwein, gimagim watoulan, tage wanuwan kaeimiy bukuveinaws gamag wasigeis.

²⁶ “Matam nag, Palisiy yak. Bweina beivag amsinap bwein, waseg bukaban kam, mo bukusen wamkwabmavin o amkwavig waseg; babaw mo beibwein watoulan o wanuwan.

²⁷⁻²⁸ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Mamagina alawag yakamiy, dakul watoulan singay ankakin bwein, singaya pwapwakaw, wanuwan gog kalbaleb, gamag tatuwes seiy, youd bikibik seiy. Yakamiy bo mawan, amikakin watoulan gamag ikines, magina sinap didumwal, waninoumiy gog sinap yaweid, ikamimet, kalbaleb seikwan.

²⁹⁻³⁰ “Tayyaweids yakamiy takatimlakeins kaleiwag yakamiy, o yakamiy Palisiy, singay kalbaleb bukulivatus. Tasiyas palopit asisinap didumwal, kweiboug imats, sikalawag nukutoumis, astubub kusenas, mo kulansa, ‘Magat yakids bitasesus sidayas, tammwayas isitut waseg, nag bitalabes igaw iwaweiys siyas palopit.’

³¹⁻³² “Yakamiy gog kulivans mawan, peinan tammwayas tibsiyas yakamiy, amisinap mawana tasiyas, mo bukuyakousis siwotet kalbaleb.

³³ “Mwatet nitun yakamiy, Yowbad bikaleiwag bilaveimiy bukuneis wadiginasim. Tamawan bukusawls bukuneis.

³⁴ “Mapun akayabes palopit babaw, tassinaps babaw, takatimlakeins kaleiwag babaw; tasiyas biwekeimiy, igaw bukwatimates mwasanin, mwasanin bukuweiys waklos, mwasanin wamibuntuman tapwaloul bukuwaeiys vatul waseg, bukwatigigayes mwasanin mo bisawls bineis ven kweitan.

³⁵ “Amisinap mapun mo bukulivatus son mapun asisinap tasiyas kweiboug neiweiys palopits. Ven watinow gimgilis yakamiy nukuweiys tasiyas tadicumwals, nukusilamaws waseg tadicumwal towen Ebel; mo nukuwaeiys tasiyas palopits oko Balakiy natun Sekaliy nukuweiys Yowbad wanbunatum, abeilun palatan, Yowbad nabunatum palakakit palatan.

³⁶ “Mounid adibakeimiy gudwouvaws yakamiy, bo bukulivatus mapun amisinap kalbaleb sona asisinap tasiyas tabgabougs.”

*Yeisuw ivälam peinan Yelusalem
(Luk 13:34-35)*

³⁷ Livänen ven towen Yelusalem Yeisuw mo ilivan mamagina “O Yelusalem gimgilis yakamiy, nukuwaeiys tasiyas palopits, o dakul waseg nukuwaeiys tasiyas Yowbad nikayabes niwekeimiy; tut babaw sivinag bamtakavateimiy mäwana kolkolek imtakavates nitun; nag gog, kupiyaveigs.

³⁸⁻³⁹ “Mapuna Yowbad ipiyev miven. Makava bukusesus. Igaw nag bukukineigs ee... anatut bukulivans, ‘DaGuyaws nikayabeim nukum, mapuna kakavasim,’ mounid mo bukukineigs.”

24

*Igaw bigulekxes Yowbad nabunatum
(Mak 13:1-2; Luk 21:5-6)*

¹ Yeisuw ilisow Yowbad nabunatum, inoun; navamul mo inekes, ikamtilakes Yeisuw bikin Yowbad nabunatum siyas bunamnabweins.

² Yeisuw ikatimop ages, ilana, “Kukines bunsiyas bunatum. Mounid adibakeimiy bo bigulekxes biyakousis; dakul babaw bilaves bikatiggyes.”

*Mouvit tutan nakabsilamaw ven watinow
(Mak 13:3-13; Luk 21:7-19)*

³ Inounas ineis koy towen bigulen oliv nises, isin; tasiyas navamul inekes, ilansa, “Kudibakem asinavin bigulekxes bunatum bunawen bunavakaen; amawan bakakakin avei-tut bukuyum bukum mo beikous ven watinow?”

⁴ Iw to Yeisuw, ilana, “Awoum gamag mwasinis bikatidavimiy.

⁵ “Igaw teitan bisap, bilana, ‘Yey Mesay Kelis ye,’ wankuyeim tayuwein bisap bilana, ‘Yey Mesay Kelis ye,’ wankuyeim tatounun mäwan; e, mäwana mäwana ee... singay babaw. Tasiyas bo bikatidividavs wasigeis gamag babaw.

⁶ “Livänen naviy bukuliganes, livan kweitan kweitan, awoum beiyow nuwamiy, kadiloka bivages mäwan; nakabiyokous tut igaw.

⁷ “Peinan ven kweitan bikanaviys kweitan ven waseg, ven avakaein bikanaviys ven avakaein waseg; ven mwasanin bikamates moun; ven mwasanin nik avakaein bivag.

⁸ “Youd tasiyas moumouvit bisunaps, igaw mo bivakaein.

⁹ “Tasiyas ikamliweimiy mo biyagageimiy, bikatimateimiy; e, vena babaw gimgilis bikamliweimiy peinan gungamag yakamiy.

¹⁰ “Mapuna mwasinis bikalouws; mwasinis bisilkodes sisiyas, bikamliwes.

¹¹ “Palopit siyas mwasanin tayyaweids bisaps, bikatidavis gamag babaw.

¹² “O sinap kalbaleb bo bivakaein, mapuna mo beigwey siwayoub wasigeis gamag babaw.

¹³ “Kukin kalisiy bikaptules, ee... nakabiyokous tut waseg Yowbad mo bikatinabwes.

¹⁴ “Gungamag igaw mo bikawes livanen Yowbad nakaleiwag, biguyes vena babaw wadaban pweppway, bikatiliganes, mo beikous ven watinow.

*Moumouvit anatut
(Mak 13:14-23; Luk 21:20-24)*

¹⁵⁻¹⁶ “Kweiboug palopit Daniyel nilivnek teitan nawotet igaw biyableb Yowbad navavag, youd singay kalbaleb waseg. E, igaw yakamiy bukukines towen Yowbad

wanbunatum. (Bukuvinis liveñ town kadiloka bukukwakins). E, igaw bukukines sinap town, bukusesus Yudiy, kadiloka kusawls kuneis wākoy.

¹⁷ “Magat bukuyeiwas wampwāsiw, awoum kusiw vayuwein wambunatum wanuwan vagan bukukow muwlioug, awoum. Nuwanaw kusawls.

¹⁸ “Magat bukuwotet wābag, awoum bukuyum bukukow amkweim.

¹⁹ “Tut town wanakougwaw singay moumouvit bilivatus siyas vinay kakudāpoms, o siyas vinvanuns.

²⁰ “Kadiloka kunitougs waseg Yowbad vagan awoum bukusawls bulbweilim waseg, o awoum bukusawls Tapwāloul waseg.

²¹ “Peinan tut singay moumouvit. Nag kweitan tut ivag mouvitan māwana town, kweiboug nag, igaw tut wanakoug nag.

²² “Kukin Yowbad nag bigidem moumouvit town, nag kal son mwamovan bises. Tage Yowbad bo bigidem moumouvit, pinamiy inagamag yakamiy.

²³ “Kukin kal bilivan, ‘Mesay town-an,’ o bilivan, ‘Mesay town-one,’ awoum kusimounids waseg.

²⁴ “Peinan tayyaweids mwasanin bisaps, gamag bidokes Mesay tasiyas; o tayyaweids mwasanin bisaps, gamag mwasanin bidokes palopit tasiyas, bikatimlakays aniyes, mamagina naman mulin Yowbad, vagan kid bikatidavis gamag; idokes kid bikatidavis Yowbad nagamag.

²⁵ “Bo akatiboug nuwamiy sinap town.

²⁶ “Kukin gog gamag mwasinis bidibakeimiy, bilansa, ‘Mesay wanawoud nises,’ awoum bukun kukin; awoum. Kukin bilansa, ‘Nises bunatum wanuwan,’ awoum kusimounids.

²⁷ “Igaw Gimgilitoun yey bayum baw, mamagina mititeilin kavikawn bisap wanuvid bimteil ee... bein wayavat, gamag babaw bikines.

²⁸ “Avanuy takanig nises, mansiyas bunibwan bikatuyouns bimeis.

Gimgilitoun beiyum beim

(Mak 13:24-27; Luk 21:25-28)

²⁹ “Moumouvit anatut beikous, kālas mo bidadub, tibukon-vak bikanig mititeilin, siyas wutun walbālab bikalkālouws, youd siyas wanakaew bo beigwey.

³⁰ “Mo bukukines aniyag wanakaew yey Gimgilitoun. Ven babaw gimgilis bivalams, bikiniigs Gimgilitoun yey, bo baw lov waseg, soug guntawtoun o yakawanag avakaein waseg.

³¹ “Bwāgig biyik avakaein vagan guntakayobs bineis bikatiyounis gungamag wanuvid, wayals, wayavat, wabomat, bilisawes vena babaw wadaban pwepway, mo bimekeigs yey.

Yaveinun livānen

(Mak 13:28-31; Luk 21:29-33)

³² “Kabebay nises yaveinun waseg. Kadiloka kuliganes sinapun yaveinun. Bukukin biyāsus yageivein kweivaw mo bukukwakins wuwal bisilamaw.

³³ “Māwan magin bukukines youd tasiyas mo bukukwakins Gimgilitoun yey basap, mamagina wakoukwed nases.

³⁴ “Mounid adibakeimiy gamag yakamiy, igaw son mwamovamiy bukusesus, mo bukukines youd siyas babaw.

³⁵ “Libalab son ven watinow bigulek beikous, tage agulivan nag beikous, nag.

Ta-kal ikakin avei-yam

(Mak 13:32-37; Luk 17:26-30, 34-36)

³⁶ “Ta-kal ikakin avei-yam o avei-tut, nag; min-libālab na-ikakins; yey nag bakakin; misinaka Tamag ikakin.

³⁷ “Māwana tutan Now, māwana tutag yey, Gimgilitoun yey.

³⁸ “Peinan kweiboug anatut yevagam na-ipop ven, gamag ikamkwams, imwamoums, iveivays, Now mo itouw wāwag.

³⁹ “Yam towen na-ikakins ee... kweis mo isap iyagages tasiyas. Mawan magin Gimilitoun yey bayum bam, gamag nag bikakins avei-tut.

⁴⁰ “Tawaw asteiy biwwotets wabag, teitan bakow, teitan bises.

⁴¹ “Vinay asteiy bikanimimayes wit, natan bakow, natan bises.

⁴² “Kadiloka kumtakavateimiy, peinan nag kukwakins avei-tut miGuyaw yey mo bam.

⁴³ “Kadiloka kukwakins sinap towen. Magat tanuwagan bunatum bikakin asinavin boug waseg tavveinaw bisap, bo beikit bimtakavet nabunatum, mata ge tavveinaw ge im iven navavag.

⁴⁴ “Mawan-vak yakamiy, kadiloka kwatunags, peinan Gimilitoun yey bayum, o yakamiy nag kukwakins tutag bayum bam.

Teitan itoukum, teitan igwey

(Luk 12:41-48)

⁴⁵ “Tamwey inagamag isek inawotet vagan tut babaw bivakamus tasiyas wanbunatum nisesus. Yam katanok katanok inawotet towen. Kavel bitoukum nawotet towen waseg? Adok towen ansinap bwein.

⁴⁶ “Igaw natovek beiyum beim, biban nagamag inawotet bwein, bikalin nuwan waseg mtowen; o nagamag towen mo bimwasaw.

⁴⁷ “Mounid mo bisek nagamag towen nawotet mamagina tanuwagan navavag babawan.

⁴⁸⁻⁵¹ “Kukin gog nagamag ansinap kalbaleb, bilivan, ‘Guntovek bo iyouviy,’ mo bikawegweis won, biwaeiys siney, o beikams bimwamoums siney siyas tamwamoums mo bikabalweins, natovek gog igaw mo beim, tutan nag bikakin, bisap, bisibilut, mo bimop ansinap kalbaleb; bilev gamag towen binekes tasiyas tayyaweids, mo bivvalams, singay bigeg ninous.

25

Kabebay guwavin sinawatan

¹ “Tage Yowbad nakaleiwag mamagina guwavin sinawatan, silamp ikawes, inounas binekes kid mtowen taveivay.

² “Nanim nag isinaps bwein; nanim nasinaps.

³⁻⁴ “Tasiyas nag isinaps, ikokews silamp, tagon go nag. Tage sisiyas sam sitagon wabotol.

⁵ “Igaw ikayamats, toge taveivay iyouviy; mites inanup tasiyas, mo imasis.

⁶ “Watapwan boug, teitan iwak, ilana, ‘Taveivay bo neim; kumeis tanekes.’

⁷ “Ikits tasiyas, bivakanotes silamp.

⁸ “Tasiyas nag isinaps idibakes sisiyas, ilansa, ‘Tabta mitagon bukusekemas, ne? Malamp bo imtamats.’

⁹ “Iweis sisiyas, ilansa, ‘Adok nag ampwavin yakamiy mouy yakamey. Kuneis wastow kugimwals.’

¹⁰ “Inounas tasiyas bigimwals, mo isap towen taveivay; tasiyas bo ikatunags ikous mo isiws sisiy towen taveivay, inasagal silmanin; koukwed mo ikatibagus.

¹¹ “Wankuyeim sisiyas mo iyum imeis, itamanaws watoulan bwan, ilansa, ‘Maguyaw yak, kwalijow koukwed pinem yakamey.’

¹² “Iw mtowen, ilana, ‘Nag akakin yakamiy.’ ”

¹³ Yeisuw ilana, “Kadiloka kutoukums, kumtakavateimiy, peinan nag kukwakins aveitut o avei-yam mo bam.

Kabebay money avakaein

(Luk 19:11-27)

¹⁴ “Peinan mawana tamwey teitan binoun bilakwen kweitan ven, idawes natouwat asteitoun, imeis, iseke simoney vagan biwotets waseg.

15 “Teitan gamag tawtoun, isek kweinim tawsan kina. Tayuwein natawtoun kalamwey avakaein, isek akweiy tawsan kina. Tatounun nag bivakaein natawtoun, isek katanok tawsan kina. Isekes ikous, mo inoun in kweitan ven.

16 “Natovek bo inoun, towen gog tatawtoun ikow inamoney kweinim tawsan kina, igaw bikuney mo bikatimweis inamoney. E, inamoney ikatimweis kweinim tawsan kina, imlavag sinawatan tawsan kina.

17 “Mawan-vak tayuwein ikatimweis kweiy tawsan kina, imlavag kweivas tawsan kina.

18 “Tatounun gog, ikow inamoney katanok tawsan kina, ikaviyeil pwepway, idibwen natovek inamoney.

19 “Tut kadiveiyov ikous, iyum sitovek im, idibakes tasiyas bimeis *vagan* bimeyes namoney bikin.

20 “Mtowen nisek kweinim tawsan kina, ikow imey namoney, sinawatan tawsan, ilana, ‘Tamwey, kweinim tawsan nukusekeig towen, son kweinim tawsan aban, bo akatimweis.’

21 “Iw natovek, ilana, ‘Bwein! Guntouwat bwanabwein *yakoum*. Peinan bo kutoukum wotet kakit, mapuna basekeim avakaein. Kusiw kum, gunakabmwwasaw waseg.’

22 “Tayuwein nisek kweiy tawsan kina, ikow imey namoney, ilana, ‘Tamwey, kweiy tawsan nukusekeig towen, son kweiy tawsan aban, bo akatimweis.’

23 “Iw natovek, ilana, ‘Bwein! Guntouwat bwanabwein *yakoum*. Peinan bo kutoukum wotet kakit, mapuna basekeim avakaein. Kusiw kum, gunakabmwwasaw waseg.’

24-25 “Tatounun nisek katanok tawsan kina, ikow imey namoney, ilana, ‘Tamwey, akakin amsinap keikay, anagin gamag siwotet kukokew ven babaw; mapun aweneim, akaviyeil pwepway, adibwen mumoney, bo avnas bwein; nises towena.’

26-27 “Iw natovek, idibek, ilana, ‘Singay tougwey, guntouwat kalbaleb *yakoum*. Kukwakin-wan agusinap keikay, anagin gamag siwotet akokew ven babaw; kadilok-wan bukusen gunmoney wanuwan benk, bikatimweis bibabaw; ga *bayum* bam mo bakow siyas gunmoney babaw.’

28-29 “Natovek mo idibek natouwat teitan, ilana, ‘Kukow inamoney katanok tawsan kina, kusek mtowen tatawtoun, bikatimweis inamoney, bimlavag singay babaw, sinawatan katanok tawsan kina.’ Kukin kal navavag sam, igaw mo bikow bikatimweis, bibabaw. Kukin gog kal ta-ivag navavag, teitan mo bikow aveiyag nises; mounida beidev mtowen.

30 “Sitovek mo ilana, ‘Kadiloka kukow guntouwat towen kalbaleb, kulev bein watoulan, dadub waseg. Tasiyas watoulan bivvalams-wan, singay bigeg ninous.’

Bikaleiwag vena babaw wasigeis

31 “Igaw bam, Gimgilitoun yey, soug yakawanag, o sigwey min-libalab asibabaw, mo basin *abag* bwanabwein waseg.

32-33 “Vena babaw gimgilis bikatuyouns bimeis wamatag, bakatukin. Mamagina tamtakavatein alen bikatukin, alen sip bineis palatan, alen gout bineis palatan. Mansiyas sip bineis wanakatay; tage mansiyas gout bineis wankimaw.

34-36 “Miguyaw yey bakatukin, gamag mwasanin wagunkimaw, mwasanin wagunkatay. Ikous mo badibakes tasiyas wagunkatay nisesus, balana, ‘Kumeis yakamiy, Tamag nisiwayoub wasigeis yakamiy, kweiboug nibun ven watinow mo ikatineg mikabmwwasaw pinamiy yakamiy; e, kumeis kumwasaws. Peinan agumoun, kag nukusekeigs; agudak, soup nukusekeigs; agutowous nag mo nukulabeigs; nases sona mwadoyag, nukusekeigs agukweim; agukwatoun nukuvnaseigs; wadeil nases, nukulakwaneigs.’

37-39 “Tadidumwals tasiyas mo bikatimapus aygag, bilansa, ‘Tamwey, asinavin kakineim soum amumoun kasekeim kam, o amdk kasekeim soup, o amtowous nag mo kalabeim, o sona mwadoyam kasekeim amkweim, o amkwatoun mo kavnaseim, o wadeil nukuses mo kalakwaneim?’

40 “Miguyaw yey mo bakatimop ages, balana, ‘Mounid adibakeimiy, kweiboug nukuleb teitan bwadag takakit, mawan yey bo kulabeig.’

⁴¹ “Mo badibakes tasiyas wagunkimaw isesus, balana, ‘Kulisaweigs takalbalebs yakamiy, amisinap bo ikunakeimiy, kuneis kov towen nag beikous, Yowbad nikatineg silmanin Seitan siney siyas baloum.

⁴²⁻⁴³ “Peinan agumoun, ta-kweitan kag kusekeigs; agudak, ta-kweitan soup kusekeigs; agtowous nag, ta-kulabeigs; sona mwadoyag, ta-kweitan kweim kusekeigs; akatoun, ta-kuvnaseigs; ases wadeil, ta-kulakwaneigs. Takalbaleb yakamiy!”

⁴⁴ “Tasiyas bikatimapus aygag, bilansa, ‘Tamwey, asinavin kakineim amumoun, kakayus gog kan; o amdak, kakayus soup; o amtowous nag, o sona mwadoyam, o amkwatoun, o wadeil kuses, tage nag kalabeim?’

⁴⁵ “Mo bakatimapus asilivan, balana, ‘Mounid adibakeimiy, kweiboug nag kulabes teitan bwadag takakit, mawan yey nag kulabeigs.’

⁴⁶ “Tasiyas asisinap kalbaleb bisiwas watoulan, asisinap kalbaleb mapun bilivatus tut nag beikous; tasiyas gog tadicumwals beisiws abmwamov waseg bisigagas.”

26

Tammwayas sivines beiweiys Yeisuw

(Mak 14:1-2; Luk 22:1-2; Yon 11:45-53)

¹⁻² Iyakousis anilivan tasiyas, Yeisuw mo idibakes navamul, ilana, “Adok kukwakinsa akweiy Yam mo Kaltuwon Sigeilin; teitan mo bisilkodeig, Gimgilitoun yey. Gamag mwasanin mo biyousigs bikatimateigs waklos.”

³ Misiyamun towen tasiyas tanuwgwas lun situwəvek sisiyas tammwayas katuyouns ineis tanuwgwas lun sitovek avakaein wanven, mtowen yagan Kayapas.

⁴ Sivines kid biyousis Yeisuw bikatimates; illivans silmanin.

⁵ Ilansa, “Kadiloka tasinaps beibwein; amawan bitayousis. Awoum bitayousis sagal waseg; peinan gamag singay babaw; adok mwasanin bikayuses, igaw mo bikawanaws.”

Natan vin iptom Yeisuw kunun

(Mak 14:3-9; Yon 12:1-8)

⁶ Yeisuw nises Betaniy, Saymon wanbunatum, mtowen toulepel.

⁷ Natan vin inek Yeisuw, nabotol bwanabwein wanaman, tagon nises, tage maysan singay avakaein. Yeisuw igaw ikamkwam, isap manawen, tagon towen iligubok kunun Yeisuw.

⁸⁻⁹ Navamul ikines, ikavikuns, ilansa, “Bo iyamkwen tagon bwanabwein. Kadiloka biyamiyis, maysan avakaein bikow, money towen bivgen tasiyas tasimavs wasigeis.”

¹⁰⁻¹³ Yeisuw gog bo itilikwen asilivan, ikatimap, ilana, “Awoum kulivans, ivag geg anmwasin. Inawotet bwanabwein waseg yey. Tut babaw tasiyas tasimavs simiyas nukusesus; yey gog kweitan, igaw mo balisaweimiy. Bo iptom woug silmanin anatut bidibwanigs. Mounid adibakeimiy, ampalawen ven watinow igaw bikawes livaneig, o livanen-vak manawen vin bikawes binawes, gamag babaw biliganes, mo bininuways inawotet towen.”

Yudas itam kid bisilkod Yeisuw

(Mak 14:10-11; Luk 22:3-6)

¹⁴⁻¹⁵ Yeisuw navamul sinawatan teiy, teitan gog yagan Yudas Iskaliyot inekes tasiyas tanuwgwas lun situwəvek, ilana, “Kweivin maysan bukusekeigs mo bakamel Yeisuw avanuy misikey-yay, mo bukuyousis?” Isenas money silib sinawatoun, mo itam.

¹⁶ Wankuyeim Yudas inineiv amata-ked bwein waseg mo bisilkod Yeisuw.

Kaltuwon Sigeilin

(Mak 14:12-21; Luk 22:7-14, 21-23; Yon 13:21-30)

¹⁷ Yam towen isilamaws anawik bikatunags silmanin Kaltuwon Sigeilin. Navamul Yeisuw inekes, ilansa, “Avanuy bakakatineg sagal towen vagan bukukwam?” Wik towen nag beikams bled son yist; bwaboum.

¹⁸ Iw to Yeisuw, ilana, “Kunekes mtowen nises waven, kudibakes, kulansa, ‘Matovek ilivan, ilana: Tutag bo alivet, wambunatum bakakam Kaltuwon Sigeilin, sigwey gunavamul.’”

¹⁹ Tasiyas iliganes, ikanawes aygan, inounas, ineis, ikatinages sagal towen.

²⁰ Kwayav mo isinis siney navamul tasiyas sinawatan teiy, beikams.

²¹ Igaw ikamkwams, ilivan, “Mounid adibakeimiy, teitan nises wasigeis yakamiy, igaw mo bisilkodeig.”

²² Singay igegeg ninous, katanok katanok mo idibakes, ilansa, “Tamwey, kal bisilkodeim? Yey? o nag? kavel?”

²³ Ikatimop, ilana, “Mtowen soug kakokew kan wakabmavin, igaw mo bisilkodeig.

²⁴ “Gimgilitoun yey banoy ban makadewen ked nilivnakes Bukitab waseg, tage taw towen tasilkodeig singay kalbaleb bilivet. Magat inan nag bikop taw towen bo bwein, tage bo ikop, mo singaya kalbaleb bilivet.”

²⁵ Tasilkodein Yeisuw yagan Yudas mo ikatigan, ilana, “Guntovek yak, mtowen kavel? Yey?”

Iw to Yeisuw, ilana, “Mawan.”

Datoveks inakamkwam

(Mak 14:22-26; Luk 22:15-20; 1 Kolinit 11:23-25)

²⁶ Igaw ikamkwams, Yeisuw ikow bled, anilivan bwanabwein isek, mo ivgen, isekes inavamul wasigeis, ilana, “Kaeimiy towen wou, kukwams.”

²⁷⁻²⁸ Ikous, mo ikow kwavig, ikalin nuwan Yowbad waseg, ikiv, isekes, ilana, “Tababaws yakamiy kumoums towen buyavig silmanin kaleiwag kweivaw; buyavig iwtawout biwid kid amisinap kalbaleb, simiyas gamag babaw.

²⁹ “Adibakeimiy, nag vayuwein bamoum gleip sipinen ee... anatut kweivaw sipinen mo bitamoums Tamag wanakabkaleiwag.”

³⁰ Asiwous ikanweles ikous, mo isaps ineis koy towen bigulen oliv nises.

Yeisuw ilivnek Pita bikayan

(Mak 14:27-31; Luk 22:31-34; Yon 13:36-38)

³¹ Ineis koy towen, Yeisuw idibakes, ilana, “Boug towen bukupiyaveigs amibabaw-wan yakamiy, livanen nises Bukitab waseg, mamagina: ‘Bawey tamtakavatein mansiyas sip, mo bikatigayes alen.’

³² “Igaw bakt vayuwein mo bamug ban Galiliy waseg; yakamiy wankuyeim, mo kuwekeigs Galiliy waseg.”

³³ Iw to Pita, ilana, “Magat babaw bipiyaveims, yey gog nag bapiyaveim.”

³⁴ Yeisuw ilivan, “Adibakeim yak, boug towen waseg bukwayaneig sivatoun, mo beigel kolkolek.”

³⁵ Iw to Pita, ilana, “Kukin bikatimateims, soug yak bikatimateids aditeiy. Nag bakayaneim, nag.” Inavamul babaw asilivan bo mawan.

Getsemani waseg initoug

(Mak 14:32-42; Luk 22:39-46)

³⁶ Siney navamul mo ineis ven yagan Getsemani, idibakes, ilana, “Kusinis towen. Yey ban palatan anitoug Yowbad waseg.”

³⁷ Mo idawes tasiyas Pita siney Sebediy nitun asteiy, mo ivag asteivas, ineis isiwias; mo igegeg nanon, won imouvit seikwan.

³⁸ Idibakes, “Wouq moumouvit mawana dakul, kakita bakanig adok. Bweina kusesus towen kulalals, kulabeigs nitoug waseg.”

³⁹ Inoun, nag in kadiveiyov, imasis kantukov, initoug, ilana, “Tamag, magat bukutam bo bapiyev kwavig towen, singay yayan; tage amawan yakoum nanoum, nanoug yey awoum.”

⁴⁰⁻⁴¹ Ikous, iyum inekes asteitoun, bo imasis. Idibek Pita, “Ta-bukulalals bukulabeigs tut kadiyakus waseg. Kutoukums, kulalals, kunnitougs; mata ge bukusiws abiyokon waseg. Boiseiw nuwamiy wotet towen, tage tougwey yakamiy.”

⁴² Sivyuein in initoug, ilana, “Tamag, adok nag kadilok bukwayus kwavig towen, bweina b̄amoum. Aveiyag wananoym bo bavag māwan.”

⁴³ Iyum inekes bo imasis, peinan bo inanup mites.

⁴⁴ Sivtounun ilisawes, initoug; anilivan māwana nilivan mo initoug.

⁴⁵⁻⁴⁶ Ikous, iyum inekes navamul, idibakes, ilana, “Igaw kuyeiyas, kummasis. Bo deis! Datuts bo ikous. Bo isap tasilkodeig Gimgilatoun yey. Takalbalebs bo nimeis kid biyousigs yey. Kukits tanounas, tasilkodeig bo isap!”

Iyousis Yeisuw

(Mak 14:43-50; Luk 22:47-53; Yon 18:3-12)

⁴⁷ Yeisuw igaw ilivan, isap inavamul teitan yagan Yudas, siney babaw gamag ikokews sipulut seiy, sinew seiy. Tanuwgwas lun situwāvek sisiyas tammwayas nikayabes nimeis.

⁴⁸ Townen tasilakod bo nidibakes, “Kukin kal bakamuloul soug, townen kuyousis, mtownen Yeisuw.”

⁴⁹ Nuwanaw mo inek Yeisuw, ilivan, “Kalin nuwag guntovet yak,” mo imulouls son.

⁵⁰ Iw to Yeisuw, ilana, “Gwa, wawun nukum?”

Ituts tasiyas, iwekes, iyousis Yeisuw, itawtouns waseg.

⁵¹ Son Yeisuw teitan igut napulut wakaban nises, iweiy natouwat tanuwgwas lun sitovet, ibob teigan.

⁵²⁻⁵⁴ Iw to Yeisuw, ilana, “Kuyamen mupulut, bein wakaban. Tasiyas gog tawayins gamag pulut waseg, igaw bikankānigs pulut waseg. Adok nag kukwakins gunanitoug waseg Tamag, nuwanaw mo beitam min-libālab bilabeigs, singay babaw tawsans. Nag gog. Kukin nag biyousigs, ta-māwan bikamat livāneig Bukitab nilivnek.”

⁵⁵⁻⁵⁶ Misiyamun townen Yeisuw idibakes asibabaw, ilana, “Yam babaw nases Yowbad wanbunatum akatimlakes gamag, ta-kuyousigs. Nagein gog aveiyag wawun kukokews mipulut, minew, nukumeis kuyousigs mamagina tavveinaw yey? Tage youd townen ikamat peinan tasiyas palopit nilivnakes Bukitab waseg.” Navamul aspwāyat ilisawes Yeisuw; mo isawls.

Yeisuw iyātal waseg Kayapas

(Mak 14:53-65; Luk 22:54-55, 63-71; Yon 18:12-14, 19-24)

⁵⁷ Iyousis Yeisuw ikous, inawes Kayapas wanbunatum; mtownen tanuwgwas lun sitovet avakaein. Inaven waseg nikatuyouns nimeis tammwayas sisiyas takatimlakeins kaleiwag.

⁵⁸ Mtownen gog Pita ikikikun wankuyeim ee... isap waven, isin waven siney tamwey townen natouwats, idoki aveiyag binuwakes.

⁵⁹ Tasiyas tanuwgwas lun situwāvek sisiyas takaleiwags babaw inineivs kalisiy biyaweids yātal waseg vagan kid mo bikatimates Yeisuw.

⁶⁰⁻⁶¹ Babaw iyaweids, Yeisuw silmānin, tage nag ibānes silawun yātal, nag.

Wankuyeim asteiy mo imeis, ilansa, “Taw townen ilivan, ‘Kadilokeig bagulek Yowbad nabunatum, yam kweitoun mo bawlulavaw bayakous.’ ”

⁶² Itamanaw tanuwgwas lun sitovet, ikatigan Yeisuw, ilana, “Aveiyag bukwatimop? Aveiyag amsinap townen, tasiyas nillivans?”

⁶³ Yeisuw gog isesuna ikikāpay.

Iwage tanuwgwas lun sitovet, ilana, “Tamwamov Yowbad iligen amlivan yak; kadiloka kulivan mounid. Tab yākoum Yowbad Natun, Mesay? o nag?”

⁶⁴ Yeisuw idibek, ilana, “Māwan amlivan. Vayuwein livan mo badibakeim:

‘Igaw bukukineigs Gimgilatoun yey, biseinig Yowbad wanakatay, guntawtoun waseg; mo bukukineigs wālov walbālab bawekeimiy.’ ”

⁶⁵⁻⁶⁶ Kayapas, kapasal nuwan, iksigeb anakweim, ilana, “Bo kuliganes anilivan townen kalbaleb. Nag ivag sivinads gamag biyateles; babaw yākids nitaliganes anilivan kalbaleb. Amāwan bitanuwakes mtownen?”

⁶⁷⁻⁶⁸ Mo igusus Yeisuw magin, iwaweiys nimes waseg. Igawa iwaweiys, mwasanin ilansa, “Magat yākoum Kelis, bukulivan māwana palopit yākoum, kwavteg yagan kal iweim!”

Pita ikayan Yeisuw

(Mak 14:66-72; Luk 22:56-62; Yon 18:15-18, 25-27)

⁶⁹ Pita igaw nises Kayapas wanven, wamatan nabunatum, tawtelein bunatum nātan inek, ilana, “Adok yākoum soum Yeisuw mukunoys Galiliy nukumeis, ne?”

⁷⁰ Ikayan mtowen, ilana, “Nag. Ta-akakin aveiyag nukulivan.” Babaw gamag ikatiliganes anilivan towen.

⁷¹ Isineikik in wadunan ked waseg, nayuwein vin ikin, idibakes siney, ilana, “Taw towen veiyon gum-Nasalet towen Yeisuw.”

⁷² Ikayan vayuwein, ilana, “Nag bakakin gamag towen. Tamad!”

⁷³ Igaw kakit, tasiyas nitomos wadadan ven iwekes Pita, ilansa, “Adok mounid yākoum veiyon gum-Galiliy yākoum, ne? Peinan aygam māwana aga-Galiliy.”

⁷⁴ Ikavikun Pita, anilivan kalbaleb igegeyous, itabudabod, ilana, “Nag; ta-bakakin taw towen. Tamad!” Mo igel kolkolek.

⁷⁵ Pita inuway Yeisuw anilivan, “Nuwanaw bukupiyaveig sivatoun, mo beigel kolkolek.” Inuway livan towen, isunap, inoun in tanāban, ivālam, singay igeeg nanon.

27

Yeisuw iyātal wamatan Paylat

(Mak 15:1; Luk 23:1-2; Yon 18:28-32)

¹ Iyam-nen gaboug, illivans tasiyas tanuwgwes lun situwāvek sisiyas tammwayas, idokes kadiloka beiweiys Yeisuw, beimat.

² Naman iyawanis vatul waseg, itokes, inawes Paylat waseg, guma-Lom towen sigabman avakaein.

Yudas ikanig

(Wotet 1:18-19)

³⁻⁴ Yudas, mtowen tasilkodein Yeisuw, ikakina beiweiys Yeisuw, ikanavin nanon, iyamen maysan towen, money silib sinawatoun, bisekes kid tanuwgwes lun situwāvek sisiyas tammwayas, ilana, “Agusinap kalbaleb; bo asilkod gamag towen bwanabwein.”

Iweis tasiyas, ilana, “Yākoum muwotet; yakamey nag.”

⁵ Yudas ipiyev money towen, ilev in Yowbad wanbunatum wanuwan, inoun in, ikow vatul, iyawen kayon mo ikayagweg, imat.

⁶ Tasiyas gog tanuwgwes lun situwāvek ikawes money towen, ilana, “Towen maysan gamag buyāvin, awoum binek Yowbad namuloul. Amāwan bitavkakes money towen?”

⁷ Mapuna iyamiyises tawtelein loutan napwepway, vāgan kid bidibwanis takanigs asibwabwal igaw bikankānigs ven towen waseg.

⁸ Peinan money towen maysan gamag buyāvin, mapuna tadokes pwepway towen yagan “Gamag buyāvin pwapwayein.” Tut towen waseg pwepway yagan māwan.

⁹⁻¹⁰ Ivages māwan, mo ikamat livānen palopit towen Yelemay, peinan kweiboug ilivnek mamagina:

“Ikawes money silib sinawatoun, maysan mtowen min-Yisleil bo ikaliwages, mo iyamiyises tawtelein loutan napwepway. DaGuyaws bo ikaliwageig māwan.”

¹¹ Inawes Yeisuw gabman waseg, itow wamatan. Mtowen gabman mo ikatigan, ilana, “Tabta yākoum min-Yudiy siking yākoum?”

Iw to Yeisuw ilana, “Māwan amlivan.”

¹² Tanuwgwes lun situwāveks sisiyas tammwayas mo iyateles Yeisuw; towen gog nag ikatimop ikkāpay-wan.

¹³ Iw to Paylat ilana, “Tab kwatiligen livaneim babaw illivans?”

¹⁴ Towen gog nag kweitan livan iyamen; mapuna gabman towen bo isunasun nanon.

*Ikaleiwag vagan beiweiys Yeisuw**(Mak 15:6-15; Luk 23:13-25; Yon 18:39-19:16)*

¹⁵ Bweilim katanok katanok sagal towen waseg, gabman ansinap bilik tasiwun deil, am-towen sivines tababaw gamag. E, bilik mo bein wamnat.

¹⁶ Teitan wədeil nises, butun avakaein peinan ansinap kalbaleb, yagan Yeisuw Balabas.

¹⁷ Katikunouks gog gamag babaw, Paylat ikatugan, ilana, “Kal sivinamiy? Kwavtagis yagan mo balik bein wamnat. Tabta sivinamiy Yeisuw Balabas? o adok sivinamiy Yeisuw, mtowen idokes Kelis? Takaleiwag yakamiy.”

¹⁸ Ikakin geg iyateles Yeisuw peinan ikamliwes.

¹⁹ Tage mtowen Paylat issin wakaban vagan bikaleiwag, Paylat nakwav mo ikayeb natouwat inek, isek aygan nakwav mamagina, “Awoum kuvag aveiyag taw towen waseg. Gamag towen bwanabwein. Boug akamikon towen silmanin; mapuna singay igeg nanoug.”

²⁰ Bo itatays ninous gamag babaw, tasiyas tanuwgves lun situwəveks sisiyas tammwayas; ilansa, “Kwavtagis Balabas yagan; Yeisuw gog beimat.”

²¹ Vayuwein gabman towen ikatugan; ilana, “Asteiy wədeil nisesus. Am-towen sivinamiy balik beiw wamnat?”

Ilansa, “Balabas.”

²² “Tage aveiyag bavag waseg Yeisuw? Mtowen idokes Kelis.”

Ilansa, “Kwatimet waklos.”

²³ Iw to Paylat ilana, “Aveiyag wawun? Nag ivag ansinap kalbaleb.”

Iweis tasiyas, iwkuwaks, ilansa, “Kwatimet waklos!”

²⁴ Paylat go ikakin ta-mawan binuwek, peinan kakita bisilamaws kawpwanaw; mapuna idow natouwat, ilana, “Soup kumey, bawid namag.” Imey, iwid naman wamtes gamag babaw, ilana, “Yey nag bawey gamag towen bwanabwein; e, takaleiwags yakamiy.”

²⁵ Iweis tasiyas, ilansa, “Yakamey bakakaleiwag, bakawey; mawotet towen mapun bakalivet simayas nitimayas.”

²⁶ Paylat mo ilik Balabas, inekes tasiyas. Ilivan gog Yeisuw beiweiys vatul waseg, bisekes asibabaw bikatimates waklos.

*Takannaviys isibawes Yeisuw**(Mak 15:16-20; Yon 19:2-3)*

²⁷⁻²⁹ Gabman nagamag tasiyas takannaviys itokes Yeisuw inawes wasibunatum bunavakaein. Takannaviys asibabaw ikatuyouns nimeis, inibwis Yeisuw anakweim, ivaskoumis anakweim avakaein bwabwel. Ikous, mo ikawes vatul kulikoul mamagina doudiw, ikwanis isenas wakunun, magina anapay; nakaytuk isekes wanakatay; mo ikululs wamatian, ilansa, “Kalin nuwem yākoum, min-Yudiys siguyaw yākoum!” Isibawes igegayous.

³⁰ Ikous, mo igusus won towen, ikawes nakaytuk iways wakunun.

³¹ Isibawes ikous, mo inibwis maynawen kweim bwabwel, ivaskoumis anakweim tatonen, itokes, inawes beiweiys waklos.

*Iweiys Yeisuw waklos**(Mak 15:21-32; Luk 23:26-43; Yon 19:17-27)*

³² Isekes Yeisuw anklos kaytan beikew, inounas. Wakəd mo ilivatus gum-Saylin yagan Saymon, ilansa, “Kukow anklos taw towen.”

³³ E, Saymon ikokew Yeisuw anklos, inounas ineis koy yagan Golgot. (Takativin livan bein aga-Muyuw ‘Takanig busabwesan.’)

³⁴ Bo isekes Yeisuw wayn son alun beimoum, vagan mamayuy biyеном; ikamkwen, ipiyev.

³⁵ Pwapwat ikatikavates wanaman o wakaken; ikayagweg waklos. Takanaviys tasiyas iyakousis wotet towen, mo ikaliwages anakweim, kalisyi bikawes, mamagina makava ilaves kweitan youd silmanin bikines kalisyi bikawes asikweim tatanok tatanok tasiyas.

³⁶ Ikous, mo isinis, imtakavates.

³⁷ Anklos wakunuwatan ileles nakalbaleb mamagina, “Mtowen Yeisuw, min-Yudiy siGuyaw.”

³⁸ Siney tavveinaws asteiy iweiys waklos, teitan wanakatay, tayuwein wankimaw.

³⁹⁻⁴⁰ Tasiyas gog inounas makadewen ked isibawes, asilivan kalbaleb, ilansa, “Yākoum kudoki bukugulek Yowbad nabunatum, bukuwlulavaw gog yam kweitoun. Magat Yowbad Natun yak, kubus kum, kuymoveim.”

⁴¹⁻⁴³ Mawan-vak tanuwgwas lun situwāvek, sisiyas takatimkakeins kaleiwag, sisiyas tammwayas iyages Yeisuw, ivtokes livan, ilansa, “Bo ikatinabwes gamag mwasanin, nag kadilok bikatinob tatonen.” E, ilansa, “Mtowen kid Yisleil guyawun, kadiloka beibus waklos beim, mo bitaliganes anilivan. Peinan anilivan, ‘Asimounid Tamag Yowbad waseg; yey Yowbad Natun yey.’ Magat Yowbad sivinan gamag towen, kadiloka beim bikatinob.”

⁴⁴ Mawan-vak tavveinaws tasiyas asteiy nikayagwegs wasklos, iyages Yeisuw.

Yeisuw ikanig

(Mak 15:33-41; Luk 23:44-49; Yon 19:28-30)

⁴⁵ Yanay idadub ven babaw ee... kālas itageg mo ikamnat vayuwein.

⁴⁶ Igaw dadub ven, Yeisuw mo iwak, aygan avakaein, ilana, “Eli, Eli. Lamasabaktaniy.” (Takatavini go bein aga-Muyuw waseg: ‘Guna Yowbad! GunaYowbad! Aveiyag wawun nukulisaweig?’)

⁴⁷ Gamag mwasanin nitatos wadadan iliganes, idokes Yeisuw ididow kid Ilaytiy.

⁴⁸ Mapun teitan isawl in, ikow yotout isen wayn yayan wanuwan, ikalawt yotout, ibes wamatian kayal iyasel, isek Yeisuw, imoum.

⁴⁹ Mwasinis gog ilivans, “Ga ises. Adok Ilaytiy beim bikatinob. Ga takines.”

⁵⁰ Vayuwein Yeisuw mo iwak, aygan avakaein, kululuwan ilisow, bo ikanig.

⁵¹⁻⁵³ Maynatan kweim nisilbwed palakakit, Yowbad wanbunatum, tut towen waseg mo iksigeb maynawen kweim; isilamaw wanakaew, iksigeb in watinow, ivag mwayney. Nik ivag, dakul itavis, alawag ikaliyowes, tadiendumwals mwasinis nimmasis wakalugwas, tutan Yeisuw ikit vayuwein mo ikits tasiyas, inounas ineis Yelusalem, gamag babaw ikines.

⁵⁴ Takalikay towen siney tasiyas takannaviys imtakavates Yeisuw, ikines nik, ikines youd siyas nikamats; aspwāyat, ilansa, “Mounid Yowbad natun.”

⁵⁵⁻⁵⁶ Vinay mwasinis itowas tanbes. Nātan vinen-Magdal yagan Meliy; nayuwein valeyin, manawen nitun tasiyas Yemes son Yosep; natounun Sebediy nakwav, ivag nitsiyas tawaw asteiy; sisiyas vinay mwasanin. Tasiyas kweiboug sisay Yeisuw meinoy Galiliy nimeis, o yam babaw imtakavates. E, tasiyas itowas tanbes ikakins.

Yeisuw itakus

(Mak 15:42-47; Luk 23:50-56; Yon 19:38-42)

⁵⁷⁻⁵⁸ Yeisuw inavamul guyaw teitan yagan Yosep. Inaven Alimatiy. Yam towen kwayav waseg inek Paylat, initoug kaleevin Yeisuw bidibwen. Paylat itam.

⁵⁹⁻⁶⁰ Yosep ikow kaleevin Yeisuw, isumweil kweim pwapwākaw gimagim, isen wakalawag. Inakalawag takunumwan kweitan bo itateiys wanuwan dakul, bo imlavag Yosep alawagan tatonen. Isen kaleevin Yeisuw wanuwan, iyatipin dakul avakaein, ikatibwed wadon leg, mo inoun.

⁶¹ Vinay asteiy isiwas tanaban isinis ikikines, vinen-Magdal yagan Meliy son valeyin.

⁶²⁻⁶³ Yam towen ikatunags silmanin sagal. Iyam-nen mo sagal; tasiyas tanuwgwas lun situwāvek sisiyas tasiyas Palisiy mo ikatuyouns inekes Paylat, ilansa, “Tamwey, kanuw anilivan tayyaweid towen, igaw mwamov, ilana, ‘Yam kweitoun mo bākit vayuwein.’”

⁶⁴ “Kadiloka kukwaleiwag gamag mwasanin bimtakavates alawagan kweitoun yam. Mata ge navamul bineis ivenos kaleevin, mo bidibakes gamag, bilansa, ‘Bo ikit vayuwein.’ Singay mo bikatimweisis yaweid, bikatidavis gamag babaw.”

⁶⁵ Iw to Paylat, ilana, “Takaymateins alawag nisesus wasigeis yakamiy. Kuneis kuwteles mawan beibwein.”

⁶⁶ Ineis tasiyas; youd mamagina kaybas ikawes, ipakus wawadon leg; takannaviys isekes siwotet imtakavates alawag towen.

28

Yeisuw itamanaw vayuwein

(Mak 16:1-8; Luk 24:1-12; Yon 20:1-10)

¹ Yam tapwəloul-nen ikous, kadiyakusa beiyam kweivaw wik Sabat waseg, vinen-Magdal yagan Meliy son valeyin, asteiy ineis ilakwanes alawag.

² Nik ivag avakaein. Yowbad natakayob ibus walbalab im, iyatipin dakul, isen wadadan alawag, isin wakunuwatan.

³⁻⁴ Magin immteil mawana kavikawn, anakweim singaya pwapwakaw. Aspwayat takaymateins alawag, itatata wous, ikabalamats imasis.

⁵⁻⁷ Toge anelos idibakes vinay tasiyas, ilana, “Awoum beivag amipwayat. Akakina kunineivs Yeisuw, kudokes kid takanig. Nag. Mtowen bo nein. Bo ikit mawana nilivnek. Kumeis, kukines nakabmasis makawan. Kunuwanaws, kuyum kuneis, kudibakes navamuls, kulansa, ‘Bo ikit kanig waseg.’ Mtowen bo bimgwayeimiy wa-Galiliy, yakamiy wankuyeim kuneis, mo bukunekes. Bo kuliganes agulivan?”

⁸ Mapun ilisawes alawag, isawls, iyow nuwes, bogo imwasaws; isisawls kid bidibakes navamul.

⁹ Isisawls ee... Yeisuw im ilivatus, ilana, “Kalin nuwag.”

Iweis tasiyas, iyousis kaken Yeisuw, magina bitapwəlouls waseg.

¹⁰ Itapwəlouls, Yeisuw mo idibakes, ilana, “Awoum beivag amipwayat. Kunounas, kuneikes budag, kukines bineis Galiliy, mo bikineigs.”

Tamtakavateins alawag asilivan

¹¹ Inounas tasiyas, tamtakavateins alawag mwasinis mo ineis ven towen Yelusalem, inekes tasiyas tanuwgwes lun situwavek, youda babaw ikamteles ikous.

¹²⁻¹³ Katuyouns gog asibabaw sisiyas tammwayas, illivans ikous, mo isekes simoney avakaein takannaviy tasiyas, bital kid mites, ilansa, “Igaw kalisiy bikatiganeimiy, kuyaweids, kulivans, ‘Navamul bo imeis boug waseg, ivenos takanig towen; igaw kammasis yakamey.’

¹⁴ “Kukin gog mitovek avakaein biligen, deisa bakalivan simey towen, bakasowm amisinap.”

¹⁵ Itams tasiyas, ikawes maysan yaweid towen. Asilivan bo mawen; min-Yudiy mo iliganes. Igaw nagein tut towen min-Yudiy asilivan mawen.

Yeisuw isekes siwotet navamul

(Mak 16:14-18; Luk 24:36-49; Yon 20:19-23; Wotet 1:9-11)

¹⁶ Navamul sinawatan tatanok inounas ineis Galiliy, ikatulags koy towen Yeisuw nilivnek.

¹⁷ Ikatulags koy towen, ikines Yeisuw, ikululs wamatan; tage mwasanin nag isimounids bwein, ivag ninous akweiy.

¹⁸⁻²⁰ Iw to Yeisuw, ilana, “Tamag bo isekeig gunakaleiwag babaw, walbalab, watinow. Kuneis kumulis ven babaw gimgilis, kwatimlakes gunaked, kubaptyses Tamag Yowbad yagan waseg, Natun ye yagag waseg, o Kululuwan Towen Bwanabwein yagan waseg; kwatimlakes bivnases kid agulivan towen nasekeimiy. Peinan yam babaw sigwey yakamiy bitasesus ee... igaw mo beikous ven watinow.”

MAK

*Tabibaptaysein gamags yagan Yon
(Matiw 3:1-12; Luk 3:1-17; Yon 1:19-28)*

¹ Livan bwanabwein nakabsilamaw townen; livanen Yeisuw Kelis, mtowen Yowbad natun.

² Livanen Yon nises wanuwan Bukitab, Yowbad anilivan palopit townen Isaya nilel mamagina:

“Kukines guntakayob bakayeb wamatam,
Ikidumwal muked.

³ Tawkuwak wanawoud, ilana,
‘DaGuyaws inaked kuvages beibwein;
Kukidumwalus vagan binoun.’ ”

⁴ Yon igeiguy, makava nawoud waseg, ilana, “Kulavewas amisinap kalbaleb, babaptayseimiy vagan Yowbad biwidimiy bukukwamnats.” Igeiguy mawan mo ibaptyses gamags.

⁵ Gamag babaw inekes Yon wanawoud, siven kweitan kweitan wawnuwan ven Yudiy sisiyas min-Yelusalem babaw, iliganes Yon nageiguy, mo ikamteles asisinap kalbaleb, ipiyaves, mo ibaptyses lay Yoldan wanuwan.

⁶ Yon nag ivag anakweim bwein. Tage wunuunun kamel ivkek anakweim, isikam. Kaleivin man ivkek anawat. Kan ikamkwam kulipaw son kitoul.

⁷⁻⁸ Yon igeiguy, ilivan mawan, ilana, “Yey nag tatawtoun, nag. Tatawtoun wankuyeim beim. Nag kadilokeig bakulul bakablev inasandol. Deisa babaptayseimiy wayevagam, townen gog mo bibaptayseimiy Yowbad Kululuwan Bwanabwein waseg.”

*Yon ibaptays Yeisuw
(Matiw 3:13-17; Luk 3:21-22)*

⁹ Misumkwey townen, Yeisuw meinoy neim Nasalet wawnuwan ven Galiliy, iwek Yon, mo ibaptays Yeisuw, lay Yoldan waseg.

¹⁰ Ibaptays ikous, igalag, mo ikin libalab bo itavis, Kululuwan ibus im, iton wakunuwatan, ankakin mawana bwabun italbelub im watinow.

¹¹ Aygan teitan walbalab ilivan, ilana, “Yakoum natug bwanabwein yak. Singaya ibwein nanoug waseg yakoum.”

*Seitan iyakwen Yeisuw
(Matiw 4:1-11; Luk 4:1-13)*

¹²⁻¹³ Ikous, kululuwan Yowbad mo ikayeb Yeisuw in wanawoud, isiw nawoud makaw waseg, sinawavas yam Seitan iyyakwen. Nawoud townen bulawud man nisesus, tage minlibalab inekes Yeisuw imtakavates.

*Yeisuw islamaw geiguy ven Galiliy waseg
(Matiw 4:12-17; Luk 4:14-15)*

¹⁴⁻¹⁵ Wankuyeim mo iyousis Yon inawes wadeil, Yeisuw mo iyum im waGaliliy, Yowbad livanen bwanabwein waseg igeiguy mamagin, ilana. “Yowbad nakaleiwag bo bisap tut townen waseg. Kadiloka kulavewas amisinap kalbaleb, kusimounids livan bwanabwein waseg.”

*Idawes taplapouls asteivas
(Matiw 4:18-22; Luk 5:1-11)*

¹⁶ Yeisuw inoun in ivvayal wadadan yevagam avakaein, yagan Galiliy, ikin Saymon son bwadan Andiluw iplapouls, peinan siwotet poul-wan.

¹⁷ Yeisuw idibakes, ilana, “Kumeis kwabkunigs yey, mo basekeimiy miwotet kweitan, vagan bukukwanes gamags.”

¹⁸ Iliganas tasiyas; mo ilavewas siwot, ibukunis gog Yeisuw.

¹⁹ Inounas nag kadiveiyov, ikines Sebediy nitun, Yemes son bwadan sisiyas tasiyas nawnataws wanuwan siwag iymieims wot.

²⁰ Yeisuw ikines, mo idawes tasiyas asteiy, ilisawes gog times Sebediy wawag siney natouwats, mo ibukunis Yeisuw.

Takayyeiluw teitan

(Luk 4:31-37)

²¹ Inounas ineis Kapaneyum. Sabat waseg isiw in wabuntuman tapwäloul yagan sinagog, ikatimlakay.

²² Iliganes nakatimlakay, isom ninous, peinan mawan takaleiwag mounid, nag mawan tasiyas takatimlakeins kaleiwag.

²³⁻²⁴ Sinagog wanuwan, takayyeiluw teitan nises, ikin Yeisuw, iwak; tasiyas yeiluw ilansa, “Gum-Nasalet yakoum Yeisuw, awoum kuyagagem. Kulisawem kunoun. Akakina yak Yowbad natun yakoum.”

²⁵ Tage Yeisuw idibek, ilana, “Kukwapay, kukilev gamag towen.”

²⁶ Yeiluw iligen, mo iweiy gamag towen kabalamat, aygan avakaie iwak, ikilev, mo inoun.

²⁷ Asibabaw ikines, isom ninous, illivans sisiyas wasigeis, ilansa, “Aw-kaleiwag towen? Adok kweivaw sinap, tawtoun. Idibek yeiluw mo ikanow aygan.”

²⁸ Butun towen nuwanaw in vena babaw Galiliy waseg.

Takatouns ivag mo ibweins

(Matiw 8:14-17; Luk 4:38-41)

²⁹⁻³⁰ Ilisawes sinagog towen siney Yemes, Yon; sisiyas Saymon, Andiluw, mo isiws wasibunatum tasiyas; togo yawan Saymon ikatoun nimmasis, won muyamuy; idibakes Yeisuw mawan.

³¹ Yeisuw iligen, inek manawen vin, iyous naman, itamnow; bo ibwein, ivag kaeis ikams.

³² Kalas iseilil kwayav waseg, mo imeyes takatouns babaw, sisiyas tasiyas baloum neiweiys.

³³ Ven to gimgilis katuyouns babaw nimeis, itomos wawkwedan bunatum.

³⁴ Tage Yeisuw mo ivag ibweins askatoun kweitan kweitan, o baloum ikayabes isawls. Tasiyas baloum iwtusis Yeisuw, togo nag itam vagan bikamteles.

Ininoun igeiguy

(Luk 4:42-44)

³⁵ Iwotet ikous, imasis, ikous, mo ikit kakita beiyam, tage igaw dadub, isap, inoun in wanawoud, ikulul, initoug waseg Yowbad.

³⁶⁻³⁷ Saymon siney nagamag ikikunis, ibanes Yeisuw, ilansa, “Gamag babaw inineveims yakoum.”

³⁸ Iw to Yeisuw, ilana, “Kumeis, tatavins vena babaw, bageiguy. Bo nam wotet towen silmanin.”

³⁹ Mapuna inounas, igeiguy sinagog katanok katanok waseg, ven Galiliy wawnuwan; o siyas baloum ikkayabes isisawls.

Toulepel ivag ibwein

(Matiw 8:1-4; Luk 5:12-16)

⁴⁰ Toulepel teitan inek Yeisuw, ikulul wamatan, igilagel, ilana, “Tabta sivinam bukuverageig bawbein?”

⁴¹ Yeisuw igeeg nanon, iyasel naman, ikabkwen won, ilana, “Sivinag bukubwein.”

⁴² Ilivan ikous mo ilatimatet won, kaleivin bo ibwein.

⁴³⁻⁴⁴ Yeisuw ikayeb gamag towen, anilivan tawtoun waseg ilivan, ilana, “Awoum kudibek teitan gamag livaneig; awoum. Kukwapay-wan, kunoun kun Yowbad wanbunatum bunavakaein, tanuwagan lun bikineim, muvavag kusek, mawan Moses nakaleiwag kweiboug, vagan gamag bikakins, bilansa, ‘O, bo ibwein.’ ”

⁴⁵ Toge nag iligen, isap, illivan livanen Yeisuw nawotet towen, iliganes gamag babaw. Mapuna Yeisuw nag kadilok binoun wamnat o binoun bein waven, tage isiwana wanawoud, vena babaw imgilis mo ininekes.

2

Takatoun ivag mo ibwein
(Matiw 9:1-8; Luk 5:17-26)

¹ Mwasanin yam ikous iyum vayuwein in Kapaneyum, gamag babaw mo iliganes Yeisuw wabunatum nises.

² Iliganes bulagan Yeisuw nises wanawan bunatum, mo ikatuyouns gamag singaya babaw, ikaven koukwed. Ta-mawan gamag binoun. Tage gamag siyas babaw, silmanin Yeisuw anilivan beinegs, mo isekeks anilivan bwanabwein.

³ Mo imeyes takatoun teitan nimmasis wakaban. Ta-mawan binoun. Mapuna asteivas gamag idagis takatoun in wakaban mo ikawes.

⁴ Sivines kid Yeisuw waseg binawes. Ta-mawan, peinan gamag singay babaw. Mapuna imwens wakunuwatan bunatum, itaboulis tapwan bunatum wakunuwatan Yeisuw, ikaygwagwes takatoun towen sona aban nimmasis, italaves in iton wamatian Yeisuw.

⁵ Yeisuw ikin, ikakina tasiyas inmises takatoun bivag beibwein, mapuna idibek takatoun towen, ilana, “Gwade, bo awid amsinap kalbaleb, ikous.”

⁶⁻⁷ Tage takatimlakeins kaleiwag mwasanin nisinis towen, ikitilutegs anilivan, ininuways, ilansa, “Takalbaleb towen, anilivan mamagina iyeg Yowbad. Yowbad anmwanet ikadilok biwid gamag ansinap kalbaleb.”

⁸⁻⁹ Yeisuw wananon ikakina sikanuway tasiyas, idibakes, ilana, “Aveiyag wawun mikanuway mawan? Bweina balivan balana, ‘Bawid amsinap kalbaleb, beikous,’ o bweina balivan-vak balana, ‘Kutamanaw, kukow abam, kunoun.’”

¹⁰⁻¹¹ “Wotet akweiy gagab waseg ye. Kadiloka bukukwakins Gimilitoun ye, o gunakaleiwag nises ven watinow vagan bawid gamag asisinap kalbaleb, mapuna adibakeim takatoun yak, ‘Kutamanaw, kukow abam, kunoun kun wamven.’”

¹² Iligen takatoun towen, mo itamanaw wamtes tasiyas, ikow aban mo inoun in. Bo isom ninous tasiyas, iyakawanes Yowbad, ilansa, “Kweitana sinap towen. Kweiboug nag takines mawan, nageina mo takines.”

Yeisuw idow Livay
(Matiw 9:9-13; Luk 5:27-32)

¹³ Vayuwein Yeisuw mo inoun, ivayal wadadan yevagam avakaein; gamag babaw ikituyouns inekes, mo ikitimlakes sinap.

¹⁴ Ikous, inoun in, ikin Alpiyow natun yagan Livay, isin wakaban ikokew gamag sitakis; Yeisuw idibek, ilana, “Kwabkunig.” Iligen, mo itamanaw, ibwakun waseg.

¹⁵ Wankuyeim isinis beikams Livay wanbunatum, siney navamul sisiyas takalbalebs tasiyas takaweins takis mwasanin, sisiyas takalbalebs mwasanin. Gamag tasiyas babaw bo ibukunis Yeisuw.

¹⁶ Tasiyas gog takatimlakeins Palisiy sikaleiwag, ikines Yeisuw nikammutans siney takalbalebs tasiyas takaweins takis sisiyas takalbalebs mwasanin, mapuna idibakes Yeisuw navamul, ilansa, “Aveiyag wawun ikammutans siney tasiyas takaweins takis sisiyas takalbalebs mwasanin? Bo igak!”

¹⁷ Yeisuw gog iligen asilivan, idibakes, ilana, “Tasiyas tatawtouns nag sivines doket; misinaka tasiyas takatouns. Yey nag am badawes tasiyas toubweins silmanin Yowbad nakaleiwag, nag. Yey nam silmanin takalbalebs.”

Pos liveyan
(Matiw 9:14-17; Luk 5:33-39)

¹⁸ Ips̄apos tasiyas Yon navamul; Palisiy sivamul-vak ips̄apos. Mapuna gamag mwasanin inekes Yeisuw, ilansa, “Aveiyag wawun Yon navamul ips̄apos, o tasiyas Palisiy sivamul ips̄apos, muvamul gog yakoum nag.”

¹⁹ Iw to Yeisuw, ilana “Taveivay inasagal waseg taliven nag beipos, peinan taveivay towen sisiy nisesus. Singaya imw̄asaws; ta-m̄awan beipos.

²⁰ “Tut gog wankuyeim taveivay bikanig, mo bigeg ninous, beipos yam towen waseg. Taveivay towen mamagina yey.

²¹ “Awoum bitakow bwal kweivaw, bitabweil kweim kweiboug. Awoum. Nag kadilok; igaw bitawtoun bwal bikididul kweim kweiboug, bitadud avakaein.

²² “M̄awan-vak nag ikadilok kunasoup kweiboug bitavgog wayn kweivaw waseg; igaw beilol wayn kweivaw bikatuv kunasoup biyageg; tage wayn biligibaw mo biyamkwen. Tage bitavgwagwes kweivaw kunasoup waseg kweivaw wayn.”

Yeisuw takaleiwag yam tapw̄aloul waseg

(Matiw 12:1-8; Luk 6:1-5)

²³ Wankuyeim, yam Sabat waseg, ikanapels wabag, siney navamul. Inounas, navamul ilapes anagin wit, beikams.

²⁴ Tasiyas gog Palisiy ikines, idibakes Yeisuw, ilansa, “Kukines muvamul isiplaves Sabat kaleiwag-nen.”

²⁵⁻²⁶ Iw to Yeisuw, ilana, “Adok livanen Deibid, w̄abuk bo kuvinis, tage ninoumiy nag ikamnat. Peinan Deibid siney nagamag asimoun, isiw in wanuwan Yowbad nabunatum, ikow bled towen nisenas silmanin Yowbad, ikams siney nagamag. Nag kadilokes beikams bled towen; bwaboum. Misinaka tanuwgwas lun beikams; tage tanuwgwas lun sitovek Ebatal itam, peinan singaya asimoun, isekes Deibid siney nagamag, ikams.”

²⁷⁻²⁸ Wankuyeim Yeisuw idibakes, ilana, “Sabat pines gamags, nag gamag peinan Sabat, nag. Kadiloka bukukwakins Gimilitoun yey tanuwagan Sabat yey.”

3

Taw teitan naman ipam

(Matiw 12:9-14; Luk 6:6-11)

¹ Vayuwein Yeisuw inoun in wasinagog, taw teitan nises, naman ipam.

² Tasiyas gog nikamliwes Yeisuw ikakins, idokes kid bivag taw towen beibwein mo biyateles, peinan iwotet Sabat waseg.

³ Yeisuw gog idibek toupam towen, ilana, “Kum, kutom, kutamanaw wamtes gamags.”

⁴ Im, item, itamanaw wamtes, Yeisuw idibakes, ilana, “Tab kadilok Sabat waseg bital-abes gamags o adok bitayagages gamags? Bitayamoves gamags o adok bitakatimates?” Tasiyas gog isesuska ikkapays.

⁵ Bo igeg nanon peinan tayakeikays tasiyas. Kapasal nuwan, ikikines ikous, mo idibek toupam towen, ilana, “Kuyasel namam.” Iyasel, bo ibwein.

⁶ Tasiyas Palisiy ikines, mo isaps, illivans sisiyas gamag tasiyas sivines Elod nakaleiwag; amata ked waseg mo beiweiys Yeisuw.

Gamag babaw wadadan yevagam

⁷⁻⁸ Wankuyeim Yeisuw siney navamul inounas bineis kid wayvagam; singay babaw gamag ikabkunis, min-Galiliy, min-Yudiy, min-Yerusalem, min-Idumi, sisiyas tasiyas misikes Yoldan wanpalatan o walasin ven wunsiyas Tayil son Sidon, singay babaw gamag niliganes butun nawotet Yeisuw, mo inekes.

⁹⁻¹⁰ Ikatuyouns inekes, takatouns babaw ivag ibweins, mapuna tasiyas askatoun kweitan kweitan ipapeps sisiyas wawous, sivines kid bikabkwanes Yeisuw. Yeisuw mo idibakes navamul, ilana, “Kunibwis wag, kukin gamag babaw biyabinigs mo batouw wawag.”

¹¹ Tasiyas gog takayyeiluws bikalkalouws Yeisuw wamatian mo beiwaks, bilansa, “Yakoum Yowbad natun yakoum,” peinan yeiluw tasiyas bo iwtusis Yeisuw.

¹² Tage Yeisuw singaya anilivan tawtoun idibakes, ilana, “Awoum kwamteleigs peinan Yowbad natun yey.”

Navamul sinawatan teiy

(Matiw 10:1-4; Luk 6:12-16)

¹³ Wankuyeim ikatulag in wəkoy, kalisiy tasiyas itimek nanon ikatigikes, mo idawes inekes.

¹⁴⁻¹⁵ Bo ikatigik tasiyas sinawatan teiy, mamagina takaweins anilivan, siney bisesus mo bikayabes vəgan bigeiguy o bitawtouns wasigeis yeiluw, bikayabes.

¹⁶ Tasiyas sinawatan teiy yiges Saymon, mtownen idok Pita;

¹⁷ Sebediy nitun Yemes son bwadan Yon, idokes Bowanages, peinan asisinap məwana palalap tasiyas;

¹⁸⁻¹⁹ Andiluw, Pilip, Batolomiw, Matiw, Tomas, Yemes, mtownen Alpiyow natun, Tadiw, gum-Keinan yagan Saymon, Yudas Iskaliyot, mtownen tasilkodein Yeisuw.

Idokes bwagaw ileb Yeisuw

(Matiw 12:22-32; Luk 11:14-23; 12:10)

²⁰ Ikous, iyum in wanven, babaw gamag mo ikatuyouns inekes. Nawotet singay avakaein wasigeis tasiyas babaw gamag. Ta-mawan beikam.

²¹ Taliven livənen Yeisuw iliganes, idokes bo ikabaləwein, bineis kid bitokes binawes.

²² Tasiyas gog takatimlakeins kaleiwag meinoy nimeis Yelusalem, ikines Yeisuw, ilansa, “Bwagaw ileb. Adok tasiyas tabbwagaws sitovek Seitan mtownen nileb Yeisuw, mo ikayabes yeiluw.”

²³ Iw to Yeisuw, ikabebay, idibakes ilana, “Ta-mawan Seitan bigulek nawotet tatonen.

²⁴ “Kukin nagamag bilivis bimlavags bod kweitan kweitan, mo bikalouw nakaleiwag.

²⁵ “Wanbunatum-vak, kukin bilivis bimlavag bod kweitan kweitan, mo beikous nabunatum gimgilis.

²⁶ “Seitan-vak məwan, kukin bigulek nawotet tatonen, o biliv inabod, mo bikalouw, nakaleiwag bo beikous.

²⁷ “Kukin bitasiw wanuwan tatawtoun townen Seitan nabunatum, bitaven navavag, kadiloka bitayous mtownen, tayawen naman kaken, mo bitakow navavag beikous. Bwagaw nag ilabeigs; nag. Yowbad Kululuwan ilabeig.

²⁸⁻²⁹ “Mounid adibakeimiy amisinap singay kalbaleb, peinan kuyages Kululuwan Townen Bwanabwein. Gamag asisinap babaw Yowbad biwid; sikalbaleb, o asilivan kalbaleb nillivans, Yowbad biwidis beikous; tage kukin biyages Kululuwan Townen Bwanabwein, nag biwid, peinan asisinap to kalbaleb bises bisiseg. Nag kweitan tut biwid, nag.”

³⁰ Yeisuw anilivan məwan peinan ilansa, “Bwagaw ileb.”

Yeisuw inan budan

(Matiw 12:46-50; Luk 8:19-21)

³¹ Yeisuw inan budan nimeis itemos watoulan gamag babaw, ikayabes gamag mwasanin bidawes beim.

³² Inekes Yeisuw, gamag babaw nisinis wadadan, ilansa, “Inam siney budam inin-eveims; watoulan nisesus.”

³³ Iw to Yeisuw, ilana, “Kavel inag o bwadag?”

³⁴⁻³⁵ Mo ikatimlek bikin gamag siyas nisinis wadadan, ilana, “Tasiyasa inag o bwadag. O kukin kal bikanow aygan Yowbad, mtownen bwadag o nagut o inag.”

Talavein kaytul

(Matiw 13:1-9; Luk 8:4-8)

¹ Vayuwein inoun in yevagam avakaein wadadan mo ikatimlakes gamags, peinan singay babaw gamag katuyouns inekes, mapuna itouw w̄awag, isin, ikatimlakes gamag tasiyas wanakaew nisesus.

² Ikatimlakes, nakabebay babaw iseke, idibakes mamagina:

³ “Kuliganes yakamiy. Talavein kaytul wit inoun in w̄abag, ilivelov nakaytul.

⁴ “Kaytul mwasanin ikalkalouw ininein waked, man iyoyows imimeis, ikoums ikamiyeivis.

⁵⁻⁶ “Kaytul mwasanin ikalkalouw ininein wadikudakul; nag ivag pwepway-nen, tage nuwanaw isob, wankuyeim ikal k̄las, ikalayag peinan gidwalin nag inek pwepway.

⁷ “Kaytul mwasanin ikalkalouw inek doudiw kaytul-nen, isibw̄asobs son doudiw, tage doudiw itawtoun; wit nag ivag anagin.

⁸ “Tage kaytul mwasanin ikalkalouw ininein wasapon isibw̄asobs, ivakaein, ivag kan babaw; kaytan wit anagin sinawatoun, kaytan wit anagin sinawanim, kaytan wit lakatutan.”

⁹ Ikous nakabebay towen, ilivan, ilana, “Kal yak sam teigam, bweina kuligen.”

Silawun nakabebay

(Matiw 13:10-17; Luk 8:9-10)

¹⁰ Wankuyeim gamag babaw ilisawes Yeisuw, asteiyuy sisiy nisesus, mo ikatiganes Yeisuw sisiyas inavamul sinawatan teiy; sivines bikakins nakabebay silawun.

¹¹ Iw to Yeisuw, mo idibakes, ilana, “Sinapun Yowbad o nakaleiwag kukwakins yakamiy, tage tasiyas watoulan biliganes kabebay, tage nag bikakins silawun.

¹² “Mapuna

‘Mites bikines tage nag biwtusis.

Tiges biliganes tage nag bikakins.

Vagan nag bikanavin ninous, nag biwidis asisinap kalbaleb, nag.’ ”

Yeisuw ilik ankabebay

(Matiw 13:18-23; Luk 8:11-15)

¹³ Yeisuw mo idibakes, ilana, “Adok nag kukwakins kabebay towen. Amawan bukuwkakes mo bukuwkakins kabebay babaw?

¹⁴ “Mtowen talavein kaytul mamagina livan bilivelov.

¹⁵ “Siyas nikalkalouw waked man bikawtawes mamagina gamag iliganes bwanabwein, nag inuwes beibwein livan towen, mo isap Seitan, ikwey livan towen.

¹⁶⁻¹⁷ “Siyas nikalkalouw wadikudakul mamagina gamag tasiyas bo iliganes livan bwanabwein, sona simw̄asaw mo itams waseg. Tage nag ikakins livan silawun, mamagina gidwalis nag binek pwepway, nuwanaw mo ikalouws. Gamag tasiyas beitams livan towen waseg, mapuna gamag mwasanin biyagages, abes bigeg, nuwanaw mo bikalouws.

¹⁸⁻¹⁹ “Siyas gog nisibw̄asobs son doudiw mamagina gamag tasiyas iliganes livan towen, tage ininuways sinapun ven watinow, o sivines biguyaws o bimw̄asaws youd kweitan kweitan waseg, mapuna inumlates livan towen; nag ivag anagin; mamagina bo ikwen doudiw.

²⁰ “Tage tasiyas wasapon, mamagina gamag tasiyas iliganes livan, itams waseg, ivag angis, mwasinis sinawatoun, mwasinis sinawanim, mwasinis lakatutan.”

Lamp bitasen watebol

(Luk 8:16-18)

²¹ Wankuyeim mo ikabebay, idibakes, ilana, “Nag teitan bikow nalamp bikatgubwel loutan wakunuwatan; nag bisen keb waskawan, nag. Tage dalamp bitasen watebol.

²² “Aveiyag bitasowum, igaw mo bikamat. Aw-livan bitakatmw̄alag, igaw gamag babaw mo biliganes.

²³ “Kal yakoum sam teigam, bweina kuligen.”

²⁴ Ikous, mo idibakes, ilana, “Kuvn̄ases livan to kuliganes. Aveiyag kusekes gamags, Yowbad mo bisekeimiy, o bikatimweis bibabaw.

²⁵ “Kukin mivavag nises, Yowbad mo bisekeimiy bibabaw; kukin gog mivavag nag, mo biyamen aveiyag nises, bikow, vagan bukudeivs.”

Kaytul isibwasobs

²⁶⁻²⁷ Wankuyeim ilivan, ilana, “Yowbad nakaleiwag amawan? Adok mawan gamag teitan ilivelov kaytul ininein w̄bag, iyum in, ises, ee... Yam mwasanin ikous, kaytul mo isob, ivakaein; tage nag ikakin silawun.

²⁸ “Pwepway nakaleiwag tatonen, kan isob, ivakaein mo ilal, ivag anagin.

²⁹ “Anagin bimatuw, nuwanaw mo bitayow, peinan anatut tayoy.”

Tipol kaytul-nen

(Matiw 13:31-32; Luk 13:18-19)

³⁰⁻³² Wankuyeim ilivan, ilana, “Kweitan kabebay mawan towen kuliganes vagan bukukwakins Yowbad nakaleiwag. Adok mawana tipol kaytul-nen, bitasop singay kakit, tage beicob mo bimlavag kay avakaein, yayagen kawk̄aveks; man biyoyows bimimeis biwlules sibwan wayayagein.”

Yeisuw nakabebay babaw

(Matiw 13:34-35)

³³ Nakabebay mawan singay babaw ansinap ikatpel isekes. Aveiyag ikadilokes bikakins mo isekes mawan.

³⁴ Nag anilivan didumwal isekes, nag; kabebay-wan. Wankuyeim siney navamul tatonen, tasiyas-wan mo ilik vagan silawun meiveka kabebay bikakins.

Bwaw idibek mo iyenom

(Matiw 8:23-27; Luk 8:22-25)

³⁵ Yam towen kwayav, Yeisuw w̄wag nises, idibakes, ilana, “Kumeis kutouws tadopels, taneis palatan.”

³⁶ Itouws tasiyas, ilisawes gamag babaw nisesus waven mo idopels bineis palatan, ikavetans sisiyas mwasanin wag.

³⁷ Isisawls, bwaw avakaein ilivatus, soup inay-o; kakita bimukul wag.

³⁸ Togo Yeisuw nikow abeikun, nisen wawawun wag, imasis kangagay, mo inekes, iwgunis, ilansa, “Tamwey, kikit, tabta kukwakin kakita bitamtamats?”

³⁹ Iligen, ikit, idibek yag son kaysay, ilana, “Deisa! Beitay!” Yag mo idabab, niwal avakaein.

⁴⁰ Ikous, mo idibakes tasiyas, ilana, “Wawun amipwayat? Adok nag kusimounids waseg yey, ne?”

⁴¹ Singaya igoulus, sisiyas illivans, ilansa, “Amata taw towen? Idibakew yag son kaysay, mo ikanawes aygan.”

Takayeiluw ven Gelasin waseg

(Matiw 8:28-34; Luk 8:26-39)

¹ Idopels ineis palatan, ilugs ven Gelasin waseg.

² Yeisuw ibus, in wanakaew, mo takayeiluw teitan isap, imek. Bo ilisow alawag towen takunumwan, inoun imek Yeisuw.

³⁻⁴ Taw towen nag ivag nabunatum, immasisa wakalawag. Nag teitan gamag kadilok bitawtoun biyous taw towen, biyawen sen waseg. Tut babaw niyawwanis sen waseg o kaken nikiptukwes amweilok waseg, tage ivatay, iwlitun sen, iwut amweilok kaken waseg mo isawl. Tut babaw mawan-wan. Nag teitan gamag kadilok vayuwein biyous.

⁵ Mapuna nises wakalawag o w̄koy, biikuwak-wana beiyam oko beiboug, mo biwekey dakul bikow, tatonena-wan biwaway w̄won.

- ⁶ Tage Yeisuw ilug im, ikin kadiveiyov, isawl im, bikulul kid wamatān.
- ⁷ Aygan avakaēin iwak, ilana, “Aveiyag bukunuwakeig Yeisuw, yākoum Tamam Yowbad walbałab. Kunuway Tamam; mata kuweig, ke?”
- ⁸ Anilivan māwan peinan Yeisuw bo idibek yeiluw bilisow kid gamag towen, binoun.
- ⁹ Yeisuw ikatigan yeiluw ilana, “Yeiluw yākoum, amiyagam?” Iw to yeiluw, ilana, “Yagag Kamimet, peinan meiveka yakamey kāsiw nakases.”
- ¹⁰ Mo igilagel waseg Yeisuw, ilana, “Awoum kwayabem bakan kadiveiyov.”
- ¹¹ Tage bwaloud babaw ikamkwams awuyow wākoy.
- ¹² Siyas yeiluw igilagels, ilansa, “Kwayabem bakan bwaloud wanuwes.”
- ¹³ Itam, ilana, “Kuweis.” Iweis gog, isiws wanuwes bwaloud, mo isisawls, ineis koy tigtageg waseg mo ikalkalouws inineis wayvagam, iwgweles, bwaloud singay babaw, mamagina akweij tawsan.
- ¹⁴ Tasiyas gog tamtakavateins aleis, isawls, ikamteles youd towen wawnovek o vena babaw wasigeis. Iliganes gamag babaw, bisaps kid bineis ikines.
- ¹⁵ Isaps, inekes Yeisuw, ikines towen takayeiluw bo ibwein, bo isikam anakweim, nissin wadadan. Bo iyow nuwes peinan ikakins yeiluw babaw neisiws wanuwan taw towen; nagein gog bo ibwein. ¹⁶ Gamag mwasanin nisesus, ikines takayeiluw bo ibwein, yeiluw mo iyagages bwaloud, wankuyeim mo ikamteles gamag tasiyas mwana nimeis.
- ¹⁷ Iliganes tasiyas mo igilagels waseg Yeisuw sivines bilisow siven, binoun.
- ¹⁸ Mapuna itouw wāwag, bo beiyum. Toge takayeiluw mtowen mwana neibwein igilagel waseg Yeisuw, sivinan kid sona bineis.
- ¹⁹ Yeisuw gog ipiyev, ilana “Nag. Bweina kuyum kun wamven, kudibakes talawom mo bikakins amāwan daGuyaws nikalin nuwan waseg yākoum, ilabeim.”
- ²⁰ Iligen, iyum, in ikāmat amāwan nivkek Yeisuw nileb. Wawnuwan ven towen Dekapolis gamag babaw iliganes, mo isom ninous.

Vinay asteiy ibweins

(Matiw 9:18-26; Luk 8:40-56)

- ²¹ Yeisuw siney navamul idopels, iyums ineis palatan; babaw gamag iliganes, ikatuyouns imekes Yeisuw, igaw nises walasin yevagam avakaēin.
- ²²⁻²³ Isap tanuwagan sinagog teitan, yagan Yelos, ikin Yeisuw, ikulul avakaēin wamatān, igilagel, ilana, “Natug kudāvin ankatoun avakaēin. Kum kusen namam wāwon kuyamov.”
- ²⁴ Yeisuw itam, mo inounas ineis son taw towen. Singay babaw gamag ibwākuns waseg, ipapeps wāwon.
- ²⁵ Inounas, nātan vin nakatoun inek Yeisuw. Ankatoun peinan buyāvin iwtāwout sinawatan kweylim; nag imdāmad.
- ²⁶ Doket babaw iyyokons, bo nag. Vin nāwen namoney igimwelena bo iyakous; tage doket tasiyas nag ilabes bwein vin manāwen, ankatoun bo ivakaeina singay.
- ²⁷ Manāwen vin bo iligen bulagan Yeisuw, isiw wanuwan gamag babaw, ikikun ee... mo ikabkwen anakweim matan.
- ²⁸ Idoki misinaka bikabkwen anakweim matan mo beibwein.
- ²⁹ Ikabkwen, nuwanaw mo imad buyāvin; isimkwen wāwon, ikakina bo ibwein.
- ³⁰ Tage Yeisuw isimkwen natawtoun bo ilisow won, itouvin wanuwein gamag babaw, ilana, “Kal ikabkwen agukweim?”
- ³¹ Iweis navamul, ilansa, “Gamag singay babaw ipapeps wāwom. Aveiyag wawun kulana, ‘Kal ikabkwaneig?’”
- ³² Tage Yeisuw ivvatus gamag babaw, bikin kid kal nikabkwen.
- ³³ Vin manāwen ikakina bo ibwein won, anpwayat seikwan, tage inek Yeisuw, ikulul wamatān, ikamtel anilivan iyakous.
- ³⁴ Iwage Yeisuw, idibek ilana, “Vin yākoum, nukusimounid waseg yey, mapuna bo kubwein. Mwāsaw waseg kunoun, peinan amkwatoun bo ikous.”

³⁵ Igawa illivan, teitan gog gamag meinoy neim tanuwagan sinagog wanbunatum, idibek, ilana, “Natum bo ikanig. Awoum kweitan wotet kusek takatimlakay towen.”

³⁶ Yeisuw gog iligen, idibek tanuwagan sinagog, ilana, “Awoum bikubukub nuwam, bweina bukusimounid.”

³⁷ Yeisuw ilana, “Awoum kumeis tababaw yakamiy. Bweina yey sigwey gunavamul tasiyas Pita, Yemes son bwadan Yon, o gwad taman. Misinaka amateinim.”

³⁸⁻³⁹ Isaps tanuwagan sinagog wanven, ikines tavvalams ivvalams, talloupids illoupids, ages avakaein. Isiw, ilana, “Aveiyag wawun kuvvalams, agamiy avakaein? Gwad n̄wen na-ikanig; immasis-wan.”

⁴⁰ Tasiyas gog igagigs issibawes. Yeisuw mo idibakes babaw bineis watoulan; misinaka gwad taman inan, sisiyas navamul asteitoun sisiy binekes gwad nimsik-yay.

⁴¹ Yeisuw inek gwad towen, iyous naman, ilana, “Talita koum.” (Takativini gog bein aga-Muyuw, mamagina, “Gwade, adibakeim kukit.”)

⁴² Gwad n̄wen nuwanaw itamanaw inoun, anbweilim mamagina sinawatan kweiy. Ikines, singay isom ninous tasiyas.

⁴³ To go Yeisuw anilivan tawtoun idibakes, ilana, “Awoum kwamteles youd towen”, mo ilana, “Kan kusekes nitumiy beikam.”

6

Min-Nasalet ipiyaves Yeisuw

(Matiw 13:53-58; Luk 4:16-30)

¹ Yeisuw ilisow ven towen, iyum in wanven tatonen; navamul gog ibbwakuns waseg.

²⁻³ S̄abat waseg isilamaw nakatimlakay wasinagog. Tanganebs babaw isom ninous, ilansa, “Amawan singaya isinap taw towen? Kal isek ansinap mo iwotet singay tawtoun wanaman waseg? Adok towen tawtelein amweilok, ne? Inan Meliy, budan tasiyas Yemes, Yoses, Yud, Saymon, sisiyas nunet nitasesus sidayas.” Mapuna mo ipiyaves mtownen Yeisuw.

⁴ Iw to Yeisuw, idibakes, ilana, “Vena babaw itams palopit waseg. Misinaka naven tatonen bipiyev, o taliven tasiyas wanbunatum bipiyaves.”

⁵ Mapuna ven towen waseg ta-mawan biwotet tawtoun. Deisa takatouns asteiyuy isen naman wawous mo ibweins.

⁶ Bo isom nanon peinan nag bisimounids ven towen waseg.

Navamul sinawatan teiy siwotet

(Matiw 10:1, 5-15; Luk 9:1-6)

⁷⁻⁹ Tage it̄avin ven mwasanin, ikatimlakay. Mo idawes navamul sinawatan teiy, ikayabes asteiy asteiy bineis ven babaw; isek sitawtoun v̄agan bikayabes yeiluw; ilana, “Awoum kunamiy kukawes waked; misinaka mikaytuk; kaeimiw awoum; amikaw awoum, mimoney awoum; misinaka sandol kuvaligaves wakikeimiy; amikweim mwayntanok.”

¹⁰ Ilana, “Bukuneis kweitan ven, awoum kuglagals, kokin kal wanbunatum bukusiws, bweina bukusesusa bunatum towen oko tutan bo bukuneis mo bukunounas.

¹¹ “Kokin ven kweitan bipiyaveimiy, o bipiyaves amilivan, kadiloka kulisawes ven towen, kwatsapis musmusan pwepway wakikeimiy bininein wasiven mo bikakins asisnap kalbaleb.”

¹²⁻¹³ Iliganes tasiyas sinawatan teiy inounas iggeiguis v̄agan gamag bikanavin ninous; o ikkayabes yeiluw babaw, o takatounsa babaw ilgubokes tagon wawous mo ibweins.

Tabibaptaysein gamags ibwabwes kayon

(Matiw 14:1-12; Luk 9:7-9)

¹⁴ Inounas tasiyas, king towen Elod iligen bulagan, peinan babaw gamag niliganes livanen Yeisuw. Gamag mwasanin idokes Yon bo ikit kanig waseg, mapuna Yeisuw nawotet singaya tawtoun.

¹⁵ Mwasanin gog ilansa, “Mtowen Ilaytiy.” Tage mwasanin ilansa, “Mtowen palopit mawana siyas palopits kweiboug.”

¹⁶ Tage Elod iligen bulagan Yeisuw mo ilana, “Mtowen Yon, nabob kayon, tage bo imov vayuwein.”

¹⁷⁻¹⁸ Kweiboug Yon ikan Elod ilana, “Amsinap kalbaleb, kuvagut bwadam nakwaw.” Peinan bwadan Pilip nakwaw Elodiyas ivagut mtowen Elod. Yon ikanan, mo igeeg nanon mtowen Elod, ikayeb natouwats iyousis Yon, iyawanis naman, isen wanuwan deil.

¹⁹⁻²⁰ Elodiyas-vak ikamliw Yon, sivinan beiweiy. Nag gog, peinan Elod ikayus, iwen Yon, ikakina gamag tadinumwal, bwanabwein; ikayus, sivinan biligen aygan, tage Yon anilivan waseg mo iyageg nanon Elod.

²¹ Manawen vin sivinan beiweiy Yon, ikayamat oko Elod isagal, anvavan sigeilin, peinan yam towen inan nikop, ikamkwam siney tasiyas gabmans sisiyas takalikays sisiyas min-Galiliy situwaveks.

²²⁻²³ Tasiyas ikamkwams imwamoums, mo isap Elodiyas natun kudavin isilasal. Isilasal oko ikalin nuwes tasiyas sisiy Elod, idibek gwad manawen, ilana, “Aveiyag sivinam, kulivan mo basekeim.” Itabudabod, ilana, “Magat sivinam baliv gunaven to namtakavet, palatadadan yak, palatadadan yey. Bweina kulivan mo baliv basekeim palatan.”

²⁴ Gwad manawen iligen, in watoulan, ikatigan inan, ilana, “Aveiyag balivan?”

Iwage inan, ilana, “Kulivan busabwesan Yon, tabaptaysein gamags.”

²⁵ Iligen, nuwanawa iyum, inek king towen, initoug, ilana, “Sivinag Yon busabwesan kusen wakabmavin mo kusekeig, mtowen tabaptaysein gamags.”

²⁶ Iligen king towen, igeeg nanon, tage nag bipiyev, peinan bo itabudabod, o tasiyas siney bo iliganes anilivan.

²⁷⁻²⁸ Mapuna ikayeb takaymatein bunatum teitan, ilana, “Kun kubob kayon Yon, busabwesan kudeg wakabmavin kumey.” Inoun in wadeil, ibob kayon Yon, busabwesan isen wakabmavin, imey, isek gwad manawen; ikow, inow, isek inan.

²⁹ Inavamul Yon iliganes bo iweiys, mo imeis, ikawes takaning towen, inawes, isenas wakalawag.

Kweinim tawsan gamags ivakamus

(Matiw 14:13-21; Luk 9:10-17; Yon 6:1-14)

³⁰⁻³¹ Yeisuw nagamag nikayabes mo iyums, ikatuyouns imekes Yeisuw, ikamats siwotet babaw o sikatimlakay babaw; mo idibakes, ilana, “Kumeis, taneis nawoud makaw, yakids-wan bitayeiwas tut kadiyakus.” Peinan singay babaw gamag inounawas inounamas; tamawan biyeiwas o beikams kan, nag.

³² Mapuna itouws wawag, idopels ineis nawoud makaw, tasiyas-wan bisiwas.

³³ Tage gamag babaw bo ikines nikalavis-o nineis. Tasiyas gog gamag babaw bo iwtusis, ilisawes siven babaw isisawls, inoys waked, bo imgwayes, Yeisuw siney navamul wankuyeim.

³⁴ Italags siney navamul, ikin gamag babaw, inok nuwan, peinan mawana mansiyas sip, ta-ivag sitamtakavatay, mapuna ikatimlakes sinap babaw.

³⁵⁻³⁶ Ikatimlakay ee... kwayav, navamul mo imekes Yeisuw, ilansa, “Ven to nawoud makaw o bo iboug, kwayabes gamag babaw, bineis ven mwasanin walasids vagan bigimwals kaeis beikams.”

³⁷ Iw to Yeisuw ilana, “Kusekes kaeis beikams.”

Tasiyas gog ikatugwans, ilansa, “Tabta bakan bakagimwal asibled lakatuy kina, bakasekes ikams, ne?”

³⁸ Iwage, ilana, “Kweivin amibled? Kuneis, kukines.” Ikakins, ivinis, ilansa, “Kweinim bled, son in mwanay.”

³⁹ Yeisuw mo ilivan vagan bisinis tasiyas wakunuwatan awuyow, kweitan bod, kweitan bod waseg.

⁴⁰ Mapuna isinis, bod kweitan, kweitan, mwasanin lakatutan, mwasanin sinawan.

⁴¹ Isinis ikous, Yeisuw mo ikow bled siyas kweinim son in mwanay, ikin walbalab, ikalin nuwan Yowbad waseg, mo ikikivis bled tasiyas, isekes navamul bikawes bisenas wamtes gamag, beikams. Mansiyas in-vak ikaleiwag, isekes asibabaw beikams.

⁴² Ikamkwams tasiyas, ikamuweips-wan.

⁴³ Ikous, kan nikambwages ikatikunakus sinawatan kweiy kaynad, bled son in.

⁴⁴ Tasiyas takamkwams mamagina kweinim tawsan tawaw.

Yeisuw inoun wakunuwatan yevagam

(Matiw 14:22-33; Yon 6:15-21)

⁴⁵ Ikous, mo idibakes navamul, ilana, “Kutouws kudopels, kumugwas, kuneis palatan, ven yagan Beteseid; yey gog bases bakayabes gamag babaw.”

⁴⁶ Ikayabes ikous, mo ikatulag in wakoy, initoug waseg Yowbad.

⁴⁷ Ikalavis navamul, ineis watapwana yevagam avakaein; bo iboug. Tage Yeisuw anmwanet-wan isiwana waven.

⁴⁸ Yeisuw ikines ikallavis, kalalav nimeis, peinan yag itow meinoy neim wamtes. Kakita beiyam mo inoun wakunuwatan yevagam, sivinan binekes.

⁴⁹ Tasiyas gog ikines Yeisuw wakunuwatan yevagam inoun imimeim, iwaks, aspwayat, idokes kid aluw.

⁵⁰ Asbabaw ikines, iwenes singay. Townen gog idibakes, ilana, “Yey. Bwein-wan. Awoum beivag amipwayat.”

⁵¹⁻⁵² Mo itouw, inekes wawag, mo idabab yag. Singay isom ninous. Ninous tasiyas keikay, peinan nag ikakins Yeisuw natawtoun silawun tut townen waseg ikow bled kweinim mo ivakamus gamag babaw.

Ven Genesalet waseg takatouns ivag ibweins

(Matiw 14:34-36)

⁵³ Ikalavis ee... italags palatan, ven yagan Genesalet, lon ikawes ilaves in wanakaew, siwag ikot.

⁵⁴⁻⁵⁵ Ineis wanakaew, towous bo iwtusis, isisawls, ineis vena babaw, ikawes takatouns nimmasis wakabes, imeyes am-palawen iliganes Yeisuw nises.

⁵⁶ Yeisuw am-palawen binoun bein, takinew wunkakit, o takinew wunovek, o takinew wanawoud, tasiyas towous mo bikawes takatouns biseinis wavytakon ven, mo binitougs vagan bikabkwanes matan anakweim; o kalisiy tasiyas ikabkwanes mo ibweins.

Tammwayas sikaleiwag

(Matiw 15:1-20)

¹⁻² Wankuyeim tasiyas Palisiy sisiyas takatimlakeins kaleiwag mwasanin meinoy nimeis Yelusalem, ikatuyouns imekes Yeisuw; ikines navamul mwasanin nag iwidis nimes, tage sona ikamkwams.

³⁻⁴ Tasiyas gog Palisiy asisinap kweitan, sisiyas min-Yudiy babaw; kukin nimes nag biwidis beibwein, nag beikams; peinan ikikuns tammwayas asisinap waseg. Asisinap mawana kukin beinoys wamaket bimeis, biwidis nimes mo beikams; kukin nag biwidis nimes nag beikams. Asisinap babaw mawan, iwdiwids askwavig, askunasoup, sikab-mavin, o abes.

⁵ Tasiyas Palisiy sisiyas takatimlakeins kaleiwag ikines, mo ikatiganes Yeisuw, ilansa, “Aveiyag wawun muvamul nag ikikunis tammwayas sikaleiwag; nimes bikibik sona ikamkwams.”

⁶ Iwage Yeisuw, mo idibakes, ilana, “Tayyaweid yakamiy! Palopit townen Isaya ilivnek livneimi, kweiboug Yowbad anilivan ilel, bo ikunakeimiy, mamagina:

‘Gamag tasiyas isiwyoubugs wudousa may waseg;

Tage ninous nag imekeig.

⁷ Makava itapwəloulus waseg yey,
Peinan nag ikatimlakays gunakaleiwag,

tage gamag mwasanin sikaleiwag ikatimlakays.'

⁸ "Yowbad nakaleiwag bo kupiyaves, tage kutams waseg gamag mwasanin sikaleiwag."

⁹ Mo idibakes, ilana, "Singaya kusinaps, tage kupiyaves Yowbad nakaleiwag, mo kukwatilawos mikaleiwag tatineimiy.

¹⁰ "Kweiboug Moses ilivan Yowbad nakaleiwag mamagina:

'Kuvnases timmiyas o inmiyas,'

o 'Kukin kal biyeg taman o inan, kuweiys beimat.'

¹¹ Tage yakamiy mikaleiwag mamagina:

Gamag bweina bidibek taman o inan, bilana,

'Bo akatibom youd towen silmanin Yowbad; ta-mawan basekeim yak.'

¹² Mamagina kutams vagan bikamgwayes taman o inan.

¹³ "Amikikun towen waseg bo kugulekxes Yowbad nakaleiwag. Amisinap babaw mawan."

¹⁴ Yeisuw mo idawes gamag babaw, isineikimas, idibakes, ilana, "Babaw yakamiy, kuliganes agulivan mo bukukwakins.

¹⁵ "Nag aveiyag watoulan gamag beisiw wəwon biyageg, nag. Tage aveiyag wanuwan gamag bisap bein wamnat mo biyageg gamag towen." ¹⁶ (-)

¹⁷ Ilivan ikous, ilisawes gamag babaw, inoun in wanbunatum. Navamul mo ikatiganes Yeisuw, sivines kid bikakins nakabebay silawun.

¹⁸⁻¹⁹ Iw to Yeisuw, idibakes, ilana, "Adok yakamiy-vak tatagouwaws yakamiy! Youd babaw watoulan gamag beisiw wəwon, nag biyabik, nag. Peinan nag beisiw wananon; misinaka in watoubun wankuyeim mo bipwal bein wamnat." Yeisuw anilivan towen waseg ikabwein kan babaw; nag kweitan bwaboum, nag.

²⁰⁻²² Wankuyeim mo ilivan, ilana, "Aveiyag wanuwan gamag bisap bein wamnat, youd towen biyabik gamag. Peinan wanuwan gamag bispuv nakanuway kalbaleb, subwan, veinaw, katumat gamag, kanavay mav, mitmwamon, kameiliw, katadividav, kalimwəsaw, silponay, livan kalbaleb, kayapam, sinap kalbaleb.

²³ "Sinap tasiyas kalbaleb wanuwan gamag bisap mo biyabik gamag towen."

Nen-Saloponis isimounid waseg Yeisuw

(Matiw 15:21-28)

²⁴ Ikous, Yeisuw itamanaw in wawnuwan ven Tayil; mo isiw in bunatum kweitan, nag sivinan gamag bikakins; nag gog, ta-mawan bisowum.

²⁵⁻²⁶ Vinen-Saloponis natan, nag vinen-Yudiy; tage bo iligen bulagan Yeisuw nises ven Tayil waseg, mo inoun inek silmanin bikulul binitoug waseg, peinan yeiluw neiweiy natun kudavin, sivinan kid bikayeb yeiluw binoun; ilana, "Kum kwayeb yeiluw towen neiweiy natug."

²⁷ Iw to Yeisuw, ilana, "Wanmugwana bavakamus gamagal. Awoum bakow gamagal kaeis basekes mansiyas awuk beikams, awoum." Ilivan mawan peinan min-Yudiy idokes tobwag ven gimgilis mamagina awuk.

²⁸ Manəwen vin ikatimop aygan, igilagel, ilana, "O guyaw, mansiyas awuk-vak waskawan teibol beikams musmusan gamagal asibled ikalkalouws."

²⁹ Iw to Yeisuw ilana, "Amlivan bwein. Kunoun kun, kukin natum, yeiluw bo ilisow."

³⁰ Inoun in wanbunatum, iban natun nimmasis wəkeb, yeiluw bo ilisow.

Takakon teitan ivag mo ibwein

³¹ Wankuyeim ilisow wunsiyas ven walasin Tayil, ikanapel Saydon, in yevagam avakaein yagan Galiliy, wawnuwan Dekapolis.

³² Mo imeyes takakon teitan, anilivan wadadan-wan, ilansa, "Tab kadilok bukusen namam wəwon, takakon towen."

³³⁻³⁴ Yeisuw itok takakon towen, ilisawes gamag babaw, mo teigan paley ikawgil didin waseg, mo giwun waseg iwlik mayen; ikous iyey, ikin walbalab, singay igeg nanon, mo ilana, "Epipat." (Aga-Muyuw waseg mamagina "Kwaliyow.")

³⁵ Nuwanaw ikaliyow teigan, mayen ibwein, anilivan mo ididumwal.
³⁶⁻³⁷ Yeisuw gog idibakes, ilana, “Awoum kwamteles gunawotet towen, awoum.” Anilivan babaw mawan, tage nag ikanawes, singaya illivans-wan inawotet bulagan. Singaya isom ninous, ilansa, “Inawotet babaw singay bwein. Takakons ivag ibweins mo iliganes livan, o tasiyas asilivan wadadan ivag mo ilivans bwein.”

8

Kweivas tawsan tawaw ivakamus
(Matiw 15:32-39)

¹⁻² Misiyamun towen, babaw gamag nikatuyouns nimekes vayuwein Yeisuw, nag ivag kaeis beikams, mo idawes navamul, imekes, idibakes, ilana, “Bo inok nuwag gamag tasiyas babaw nikanatouns waseg yey, kaeis gog nag.”

³ “Kukin bakayabes bineis wasiven asimoun-wan, adok bisoumats waked. Peinan mwasanin siven kadiveiyov.”

⁴ Iweis navamul tasiyas, ilansa, “Ven to nawoud makaw; amawan bitavakamus gamag tasiyas? Kan gog nag.”

⁵ Iw to Yeisuw, ilana, “Akweevin amibled?”
 Ilansa, “Kweinim kweiij.”

⁶ Idibakes gamag babaw, ilana, “Kusinis wapwepway.” Wankuyeim mo ikow bled siyas kweinim kweiij, ikalin nuwan Yowbad waseg, ikivis bled siyas, isekes navamuls vagan bivaganes; mo ikawes isekes babaw gamag wasigeis.

⁷ Asiyin mwanayun-wan nisesus, ikow wanaman, mo initoug Yowbad waseg, ikalin nuwan peinan in. Ikous, mo idibakes navamul vagan bikawes bisekes babaw gamag, mo isekes.

⁸ Babaw gamag ikamkwams, bo ikamuweips, mo ikatikunakus kan towen nikamb-wages, mo idagis wagamwat, imlavag gibsiniim gibsiy.

⁹⁻¹⁰ Ikous, mo ikayabes tasiyas kweivas tawsan gamag, inounas; mtowen siney navamul itouws wawag, idopels ineis ven Dalmanut.

Gamag sivines Yeisuw naman mulin bikines
(Matiw 16:1-4)

¹¹ Tasiyas Palisiy mwasanin mo inekes Yeisuw, ikammnimans, mamagina iyakwanes, ilansa, “Kuvag muwotet bitawtoun mawana naman mulin Yowbad.”

¹² Yeisuw gog singay igeg nanon, ilana, “Gudwouvaws yakamiy sivinamiy bukukines Yowbad naman mulin,” mo itabudabod, ilana, “Nag bukukines, nag.”

¹³ Vayuwein mo ilisawes, itouws wawag, idopels ineis palatan.

Ansinap Elod o Palisiy asisinap mawana yist
(Matiw 16:5-12)

¹⁴ Tage bo inumlavies kaeis; misinaka katanoka bled wawag.

¹⁵ Yeisuw mo iguyes, ilana, “Kuvnaseimiy. Kadiloka kupiyaves tasiyas Palisiy asiyist o Elod anayist.”

¹⁶ Iliganes, idibakes sisiyas, ilansa, “Adok anakabebay, peinan tanumlavies adableds.”

¹⁷ Yeisuw gog ikakina ninous, idibakes, ilana, “Wawun kulansa, ‘Tanumlavies adableds?’ Singay tatagouwaws yakamiy; ninoumiy nag.”

¹⁸⁻¹⁹ “Sam mitamiy tage nag kuwtusis; sam tigamiy tage nag kuliganes beibwein. Adok nag kunuways akivis kweinim bled silmanin kweinim tawsan gamag, kweevin kaynad kan nikambwages mo kwaitikunakus, ne?”

Ilansa, “Sinawatan kaginey.”

²⁰ Vayuwein Yeisuw ikatiganes, ilana, “Wankuyeim akivis bled kweinim kweiij silmanin kweivas tawsan gamag, kweevin gamwat kan nikambwages mo kwaitikunakus, ne?”

Ilansa, “Gibsiniim gibsiy.”

²¹ Iwage Yeisuw, ilana, “Igawa tatagouwaws yakamiy!”

Toukwaw teitan ivag ibwein

²² Wankuyeim Yeisuw inoun in Beteseid, imeyes takatoun teitan, ilansa, “Tabta bukwabkwen matan toukwaw towen, ne?”

²³ Yeisuw iligen, ivakaben, inow watoulan ven, igus matan, naman waseg ikabkwen, ikatigan, ilana, “Kukin tan?”

²⁴ Itamnow matan, ilana, “Akin gamag mwasanin, tage askakin mawana amweilok ininounas.”

²⁵ Vayuwein mo ikabkwen matan, mo ikinbunik, bo ibwein.

²⁶ Yeisuw mo ikayeb beiyum bein wanbunatum, ilana, “Awoum bukun waven.”

Pita ikakina Yeisuw nawotet
(*Matiw 16:13-20; Luk 9:18-21*)

²⁷ Wankuyeim Yeisuw siney navamul itavins wunsiyas ven wawnuwan Sisaliy, guyaw towen Pilip nikaleiwag wasigeis. Inounas waked, ikatiganes navamuls, ilana, “Gamag idokeigs kal yey?”

²⁸ Iweis tasiyas, ilansa, “Gamag mwasanin idokes yakoum tabibaptaysein gamags towen Yon; tage mwasanin idokeims Ilaytiy yak, o mwasanin idokeims yakoum palopit teitan.”

²⁹ Yeisuw mo ikatiganes, ilana, “Tage yakamiy, kudokeigs kal yey?”

Iw to Pita, ilana, “Yak Kelis yak.”

³⁰ Mapuna Yeisuw idibakes, ilana, “Awoum gamag mwasanin bikakinsa yey Mesay Kelis yey; awoum kwamteleigs; awoum.”

Yeisuw ilivnek peinan bikanig mo beikit vayuwein
(*Matiw 16:21-28; Luk 9:22-27*)

³¹ Wankuyeim mo ikatimlakes, ilana, “Gimgilitoun yey, kadiloka abag bigeg singay; kadiloka bipiyaveigs tasiyas tammwayas sisiyas tanuwgwes lun situwavezek sisiyas takatimlakeins kaleiwag, mo bikatimateigs; yam kweitoun mo bəkit vayuwein.”

³² Anilivan towen kamnat; toge Pita ikanan, ilana, “Awoum kulivan mawan.”

³³ Yeisuw itouvin, ikin navamuls, ikan Pita, ilana, “Kusineikik yakoum Seitan, amsinap mawana gamag asisinap, nag mawan Yowbad ansinap.”

³⁴ Ikous, mo idawes gamag babaw sisiyas navamuls, ikatuyouns imekes, mo idibakes, ilana “Kavel tan yakamiy sivinan bibkunig, kadiloka bipiyev nakaleiwag tatonen mo bikokew anklos tatonen vagan mo bibkunig.

³⁵ “Kavel-tan yakamiy sivinan bikayus mwamovan mo biyamkwen, tage kukin biyamkwen mwamovan peinan gunawotet, mo bises bwein.

³⁶ “Kukin gog bikow wuliyoug meivek-wan, ven watinow wuliyougwan, mo biyamkwen mwamovan, adok nag bimwasaw, nag.

³⁷ “Aveiyag mo bisek maysan silmanin mwamovan, ne? Nag.

³⁸ “Tut towen gudwouvaws tappeyawas o asisinap babaw kalbaleb. Tage kukin kal bimsin agulivan mamagina bimseneig Gimgilitoun yey; o yey-vak mawan igaw tamag mititeilin waseg bayum bam sigwey Yowbad natakayobs, mo beivag agumwasin gamag towen waseg.”

9

¹ Mo idibakes, ilana, “Mounid adibakeimiy, mwasanin yakamiy nukutablawa wasalig nag bukukwanigs tage bukusesus-wan mo bukukines Yowbad nakaleiwag beim, son natawtoun.”

Yeisuw ivag ankakin kweitan
(*Matiw 17:1-13; Luk 9:28-36*)

²⁻³ Yam kweinim katanok ikous, Yeisuw mo itokes Pita, Yemes, Yon, ikatulags ineis koy avakaein wakunuwan; tasiyas-wan isiwas. Wamtes mo ivag ankakin kweitan, anakweim ivag ankakin gimagim, pwapwakaw igegeyous; nag teitan gamag ven watinow anakweim bivag pwapwakawun mawan, nag.

⁴ Mo ikines Ilaytiy son Moses isaps, sisiy Yeisuw illivans.

⁵⁻⁶ Iw to Pita, idibek Yeisuw, ilana, “Tamwey, bo tamwåsaws peinan tasesus towen; bakawlul bunatoun bwan, bunatan yakoum, buniyuwein Moses, buntounun Ilaytiy.” Anilivan mawana illivan mav; na-ikakin aveiyag bilivan, peinan aspwayat.

⁷ Mo lov kweitan ilumwes tasiyas, aygan teitan iliganes wålov, ilana, “Mtowen natug bwanabwein, kuliganes aygan.”

⁸ Nuwanaw mo ikins palatan palatan, makaw; misinaka Yeisuw sisiy.

⁹ Wankuyeim iwloubus, idibakes, ilana, “Youd towen nukukines, awoum kwamteles gamag mwasanin wasigeis ee... Gimilitoun yey bakanig, båkit vayuwein, mo kwamteles wasigeis.”

¹⁰ Youd towen nag ikamteles gamag mwasanin wasigeis; tage tasiyas-wan illivans, idokes aveiyag silawun anilivan towen, “Bakanig mo båkit vayuwein.”

¹¹ Iweis tasiyas, ilansa, “Aveiyag wawun tasiyas takatimlakeins kaleiwag asilivan, ilansa, ‘Kadiloka Ilaytiy bimgwey Mesay waseg’?”

¹²⁻¹³ Yeisuw gog mo idibakes, ilana, “Ilaytiy iginmug, ikatilow youd babaw. Tabta kukwakins silawun Bukitab livanen Gimilitoun nises, mamagina, ‘Gamag bipiyaves; aban bigeg singay?’ Adibakeimiya mtowen-vak Ilaytiy bo neim, itam ninous mo iyagages towen, mawana livanen nises Bukitab waseg.”

Gwad teitan takatoun Yeisuw ivag ibwein

(Matiw 17:14-20; Luk 9:37-43)

¹⁴ Yeisuw siney navamul asteitoun, tavasin gog mtowen, mo iwloubus iwekes navamul meivek-wan watinow nisesus, ikinis gamag singay babaw nisiwnis, tasiyas takatimlakeins kaleiwag nikikamnimans sisiyas navamul mwasanin.

¹⁵ Gamag babaw ikinis Yeisuw bo neim, isom ninous, isawls inekes, imulouls sisiy.

¹⁶ Iw to Yeisuw, ilana, “Aveiyag silawun mikamnimman?”

¹⁷⁻¹⁸ Iw teitan gamag, ilana, “Tamwey, natug towen amey vagan bukukin, peinan yeiluw neiwei y bo ikakon. Kukin beiwei y mo bikalavatouw bikabalawein, beipoul wadon, bikakil kimwatun, bilamtumweitol won. Bo adibakes muvamuls vagan bikayabes. Iyokons bo nag.”

¹⁹ Iw to Yeisuw, ilana, “Takakons yakamiy! Tut kadiveiyov sigwey yakamiy nitasesus bo asoumat. Gwad towen kumey waseg yey.”

²⁰ Imeyes gwad towen waseg Yeisuw, yeiluw ikin Yeisuw, iwei y gwad towen, itatat won, ikalivatow wapwepway, ikanivnavin, ipoul wadon.

²¹⁻²² Yeisuw mo ikatigan taman, ilana, “Kweivin tut ankatoun mawana?”

Ilana, “Igaw-o wagwadin. Tut babaw iwaweiy, ikalivatow in wåkov o wayvagam, sivinan bilbaleb. O Tamwey, tabta binok nuwam yakamey? Tabta ikadilokeim bukulabem?”

²³ Iw to Yeisuw, ilana, “Aveiyag wawun amlivan kulana, ‘Tabta ikadilokeim?’ Kukin bitasimounid, sinap o wotet babaw mo bikadilokeid.”

²⁴ Gwad to taman mo igel, ilana, “Asimounid-wan; tage kulabeig vagan basimounid beibwein.”

²⁵ Yeisuw gog ikin gamag babaw isisawls imimeis, mo idibek yeiluw towen, ilana, “Yeiluw yak, gwad towen nukuvag nikakon, adibakeim kulisow gwad towen, kusiwana, awoum kuvgavaw bukumek gwad towen; awoum.”

²⁶ Iligen, mo iwak, iwei y gwad towen, itatat won, mo ilisow gwad kabalamat nimmasis mawana takanig, babaw gamag idokes bo ikanig.

²⁷ Yeisuw gog iyous naman, itamnow gwad towen, itamanaw.

²⁸ Wankuyeim Yeisuw mo inoun in isiw wabunatum, navamul mo inekes, tasiyas-wan illivans, ilansa, “Aveiyag wawun na-ikadilokem bakakayeb?”

²⁹ Iw to Yeisuw, ilana, “Singay keikay ankayob bitakayabes tasiyas; misinaka bitanitoug waseg Yowbad mo bitakayeb.”

Yeisuw ilivnek bikanig mo beikit vayuwein
(Matiw 17:22-23; Luk 9:43-45)

³⁰ Ilisawes ven towen, mo ikanpeles Galiliy, inounas; tage nag sivinan gamag bikakins.

³¹ Inawotet gog ikatimlakes navamuls, ilana, “Gimgilitoun yey, teitan gamag bisilkodeig mo gamag mwasanin biyousigs, beiweigs bakanig, bammasis kweitoun yam mo bākit vayuwein.”

³² Anilivan towen na-ikakins tasiyas; aspwayat bikatiganes silawun livan towen.

Tasiyas astamumug
(Matiw 18:1-5; Luk 9:46-48)

³³ Inounas ineis ven Kapaneyum, isiws wabunatum, mo ikatiganes, ilana, “Aw-livan waked nukulivānes, ne?”

³⁴ Tasiyas gog isesusa ikkapays, peinan waked nikamnimans, idokes kal biguyaw.

³⁵ Mapuna isin, idawes tasiyas sinawatan teiy, imeis, idibakes, ilana, “Kal yakamiy sivinan biguyaw, kadiloka bimlatoul, babaw gamag bimugwas, mtownen bikuyeim, o bikanow ages gamag babaw.”

³⁶⁻³⁷ Ilivan ikous, mo itok gwad teitan, imey, isein wamtes tasiyas, mo inup iwlibob, idibakes, ilana, “Kal yākoum bileb teitan gwad, māwana gwad towen, peinan gungamag towen, mamagina bilabeig yey, o mamagina bileb mtownen Tamag nikayabeig nam.”

Kukin gamag nag bisilbwadeid mamagina bilabeid
(Luk 9:49-50)

³⁸ Iw to Yon, ilana, “Tamwey, nakakin taw teitan ikayabes yeiluw, yagam yak waseg, kasilbwed, peinan nag ibwākun wasigeis yākids.”

³⁹⁻⁴⁰ Yeisuw gog ilivan, ilana, “Awoum kusilbwed. Nag kal biwotet tawtoun yagag waseg mo nuwanaw bitawyageig, nag. Kukin kal nag isilbwadeids mamagina ilabeids-nan.

⁴¹ “Kukin kal bisekeimiy amisoup bukumoums peinan kuwteles Kelis nawotet, mounid adibakeimiy nag biyamkwen maysan mtownen.

Sinap kalbaleb
(Matiw 18:6-9; Luk 17:1-2)

⁴² “Gamagal tasiyas isimounids waseg yey, kukin kal bikatsilakes silmānin bikakins sinap kalbaleb, singay kalbaleb mo bilouvat gamag towen. Kukin gamag mwasanin bikawes dakul avakaein biyawanis kayon mo bilaves bein wabwanit, nakalbaleb towen kalamwey; tage kukin bisesuna ee... bikatsilek teitan gwad, singaya kalbaleb mo bilouvat.

⁴³ “Kukin gog namam bikatsilakeim silmānin amsinap kalbaleb, kadiloka kubob, wankuyeim namam palatanok mo bukaban mwamovam. Awoum namam paley bilaveims bukun wadiginasim, kov nigidaged bigabum tut nag beikous. ⁴⁴ (-)

⁴⁵ “Kukin gog kakeim bikatsilakeim silmānin amsinap kalbaleb, kadiloka kubob, wankuyeim kakeim palatanok mo bukaban mwamovam. Awoum ge kakeim paley bilaveims bukun wadiginasim. ⁴⁶ (-)

⁴⁷⁻⁴⁸ “Kukin matam bikatsilakeim silmānin amsinap kalbaleb, kadiloka kugut kulev, igaw wankuyeim matam palatanok mo bukusiw wanuwan Yowbad nakabkaleiwag. Awoum matam paley bilaveim bukun wadiginasim; simwāmwats bitatets wāwom; o kov bigidaged-wan; nag beimat.

⁴⁹ “Kov bigabuds vagan bitayayan.

⁵⁰ “Sol bwanabwein bo bwein. Kukin gog sol bigeg, nag sabal-nen bitaban vayuwein. Sol bises wasigeis yakamiy bo bwein, vagan bukumsamwas simsimiwas wasigeis.”

¹ Ikous, mo itamanaw Yeisuw, inoun in wawnuwan Yudiy mo igapel lay Yoldan, in palatan. Vayuwein-vak gamag babaw mo ikatuyouns ininekes Yeisuw, mo ivgavaw katimlakay gamag wasigeis, peinan nawotet tut babaw mawan.

² Tasiyas gog Palisiy mo inekes Yeisuw, sivines kid biyakwanes, mo ikatiganes Yeisuw, ilansa, “Tab kadilok bitapiyev dakwav, ne?”

³ Iw to Yeisuw, ilana, “Kweiboug Moses bo isekeimiy mikaleiwag, amawan?”

⁴ Ilansa, “Moses bo itam, nakaleiwag mawan towen, kukin vin bitapiyev, inalet bitalel tasek mo tapiyev.”

⁵ Iw to Yeisuw, ilana, “Peinan ninoumiy keikay yakamiy, mo isekeimiy nakaleiwag towen.”

⁶⁻⁸ “Tage kweiboug Yowbad niginbun gamag kudaw son kudavin, mapuna taw bilisow taman son inan, binek nakwav, mapuna asteiy bimlavag wous katanok. Nag teitan naan, nag; wous bo ilatanes imlavag katanok-wan.”

⁹ “Peinan Yowbad bo ilaten, awoum gamag bilivis, awoum.”

¹⁰ Ikous, iyums ineis wanbunatum, navamul mo ikatiganes vayuwein, sivines kid bikakins silawun nakatimlakay towen.

¹¹ Yeisuw mo idibakes, ilana, “Kukin kal bipiyev nakwav, bivevaw gog nayuwein vin, mo biyageg nakwav tatonen, peinan taggeinawl towen ikanavay mav.”

¹² “Nawen-vak kukin bipiyev namwan, o beivay gog son tayuwein taw mo bikanavay mav.”

Yeisuw sivinan gamagal

(Matiw 19:13-15; Luk 18:15-17)

¹³ Wankuyeim gamag mo imeyes nitsiyas, sivines Yeisuw naman bisen wawous. Tage navamul idokes kid bisilbwades gamagals, awoum kid bimekes Yeisuw.

¹⁴ Yeisuw gog ikines, mo ikanes, ilana, “Gamagal bweina bimeis waseg yey. Awoum kusilbwades, peinan tasiyas wanuwan Yowbad nakaleiwag mamagina gamagal.

¹⁵ “Mounid adibakeimiy, kukin beivag ninoumiy mawana gamagal mo bukutams Yowbad nakaleiwag waseg, mo bukusiws wanuwan. Kukin gog nag, bo nag.”

¹⁶ Ilivan ikous, ipliboub gamagal wasigeis, naman isen wawous, anilivan bwanabwein mo isekes gamagal tasiyas.

Guyaw teitan ipiyev Yeisuw

(Matiw 19:16-30; Luk 18:18-30)

¹⁷ Ikous, ininoun waked, mo teitan taw isawl inek, ikulul avakaein wamatian, ilana, “Takatimlakay bwanabwein yak, aveiyag bavag mo mwamovag nag beikous?”

¹⁸⁻¹⁹ Iw to Yeisuw, ilana, “Aveiyag wawun kudokeig toubwein yey? Toubwein anmwānet Yowbad. Adok kaleiwag tasiyas kukwakin: awoum kuweiy gamag, awoum kwanavay mav, awoum kuveinaw, awoum kuyaweid, awoum kusilponay, o kuvnāses tamam son inam.”

²⁰ Iwage, ilana, “Tamwey, igaw-o wagwādig asilamaw kaleiwag tasiyas oko nagein igawa avvalut kaleiwag tasiyas wasigeis.”

²¹ Togo Yeisuw ikin taw towen, ikalin nuwan waseg, idibek, ilana, “Katanoka sinap ikabwag waseg yak, kadijuka kuymayis muvavag babaw, maysan kukow, kuvgen, kusekes tasiyas tasimavs, mo kum kubkunig; tage maysan bwein igaw mo bukaban walbalab.”

²² Mto taw bo isisiyuw nanon, mo itamanaw, inoun, singay igeg nanon, peinan nawliyog babaw, ikayus.

²³ Yeisuw gog itouvin, idibakes navamul, ilana, “Singay keikay tasiyas guyawaw beisiws wanuwan Yowbad nakabkaleiwag waseg.”

²⁴⁻²⁵ Navamul gog iliganes anilivan sitovek, bo isunasun ninous. Vayuwein Yeisuw mo idibakes, ilana, “Sigwey, singay keikay tasiyas guyawaw beisiws wanuwan Yowbad nakabkaleiwag waseg. Mansiyas kamel beisiws vas analeg kalimwey-nen keikay, tage guyawaw beisiws Yowbad nakabkaleiwag waseg, singaya keikay.”

²⁶ Tasiyas gog singay isunasun ninous, illivans sisiyas, ilansa, “Kalisiy kid beisiws Yowbad nakabkaleiwag waseg?”

²⁷ Yeisuw bo ikinbunikes tasiyas, ilana, “Gamag wasigeis na-ikadilok, tage Yowbad bwein kadilok, peinan Yowbad kadilok youd babaw.”

²⁸ Iw to Pita, ilana, “Yakamey gog nakapiyev mavavag babaw mo kabkunim.”

²⁹⁻³⁰ Yeisuw ilana, “Mounid adibakeimiy, kal yakamiy bilisow naven, budan, nunet, inan, taman, nitun, o napwepway, vagan bikanow agulivan bwanabwein, nagein tut towen mo biban lakatutan nabunatum, budan, nunet, inan, nitun, napwepway; tage gamag mwasanin biyagages; igaw gog tut wanakougwaw mwamovan bises bisigeg.

³¹ “Tage babaw tasiyas tumumug bikuyeims, o tasiyas takukuyeims mo bimugwas.”

Sivtounun Yeisuw ilivnek bikanig mo beikit vayuwein

(*Matiw 20:17-19; Luk 18:31-34*)

³²⁻³⁴ Inounas waked bineis kid Yelusalem, Yeisuw imug, navamuls wankuyeim bo ikubukub nuwes, sisiyas bod mwasanin wankuyeim aspwayat. Inounas ee... mo idawes navamul sinawatan teiy, vayuwein inekes, ikamteles aveiyag igaw mo bilivet, ilana, “Bitaneis Yelusalem, teitan gamag mo bisilkodeig Gimgilitoun yey, mo biyousigs tasiyas tanuwgves lun situw^əvek sisiyas takatimlakeins kaleiwag, biyateleigs bisekeigs wasigeis tobwag ven gimgilis vagan beiweigs, bikatimateigs; tasiyas gog bisibaweigs, bigusugs, biwaweigs vatul waseg, ikous mo bikatimateigs; yam kweitoun mo b^əkit vayuwein.”

Yemes son Yon initougs waseg Yeisuw

(*Matiw 20:20-28*)

³⁵ Sebidiy nitun tasiyas Yemes son Yon mo inekes Yeisuw, ilansa, “Tamwey, sivinem bukutam aveiyag bakalivan.”

³⁶ Ilana, “Aveiyag sivinamiy?”

³⁷ Iweis tasiyas, ilana, “Igaw muguyaw waseg, kutam vagan bakasin teitan wamkwatay, teitan wamkimaw.”

³⁸ Yeisuw idibakes, ilana, “Nag kukwakins silawun mikanitoug towen. Tab kadilok bukumwamwes kw^əvig towen b^əamoum, o tab kadilok bibaptayseimiy m^əwana bibaptayseigs yey?”

³⁹⁻⁴⁰ Ilansa, “Ikadilokem-wan.”

Iw to Yeisuw, ilana, “Mounid bukumwamwes kw^əvig towen yey b^əamoum o bibaptayseimiy m^əwana bibaptayseigs yey; tage nag kadilok bakaliwageimiy vagan bukusinis wagunkatay o wagunkimaw, nag. Tamag nakaleiwag towen, bikaleiwag kalisiy bisinis wadadag.”

⁴¹ Navamul gog tasiyas sinawatan iliganes, mo ikawkunes Yemes son Yon.

⁴² Mapuna Yeisuw idawes bimeis, binekes; imeis mo idibakes, ilana, “Kukwakinsa tasiyas idokes guyawaw tobwag ven wasigeis, ikaliwages sigamag, siwotet kweitan kweitan isekes biwteles.

⁴³ “Tage yakamiy nag m^əwan. Kal yakamiy sivinan biguyaw bweina bimlavag mitouwat.

⁴⁴ “Kal yakamiy sivinan bimlavag mitamumug, kadiloka biwotet silmanin miwotet.

⁴⁵ “Gimgilitoun yey bo m^əwan, nag am vagan bukulabeigs, tage balabeimiy yakamiy, o mwamovag batam mamagina baymiyiseimiy tababaw yakamiy.”

Toukwaw towen Batamiyas ikiplal matan

(*Matiw 20:29-34; Luk 18:35-43*)

⁴⁶ Ikous anilivan towen, inounas oko ineis Yelikow, ikanapels Yelikow binounas siney navamul sisiyas gamag babaw. Toukwaw teitan nissin wadadan ked ininitoug money wasigeis gamag babaw; yagan Batamiyas, peinan taman yagan Tamiyas.

⁴⁷ Toukwaw towen iligen butun gum-Nasalet yagan Yeisuw, peinan bo neim, mo iwak, ilana, “Yeisuw, yakoum Deibid tabun yakoum, binok nuwam yey.”

⁴⁸ Babaw gamag bo ik^ənes, ilansa, “Kukwapay.”

Togo singaya iwkuwak, ilana, “Yakoum Deibid tabun yakoum, binok nuwam yey.”
 49 Yeisuw gog im itom, ilana, “Kudibakes beim.” Mapuna idibakes toukwaw towen, ilansa, “Bweina kutamanaw kum. Bo idaweim.”
 50 Togo ilavew anpwälum, nuwanaw mo itamanaw, inoun inek Yeisuw.
 51 Inek Yeisuw, Yeisuw ikatigan, ilana, “Aveiyag sivinam bavag peinam yak?” Iw toukwaw towen, ilana, “Tamwey, sivinag beilal matag.”
 52 Yeisuw gog idibek, ilana, “Nukusimounid waseg yey, mapuna bo kubwein; bweina kunoun.” Nuwanaw ilal matan, mo ibwəkun Yeisuw waseg.

11

Yeisuw isiw in ven Yelusalem
(Matiw 21:1-11; Luk 19:28-40; Yon 12:12-19)

1-2 Yeisuw inoun in wunsiyas ven Betepeig o Betaniy, walasin koy yagan Oliv, kakita mo bisap Yelusalem waseg. Mapuna mo idibakes navamul asteiy vagan bimugwas kid bineis ven wunkakit, ilana, “Kuneis ven towen wamatads, bukusius wanuwan mo bukubənes donkiy natan, kayon niyawanis vatul waseg, gamag nag itotouws waseg. Igaw. E, bukubənes mo kulikus vitulen, kutokes kumeyes.

3 “Kukin teitan gamag bilivan, bilana, ‘Aveiyag wawun kulikus donkiy nəwen?’ kulansa, ‘Tunuwagan sivinan. Nawotet biyakous, mo biyamen.’”

4 Inounas tasiyas mo ibənes donkiy wavytakon ven, niyawanis kayon wamatian koukwed nititoy, mo ilikus vitulen.

5 Ilikus vitulen, tage gamag mwasanin nitablawaws wadadan ilivans gog, ilansa, “Aveiyag wawun kulikus donkiy manəwen?”

6 Mo ikatimapus ages məwana Yeisuw nikatimlakes; ilivans məwan, mo itams.

7 Itams tasiyas, mo imeyes donkiy waseg Yeisuw, asikweim isenas watapwan mo imwen isin wakunuwatan.

8 Mwasanin gog asikweim iyaves wəked, mwasanin isəves amweilok yayagein wanawoud iyaves wəked.

9 Tasiyas tamumugwas sisiyas takkuyeims iwkuwaks, ilansa,
 “Osana! Yowbad bikatinabweids.

Kakavasim nukum daGuyaws yagan waseg.

10 Tamads Deibid nakaleiwag bukuwgow.
 Tanuwagan libəlab bo bikatinabweids.”

11 Yeisuw inoun in wunovek Yelusalem, isiw in wanuwan Yowbad nabunatum bunavakaein, ikin palatan palatan, youd babaw ikikin ikous, mo iyum ineis Betaniy siney navamul; bo iboug.

Ikawtun yaveinun
(Matiw 21:18-19)

12 Iyam nen gaboug ilisawes Betaniy bineis Yelusalem, ivag anamoun.

13 Anamoun, ikin kadiveiyov yaveinun nitet, sam yageivein, idoki anagin biban beikam; iwekey gog nag; makava yageivein. Peinan nag tutan beiwu. Igaw.

14 Iw to Yeisuw, ikawtun kay kaywen, ilana, “Adok nag bukuvgavaw beivag anagim, beikams gamag, nag.” Navamul iliganes anilivan towen.

Ikayabes taggimwals wanuwan Yowbad nabunatum
(Matiw 21:12-17; Luk 19:45-48; Yon 2:13-22)

15 Inounas ineis Yelusalem, isiws wanuwan Yowbad nabunatum mo ikayabes tasiyas taggimmwals wabunatum, siteibol ikatitan tasiyas nikatimapus money dakul waseg, o ikatitan abes tasiyas niggimwals bwabun.

16 Nag itam vagan gamag bikokews kunes wanuwan Yowbad nabunatum.

17 Ikatimlakes, ilana, “Bukitab wanuwan livan nises mamagina:
 ‘Ven babaw gimgilis bidokes gunbunatum nitoug buntuman.’
 Tage yakamiy nukuvkakes mamagina buntuman veinaw.”

¹⁸ Tasiyas gog tanuwgves lun sisiyas takatimlakeins kaleiwag iliganes anilivan, sivines kid amawan bivkakes mo biyablebes; tage iwenes peinan gamag babaw igoulus, sivines biliganes nakageiguy.

¹⁹ Kwayav waseg Yeisuw siney navamul mo ilisawes wunovek.

Yaveinun ikallayag

(*Matiw 21:20-22*)

²⁰ Iyam nen gaboug, ininounas waked, mo ikines yaveinun bo ikallayaga ikous.

²¹ Pita inuway, mo ilivan ilana, “Tamwey, kay kaywen nukwawtun bo ikalayag.”

²²⁻²³ Iw to Yeisuw, idibakes tasiyas, ilana, “Livan mounid badibakeimiy. Kadiloka kummises Yowbad vagan wotet tawtoun biwtel. Kal yak bukubidek koy towen, kulana, ‘Kunoun kun kumkul wabwanit,’ tage nag beivag nanoum akweiy, bukunamisa-wan, mo bivag mawana amlivan nukulivan.

²⁴ “Mapuna badibakeimiy, kukin bukukululs bukunitougs Yowbad waseg, kukwakins-wan bisekeimiy, mo bukubanes youd tasiyas.

²⁵ “Kukin bukunitougs Yowbad waseg, aveiyag gamag asisinap waseg yakamiy kuniuwes, kunumlaves, bikalin nuwamiy. Igaw Tamads walbalab mo biwidimiy binumlev amisinap kalbaleb yakamiy.” ²⁶ (-)

Yeisuw nakaleiwag

(*Matiw 21:23-27; Luk 20:1-8*)

²⁷⁻²⁸ Wankuyeim mo inounas, vayuwein ineis Yelusalem. Ineis Yelusalem, Yeisuw ininoun wanuwan Yowbad nabunatum, mo iweis tasiyas tanuwgves lun situwáveks sisiyas takatimlakeins kaleiwag sisiyas tammwayas, inekes Yeisuw, ilansa, “Aw-kaleiwag towen? Kal isekeim mukwaleiwag silmanin muwotet towen?”

²⁹ Iw to Yeisuw, ilana, “Kweitan youd bakatiganeimiy, kudibakeigs, mo badibakeimiy silawun gunakaleiwag silmanin gunawotet towen.

³⁰ “E, kudibakeigs silawun Yon inawotet waseg ibaptases gamags. Tabta Tamads walbalab isek nawotet towen, o gamag teitan watinow isek nawotet? Kudibakeigs silawun nawotet Yon.”

³¹ Iliganes, illivans sisiyas, ilansa, “Kukin bitalansa, ‘Tamads walbalab,’ mtownen Yeisuw bikatimop aygads bilana, ‘Aveiyag wawun nag kusimounids waseg mtownen Yon?’

³² “Tage awoum talansa, ‘Gamag teitan isek nawotet’; mata ge gamag babaw biyagageids, peinan isimounids waseg Yon, idokes palopit tatonen.”

³³ Mapuna ikatimapus Yeisuw aygan, ilansa, “Nag kakakin.”

Iw to Yeisuw, ilana, “Yey-vak mawan, nag badibakeimiy kal nisekeig gunawotet towen.”

12

Tawteleins bag asisinap kalbaleb

(*Matiw 21:33-46; Luk 20:9-19*)

¹ Ikous, mo isilamaw nakabebay, isekes mamagina, “Bigulen gleip teitan tamwey isop; kal ilev ikous wadadan bag palavas; wayn kasinen ivkaes ikous; tamtakavatein bag nabunatum iwlul ikous; mo isekes gamag mwasanin siwotet vagan biwwotets inabag, mo inoun in kweitan ven, isiw.

² “Wankuyeim anagin tutan bo bimwanoug ivag sivinan bikamkwen, mo ikayeb natouwat binekes tasiyas tawteleins bag, anagin bikow bimey, tamwey towen bikamkwen.

³ “Inekes, mo iwaweiys; nag kan isekes, ikayabes, makava iyum.

⁴ “Mo ikayeb tayuwein-vak, inekes tasiyas tawteleins bag, iwaysa wakunun iyagages; mo iyum.

⁵ “Im, ikayeb-vak tatounun; in mo iweiys, ikatimates. Wankuyeim ikayabes babaw, mwasinis iwaweiys, mwasinis ikatimates.

⁶ “Ikous natouwats babaws, anmwanet natun tatonen nises, mo ikayeb binekes; ilana, ‘Bo bivnases natug o bisiwyoubus.’

⁷ “Nag gog. Tasiyas tamtakavateins bag illivans, ilansa, ‘Kukines tamwey towen natun beim. Kumeis, taweiyis; igaw gog tamwey towen bikanig, mo bitakawes dakiyays, bag towen.’

⁸ “Mo ituts, inekes, iweiys taw mtowen, tamwey natun, mo inupes, ilaves, in watoulan bag.

⁹ “Tamwey taginibag towen ininuway, ilana, ‘Aveiyag bavag?’ Adok bo binekes, tasiyas tamtakavateins bag bikatimates, bisek gog siwotet gamag mwasinis wasigeis.

¹⁰ “Adok nag kukwakins livanen, Bukitab waseg nises mamagina: ‘Wululay towen, tawteleins bunatum nipiavies, tage bo imlavag anmawamwan bunatum.

¹¹ DaGuyaws nawotet towen; bo isom nanouds.’ ”

¹² Yeisuw anilivan iyakous, tasiyas ikakins-wan Yeisuw anilivan peinan asisinap kalbaleb, mo ikapasal nuwes, idokes kid biyousis Yeisuw beiweiys. Nag gog; aspwayat peinan ikines gamag singaya babaw, mapuna bo ilisawes, inounas.

Payin silmanin Sisal

(Matiw 22:15-22; Luk 20:20-26)

¹³ Min-Yudiy tasiyas mo ikayabes Palisiy mwasanin sisiyas Elod nagamag mwasanin, binekes Yeisuw bikatiganes, bikines kokin beibol anilivan mo biyateles kid.

¹⁴ Inekes Yeisuw, idibakes, ilansa, “Tamwey, kakakina yakoum amsinap kamnat. Nag bukuvnas gamag teitan mo bukupiyev kid son, nag. Nag kuninuway gamag askakin watoulan, nag. Tage mukwatimlakay mounid, Yowbad inaked silmanin. Tab kadilok bitapayins Sisal natakis, ne? Bitatams Sisal waseg o bitapiyaves adok?”

¹⁵ Tage Yeisuw bo ikakin tayyaweids tasiyas, idibakes ilana, “Wawun kuyakwaneigs, ne? Money silmanin takis kumeyes bakin.”

¹⁶ Imeyes money dakul towen yagan danaliyus, ikin, ikatiganes, ilana, “Kal gamag kululuwan nileles money towen waseg, o kal yagan nileles towen?”

Iweis tasiyas, ilansa, “Sisal.”

¹⁷ Yeisuw mo idibakes, ilana, “Sisal navavag kutams Sisal waseg, o Yowbad navavag kutams Yowbad waseg.”

Iliganes anilivan towen, bo isom ninous tasiyas.

Gamag beikits vayuwein

(Matiw 22:23-33; Luk 20:27-40)

¹⁸⁻¹⁹ Tasiyas Sadusiy asilivan, ilansa, “Takanigs nag beikits vayuwein.” Tasiyas gog inekes Yeisuw, ikatiganes, ilansa, “Tamwey, kweiboug Moses nilel dakaleiwags mamagina: Kokin kal taw bikanig, natun nag, bwadan mo beivays son nakwab vagan bikop natun mo bimlavag tuwan natun.

²⁰ “Tamwey teitan, budan gog teinim tatanok; tamwey iginivay son nakwaw, mo ikanig, natun nag.

²¹⁻²³ “Isiken mo ivay son nakwab, mo ikanig, natun nag. Isiken, isiken, isiken iveivaya sisiv nakwab, imtamats, nitus nag, ee... iyakous tawaw, mo ikanig kudavín næwen. Igaw beikits vayuwein takanigs tasiyas, vin namwan kavel; peinan babaw neivays sisiv?”

²⁴⁻²⁵ Iw to Yeisuw, idibakes, ilana, “Adok bo ibol amilivan yakamiy, peinan nag kukwakins Bukitab anilivan, o nag kukwakins Yowbad natawtoun. Igaw beikits vayuwein mamagina anelos tasiyas walbalab, nag beivays, nag.

²⁶⁻²⁷ “Tage takanigs bo beikits vayuwein. Adok nag kukwakins Yowbad anilivan Bukitab waseg, Moses kweiboug ikin kaligweg nigigob kov. Yowbad mo idibek, ilana, ‘Yey Ebelam naYowbad yey, vey Aysak naYowbad yey, yey Yekob naYowbad yey.’ Yowbad tamwamovs tasiyas siYowbad, nag imtakavates tasiyas takanigs, nag. Singay ibol ninoumiy.”

Kaleiwag avakaein

(Matiw 22:34-40; Luk 10:25-28)

²⁸ Teitan takatimlakein kaleiwag iligen sikitugwan waseg Yeisuw, ikakina nakatumap tawtoun, mo inek Yeisuw, ikatigan, ilana, “Aw-kaleiwag imug?”

²⁹⁻³⁰ Iw to Yeisuw, ilana, “Kaleiwag tamumug mamagina: Kuliganes min-Yisleil yakamiy, daGuyaws Yowbad anmwānet. Kadiloka kusiwyoubus daGuyaws Yowbad, ateimi mounid kutāmes waseg, mwamovamiy mounid kutāmes waseg, ninoumiy mounid kutāmes waseg, mitawtoun mounid kutāmes waseg.

³¹ “Kwayuwein kaleiwag mamagina: Kuvnas soum māwana yākoum tatoneim nukuvnāseim. Nag kweitan kaleiwag imgwayes tasiyas.”

³²⁻³³ Takatimlakay town idibek Yeisuw, ilana, “Singaya bwein mukwatimlakay. Amlivan mounid, peinan daYowbads anmwānet; nag tayuwein nises. Kaleiwag tasiyas nukulivan ilisawes mansiyas man bitagob vāgan bitalun Yowbad waseg. E, bo imug kaleiwag tasiyas vagan bitasiwyoubus Yowbad ateids mounid waseg, datawtouns mounid waseg, o bitavnas sod māwana yākid tatoneid nitavnāseid.”

³⁴ Yeisuw iligen, ikakina taw town anilivan bwanabwein, idibek, ilana, “Yākoum kadilakusa Yowbad nakabkaleiwag bukukwakin.”

Ikous, mo igoulus Yeisuw; bo iyakousis sikitugwan.

Deibid tabun

(Matiw 22:41-46; Luk 20:41-44)

³⁵⁻³⁶ Wankuyeim ikatimlakes gamag wanuwan Yowbad nabunatum, ilana, “Aveiyag wawun takatimlakeins kaleiwag asilivan, ilansa, ‘Kelis Deibid tabun.’ Kweiboug Yowbad Kuluwan ansinap ikatipel isek Deibid, ilana:

‘DaGuyaws idibek gunguyaw, ilana:

Kusin wagunkātay vāgan bavāges beibus siyas astameiliw yak, bukuvnivans wakunutes.’

³⁷ “Mtowen Deibid tamwey, amawan bidok tabun naGuyaw?”

Yeisuw nakatimlakay gamag babaw sivines binganegs.

Ikanes tasiyas takatimlakeins kaleiwag

(Matiw 23:1-36; Luk 20:45-47)

³⁸⁻³⁹ Yeisuw nakatimlakay wasigeis, ilana, “Kupiyaves asisinap tasiyas takatimlakeins kaleiwag. Sivines binounas asikweim vayvayov mo gamag bikululs wamtes wavytakon ven. Tapwāloul waseg sivines bisinis wākeb, o sagal waseg bisinis wapwāsiw.

⁴⁰ “Tage tasiyas asisinap kalbaleb kupiyaves, peinan ikwekways nakwabs sivavag, mo sinitoug iveiyov. Tayyaweids tasiyas. Igaw Yowbad mo bimop asisinap kalbaleb, biyagagesa singay.”

Nakwab namuloul

(Luk 21:1-4)

⁴¹ Yeisuw isin wanuwan Yowbad nabunatum, ikin gamag babaw imimeis bimulouls. Simuloul ilaves in wanuwan didawag avakaein. Ikin guyawaw simuloul singaya avakaein.

⁴² Wankuyeim mo ikin nakwab nātan nasimav isiw im, ilev namoney dakul kekel akweiy, mamagina akweiy toya.

⁴³ Yeisuw ikin, idawes navamul, imeis, idibakes, ilana, “Mounid adibakeimiy nakwab manāwen nasimav namuloul ilisow simuloul tasiyas gamag babaw.

⁴⁴ “Tasiyas imulouls ikous, tage babaw simoney nises. Manāwen gog nasimav bo ililavena iyakous. Nag kweitan namoney nises vāgan bigimwel kan beikam; nag.”

Bigulekwas Yowbad nabunatum

(Matiw 24:1-2; Luk 21:5-6)

¹ Ikous, mo itamanaw, ilisow Yowbad nabunatum, binoun kid; navamul teitan mo idibek, ilana, “Tamwey, kukin wululay tasiyas dakul bwanābweins, o bunsiyas bunatum bunamnābweins-wan.”

² Iw to Yeisuw, ilana, “Bunsiyas bunatum bunuwk^əveks bo bigulekwes beikous. Nag kweitan dakul bises wakaban. Babaw-wan bigulekwes beikous.”

Abes bibeg

(Matiw 24:3-14; Luk 21:7-19)

³⁻⁴ Inoun in koy yagan Oliv, isin, ikin Yowbad nabunatum palatan-o nises. Siyas Pita siney Yemes, Yon, Andiluw, tasiyas-wan asteivas mo ikatiganes Yeisuw, ilansa, “Asin^əvin bivages m^əwan? Sivinem bakakakin anatut abivatus towen, bukulivan mo bakakakin youd tasiyas bisaps wadaban pwepway. Kudibakem v^əgan bakakakin.”

⁵ Yeisuw mo isilamaw anilivan, idibakes tasiyas, ilana, “Kuvn^əseimiy; awoum teitan gamag bikatidavimiy.

⁶ “Tage babaw gamag biweis, mo bilansa, ‘Yey-aya!’ mo bikatidavis babaw gamag, bidokes kid Kelis.

⁷ “Tage igaw mo bukuliganes bulagan naviy, naviy mwasanin kadilakus, mwasanin kadiveiyov. Bukuliganes, awoum beivag amipwayat. Bo bivages m^əwan, tage nakabiyokous tut igaw.

⁸ “Igaw bod mwasanin bikanaviys wasigeis bod m^əwasanin, ven mwasanin bikanaviys wasigeis ven mwasanin. Nik beinik ven mwasanin waseg. Gamag bikamates moun. Bisilamaw m^əwan simoumouvit kalamwey, tage watibwelon tut mo bivakaein singay.

⁹ “Kuvn^əseimiy; igaw mo biyateleimi takaleiwag wamites, o sinagog wanawan biwaweimiy, vatul waseg, o peinan agugwamag yakamiy bo bitamnaweimiy wamtes siyas gabman sisiyas guyawaw, mapuna livan bwanabwein mo bukusekes.

¹⁰ “Tage wanmugwana bukuklawes l^əvaneig bwanabwein kunawes, kugeiguy vena babaw wasigeis. Nakabiyokous tut igaw.

¹¹ “Avei-tut bitokeimiy bukuneis silm^ənin yatal, awoum kuninuways aveiyag bukulvanes, tage tut towen aveiyag bikamat waninoumiy bukulivans m^əwan. Yakimiy amilivan nag, tage Yowbad Kululuwan anilivan.

¹² “Tut towen wamatads tuwan teitan biyatel v^əgan beiweiys bwadan, o times biyateles v^əgan beiweys nitun, o gamagal gog bitamanaws mo biyagages beiweiys timsiyas o insiyas.

¹³ “Gamag babaw mo bikamliweimiy peinan agugwamag yakamiy. Tage bweina kwaptuleimiy; igaw nakabiyokous tut waseg mwamovamiy mo bukub^ənes.

Singay abes bigeg

(Matiw 24:15-28; Luk 21:20-24)

¹⁴ “Igaw mo bukukines takalbaleb singay bitet ven bwaboum waseg. (Kal bivin mo bikakin silawun livan towen.) Kukines, magat Yudiy bukusesus, kadiloka kusawls kuneis w^əkoy.

¹⁵ “Kukin kal bisesuna wapwasiw, kadiloka bisawl, awoum biyoubaw beisew bikow nawlioug; awoum.

¹⁶ “Kukin kal iwwotet w^əbag, awoum beiyum bikow anakweim; awoum.

¹⁷ “Tut towen wamatads siyas nakakud^əpoms bigeg abes sisiyas siyas nivvasus nitsiyas.

¹⁸ “Kuntougis Yowbad, awoum ge bukusawls bulbweilim anatut loulun waseg.

¹⁹ “Igaw tut towen beim, singaya gamag abes bibeg. Kweiboug Yowbad niginbuniyy nag m^əwan. Bweilim babaw nag m^əwan. Nagein nag m^əwan. E, tut towen beim singaya gamag abes bigeg, tage nag vayuwein biwgow.

²⁰ “Magat daGuyaws nag bigidem yam mwasanin, adok babaw gamag bikank^ənigs beikous. Tage peinan bo ikatigik nagamag mwasanin bikatimoves, mapuna bibob yam mwasanin.

²¹ “Tage tut towen wamatads, kukin kal bilivan, bilana, ‘Kukines Kelis towen-one,’ o bilana, ‘Towen-an nises’, awoum kusimounids.

²² “Igaw bisaps yaweid Kelis mwasanin, o yaweid palopit mwasanin, bikatidavis gamag. Mulin nimes bivages tawtoun mo bikatidavis gamags. Magat kadilokes mo bikatidavis Yowbad angamag tasiyas nilivnakes.

²³ “Kuvnəseimiy; peinan bo akatiboug nuwamiy mo kukwakins aveiyag bukulivatus tut wanakougawaw.

Gimgilitoun beiyum beim
(Matiw 24:29-31; Luk 21:25-28)

²⁴⁻²⁵ “Tut towen wamatads, abes singaya bigeg, kàlas biladadub, o tibukon bikayus mititeilin. Siyas wutun walbalab bikalkalouws. Aveiyag tawtoun nises walbalab mo beigwey.

²⁶ “E, mo bukukineigs Gimgilitoun yey baw, lov waseg, son guntawtoun o mititeilig avakaein.

²⁷ “Mo bakayeb guntakayobs bikatinakus agugwamag tasiyas meinoy nimeis ven katanok katanok wadaban pwepway.

Yaveinun biyasus
(Matiw 24:32-35; Luk 21:29-33)

²⁸⁻²⁹ “Yaveinun waseg kabebay kweitan nises. Igaw biyasus mo bukukwakins, buku-lansa, ‘Wuwal bisilamaw.’ Yakamiy mawan, bukukines youd tasiyas mo bukukwakins kakita mo bayum baw.

³⁰ “Mounid adibakeimiy gudwouvaws yakamiy, igaw bukusesus ee... mo bukukines youd siyas babaw.

³¹ “Libalab son pwepway beikous tage agulivan nag beikous.

Nag takakins avei-tut
(Matiw 24:36-44)

³² “Yam towen nag takakins. Nag takakins gaboug o kwayav o boug adok. Nag takakins. Yowbad natun yey nag akakin. Tamag anmwanet ikakin.

³³ “Kuvnəseimiy, kulalals. Nag kukwakins asinavin bayum bam.

³⁴ “Nagein mawan teitan gamag bein bitavin palatan, tage inagamag bimtakavates inaven. Tamwey towen bisekes siwotet kweitan kweitan; tamtakavatein gog koukwed bidibek bilana, ‘Kwaymateig ga bayum.’

³⁵ “Kukwayamatsa beibwein. Nag kukwakins asinavin bunatum tanuwagan beiyum, adok kwayav, adok watapwan boug, adok walalayis, adok gaboug. Nag kukwakins.

³⁶ “Awoum kumasis kwangagays, mata ge bilabuboleimiy geg.

³⁷ “Adibakeimiy, o babaw gamag badibakes mawan, ‘Kwaymateigs beibwein! ’ ”

14

Sivines beiweiys Yeisuw
(Matiw 26:1-5; Luk 22:1-2; Yon 11:45-53)

¹⁻² Igaw akweiy yam mo Kaltuwon Sigeilin bisagals, makava bled beikams. Tage tanuwges lun situwavek sisiyas takatimlakeins kaleiwag sivines kid beiweiys Yeisuw, idokes kid anmwaneta bibanes mo biyousis; mapuna ilansa, “Awoum bitayousis sagal wanuwan, mata ge gamag bikayuses mo bikawpwanaws adok.”

Natan vin iptom kunun Yeisuw
(Matiw 26:6-13; Yon 12:1-8)

³ Yeisuw gog nises Betaniy, ikamkwam wanbunatum toulepel teitan, yagan Saymon, mo natan vin isiw im, ikokew nabotol bwanabwein. Wanuwan nabotol tagon nises yagan nad, maysan singay avakaein. Ikatuv nabotol, mo ilgubok kunun Yeisuw.

⁴⁻⁵ Mwasanin gog mo ivtokays livan, idibakes sisiyas, ilansa, “Aveiyag wawun iyamkwen tagon towen? Kadiloka bitayamiyis, bitakow lakatutoun kina, mo bitavgen tasekes tasiyas tasimavs.” E, singaya ikawkunes manawen vin.

⁶⁻⁷ Yeisuw gog idibakes, ilana, “Deis! Awoum kutawyages manawen vin; nawotet singaya bwanabwein waseg yey. Tasimavs tut babaw simiyas kusesus, asinavin sivinamiy bweina bukulabes. Yey gog kweitan, nag simiy yey bitasesun-wan tut babaw, nag.

⁸ “Wotet towen ikadilok manawen waseg mo niwtel waseg ye. Bo iptom wougnanawan, silmanin alawag.

⁹ “Adibakeimiy igaw ven babaw bigeiguis livaneig bwanabwein waseg, mo nawotet manawen vin bilivanes vagan gamag babaw mo bininuways.”

*Yudas bisilkod Yeisuw
(Matiw 26:14-16; Luk 22:3-6)*

¹⁰ Mtowen gum-Iskaliyot yagan Yudas, Yeisuw navamul teitan, mo inekes siyatantuwgwes lun situwaveks, sivinan kid bisilkod Yeisuw.

¹¹ Iliganes Yudas anilivan, mo ikalin nuwes, ilivnakes namoney bisekes, maysan nawotet towen. Itam, mo ikayamat tut bwanabwein vagan basilok Yeisuw.

Ikamkwams siney navamuls

(Matiw 26:17-25; Luk 22:7-14, 21-23; Yon 13:21-30)

¹² Yam towen bisilamaws makava bled bikamkwams, o biwaweys Kaltuwon bulukwan, navamul idibakes Yeisuw, ilansa, “Nanoum yak, avanuy bakan bakakatineg vagan Kaltuwon Sigeilin bitakams?”

¹³ Yeisuw iligen, ikayabes navamul asteiy, ilana, “Kuneis waven, bukulivatus taw teitan ikokew nakunasoup, kwabkunis taw towen.

¹⁴ “Kwabkunis, kukines avei-bwan beisiw, kunekes tanuwagan bwan towen, kulansa, ‘Matovek ilana: Avanuy bwabwal mabunatum vagan bakakam Kaltuwon Sigeilin sigwey gunavamul.’

¹⁵ “Mtowen taw mo bikatimlakeimiy bukukines bunavakaein wanuwan nabunatum, wanakaew nises, bo ikatinages nanawan silmanin amkwam; towen waseg kuvages kads.”

¹⁶ Navamul asteiy inounas ineis waven ibanes taw towen ibukunis, mo ibanes bunatum mawana Yeisuw nilivnek, mo ikatinages Kaltuwon Sigeilin.

¹⁷ Kwayav waseg Yeisuw mo isap siney navamul.

¹⁸ Isiws bunatum towen, isinis ikamkwams, Yeisuw mo ilana, “Tawaw, tasilkodeig teitan sods nitakamkwams.”

¹⁹ Iliganes tasiyas, singaya igege ninous, tatanok tatanok idibakes sitovek, ilansa, “Kal? Hey?”

²⁰ Iw to Yeisuw, ilana, “Yakamiy sinwatan amiteiy. Teitan yakamiy gog tasilkodeig soug kasow amabled wanuwan loutan.

²¹ “Gimgilitoun yey banoy ked towen Bukitab nilivnek, tage mtowen tasilkodeig singay kalbaleb bilivet. Magat inan nag bikop bo bwein, togo bo ikop, imligamag mo singay kalbaleb bilivet.”

DaGuyaws inakamkwam

(Matiw 26:26-30; Luk 22:15-20; 1 Kolinit 11:23-25)

²² Igaw ikamkwams, mo ikow bled kweitan, ikulul, ikalin nuwan Yowbad waseg, ikiv, isekes navamuls, ilana, “Kukwawes kukwams, peinan wougn.”

²³⁻²⁴ Wankuyeim mo ikow kwavig, itapwəloul, isekes, imoums asibabaw-wan; mo idibakes, ilana, “Towen buyavig silmanin kaleiwag kweivaw, iwtawout pinamiy babaw yakamiy.”

²⁵ “Adibakeimiy nag vayuwein bamoum gleip sipinen ee... Tamag nakabkaleiwag waseg mo sipinen kweivaw bamoum.”

²⁶ Ikams ikous, wous kweitan ikanweles, mo isaps, ikatulags ineis wakoy yagan Oliv.

Ilivnek Pita bikayan

(Matiw 26:31-35; Luk 22:31-34; Yon 13:36-38)

²⁷ Yeisuw mo idibakes navamuls, ilana, “Babaw yakamiy bukulisaweigs, peinan Bukitab nilivnek mamagina:

‘Baweyi mtowen tamtakavatein sips, mo bikatigayays.’

²⁸ “Wankuyeim bəkit vayuwein mo bamgwayeimiy bitaneis waGaliliy.”

²⁹ Iw to Pita, idibek natovek, ilana, “Magat babaw tasiyas bilisaweims, tage yey nag.”

³⁰ Yeisuw idibek, ilana, “Adibakeimiy nagein, boug waseg bukukwayaneig sivatoun, mo kolkolek beigel sivay nubweig gaboug.”

³¹ Tage Pita anilivan tawtoun idibek, ilana, “Nag bakayaneim. Kukin bukumat, aditeiy soug yak bitamat.” Babaw asilivan mawan.

*Yeisuw initoug ven Getsemani waseg
(Matiw 26:36-46; Luk 22:39-46)*

³² Inounas ines ven yagan Getsemani, idibakes navamuls, ilana, “Kusinis towen, yey ban anitoug Yowbad waseg.”

³³ Itokes Pita, Yemes, Yon, asteivas ineis palatan, mo singay igeg nanon, anpwat seikwan.

³⁴ Idibakes, ilana, “Singay igeg nanoug. Bo bakanig adok. Kusesus towen kukwaymateigs.”

³⁵⁻³⁶ Inoun in kadiyakus, imasis kantukov wapwepway, initoug Taman waseg, idok kid bigidem youd kalbaleb wamatan, kakita bo bilouvat, ilana, “Tamag, bo ikadilokeim youda babaw. Kuyamen agukwavig towen; awoum bamoum. Nanoug yey awoum; tage nanoum yak kuvag mawan.”

³⁷⁻³⁸ Iyum inekes navamul bo imasis, idibek Pita, ilana, “Bo kumasis, ne? Nag kadilokeimiy tut kadilakus-wan kwaymateigs. Kwaymateigs kunitougs; mata ge bukusiws abiyokon waseg. Ninoumiy waseg bukutawtouns; nag gog, woumiy tougweys.”

³⁹ Vayuwein mo in palatan initoug, anilivan mawan nilivan.

⁴⁰ Iyum inekes, vayuwein bo imasis, peinan mites bo inanup. Nag ikakins amawan bikatimapus aygan.

⁴¹⁻⁴² Sivtounun inoun, initoug, iyum, ilana, “Bo kumasis, kuyeiwas, ne? Bo deis. Datuts bo ikous. Teitan gamag bo bisilkodeig Gimilitoun yey; tasiyas takalbalebs bo biyousigs. Kukits, tanounas; tasilkodeig bo isap.”

Iyousis Yeisuw

(Matiw 26:47-56; Luk 22:47-53; Yon 18:2-12)

⁴³ Igawa illivan, navamul teitan, Yudas, isaps siney tasiyas takaweins pulut son new; peinan tammwayas bo ikayabes nimeis. E, tammwayas sisiyas tanuwgwas lun situwəvek sisiyas takatimlakeins kaleiwag bo ikayabes nimeis.

⁴⁴ Tasilkodein bo idibakes kweitan sinap vagan bikakins kal Yeisuw, ilana, “Kukines kal bakamuloul soug, mtownen Yeisuw, kuyousis, kumtakavates beibwein.”

⁴⁵⁻⁴⁶ Mto Yudas iwek Yeisuw, ilana, “Kalin nuwag guntovek yak,” mo ivayams son. Tasiyas ikines, ituts, iweis, iyousis, itawtouns waseg.

⁴⁷ Teitan gog nitet waddan mo ikow napulut tanmunum, iweiy natouwat tanuwgwas lun sitovek avakaein, ibob teigan.

⁴⁸⁻⁴⁹ Yeisuw gog idibakes, ilana, “Mipulut minew kukokews, kuyousigs mawana tavveinaw yey. Yam katanok katanok Yowbad wanbunatum wamtamiy akatimlakes gamags, nag kuyousigs. Tage sinap mawan vagan bikamat livaneig Bukitab waseg nilivnek.”

⁵⁰ Inavamul babaw bo isawls, ilisawes Yeisuw.

⁵¹⁻⁵² Natabwəkun teitan anakweim mwayntanok nisikam, bisawl kid, tage bo iyousis; ilisow anakweim wanimes, sona mwadoyan mo isawl in.

Yatal

(Matiw 26:57-68; Luk 22:54-55, 63-71; Yon 18:13-14, 19-24)

⁵³ Itokes Yeisuw binawes tanuwgwas lun sitovek avakaein wamatan, biyateles. Ikatuyouns nimeis babaw siyas tanuwgwas lun situwəvek, sisiyas tammwayas, sisiyas takatimlakeins kaleiwag.

⁵⁴ Pita anmwənet ibwəkun kadiveiyov, nag in walisis, isap tanuwgwas lun sitovek avakaein wanven, mo isinis siney tasiyas tawtotets, ikamunuws wəkov.

⁵⁵ Iyatals. Tanuwgwas lun situwəvek sisiyas tammwayas babaw iyateles Yeisuw vagan kid bikatimates, tage silawun nag ibənes.

- ⁵⁶ Iyyatals, gamag babaw asilivan yaweid-wan, peinan asilivan nag ilatanes.
- ⁵⁷⁻⁵⁸ Iyyokons ee... tayyaweids asteiy mo itamanaws, ilansa, "Yakamey nakaligen anilivan mamagina, 'Yowbad nabunatum towen gamag niwlules, yey bo bagulek, ikous, kweitoun yam mo bawlulavaw, tage nag namag bawlul.' "
- ⁵⁹ Ilivans mawan, tage asilivan nag ilatanes katanok-wan.
- ⁶⁰ Wankuyeim tanuwgves lun sitovek avakaein mo itamanaw wanuwein, wamatan Yeisuw, ilana, "Nag aveiyag bukwatimop, ne? Aveiyag silawun asilivan tasiyas?"
- ⁶¹ Yeisuw gog isesuna ikkapay. Vayuwein ikatigan, ilana, "Tabta yakoum Kelis, Tamwey bwanabwein natun yak, ne?"
- ⁶² Iw to Yeisuw, ilana, "O, mawan. Igaw bukukineigs Gimgilitoun yey bassin Tatawtoun wanakatay, mo bam libalab lov-nen waseg."
- ⁶³⁻⁶⁴ Tanuwgves lun sitovek avakaein ikapasal nuwan, iksigeb anakweim, ilana, "Nag sivinads teitan gamag bikamtel ansinap kalbaleb; peinan bo taliganes anilivan kalbaleb. Aveiyag bitavages?" Babaw itams, ilansa, "Kadiloka bitaweiys."
- ⁶⁵ Mwasanis mo igusus, ilumwes magin, iwaweiyis, ilansa, "Kulivan mawana palopit yakoum." Igawa iwaweiyis, siyas tawwotets mo itokes Yeisuw, ineis.

Pita ikayan

(Matiw 26:69-75; Luk 22:56-62; Yon 18:15-18, 25-27)

- ⁶⁶⁻⁶⁷ Pita igawa nises wamatan bunatum, tanuwagan lun natouwat kudavin natan inek Pita, ikin ikamunuw kov, iwtus, ilana, "Adok yakoum-vak soum gum-Nasalet Yeisuw yakoum, ne?"
- ⁶⁸ Ikayan, ilana, "Nag. Nag akakin aveiyag kulivan." Mo inoun in wadunan ked.
- ⁶⁹ Vin manawen ikin, idibakes tasiyas nitatos, ilana, "Mtowen Yeisuw nagamag teitan."
- ⁷⁰ Vayuwein Pita ikayan. Tut kadiyakus wankuyeim siney nitabalawaws idibakes Pita, ilansa, "Mounid yakoum Yeisuw nagamag teitan, peinan gum-Galiliy yak."
- ⁷¹ Iw to Pita, ilana, "Nag. Awouum bayaweid; Yowbad beiweig. Nag akakin gamag to nukulivan."
- ⁷² Ilivan ikous, kolkolek mo igel sivay. Pita iligen, inuw Yeisuw anilivan mamagina, "Sivatoun bukwayaneig mo kolkolek beigel sivay." Anilivan nilivnek mawan, inuw Pita, anmwasin mo ivalam.

15

Iyateles Yeisuw, Paylat wamatan

(Matiw 27:1-2, 11-14; Luk 23:1-5; Yon 18:28-38)

- ¹ Walalayis-wan tasiyas tanuwgves lun situwavek sisiyas tammwayas, sisiyas takatimlakeins kaleiwag, tasiyas tababaws mamagina konsels illivans bo idumwal ninous katanok-wan, mo iyawanis naman Yeisuw, itokes, inawes Paylat wamatan.
- ² Mtowen Paylat ikatigan, ilana, "Tabta min-Yudiy siking yakoum?"
Yeisuw ilana, "Mawan amlivan."
- ³ Tasiyas tanuwgves lun situwavek iyateles Yeisuw, asilivan babaw waseg.
- ⁴ Vayuwein mo Paylat ikatigan, ilana, "Nag bukwatimop, ne? Livaneim babaw illivans."
- ⁵ Tage Yeisuw nag ikatimop anilivan, ikkapay-wan, Paylat ikin, bo isunasun nanon.

Bo beiweiys Yeisuw

(Matiw 27:15-26; Luk 23:13-25; Yon 18:38-19:16)

- ⁶ Sagal towen waseg Paylat bilik tasiwun deil teitan bein wamnat, kal sivines gamags.
- ⁷ Bweilim katanok katanok mawan. Teitan gamag yagan Balabas nises wadeil, kweiboug siney tasiyas tapiyaveins gabman nakaleiwag ivvatays waseg gabman natouwats mo iweiy gamag.
- ⁸ Babaw gamag inekes Paylat, ilansa, "Tab bukulik tasiwun deil, kal bakalivan, bisap, mawan mukwaleiwag nukuvvag bweilim babaw."
- ⁹ Iw to Paylat, ilana, "Tab sivinamiy min-Yudiy miking balik beiw, ne?"

¹⁰ Paylat gog ikakina antameiliw Yeisuw tasiyas tanuwgves lun situw^əveks, to niyateles.

¹¹ Tage tasiyas tanuwgves lun bo itateiys nino^o gamag babaw, igaw mo bikavtagis kid Balabas yagan vagan bilik beim wamnat. E, ilivans m^əwan.

¹² Vayuwein mo Paylat ikatig^ənes, ilana, “Aveiyag banuwek mtowen miking min-Yudiy yakamiy?”

¹³ Vayuwein iwaks, ilansa, “Kuweiys waklos, beimat.”

¹⁴ Iw to Paylat, idibakes, ilana, “Aveiyag ansinap kalbaleb?”

Tasiyas gog singay iwkuwaks, ilansa, “Kuweiys, kuweiys!”

¹⁵ Paylat bo itam wasigeis gamag babaw, ilik Balabas, o idibakes biwawiys kid Yeisuw, vatul waseg, mo bikatikavates bikayagweg waklos, bikanig.

Tasiyas takanaviys iyages Yeisuw

(Matiw 27:27-31; Yon 19:2-3)

¹⁶ Tasiyas takanaviys mo itokes Yeisuw inawes ilaksiwus wasibunatum bunavakaein, idawes sisiyas takanaviys babaw bimimeis.

¹⁷ Imeis, ikawes kweim bwabwel, ivaskoumis; ikous mo ikawes vatul kulikoul, ikwanis wakunun magina anapay.

¹⁸ Ikous, mo illivansa mav, ilansa, “Kalin nuwem, min-Yudiy siking y^əkom.”

¹⁹ Amweilok ikawes, iwawiys wakunun, igusus, ikululs wamatian.

²⁰ Isib^əwes ikous, inisis maynawen kweim bwabwel, ivaskoumis anakweim tonen, itokes inawes vagan beiweiys waklos.

Iweiys Yeisuw waklos

(Matiw 27:32-44; Luk 23:26-43; Yon 19:17-27)

²¹ Itokes Yeisuw, inounas w^əked, ilivatus Saymon meinoy wanawoud neim; gum-Saylin towen nitun asteiy Alekisan son Lup. Ilivatus Saymon, idibakes, ilansa, “Kukew anklos taw towen.”

²² Itokes inawes ven Golgot. Golgot takativini bein aga-Muyuw, Busabwes.

²³ Isekes beimoum wayn son mul, ipiyev.

²⁴ Ikous mo ikatikavates, ikayagweg waklos. Ikokews anakweim, ikalawages; ilaves kweitan youd bikines kid kalisiy bikawes asikweim tatanok tatanok tasiyas.

²⁵ Ikatikavates gaboug, k^əlas italgalag.

²⁶ Ileles nakalbaleb, isenas waklos mamagina, “Min-Yudiy siking.”

²⁷ Asteiy sisiy Yeisuw ikatikavates wasklos, tavveinaws, teitan wanakatay, teitan wankimaw. ²⁸ (-)

²⁹⁻³⁰ Tasiyas gog inounas w^əked, itawyages, asilivan kalbaleb, ilansa, “Y^əkom tagulekwein Yowbad nabunatum, ne? Kweitoun yam kid bukuwlulavaw, ne? Kubus waklos kum; kwatinabweim tatoneim.”

³¹⁻³² Tasiyas tanuwgves lun sisiyas takatimlakeins kaleiwag illivans, issebaws, ilansa, “Bo ikitinabwes gamag mwasanin, ta-m^əwan bikatinob tatonen. Magat mtowen Kelis, min-Yisilei dakin, kadiloka beibus waklos beim, bitakines mo bitasimounids.”

Siney-vak igawa nikayagwegs wasklos, itawyages Yeisuw.

Yeisuw imat

(Matiw 27:45-56; Luk 23:44-49; Yon 19:28-30)

³³ Yam towen yanay bo iladadub ven, idadub ee... k^əlas itageg, mo ikamnat.

³⁴ K^əlas itageg, Yeisuw iwak, ayan avakaein, ilana, “Eli, Eli, lamasabaktaniy.” Takanivini gog bein aga-Muyuw “GunaYowbad, gunaYowbad, aveiyag wawun nukulisaweig?”

³⁵ Iliganes mwasanin siyas nitabalawaws wadadan, ilansa, “Bo idow Ilaytiy beim.”

³⁶ Teitan gog isawl in, ikow yotout, ibes kayal matan, isow wayn yayan waseg, iyasel binek Yeisuw wadon beimoum, ilana, “Beitay wouds, bitakines ga beim Ilaytiy mo binib.”

³⁷ Ikous, Yeisuw iwak, ayan avakaein, mo ikanig.

³⁸ Maynawen kweim nisilbwed palakakit wanuwan Yowbad nabunatum, mo isiled, isilamaw wanakaew in watinow, ivag mwayney.

³⁹ Takalikay towen nitamanaw wamatan Yeisuw, iligen aygan avakaein, ikin ikanig, ilana, “Mounid taw towen Yowbad natun.”

⁴⁰⁻⁴¹ Vinay gog kadiiveiyov nitamanaws ikakins, vinen-Magdal yagan Meliy, son valeyin manawen nitun Yemes takakit son Yusitos, sisiy Salom. Kweiboug Galiliy waseg vinay tasiyas ibukunis Yeisuw ivakamus. Tasiyas sisiyas vinay mwasanin nimeis Yelusalem, itamanaws ikakins.

Itakus Yeisuw

(Matiw 27:57-61; Luk 23:50-56; Yon 19:38-42)

⁴² Kwayav waseg mo ikatinages silmanin sagal nubweig Sabat.

⁴³ Gum-Alimatiy nises yagan Yosep, min-Yudiy sitakaleiwag teitan bwanabwein, nikaymet Yowbad nakaleiwag beim. Kwayav Yam towen mtownen Yosep ikapwapout, inek Paylat, bintoug won Yeisuw vagan bikow binow bidibwen.

⁴⁴ Mtownen Paylat idoki singay nuwanaw ankanig Yeisuw, idow natakalikay; im ikatigan, ilana, “Tabta mtownen Yeisuw bo nikanig, ne?”

⁴⁵ Itam, ilana, “O!” mapuna Paylat itam Yeisuw won vagan Yosep bikow.

⁴⁶ Mtownen Yosep in igimwel maynatan kweim pwapwakaw, imey, mo ibwi Yeiaw waklos, imey watinow, mo isumweil won, kweim to pwapwakaw waseg. Ikous mo ikow inow isen wakalawag. Alawag towen neiteiys takunumwan. Dakul avakaein iyatpinis in ikatibwed wadon leg.

⁴⁷ Vinay asteiy ikines alawag towen nisenas, vinen-Magdal yagan Meliy, son valeyin, Yusitos inan.

16

Yeisuw ikit vayuwein

(Matiw 28:1-8; Luk 24:1-12; Yon 20:1-10)

¹ Wankuyeim, S̄abat ikous, vinay asteitoun igimweles tagon binawes kid biptumis Yeisuw won. Tasiyas vinen-Magdal yagan Meliy, valeyin Yemes inan, sisiy Salom.

² S̄abat ikous, kweivaw Yam, walalayis ikanakons inounas, bilakwanes kid alawag; kalas bo neipel.

³ Illivans sisiyas, ilansa, “Kal biyatipin dakul towen nisilbwed wadon leg vagan bitasiws?”

⁴ Ilivans m̄awan mo itamnawes mites, ikines nanawan bo iyatpin nises wadadan leg; singay avakaein dakul towen.

⁵ Iweis tasiyas, isiws wanuwan alawag ikines toubwat teitan nisin waskatay, anakweim pwapwakaw. Ikines mo ivag aspwayat.

⁶ Mtownen taw idibakes, ilana, “Awoum beivag amipwayat. Kunineivs gum-Nasalet Yeisuw, neimat waklos. Bo ikit. Bo nein. Kukines nakabmasis makaw-wan.

⁷ “Kuneis kudibakes navamuls sisiy Pita, kulansa, ‘Bo bimgwayeimiy bein waGaliliy, kuneis waGaliliy mo bukukines, m̄awan nidibakeimiy.’”

⁸ Isaps tasiyas, isawls, ilisawes alawag, itatat wous, singay isom ninous. Nag ikamteles teitan gamag waseg, peinan aspwayat.

Vinen-Magdal ikin

(Matiw 28:9-10; Yon 20:11-18)

⁹ [S̄abat ikous, iyam nen bo ikit Yeisuw, wanmugwana isap waseg vinen-Magdal, yagan Meliy, kweiboug nikayeb yeiluw teinim teiy niyagages. Manawen ikin, inoun, inekes Yeisuw nagamag igawa nivvalams.

¹⁰⁻¹¹ Meliy ilana, “Bo akin Yeisuw sona mwamovan nises.” Tasiyas iliganes, tage nag isimounids.

Asteiy ikines

(Luk 24:13-35)

¹²⁻¹³ Wankuyeim nagamag asteiy ikines Yeisuw ankakin kweitan, igaw inounas bineis wanawoud. Ikines, iyums idibakes sisiyas, tage nag isimounids.

*Navamuls bo isekes siwotet**(Matiw 28:16-20; Luk 24:36-49; Yon 20:19-23; Wotet 1:6-8)*

¹⁴ Wankuyeim navamul sinwatan tatanok, ikamkwams, mo inekes. Ikines, ilana, “Keikay gamag, takakons yakamiy. Gamag mwasanin bo ikineigs, idibakeimiy, tage nag kusimounids.”

¹⁵⁻¹⁸ Ilana, “Kuneis vena babaw, kugeiguis, kusekes livan bwanabwein, gamag tatanok tatanok wasigeis. Kukin kal bisimounid bibaptays mo Yowbad bikatinob; kukin gog nag, Yowbad mo bikamtan. Tasiyas bisimounids mo biwotets tawtoun; yagag waseg bikayabes bwagaw; kaeig kweitan kweitan billivans; mwatet biyousis wanimes; o pwātuw beimoums nag biyagages; bisenas nimes takatouns wawous mo beibweins.”

*Imwen in walbalab**(Luk 24:50-53; Wotet 1:9-11)*

¹⁹ SiGuyaw mtowen siney illivans ikous, mo imwen in walbalab, isin Yowbad wanakatay.

²⁰ Tasiyas gog mo ineis ven babaw igeiguis, siGuyaw ilabes, siwotet mo itawtoun singay. Gamag ikines tawtoun siwotet mo isimounids asilivan waseg.]

LUK

Nakabsilamaw

¹ Kalin nuwag yakoum Tiyopil. Peinan babaw gamag bo isilamaws mo ileles livanen Yeisuw inawotet niwtel wasigeis yakids.

² Peinan wanmugwana mwasanin bo nikines wamtes, mo ikawes livanen Yeisuw, isekemas yakamey.

³⁻⁴ O yey-vak tut babaw aligen livan towen, asisawena oko ayakous, mo nanoug alana, "Adok bweina balivkaes livan babaw, basen mulet waseg, beiw bukukin, guyaw yakoum Tiyopil." Bukuvin vagan bidumwal nanoum mo bukusimounid waseg sinap towen nikatimlakeims.

Elisabet bikop natun

⁵ Tutan min-Yudiy siking yagan Elod, tanuwagan lun teitan yagan Sekaliy. Nakwav yagan Elisabet, manawen Elon delen. Tasiyas tanuwgves lun dal kweitan kweitan. Mtowen Sekaliy Abiy delen.

⁶ Mtowen Sekaliy son nakwav asisinap didumwal wamatan Yowbad. Yam katanok katanok ivnases Yowbad nakaleiwag babaw, iyakousis.

⁷ Tage nitus nag, peinan Elisabet vinakal bo ivnavek, o namwam bo itovek.

⁸ Tasiyas Abiy delen, anatut waseg iwteles lun Yowbad wanbunatum.

⁹ Peinan sikkun mawan, kweitan youd ilavesa mav mo iton yagan mtowen Sekaliy; mo ikow nawotet kweitan, mamagina isiw in Yowbad nabunatum wanuwan, igob gewuw, manisin simasim seikwan.

¹⁰ Gamag meivek-wan watoulan bunatum ikululs ininitougs waseg Yowbad, peinan bo tutan gewuw beigabs.

¹¹ Mo Yowbad natakayob teitan isap waseg Sekaliy, itoun nakabeigab gewuw wanakatay waseg.

¹² Mtowen Sekaliy ikin, iyow nuwan, anpwayat seikwan.

¹³ Mtowen anelos mo idibek, ilana, "O Sekaliy, awoum beivag ampwayat. Yowbad bo iligen mukwanitoug, mukwav Elisabet bo bikop nitumiy, mo bukudok yagan Yon.

¹⁴ "Yakoum bukumwasaw seikwan simwey babaw gamag bimwasaws, mukwav inakop-way waseg bikop nitumiy.

¹⁵ "Mtowen natum bo bitawtoun wamatan Yowbad. Nag beimoum wayn o tawtoun yevagam, nag. Awei-tut inan bikop, Yowbad Kululuwan mo binek gwad towen, son bises bisigeg.

¹⁶ "Mtowen bo bileb min-Yisleil mwasanin mo bikanavin ninous, beiyum binekes siGuyaw Yowbad.

¹⁷ "Peinan bo bikanow daGuyaws aygan, biwotet Kululuwan tawtoun waseg, mawan Ilaytiy kululuwan. Bivag timsiyas ninous bikanavin mo binekes gamagal; o tasiyas takapidabs bikanavin ninous mo bisinaps mawana tadirumwals. E, natum inawotet mawan, vagan bikabutus inagamag silmanin Yowbad inawotet."

¹⁸ Iw to Sekaliy idibek anelos, ilana, "Amawan bakakin amlivan towen mounide? Peinan bo atovek, o gunakwav bo ivnavek."

¹⁹ Anelos ikatimop anilivan, ilana, "Yey Gebliyel, tut babaw natitamanaw wamatan Yowbad. Bo ikayabeig nam adibakeim bulagan towen bwanabwein.

²⁰ "Peinan nag kusimounid waseg agulivan, bo bukusesuna mamagina gumugum yak. Bukusesuna ee... anatut youd towen nalivnek; wankuyeim mo bukulivan."

²¹ Gamag tasiyas ikayamats Sekaliy, idokes aveiyag wawun inayouviy wanuwan bunatum.

²² Ikayamats ee... mo isap. Ta-mawan bilivan; mo ikakins mtowen nikin kweitan youd wanuwan Yowbad nabunatum; anilivan bogo naman-wan; wadon nag mawan bilivan.

²³ Mtowen Sekaliy ises iwwotet ee... yam towen iyakous nawotet, mo iyum in wanven.

²⁴⁻²⁵ Wankuyeim nakwav Elisabet mo isum, nises wabunatum kweinim tibukon; mamagina bo issowm wabunatum, ilana, “Yowbad inawotet mawan. Bo ikalin nuwan yey. Gamag nivtokeigs livan vinakal yey, agumwasin; nagein gog bo iyakous.”

Meliy bikop natun

²⁶⁻²⁷ Kweinim tibukon ikous, iton kweivaw, mo Yowbad ikayeb anelos Gebliyel in Galiliy, ven yagan Nasalet. Inek nakubukwab nagtabod nibokes beivay kid son taw Yosep, Deibid delen.

Nakubukwab manawen yagan Meliy.

²⁸ Mtowen Gebliyel inek Meliy, ilana, “Kalin nuwag! Yowbad soum yakoum, ilabeim.”

²⁹ Manawen anpwat singay; ininuway seik aveiyag silawun livan towen.

³⁰⁻³¹ Iw to anelos, ilana, “Meliy, awoum beivag ampwayat. Yowbad bo ikalin nuwan yakoum. Igaw mo bukukop natum kudataw. Ikous, mo bukudok yagan Yeisuw.

³²⁻³³ “Mtowen bo bitawtoun. Gamag bidokes ‘Tatawtoun Yowbad Natun.’ DaGuyaws Yowbad bo bisek inakaleiwag tawtoun, peinan tabun Deibid inakaleiwag; mo bikaleiwag Yekob delen wasigeis. Nakaleiwag bises bisigeg.”

³⁴ Meliy ikatigan anelos, ilana, “Amawan basum, peinan ta-ivag gunamwan.”

³⁵ Iw to anelos, idibek, ilana, “Yowbad Kululuwan biwekeim, Yowbad natawtoun waseg bisekeim. Mapuna bukusum natum, gamag bidokes gwad to takamnat, Yowbad Natun tatonen.

³⁶ “Tage veiyoum Elisabet bo ivnavek mo isum, natun kudataw nises wanuwan. Idokes kid vinakal manawen, tage neisum kweinim tibukon katanok waseg.

³⁷ “Peinan Yowbad waseg, youd babaw bo kadilok.”

³⁸ Meliy iligen ikous, mo itam, ilana, “Bwein. Yey Yowbad natouwat yey. Bweina bivageig mawan nukulivan.” Anelos towen mo ilisow, inoun.

Meliy inek Elisabet

³⁹⁻⁴⁰ Tut towen Meliy mo itamanaw, inuwanaw, inoun in koyakoy, ven kweitan wawnuwan Yudiy, isiw in wanuwan Sekaliy nabunatum, imulouls son Elisabet.

⁴¹⁻⁴² Elisabet iligen Meliy anilivan ikous, natun mo ivatay wanuwan, Yowbad Kululuwan mo inek manawen Elisabet, aygan avakaen, ilana, “Singaya namwasaw yakoum. Vinay babaw isimwasaw nag mawan yakoum. Natum nukusum singay bwanabwein.

⁴³ “Aveiyag wawun Yowbad nisiwyoubug mo kumekeig, DaGuyaws inan yakoum?

⁴⁴ “Nukum, aligen aygam mo natug ivatay wanuwag, peinan bo imwasaw.

⁴⁵ “Singay tammwasaw yakoum peinan kunamis vagan bikamat youd towen Yowbad nidibakeim.”

Meliy iyakawn waseg Yowbad

⁴⁶ Iw to Meliy, ilana,

“Kululuwag iyakawn waseg Yowbad.

⁴⁷ “Singay amwasaw, peinan takatinaweig Yowbad.

⁴⁸ “Peinan bo inuway tasimav natouwat yey.

Wankuyeim gamag babaw mo bidokeigs

nammwasaw yey, bweilim katanok katanok waseg.

⁴⁹ “Towen Tatawtoun, singaya bo ilabeig; yagan tonen kamnat.

⁵⁰ “Bo inok nuwan tasiyas nigigoulus; wankuyeim nitsiyas o tibsiyas bo mawan.

⁵¹ “Naman tawtoun waseg bo itakayway.

Bo ikatigulekwas tasiyas takaypamweins sinap.

⁵² “Bo ikatigulekwas sikaleiwag tasiyas tatawtouns; o tasiyas tasimavs bo iyamwenes.

⁵³ “Tasiyas asimoun bo isekes kaeis bwanabwein, beikams bikamuweips.

Tage bo ikayabes guyawaw, asimoun waseg iyums.

⁵⁴⁻⁵⁵ “Bo inuway anilivan bwein nidibakes tammwayas, tasiyas Ebelam

siney delen yakids, tut nag beiyakous.
E, bo inuway anilivan, inok nuwan,
ilabeids min-Yisleil yakids.”

⁵⁶ Meliy ilivan ikous; asteiy nisesus son Elisabet; adok kweitoun tibukon, mo iyum in wanven.

Elisabet ikop natun Yon

⁵⁷ Manawen Elisabet nises ee... tutan bo itup mo itapoy naman, natun kudataw.

⁵⁸ Ansinvalam sisiyas taliven mo iliganes bulagan Yowbad nasiwayoub avakaein waseg Elisabet, inekes, sisiy imwasaws.

⁵⁹⁻⁶⁰ Yam kweinim ikous, kwatounun yam mo inekes vagan bibwabwes momwan gwad; bidokes kid yagan Sekaliy, mamagina valeyin taman; tage inan igidem sikaleiwag, ilana, “Nag. Tadokes yagan Yon.”

⁶¹ Iweis tasiyas, ilansa, “Aveiyag wawun? Nag ivag amigamag teitan yagan Yon, bukudokes valeyin.”

⁶² Mo ilivates nimes waseg, ikatiganes taman, avei-yeg waseg bidokes yagan gwad towen.

⁶³ Taman towen sivinan buk; isekeids mo ilel mamagina “Yagan Yon.” Ikines, bo isom ninous.

⁶⁴ Ilelel ikous, mo ikapwageg wadon, ilivan, iyakawn waseg Yowbad.

⁶⁵ Bo iyow nuwes tasiyas; bulagan illivans ven babaw koyakoy wawnuwan Yudiy.

⁶⁶ Asbabaw iliganes, ininuways, ilansa, “Gwad towen aveiyag mo bimlavag?” Peinan Yowbad son gwad towen, ilileb.

Sekaliy ilivnek livgnen Yon

⁶⁷ Yowbad Kululuwan mo inek taman Sekaliy, ilivnek sinap, ilana:

⁶⁸ “Min-Yisleil yakids bitayakawns waseg daGuyaws Yowbad,
peinan bo ilakwaneids nagamag yakids,
ikatinabweids.

⁶⁹ “Natouwat Deibid delen teitan bo isekeids takatinabweids.

⁷⁰ “Kweiboug Yowbad nilivnek waseg asilivan inapalopits tatonen.

⁷¹ “Anilivan mamagina bikatinabweids;

awoum tasiyas nikamliweids biyagageids.

⁷² “O binok nuwan, peinan nilivnek wasigeis tammwayas.

Bo inuw anilivan towen mounid.

⁷³⁻⁷⁵ “Anilivan mounid towen nisek tabuds Ebelam,
itam vagan bikatinabweids.

Awoum tasiyas nikamliweids biyagageids;

mapuna beiyakous adpwayats,

o bitakanawes ayan, waseg

adsinaps didumwal, bwanabwein, yam

katanok katanok.

⁷⁶ “O gwad yakoum, igaw gamag mo bidokeims

‘Yowbad Tatawtoun inapalopit yakoum.’

Peinan bukumgwey; inaked bukuvag beibwein.

⁷⁷ “Bukwatimlakes inagamag mo bikakins nakatuneib waseg,

peinan biwid asisinap kalbaleb, binumlev.

⁷⁸⁻⁷⁹ “Towen Yowbad inasiwayoub bwanabwein beinoy walbalab bimekeids,

mamagina lalayis

beim mititeilin waseg bimteilids,

o bimteilis kid tasiyas tadaubs, tasiyens kabkanig walasin,

mo bikatimlakeids niwal kidenen.”

⁸⁰ Gwad towen bo itawbwat, bo ivakaein, kululuwan bo itawtoun, misik wanawoud ee...
anatut waseg mo ikamat wasigeis min-Yisleil.

*Meliy ikop natun Yeisuw**(Matiw 1:18-25)*

¹ Gwad towen Yon igaw kakit, king avakaein yagan Sisal Ogoustos mo ikaleiwag mawan gabman, vagan bileles yiges gamag babaw, ven meiveka wasigeis.

² Inakaleiwag towen wanamug, anatut mtowen Kwlilnis nikaluweg ven yagan Siliy.

³ Sisal ikaleiwag ikous; mo inounas gamags meivek-wan, ineis wasiven tatineis, silmanin yiges bileles.

⁴⁻⁵ Yosep-vak ilisow ven Nasalet wawnuwan Galiliy, ikatulags ineis Yudiy, Deibid inaven yagan Betelem, peinan Deibid delen mtowen; e, bilel kid yiges son nakwav Meliy, ankudapom.

⁶ Asteiy nisesus Betelem, mo ilouvat anatut bo nitup.

⁷ Nitup manawen, peinan anigavaw, mo ikop natun kudataw. Isumweil anakweim, isen wadawag, bulumakaw astavalel waseg, peinan nag ivag aban wanuwan bunatum. Singay gamag babaw.

Tamtakavateins aleis sip inekes Yeisuw

⁸ Ven towen tamtakavateins aleis sip wanawoud boug waseg nimtakavates aleis.

⁹ Yowbad natakayob mo isap wasigeis, Yowbad inakamnat imteil ven towen nisikes; mapuna ivag aspwayat.

¹⁰ Anelos towen idibakes, ilana, “Awoum beivag amipwayat, peinan basekeimiy mwaw livanen, simiyas meiveka gamag.

¹¹ “Nagein gog, Deibid inaven waseg natán vin bo ikop mtowen takatinabweimiy, daGuyaws Kelis.

¹² “Igaw bukubanes apwaw nisumweilis anakweim nimmasis wadawag, bukukines mo bukukwakins mtowen Kelis.”

¹³ Ilivan ikous, nuwanaw mo inekes min-libalab singay babaw, ikavasis Yowbad, ilansa,

¹⁴ “Singay tayakawanes Yowbad walbalab;

O niwal watinow wasigeis tasiyas tasiwayoub.”

¹⁵ Anelos tasiyas mo ilisawes, iyum ineis walbalab, tamtakavateins aleis mo illivans sisiyas, ilansa, “Kumeis, taneis Betelem, bitakines youd towen nikamat, peinan daGuyaws bo ikamtilakeids.”

¹⁶ Ilivanes ikous, nuwanaw ineis, ibanes Meliy son Yosep, sisiy apwaw nimmasis wadawag.

¹⁷ Ikines ikous, mo ikamteles livanen gwad towen, peinan gum-libalab nikamtilakes.

¹⁸ Tasiyas tamtakavateins aleis ikamteles asilivan ikous, o tasiyas niliganes bo isom ninous.

¹⁹ Tage Meliy isesuna, ininuway youd tasiyas waseg.

²⁰ Tasiyas tamtakavateins aleis mo iyums, iyakawns waseg Yowbad, peinan mawan gum-libalab anilivan, youd babaw ikines o iliganes mawan.

Inawes Yeisuw Yowbad wanbunatum

²¹ Yam kwenim kweitoun ikous, mo ibwabwes momwan gwad towen, idokes yagan Yeisuw; peinan gum-libalab bo idok yagan kweiboug, inan nag isum; igaw-wan.

²² Wankuyeim anatut bivkayes bikamnat mawan Moses nakaleiwag, mo ikopwes gwad towen, ikatulags ineis Yelusalem, inawes Yowbad waseg.

²³ Peinan Yowbad inakaleiwag waseg anilivan nileles mamagina, “Igaw vin bikop natun kudataw anigavaw waseg, mo bakayus, kudokes ‘Yowbad angamag towen.’ ”

²⁴ Mapuna ineis Yelusalem vagan beiweiys man mwasanin, bigabus silmanin Yowbad, peinan inakaleiwag waseg ilana, “Kuweiys kulitapip mwanay, o kukin nag, mo bwabun mungogewns mwanay.”

Simiyon anilivan

25-26 Ven Yelusalem taw teitan yagan Simiyon, taddidumwal, ansinap bwein. Ikkayamat anatut Yowbad bisiwyoubus tasiyas min-Yisleil *vagan* beitay nuwes. Yowbad Kululuwan waseg taw towen, bo ikatimlakay mo ikakin bisesuna ee... bikin daGuyaws inaMesay Kelis, mo bikanig wankuyeim.

27 Yowbad Kululuwan imgwey taw towen mo inoun in Yowbad wanbunatum. Taman son inan bo ikopwes nitus mtown Yeisuw, isiws wanuwan bunatum *vagan* bivages peinan, mawan sikikun kweiboug Yowbad inakaleiwag nilel Bukitab waseg.

28 Mtown Simiyon im inekes, ikin gwad towen, inup, iyakawn waseg Yowbad, ilana:

29 “MaGuyaw yak, o yey mutouwat,
Tut towen amwasaw.

Kukilaveig bakanig niwal waseg,
Mawan nukulivan.

30 “Peinan wamatag bo akin mtown
takatinabweids.

31-32 “Inawotet nukwaluweg wamtes gamag babaw,
vagan bimteilis tasiyas igaw dadub, tobwag ven wasigeis,
mo bikakins tasiyas, bikannats.

Inawotet-vak silmanin yakawanan mubod
yakamey min-Yisleil.”

33 Taman son inan iliganes livanen nitus, isom ninous silmanin.

34 Simiyon mo isekes anilivan bwanabwein, idibek gwad inan, ilana, “Peinan gwad towen inawotet igaw bikow, mo min-Yisleil mwasanin bikalivatows o mwasanin bitamanaws. O mwasanin bikines nawotet mawana naman mulin Yowbad, tage bitawyages.

35 “Yakoum-vak, woum bimouvit, singay bigeg nanoum. Tage mtown inawotet *vagan* bitakakins ninous babaw gamag.”

An ikin gwad

36-37 Palopit natan yagan An, taman Panuwel, anakum Asel. Bo ivnaveka singay. Igaw naptabod isesuna ee... mo ivays son namwan. Asibweilim nisikes son namwan kweinim kweiy. Namwan mo ikanig. E, isesuna nakwab ee... mo ivag anbweilim sinwanim sinwatoun kweivas. Nag ilisow Yowbad nabunatum, ikikulul wamatan Yowbad yam o boug, ipsapos o ininitoug.

38 Anatut tasiyas sisiy nitus nimeis, mo isap manawen vin, ikalin nuwan waseg Yowbad, o idibakes tasiyas min-Yelusalem, ilana, “Gwad towen inawotet *vagan* bikatin-abweids”; peinan tasiyas nikaymates teitan gamag beim silmanin nawotet towen.

Yeisuw itub, ivakaein

39 Tasiyas son nakwaw iyakousis youd babaw silmanin Yowbad nakaleiwag, mo iyums ineis Galiliy wasiven Nasalet.

40 Yowbad ikalin nuwan waseg gwad towen; bo itub, ivakaein bo itawtoun, bo ivag nanon; bo ivag ansinap avakaein.

Yeisuw ilivan siney takatimlakays

41 Taman o inan, asigulagul bweilim kanatok kanatok inineis Yelusalem silmanin Kaltuwon Sigeilin.

42 Yeisuw anbweilim sinwatan kweiy, ikatulags ineis Yelusalem, mawan asigulagul kweiboug.

43-44 Sagal towen iyakousis, iyums ineis wa^ked, tage nitus nises Yelusalem. Taman inan nag ikakins, idokes kid sisiy, peinan babaw gamag. Inounas ee... iboug, mo inineivs tawlisiyas o sisiyas wasigeis.

45 Inineivs bo nag, mo iyumnavaws ineis Yelusalem, inineivs nitus.

46 Inineivs yam kweitoun, mo ibanes Yowbad wanbunatum, nisesus ikkaypuls siney tasiyas takatimlakays, iligen asilivan o ikatitugan wasigeis.

⁴⁷ Babaw gamag niliganes ansinap waseg ikatimop asilivan, isom ninous, peinan ansinap singay-wan.

⁴⁸ Taman inan ikines, bo isom ninous; inan mo idibek, ilana, “Natug yak, aveiyag wawun nukuvägem mäwan? Soug tamam nakanineveim, ikubukub nuwem seikwan.”

⁴⁹ Iwage, ilana, “Aveiyag wawun kunineveigs? Tabta kukwakins yeys nases tamag wanbunatum?”

⁵⁰ Tage tasiyas nag ikakins livan towen nidibakes.

⁵¹ Siney tasiyas mo iwloubus ineis Nasaleet, mtowen bo ikanaway ages; tage inan ininuway youd tasiyas silmanin.

⁵² Yesuw bo itub ivakaein, bo isinap. Yowbad ikalin nuwan, o gamag ikalin nuwes waseg.

3

Yon igeiguy

(Matiw 3:1-12; Mak 1:1-8; Yon 1:19-28)

¹ Astakaleiwag avakaein Sisal Tibeliyas; inakaleiwag anbweilim sinwatan kweivas bweilim bo nein wankuyeim. Ponitiy Paylat takaleiwag ven Yudiy waseg; Elod takaleiwag Galiliy waseg, o bwadan Pilip takaleiwag waseg ven Ituliy son ven Tilakonit; o Lisaniyas takaleiwag ven Abilen waseg.

² Tanuwgwas lun sitovek avakaein Anas son Kayapas. Sekaliy natun Yon wanawoud misik, Yowbad anilivan inek Yon mo ikakin.

³ Yowbad anilivan mo ikow, inow ven towen walasin yevagam Yoldan; iguyes gamag vagan bilavewas asisinap kalbaleb, bibaptyses, Yowbad mo biwid asisinap beikous.

⁴⁻⁶ Livānen Yon nises Bukitab, anilivan palopit mtowen Isaya, mamagina:

“Aygan mtowen tawkuwak wanawoud
mamagina:

‘Kwaleliws daGuyaws inaked,
bididumwal.

Kadiloka bitadibwanis leg babaw,
o bitagiyeilis koy bimamanas.

Aveiyag kaydodog mo bitadumwälus,
o ked kalbaleb bitagiyeilis bimamanas.

Meiveka gamag mo bikines amawan Yowbad bikatinabweids.’ ”

⁷ Singay babaw gamag inekes Yon vagan bibaptyses tasiyas, mo ilivan, ilana, “Mawan mwatet yakamiy! Adok teitan nidibakeimiy peinan Yowbad anvikun, bimop kid amisinap kalbaleb, mapuna kusawls kumekeigs.

⁸ “Kadiloka bikanavin ninoumiy vagan beibwein miwotet. Awoum kuninuways tibumi Ebelam. Yowbad nag bikalin nuwan peinan tibumi Ebelam. Deisa beibwein miwotet, mo bikalin nuwan wasigeis yakamiy. Yowbad kadiloka dakul tasiyas bivag mo bimlavags Ebelam tibun.

⁹ “Tage tut towen Yowbad ikow tälal bitateiy kasiyas amweilok kalbalebs, bikalivatows. Kukin nag beivag anagin bwein, mo bitateiy, bikatikunok, bikow, binow, bilev, bein wakov, bigob.”

¹⁰ Gamag babaw mo ikatugans, ilansa, “Aveiyag bakavag yakamey?”

¹¹ Ikatimop, ilana, “Kukin kal anakweim mwayney, kadiloka mwaynatan bisek son, kavel anakweim nag ivag. Kukin sam kan, kadilok-vak bisek son, kavel nag ivag kan.”

¹² Takaweins takis mwasanin sivines-vak bibaptays, inekes, ikatugans waseg Yon, ilansa, “Takatimlakay yak aveiyag bakavag yakamey?”

¹³ Iwage, ilana, “Mawan mitovek nakaleiwag kuklawes takis; meiyum bo deis. Awoum kuvages bivakaein.”

¹⁴ Takaninaviys-vak ikatiganes, ilansa, “Yakamey, aveiyag bakavag?” Iwage, ilana, “Awoum kutawtouns wasigeis gamag kukwayes siwliyoug. Awoum kuyaweids yatal

waseg kukyawes gamag siwliyoug. Maysamiy nises, kadiloka bibabeit mitamiy. Awoum kumtapwags."

¹⁵ Gamag babaw idokes Kelis beim watinow, mo Yon nawotet ikines, idokes kal, takinew Kelis, adok tobwag.

¹⁶ Yon ikakina ninous tasiyas, mapuna ikatimop, ilana, "Yey abaptayseimiy yevagam waseg; tage teitan beim; natawtoun waseg ilaveig yey. Yey tasimav, nag kadilok basin bastotow bakablev nasandol. Mtowen beim mo bibaptayseimiy waseg Kululuwan Bwanabwein, mamagina kov.

¹⁷ "Nakaytuk wanaman vagan biwaway anawit biyakous, mo bikow anagin binow wan-seigous, tage musamusun wit bilev bein wakov bigbugwab yam babaw; nag biyakous."

¹⁸ Anilivan waseg singay babaw mo igiguyes o ikatimlakes gamag, vagan livan bwanabwein biliganes.

¹⁹⁻²⁰ Tage bo idibek gabman towen Elod, ilana, "Amsinap kalbaleb peinan bo kukow bwadam nakwav Elodiyas, o peinan muwotet kweitan kweitan kalbaleb." Elod mo ivag kweitan-vak ansinap kalbaleb, mo iyous Yon, isen wadeil.

Ibaptays Yeisuw

(Matiw 3:13-17; Mak 1:9-11)

²¹⁻²² Yon nibaptyses gamag babaw ikous, o nibaptays Yeisuw ikous, misumkwey towen Yeisuw bo ikulul, initoug waseg Yowbad, libalab mo itavis, Kululuwan Bwanabwein ibus im, iton wakunuwatan. Kululuwan won tatonen ankakin mawana bwabun, mo aygan teitan walbalab iliganes, ilana, "Yak Natug bwanabwein yak, singaya ibwein nanoug waseg yakoum."

Yeisuw tibun

(Matiw 1:1-17)

²³ Yeisuw, anatut nisilamaw nawotet anbweilim adok sinwatoun. Gamag idokes taman Yosep.

Yosep taman Ilay.

²⁴ Ilay taman Madatat. Madatat taman Livay. Livay taman Melik. Melik taman Danay. Danay taman Yosep.

²⁵ Yosep taman Mataday. Mataday taman Emos. Emos taman Nekum. Nekum taman Esliy. Esliy taman Nagay.

²⁶ Nagay taman Makat. Makat taman Mataday. Mataday taman Semein. Semein taman Yosek. Yosek taman Yod.

²⁷ Yod taman Yowanen. Yowanen taman Lis. Lis taman Delububel. Delububel taman Seyaltyiel. Seyaltyiel taman Neliy.

²⁸ Neliy taman Melik. Melik taman Adiy. Adiy taman Kosan. Kosan taman Elmadam. Elmadam taman El.

²⁹ El taman Yosuw. Yosuw taman Eliyesel. Eliyesel taman Dolim. Dolim taman Madatat. Madatat taman Livay.

³⁰ Livay taman Simiyon. Simiyon taman Yud. Yud taman Yosep. Yosep taman Yonam. Yonam taman Iliyakim.

³¹ Iliyakim taman Malay. Malay taman Men. Men taman Matat. Matat taman Nadan. Nadan taman Deibid.

³² Deibid taman Desiy. Desiy taman Obed. Obed taman Bowas. Bowas taman Sal. Sal taman Nason.

³³ Nason taman Amminadab. Amminadab taman Edmin. Edmin taman Anay. Anay taman Eslon. Eslon taman Peles. Peles taman Yud.

³⁴ Yud taman Yekob. Yekob taman Aysak. Aysak taman Ebela. Ebela taman Telak. Telak taman Neyol.

³⁵ Neyol taman Selug. Selug taman Lew. Lew taman Peleg. Peleg taman Ebel. Ebel taman Selak.

³⁶ Selak taman Keinan. Keinan taman Alpaksad. Alpaksad taman Sem. Sem taman Now. Now taman Lemek.

³⁷ Lemek taman Metuselak. Metuselak taman Inok. Inok taman Deled. Deled taman Małalel. Małalel taman Keinan.

³⁸ Keinan taman Inos. Inos taman Set. Set taman Adam. Adam taman Yowbad.

4

*Seitan iyakwen Yeisuw**(Matiw 4:1-11; Mak 1:12-13)*

¹⁻² Yowbad Kululuwan Bwanabwein bo itawtoun waseg Yeisuw, ilisow Yoldan iyum in wanawoud. Yowbad Kululuwan imgwey Yeisuw inoun yam sinwavas, waseg Seitan iyyakwen. Yam tasiyas nag ikamkwam ee... nakabiyokous waseg mo ivag anamoun.

³ Yeisuw anamoun, Seitan mo idibek, ilana, "Magat Yowbad Natun yak, kadiloka kudibek dakul towen, mo bimlavag kam."

⁴ Iw to Yeisuw, ilana, "Livānen nises Bukitab waseg mamagina:
'Makava kan nag biyamov gamag.'

⁵⁻⁷ Wankuyeim Seitan mo itok inow wanakaew, ikatimlek ven babaw wadaban pwepway. Sivtanok ikin ikous; mo Seitan ilivan, ilana, "Ven tasiyas son yakawan basekeim mukwaleiwag, peinan gunakaleiwag towen. Am-towen sivinag mo basek. Magat yak bukukulul wamatag, mo basekeim silmanin mukwaleiwag."

⁸ Iw to Yeisuw, ilana, "Livānen nises Bukitab waseg mamagina:
'Kadiloka bukukulul wamatān Guyaw Yowbad.
Mtowen anmwanet bukwanow ayan.'

⁹⁻¹⁰ Mo itok Yeisuw inow Yelusalem, isen Yowbad nabunatum wankunumwan, idibek, ilana, "Magat Yowbad Natun yak, kwaspepel kun watinow. Livāneim nises Bukitab waseg,

'Bo bisek natakayobs siwotet mo
bimtakavateims.'

¹¹ "Kweitan livan nises mamagina:
'Nimes waseg binupeims;
Mata ge kakeim beiwejy dakul.'

¹² Iw to Yeisuw, ilana, "Livan nises mamagina:
'Awoum kuyakwen muGuyaw Yowbad.'

¹³ Seitan iyakous ansinap babaw waseg iyakwen Yeisuw, mo ilisow, in, ikayamat kweitan tut, idok beiyum binek.

*Yeisuw isilamaw nawotet**(Matiw 4:12-17; Mak 1:14-15)*

¹⁴ Yowbad Kululuwan natawtoun waseg Yeisuw, mo iyum in Galiliy; bulagan in ven babaw Galiliy walasin.

¹⁵ Ven babaw sisinagog katanok katanok waseg ikkatimlakay, mapuna gamag babaw ikavasis mtowen Yeisuw.

*Min-Nasalet ipiyaves**(Matiw 13:53-58; Mak 6:1-6)*

¹⁶ Ikous, mo in Nasalet, ven towen nituyay-yay waseg; isiw in wasinagog, mawan ankikun, peinan S̄abat. Mo itamanaw vāgan bivin Bukitab.

¹⁷ Itamanaw, mo isekeis buk bivin. Buk towen palopit Isaya inabuk. Ikaliyow buk towen iban mwaynatan yageivein waseg nilel mamagina:

¹⁸⁻¹⁹ "Yowbad Kululuwan waseg yej.

Bo isekeig gunawotet vāgan bageiguy livan bwein, basekes tasiyas tasimavs.

Bo ikayabeig nam badibakes tasiyas wādeil mo bisaps bineis wamnat.

O tasiyas toukwaws mo bikines.

O tasiyas, abes igeg, batokes banawes
bwanabwein keb waseg.

O baliwon bak̄amat Yowbad anbweilim waseg igaw mo bilabeimiy."

²⁰ Ivin ikous, ikatibog buk towen, isek tanuwagan, mo isin. Tasiyas nisesus wasinagog mites meivek-wan igintoves Yeisuw.

²¹ Isin towen, mo idibakes, ilana, “Kweiboug Bukitab nilivnek youd towen, tage nagein bo ikamat; yakamiy nukuliganes.”

²² Asibabaw asilivan idokes Yeisuw ansinap bwein. Ikatiliganes anilivan peinan singay bwein, mo isom ninous, ikatugans; ilansa, “Tabta mtowen Yosep natun, ne? Amawan bikakin sinap towen?”

²³ Iw to Yeisuw, ilana, “Mounid bukudibakeigs adilivans mamagin: ‘Doket yakoum, kuvageim tatoneim mo bukubwein!’ Adok bukulana, ‘Bulagam Kapaneyum waseg nakaligen, kuvag mawan, wamven tatoneim.’ ”

²⁴ Yeisuw mo ilivan, ilana, “Mounid adibakeimiy, gamag nag biliganes palopit anilivan wanven tatonen.”

²⁵⁻²⁶ Yeisuw ilivan-vak, ilana, “Anatut Ilaytiy nag ikweis kweis kweitoun bweilim mo tibukon kweinim katanok, o nakwabs singay babaw ven towen Yisleil waseg, tage Yowbad nag ikayeb Ilaytiy binek nakwab vinen-Yisleil vagan bimtakavet kan Ilaytiy, nag. Ikayeb Ilaytiy inek vinen-Sidon, nakwab nañtan inaven Salepat.

²⁷ “Toulepel-vak singay babaw ven Yisleil waseg, tage palopit Ilays nag ivag ibweins; misinaka ivag ibwein gum-Siliy teitan yagan Nañman.”

²⁸⁻²⁹ Tasiyas wanuwan sinagog iliganes Yeisuw anilivan towen, mo ikapasal nuwes, ituts, iyousis Yeisuw, inawes watoulan ven, itokes inawes dibwadeb tigtageg waseg, ven nikabis wakunuwatan, idokes bilaves bein watinow.

³⁰ Tage Yeisuw ilavay wanuwana gamag babaw, inoun in, ilisawes.

Inakatimlakay tawtoun

³¹⁻³² Iwloubus in Galiliy ven yagan Kapaneyum. Sabat waseg ikatimlakes gamag, mo isom ninous, peinan inakatimlakay tawtoun, mawan takaleiwag tatonen.

Ikawsep yeiluw

(Mak 1:21-28)

³³⁻³⁴ Wasinagog towen gamag teitan, yeiluw kalbaleb nises wawon. Aygan avakaein iwak, ilana, “Ya! Aveiyag bukunuwakeig yakoum gum-Nasalet Yeisuw? Adok bukuya-gageig, ne? Akakina yak, Yowbad Natun yak.”

³⁵ Tage Yeisuw ikan yeiluw towen, ilana, “Kukwapay, kukilev taw towen.” Yeiluw ivag taw towen ikalouw imasis wapwepway wanuwas gamags, ikilev taw towen, inoun; tage taw towen bo ibwein, nag iyageg, nag.

³⁶ Bo isom ninous tasiyas, illivans sisiyas, ilansa, “Aw-sinap towen? Inakaleiwag tawtoun idibakes tasiyas yeiluw kalbaleb mo ikilaves gamags.”

³⁷ Bulagan in ven babaw Kapaneyum walasin.

Ivag takatouns babaw ibweins

(Matiw 8:14-17; Mak 1:29-34)

³⁸ Yeisuw itamanaw ilisow sinagog, inoun in Saymon wanbunatum. Saymon yawan nimmasis ankatoun, won manawen vin singay muyamuy, initougs waseg Yeisuw vagan bileb.

³⁹ Iligen, inoun in, itamanaw itoun walasin, ikayeb katoun towen, mo iyenom. Bo ibwein, nuwanaw mo itamanaw ivag kaeis mo ikams.

⁴⁰ Wankuyeim kelas iseilil, mo imeyes takatouns waseg Yeisuw, askatoun kweitan kweitan; isen naman wawous tatanok tatanok, mo ibweins.

⁴¹ Bwagaw-vak nibugawus gamag mwasanin, Yeisuw ivag mo ilisawes; ikuwaks, ilansa, “Yakoum Yowbad Natun yakoum!” Tage Yeisuw ikanes; nag itam vagan bilivans, peinan iwtusis, ikakins mtowen Kelis, takatinabwein gamags.

Itavin igeiguy

(Mak 1:35-39)

⁴² Iyam gaboug mo inoun in ven makaw. Gamag babaw mo ineis ineve; ibanes mo inekes. Bikayuses kid Yeisuw; ilansa, “Awoum bukulisawem.”

⁴³ Iwage Yeisuw, ilana, “Nag! Kadiloka bageiguy livanen Yowbad nakaleiwag, wasigeis ven kweitan kweitan. Yowbad nikayabeig nam silmanin nawotet towen.”

⁴⁴ Mo itavon in igeiguy sinagog kweitan kweitan Yudiy waseg.

5

Yeisuw idawes tasiyas taplapouls
(Matiw 4:18-22; Mak 1:16-20)

¹ Iggeiguy Yowbad anilivan ee... sivatan tut itamanaw wadadan yevagan nikatiboul yagan Genesalet. Singay babaw gamag katuyouns inekes, ipapeps wawous vagan biliganes anilivan.

² Itabinis Yeisuw, mo ikin wag akiy nibiteilis wakawalaw; o tasiyas taplapouls bo ikawes siwoyim, inawes ilasapis.

³ Itabinis Yeisuw, mo itouw kaytan wag, Saymon inawag, idibek Saymon, ilana, “Kwalises tasineikik-nen mo bageiguy.” E, ikayseles wag, isineikiks-nen, Yeisuw isin wawag, itouvin mo ikatimlakes tasiyas wanakaew nisesus.

⁴ Illivan ikous, mo idibek Saymon ilana, “Tatabus taneis wabwanit, mo kupouls.”

⁵ Iw to Saymon, ilana, “Tamwey, naklapapoul ee... iyam, bo nag. Tage peinan amlivan waseg mo bapoul vayuwein.”

⁶⁻⁷ Misinaka sawtanoka ilaves, mo ikwanes in singay babaw. Kakita bikalitounis woyim. Mapuna iloukwams, idibakes sisiyas, ilansa, “Wag kwayuwein kumeyes.” Imeyes kwayuwein wag, ilabes; idagis in, bo ikalawt wag akiy. Kakita bimukuls wag.

⁸ Saymon Pita ikin in singay babaw; iwen Yeisuw, itapop, ikulul waskawan kaken, mo initoug, ilana, “O Guyaw, kunoun kun, kulisaweig, peinan takalbaleb ye.”

⁹ Pita anilivan mawan, peinan iyow nuwes siney tasiyas; ikines asiyin singay babaw.

¹⁰ Tasiyas-vak Sebediy nitun iyow nuwes. Yiges tasiyas Yemes, Yon. Sisiy Saymon taplapouls tasiyas. Yeisuw mo idibek Saymon, ilana, “Awoum beivag ampwayat. Igaw bukwatikunakus gamags, mawana wot waseg nukukwanes in.”

¹¹ Ibiteilis siwag ikous, mo ilisawes siwlioug wawag nises, ikikuns Yeisuw waseg.

Toulepel ivag mo ibwein
(Matiw 8:1-4; Mak 1:40-45)

¹² Wankuyeim misik kweitan ven toulepel teitan mo inek, meivek kaleivin kakulikul. Im towen, ikin Yeisuw, ikalivatow kantukov wamatian, initoug waseg, ilana, “Guyaw, magat sivinam, bukuvag kaleivig beibwein.”

¹³ Yeisuw iligen, iyasel naman, ikabkwen won, ilana, “Bo bavag kaleivim beibwein.” Nuwanaw mo ibwein toulepel towen.

¹⁴ Yeisuw anilivan tawtoun mo ilivan, ilana, “Awoum kudibek teitan gamag; awoum. Tage kunoun kune tanuwagan lun bikineim, mo kukow aleim mansiyas Moses nilivan, kusek Yowbad peinan bo kubwein, o gamag bikineims o bisimounids bo kubwein.”

¹⁵ Ilivan; bo nag. Peinan bulagan bo in babaw gamag wasigeis; mo gamag singay babaw katuyouns kid biliganes aygan o bivag askatoun kweitan kweitan mo beibweins.

¹⁶ Yeisuw gog ininoun-wan wanawoud, initoug waseg Yowbad.

Gamag imeyes takatoun waseg Yeisuw
(Matiw 9:1-8; Mak 2:1-12)

¹⁷ Yam kweitan waseg ikatimlakay, o tasitas Palisiy mwasanin sisiyas takatimlakeins kaleiwag mwasanin isinis wadadan. Tasiyas meinoy nimeis ven babaw Galiliy waseg o Yudiy waseg o Yelusalem waseg nimekes Yeisuw; o Yowbad natawtoun waseg Yeisuw, bivages takatouns mo ibweins.

¹⁸ Wankuyeim tawaw mwasanin bimeyes takatoun teitan nimmasis wakeb siwsawoul won. Sivines bimeyes wamatian Yeisuw bikin.

¹⁹ Iyokons, nag. Ta-mawan. Gamag singay babaw. Mo imwens watapwan bunatum, ikiboulis tapwan, ikaygwagwes takatoun wakaban nimmasis, mo ibus in, iton Yeisuw wamatian o wanuves gamag babaw.

²⁰ Yeisuw ikin, ikakina singay inmises, o idokes bo bileb takatoun town, mapuna ilivan, ilana, “Yakoum amsinap kalbaleb bo awid; bo ikous.”

²¹ Tasiyas takatimlakeins kaleiwag sisiyas Palisiy bo isunasun ninous, ilansa, “Kal mtownen ilivan makaw, kalbaleb? Anmwanet Yowbad kadilok biwid sinap kalbaleb beikous.”

²²⁻²³ Yeisuw ikakin ninous, ikatimop asilivan, ilana, “Aveiyag wawun isunasun ni-noumiy? Bweina balivan balana, ‘Bawid amsinap kalbaleb; beikous?’ O bweina balivan-vak balana, ‘Kutamanaw kunoun?’ Wotet akweiy gagab waseg yey.

²⁴ “Kadiloka kukwakins Gimilitoun yey, o gunakaleiwag nises ven watinow vagan bawid gamag asisinap kalbaleb.” Mo idibek town takatoun, ilana, “Adibakeim yak, kutamanaw, kukow abam, kun wambunatum.”

²⁵ Nuwanaw mo itamanaw wamtes, ikow keb to nimsik, inoun, inow wanven; singaya iyakawn waseg Yowbad.

²⁶ Asbabawa ikines, bo isom ninous, iyakawanes Yowbad, igoulus, ilansa, “Nageina mo nitakines sinap kweitan.”

Yeisuw idow takawein takis teitan

(Matiw 9:9-13; Mak 2:13-17)

²⁷ Wankuyeim Yeisuw isap, ikin takawein takis teitan, yagan Livay, nissin buntuman takis waseg, mo idibek, ilana, “Kubkunig.”

²⁸ Mtownen iligen, itamanaw, ilisow navavag babaw, inoun, ibukun Yeisuw.

²⁹ Ibukun, mo ivag kan wanbunatum silmanin Yeisuw beikam. O nimeis tasiyas takaweins takis babaw, sisiyas gamag singay babaw, ikamkwams sisiy Yeisuw.

³⁰ Tasiyas Palisiy sisiyas takatimlakeins kaleiwag ikines, ivtokays livan, idibakes inavamul, ilansa, “Aveiyag wawun kukwams o kumoums simwayas tasiyas takaweins takis o tasiyas takalbalebs?”

³¹⁻³² Iw to Yeisuw ilana, “Tasiyas toubweins nag sivines doket; misinaka takatouns. Nag am silmanin tasiyas toubweins, tage silmanin tasiyas asisinap kalbaleb, badawes vagan bikanavin ninous mo beibweins.”

Pos livanen

(Matiw 9:14-17; Mak 2:18-22)

³³ Wankuyeim idibakes Yeisuw, ilansa, “Yon inavamul singaya kutukut ipsapos o initougs waseg Yowbad, o tasiyas-vak Palisiy sivamul ipsapos o initougs; tage yakoum muvamul ikamkwams, imwamoums.”

³⁴⁻³⁵ Iw to Yeisuw, idibakes, ilana, “Sigeilin veivay waseg, ta-mawan tasiyas tassagals beipos, peinan taveivay siney tasiyas nisesus. Tage igaw anatut waseg taveivay bilisawes, mo beipos tut town waseg.”

Kweivaw kaleiwag

³⁶ Kabebay kweitan idibakes, ilana, “Nag kal bisiled mwaynavaw kweim bibweil kweim mwaynaboug, peinan kweivaw kweim bo biyageg, o nag bibunek kweiboug kweim waseg.

³⁷ “Nag kal bivgog kunasoup kunaboug waseg wayn kweivaw, peinan beilol wayn mo bitavis kunasoup biyageg, o bo biyamkwen wayn.

³⁸ “Tage bivgog kunasoup kunavaw wanuwan, mo bises bwein.

³⁹ “Nag kal beimoum kweiboug wayn mo sivinan kweivaw. Ilana, ‘Peinan kweiboug bwanabwein.’”

¹ Wankuyeim, Səbat waseg, ikanapels bag kweitan, siney navamul, mo inavamul ilpeleps wit mwanoug, inutus, ikimmayes vagan bibanes anagin beikams.

² Palisiy mwasanin ikines, ilansa, “Aveiyag wawun kuvages mäwan, kusiplaves Moses nakaleiwag?”

³⁻⁴ Iw to Yeisuw, ilana, “Adok bo kuvinis livänen Deibid, ne? Peinan asimoun siney nagamag, isiw in wanuwan Yowbad nabunatum, ikow bled towen nisenas wamatan Yowbad, nikatibomes silmänin tanuwgues lun beikams, o towen Deibid nag kadilok beikam. Tage peinan asimoun, ikam, mo isekes siney ikams.”

⁵ Mo Yeisuw idibakes, ilana, “Gimgilitoun yey; takaleiwag Səbat waseg, yey.”

Səbat waseg Yeisuw ivag toupam ibwein

(Matiw 12:9-14; Mak 3:1-6)

⁶ Kwayuwein Səbat isiw in wasinagog ikatimlakay. Taw teitan nises, nakatay ipam.

⁷ Tasiyas takatimlakeins kaleiwag sisiyas tasiyas Palisiy ikinbunikes, idokes kid bivag taw towen beibwein Səbat waseg; bivag mäwan mo biyateles Yeisuw.

⁸ Ikakina sikanuway, idibek towen toupam, ilana, “Kum, kutom towen.” Mo mtowen itamanaw im.

⁹ Yeisuw mo ikatiganes, ilana, “Kadeg? Tab kadilok Səbat waseg bitawotet bwein? o kalbaleb? Bitayamov gamag? o bitayageg gamag?”

¹⁰ Yeisuw ikines gamag tasiyas babaws ikous, wankuyeim mo idibek mtowen toupam, ilana, “Kudumwes namam.” Idumwes, bo ibwein.

¹¹ Tasiyas gog, bo ikapasal nuwes peinan iwotet Səbat waseg, illivans sisiyas aveiyag binuwakes.

Inavamul sinwatan teiy

(Matiw 10:1-4; Mak 3:13-19)

¹² Misiyamun towen inoun in ven koyakoy waseg vägan binitoug waseg Yowbad; initoutg ee... iyam.

¹³ Iyam gaboug idawes navamul mo imekes. Waseg bod towen ikatigik inagamag, misinaka sinwatan teiy, vägan bimlavag aposol bikanawes kid aygan.

¹⁴⁻¹⁶ Tasiyas yiges mamagina: teitan Saymon, mo idok yagan Pita, o bwadan yagan Andiluw; o Yemes son Yon; o Pilip son Batolimiw; o Matiw son Tomas; o Alpiyow natun yagan Yemes; o talliwon towen yagan Saymon; o Yemes natun Yudas; o tayuwein Yudas Iskaliyot, mtowen bisilkod Yeisuw.

Ilabes gamag babaw

(Matiw 4:23-25)

¹⁷ Siney tasiyas iwloubus, itamanaws wasapon, sisiyas inavamul singay babaws; sisiyas babaw min-Yudiy o min-Yelusalem o tasiyas misikes ven Tayil o Sidon wakawalaw, asbabaw nimeis kid biliganes aygan, o bivag vägan beibwein askatoun.

¹⁸ O Tasiyas bwagaw nibugawus, ivag mo ibweins.

¹⁹ Asbabaw sivines bikabikons wäwon Yeisuw, silmänin natawtoun binekes kid tasiyas, mo beibweins.

Mwasanin bimwäsaws, mwasanin nag

(Matiw 5:1-12)

²⁰ Itamnow matan mo ikines navamul ilana:

“Tamumwäsaw yakamiy tasimavs, peinan
Yowbad nakaleiwag nises wasigeis yakamiy.

²¹ “Tamumwäsaw yakamiy amimoun, bo
bukwamuweips.

Tamumwäsaw yakamiy tavvalams, peinan
bukugigs.

²²⁻²³ “Kukin gamag mwasanin bikamliweimiy peinan agugwamag yakamiy, o kukin bipiyaveimiy o bitawyageimiy o bivtokeimiy livan, mamagina takalbaleb yakamiy,

kadiloka kumw̄asaws avakaein, kusilasals, peinan maysamiy avakaein nises walbalab. Kweiboug timsiyas inuwakes tasiyas palopits m̄awan.

²⁴ “Tage guyawaw yakamiy, kalbaleb bukulivatus, peinan maysamiy nukukwawes ven watinow, bo misinak.

²⁵ “Bo kukwamuweips yakamiy, tage kalbaleb bukulivatus, moun bikamateimiy.

“Kugagigs tut towen, tage kalbaleb bukulivatus, bukuvalams.

²⁶ “Tut towen gamag babaw ikavasimi, tage kalbaleb bukulivatus. Peinan kweiboug timsiyas bo ikavasis tasiyas palopit tayyaweids. Yakamiy m̄awana tasiyas.

Kusiwyoubus tasiyas takalbalebs

(Matiw 5:38-48; 7:12)

²⁷ “Tage adibakeimiy taliganeins agulivan yakamiy: Kadiloka kusiwyoubus tasiyas nikamliweimiy. Kulabes tasiyas nikamliweimiy.

²⁸ “Kulivans bwein wasigeis tasiyas nikawtuneimiy. Kunitougs waseg Yowbad v̄agan bilabes tasiyas niyageimiy.

²⁹ “Kukin kal beiwei y silapam kutouvin-vak paliyuwein beiwei.

Kukin kal bikwey amukweim, kusek-vak musag.

³⁰ “Kukin kal tasimav binitoug waseg yak, kadiloka kusek.

Kukin kal bikwey muwliyoug, awoum kulivan biyamen.

³¹ “Am̄awan sivinamiy gamag bivages wasigeis yakamiy, kuvages m̄awan wasigeis tasiyas.

³² “Kukin bukusiwyoubus tasiyas nisiwyoubumiy nag ivag amisinap bwein. Takalbalebs-vak ivages m̄awan.

³³ “Kukin bukulabes tasiyas nilabeimiy nag ivag amisinap bwein. Takalbalebs-vak ivages m̄awan.

³⁴ “Kukin bukusekes miwliyoug wasigeis tasiyas kudokes igaw bimapus, nag ivag amisinap bwein. Tasiyas takalbalebs isekes sisiyas v̄agan igaw mo bimapus.

³⁵ “Tage yakamiy, kadiloka kusiwyoubus tasiyas nikamliweimiy, o kulabes gamag, kusekes miwliyoug. Awoum kunmises mapun bukulawes. Bukuvages m̄awan agulivan, mo bukubanes maysamiy avakaein, bukumlavags Yowbad nitun yakamiy. Peinan Yowbad issiwyoubus tasiyas tagidukis sisiyas takalbalebs babaw-wan.

³⁶ “Yakamiy-vak kadiloka binok nuwamiy wasigeis tasiyas; m̄awan ansinap Tamads walbalab.

Awoum kudok soum ansinap kalbaleb

(Matiw 7:1-5)

³⁷ “Awoum kudokes gamag mwasanin takalbalebs, m̄awan Yowbad bidokeimiy takalbalebs yakamiy.

Awoum kumapus asisinap; m̄awan Yowbad bimop amisinap yakamiy. Tage kuwidis, kunumlavas asisinap, mo biwid amisinap yakamiy, binumley.

³⁸ “Kusekes tasiyas, mo Yowbad bisekeimiy, miwliyoug bibabaw, bo bikalawt wasigeis yakamiy. Am̄awan vakaeanan bukusekes simiyas, bo m̄awana vakaeanan Yowbad bisekeimiy yakamiy.”

³⁹ Kweitan kabebay isekes mamagina: “Kukin toukwaw bimgwey toukwaw teitan, nag kadilok ked bibanes. Asteiy bo bikalivatows bineis w̄aleg.”

⁴⁰ Kweitan livan isekes mamagina: “Kukin tamwey kal bimulis natouwats, tasiyas navamul nag bikaleiwags; igaw gog biyakousis sitovek ansinap mo bimlavags m̄awana tamwey towen.

⁴¹ “Aveiyag wawun kukines musamus nises bwadam matan waseg, tage nag kukin amweilok avakaein matam toneim wanuwan?

⁴² “Aveiyag wawun kudibek bwadam, kulana, ‘Gwade, bo bakablev musamus wamatam’ tage nag kukin amweilok matam toneim wanuwan? Tayyaweid yakoum, wanamug kwablev amweilok matam waseg, mo bukukin bunik musamus bwadam wamatam, bukstablev.

*Sinap m̄wana amweilok anagin
(Matiw 7:17-20; 12:35)*

⁴³ “Nag kadilok amweilok bwanabwein beiuw gog anagin kalbaleb, nag; o nag kadilok amweilok kalbaleb beiuw gog bwanabwein, nag.

⁴⁴ “Bitakin wuhan mo bitakakin amweilok amawan, bwein o kalbaleb. Adilaboub waseg nag bitalep yaveinun. Amweilok kulikoul waseg nag bitalep gleip, nag.

⁴⁵ “Gamag m̄awan. Magat nanon bwein mo beivag ansinap bwein; tage kukin nanon kalbaleb mo beivag ansinap kalbaleb.

Aveiyag gamag nanon bikalawt waseg, mo bisap wadon, billivan m̄awan.

*Kakol tawtoun o adok igwey
(Matiw 7:24-27)*

⁴⁶ “Aveiyag wawun kudibakeigs kulansa, ‘Guntovek, guntovek,’ tage nag kwanawes aygag?

⁴⁷ “Kal yak bukumekeig, bukuligen agulivan o bukwanow aygag, bakabebay vagan bukukwakins amawan amsinap.

⁴⁸ “Peinan yakoum m̄awana taw teitan niwlul nabunatum, ikaviyeil in watinow vagan kakolan bunatum bisin wakunuwatan dakul. Iwlul iyakous mo ikweis avakaein, yevagam ilatay avakaein iwaweiy bunatum towen, tage nag igogewn, peinan iwlul bwein.

⁴⁹ “Tage kal yak bukuligen agulivan, tage nag bukwanaway aygag, yakoum m̄awana taw teitan niwlul nabunatum, tage kakolan igwey, nikelay pwepway makaw waseg; yevagam mo ilatay avakaein, iwaweiy bunatum towen, nuwanaw mo ikalivatow, ikatag-ulek iyakous. Bo igak.”

*Takalikay natouwat ivag bwein
(Matiw 8:5-13; Yon 4:43-54)*

¹ Anilivan isekes gamag ikous, mo inoun in Kapaneyum.

² Ven towen mina-Lom sitakalikay nises; mtown singay sivinan natouwat teitan; tage bo ikatoun avakaein mtown natouwat. Kakita bo bikanig.

³ Takalikay towen iligen bulagan Yeisuw mo idawes min-Yudiy tammwayas mwasanin, ikayabes bikines Yeisuw, binitougs vagan beim bivag takalikay natouwat towen mo beibwein.

⁴⁻⁵ Min-Yudiy tasiyas inekes Yeisuw, igilagels, ilansa, “Bweina kuvag, peinan takalikay towen ansinap bwein, sivinan gamag yakids mo iwlul dasinagogos.”

⁶⁻⁸ Yeisuw iligen, siney tasiyas ineis ee... kakita bisaps takalikay nabunatum waseg, takalikay towen mo ikayabes viyen mwasanin, imekes Yeisuw, isekes takalikay anilivan, ilansa, “Takalikay anilivan mamagina: Guyaw, awoum bivakaein muwotet. Yey toul wamatam yak. Awoum bukusiw wagunbunatum. Mapuna na-ikadilokeig bawekeim yak. Deisa kulivan mo beibwein guntouwat. Yey akakin kaleiwag. Gunakaleiwag nises wasigeis guntakanaviys. Badibek teitan, balana, ‘Kun,’ mo bein. Tayuwein badibek balana, ‘Kum,’ mo bein. O guntouwat badibek, balana, ‘Kuwtel wotet,’ mo biwtel. Bweina kulivan beibwein ankatoun.”

⁹ Yeisuw iligen anilivan towen, bo isom nanon, itouvin, idibakes asibabaw antab-wakuns, ilana, “Mounid nag aban gum-Yisleil binamis beibwein waseg yey, tage takalikay towen singay inamis bwein.”

¹⁰ Ikous, takalikay natouwats tasiyas mo iyums ineis wanbunatum, ibanes natouwat, bo ibwein.

Nakwab n̄tan natun iyakit

¹¹ Yamtan yam mo ineis ven yagan Neyn siney navamul sisiyas gamag babaw.

¹²⁻¹³ Inounas ee... kakita bisaps wakalamatan ven, mo ilivatus tasiyas takaweins takanig nimeis, peinan bo bidibwanis. Takanig kudataw, inan nakwab, tage towen natun

anmw̄net. Yeisuw ikin manawen vin ivvālam siney ven gimgilis singay babaw. Yeisuw ikin, inok nuwan, idibek, ilana, “Mata kuvalam.”

¹⁴ Mo imek takanig aban, ikabkwēn. Takaweins toumat tasiyas mo itomos. Mo idibek takanig, ilana, “Tawlat yak, adibakeim, kukit.”

¹⁵ Mo takanig towen ikit, illivan. Yeisuw itok mo inow inan waseg.

¹⁶ Tasiyas ikines, bo igeeg ninous, iyakawanes Yowbad, ilansa, “Palopit avakaēin bo isap wasigeis yakids,” o ilansa, “Yowbad bo ilakwaneids inagamag yakids.”

¹⁷ Bulagan towen in ven babaw wawnuwan Yudiy mo ibekena walasin Yudiy.

Tabibaptaysein gamags yagan Yon

(Matiw 11:2-19)

¹⁸ Tasiyas Yon inavamul ikines, mo inekes Yon wādeil nises, ikamteles youd tasiyas.

¹⁹ Yon iligen, idouw navamul asteiy, ikayabes kid binekes Yeisuw bilansa, “Age yakoum Mesay? o nag? bakakaymet tayuwein beim?”

²⁰ Tawaw tasiyas inounas, inekes Yeisuw, ilansa, “Tabibaptaysein gamag towen Yon nikayabem nakam, kasekeim anilivan, ilana, ‘Age yakoum Mesay? o nag? bakakaymet tayuwein beim?’”

²¹ Yam towen waseg, Yeisuw ivages mo ibweins takatouns babaw, sisiyas tasiyas bwagaw nibugawus, o toukwaws babaw ivages mo ikines.

²²⁻²³ Yeisuw iligen asilivan Yon navamul tasiyas, ilana, “Kuyums, kwamtilakes Yon sinap towen nukukines o nukuliganes: toukwaws ikins bwein, takagayals inounas bwein, toulepels kulivis ibwein, takakons iliganes livan, takanigs ikits vayuwein, o tasiyas tasimavs bo inganegs agulivan bwanabwein. Gamag mwasanin idokes gunawotet nag ibwein, tage kalisiy ikalin nuwes waseg yey, mo bimw̄saws tasiyas. E, kuneis, kudibakes Yon mamagin.”

²⁴ Yon inavamul iyums ineis, mo Yeisuw isilamaw livānen Yon, idibakes gamag babaw, ilana, “Aveiyag silmanin bo kuneis wanawoud? Bukukines amweilok giligil, yag itow mo iguwen, ne? Adok nag.

²⁵ “Tage aveiyag silmanin bo kuneis wanawoud? Bukukines taw teitan anakweim maynamnabwein, ne? Adok nag. Peinan tasiyas asikweim singay maynamnabwein, abes bwanabwein king sibunatum wanuwan.

²⁶ “Tage aveiyag silmanin nukuneis wanawoud? Adok bukukines palopit, ne? Magen! Peinan mtowen Yon ilisawes tasiyas palopits.

²⁷ “Livānen mtowen Bukitab waseg mamagina:

‘Bo bakayeb towen bikokew agulivan,
bimgwayeim yak, bikaleil muked.’

²⁸ “Mounid mtowen Yon ikalisawes gamag babaw wadaban pwepway; tage Yowbad nakaleiwag wanuwan asibabaw imugwas; Yon ikuyeim.”

²⁹⁻³⁰ Iliganes Yeisuw anilivan towen, tasiyas takaweins tākis sisiyas gamag babaw; ikavasis Yowbad, peinan bo itams waseg Yon inageiguy, ibaptyses tasiyas. Tage tasiyas Palisiy sisiyas tassinaps bo ipiyaves Yowbad nanon pines tatineis, o Yon nag ibaptyses tasiyas.

³¹⁻³² Yeisuw mo ilivan, ilana, “Amawan bakabebay vāgan bukukwakins gudwouvaws yakamiy amisinap amawan? Adok yakamiy māwana gamagal iwliwals wavtakon ven, idibakes sisiyas, ilansa, ‘Kawaway kup tage nag kusilasals; ikous, mo kalloupid tage nag kuvalams.’

³³⁻³⁴ “Peinan tabaptaysein gamags Yon neim, nag ikam kan tonen, nag imwamoum wayn, mo kulansa ‘Takabalāwein mtowen peinan baloum iwei.’ Tage Gimilitoun yey nam akamkwam, amwamoum, mo kulansa ‘Taw towen tagovek, ikamkwam o imwamoum avakaēin, ikanubeins siney tasiyas takaweins tākis o tasiyas takalbalebs.’

³⁵ “Tage misinaka Yowbad nitun ikakins ansinap mounid.”

Natan vin iwid ansinap kalbaleb

³⁶ Palisiy teitan bo idow Yeisuw bein ikams son. Itam, isiw Palisiy wanbunatum, isin.

³⁷⁻³⁸ Isin, mo vinen ven towen ansinap kalbaleb iligen Yeisuw neisiw beikam Palisiy towen wanbunatum, mo ikow natagon wanuwan botol kikit, inow, itamanaw watib-welon Yeisuw, kaken walasin, ivvālam. Ivvālam, iwtawout mitinagin, ininein wakaken. Ikous, mo kunun vayvayov ikow wanaman, itanob. E, iviyom kaken, peinan singay ikalin nuwan; mo iptum natagon waseg.

³⁹ Tage tanuwagan bunatum, Palisiy mtownen ikin vin manawen. Nanon waseg ivtok livan, ilana, “Kukin Yeisuw palopit bo bikakin kal vin manawen ikabkwen won o bikakin ansinap kalbaleb.”

⁴⁰ Iw to Yeisuw, ikatimop nanon, ilana, “Saymon, kweitan youd badibakeim yak.” Saymon ikatimop, ilana, “Aw-youd bukwatimlakeig?”

⁴¹ Yeisuw mo ikabebay, ilana, “Tamwey teitan waseg, asteiy gamag sikawlavad, teitan lakatunim kina, tayuwein sinawanim kina.

⁴² “Asteiy nag ivag money waseg bimapus sikawlavad; mapuna iwidis iyakousis. Am-townen bikalin nuwan singay waseg?”

⁴³ Iw to Saymon, ilana, “Adok mtownen nakawlavad avakaein niwid iyakous.” Yeisuw ilana, “Magen.”

⁴⁴ Mo itouvin bikin vin manawen, idibek Saymon, ilana, “Kukin vin manawen. Asiw am wambunatum, nag yevagam kusekeig bawid kakeig; tage manawen mitinagin bo idal kakeig mo itanob kunun waseg.

⁴⁵ “Nasiw nam wambunatum, nag kumuloul waseg yey, tage manawen vin isap ivviyom kakeig ee... nag iyakous.

⁴⁶ “Nag tagon kuptum kunug, tage manawen vin bo iptum kakeig natagon mul waseg.

⁴⁷ “Mapun ansinap babaw kalbaleb bo awid bo ikous, mo ikalin nuwan avakaein; tage kukin kal bawid ansinap kikit kalbaleb, mo bikalin nuwan kikit.”

⁴⁸ Yeisuw mo idibek vin manawen, ilana, “Amsinap kalbaleb bo awid, bo ikous.”

⁴⁹ Siney nikamkwams mo illivans sisiyas, ilansa, “Kal mtownen biwid gamag asisinap kalbaleb?”

⁵⁰ Tage Yeisuw idibek vin, ilana, “Nukusimounid waseg yey mapuna bo kubwein. Kunoun kun niwal waseg.”

8

Vinay mwasanin ilabes Yeisuw

¹⁻² Yam mwasanin wankuyeim mo itavín ven babaw wasigeis, iggeiguy, o isekes anilivan bwanabwein, Yowbad inakaleiwag livanen. Siney inavamul sinwatan teiy, sisiyas vinay mwasanin issekes kaeis yam katanok katanok ikams. Vinay tasiyas Yeisuw nivag mo ibweins kweiboug askatoun, peinan yeiluw nyagages. Natan Meliy nididawes Magdalein, bo nikayeb yeiluw teinim teiy waseg, mo ilisawes, bo ibwein.

³ Nayuwein vin yagan Yowan, Susa nakwav, mtownen tamtakavatein Elod nabunatum. Natounun Susana. Tasiyas sisiyas vinay babaw sivavag sam; issekes kaeis Yeisuw siney navamul yam katanok katanok ikams.

Talavein kaytul

(Matiw 13:1-9; Mak 4:1-9)

⁴ Wankuyeim ven babaw gimgilis ikatuyouns inekes Yeisuw, gamag singay babaw, inakabebay mo isekes, ilana:

⁵ “Talavein kaytul wit ispusoup wabag. Ilivelov ee... kaytul mwasanin ikalkalouw ininein waked. Gamag mo inounas ivvānis kaytul tasiyas, mo man iyoyows imimeis, ikikines, ikamkoums ikamiyeivis.

⁶ “Kaytul mwasanin ikalkalouw ininein wadikudakul, isibwāsobs, mo kālas ikalin, ikalayyag; peinan nag ivag pwepway-nen.

⁷ “Kaytul mwasanin ikalkalouw ininein wapwepway son doudiw kaytul-nen. Son doudiw isibwāsobs; kasiyas doudiw bo iwkuvākaeins, mapuna wit iguyagweys.

⁸ “Tage kaytul mwasanin ikalkalouw ininein pwepway bwanabwein, isibwəsobs, iwkuvəkaeins. Kaytul katanok ivag anagin lakanutan.” Ilivan ikous, mo ilivan, aygan avakaein, ilana, “Kal yak sam teigam, bweina kuligen.”

Kabebay livənen

(Matiw 13:10-23; Mak 4:10-20)

⁹ Inavamul mo ikatugans waseg Yeisuw, sivines kid bikakins silawun kabebay.

¹⁰ Iw to Yeisuw, ilana, “Yowbad bo itam wasigeis yakamiy vəgan bukukwakins nakaleiwag sinapun, nisowum wasigeis babaw gamag. Tasiyas gog misinaka kabebay biliganes,

Bikikines, nag gog bibənes silawun;

o biliganes, nag gog bikakins silawun.

¹¹ “Silawun kabebay towen mamagina: kaytul məwana livanen Yowbad.

¹² “Kaytul kasiyas wəked məwana tasiyas iliganes, waninous nises, mogo Seitan isap ikwey livan towen; matage isimounids Yowbad ankatureib silmənin.

¹³ “Kaytul kasiyas wadikudəkul məwana tasiyas livanen Yowbad, imwəsaws-wan, tage nag isob wanuwes, tut kadilakus isimounids ee... Seitan iyakwanes mo ikalows.

¹⁴ “Kaytul kasiyas ikalkalouws son doudiw kaytul-nen məwana tasiyas iliganes, inounas ee... ininuways livan towen son ven watinow ankanuway, o ininuways ven watinow mwəsaw-nen; mapuna livanen Yowbad nag ivag anagin.

¹⁵ “Tage kaytul towen wasapon məwana tasiyas asisinap bwanabwein, iliganes livan, iyyousis ikimtuwes, o ikaptules, mo ivag angis bwanabwein.

Lamp livənen

(Mak 4:21-25)

¹⁶ “Nag kal bivakanot lamp, mo loutan bikatigubweil wakunuwatan, o nag bisen lamp waskawan keb, nag; tage bisen wanakaew wakaban, mo tasiyas bisousiws wanuwan bunatum towen mo bikines mititeilin.

¹⁷ “Peinan sinap babaw nisowmes nisesun-wan, igaw mo bikamat, wakamnat.

¹⁸ “Kuvnəseimiy vəgan bukuliganes bwein. Kukin kal navavag sam, mo bikatimweis bibabaw. O kukin navavag nag, mo bikwey aveiyag idok nises. Mounida beidev mtowen.”

Yeisuw inan, budan

(Matiw 12:46-50; Mak 3:31-35)

¹⁹ Inan siney Yeisuw budan mo binekes, nag gog, peinan gamag babaw katikunouks isibwades ked.

²⁰ Teitan gamag ikow livan, ikaypwəlal in, idibek Yeisuw, ilana, “Inam siney budam nitowas watoulan, sivines bikiniems.”

²¹ Iwage Yeisuw, idibakes, ilana, “Kalisiy yakamiy bukuliganes livanen Yowbad o bukutams waseg, yakamiy mamagina inag o budag yakamiy.”

Bwaw ikan, mo iyenom

(Matiw 8:23-27; Mak 4:35-41)

²² Yam kweitan, itouws wəwag siney navamul, idibakes, ilana, “Tadopels, taneis palata dadan yevagam towen.” Mo ikuks.

²³ Ikuks ee... bo imasis Yeisuw. Bwaw kweitan mo ilivatus; iwaweiy wag, yevagam bo neinay-o; kakita bimukuls. Bo igak.

²⁴ Inekes Yeisuw, iwgunes, ilansa, “Tamwey, bo bitamtəmats.” Iligen, ikit, ikan yag, ikanes kaysay tasiyas kuvakaein, mo iyenom. Niwal avakaein.

²⁵ Yeisuw mo idibakes, ilana, “Aveiyag wawun amipwəyat? Adok nag kunmiseigs, ne, vəgan balabeimiy?” Bo iwenes tasiyas, isom ninous, sisiyas wasigeis illivans, ilansa, “Adok kweitan gamag towen, idibakes yag son kaysay, mo ikanawes aygan!”

Inek takabaləwein ven Gelasin waseg

(Matiw 8:28-34; Mak 5:1-20)

²⁶ Ikuks ee... ilugs min-Gelasin wasiven. Galiliy palatan, Gelasin palatan.

²⁷ Ilugs, Yeisuw in wanakaew mo ilivet gimgeilin ven towen; yeiluw neiweiys taw towen. Yam babaw nag issikam anakweim, nag ivag nabunatum. Sona mwadoyan nimmasis wakalawag.

²⁸ Mtowen im, ikin Yeisuw, mo iwak, ikalivatow, imasis kantukov wamatian Yeisuw, aygan avakaein waseg iyowal, ilana, “Aveiyag bukunuwakeig yey? O yakoum Yeisuw, Yowbad Tatawtoun Natun yakoum. Beitay! Awoum bukuyagageig, ne?”

²⁹ Peinan Yeisuw bo nidibek yeiluw towen vagan bilisow taw. O peinan tut babaw yeiluw niwaweiys-wan mo ikabalawein, o gamag niyousis, imtakavates. Naman, kaken niyawanis tawtoun waseg, tage bo iwlitun; o yeiluw kawsep isawl in wanawoud; singaya iyageg gamag towen.

³⁰ Yeiluw igilagel waseg Yeisuw ikous, mo Yeisuw ikatugan, ilana, “Ami-yagam?” Ilana, “Kamimet,” peinan yeiluw babaw neisiws wawnuwan.

³¹ Siyas yeiluw mo igilagels waseg Yeisuw, ilansa, “Awoum kwayabem bakan waleg, ne?”

³² Bwaloud babaw nikamkwams awuyow ane wakaytet nitatos; siyas yeiluw igilagels, ilansa, “Tab kadilok bakasiv bakanekes mansiyas bwaloud, ne?” Yeisuw itam.

³³ Siyas yeiluw mo ilisawes taw, inekes bwaloud mo kabala*weins*, isisawls ikalkalouws tigtageg, inineis wayvagam, iwgweles.

³⁴ Tasiyas tamtakivateins bwaloud ikines, mo isawls ikamteles youd to nikines, inineis ven waseg o nawoud waseg.

³⁵ Gamag babaw iliganes, isaps kid bikines; e, imekes Yeisuw, ibanes taw towen, bo nilisawes yeiluw. E, isin Yeisuw walasin, anakweim bo isikam, nanon bo idumwal; mapuna iwenes.

³⁶ Tasiyas nikines mo ikamteles, ilansa, “Taw towen takabalawein, yeiluw neiweiys, Yeisuw gog idibakes mo yeiluw ilisawes, o taw towen bo ibwein.”

³⁷ Ven walasin Gelasin gimgilis iliganes, initougs waseg Yeisuw, sivines kid Yeisuw beiyum; peinan aspwayat avakaein. Mo itouw wawag, iyum.

³⁸⁻³⁹ Mtowen neibwein yeiluw waseg mo initoug waseg Yeisuw, ilana, “Soug yak bitatouw,” tage Yeisuw ikayeb, ilana, “Kuyum kun wambunatum; kwamtel Yowbad nasiwayoub waseg yakoum.” Mo inoun in ikamtilakes ven avakaein wawnuwan, mo ikakins Yeisuw nasiwayoub bwanabwein waseg.

Takalawagein sinagog natun ikatoun

(Matiw 9:18-26; Mak 5:21-43)

⁴⁰ Yeisuw iyum im Galiliy, gamag babaw nikaymates, mo imwasaws peinan bo iyum.

⁴¹⁻⁴² Takalawagein sinagog teitan yagan Yelos inek Yeisuw, ikulul wamatian, initoug waseg, ilana, “Kum wagunbunatum, kukin natug ikatoun avakaein.” Natun manawen anbweilim sinwatan akweiy. Idokes kakita bikanig. Asteiy inounas, tage gamag singay babaw katuyouns imimekes, ipapeps Yeisuw wawon.

Natan vin ikabkwen anakweim matan

⁴³ Natan vin nises buyavin iwtawout sinwatan kweiy bweilim, tage nag kal ikakin bivag beimad.

⁴⁴ Manawen vin meinoy Yeisuw watibwelon, ikabkwen anakweim matan; nuwanaw buyavin mo imad.

⁴⁵ Iwage Yeisuw, ilana, “Kal ikabikon waseg yey?” Asibabaw ikayans, ikous, mo Pita idibek ilana, “Tamwey, gamag singay babaw ipapeps wawoum.”

⁴⁶ Tage Yeisuw ilana, “Teitan gamag bo ikabikon waseg yey, peinan asimkwen guntawtoun bo ilisaweig, bo inek gamag towen.”

⁴⁷ Vin manawen ikakin ta-mawan bisowm, itatat won, inek, ikulul wamatian, ikamat wamtes gamag babaw, ilana, “Peinan sivinag bawwein, to nakabkwen anakweim matan; nuwanaw mo abwein.”

⁴⁸ Iw to Yeisuw, ilana, “Natug yak, nukusimounid waseg yey, mapuna bo kubwein. Ninabwein waseg kunoun.”

Yeisuw iyakit gwad teitan nikanig

⁴⁹ Igawa illivan, takaleiwag towen inagamag teitan imek, ilana, “Bo ige! Natum bo ikanig. Awoum kweitan wotet kusek mtowen takatimlakay.”

⁵⁰ Yeisuw iligen, iwage, ilana, “Awoum beivag ampwayat. Bweina kusimounid vagan beibwein natum.”

⁵¹ Yeisuw mo isap wabunatum ilana, “Awoum babaw gamag bukusiws waseg yey. Adok Pita, Yon, Yemes, o gwad taman, inan. Misinak.”

⁵² Ikin tasiyas tavv^{alams} ivv^{alams} peinan loupid ivages, ilana, “Awoum kuv^{alams}. Nakanig gwad manawen; immasis-wan.”

⁵³ Tasiyas gog bo isibawes, peinan ikakinsa bo ikanig.

⁵⁴ Tage Yeisuw inek manawen gwad, iyous naman, ilana, “Gwa! Kukit!”

⁵⁵ Mo iyum kululuwan; nuwanawa ikit. Yeisuw mo ilana, “Kusek kan beikam.”

⁵⁶ Tasiyas inan taman bo isom ninous, tage Yeisuw ilana, “Awoum kwamteles gamag biliganes sinap towen. Awoum.”

9

Navamul sinwatan teiy siwotet

(Matiw 10:5-15; Mak 6:7-13)

¹ Mo idawes inavamul sinwatan teiy, imeis mo isekes sikaleiwag o sitawtoun wasigeis tasiyas bwagaw, baloum, katoun.

² Mo ikayabes kid biggeiguis livanen Yowbad nakaleiwag o bivages vagan beibweins tasiyas takatouns.

³ Idibakes tasiyas, ilana, “Awoum kuneis kukawes kunamiy, mikaytuk awoum, amikaw awoum, kaeimiay awoum, mimoney awoum; awoum mwaynatan kweim, awoum.

⁴ “Avei-bwan waseg bukusiws bukumsikes ee... mo bukunounas kuneis.

⁵ “Am-palawen nag beitams wasigeis yakamiy, bukulawes ven towen mo musamusang pwepway wakikeimiy kwatsapis bein waven mo bikakins Yowbad bimop asisinap.”

⁶ Mo inounas, itavins ven katanok katanok waseg, iggeiguis livan bwanabwein o takatouns ivages ibweins ven katanok katanok waseg.

Elod iligen bulagan

(Matiw 14:1-12; Mak 6:14-29)

⁷ Inounas ee... guyaw avakaein Elod iligen bulagan Yeisuw siney navamuls, bo isunasun nanon, peinan gamag mwasanin asilivan, ilansa, “Yon nikanig, bo ikit vayuwein.”

⁸ Tage mwasanin ilansa, “Ilaytiy bo isap.” O mwasanin ilansa, “Palopit kweiboug teitan bo ikit vayuwein.”

⁹ Elod iligen asilivan, ilana, “Yon bo abob kayon, tage kavel mtowen alligen nawotet bulagan, ivag mawan?” Mo Elod sivinan bikin.

Yeisuw ivakamus gamag babaw

(Matiw 14:13-21; Mak 6:30-44; Yon 6:1-14)

¹⁰ Iyakousis siwotet tasiyas Yeisuw nikayabes, mo iyums, imekes Yeisuw mo ikamteles siwotet livanen. Mo Yeisuw itokes tasiyas-wan ineis ven yagan Beteseid.

¹¹ Gamag babaw iliganes mo ikikunis. Yeisuw ikines, itam wasigeis; isekes livanen Yowbad nakaleiwag, o takatouns tasiyas ivag mo ibweins.

¹² Iwwotet ee... bo ikwayav, tasiyas sinwatan teiy inekes, ilansa, “Kwayabes gamag babaw, bineis ven mwasanin o bineis nawoud waseg, kaeis bibanes o bimasis, peinan ven towen makawan.”

¹³ Iwage Yeisuw, idibakes, “Kusekes kaeis beikams.” Ilansa, “Yakamey kaem misinaka bled kweinim son in mwanay, tage nag kadilokes asibabaw beikams. Adok bakan waven bakagimwal kaeis bakamey, beikams, ne?”

¹⁴ Tawaw babiweis mamagina kwenim tawsan. Yeisuw mo idibakes navamul, ilana, “Kudibakes tasiyas bisinis bod kweitan kweitan waseg. Kweitan bod sinwanim gamag, kweitan bod simwanim gamag.”

¹⁵ Ivages mawan mo isinis asibabaw-wan.

¹⁶ Ikous, Yeisuw mo ikow bled kweinim son in mwanay, itamnow kayon, ikin walbalab, anilivan bwanabwein isek, silmanin kan towen, mo ikikivis, issekes navamul, ikawes, isenas wamtes gamag babaw.

¹⁷ Asibabaw ikams ikamuweips; mo isiyavis kan nikambwages nises, gamwat sinwatan gibsiy.

Pita ikakin Yeisuw Yowbad inaMesay

(Matiw 16:13-19; Mak 8:27-29)

¹⁸ Kweitan tut siney navamul mtownen Yeisuw anmwanet initoug waseg Yowbad; ikous, mo ikatugan wasigeis tasiyas ilana, “Gamag babaw idokeigs kal yey?”

¹⁹ Ikatimapus aygan, ilansa, “Tabibaptaysein gamags Yon adok; o mwasanin idokeims Ilaytiy; o mwasanin idokeims kweiboug palopit teitan yakoum nukukit vayuwein.”

²⁰ Iwage Yeisuw, ilana, “Age yakamiy, kudokeigs kal yey?” Pita ikatimop aygan, ilana, “Yakoum Kelis, Yowbad nikayabeim nukum bukwatinabwem.”

²¹⁻²² Tage Yeisuw anilivan tawtoun isekes, ilana, “Awoum kwamteleigs wasigeis gamag mwasanin.” Ilana, “Gimgilitoun yey, kadiloka abag bigeg singay, o tammwayas bipiyaveigs sisiyas tanuwgjes lun o tasiyas takatimlakeins kaleiwag. Ikous mo bikati-mateigs; yam kweitoun mo baktit.”

Kadiloka navamul bikokews asklos

(Matiw 16:20-28; Mak 8:30-9:1)

²³ Yeisuw idibakes asibabaw, ilana, “Kukin kal bikikun waseg yey, kadiloka bipiyev mwamovan tatonen, anklos bikokew yam katanok katanok mo bibkunig.

²⁴ “Kalisiy yakamiy bikayus mwamovan tatonen igaw mo biyamkwen, tage kukin biyamkwen mwamowan peinag yey mo bises bwein.

²⁵ “Kukin kal bikow youd babaw nisesus wadaban pwepway, mo biyamkwen mwamovan tatonen; tage nag bimwasaw mtownen, nag.

²⁶ “Kukin kal beivag anmwasin peinan iligen agulivan o peinan gungamag mtownen, igaw Gimgilitoun yey bayum bam ven watinow mo beivag agumwasin waseg gungamag towen. Peinan igaw bayum bam, yakawanag waseg, o Tamag yakawanan waseg, o tasiyas natakayobs yakawanes waseg.

²⁷ “Mounid adibakeimiy mwasanin yakamiy nukutomos, nag bukukwanigs ee... mo bukukines Yowbad nakaleiwag.”

Yeisuw ivag ankakin kweitan

(Matiw 17:1-8; Mak 9:2-8)

²⁸ Yam kwenim kweitoun ikous, itokes siney asteitoun, Pita, Yon, Yemes, ikatulags ineis wakoy vagan binitougs waseg Yowbad.

²⁹ Yeisuw initout ee... ankakin iviwl ivag kweitan-wan, anakweim-vak bo ilapup-wakaw singay.

³⁰⁻³¹ Asteiy sisiy Yeisuw bo isaps, illivans. Mtasiyas Moses son Ilaytiy bo isaps, kamnat avakaein waseg. Illivans sisiy Yeisuw livanen nakanig igaw mo bilivet Yelusalem waseg.

³² Pita siney tasiyas bo imasis ikangagays mo ikits, ikines sikannat tasiyas Yeisuw siney tasiyas asteiy.

³³ Tasiyas asteiy bo beiyums, Pita idibek Yeisuw, ilana, “Tamwey, bweina bitasesus towen. Bo bakawlul bunatum kweitoun, bunatan yak, bunatan Moses, bunatan Ilaytiy.” Ta-ivag silawun; makava ilivan Pita.

³⁴ Igaw illivan, lov kweitan im ilumwes; tasiyas wanuwan, bo iwenes.

³⁵ Aygan teitan wanuwan lov iliganes, ilana, “Mtowen Natug bwanabwein. Bweina bukuliganes aygan!”

³⁶ Ilivan ikous, mo ikines Yeisuw anmwanet nises. Youd towen nikines bo isowmes. Misiyamun towen nag ikamteles gamag wasigeis, nag.

Yeisuw ivag gwad ibwein
(Matiw 17:14-18; Mak 9:14-27)

³⁷ Iyam nen gaboug Yeisuw siney nagamag iwloubus ineis watinow, inounas mo inekes gamag babaw bo nimimeis.

³⁸⁻³⁹ Teitan siney tasiyas iwak, ilana, “Tamwey, kokin natug kudataw. Peinan natug anmwanet-wan, yeiluw iwawei, isiblut waseg, iwak, itatat won mo ikapoul wadon, mo bigulek won. Nag biyeiwas waseg.”

⁴⁰ “Bo anitoug wasigeis muvamul vagan bikayabes yeiluw, tage nag kadilokes.”
⁴¹ Iw to Yeisuw ilana, “Takakon yakamiy. Bo kawegweis woug wasigeis yakamiy. Natum kumey bakin.”

⁴² Bimeyes kid gwad towen Yeisuw waseg, mo yeiluw iwei, igulek won, itatat; tage Yeisuw ikan yeiluw towen, ikayeb, mo ibwein gwad; mo iyamen isek taman.

Igaw teitan gamag bisilkod Yeisuw
(Matiw 17:22-23; Mak 9:30-32)

⁴³⁻⁴⁴ Asibabaw bo isom ninous peinan nikines Yowbad natawtoun. Ikines nawotet babaw, isunasun ninous ee... mo Yeisuw idibakes navamul ilana, “Livan towen kunin-uways beibwein, peinan igaw mo bisilkodeigs, Gimgilitor yey, vagan gamag beiweigs.”

⁴⁵ Tage nag ikakins silawun anilivan towen, mamagina bo isowm wasigeis, vagan nag bikakins. Bo igoulus, aspwayat gog bikatugans waseg towen, vagan silawun bikakins.

Kal bimug?
(Matiw 18:1-5; Mak 9:33-37)

⁴⁶ Wankuyeim mo ikannimans sisiyas, sivines kid bikakins kal bikow yagan avakaein mo bimlavag astamumug.

⁴⁷⁻⁴⁸ Tage Yeisuw ikakin sikanuway, mo itok gwad teitan, isen wadadan, idibakes, ilana, “Kal yak bukutam waseg gwad towen peinan agugwamag, bo kutam waseg yey; o kal yak bukutam waseg yey bo kutam waseg towen nikayabeig nam, mtown Tamag. Kalisy tamumug wasigeis yakamiy? Mounid siyas takekels bimgwayeimiy; guyawaw nag.”

Kukin kal nag bisibwadeimiy, bo ilabeimiy
(Mak 9:38-40)

⁴⁹ Iwage Yon ilana, “Tamwey, nakakin taw teitan nikayabes yeiluw yagam waseg, mo kasibwed, peinan nag sidayas mtown.”

⁵⁰ Yeisuw gog ikatimop anilivan, ilana, “Awoum kusibwades. Kukin kal nag bisibwadeimiy bo ilabeimiy.”

Min-Samaliy ipiyaves Yeisuw

⁵¹⁻⁵² Wankuyeim kakita bilivet tutan beimwen bein wanakaew, mo itamanaw silmanin bein Yelusalem. Bo ikayabes nagamag mwasanin vagan binounas wamatian bineis kweitan ven Samaliy gimgilis bidibakes, bilansa, “Kwatinags. Matovek wankuyeim mo beim.”

⁵³ Tasiyas gog min-Samaliy bo ipiyaves Yeisuw, peinan bein Yelusalem.
⁵⁴ Siyas inavamul Yemes son Yon ikines bo nipiavies, ilansa, “Guyaw, tab sivinam bakadibek kov bikalivatouw walbalab bigabus tasiyas, ne?”

⁵⁵⁻⁵⁶ Tage Yeisuw itouvin, ikanes, ilana, “Awoum.” Mo inounas, ineis ven kweitan.

Asteitoun bibwakuns waseg Yeisuw
(Matiw 8:19-22)

⁵⁷ Inounas waked, teitan taw idibek Yeisuw, ilana, “Babkunim ampalawen bukun.”
⁵⁸ Iw to Yeisuw, ilana, “Awuk sibunatum wakiwmawum, o mansiyas man sibunatum wakamweilok, tage Gimgilitor yey ta-ivag abkunug bamasis.”

⁵⁹ Yeisuw idibek tayuwein, ilana, “Kubukunig yey.” Iwage townen, ilana, “Tab kadilok bakaymet tamag ee... beikous, bikanig, bakadibwen, mo baw.”

⁶⁰ Yeisuw gog ilana, “Tamam ga-is; bikanig, tatineis bidibwanis; tage yak, kun kugeiguy livanen Yowbad nakaleiwag.”

⁶¹ Tatounun gamag ilana, “Babkunim gunguyaw yak; tage wanamug ban amuloul wasigeis agugwamag waven nisesus.”

⁶² Iwage Yeisuw, ilana, “Kukin kal bikavaveis, tage bitouvin beiyey wankuyeim, mtownen nag kadilok Yowbad nakaleiwag, nag.”

10

Navamul sinwanim sinawey

¹ Wankuyeim siwotet Yeisuw isekes-vak inagamag sinwanim sinawey, ikayabes vagan bineis bimugwas, asteiy asteiy, bineis ven katanok katanok. Tasiyas bimugwas; Yeisuw tititavin wankuyeim.

² Idibakes, ilana, “Kan bitatayoys singay babaw, tage tawteleins bag nag ibabaws. Kadiloka kunitougs waseg tanuwagan tayoy vagan bikayabes nagamag mwasanin bilabeids inatayoy waseg.

³ “Bo akayabeimi, mawana sip nitsiyas yakamiy, bukunekes tasiyas mamagina awuk takananeiys.

⁴ “Awoum amikaw kukokews, awoum gamwat, awoum sandol; awoum bukulouvats gamag waiked, bukukwaypuls; awoum.

⁵ “Aw-bunatum bukusiw wawnawan, wanmugwana bukulivan Yowbad yagan waseg, kulana, ‘Niwal biwekeimiy yakamiy.’

⁶ “Kukin tanuwagan bunatum ansinap niwal, mo beitaw nuwan mtownen; kukin gog nag, amilivan bwein mo beiyum wasigeis yakamiy.

⁷ “Aw-bunatum waseg bukusikes, aveiyag bisekeimiy bweina kukwams o kumoums. Peinan tawteleins wotet yakamiy, kadiloka kukwams wotet anagin. Awoum kwaninapels bunatum kweitan kweitan.

⁸⁻⁹ “Kukin bukusunaps kweitan ven o taginvens beitams wasigeis yakamiy, kaeimiy bisekeimiy bweina kukwams; o takatouns kuvages beibweins; o kudibakes tasiyas, kulansa, ‘Yowbad nakaleiwag bo isap wasigeis yakamiy.’

Ven mwasanin bipiyaves

(Matiw 11:20-24)

¹⁰⁻¹¹ “Tage kukin bukusunaps kweitan ven o towous nag beitams wasigeis yakamiy, kulivans wavytakon ven, kulansa, ‘Kapiyaveimiy yakamiy, simiyas musamusang pweepway wakikem kakatsap bininein wamiven; tage kadiloka kuninuways Yowbad nakaleiwag, peinan bo isap wasigeis yakamiy.’

¹² “Adibakeimiy, igaw Yowbad bimop ven babaw asisinap kalbaleb, ven Sodom mapun bilivatus kalbaleb, tage ven townen bipiyaveimiy mapun singay kalbaleb bilivatus.

¹³ “Yakamiy min-Kolasin, o min-Beteseid yakamiy, singay kalbaleb bukulivatus. Nukukines gunawotet tawtoun, tage nag kupiyaves amisinap kalbaleb. Kukin kweiboug min-Tayil o min-Sidon bikines gunawotet tawtoun mogo bigeg ninous bipiyaves asisinap kalbaleb, bikumus wous son asikweim kalbaleb, gunugoun, o adok sewed, peinan bikakinsa asisinap kalbaleb.

¹⁴ “Igaw Yowbad bimop ven babaw sikalbaleb, tasiyas min-Tayil o min-Sidon bilivatus mapun sikalbaleb, tage yakamiy singay kalbaleb bukulivatus.

¹⁵ “O yakamiy-vak min-Kapaneyum kudokes bukumwens kuneis walbalab, adok bukubus bukuneis watinow.”

¹⁶ Ikous anilivan townen, mo idibakes navamul, ilana, “Kukin kalisiy biliganes agamiy, biliganesa aygag. Kukin gog kalisiy bipiyaveimiy, bipiyaveigs yey. Kalisiy tasiyas bipiyaveigs, bo ipiyaves Tamag, townen nikayabeig nam.”

Iyums sona simwəsaw

¹⁷ Tasiyas sinwanim sinawey ineis, iwotets mawan, mo iyums, imwəsaws avakaein, ilansa, “Tamwey, yagam waseg kadibakes siyas bwagaw, mo ikilos sinap kalbaleb waseg.”

¹⁸ Yeisuw gog idibakes, ilana, “Bo akin Seitan walbałab ikalivatouw mawana kavikawn, in watinow.

¹⁹ “Bo asekeimiy mikaleiwag vagan bukvtakus mwatets sisiyas bobos bwabwels, tage nag bigadeimiy; mo bukutawtouns waseg Seitan inakaleiwag babaw.

²⁰ “Tage silawun mimwəsaw nag peinan tasiyas bwagaw ikanawes agamiy. Silawun mimwəsaw peinan Yowbad bo nilel yigamiy walbałab.”

²¹ Misiyamun towen Yeisuw bo imwəsaw Yowbad Kululuwan Bwanabwein waseg, ilana, “Kalin nuwag Tamag yəkoum, ven watinow son libalab sitovek yəkoum, peinan nukusom sinap towen, awoum tasiyas tassinaps bikakins, misinaka siyas ninous mawana pwapwaw. Mounid, Tamag, mawan nanoum tatoneim bwanabwein.

²² “Tamag bo itam youd babaw waseg yey. Nag kal ikakin Natun; misinaka Tamag. Nag kal ikakin Tamag; misinaka Natun yey, sigwey kalisiy sivinag bakamel wasigeis mo bikakins Tamag.”

²³ Mo itouvin idibakes navamul, tasiyas-wan idibakes, ilana, “Tatumwəsaws tasiyas, kalisiy mites bikines sinap towen nukukines.

²⁴ “Mounid adibakeimiy, kweiboug palopit babaw sisiyas guyawaw babaw ivag sivines bikines sinap towen nukukines, nag gog ikines. O tasiyas sivines biliganes sinap towen nukuliganes nag gog iliganes.”

Tassinap iyakwen Yeisuw

²⁵ Wankuyeim tassinap teitan inek Yeisuw, idoki biyakwen; ilana, “Takatimlakay yak. Aveiyag yey bavag vagan mwamovag bises bisigeg?”

²⁶ Iw to Yeisuw, ilana, “Kuninuway Moses nakaleiwag. Aveiyag nile?”

²⁷ Ikatimop, ilana, “Kadiloka kusiwyoub Guyaw Yowbad, əteim waseg, kululuwam waseg, mutawtoun waseg o nanoum waseg; o kuvnas-vak soum mawana kuvnəseim tatoneim.”

²⁸ Iwage Yeisuw, ilana, “Magen! Kukin bukuvag mawan mo bukumov.”

²⁹ Tage taw towen, idok ansinap tonen didumwal, ikatigan Yeisuw, ilana, “Kavel soug bavnas?”

Teitan taw nikatimlowus won waked

³⁰ Yeisuw ikatimop anilivan, ikabebay, ilana, “Teitan taw meinoy neim Yelusalem, iwloubus bein Yelikow. Ininoun ee... tavveinaws mwasanin ituts iweis, iyousis taw towen, ikawes anakweim, iwaweiys ikous, mo ilisawes taw towen immasis, bo katimlowus won.

³¹ “Yam towen tanuwagan lun teitan idoki biwloubus ked towen waseg, inoun ee... iwekey mtown taw nimmasis waked, nag inek, ilisow ises, inoun-wan.

³² “Livay tabun teitan mo iwloubus iwekey mtown nimmasis waked, ikin, nago inek, ilisow ises, inoun-wan.

³³⁻³⁴ “Tage gum-Samaliy teitan, ininoun, iwekey nimmasis waked, ikin, ikalin nuwan, inek, iyakit, ikabiyuv ansasok waseg antagonist son wayn, mo isumweil. Ikous mo inup, isen əlen donkiy watapwan, ivakaben donkiy, inow bunatum kweitan nises waked, mo ivnas wabunatum.

³⁵ “Iyam nen gəboug, mo ikow akweiy kina, isek tanuwagan bunatum, ilana, ‘Kuvnas gamag towen beibwein; o kukin money towen nag kadilok, igaw bayum bam bamop.’”

³⁶ Yeisuw mo ilivan, ilana, “Gamag asteitoun iwekes sisiy nimmasis waked; tage kal ivnas?”

³⁷ Iwage towen, ilana, “Adok towen ikalin nuwan, mo ileb.” Yeisuw mo idibek, ilana, “Yəkoum kun, bukuwtel mawan.”

Malid son bwadan Meliy

³⁸ Yeisuw siney nagamag inounas oko isaps kweitan ven; nātan vin Mālid itam nabunatum, anbwabwal tasiyas.

³⁹ Mālid bwadan Meliy isin Yeisuw wadadan, iligen nakatimlakay.

⁴⁰ Manawen Mālid ivag kaeis beikams, inawotet singay babaw, mapuna inek Yeisuw, ilana, “Guyaw, ta-bukukin bwadag nilisaweig agumwānet bavag kaeimiy bukukwams. Kudibek beim bilabeig.”

⁴¹⁻⁴² Iwage Yeisuw, ilana, “Ikubukub nuwam peinan nanoum babaw, tage kweitan sinap ikābwag waseg yakoum. Meliy gog sivinan sinap towen bwanabwein; iligen aygag. Bweina bises bikatiluteg agulivan.”

11

Nitoug waseg Yowbad

(Matiw 6:9-15; 7:7-11)

¹ Ven kweitan waseg Yeisuw bo ikulul, initoug waseg Yowbad; ikous, inavamul teitan idibek, ilana, “Tamwey, kwaitimlakem bakanitoug waseg Yowbad; māwan Yon nikatimlakes tasiyas inavamul.”

² Iw to Yeisuw, ilana, “Bukunitougs, kulivans, kulansa:

‘Timem, bakagoul yagam.

Mukwaleiwag beim.

³ Kaem bukusekem nagein.

⁴ Kunumlev amasinap kalbaleb, peinan yakamey kanumlev gamag asisinap kalbaleb wasigeis yakamey. Tage awoum bukusenam abiyokon waseg.’”

⁵⁻⁶ Mo idibakes, ilana, “Kal yak bukunek nubeim watapwan boug, bukulana, ‘Gwa, kusekeig bled kweitoun, agubwabwal beikam; peinan mwana isap, anamoun; ta-ivag kan basek beikam.’

⁷ “Nubeim adok wanuwan nabunatum bikatimop aygam, bilana, ‘Awoum kuvag mouvit waseg yey. Peinan koukwed bo akatibog, o nitug sigwey kamasis. Ta-māwan basap basekeim.’

⁸ “E, nag bisap bisekeim peinan nubeim, nag. Tage peinan kusimkakin mo bisap bisekeim aveiyag sivinam.

⁹ “Adibakeimiy, bweina kunitougs, mo bisekeimiy. Kunineivs mo bukubānes. Kugipits mo bikaliyow koukwed pinamiy yakamiy.

¹⁰ “Kukin kal binitoug, mo bisek. Kukin kal binineiv, mo biban. Kukin kal bigipit, mo bikaliyow koukwed peinan.

¹¹⁻¹³ “Tawaw yakamiy, kukin nitimiwas sivines in, bilivans, mwatet bukusekes beikams, ne? O kukin sivines pouw, bilivans, kadilayuy bukusekes, ne? Adog nag. E, takalbaleb yakamiy, kukwakins aveiyag bwein bukusekes nitimiwas. Yowbad ansinap bwein. Bukunitougs waseg mtown, singay mo bisekeimiy Kululuwan Bwanabwein.”

Kal ileb Yeisuw mo ikayeb yeiluw?

(Matiw 12:22-30; Mak 3:20-27)

¹⁴ Teitan gamag bo ipiyev livan, peinan yeiluw neisiw wāwon; Yeisuw ikayeb, ikilev gamag towen mo ilivan bwein; o tasiyas iliganes bo isom ninous.

¹⁵ Tage mwasanin iyages Yeisuw ilansa, “Siyas tabbwagaws sitovek Seitan mtown nileb Yeisuw, mo ikayabes yeiluw.”

¹⁶ O musinis-vak sivines biyakwanes Yeisuw, ilansa, “Kwamtilakem Yowbad naman mulin, bakakin.”

¹⁷ Yeisuw gog ikakina ninous tasiyas, idibakes, ilana, “Kukin ven avakaein gimgilis bilivis bivages bod kweitan kweitan, mo bigulekwas ven towen; o kukin gamag bilivis wawnuwan bunatum mo bigayays, singaya bigeg.

¹⁸ “O Seitan-vak, kokin inabod bilivis, inakaleiwag bikalivatow. Awoum kulansa, ‘Bwagaw ilabeim mo kukwayabes yeiluw’; awoum.

¹⁹ “Amilivan gog mawan, tage kal ilabes mivamul mo ikayabes yeiluw? Kuninuways asisinap tasiyas mo bukukwakins bo ibol amilivan.

²⁰ “Tage kuninuways, magat Yowbad ilabeig vagan bakayabes yeiluw, nakaleiwag bo isap wasigeis yakids.

²¹⁻²² “Kokin tawtoun gamag bikokew naviy wuliyougwan ninamis waseg vagan bimtakavet nabwan tatonen, adok nag teitan biyageg nawliyoug. Tage kokin tayuwein gamag singaya tatawtoun mo bivvatay waseg, bitakayway, mo bikwey wuliyougwan naviy son nawliyoug babaw, bivgen bisekes inagamag.

²³ “Kokin kal nag ilabeig bo isilbwadeig. O kokin kal nag ikatikunouk kan inow wagunseigous, mtowen bo ikatigey.

Gamag ibwein, mo ilivet kalbaleb singay

(Matiw 12:43-45)

²⁴ “Magat yeiluw bikilev gamag, mo bitavan ven makaw, binineiv nakabiyeiwas. Binineiv nag, bilivan bilana, ‘Bayum ban wagunbunatum to nalisow.’

²⁵⁻²⁶ “Beiyum biban nabunatum, bo itaneivis, youd babaw bo ilivkases bwein, bikalin nuwan, bein ikin siney teinim teiy asisinap singaya kalbaleb, tasiyas asibabaw mo beisiws wabunatum, bisesus bisigagas. Kweiboug gamag towen nakalbaleb peinan yeiluw neisiw, tage nakabiyokous waseg singaya kalbaleb.”

²⁷ Yeisuw anilivan mawan, natan vin wawnuwes gamags, aygan ivakaein, idibek Yeisuw, ilana, “Singay tamumwasaw manawen vin nikopweim yak, o ivsasum.”

²⁸ Iwage Yeisuw, ilana, “Nag, tasiyas taliganeins Yowbad aygan bimwasaws, o takanaweins aygan.”

Livanen Youna

(Matiw 12:38-42; Mak 8:12)

²⁹⁻³⁰ Gamag singay babaw katikunouks nimeis waseg Yeisuw, mo idibakes, ilana, “Gudwouvaws yakamiy amisinap kalbaleb. Sivinamiy naman mulin Yowbad bukukines. Nag gog. Magat bukuninuways Youna waseg. Mawan min-Ninavek kweiboug ikines Youna nawotet mamagina naman mulin Yowbad; mawan Gimilitoun ye, gunawotet kukines tut towen waseg.

³¹ “Igaw Yowbad biyatyal wasigeis gamag babaw, mo kwin manawen kweiboug inaven wayals mo bilivan vagan bukukwakins amisinap kalbaleb gudwouvaws yakamiy. Peinan manawen kwin inoun in singay kadiveiyov vagan biligen Solomon ansinap; tage sinap towen nagein nukuliganes ikalisow Solomon ansinap waseg.

³² “Min-Ninavek bitamanaws yatal waseg, bilivans vagan bukukwakins amisinap kalbaleb gudwouvaws yakamiy. Peinan tasiyas iliganes Youna nageiguy mo ilaves asisinap kalbaleb; tage kaleiwag nagein nukuliganes ikalisow Youna nageiguy. Kuliganes; nag gog, nag kulaves amisinap kalbaleb.

Woun mititeilin

(Matiw 5:15; 6:22-23)

³³ “Lamp bitavakanot, awoum aveiyag bitakatugbulik, o awoum bitesen waskawan bunatum; awoum. Tage bitesen wateibol, mo tasiyas beisiws wabunatum bikines mititeilin.

³⁴ “Woun mititelin mat. Kukin matam bwein mo woum meiveka bikamnat; kokin matam kalbaleb mo woum meiveka bidadub.

³⁵ “Kuvnases mititeilimi, mata ge idadub.

³⁶ “Kokin gog woum meiveka bikamnat, dadub nag, mo bukumlavag mamagina lamp kuvakein mititeilin.”

Tasiyas Palisiy sisiyas tassinaps

(Matiw 23:1-36; Mak 12:38-40; Luk 20:45-47)

³⁷ Igawa illivan, Palisiy teitan inek, idibek Yeisuw, ilana, “Kum, bitakams wagunbunatum”. Itam, inek beikams.

³⁸ E, kakita beikams, Palisiy towen ikin Yeisuw nag iwid naman, bo igeg nanon, ilana, “Aveiyag wawun nag kuwid namam?”

³⁹ Iwage Yeisuw, ilana, “Yakamiy Palisiy mamagina abmavin o kwävíg, kuwidis watoulan igimagim, tage wanawan bikibik, kalbaleb, peinan amisinap kukkwayes gamag sivavag.

⁴⁰ “Takabalawein yakamiy! Yowbad nibun kaleivids, nibun-vak nuwads.

⁴¹ “Wanuwamiy kadiloka kuvages amisinap beibwein, kusiwayoubs gamag wasigeis, mo bukugimagims, o youd katanok katanok beibwein pinamiy yakamiy.

⁴² “Tage yakamiy Palisiy, singay kalbaleb bukulivatus. Kukwatkakils waseg miwlioug babaw, kulagus sinawatan; kalgutan mo kusekes Yowbad. E, kulagus gayas siyas kekel, mamagina minit o luw, tage bo kunumlaves sinap didumwal son siwayoub waseg Yowbad. E, kadiloka kuvnases sinap babaw, tage awoum bukuwidis sinap tasiyas avakaein.

⁴³ “Yakamiy Palisiy, singay kalbaleb bukulivatus. Peinan tapwaloul waseg sivinamiy bukusinis wäkeb, o sivinamiy gamag wavytakon ven beikoks wamitamiy binounas.

⁴⁴ “Yakamiy Palisiy, singay kalbaleb bukulivatus. Amikakin bwein, tage wanuwamiy kalbaleb, mäwana alawag wanawoud, gamag bikanpeles tage nag ikakins takanig alawagan.”

⁴⁵ Tassinap teitan idibek Yeisuw, ilana, “Tamwey, amlivan towen waseg kuyagem-vak yakamey.”

⁴⁶ Iw to Yeisuw, ilana, “Yakamiy-vak tassinap yakamiy, singay kalbaleb bukulivatus. Peinan mikaleiwag kusekes gamags singay moumouvit mäwana kunes kusekes avakaein, tage nag kakit bukukawes vägan bukulabes, nag.

⁴⁷ “Singay kalbaleb bukulivatus. Tibumiya bo neiweiys siyas palopits mo kuwlules aluwgwas tasiyas palopits.

⁴⁸ “Mapuna kukwakins o kutams waseg tibumiya siwotet kalbaleb. Tasiyas neiweiys palopits o yakamiy kuwlules aluwgwas.

⁴⁹ “Yowbad ansinap waseg ilivan mäwan, ilana,
‘Bakayeb palopits sisiyas aposols binekes,
mo beiweiys mwasanin o bisilkodes
mwasanin.’

⁵⁰ “O tasiyas Yowbad inapalopit bo iwaweiys ven watinow. O wotet towen kalbaleb mapun bukulivatus gudwouvaws yakamiy, tut towen waseg.

⁵¹ “Yowbad nibun ven watinow o gamag siyas wanamug, teitan taw iwei Yowbad nagamag towen Eibel. Yowbad inapalopit iwaweiys ee... nakabiyokous waseg mtowen Sekaliya, neiweys Yowbad wanbunatun, abeilun palatan, bunkakit palatan. E wotet towen kalbaleb mapun bukulivatus gudwouvaws yakamiy, tut towen waseg.

⁵² “Yakamiy tassinaps, singay kalbaleb bukulivatus. Kukwayuses awkwedan sinap, nag bukusiws yakamiy, tage kusilbwades tasiyas sivines kid beisiws. Ta-mäwan. Bo kusilbwades.”

⁵³⁻⁵⁴ Ilisow ven towen, mo Palisiy sisiyas tasiyas takatimlakeins kaleiwag singay ivvaluts asilivan waseg, mamagina ivvasiganis; ikayamats waseg Yeisuw anilivan; kukin kalbaleb biliganes, mo biyatals.

² Ilana, “Youd babaw nilumwes igaw mo bikaliyow, bikamat; o aveiyag nisisowmes, igaw mo bispuyes mo bikakins.

³ “Youd towen nukulivanes dadub waseg, igaw biliganes wamnat; o aveiyag nukwatinwalags wamibunatum igaw mo bilivans wavytakon ven.

⁴ “Sigwey, awoum kuwenes tasiyas beiweiys woumiy. Bikatimateimiy bo misinak. Nag aveiyag binuwakeimiy.

⁵ “Tage kadiloka kuwenes mtownen bikatimateimiy mo bilaveimiy bukuneis wākov. Mounid bukuwenes mtownen.

⁶ “Skwasik mwanan̄im, adok ten toya maysan; tage Yowbad ikikines; nag binumlev mwantanok, nag.

⁷ “Yowbad gog ikakin kunumi y nakasabwasob babewein nakavniwin. Awoum beivag amipwayat, Yowbad ikakina mansiyas skwasik, imtakavates; singay gog bimtakavateimiy yakamiy.

Awoum bitakayan

(*Matiw 10:32-33; 12:32; 10:19-20*)

⁸ “Kukin kal yak bukwamtel wamtes gamag, kulana, ‘Mounid Yeisuw inagamag yey,’ wankuyeim yey Gimilitoun yey mo bakamtel wamtes tasiyas Yowbad natakayobs, balana, ‘Taw towen yey gunagamag.’

⁹ “Tage bukwayaneig wamtes gamag, mo bakayaneim wamtes tasiyas Yowbad natakayobs.

¹⁰ “Kukin kal bitawyageig Gimilitoun yey, Yowbad bweina biwid ansinap kalbaleb beikous; tage kukin bitawyeg Kululuwan Bwanabwein, Yowbad nag biwid ansinap kalbaleb, nag.

¹¹ “Igaw biyousimiy, biyateleimiy wasinagog o wamtes tasiyas guyawaw o tasiyas takaleiwags, awoum beivag ninoumi y babaw. Awoum kulansa, ‘Amawan bakatimop asilivan?’ Awoum kulansa, ‘Aveiyag balivan?’ Awoum.

¹² “Yowbad Kululuwan Bwanabwein mo bikamtilakeimiy anilivan bukulivans tut towen waseg.”

Awoum bimwamon matad

¹³ Teitan taw wanuwes gamag babaw mo idibek Yeisuw, ilana, “Takatimlakay yak, tuwag bo ikow nakiyay avakaein, kudibek mwasanin bisekeig gunkiyay yey.”

¹⁴ Iw to Yeisuw, ilana, “Adok awoum. Nag kal isekeig gunakaleiwag vagan bakaluweg mivavag.”

¹⁵ Idibakes tasiyas, ilana, “Kuvnaseimiy. Awoum bimwamon mitamiy. Nag bitamwasaw peinan dawliyoug babaw. Silawun damwasaw kweitan.”

¹⁶⁻¹⁷ Kabebay kweitan idibakes, ilana, “Guyaw teitan inabag ivag kan singay babaw. Bo ikalawt seigous. Nanon ilana, ‘Aveiyag bavag? Peinan bo ikalawt seigous.’

¹⁸ “Ilana, ‘Adok bagulekwas seigous kweibougs, bawlulavaw bunavkāveks, waseg basen kan babaw o youd katanok katanok.

¹⁹ “Beikous; nanoug mo balana: “O yey guyaw yey, kag babaw, bo kadilok bweilim babaw; bweina bayeiwas, bakamkwam, bamwamoum, bamwasaw.”’

²⁰ “Tage Yowbad idibek, ilana, ‘Takabalāwein yak, boug towen bukumat, kululuwam toneim biyamkwaneim, mo kal bikow muvavag tasiyas nukwanlev?’

²¹ “Guyawaw mwasanin bo māwan; sivines siwliyoug bikatimweisis bibabaw; tage wanuwes nag ivag Yowbad nawliyoug, nag.”

Awoum bikubukub nuwamiy

(*Matiw 6:25-34; 6:19-21*)

²² Mapuna idibakes navamul, ilana, “Awoum bikubukub nuwamiy silmānin mwamovamiy, aveiyag bukukwams. Awoum bikubukub nuwamiy silmānin woumiy, aveiyag bukusikams.

²³ “Mwamovads nag mamagina kan; o wouds nag mamagina kweim.”

²⁴ “Kuninuways mansiyas bwayobway. Nag isapwes kan, nag itayoys binawes wasiseigous; tage Youbad imtakavates, isekes kaeis ikams, singay gog bimtakavateimiy yakamiy.

²⁵ “Adok nag kal yakoum bukuninuway mutawtoun waseg mo beivag ambweilim bibabaw. Nag kadilok.

²⁶ “Sinap towen kakit nag kadilokeimiy. Awoum bikubukub nuwamiy youd babaw silmanin.

²⁷ “Kuninuways kasiyas moloubaw peinan isibwasobs wadadan ked, nag iwotets, nag ibalals, nag. Tage astubub waseg ilisawes mtowen Solomon antubub kweiboug gamag nikavasis singay.

²⁸ “O kasiyas kay, nagein mwamov wadadan ked, nubweig beimat, o gamag bikawes binawes bilaves bein wakov. Peinan Yowbad isekes kay astubub kamnabwein singay mo bisekeimiy amikweim yakamiy. Adok nag kunmises Yowbad, vagan bisekeimiy kan, kweim.

²⁹ “Awoum kuninuways aveiyag bukukwams o aveiyag bukumoums. Awoum bikubukub nuwamiy.

³⁰⁻³¹ “Ven babaw gimgilis sivines youd tasiyas. Tamads ikakina aveiyag sivinamiy. Kadiloka bukuninuways Yowbad nakaleiwag, bukwanawes, mo bisekeimiy youd tasiyas.

³² “Awoum beivag amipwayat. Yakamiy Yowbad alen yakamiy, mapuna bo itam vagan bukusiws wanawan nakaleiwag.

³³ “Kuymiyises miwliyoug, money kukawes, kusiwyoubus tasiyas tasimavs; maysamiy walbalab mo bises bisigeg. Gamag nag bibakews waseg, o man kekel nag bikamkwams, o biyagages, nag.

³⁴ “Ampalawen miwliyoug kwatikunakus, mo biseiw nuwamiy ven towen.

Takaymates datoveks igaw beim

(Matiw 24:45-51)

³⁵⁻³⁶ “Kadiloka kupayıws o milamp bigidaged mamagina tasiyas nikaymates sitovek wasagal, veivay sigeilin; mtowen beiyum beim, bigipit; tasiyas biliganes, nuwanaw mo bikaliyowes koukwed. E, kadiloka kwayamats mawan tasiyas.

³⁷ “Igaw sitovek beim mo tasiyas talalals mo bimwasaws, bipayiw mtowen, bisekes abes bisinis, mo bimey kaeis beikams.

³⁸ “Kukin beim watapwan boug o bibanes ilalals, mo bimwasaws; o kukin walalayis mo beim o bibanes ilalals, mo bimwasaws-vak tasiyas.”

³⁹ Kweitan livan Yeisuw isekes mamagina, “Kuninuways tanuwagan bunatum; kukin bikakin asinavın tavveinaw beim, mo beilal, bisilbwed kid towen tavveinaw; awoum ge beisiw wanbunatum.

⁴⁰ “Yakamiy mawan, kadiloka kulalals, kukwaymateigs Gimilitoun ye. Awoum balabuboleimiy; awoum.”

⁴¹ Pita ikatugan, ilana, “Tamwey, tabta mukwabebay towen silmanin yakamey, o adok gamag babaw?”

⁴²⁻⁴⁴ Iw to Yeisuw ilana, “Kal natouwat tamwey bisek nawotet vagan bimtakavates inagamag, bisekes kaeis bikamkwams? Adok towen tatoukum o tassinap. Igaw natovek beiyum beim o biban inatoukum inawotet waseg, bilana, ‘Kalin nuwag yakoum, kadiloka kumtakavet gunwuliyoug babaw.’

⁴⁵⁻⁴⁶ “Tage kukin natouwat bilana, ‘Guntovek bo iyovi, adok nag nuwanaw beim,’ mo biwaweiy inagamag, tawaw, vinay, o bimlavag tagovek, o bimwamoum tawtoun soup bikabalawein, mo natovek beiyum beim bilabubol natouwat, bimop ansinap kalbaleb, bisen wasigeis tasiyas takapidabs.

⁴⁷ “Natouwat kavel ikakin natovek nanon, tage nag iwtel mawan, o nag ikatunag, natovek mo biwaweiy avakaein.

⁴⁸ “Tage kukin kal nag ikakin natovek nanon, mo iwotet kalbaleb, kadiloka natovek biwaweiy gamag towen, tage nag beiweiy bivakaein. Kukin kal natovek bisiwayoub

avakaein waseg, kadiloka biwotet avakaein peinan. O kokin natovek bisek navavag babaw, sivinan gamag towen biwotet bivakaein peinan.

Yeisuw im silmanin abilivis

(Matiw 10:34-36)

⁴⁹ “Yey nam bavakanot kov wadaban pweppway, o sivinag nanawan bigidaged.

⁵⁰ “Igaw mo bibaptayseig kweitan youd kalbaleb waseg, o sivinag nuwanaw biyakous.

⁵¹ “Awoum kuninuways yey nam silmanin niwal ven matinow. Nag. Yey nam silmanin abilivis bavag.

⁵² “Igaw bunatan bunatum wanuwan asteinim bilivis, asteitoun palatan, asteiy palatan.

⁵³ “E, bilivis, taman palatan, natun palatan; o inan palatan, natun palatan; o asteiy vinay son yawan, natan palatan, natan palatan.”

Nag iwtusis Yeisuw

(Matiw 16:2-3)

⁵⁴ Idibakes gamag babaw, ilana, “Magat bukukines lov isob wayavat, bukulansa, ‘Bo beikweis.’ E, mo ikweis.

⁵⁵ “O magat bukukines yals itow, bukulansa, ‘Kalas beikal avakaein,’ mo beikal kalas.

⁵⁶ “Tayyaweid yakamiy! Kukines libalab, ven ankakin mo kukwakins aveiyag bikamat, tage nag kuwtusis Yowbad nawotet tut towen waseg.

⁵⁷ “Aveiyag wawun nag bukukwakins sinap didumwal?

⁵⁸ “Kukin kal biyateleim binawein waseg takaleiwag silmanin yatal; igaw waked kadiloka kuyokons vagan ninoumiy bukulataxes. Kukin gog nag, mo biyateleim wamatan towen takaleiwag, o takaleiwag bidibek plisman, bilana, ‘Kutok gamag towen kunow wadeil.’

⁵⁹ “E, bukun wadeil, bukusesuna ee... anatut bukupayin inapayin meivek-wan beikous, mo bilikum bukusap wamnat.”

13

Kadiloka kulaves amisinap kalbaleb

¹ Misiyamun towen gamag mwasanin idibakes Yeisuw, ilansa, “Min-Galiliy mwasanin iwaweiys man iluns waseg Yowbad, mo Paylat iweiys gamag tasiyas, imtamats sisiyas mansiyas man neiweiys.”

²⁻³ Iw to Yeisuw ilana, “Awoum kudokes min-Galiliy tasiyas asisinap singay kalbaleb mapuna imtamats. Nag. Min-Galiliy babaw asisinap kalbaleb; o yakamiy-vak, kukin nag bukulaves amisinap kalbaleb mo bukukwanigs mawana tasiyas.

⁴⁻⁵ “Awoum kudokes min-Yelusalem tasiyas sinwatan teitoun asisinap kalbaleb, mo bunatum bunaveiyov yagan Siloum ikalivatouw iwaweiys. Nag. Min-Yelusalem babaw asisinap kalbaleb; o yakamiy-vak, kukin nag bukulaves amisinap kalbaleb, mo bukukwanigs mawana tasiyas.”

Yaveinun nag ivag anagin

⁶ Yeisuw mo isekes nakabebay mamagina: “Taw teitan, wanabag nisop yaveinun nitet. Sivinan wuhan bikow; iwekey, nag.

⁷ “Idibakes tasiyas tawtelein bag, ilana, ‘Kweitoun bweilim aninek yaveinun makaywen, anineiv wuhan; nag. Kuteiy, awoum biteta mav, biyamkwen pweppway.’

⁸⁻⁹ “Ikatimop aygan, ilana, ‘Bweina ga itet bweilim towen. Bakaviyeil leis wadadan palavas, basen bulumakaw pwes. Kukin bweilim wamatads beiwu wuhan, bo bwein. Kukin nag, mo bateiy.’ ”

Natan vin ivag ibwein Sabat waseg

¹⁰ Sabat waseg, Yeisuw igeiguy wanuwan sinagog.

¹¹ Natan vin nises, sinwatan kweinim kweitoun bweilim ankatoun waseg tapwan idadog. Ta-mawan bitamanaw bidamoms tapwan.

¹² Yeisuw ikin, idibek, ilana, “Vin yak, bo kubwein, amkatoun waseg.”

¹³ Isen naman wawan, nuwanaw mo idamoms tapwan; mapuna ikaves Yowbad.

¹⁴ Tage tanuwagan sinagog ikin Yeisuw nivag takatoun ibwein Sabat waseg, ikapassal nuwan, idibakes gamag tasiyas, ilana, “Yam kweinim katanok waseg bitawotets. Awoum kumeis Sabat vagan amikatoun bivageimiy bukubweins.”

¹⁵ Yeisuw ikatimop aygan, ilana, “Tayyaweid yakamiy. Sabat waseg kulikus aleimiyl bulumakaw o donkiy wasibunatum nisesus mo kutokes kunawes wayvagam beimoums.

¹⁶ “Tage manawen vin, Ebelam tabun nañan, Seitan niyawen bweilim babaw, bweina balik Sabat waseg. Peinan Seitan ankatoun nivag sinwatan kweinim kweitoun bweilim.”

¹⁷ Anilivan mawan, mo ivag asimwasin tasiyas nivtokays livan, tage gamag babaw imwåsaws peinan ikines nawotet singay tawtoun.

Yowbad nakaleiwag

(Matiw 13:31-33; Mak 4:30-32)

¹⁸ Mapuna idibakes, ilana, “Yowbad nakaleiwag amawan? Aw-kabebay basekeimiy vagan bukuliganes o bukukwakins.

¹⁹ “Adok mawan tipol veitun, peinan gamag teitan ikow inow isop wanabag; isob, ivakaein, mo mansiyas man iyoyows iwlules sibunatum yayagein waseg.”

²⁰⁻²¹ Vayuwein ilivan, ilana, “Amawan bakabebay vagan bukukwakins Yowbad nakaleiwag? Adok mawana yist, nañan vin ikow isen waseg pwalaw avakaein, tamkwalan mo ilol.”

Koukwed kabkakit

(Matiw 7:13-14, 21-23)

²² Inoun, in, silmanin Yelusalem, itavrin ven babaw, ven mwasanin wunoveks, o ven mwasanin wunkekels, ikitimlakes gamags.

²³⁻²⁴ Teitan gamag ikitigan, ilana, “Tamwey, tabta Yowbad bikatinabwes gamag asteiyuye?” Iwage, ilana, “Kuyokons vagan bukusiws koukwed kabkakit waseg. Mounid, gamag babaw sivines beisiws, biyokons, bo nag.”

²⁵ “Igaw tanuwagan bunatum bitamanaw, bikatibog koukwed, mo bukutowas watoulan, bukugipits, kulansa, ‘Tamwey, kwaliyow koukwed pinem yakamey,’ tage mtowen bikatimop agamiy, bilana, ‘Nag akakin avanuy mukunoy nukumeis yakamiy.’

²⁶ “Mo bukulansa, ‘Nakakamkwam nakamwamoum wamatam yak, o nukwatimlakay wamaven.’

²⁷ “Towen gog bilivan, ‘Mounid nag akakin avanuy mukunoy nukumeis yakamiy. Kunounas, kuneis, takalbalebs yakamiy.’

²⁸ “Mo bukuvalams o bukwakilis kumtumi, peinan bukukines Ebelam, Aysak, Yekob sisiyas tasiyas palopits, Yowbad nakabkaleiwag waseg, o yakamiy bukusiwas watoulan.

²⁹⁻³⁰ “Gamag babaw meinoys wanuvid, wayavat, wabomat, wayals, bimeis bisinis beikams Yowbad nakabkaleiwag waseg. Tage mwasanin wankuyeim bo bimugwas, o mwasanin wanamug bo bikuyeims.”

Yeisuw beimat Yelusalem waseg

(Matiw 23:37-39)

³¹ Tut towen Palisiy mwasanin inekes Yeisuw, ilansa, “Kusawl, kun, Elod sivinan beiweim.”

³² Iw to Yeisuw, ilana, “Kuneis, kudibakes bulawud towen agulivan mamagin: Nagein nubweig siyas bwagaw bakayabes, takatouns bavag mo beibweins, tage bugiy bo bayakous gunawotet.

³³ “Kadiloka banoy gunaked nagein, nubweig, bugiy. Peinan palopit babaw yakamey bakamtamat Yelusalem. Tobwag ven awoum.

Min-Yelusalem bo iwaweiys palopits

³⁴ “O Yelusalem. Min-Yelusalem yakamiy kuwawaiys tasiyas palopits, o tasiyas nissekeimiy Yowbad anilivan kuwawaiys dakul waseg, kwatimates. Tut babaw sivinag

badawemiy bukumeis bamtakavateimiy mawan kolkolek imtakavates nitun; nag gog; kupiyaves aygag.

³⁵ “Nagein mibunatum makaw, o nag bukukineigs ee... igaw anatut wanakoug bukulansa, ‘Kalin nuwads mtowen neim silmanin Yowbad nawotet,’ mo bukukineigs vayuwein.”

14

Towen ilelol won, ivag ibwein

¹⁻² Sivatan tut, S̄abat waseg, Yeisuw in beikams son guyaw teitan, mtowen Palisiy. O takatoun towena, won bo ilelol. O tasiyas Palisiy ikinbunikes Yeisuw, bivag takatoun beibwein, o nag.

³ Yeisuw idibakes tasiyas tassinaps sisiyas tasiyas Palisiy, ilana, “Tab kadilok bitavag beibwein S̄abat waseg, o nag?”

⁴ Tasiyas gog isesus-wan ikikapays. Yeisuw mo ivag ibwein; ikous, mo ilana, “Bweina kunoun.”

⁵ Mo idibakes tasiyas, ilana, “Tage yakamiy, kukin aleim mwanatan bikalivatow bein waleg S̄abat waseg, adok donkiy, o bulumakaw, adok bukuyous ne? S̄abat waseg, bukunup, bukusem wanakaew?”

⁶ Tasiyas iliganes. Ta-mawan bikatimapus aygan towen nilivan.

Guyawaw abes

⁷⁻⁹ Yeisuw ikines gamag mwasanin imeis silmanin sagal, mo sivines guyawaw abes wanakaew. Yeisuw ikines, mo ikabebay, idibakes, ilana, “Bukun silmanin veivay sigeilin, awoum kusin guyaw aban waseg. Adok guyaw avakaen beim, mo tanuwagan bidibakeim, bilana, ‘Guyaw aban towen. Kum, kusin watinow.’ Amwasin, mo bukubus bukun watinow.

¹⁰ “Tage bukun wasagal, kadiloka kusin watinow. Wankuyeim tanuwagan beim, adok bidibakeim, bilana, ‘Gwa, kum kusin wanakaew, abam towena.’ Mamagina bukumliguyaw wamtes simwayas tasiyas takamsagals.

¹¹ “Kukin kal sivinan bimliguyaw mo beibus bein watinow; tage kukin kal biseib tatonen igaw mo biguyaw.”

¹² Peinan tanuwagan sagal nidow Yeisuw im silmanin sagal; o Yeisuw bo idibek, ilana, “Igaw bukusagal, awoum kudawes veiyom babaw, o taliwom o simwayas guyawaw mwasanin. Peinan tasiyas bisagals mo bidaweims yak mo bimapus.

¹³⁻¹⁴ “Tage yakoum bukusagal, kudawes tasiyas tasimavs, o tasiyas toupams sisiyas takagayals, o tasiyas toukwaws, mo bukumwasaw. Peinan tasiyas ta-mawan bimapus. Igaw anatut tadiendumwals beikits vayuwein mo maysan bukusan.”

Tamwey inasagal

(Matiw 22:1-10)

¹⁵ Nisinis sagal waseg, son teitan iligen, mo idibek Yeisuw, ilana, “Kukin kalisyi beikams Yowbad nakabkaleiwag wanuwan, singay bimwasaws tasiyas!”

¹⁶ Iw to Yeisuw, ilana: Tamwey teitan inasagal avakaen, bidawes gamag babaw bimeis.

¹⁷ Kan ikatineg ikous, mo idibakes natouwats, ilana, “Kukines tasiyas nadawes, kulansa, ‘Kumeis, tamwey bo ikatineg kaeimi, kumeis kukwams.’”

¹⁸ Tage asbabaw ipiyaves. Teitan ilana, “Bo agimwel pwepway kweitan, bo ban akin; adok awoum ban wasagal.”

¹⁹ Tayuwein ilana, “Bo agimwel bulumakaw sinawatan, vagan bibteilis plaw kweinim. Bo ban ayakwanes mwanay mwanay bibteilis; babiweis sinawatan mansiyas bulumakaw; adok awoum ban wasagal.”

²⁰ Tatounun ilana, “Bo avay soug gunakwaw. Ta-mawan baw.”

²¹ Natouwat iyum idibek natovek, ilana, “Bo ipiyaves, babaws.” Natovek iligen, ikavikun, idibek natouwat, ilana, “Nuwanaw kun ven babaw wasigeis kukines tasiyas tasimavs, toupams, toukwaws, takagayals, kudibakes bimeis ikams.”

²² Natouwat ikanow aygan, in ivag mawan, mo iyum, idibek natovek, ilana, “Bo adawes tasiyas nimeis beikams, tage gamag nag manan.”

²³ Iwage natovek, ilana, “Kun ked babaw wasigeis, kun-o wanawoud kubanes gamag, kwabutus bimeis, ikams. Kadiloka gunbunatum bikalawt.

²⁴ “Mounid adibakeim tasiyas wanamug nadawes nag beikams gunsagal.”

Amgwan bitamlavag Yeisuw navamul

²⁵⁻²⁶ Siney Yeisuw singay babaw gamag ibukunis. Itouvin, idibakes, ilana, “Kukin kal yak bukumlavag gunavamul, kadiloka kupiyev tamam, inam, mukwav, nitum, budam, nimut, o mwamovam tatoneim, mo bukumlavag gunavamul. Kukin gog nag, bo nag.

²⁷ “Kukin nag tatonen bikow anklos, mawana bibkunig, mtowen nag gunavamul.

²⁸ “Kal yak bukuwlul bunatum bunaveiyov, adok wanamug bukusin, kunuw maysan, kadilokeim? o nag?

²⁹⁻³⁰ “Kukin nag bukunuw maysan, adok kwaitivtow kakol, bo misinak. Peinan mumoney bo ikous. Tasiyas bikines mo bisibaweims, bilansa, ‘Taw towen biwlulay nabunatum, tage ta-mawan biyakous.’

³¹ “E, kuninuways guyaw teitan siney natakanaviy bikanaviys wasigeis tayuwein guyaw siney natakanaviys; adok wanamug bisin binuway, nanon bilana, ‘Guyaw towen natakanaviys sinawey tawsan, o yeystakanaviys sinawatan tawsan; adok kadilokeig batagagay wasigeis? o nag?’

³² “Kukin nanon adok nag kadilok, o tayuwein guyaw siney natakanaviy nimimeis kadiveiyov, adok mo bikayeb nagamag mwasanin bikines guyaw towen bilivans vagan bibwabwes kanavy.

³³ “E, kadiloka kupiyaves mivavag babaw mo bukumlavags gunavamul. Kukin gog nag, bo nag.

Sol sabal-nen

(Matiw 5:13; Mak 9:50)

³⁴⁻³⁵ “Sol magat yayan, bwanabwein. Kukin gog nag, ta-mawan bisabal. Sol towen kalbaleb nag bileb bag; nag ivag nawotet. Deisa talev. Yakamiy tigamiy sam bweina kuliganes.”

15

Kabebay sip

(Matiw 18:12-14)

¹ Bo ikatuyouns waseg Yeisuw tasiyas kalbaleb takaweins takis sisiyas takalbalebsa babaw, sivines kid biliganes aygan.

² Tasiyas Palisiy sisiy takatimlakeins kaleiwag ikines, ivtokes livan, ilansa, “Taw towen sivinan takalbalebs, ikamkwams siney. Bo igak!”

³⁻⁴ Yeisuw ikakin-wan asilivan, ikabebay mamagina: “Tab teitan yakoum aleim sip lakatutan, naan bikanig wanawoud, bukulana, ‘Bweina bikanig?’ Adok nag. Adok bukulisawes asibabaw bisesus, bukunineiv ee... mo bukuban.

⁵⁻⁶ “Kuban, adok beimwan woum, bukukow kumey waven; e, bukuwak, kunukwes adok talawom, ‘Aleig nikanig bo aban, kumeis bitamwasaws babaw yakids.’

⁷ “Kuninuways gamag kalisiy toubweins nisesus nag aveiyag asisinap kalbaleb vagan bilavewas, o min-libalab imwasaws pines tasiyas; tage kokin takalbaleb anmwanet bilavew ansinap, min-libalab singaya bimwasaws, peinan ilavew ansinap kalbaleb.”

Kabebay vin inaveigun

⁸ O peinan asilivan nilansa, “Taw towen sivinan takalbalebs,” Yeisuw sivyuein mo ikabebay, ilana, “Tabta naan vin nises, inaveigun sinawatan, kweitan bikanig, bilivan,

‘Bweina bikanig?’ Adok nag. Adok bikow nawodam, inataneiv, bitanev nabunatum, binineiv ee... mo biban.

⁹ “Biban, adok mo bidawes taliven bilana, ‘Kumeis tamwasaws, peinan gunaveigun nikanig bo aban.’

¹⁰ “Gamag bo mawan, kukin teitan gamag bilavew ansinap kalbaleb, Yowbad siney natakayobs walbalab mo bimwasaws singay.”

Kabebay taman son digumasus

¹¹ Sivtounun Yeisuw ikabebay, ilana, “Tamwey teitan nitun tawaw asteiy.

¹² “Digumasus idibek taman ilana, ‘Tamag, igaw bukuwanig gunkiyay mo bakow; nagein kukwaleiwag aveiyag tuwag bikow, aveiyag yey, o yey tut towen bakow.’

“Taman itam, ikaluweg, isek digumasus inavavag.

¹³ “Yam akweiy ikous, digumasus mo iyamiyis inavavag, maysan ikow, ilisow naven, inoun in kadiveiyov nen; ansinap kalbaleb waseg mo igimwal youd babaw ee... mo iyakous inamoney.

¹⁴ “Ikous namoney, mo ilivet tut kalbaleb ven towen waseg, kweis nag, kan nag, ikamet moun.

¹⁵⁻¹⁹ “Anamoun, inek tamwey teitan, ilana, ‘Tabta muwotet nises, yey bawtel, mamagina mutouwat yey?’ Tamwey towen itam, ilana, ‘Bwein, bwaloud aleig nisesus waven, kumtakavates aleig.’

Inoun, iwwotet ee... bo ivag anamoun, peinan nag kal bisek kan beikam. Singay anamoun, sivinan kid bwaloud kaeis beikam; mo idumwal nanon, ilana, ‘O takabalawein yey! Tamag wanven natouwat kaeis babaw, yey gog nag; kakita bakanig agumoun. Adok batamanaw banoun banek tamag balana: Tamag, agusinap kalbaleb, waseg Yowbad, o waseg yak. Adok bukupiyaveig natum yey, ne? Tabta bawtel muwotet, mamagina mutouwat yey?’

²⁰ “E, mo itamanaw inoun ee... kakita bisap waven, taman ikin, ikalin nuwan, isawl, in iwliboub wawon, ivvalams son.

²¹ “Ivvälams ikous, digumasus ilana, ‘Tamag, agusinap kalbaleb, waseg Yowbad o waseg yak, adok bukupiyaveig natum yey.’

²²⁻²⁴ “Tage taman nag iligen, deisa idibakes natouwats, ilana, ‘Kusawls, kweim maynamnabwein kukawes kumeyes, natug bisikam, ring kumeyes bisen wanaman, sandol kumeyes bivalige wakaken. E, kuyousis manawen bulumakaw natun ankaytub avakaen, kuweysi, takams tamwasaws, peinan natug neimat, nag gog bo imov; natug bo ikanig, nag gog bo aban.’ Mapuna isagals, imwasaws.

²⁵ “Tage kunutaw igaw wabag nises. Ikous nawotet im waven. Kadilakusan ven ikatiluteg kup waseg ikannuwels, isilasals.

²⁶ “Idow taman natouwat teitan, inek, ikatugan waseg, ilana, ‘Aveiyag silmanin imwasaws?’

²⁷ “Gwad towen ilana, ‘Peinan bwadam bo iyum neim, nises bwein, taman bo iyous alen namnabwein iwei.’

²⁸ “Kunutaw towen ikavikun, ipiyev sagal towen, isinal. Taman gog inek, igilagel, sivinan kid natun beitam.

²⁹⁻³⁰ “Nag gog, idibek taman, ilana, ‘Tut babaw akaninow aygam, nag kweitan tut asiplev amulivan, nag. Tage nag nañan aleig kakit bukusekeig bakasagal sigwey, nag. Natum gog towen muvavag babaw bo iyagey, isekes nakubukwabs naggeinawls wasigeis, ikous, iyum im, mo kuyous bulumakaw namnabwein kuweiy. Bo igak!’

³¹⁻³² “Taman gog ikatimop ayan, ilana, ‘Gwa, soug yak tasesun yam babaw. Aveiyag gunavavag yey, mawan muvavag yak, peinan natug yak. Awoum kwavikun. Kadiloka tamwasaws, peinan bwadam bo imat, nag gog bo imov, tadoki bo ikanig, nag gog bo tabanes bo imov.’”

Yeisuw ikabebay mawan, peinan asilivan, “Mtowen sivinan tasiyas takalbalebs.”

16

Tamwey natouwat kalbaleb

¹ Kabebay tasiyas ikous, kweitan isekes navamuls, ilana, “Guyaw teitan natouwat nawotet imtakavet navavag babaw. Gamag mwasanin ivtokays livan, idibakes natovek ilansa, ‘Mutouwat bo iyageg muvavag.’

² “Natovek mo idow, im, ikatigan, ilana, ‘Aveiyag silawun livaneim tasiyas illivans? Kuyamen gunabuk. Bo bakayabeim, peinan muwotet kalbaleb.’

³ “Mtownen iyum in vagan bikow inabuk; nanon ilana, ‘Gunawotet beikous, peinan guntovek bo bikayabeig. Aveiyag bavag? Nag atawtoun vagan babgubag. Tage nag banitoug kag; agumwasin.

⁴ “Bo akakin, kweitan sinap bavag. Bavag mawan mo guntovek bibob gunawotet, tage bisekeigs kag bakam.’

⁵ “E, mo ivag mawan. Idawes tasiyas nikawlavags waseg natovek, idibek teitan, ilana, ‘Kweivin mukwawlavag waseg guntovek?’

⁶ “Ilana, ‘Tagon, lakatutan botol.’ Iwage, ilana, ‘Mubuk towena. Nuwanaw kusin wakeb, kugulek lakatutan, kulel sinawanim.’ E, igulek towen, ilel gog sinawanim.

⁷ “Ikous, tayuwein im, idibek, ilana, ‘Kweivin mukwawlavag waseg guntovek?’ Ilana, ‘Wit, lakatutan gamwat.’ Iwage, ilana, ‘Mubuk towena; kugulek lakatutan, kulel go sinwanim sinwatoun.’ Mo igulek mo ilel mawan. Imimeis, tatanok tatanok idibakes mawan. Igulekxes, ileles mamagina iseibwis sikawlavag.

⁸ “Ikous, mo natovek iligen livanen mtownen tasilponay, waseg niseib sikawlavag gamag babaw. Tage natovek bo ikaves natouwat towen, ilana, ‘Singay ansinap tawtoun.’” Yeisuw ilana, “Tut towen ven watinow gimgilis bo imugwas, peinan asisinap tawtoun. Yowbad nagamag asisinap igwey.

⁹ “Ven watinow wuliyougwan kalbaleb. Miwliyoug waseg, kadiloka kukwaveiyons simiyas wasigeis. Wankuyeim, beikous miwliyoug mo bukubanes miven walbalab, bukusesus kusigagas.

Toukum

¹⁰ “Kukin kal bitoukum wotet kakit waseg, mawan avakaen waseg bitoukum. Kukin kal bisilponay wotet kakit waseg, mawan avakaen waseg bisilponay.

¹¹ “Ven watinow wuliyougwan kalbaleb. Kukin nag bukutoukum waseg mivavag ven watinow adok Yowbad nag bisekeim libalab wuliyougwan.

¹² “Kukin nag bukutoukum waseg soum navavag adok Yowbad nag bisekeim muvavag tatoneim.

¹³ “Nag kadilok gamag bikanow ages natovek asteiy, peinan bikamliw teitan, bisiwyoub tayuwein; o adok bitoukum teitan silmanin, bipiyev tayuwein. Ta-mawan bitaninuway Yowbad anilivan son ven watinow wuliyougwan.”

Palisiy asisinap

¹⁴ Tasiyas Palisiy sivines simoney bikatimweisib bibabaw, iliganes Yeisuw anilivan towen, isibawes.

¹⁵ Tage Yeisuw idibakes, ilana, “Peinan kuvages amisinap ankakin beibwein wamtes gamag, tage Yowbad ikakin ninoumiy kalbaleb. Youd tasiyas sivinamiy mawana babaw gamag sivines, tage Yowbad ikasigum youd tasiyas.

Moses nakaleiwag

¹⁶ “Moses nakaleiwag kweiboug nises, o tasiyas palopit sigeiguy nileles nises Bukitab wanuwan. Kaleiwag towen ises ee... mo Yon isap, wankuyeim mo kageiguy livanen Yowbad nakaleiwag bwanabwein, o gamag babaw itawtouns, sivines beisiws waseg.

¹⁷ “Tage Moses nakaleiwag nag beikous, nag. Kukin libalab son ven watinow biyakous mo beikous kaleiwag siyas kakit, Moses nakaleiwag wanuwan.

Kanavay mav

18 “Kukin kal bipiyev nakwav mo beivay son nayuwein vin bo igeinawl, ikanavay mav. O nakwav nipiyev mo beivay son tayuwein taw, taw towen bo ikanavay mav.

Guyaw son Ləsal ikanigs asteiy

19 “Teitan taw bo iguyaw avakaein, anakweim maynamnabwein, o kan bwanabwein ikamkwam yam katanok katanok.

20-21 “Tage tasimav teitan yagan Ləsal nimmasis guyaw wanakoukwed wadadan, won meivek sasok-wan. Mtowen tasimav sivinan beikam kan musamusun nikambweg guyaw nateibol waseg; o mansiyas awuk inekes ikanmwasis ansasok.

22-23 “Mtowen tasimav ikanig, min-libalab mo ikawes inawes vagan bimwəsaw Ebelam wanven waseg. Guyaw-vak ikanig, idibwanis, in wəTum, igidaged kov waseg, imdamed won, itamnow matan, ikin Ebelam kadiveiyov son Ləsal, imwəsaws.

24 “Iwak, ilana, ‘Tama, Ebelam, binok nuwam yey. Kwayeb Ləsal, bein isow didin wayvagam, beim, isen wamayeig, biyonom. Peinan woug singay asimkwen məwana kov towen nigidaged.’

25 “Iw to Ebelam, ilana, ‘Gwa, adok kunuw ven watinow nukumov, nukumwəsaw avakaein, tage Ləsal əban igege. Tut gog towen Ləsal immwəsaw, tage yak igidaged woum.

26 “‘O kweitan youd kukin. Yakamey palatan, yakamiy palatan, o awasas avakaein wanuwein. Ta-məwan bakakanapel bakaw; o nag bukwanpeles bukumeis.’

27-28 “Mtowen guyaw mo igilagel, ilana, ‘Tama, tab kadilok bukwayeb Ləsal bein tamag wanbunatum bikines budag asteinim, bidibakes, bilana, ‘Kuvnəseimiy. Mata ge bukumeis ven towen kalbaleb.’”

29 “Iw to Ebelam, ilana, ‘Moses siney siyas palopits asilivan nises. Kadiloka biliganes livan towen.’

30 “Ilana, ‘Nag biliganes tasiyas. Tage kukin takanig teitan beiyum binekes bilivan wasigeis, mo bipiyaves asisinap kalbaleb.’

31 “Iwage Ebelam, ilana, ‘Kukin nag biliganes Moses siney palopits asilivan, mo takanig teitan beikit binekes, nag gog bisimounids anilivan waseg.’”

17

Katsilakay silmanin sinap kalbaleb

(Matiw 18:6-7; Mak 9:42)

1 Wankuyeim mo idibakes navamuls, ilana, “Mounid gamag mwasanin biyakwanes sisiyas bikatsilakes silmanin asisinap kalbaleb, tage tasiyas takatsilakays mo bilivatus kalbaleb.

2 “Kadiloka dakul avakaein biyawonis takatsilakay wakayon bilaves bein wabwanit; mata ge bikatsilek gwad kakit məwana gwad towen, vəgan kid beivag ansinap kalbaleb.

Kuwid bwadam ansinap kalbaleb

(Matiw 18:21-22)

3 “Kuvnəseimiy. Kukin bwadam biyagageim, kwamtilek ansinap kalbaleb bikakin. Kukin bikanavin nanon, mo kuwid ansinap, kunumlev.

4 “Kukin katanok yam waseg sivənim sivay biyagageim mo sivənim sivay bigilagel, bilana, ‘Kuwid agusinap towen’; e, kadiloka kuwid.”

Simounid

5 Gamag tasiyas takaweins anilivan mo idibakes siguyaw, ilansa, “Kulabem vəgan bakasimounid beibwein.”

6 Iw to Yeisuw, ilana, “Kukin bukusimounids məwan tipoul kaytul-nen, mo bukudibakes kay makaywen bukulansa, ‘Kugut gidawəlim, mo kunoun kun kutow wabwanit,’ e, mo bikanaway agamiiy.

Bo misinak nilivan nitavag, bo deis

7-8 “Takinew mutouwat biwaway wəbag, o takinew bimtakavet mansiyas aleim wanawoud, ikous mo beiyum beim waven, adok nag bukulana, ‘Nuwanaw kum, kukwam.’

Nag. Peinan adok bukulana, ‘Kupayiw kukwaliveinun kag, kusekeig; bakanbamoum, ikous; mo kukwam, kumoum wankuyeim.’

⁹ “Mutouwat towen bikanaway aygam, adok nag bukulana, ‘Kalin nuwag avakaein yakoum.’ Nag.

¹⁰ “Yakamiy mawan, bukuyakousis Yowbad nawotet nilivan, mo bukulansa, ‘Yakids nag natouwats bwein yakids. Bo misinak nilivan nitivag, bo deis.’”

Toulepel sinawatan

¹¹ Inounas, bineis kid Yelusalem, inoyes ked makadewen Samaliy palatan, Galiliy palatan.

¹²⁻¹³ Isap ven kweitan waseg, iwekey toulepel sinawatan, itowas, iwaks, ilansa, “Tamwey, Yeisuw, tabta binok nuwam yakamey?”

¹⁴ Yeisuw ikines, ilana, “Kunounas kuneis; siyas tanuwgwes lun bikineimiy.” Inounas binekes kid tanuwgwes lun, inounas waqed mo ibweins.

¹⁵⁻¹⁶ Teitan ikin kaleivin bo ibwein, itouvin, aygan avakaein iyakawn Yowbad waseg, iyum inek Yeisuw, ikalivatouw kantukov wamatana, ilana, “Kalin nuwag yakoum avakaein.” Mtowen gum-Samaliy.

¹⁷⁻¹⁸ Iw to Yeisuw ilana, “Adok sinawatan yakamiy nukubweins, avanuy tasiyas teinim teivas? Tabta beiyum bimeis bikavasis Yowbad, peinan ibweins? o misinaka tobwag ven gimgeilin towen?”

¹⁹ Mo idibek mtowen ilana, “Kutamanaw, kunoun. Nukusimounid waseg yey, mapuna bo kubwein.”

Yowbad nakaleiwag asinavin bisap

(Matiw 24:23-28, 37-41)

²⁰⁻²¹ Palisiy mwasanin inekes, ikatiganes, ilansa, “Asinavin Yowbad nakaleiwag bisilamaw?”

Iwage Yeisuw, ilana, “Nag bitakin kweitan mulin naman Yowbad mo bitakakin nakaleiwag isilamaw, nag. O gamag nag bilivans, bilansa, ‘Kukines ane’ o ‘Towen-one’; nag. Peinan Yowbad nakaleiwag wanuwamiy nises.”

²² Mo idibakes navamul, ilana, “Igaw tut wanakoug, beivag sivinamiy bukukines Gimgilitoun yey gunakaleiwag kweitan yam waseg, tage nag bukukines.

²³ “Gamag mwasanin bidibakeimiy, bilansa, ‘Kukin-one’ o ‘Ane.’ Tage awoum kuneis kukines; awoum kukikuns tasiyas; awoum.

²⁴ “Peinan yam towen bayum bam bukukineigs mawana kavikawn bimteil libalab palatadadan palatadadan.

²⁵ “Youd towen wanakougwaw, tage wanamug abag bigeg o peinan tut towen gimgilis bo bipiyaveigs.

²⁶ “Gimgilitoun yey. Igaw bayum bam mo gamag mwasanin bilivatus kalbaleb, mawan kweiboug, inatut Now waseg, Gimgilitoun yey gunatut bo mawan.

²⁷ “Peinan Now inatut waseg ikamkwams, imwamoums, iveivays, itames nitsiyas silmanin beivays. Mawan ee... kweitan yam mo Now isiw in wanawag wanawan, mo ikweis avakaein, imukul ven, iwgweles gamag ikous. ²⁸⁻²⁹ “Lot-vak inatut mawan, ikamkwams, imwamoums, iyyamayis siwliyoug, isipusops sibag, iwlulays sibunatum. Tage yam towen Lot ilisow Sodom mo kov son dikudakul muyamuy ikalkalouw mawan kweis, ikatimates gamag babaw iyakous.

³⁰ “Bo mawan yam wanakoug waseg Gimgilitoun yey basap vayuwein ven watinow.

³¹ “Kukin kal biyeiwas wanpwasiw awoum beisiw vayuwein wanbunatum vagan bikow nawliyoug; awoum. O towen-vak wabag awoum beiyum bein waven.

³² “Kuninuways Lot inakwaw.

³³ “Kukin sivinamiy bukwatinabweimiy mo mwamovamiy biyamkwaneimiy tage kukin biyamkwaneimiy mwamovamiy mo bukubanes.

³⁴ “Adibakeimiy kukin bayum bam boug waseg, asteiy tawaw bimasis keb katanok waseg, teitan bakow; tayuwein bisiw.

³⁵ “Vinay nay biwotets wit bikanimimayes, nañan bakow; nayuwein bisiw.” ³⁶ (-)

³⁷ Iweis tasiyas, ilana, “Tamwey, avanuy?”

Yeisuw idibakes, ilana, “Am-palawen takanig immasis mo bikatuyouns bimeis man-siyas bunibwan.”

18

Nakwab son takaleiwag

¹ Kweitan kabebay Yeisuw isekes vagan bisimkakins sinitoug waseg Yowbad. Mata ge beigweys.

² Ilana, “Ven kweitan takaleiwag ansinap kalbaleb. Nag igoul Yowbad, o nag ivnases gamags.

³ “Nakwab ven townen yam katanok katanok ininek mtownen takaleiwag, ilana, ‘Kumop ansinap gamag townen niyagegeig.’

⁴⁻⁵ “Mtownen takaleiwag yam babaw nag iligen, ee... imwemway nen, mo ikawegweis won; nanon ilana, ‘Yey nag agoul Yowbad o nag avnases gamags, tage bo ikawegweis woug, nakwab manawen yam katanok katanok imimeim, mapuna bo bamop ansinap gamag townen niyageg, vagan beikous gunamouvit waseg manawen vin. Kukin gog nag, adok bimimeim ee... bo bibilek woug!’”

⁶⁻⁸ Ikous ankabebay townen, mo Yeisuw idibakes, ilana, “Kuninuways anilivan takaleiwag townen kalbaleb. Mawan Yowbad bimop asisinap tasiyas iyagages inagamag, peinan igilagels waseg Yowbad iboug ee... iyam. Nag bikabiyun, nag. Bo bimop asisinap kalbaleb. Tage kweitan tut bam Gimilitoun yey, tabta babanes mwasanin tasiyas tasimounids ven watinow?”

Palisiy son takawein takis

⁹ Gamag mwasinis idokes tatineis ididumwals o ikasigumis sisiyas. Mapuna Yeisuw idibakes kabebay townen, ilana,

¹⁰ “Tawaw asteiy ikatulags ineis Yowbad wanbunatun bunavakaein, silmanin nitoug. Teitan Palisiy, tayuwein takawein takis.

¹¹⁻¹² “Palisiy anmwānet itamanaw, initoug mamagina, ‘O Yowbad, kalin nuwag yakoum, peinan yey nag mawana gamag babaw, takalbalebs tasiyas, takwekways tasiyas, tasilakods tasiyas, tassubwans tasiyas; o yey nag mawana takawein takis towena. Wik katanok katanok apos akweiy yam vagan batapwāloul beibwein. O gunwuliyoug babaw alog sinawatan, kalgutan asekeim yak.’

¹³ “Tage townen takawein takis itamanaw itow kadiveiyov, ikulul; nag itamnow matan bikin libālab. Deisa iaway vitakon, igege nanon, ilana, ‘O Yowbad, binok nuwam takalbaleb yey!’

¹⁴ “Initoug ikous, iyum in wanven; mounid Yowbad idok taw townen tadidumwal, tage son mtownen Palisiy nag. Peinan kukin kal sivinan bimliguyaw mo beibus bein watinow, tage kukin kal biseib tatonen igaw mo biguyaw.”

Yeisuw sivinan gamagal

(Matiw 19:13-15; Mak 10:13-16)

¹⁵ Vinay bimeyes-vak nitsiyas vagan Yeisuw bikabkwen wous. Navamul ikines bo isilbwades kid.

¹⁶ Tage Yeisuw idawes bimeis, ilana, “Bweina gamagal bimeis waseg yey. Awoum kusilbwades. Yowbad nakaleiwag waseg, asibabaw mawana tasiyas gamagal.”

¹⁷ “Mounid adibakeimiy kukin bukumlavags mawana gamagal yakamiy, bukutams waseg Yowbad nakaleiwag mo bukusiws waseg. Kukin gog nag, bo nag.”

Takaleiwag inek Yeisuw

(Matiw 19:16-30; Mak 10:17-31)

¹⁸ Takaleiwag teitan ikatigan Yeisuw, ilana, “Takatimlakay bwanabwein yak. Aveiyag bavag vagan mwamovag nag beikous?”

¹⁹⁻²⁰ Yeisuw idibek, ilana, “Aveiyag wawun kudokeig toubwein ye? Toubwein anmwanet, mtownen Yowbad. Adok kukwakin Yowbad nakaleiwag, ‘Awoum kusubwan; awoum kuweiy gamag; awoum kuveinaw; awoum kuyaweid, teitan gamag livanen; kuvnases tamam, inam.’”

²¹ Iwage mtownen, ilana, “Igaw-o wagwadig asilamaw avvag youd tasiyas, o nagein igawa avvalut waseg.”

²² Yeisuw iligen, mo idibek, ilana, “Kweitan sinap ikabwag waseg yak. Kuvgen muwliyoug babaw kuyakous, kusekes tasiyas tasimavs; awoum bimapus. Maysan igaw mo bukukow walbalab. E, kuvgen kuyakous, mo tasimav yak, kum kubkunig ye.”

²³ Iligen livan towen, ipiyev; singay igege nanon, peinan nawliyoug babaw, ikayus.

²⁴ Yeisuw ikikin taw towen, ilana, “Singay keikay beisiws Yowbad inakaleiwag, tasiyas sivavag babaw.

²⁵ “Manawen kamel beisiw wakunun vas, wotet towen gagab, tage keikay tasiyas sivavag babaw beisiws Yowbad nakaleiwag wanawan.”

²⁶ Iliganes tasiyas, ilivans, ilansa, “Tage kalisiy beisiws?”

²⁷ Iw to Yeisuw, ilana, “Gamag nag kadilokes wotet babaw, Yowbad anmwanet kadilok.”

²⁸ Pita ikatugan, ilana, “Tage yakamey, bo nakalisow maven nakabkunim yak, aveiyag bakalivet?”

²⁹⁻³⁰ Iw to Yeisuw, ilana, “Mounid adibakeimiy kukin kal bilisow naven o nakwao budan o taman o inan o nitun vagan bikanow Yowbad nakaleiwag, mo biban youd tasiyas, bikatimweis bibabaw ven watinow; ikous mo mwamovan biban, nag beikous.”

Bo beiweiys Gimilitoun Yeisuw

(*Matiw 20:17-19; Mak 10:32-34*)

³¹ Navamul sinwatan asteiy tasiyas-wan idibakes, ilana, “Bo bitakatulags taneis Yelusalem, mo bikamat youd babaw tasiyas palopit kweiboug nilivnakes o nileles nises Bukitab waseg.”

³²⁻³³ “Bo ilivnakes livanen Gimilitoun, teitan bisilkod, vagan ven tobwag gimgilis biyousis, bisibawes, biyagages, bigusus, biwaweiyas waseg vatul, bikatimates; yam kweitoun mo beikit vayuwein.”

³⁴ Navamul nag ikakins youd tasiyas; mamagina bo isowm wasigeis. Nag ikakins silawun anilivan.

Toukwaw ivag ibwein

(*Matiw 20:29-34; Mak 10:46-52*)

³⁵⁻³⁶ Inoun ee... kakita bisap Yelikow, toukwaw teitan nissin wadadan ked, ininitoug money wasigeis tasiyas inounas waked; iligen butus babaw gamag inounas, ilana, “Aveiyag?”

³⁷ Idibakes, ilansa, “Gum-Nasalet towen Yeisuw bo neim-ay bo bein.”

³⁸ Iwak, ilana, “Yeisuw, Deibid delen yakoum, binok nuwam ye!”

³⁹ Tasiyas nimugwas Yeisuw waseg, ikanes toukwaw towen, ilansa, “Kukwapay!” Tage singaya iwak ilana, “Yeisuw, Deibid delen yakoum, binok nuwam ye!”

⁴⁰⁻⁴¹ Yeisuw iligen, itoun ilana, “Kumeyes taw towen.” Imeyes, isineikim; Yeisuw ikatigan; ilana, “Aveiyag sivinam bavag peinam?”

Ilana, “Tamwey kuvag matag beidal, bakin.”

⁴² Iw to Yeisuw, ilana, “Bo ilal matam. Nukusimounid waseg ye, mapuna bo kubwein.”

⁴³ Nuwanaw matan ilal, ikin-wan; ikikun Yeisuw, iyyakawn waseg Yowbad. Gamag babaw bo ikines, bo ikavasis Yowbad.

- ¹ Isap Yelikow, ikatidumwal wavytakon ven, in.
- ² Ven towen waseg taw yagan Sakiyus, takaweins t̄akis sitovek, nawliyoug singay babaw.
- ³ Mtowen Sakiyus sivinan bikin kal mtowen Yeisuw. Ta-mawan. Gamag singay babaw, o towen Sakiyus takayakus.
- ⁴ Mapuna isawl in wanakoug, imwen kay kaytan yagan sikamol vagan bikin Yeisuw, peinan beinoy beim ked towen waseg.
- ⁵ Yeisuw im, itoun, itamnow matan, iban Sakiyus, idibek, ilana, “Sakiyus, nuwanaw kubus kum, sivinag bamasis wambunatum nagein.”
- ⁶ Nuwanaw mo ibus, itam peinan bo anbwabwal towen; imwāsaw silmānin.
- ⁷ Tasiyas gog nikines, ivtokays livan, ilansa, “Yeisuw bo inek mtowen takalbaleb wanbunatum.”
- ⁸ Tage Sakiyus idibek Yeisuw, ilana, “Guyaw, bo baliv gunwuliyoug, mwasanin basekes tasiyas tasimavs, mwasanin yey. O magat kweiboug basilponay gamags siwliyoug bakwēy, bo bayamen mo bakatinweis sivatoun, mamagina bo bimlavag sivavas basekes.”
- ⁹⁻¹⁰ Iw to Yeisuw, ilana, “Nagein Yowbad bo ikatinob bunatum towen, peinan taw towen Ebelam delen. Peinan Gimlilitoun yey gunawotet vagan banineiv takalbalebs, tasiyas mamagina sip bo nilasisulis ked, mo bakatinabwes.”

Mwasanin iwotets waseg sitovek namoney

(Matiw 25:14-30)

- ¹¹ Iliganes anilivan towen, mo ankabebay isekes. Silawun kabebay peinan kakita bisap Yelusalem; o tasiyas gog idokes nuwanaw mo bikines Yowbad nakaleiwag. Tage ikakina nag nuwanaw Yowbad bisilamaw nakaleiwag.
- ¹² Mapuna ikabebay, ilana, “Tamwey teitan in kadiveiyov ven vagan bimlavag takaleiwag avakaein, mo beiyum beim.
- ¹³ “Kakita binoun, idawes natouwats sinawatan, isekes simoney, sinawatan sinawatan, ilana, ‘Mimoney towen mamagina biwotet. Kuymiyises miwliyoug kweitan magin, kweitan magin, mamagina stow waseg gamag bigimwals, vagan mimoney mo kwatimweisis bibabaw. Kuvvages mawan ee... mo bayum bam.’

¹⁴ “Tage nagamag bo ikamliwes, ikayabes gamag mwasanin wankuyeim, asilivan mamagina, ‘Kapiyev taw towen. Awoum bikaleiwag wasigeis yakamey.’

¹⁵ “Ilivans, bo nag. Taw towen imlavag takaleiwag avakaein. Iyum, in wanven, mo idawes natouwat bimeis, vagan bikin isimoney akweivin ikatimweisis.

¹⁶ “Teitan inek, ilana, ‘Guyaw, money nukusekeig sinawatan bo akatimweis imlavag lakatutan sinawatan.’

¹⁷ “Iwage natovek, ilana, ‘Bwanabwein! Bo kutoukum yak. Peinan nukutoukum waseg wotet kakit bo basekeim mukwaleiwag waseg sinawatan ven.’

¹⁸ “Tayuwein inek, ilana, ‘Guyaw, money nukusekeig sinawatan bo akatimweis imlavag sinawanim sinawatan.’

¹⁹ “Iwage natovek, ilana, ‘Yakoum-vak basekeim mukwaleiwag waseg kweinim ven.’

²⁰⁻²¹ “Tatounun inek ilana, ‘Guyaw, mumoney towena. Bo asumweil asen, peinan bo aweneim, tayakeikay yak, peinan kuninineiv simwey sivavag bukukwēy.’

²²⁻²³ “Iwage ilana, ‘Guntouwat kalbaleb yak. Amlivan toneim waseg bakatimlakeim amsinap kalbaleb. Kukwakin tayakeikay yey; aninineiv sigwey sivavag, akwekway. Aveiyag wawun nag kusen gunamoney wanuwan benk vagan bayum bam mo bakow son intalest-nen bikatimweis bibabaw.’

²⁴ “Mo idibakes tasiyas nitowas wadadan, ilana, ‘Kukow inamoney, kusek mtowen namoney lakatutan.’

²⁵ “Ikatimapus siguyaw aygan, ilansa, ‘Towen namoney babaw, lakatutan.’

²⁶ “Mounid gog adibakeimi, kukin kalisiy sivavag, bikatimweisis bibabaw; tage kukin kal navavag nag, bo bikwayes aveiyag idok nises, mo bimlavag tasimav tatonen.

²⁷ “Tasiyas gog nikamliweigs o niipyaves gunakaleiwag, kumeyes kuweiys wamatag.”

*Yeisuw isap Yelusalem waseg**(Matiw 21:1-11; Mak 11:1-11; Yon 12:12-19)*

²⁸ Ilian ikous, imug, ikatulag, in silmanin Yelusalem.

²⁹⁻³⁰ Inoun ee... koy yagan Oliv, kakita mo bisap ven Betipeig son Betaniy, mo ikayabes navamul asteiy, bineis waven, ilana, “Kuneis waven palatan nises, kusaps ven towen mo bukubanes donkiy mwanatan, kayon niyawanis vatul; igaw naptabod, nag ikakin gamag bisinis watapwan. E, bukubanes donkiy manawen, kulikus, kumeyes.

³¹ “Kukin kal bikatiganeimiy, bilana, ‘Aveiyag wawun kulikus?’ mo kwatimapus aygan, kulansa, ‘Peinan tanuwagan sivinan.’”

³² Tasiyas nikayabes nineis, ibanes donkiy mawan nilivnek.

³³ Bilikus donkiy manawen, natuwavek ikatiganes, ilansa, “Aveiyag wawun kulikus alem manawen?”

³⁴ Iweis tasiyas, ilansa, “Tanuwagan sivinan.”

³⁵ Ilikus, inawes Yeisuw waseg, iyaves asikweim watapwan; Yeisuw isin.

³⁶ Mwasanin iyeves asikweim waked, Yeisuw mo inoun.

³⁷⁻³⁸ Kakita biwllobus koy towen Oliv, inavamul asibabaw bo imwasaws, ikavasis Yowbad, peinan bo ikines nawotet tawtoun. Ages avakaein ilansa, “Kalin nuwem Guyaw yakkoum; nukum,

Yowbad yagan waseg.
Niwal son kamnat
avakaein, wanakaew, walbalab.”

³⁹ Palisiy mwasanin wanuwan babaw gamag mo idibakes Yeisuw, ilansa, “Takatimlakay yak. Kusilbwed asilivan muvamul.”

⁴⁰ Iw to Yeisuw, ilana, “Magat tasiyas bikapays, mo dakul siyas biwkuwaks.”

Ven Yelusalem igaw mo bigulekxes

⁴¹⁻⁴² Kakita bisap Yelusalem, ikin wunovek, ivalam peinan, ilana, “Magat nagein bukukwakins miked silmanin niwal. Tage bo isowm; mata ge bukukines.

⁴³⁻⁴⁴ “Peinan igaw kweitan tut abamiy bigeg singay. Tasiyas ikamliweimiy bituyes pwepway bimlavag koy watoulan miven, o bidiliwunis watibwelon miven, vagan bikalituanis boul biweis, biwaweimiy, bilaveimiy bukuneis wapwepway, simiyas nitimiwas; mibunatum bigulekxes beikous. Nag kweitan dakul bisesun wakaban. E, binuwakeimiy mawan, peinan Yowbad bo ilakwaneimiy; nag gog, nag kuwtusis, nag kukwakins.”

*Ikayabes tasiyas wanuwan Yowbad nabunatum**(Matiw 21:12-17; Mak 11:15-19; Yon 2:13-22)*

⁴⁵⁻⁴⁶ Mo isiw in wanuwan Yowbad nabunatum ikikayabes tasiyas taggimwals, idibakes, ilana,

“Yowbad anilivan mamagina: Gunbunatum
silmanin nitoug, tage nukuvages kid buntuman veinaw.”

⁴⁷⁻⁴⁸ Yam katanok katanok ikatimlakay Yowbad wanbunatum. Tanuwgwas lun sisiwas takatimlakeins kaleiwag, sisiwas tammwayas Yudiy sivines kid beiweiys Yeisuw. Tamawan binuwakes beiweiys, peinan gamag babaw sivines anilivan.

*Yeisuw nakaleiwag**(Matiw 21:23-27; Mak 11:27-33)*

¹ Yam kweitan Yeisuw ikatimlakes gamag Yowbad wanbunatum, o igeiguy livan bwanabwein, mo inekes Yeisuw tasiyas tanuwgwas lun sisiwas takatimlakeins kaleiwag, sisiwas tasiyas tammwayas.

² Inekes Yeisuw, ilansa, “Aw-kaleiwag waseg kuwotet mawan? o kal isekeim mukwaleiwag towen?”

³⁻⁴ Iw to Yeisuw, ilana, “Kweitan youd bakatugan wasigeis yakamiy. Kudibakeigs. Yon inakaleiwag waseg nibaptayses gamags, Yowbad isek nakaleiwag? o nag? gamag mwasanin isekes nakaleiwag?”

⁵⁻⁶ Sisiyas illivans, ilansa, “Kukin bitalivans ‘Yowbad isek,’ mo bikatimop aygads bilana, ‘Aveiyag wawun kupiyaves?’ Tage kukin bitalivans, ‘Gamag isekes’ mo gamag biwaweids, peinan idokes Yon palopit teitan.”

⁷ Mapuna ikatimapus Yeisuw anilivan, ilansa, “Yakamey nag kakakin kal isek Yon nakaleiwag.”

⁸ Iw to Yeisuw, ilana, “Yey-vak nag badibakeimiy kal nisekeig gunakaleiwag silmanin wotet towen.”

Tawteleins tamwey inabag.

(Matiw 21:33-46; Mak 12:1-12)

⁹ Mo isekes nakabebay towen, ilana, “Teitan tamwey isop bigulen gleip, isekes gamag mwasanin siwotet vagan bimtakavates, mo inoun in kweitan ven, isik tut kadiveiyov.

¹⁰ “Tutan gleip bimwanoug ikayeb natouwat bikow bag anagin, bimey, mo beikam, tage tamtakavateins bag bo kayuses anagin, iwaweiys tamwey natouwat towen ikous, mo ikayabes. Makava inoun, iyum.

¹¹ “Wankuyeim tamwey ikayeb tayuwein natouwat, iwaweiys-vak mtownen, iyagages, ivag anmwasin seikwan. Ikous mo ikayabes. Makava iyum.

¹² “Wankuyeim tamwey ikayeb tatounun, ibasis mtownen sikayal waseg, ikines bwayan kayal wawon, mo ilaves in watoulan ven.

¹³ “Tunuwagan bag nag ikakin seik amawan bikek, mo ilana, ‘O, bo bakayeb natug bwanabwein; tasiyas bigoulus, bisekes anagin bimey.’

¹⁴ “Inoun in natun, kakita binekes, tamtakavateins bag iwtusis, ilansa, ‘Natun mtownen. Tamwey bikanig mo nakiyay bikow, bag towen. Bo bitaweiys mo takawes dakiyays yakids.’

¹⁵ “E, ituts, iwekes, iyousis, inawes watoulan bag ikatimates. Tunuwagan bag igaw mo beim, aveiyag binuwakes tasiyas?

¹⁶ “Adok beim biwaweiys biyakous gamag tasiyas, mo binineiv gamag mwasanin, bisekes siwotet bimtakavates inabag.” Iliganes anilivan towen; ilansa, “Awoum.”

¹⁷ Tage Yeisuw ikikines tasiyas, ilana, “Silawun agulivan towen Bukitab waseg nileles mamagina:

‘Wululay towen tawteleins bunatum

nipyaves,

tage bo imlavag anmwamwan bunatum.’

¹⁸ “Wululay towen yey. Kukin kal bikalivatow wakunuwatan wululay towen mo bibilek won; tage wululay towen bikalouw wakunuwatan gamag mo bikanimimey.”

Sisal natakis

(Matiw 22:15-22; Mak 12:13-17)

¹⁹ Tut towen tasiyas takatimlakeins kaleiwag sisiyas tanuwgves lun sivines kid biyousis Yeisuw, peinan ikakins Yeisuw nakabebay silawun mamagina asisinap tatineis. Sivines kid biyousis Yeisuw. Ta-mawan, peinan iwenes gamag babaw.

²⁰ Deisa ikaymates Yeisuw, o ikayabes sitouwat mwasanin, askakin mamagina tasi-mounids tage tayyaweids; bikatiliganes Yeisuw anilivan vagan biliganes silawun yatal, waseg biyateles Yeisuw wamatatan takaleiwag avakaein, ven Yudiy waseg. Takaleiwag mo biligen yatal, bikaluweg.

²¹ Tasiyas inekes Yeisuw ilansa, “Takatimlakay yak, kakakin amlivan bwein o mukwatinakay bwein, o nag kuwenes gamag mwasanin o mukwatimlakay katanok-wan gamag babaw wasigeis. Peinan Yowbad inaked kwatimlakem mounid.

²² “E, tab kadilok bitapayin Sisal natakis? o nag?”

²³⁻²⁴ Tage Yeisuw ikakin asisinap, idibakes ilana, “Money dakul kusekeig kweitan, bakin.” Isekes mo ilana, “Kal kululuwan nileles? o kal yagan nileles waseg?”

Ilansa, "Sisal."

²⁵ Iwage Yeisuw, ilana, "Kadiloka Sisal navavag bitasekes Sisal; o Yowbad navavag bitasekes Yowbad."

²⁶ Peinan tasiyas iyokons; bo nag. Ta-mawan bibanes aveiyag kalbaleb Yeisuw bilivan wamtes gamag babaw vagan biyateles. Iliganes gog Yeisuw nakatumap, bo isom ninous, isesusa ikkapays.

Takanigs beikits vayuwein

(Matiw 22:23-33; Mak 12:18-27)

²⁷ Ikous asilivan tasiyas, mo Sadusiy mwasanin mo inekes. Gamag tasiyas Sadusiy idokes gamag yakids bitakanigs, nag bitakits vayuwein.

²⁸ Tasiyas ikatiganes Yeisuw, ilansa, "Takatimlakay yak. Moses nilel dakaleiwags vagan kukin kal taw bikanig, nakwav sam, tage natun nag, takanig bwadan o tuwan mo beivay son nakwab, mo bikop natun bimlavag takanig natun.

²⁹⁻³¹ "Taw teitan siney budan tenim tatanok, ivay son nakwab, ikanig, natun nag. Isiken ivay son nakwab, mo ikanig, natun nag. Isiken ivay son nakwab, ikanig, natun nag. Mawana mawana ee... tasiyas tenim teiy ivays sisiy vin manawen ikankanigs ikous, nitus nag.

³² "Ikous, mo vin ikanig.

³³ "Igaw beikits vayuwein, kal nakwab manawen? Peinan sikwev asibabaw."

³⁴⁻³⁶ Yeisuw ikatimop asilivan, ilana, "Ven watinow gimgilis nibokeimiy kuveivays, tage tasiyas Yowbad idok asisinap kadilok beikits vayuwein silmanin tut wanakoug, tasiyas gog nag iveivays o nag ibokes, nag. Ta-mawan bikanigs vayuwein, peinan imlavags min-libalab tasiyas. Peinan ikits vayuwein bo imlavags Yowbad nitun tasiyas.

³⁷⁻³⁸ "Takankanigs ikits vayuwein. Moses ikatimlakeids mawan. Bukitab bitavin kweiboug livenan Moses iligen Yowbad ayan wanuwan kaligweg makaywen nigidaged kov, peinan Moses idok Yowbad mamagina Ebelam naYowbad, Aysak naYowbad, Yekob naYowbad. Nag takanig tasiyas. Yowbad tamwamovs gamag siYowbad; nag takanig siYowbad. Yowbad waseg babaw tamwamovs."

³⁹ Iweis tasiyas takatimlakeins kaleiwag ilansa, "Mounid, takatimlakay yakoum amlivan bwein."

⁴⁰ Asilivan babaw ikatimop bwein, mapuna iwenes vayuwein bikatiganes.

Kelis Deibid tabun

(Matiw 22:41-46; Mak 12:35-37)

⁴¹ Yeisuw mo ikatiganes tasiyas, ilana, "Amawan gamag bidokes Kelis Deibid tabun?

⁴²⁻⁴³ "Deibid anilivan, nilel, nises buk yagan Sam waseg:

'DaGuyaws idibek gunguyaw, ilana:

Kusin wagunkatay vagan bavages tasiyas
astameiliw yak, mo bimlavags mamagina
mukwabtatet, bukuvnivans wakunuwtes.'

⁴⁴ "E, kulinuways Deibid idok Kelis inaguyaw. Kukin Kelis meinoy neim Deibid waseg, amawan bivkek bikativin bimlavag naguyaw?"

Yeisuw ikatiganes, ta-mawan bikatimapus anilivan.

Takatimlakeins kaleiwag asisinap kalbaleb

(Matiw 23:1-36; Mak 12:38-40; Luk 11:37-54)

⁴⁵⁻⁴⁶ Yeisuw mo iguyes tasiyas inavamul, o gamag babaw niliganes, ilana, "Kadiloka kupiyaves tasiyas takatimlakeins kaleiwag asisinap, sivines kid asikweim vayvayov, o sivines gamag bikakoks binounas wamtes, o tapwaloul waseg sivines keb wanakaew, o sivines bimliguyaws sagal waseg.

⁴⁷ "Tage ikukwayes nakwabs sivavag, mo ikululs initougs aveiyov, vagan gamag bisimounids, bidokes asisinap bwein. Nag gog, kalbaleb. Igaw Yowbad bimop asisinap. Singay kalbaleb bilivatus."

21

*Nakwab namuloul avakaein
(Mak 12:41-44)*

¹ Yeisuw itamnow matan, ikines guyawaw mwasanin imulouls Yowbad wanbunatum.

² Wankuyeim mo ikin nakwab nasimav imuloul akweiy toya.

³⁻⁴ Ikin ikous, mo ilivan ilana, “Mounid adibakeimiy nakwab manawen namuloul bo itamap wasigeis tasiyas asibabaw. Peinan tasiyas simoney babaw, imulouls ikous, tamkwalan nises; tage manawen namoney misinaka kweiy toya, imuloul ikous, nag aveiyag nises bigimwal kan.”

*Igaw bigulekxes Yowbad nabunatum
(Matiw 24:1-2; Mak 13:1-2)*

⁵ Gamag mwasanin ilivans Yowbad nabunatum livanen, peinan bo ikawyamis dakul bwanabweins, o gamag sisiwayoub wasigeis. Yeisuw iligen asilivan, ilana,

⁶ “Youd tasiyas nukukines, igaw kweitan tut mo bigulekxes biyakousis. Nag kweitan dakul bisesuna wakaban.”

*Tut kalbaleb ven watinow
(Matiw 24:3-14; Mak 13:3-13)*

⁷ Iweis tasiyas, ilansa, “Livan towen nukulivan, avei-tut waseg mo bivag mawan? Amawan bakakakin kakita bo bigulekxes?”

⁸ Ilana, “Awoum gamag bikatidavimiy. Tawaw babaw bisaps yagag waseg bilansa, ‘Yey mtowen yey’; o adok bilansa, ‘Anayam bo neim.’ Awoum kubwakuns wasigeis tasiyas.

⁹ “Igaw bukuliganes bulagan naviy o bulagan kawpwanaw; awoum beivag amipwayat. Sinap tasiyas wanamug, tage tut nakabiyokous wankuyeim.”

¹⁰ Mo idibakes, ilana, “Ven avakaein bikanaviys wasigeis ven avakaein. King siney nagamag bikanaviys wasigeis kweitan king siney nagamag.

¹¹ “O nik binkunik avakaein. O ven mwasanin bikamates moun, o katoun bisap; ven mwasanin gimgilis bimtamats. O gamag biwenes singay peinan bikines walbalab mulin naman Yowbad.

¹² “Youd tasiyas kalbaleb tut wanakoug singay, tage watapwan tut gamag biyousimiy biyagageimiy, biyateleimiy sinagog waseg, o bisenamiy wadeil; o peinan gungamag yakamiy bo biyateleimiy wamtes tasiyas king, o takaleiwags kawkaveks wamtes.

¹³ “Igaw tutan biyateleimiy, mo kwamteles livanen yey.

¹⁴ “Awoum ninoumiy bibabaw. Awoum ninoumiy kulansa, ‘Amawan bakakatimop asilivan?’

¹⁵ “Peinan yey basekeimiy amilivan, o amisinap, o bukutawtouns wasigeis tasiyas niyateleimiy. Nag kadilokes bikatimapus amilivan, nag.

¹⁶ “Timimiwas bisilkodeimiy. E, inmiyas, tuwmiyas, budimiwas, tawlimiyas o veimiwas bisilkodeimiy, mo bikatimateimiy yakamiy mwasanin.

¹⁷ “Asibabaw bikamliweimiy, peinan gungamag yakamiy.

¹⁸ “Tage nag biyagageimiy. Nag bigutus walitanok kunumiw.

¹⁹ “Kukin bukwaptuleimiy mo bukuyamoveimiy.

*Bo bigulekxes Yelusalem
(Matiw 24:15-21; Mak 13:14-19)*

²⁰ “Tage igaw bukukines takanaviy asibod babaw bidiliwunis miven Yelusalem, mo bukukwakins kakita bigulekxes.

²¹ “Yakamiy magat bukusikes Yudiy, kadiloka kusawls kuneis wakoy; o yakamiy waven kadiloka kuneis wanawoud; o yakamiy wabag awoum kumeis waven.

²² “Tut towen waseg Yowbad bo bimop gamag asisinap, mamagina bo bikamat sinap babaw nilivnek Bukitab waseg.

²³ “Tut towen siyas takakudapoms bilivatus kalbaleb, o tasiyas nisasus nitsiyas. Peinan ven watinow gimgilis abes singay bigeg, o Yowbad bikawkunes gamag tasiyas.

²⁴ “Gamag tasiyas bimt̄amats naviy waseg; o tobwag gamag bimeis bigulekxes ven towen Yelusalem, bitokes min-Yelusalem binawes ven babaw wasigeis; o tobwag gamag tasiyas mo bivvānis Yelusalem pwepway-nen ee... tobwag gamag tasiyas situt mo biyakous.

Yeisuw beiyum beim

(Matiw 24:29-31; Mak 13:24-27)

²⁵ “Gamag bikines mulin naman Yowbad bivag *kalas* waseg, o tibukon waseg, o wutun wasigeis, biyagages. O ven watinow, kaysay singay *bikawot* avakaein, mapuna ven babaw gimgilis biliganes, beivag ninous babaw. Ta-mawan bikakins, bikatinabwes.

²⁶ “Tawaw bo bisoumats, aspw̄yat, bininuways ven watinow bo biyageg. Peinan libalab tatonen bo bigulek.

²⁷ “Ikous, mo bukukineigs Gimilitoun yey bo bam, lov waseg, son guntawtoun o yakawanag avakaein.

²⁸ “Igaw bisilamaws youd tasiyas, bweina bukutamnawes kayoumiy, bukukines takatinabweimiy bo beim.”

Yowbad nakaleiwag bisap

(Matiw 24:32-35; Mak 13:28-31)

²⁹⁻³⁰ Nakabebay kweitan isekes mamagina: “Kukines yaveinun siney amweilok babaw, biyāsus yageivein kweivaw mo bukukwakins wuwal bo beim.

³¹ “E, mawan bukukines sinap tasiyas bisipsaps, mo bukukwakins Yowbad nakaleiwag bo bisap.

³² “Mounid adibakeimiy tut towen gimgilis bisesus ee... mo sinap tasiyas bisipsaps.

³³ “Libalab son ven watinow beiyakous, tage agulivan nag biyakous, nag.

Kuvnāseimiy, kukwayamats

³⁴ “Kuvnāseimiy. Awoum ge ninoumiy bibulabol peinan kuninuways kaeimiy, o amiyoubwein, o amiwiskiy, o youd katanok katanok ven watinow waseg, mo Yowbad anayam bisibluteimiy, mamagina sik bikwaneimiy.

³⁵ “Peinan bo bisiblutes gamag ven watinow wadaban pwepway.

³⁶ “Tage yakamiy, kadiloka kukwaymates tut babaw, kuninitougs vāgan Yowbad bilabeimiy bikimtuweimiy, mata ge bikwaneimiy youd siyas kalbaleb, wankuyeim mo bukutamanaws yey Gimilitoun yey wamatag.”

Ikatimlakes Yowbad wanbunatum

³⁷ Yam katanok katanok ikatimlakes gamag Yowbad wanbunatum, o boug waseg inoun in wakoy yagan Oliv, imasis.

³⁸ Gāboug katanok katanok gamag babaw mo ikattuyouns imimeis Yowbad wanbunatum vāgan biliganes aygan.

Yudas itam vāgan bisilkod Yeisuw

(Matiw 26:1-5, 14-16; Mak 14:1-2, 10-11; Yon 11:45-53)

¹ Yam mwasanin ikous mo bisagals, Kaltuwon Sigeilin. Sagal towen nag ikams bled son yist tage makava bled ikams.

² Tasiyas tanuwgves lun sisiyas takatimlakeins kaleiwag iyokons amawan beiweiys Yeisuw bikatimates. Ta-mawan, peinan iwenes gamag babaw.

³ Seitan nanon mo isiw wanuwan Yudas, yagan Iskaliyot, Yeisuw navamul teitan. Navamul babiweis sinawatan asteiy.

⁴ Seitan nanon isiw Yudas wananon; Yudas isap, inoun, inekestasiyas tanuwgves lun sisiyas tulals, sisiy illivans, amawan bisilkod Yeisuw vāgan tasiyas mo biyousis.

⁵ Tasiyas iliganes anilivan, imwāsaws, ilivans money kid bisekes Yudas, maysan nawotet towen.

⁶ Mtowen Yudas itam, iyokon amawan bisilkod Yeisuw. Sivinan gamag babaw bigayays, mo Yeisuw ibanes anmwānet, biyousis.

Kaltuwon Sigeilin

(Matiw 26:17-30; Mak 14:12-26; Yon 13:21-30; 1 Kolinit 11:23-25)

⁷ Yudas ikayamat ee... anayam waseg ikams makava bled, o beiweiys aleis lamiy Yowbad wanbunatum, silmanin Kaltuwon Sigeilin.

⁸ Yam towen Yeisuw mo ikayabes Pita son Yon bineis waven, ilana, “Kuneis kuvages Kaltuwon Sigeilin; bitakams yakids.”

⁹ Iweis tasiyas, ilansa, “Avanuy bakavag kan?”

¹⁰⁻¹¹ Ilana, “Bukunounas, bukusaps waven, taw teitan ikokew kunasoup bilivatumiy, mo bein, beisiw wabunatum. Kwabkunis, kudibakes tanuwagan bunatum, kulansa, ‘Datakatimlakays ilana: Avanuy bwabwal yakamey mabunatum waseg bakakamkwam Kaltuwon Sigeilin, sigwey gunavamul?’

¹² “Kulivans mawan mo bikamtilakeimiy bunavakaein wanakaew wanbunatum nises, son kabanen. Townen waseg kuvages kads.”

¹³ Iliganes, ineis, ibanes mawana nilivnek; mo ivages kan silmanin sagal towen beikams.

¹⁴ Anatut beikams, Yeisuw isinis siney tasiyas takaweins anilivan.

¹⁵ Idibakes, ilana, “Singay sivinag sigwey yakamiy bitakams sagal towen, peinan bo balivet mamayuy.

¹⁶ “Nag vayuwein bakam sagal towen oko anatut sagal towen wutalan beikous Yowbad nakabkaleiwag waseg.”

¹⁷⁻¹⁸ Ilivan ikous, mo ikow kwavig, ikalin nuwan waseg Yowbad ikous, ilana, “Kukwawes kwavig towen kumoums tatanok tatanok yakamiy, peinan igaw nag bamoum gleip sipinen ee... Yowbad nakaleiwag mo bisilamaw.”

¹⁹⁻²¹ Wankuyeim mo ikow bled; ikalin nuwan ikous, ikivis, ivvagein, isekes, ilana, “Woug towen, tage mtowen tasilkodeig sidayas nitakamkwams.

²² “Peinan Gimilitoun yey gunaked Yowbad bo ikaluweg. Ked towen banoy ban, tage mtowen tasilkodeig mo bilivet kalbaleb.”

²³ Navamul tasiyas mo illivans sisiyas wasigeis, idokes kavel bisilkod Yeisuw.

Mitovek mgwana mitouwat

²⁴ Ikous, tasiyas-wan kamnimana kweitan ivages, peinan idokes kal bimlavag astamumug.

²⁵ Yeisuw mo idibakes, ilana, “Ven tasiyas igaw dadub siking ikalawages tasiyas, o ilansa, ‘Amatakaleiwag ilabemas.’

²⁶ “Tage yakamiy awoum mawana tasiyas. Kadilok amitatumug bimlavag mawana gwad, o mitovek mawana mitouwat.

²⁷ “Kal imug? Townen isin wäkeb ikamkwam? O adok towen natouwat isek kan ikam? Nag, towen isin wäkeb tamumug. Tage yey wasigeis yakamiy, mawana mitouwat yey.

²⁸⁻³⁰ “Sigwey yakamiy nukulabeigs gunamouvit waseg. Mapuna bakaluweg abamiy beibwein tut wanakougwaw silmanin. Tamag bo ikaluweg abag o gunakabkaleiwag bwanabwein, mawan-vak akaluweg abamiy bwein, sigwey yakamiy mo bitakams bitamoums gunakabkaleiwag waseg, o bukusinis wamikabkaleiwag mamagina guyawun Yisleil yakamiy, bukwaleiwags wasigeis asikum sinawatan kweiy.

Saymon Pita bikayan Yeisuw

(Matiw 26:31-35; Mak 14:27-31; Yon 13:36-38)

³¹ “Yakoum Saymon kuligen agulivan. Seitan bo sivinan bikaweimiy vagan biyakwaneimiy mawan tatayins wit iwaweiys mo anagin ibanes.

³² “Tage bo anitoug waseg Yowbad vagan bukusimounid beibwein; awoum kukwalouw. Ikous, mo bikanavin nanoun ikous, kadiloka kulabes budam bitawtouns.”

³³ Iw to Pita, ilana, “Tamwey, kukin bilaveims bukun wədeil o bikatimateims, soug yak bitases.”

³⁴ Yeisuw ilana, “Adibakeim Pita, nagein bukwayaneig sivatoun mo beigel kolkolek.”

³⁵ Yeisuw idibakes navamul, ilana, “Kweiboug akayabeimiy, kutavins ven babaw, amikaw nag, kunamiy nag, amisandol nag, tabta aveiyag ikabwag wasigeis yakamiy?”

Ilansa, “Nag.”

³⁶ Idibakes, ilana, “Tut gog towen kal sam anakaw, bweina bikow, kwanan mawan. O kukin kal nag ivag napulut, bweina biyamiyis anpwälum, maysan bikow mo bigimwel napulut.

³⁷ “Adibakeimiy, bo bikamat livaneig nilivnek Bukitab waseg mamagina, ‘Mtowen siney takalbalebs idokes mawana tasiyas.’ Peinan livaneig nilivnek, bo bikamat mawan.”

³⁸ Iweis tasiyas, ilansa, “Tamwey, kukin pulut siyas akweiy.”

Yeisuw ilana, “Bo deis!”

Yeisuw initoug waseg Yowbad

(Matiw 26:36-46; Mak 14:32-42)

³⁹ Ilisow ven, inoun in koy yagan Oliv mawan angulagul yam babaw. Navamul ikabwakuns waseg.

⁴⁰ Isaps ven towen nimsikes-yay, idibakes, ilana, “Kunitougs waseg Yowbad. Mata ge Seitan biyakwaneimiy.”

⁴¹⁻⁴² Ilisow navamuls, inay-o tanaban-o, mo ibasin kitatun, initoug, ilana, “Tamag, magat sivinam, bukukow agkwavig kwaviwen; awoum bamoum, singay yayan. Tage awoum nanoug yey. Nanoum yak kuvag mawan.”

⁴³ Initoug ikous, mo Yeisuw ikin wamatian gum-libalab bo ileb, ikimtuw.

⁴⁴ Singay Yeisuw nanon igege, ikulul, initoug avakaein, anpulikas avakaein mamagina buyavin iwtawout wawepway.

⁴⁵ Initoug ikous, itamanaw, inekes navamul bo imasis, peinan ninous igege.

⁴⁶ Ibanes, idibakes, ilana, “Aveiyag wawun kummasis? Kukits, kunitougs; mata ge Seitan biyakwaneimiy.”

Imeis biyousis Yeisuw

(Matiw 26:47-56; Mak 14:43-50; Yon 18:3-11)

⁴⁷ Igaw ilivan, gamag babaw isaps. Taw towen yagan Yudas, Yeisuw navamul teitan, bo imgwayes tasiyas babaw. Isineikik inek Yeisuw, bimulouls son.

⁴⁸ Yeisuw ilana, “Yudas, bukumuloul waseg Gimilitoun yey vagan bukusilkodeig? Oone!”

⁴⁹ Tasiyas nitomas walasin Yeisuw ikakins gamag babaw biyousis Yeisuw, ilansa, “Tabta bakawaweis tasiyas mapulut waseg?”

⁵⁰ Ilivans ikous, mo teitan itamnow napulut tammunum iweiy teitan tanuwgwas lun sitovek natouwat, ibob teigan.

⁵¹ Iwage Yeisuw, ilana, “Deisa!” mo ikabkwen teigan, ivag ibwein.

⁵²⁻⁵³ Yeisuw mo idibakes tasiyas tanuwgwas lun sisiyas tulals tasiyas nimtakavates Yowbad nabunatum, sisiyas tammwayas, peinan bo nimeis biyousis Yeisuw; ilana, “Bo nukumeis, mipulut minew kukokews, bukuyousigs mawana tavveinaw yey? Yam katanok katanok sigwey yakamiy nitasesus Yowbad wanbunatum, nag kuyousigs. Nagein gog bukuyousigs, peinan imitut dadub kaleiwag waseg.”

Pita ikayan

(Matiw 26:57-58, 69-75; Mak 14:53-54, 66-72; Yon 18:12-18, 25-27)

⁵⁴ Ituts, iwekes, iyousis Yeisuw, inawes tanuwgwas lun sitovek wanbunatum. Pita ikikun kadiveiyov.

⁵⁵ Tawaw tasiyas ivlakes sikov tanuwgwas lun sitovek wanven, isinis wadadan kov. Pita siney tasiyas isinis.

⁵⁶ Pita isin, kov imteil magin, nātan nakubukwab ikin bo ikabunik, iwtus, ilana, “Bo akin taw towen son Yeisuw.”

⁵⁷ Pita ikayan, ilana, “Nag! Nag akakin taw towen.”

⁵⁸ Isesus ee... teitan gamag ikin Pita, ilana, “Yākoum Yeisuw nagamag yak, ne?”

Iwage Pita, ilana, “Yey nag.”

⁵⁹ Isesus ee... imwemway nen, tatounun anilivan tawtoun, ilana, “Mounid taw towen son Yeisuw nisesus, peinan gum-Galiliy.”

⁶⁰ Iwage Pita, ilana, “Nag! Nag akakin aveiyag kulivan.” Igawa illivan, bo igel kolkolek.

⁶¹ Yeisuw mo itouvin ikin Pita wamatān. Pita inuw Yeisuw anilivan mamagina: “Nagein bukwayāneig sivatoun mo beigel kolkolek.”

⁶² Pita inuw Yeisuw anilivan, isap in watoulan ven, ivālam, singay igeeg nanon.

Iyateles Yeisuw

(Matiw 26:59-68; Mak 14:55-65; Yon 18:19-24)

⁶³ Tasiyas niyousis Yeisuw mo isibāwes, iwaweiyis.

⁶⁴ Kweim waseg ilumwes matan, ikatigānes, ilansa, “Kulivnek māwana palopit yākoum. Kal to iweim?”

⁶⁵ Asilivan babaw ikikānes Yeisuw, itawyages.

⁶⁶⁻⁶⁹ Iyam gaboug, tammwayas katuyouns imimeis, tasiyas tanuwgwes lun sisiyas takatimlakeins kaleiwag. Itokes Yeisuw inawes silmanin yātal, ilansa, “Kukin yākoum Kelis yākoum, kadiloka kudibakem māwan.”

Iw to Yeisuw ilana, “Kukin badibakeimiy, nag bukusimounids. O kukin bakatiganeimiy, nag bukwatimapus agulivan. Tage nagein Gimgilítoun yey mo bassin Yowbad wanakātay, vagan bakaleiwag.”

⁷⁰ Iweis tasiyas, ilansa, “Tage yākoum Yowbad Natun, ne?”

Yeisuw idibakes, ilana, “Bo nukulivans māwan.”

⁷¹ Tasiyas mo ilivans, ilansa, “Nag sivinads gamag bikamtilakeids ansinap kalbaleb, peinan nitaliganes anilivan kalbaleb, tatonena ikamumwan.”

23

Iyateles wamatān Paylat

(Matiw 27:1-2, 11-14; Mak 15:1-5; Yon 18:28-38)

¹⁻² Iliganes anilivan, tasiyas babaw itamanaws, itokes Yeisuw, inawes Paylat waseg; mo iyateles, ilansa, “Yakamey min-Yudiy yakamey, o taw towen bimgwayem ked kalbaleb waseg. Nakaligen anilivan, ilana, ‘Awoum kutams Sisal nataķis waseg.’ Peinan ilana, ‘Yey Kelis, king yey.’”

³ Paylat ikatugan, ilana, “Yakoum min-Yudiy siking yākoum, ne?”

Iwage Yeisuw, ilana, “Nukulivan māwan.”

⁴ Paylat mo idibakes tanuwgwes lun situwāveks sisiyas gamag babaw, ilana, “Nag kweitan aban ansinap kalbaleb.”

⁵ Singay gog illivans, ilansa, “Bo ikabiyun gabman nakaleiwag. Ikatimlakes gamag māwan. Bo isilamaw Galiliy o ven babaw Yudiy ikous, mo im ven towen, waseg anilivan towen kalbaleb.”

Iyateles wamatān Elod

⁶ Paylat iligen asilivan, ilana, “Tage taw towen gum-Galiliy, ne?”

⁷ Ilansa, “Oo!”

Paylat ilana, “Elod takaleiwag ven Galiliy waseg, kadiloka kunawes binek Elod; mtowen bikaleiwag.”

Tut gog towen Elod nises Yelusalem. Paylat ikayeb Yeisuw, binek Elod vagan bikaleiwag.

⁸ Elod ikin Yeisuw neim, imwasaw, peinan tut kadiveiyov sivinan bikin Yeisuw. Bo iligen bulagan Yeisuw, tage sivinan bikin kweitan nawotet tawtoun.

⁹ Ikatitugwan waseg Yeisuw ee... bo nag. Nag ikatimop anilivan.

¹⁰ Tasiyas tanuwgves lun sisiyas takatimlakeins kaleiwag itomos, singay iyateles Yeisuw, asilivan tawtouna singay.

¹¹ Elod siney natakanavy iyagages Yeisuw peinan ikasigumis, o issibawes. Ikous, mo isekes Yeisuw anakweim mwaynamnabwein bisikam, peinan isibawes. Ikous mo Elod ikayeb beiyum binek Paylat.

¹² Yam towen Elod imwas son Paylat, peinan kweiboug kavikun son.

Gamag sivines beiweiys Yeisuw

(Matiw 27:16-26; Mak 15:6-15; Yon 18:39-19:16)

¹³⁻¹⁴ Paylat mo idawes bimeis tasiyas tanuwgves lun, sisiyas takalleiwags, sisiyas min-Yudiy babaw. Imeis mo idibakes, ilana, “Nukumeyes taw towen, kuyateles, kulansa, ‘Imgwayem ked kalbaleb waseg, vagan bakababiyun gabman nawotet.’ Wamtamiy bo nakatigan, nag kweitan ansinap kalbaleb aban mawan nukulivanes, nag.

¹⁵⁻¹⁶ “Wankuyeim mo akayeb inek Elod, o Elod nag kweitan iban ansinap kalbaleb, nag; mo ikayeb vayuwein iyamnavaw; o nag kaban ansinap kalbaleb. Nag ivag silawun bitakatimet gamag towen. Misinaka bawaweiy vatul waseg mo balik binoun.” ¹⁷ (-)

¹⁸ Iweis min-Yudiy tasiyas, iwaks, ilansa, “Awoum kulik taw towen, kwatimet-wan! Kulik Balabas beim.”

¹⁹ Mtowen Balabas nises wadeil peinan bo ikabutus gamag ven towen waseg mo ikanaviys wasigeis gabman natakanavy, o bo iweiy gamag mwasanin.

²⁰ Vayuwein Paylat mo iliwon, idibakes tasiyas, sivinan kid bilik Yeisuw, binoun.

²¹ Tasiyas gog iwkuwaks, ilansa, “Kwatikavates waklos beimat.”

²² Sivtounun idibakes, ilana, “Aveiyag wawun bitawey? Aveiyag ansinap kalbaleb? Nag aban ansinap kalbaleb vagan bakatimet. Misinaka bawaweiy mo balik binoun.”

²³⁻²⁴ Tasiyas gog min-Yudiy singaya iwkuwaks, sivines kid bikatimates Yeisuw. Avakaein ages iwkuwaks ee... bo itawtoun asilivan; Paylat bo iwnatout, mo itam.

²⁵ Ilik taw towen nikabutus gamag silmanin naviy waseg gabman, tawayin gamags mtowen Balabas. Bo ilik, peinan gamag sivines. Tage Yeisuw itam silmanin ninous tasiyas bivages.

Inawes beiweiys waklos

(Matiw 27:32-44; Mak 15:21-32; Yon 19:17-27)

²⁶ Itokes Yeisuw, inawes, iyousis gum-Saylin mwana meinoy wanawoud neim, isekes Yeisuw anklos, tatonena ikew. Yeisuw imug in, gum-Saylin mtowen wankuyeim.

²⁷ Gamag singay babaw ibukunis, o vinay mwasanin ivvalams-wan, peinan beiweiys Yeisuw.

²⁸⁻²⁹ Yeisuw itouvin idibakes tasiyas ilana, “Vinay-nen Yelusalem yakamiy, awoum kuvalams peinan beiweigs, kuvalams pinamiy simiyas nitimiya. Peinan tut kalbaleb bukulivatus, mo gamag bilansa, ‘Tasiyas vinakal bwein, ta-ivag nitsiyas, nag ikakudapoms, nag ivsusus pwapwaws.’

³⁰ “Tut towen waseg gamag bidibakes koy, bilansa, ‘Kugiyel kum kudibwanim’; peinan biwenes Yowbad. E, tut singay kalbaleb bukulivatus.

³¹ “Yey toubwein mamagina kay mwamov, bo iyagegeigs yey, o yakamiy mawana kaligweg nimtamats tasiyas bo biyagegeimiy singay.”

Isibawes Yeisuw

³² Tasiyas takanavy bikatimates-vak takalbalebs asteiy. Sisiy Yeisuw inawes bikatikavates waklos.

³³ Inawes ineis ven yagan “Busabwes,” mo ikatikavates naman kaken wanklos waseg, mo kativtawes klos akiwen, Yeisuw bikayagweg ee... beimat. Takalbalebs mawan inuwakes, teitan wanakatay, tayuwein wankimaw.

³⁴ Yeisuw ikayagweg wanklos, initoug waseg Yowbad, ilana, “Tamag, kuwid asisimap kalbaleb, kunumlev. Peinan sikalbaleb nivages nag ikakins.” Mo ikalawages anakweim; makava ilaves kweitan youd bikines kalisiy bikawes asikweim tatanok tasiyas.

³⁵ Gamag babaw itowas ikikines, tage astakaleiwags isibawes Yeisuw, ilansa, “Bo ikatinob gamag mwasanin; bweina bikatinob tatonen, magat mtownen Yowbad angamag Kelis.”

³⁶⁻³⁷ Tasiyas takanaviys-vak isibawes, imimeis bisekes wayn yayan, ilansa, “Kukin yakoum min-Yudiy siking, kadilok kwatinabweim tatoneim.”

³⁸ Anklos wakunuwatan bo ileles silawun neiweiys, mamagina: “Mtowen min-Yudiy siking.”

Yeisuw siney takalbalebs asteiy wanklos

³⁹ Takalbaleb teitan nikayagweg wanklos, iyeg Yeisuw, ilana, “Yakoum Kelis ne? Kwatinabweids simey yakoum.”

⁴⁰⁻⁴¹ Tage son ikan, ilana, “Adok nag kugoul Yowbad, peinan neiweim bukumat mawana taw towen. Yakid aditeiy kadiloka bitamat peinan adsinap kalbaleb; tage taw towen nag ivag ansinap kalbaleb.”

⁴² Mo idibek Yeisuw, ilana, “Yeisuw, igaw bukusilamaw mukwaleiwag, kadiloka bukunuweig yey.”

⁴³ Iw to Yeisuw, ilana, “Mounid adibakeim nagein bitasin ven bwanabwein waseg, yey soug yak.”

Yeisuw ikanig

(Matiw 27:45-56; Mak 15:33-41; Yon 19:28-30)

⁴⁴⁻⁴⁵ Bo yanay mo iladadub wadaban pweepway; kālas nag imiteil ven ee... itageg kālas mo ikannat vayuwein. Maynawen kweim mwaynavakaein nisilbwed palakakit Yowbad wanbunatum mo iksigeb, ivag mwayney.

⁴⁶ Yeisuw mo iwak, aygan avakaein, ilana, “Tamag, kululuwag kukow.” Ilivan ikous, mo ikanig.

⁴⁷ Takalikay towen nikakin mo iyakawn waseg Yowbad, ilana, “Mounid taw towen tadidumwal.”

⁴⁸ Gamag babaw nikatuyouns ikikines ikous, mo iyums ineis wasiven; iwaways wavytakous, peinan ninous igeg.

⁴⁹ Yeisuw taliven nitowas ikikines, sisiyas vinay tasiyas nibukunis Yeisuw Galiliy waseg mo nimeis Yelusalem.

Idibwanis wakalawag

(Matiw 27:57-61; Mak 15:42-47; Yon 19:38-42)

⁵⁰ Gum-Alimatiy teitan yagan Yosep, inaven Alimatiy wawnawan Yudiy. Mtowen Konsel teitan, ansinap bwein, didumwal.

⁵¹ Nag itam vagan bikatimates Yeisuw, bikayus kid; bo nag. Mtowen ikayamat Yowbad nakaleiwag asinavin beim.

⁵² Mtowen Yosep inek Paylat, initoug won Yeisuw silmanin bikow binow bidibwen.

⁵³ Itam Paylat. Mtowen Yosep in mo inibwis Yeisuw, ikawes inawes, isumweilis kweim pwapwakaw, isenas wanuwan alawag, mamagina takunumwan nitateiys koy dakul waseg. Takanigs nag idibwanis kweiboug wanuwan alawag towen, peinan kweivaw mwana nitateiys, mo itakus Yeisuw alawag towen waseg.

⁵⁴ Yam towen ikatunags silmanin sagal nubweig, bo beiyam nubweig Sādad, min-Yudiy tasiyas siSābat.

⁵⁵ Vinay-nen Galiliy siyas nibukunis Yeisuw nimeis Yelusalem, bo ikikunis Yosep, ikines amawan inuwek, Yeisuw isen wakalawag, mo iyums, ikatinages tagon simasim vagan won Yeisuw biptumis.

SiSābat iyeiwas, peinan Moses nakaleiwag māwan. ⁵⁶ (-)

¹ Iyam nen gaboug, kweivaw wik isilamaw. Walalayis vinay tasiyas ilakwanes alawagan. Tagon simasim to nivages nisemos, bo ikawes inawes Yeisuw biptumis.

² Dakul towen nisenas Yeisuw alawagan wadon nikatibwades bo ibanes niyatipines nises wadadan.

³ Isiws ineis wanuwan iwekes makawa-wan. Nag ibanes Yeisuw.

⁴ Bo isunasun ninous, peinan alawag makaw; bo itamanaws wadides tawaw asteiy asikweim mamagina kavikawn, ikaligwen mites.

⁵⁻⁷ Vinay aspwayat, ikululs avakaein, migis kakita binek pwepway. Tawaw idibakes, ilansa, “Aveiyag wawun kunineivs towen tamwamov, takanig siven waseg? Kuninuways igaw simiy waGaliliy anilivan, ilana, ‘Teitan gamag bisilkodeig Gimilitoun yey, vagan tasiyas takalbalebs bikatimateigs waklos. Kweitoun Yam mo bakiit vayuwein.’”

⁸⁻⁹ Ilivans ikous, mo inuves Yeisuw anilivan mamagin, mo ilisawes alawag, iyums, asilivan babaw idibakes Yeisuw navamul sinawatan tatanok sisiyas tasiyas babaw.

¹⁰⁻¹¹ Vinay tasiyas yiges Meliy Magdal, Yowan, Yemes inan yagan Meliy, sisiyas vinay mwasanin. Vinay tasiyas asilivan idibakes tasiyas takaweins Yeisuw anilivan. Tage nag isimounids, idokes asilivan mamagina kwaneib. ¹²(-)

Asteiy bineis Emeyus

(Mak 16:12-13)

¹³ Yam towen asteiy inounas bineis ven yagan Emeyus. Kukin bitanoy Yelusalem biten Emeyus katanok veit.

¹⁴ Tasiyas asteiy inounas illivans sinap tasiyas nikamat Yelusalem waseg.

¹⁵⁻¹⁶ Igaw illivans asteiy, Yeisuw mo inekes, asteitoun inounas, tage mites nag kadilok biwtusis Yeisuw.

¹⁷ Yeisuw idibakes, ilana, “Aveiyag kulivanes amiteiy nukuninounas?”

Ilivan ikous, itounis tasiyas; bo igeg ninous.

¹⁸ Teitan yagan Kliyopas, ikatimop anilivan, ilana, “Adok kweivaw gamag yakoum nukum Yelusalem, nag kukwakin aveiyag nivages tut towen. Peinan gamag babaw bo ikakins.”

¹⁹⁻²⁰ Iwage Yeisuw, ilana, “Aveiyag?”

Ilansa, “Livānen gum-Nasalet yagan Yeisuw. Mtowen palopit nawotet tawtoun, anilivan tawtoun, wamatan Yowbad, wamtes-vak gamag babaw. Tage tasiyas imalun tanuwgwas sisiyas amatakaleiwags bo ipiyaves, iyateles; isekes mina-Lom wasigeis vagan bikatimates waklos.

²¹ “Yakamey kadok mtowen bikatinabwem, min-Yisleil yakamey. E, bo iweiys ikous, sinovan. Akweiyam bo nein wankuyeim.

²²⁻²³ “Sinap kweitan mo kaligen, waseg isom ninom. Peinan simayas vinay mwasanin walalayis nagein ilakwanes alawagan, tage nag ibanes Yeisuw; iyums, ilansa, ‘Nakakin mamagina min-libalab, asilivan ilansa, “Yeisuw bo imov.”’

²⁴ “Simayas mwasanin mo ineis wakalawag, iwekes makaw, mawan vinay asilivan, tage nag ikines Yeisuw.”

²⁵ Iw to Yeisuw, idibakes, ilana, “Takabalawein yakamiy, bo ibol ninoumiy, peinan nag kusimounids kweiboug palopits asilivan!

²⁶ “Kadiloka bigeg aban Kelis, mawan nukulivānes; ikous mo bikow yakawan anavakaein.”

²⁷ Mo ikatimlakes livānen tatonen Bukitab waseg. Isilamaw waseg Moses nakaleiwag o tasiyas palopit sikalelel o Bukitab babaw ikatimlakes ikous.

²⁸ Inounas, ikatimlakes ee... kakita bisaps wasiven. Yeisuw gog bilisawes binoun.

²⁹ Tasiyas gog kayuses, ilansa, “Kum wamabunatum kumasis, peinan bo ikwayav.” Isimkines mo itam; siney isiws wasibunatum.

³⁰ Isiws wabunatum, isinis beikams; mo ikow bled, anilivan bwanabwein isek, ikivis, isekes beikams.

³¹ Mamagina bo ilal mites, peinan iwtusis Yeisuw; ikous, mo imtikiniges tasiyas.

³² Asteiy ilivans, ilansa, “Mounid bo imwan woud, nikatimlakeid waked mo takakin Bukitab.”

³³⁻³⁴ Nuwanaw itamanaws, iyums ineis Yelusalem; ibanes navamul sinawatan tatanok katuyouns nisesus sisiyas gamag mwasanin. Navamul asilivan mamagina, “DaGuyaws bo ikit, inek Saymon, mo ikin.”

³⁵ Tasiyas asteiy mo ikamteles asisinap waked, peinan Yeisuw inekes, sisyi beikams, ikivis bled, mo iwtusis.

Yeisuw isap wasigeis navamul

(*Matiw 28:16-20; Mak 16:14-18; Yon 20:19-23; Wotet 1:6-8*)

³⁶⁻³⁷ Ilivanes mawan, Yeisuw mo itoun wanuwein tasiyas, isiblutes. Aspwayat; idokes tobwag, mamagina aluw.

³⁸⁻³⁹ Idibakes, ilana, “Awoum kuweneigs! Awoum ninoumiy bibabaw! Yey! Kukines namag, kakeig; yeya toneig. Kwabkwanes woug, kukines yeya toneig. Aluw nag ivag vinyion son tatuwan mawana nukukineigs yey.” ⁴⁰ (-)

⁴¹ Singaya imwasaws, nag isimounids, peinan ninous babaw, mo idibakes, ilana, “Tabta kan nises bakam.”

⁴²⁻⁴³ Ibunes in sulusul, isekes; ikam wamtes.

Ikatiboug nuwes bikakins Bukitab

⁴⁴ Mo idibakes, ilana, “Agulivan towen nasekeimiy kweiboug sigwey yakamiy tasesus, peinan livaneig nises Moses nakaleiwag waseg, o livaneig nises tasiyas palopit sikalelel waseg, o livaneig nises wous tasiyas sam wasigeis; e, kadiloka livaneig babaw bikamat.”

⁴⁵ Mo ikatiboug nuwes bikakins Bukitab.

⁴⁶⁻⁴⁷ Idibakes, ilana, “Bukitab waseg nileles mamagina: kadiloka bigeg qaban Kelis, beimat, yam kweitoun mo beikit vayuwein, mo livanen Kelis bigeiguis ven babaw vagan gamag bilaves asisinap kalbaleb, mo Yowbad biwid binumlev. E, bisilamaws Yelusalem mo bineis ven babaw.

⁴⁸ “Yakamiy takaweins livan towen.

⁴⁹ “Tamag nikatigik kululuwan teitan bilabeimiy. Yey ban mo bakayeb towen biwekeimiy. Kadiloka kusesusa ven towen ee... Yowbad natawtoun mo biwekeimiy.”

Imwen in walbalab

(*Mak 16:19-20; Wotet 1:9-11*)

⁵⁰ Anilivan ikous, imgwayes inounas ineis Betaniy, itamnow naman, anilivan bwanab-wein isekes.

⁵¹ Igawa illivan mo ilisawes, imwen in walbalab.

⁵² Iyums tasiyas, ineis Yelusalem, imwasaws seikwan.

⁵³ Tut babaw nisesus Yowbad wanbunatum, iyakawns waseg.

YON

Livan imlavag gamag

¹ Wanamug gamag yagan Livan nises. Gamag towen yagan Livan waseg Yowbad nises. Gamag towen yagan Livan son Yowbad katanok-wan.

² Gamag towen yagan Livan son Yowbad wanamug nisesus.

³ Gamag towen yagan Livan youda babaw ibubun. Peinan Livan towen waseg, mo Yowbad nibun youd meivek-wan.

⁴ Mtowen taymovein youda babaw; mwamovan towen magina gamag yakids dakam-nats. ⁵ Kamnat towen imteil ven dadub waseg. Dadub nag iyakous kamnat towen. Igawa nises.

⁶ Yowbad nikayeb gamag teitan, tabibaptaysein gamags, yagan Yon. ⁷ Yon neim; nawotet bikamtilakeids mo bitakines gamag towen ansinap kamnat, vagan kid babaw gamag mo bitasimounids waseg.

⁸ Yon nag kamnat tatonen; misinaka ikamtilakeids bitakines mtowen kamnat tatonen.

⁹ Mtowen kamnat mounid, immiteil wasigeis gamag tatanok tatanok. E, mtowen bo neim ven watinow.

¹⁰ Im watinow, ven towen nibubun; tage ven watinow nag ikakins mtowen. ¹¹ Inekes inagamag, tage bo ipiyaves.

¹² Mwasanin gog bo itams waseg mtowen mo itames tasiyas, vagan bimlavags Yowbad nitun tasiyas, peinan isimounids mtowen Mesay waseg.

¹³ Nag ikopwes tasiyas, gamag buyvis waseg; nag. Nag ikopwes tasiyas peinan gamag sivines. Nag ikopwes tasiyas gamag sikaleiwag waseg; nag. Yowbad nakaleiwag waseg.

¹⁴ Livan towen im watinow, imlavag gimgilitoun, nisik davanuys. Nakakin mtowen singay takamnat, mamagina Taman Natun tatonen, singaya isiwayoub, ansinap mounid waseg.

¹⁵ Yon nikatimlakem, niwkuwak, ilana, “Mtowen livanen nalivan:
‘Igaw watibweloug teitan beim, bimug waseg yey.
Yey babs, peinan tutan gunakabsilamaw waseg, mtowen igawa nises.’

¹⁶ “Mtowen guyaw avakaein; singaya ivvageinissekeids; nasiwayoub ikatitimweis bo ivakaein.

¹⁷ “Moses bo isekeids nakaleiwag; tage Yeisuw Kelis isiwyoubuds ansinap mounid waseg.

¹⁸ “Ta-kweitan tut gamag ikin Yowbad, nag. Tage Yowbad nipwakit Natun tatonen; mtowen nikatimlakeids Taman, mo takines.”

Yon tabaptaysein gamags anilivan tonen

(Matiw 3:1-12; Mak 1:1-8; Luk 3:1-17)

¹⁹ Wankuyeim gamag mwasanin inekes Yon ikatugans waseg, mo ikatimop asilivan. Peinan min-Yudiy tammwayas tasiyas misikes Yelusalem ikayabes tanuwgwes lun, sisiyas mwasanin Livay delen nimtakavates Yowbad nabunatum. Ikayabes tasiyas, inekes Yon, ikatugans waseg, ilansa, “Kal yakoum?”

²⁰ Yon anilivan kamnat isek, ilana, “Yey nag Takatuneib Kelis, nag.”

²¹ Mo ikatiganes, ilansa, “Kal yak? Ilaytiy adok?”

Ilana, “Nag.”

Ilana, “Adok yakoum palopit towen nakakayyamat?”

Ilana, “Nag.”

²² Mo idibakes, ilansa, “Kal yak? Livaneim aveiyag bukulivan, vagan bakanow bakaseskes tasiyas nikayabemas nakam?”

²³ Iw to Yon, ilana, “Yey tawkuwak wanawoud vagan bukukidumwalus daGuyaws inaked, mawan palopit Isaya nilivnek.”

²⁴ Tasiyas Palisiy misikes Yelusalem, nikayabes gamag tasiyas nimeis ikatugans waseg Yon.

²⁵ E, vayuwein tasiyas mo ikatiganes, ilansa, “Kukin yakoum nag Kelis yakoum, nag Ilaytiy yakoum, nag palopit towen yakoum, aveiyag wawun kubaptayses gamags?”

²⁶⁻²⁷ Yon ikatimop asilivan, ilana, “Yey abaptays yevagam waseg. Tage wanuwein yakamiy teitan nises, nag kukwakins kavel; watibweloug mtowen beim, tage nag kadilokeig bakulul wamatān *vagan* kid bakablev nasandol, peinan mtowen singay iguyaw.”

²⁸ Ilivan mawan Betaniy waseg, ven towen palata-dadan Yoldan. Ven towen waseg Yon nibaptayses gamags.

Kukines Lāmiy Yowbad silmanin

²⁹ Neiyam-nen Yon ikin Yeisuw im, ilana, “Kukines Yowbad alen lāmiy mtowen lun bulukwan, beimat silmanids yakids, *vagan* biwidids adsinaps kalbaleb waseg.

³⁰ “Mtowen livānen kweiboug nalivan, ‘Watibweloug teitan beim, mtowen bimug. Yey babus, peinan tutan gunakabsilamaw, towen igawa nises.’

³¹ “E, yey nag bakakin kavel towen, tage nam abaptayseimiy min-Yisleil yakamiy yevagam waseg, *vagan* bukukwakins guyaw towen.”

³²⁻³⁴ Wankuyeim livānen Yeisuw Yon mo ilivan; ilana, “Akin Kululuwan Yowbad ibus walbalab im, magin māwana bwabun, iton Yeisuw wakunun. O yey nag bakakin towen, tage towen nikayabeig nam silmanin babaptays yevagam waseg, towen nidibakeig, ‘Kukin kal Kululuwag beibus biton wakunun, mtowen tabaptaysein gamags Kululuwag Bwanabwein waseg.’ Yey bo akin, to adibakeimiy mtowen Yowbad Natun tatonen.”

Yeisuw idawes navamul mwasanin vāgan bikabwākuns waseg

³⁵ Neiyam-nen Yon mo itamanaws sen inavamul asteiy, itowas. ³⁶ Yon ikin Yeisuw ininoun, ilana, “Kukines Yowbad alen.”

³⁷ Navamul asteiy iliganes, mo ikabwākuns Yeisuw waseg.

³⁸ Yeisuw itouvin, ikines tasiyas ikabwākuns waseg, mo ilana, “Aveiyag sivinamiy?” Tasiyas gog, ilansa “O matovek, avanuy mukusik?” (Aga-Muyuw “matovek”, ages gog tasiyas “Labay”.)

³⁹ Ilana, “Kumeis taneis mo bukukines.” Siney mo ineis, ikines nakabmasis, ikaypuls sisiy, asibabaw imasis ven towen, peinan bo ikwayav.

⁴⁰ Yam towen asteiy tasiyas niliganes Yon anilivan, ikabwākuns Yeisuw waseg. Teitan yagan Andiluw inuw tuwan yagan Saymon Pita nises.

⁴¹ Nuwanaw in inineiv tuwan; iban mo ilana, “Saymon, bo kaban towen Mesay.” (Takativini gog yagan “Mesay” bein aga-Gilis “Kelis”.)

⁴² Andiluw mo itok tuwan inekes Yeisuw. Yeisuw ikabunik, mo ilana, “Yakoum Saymon, Yon natun yakoum; badokeim Pita.” (Takativini gog bein aga-Muyuw, “Dakul”.)

Idawes Pilip son Nataniyel

⁴³ Neiyam-nen Yeisuw sivinan bein Galiliy. In Galiliy mo iban Pilip, idibek, ilana, “Kwabkunig yey.”

⁴⁴ Andiluw son Pita siven Beteseid. To Pilip naven katanok-wan Beteseid.

⁴⁵ Pilip inek Nataniyel ilana, “Bo kaban Mesay; Moses nakaleiwag waseg nilel ilivnek mtowen beim bikatinabweids, o tasiyas palopits nileles ilivnakes livānen towen waseg; mtowen gum-Nasalet, yagan Yeisuw, taman yagan Yosep.”

⁴⁶ Nataniyel ilana, “Adok na-ikadilok youd bwanabwein beim ven to Nasalet waseg. Adok nag.”

Pilip ilana, “Kum, kukin.”

⁴⁷ Ineis; Yeisuw mo ikin Nataniyel imimeim, ilana, “Kukines taw towen ansinap bwein, nag bikatidev son, peinan gum-Yisleil mounid.”

⁴⁸ Nataniyel iligen anilivan, mo ilana, “Amawan nukukwakin yey?” Yeisuw ikatimop anilivan, ilana, “Igaw Pilip bidaweim bukum, bo akineim mukusik yaveinun wangwanan.”

⁴⁹ Nataniyel ilana, “O guntovek, mounid yakoum Yowbad Natun yakoum; min-Yisleil yakids imaking yakoum.”

⁵⁰⁻⁵¹ Yeisuw ikatimop anilivan, ilana, “Tayyaweid yak! Peinan adibakeim, alana, ‘Bo akineim yaveinun wangwanan’ mo kusimounid. Sinap towen kakit; igaw tawtoun bukukin. Mounid adibakeim igaw bukukin libalab bikaliyow, Yowbad natakayobs mo bimnamwens o bibweibus Mesay Gimilitoun yey waseg.”

2

Sagal veivay silmanin ven Ken

¹ Yam akweiy ikous, mina-Ken mwasanin mo isagals, veivay silmanin. Ken wawnuwan ven avakaein Galiliy. Yeisuw inan in Ken silmanin sagal towen.

² Bo idawes-vak Yeisuw, sen navamul, ineis sagal towen silmanin.

³ Issagals ee... wayn bo ikous. Yeisuw inan mo idibek, ilana, “Asiwayn bo ikous.”

⁴ Iw to Yeisuw, ilana, “Adok mukwaleiwag towen; yey gunakaleiwag igaw.”

⁵ Yeisuw inan mo idibakes tanuwagan sagal navamuls, ilana, “Aveiyag Yeisuw bidibakeimiy, kadiloka bukuwteles.”

⁶ Kunasoup nisesus kunanim kunatan, silmanin min-Yudiy biwidis nimes, kikeis; peinan asisinap mawan. Kunasoup kavkavek, vakanes mamagina gamag vakaeanan.

⁷ Yeisuw idibakes, ilana, “Kuvwgawges kunasoup, yevagam waseg; mo ivwgawges, in, ikalawt.”

⁸ Yeisuw mo ilana, “Kunasoup waseg kukilis, kuklawes kunawes tanawagan sagal waseg,” mo iwteles mawan.

⁹⁻¹⁰ Tanuwagan sagal ikamwen yevagam towen bo imlavag wayn; nag bikakin avanuy meinoy neim, tage tasiyas takilins yevagam ikakins; tanuwagan sagal mo idow taveivay vagan beim bilivans son. Ilana, “Gamag babaw sagal nakabsilamaw waseg isekec wayn singaya bwein, imwamoums ee... iyakousis, wankuyeim mo isekec kalamwey wayn; tage yakoum amsinap kweitan, wayn bwanabwein kwayus, sagal nakabiyokous waseg mo kusekem kamoum.”

¹¹ Nakabsilamaw mulin naman Yeisuw nivag towen, ven Ken wawnuwan Galiliy, waseg ikatimlakes natawtoun, navamul mo isimounids waseg.

¹² Sagal towen ikous, mo iyum ineis Kapaneyum son inan, siney budan, o navamul. Nag biveiyov tut nisesus Kapaneyum.

Ikawsapes taggimwals Yowbad wanbunatum

(Matiw 21:12-13; Mak 11:15-18; Luk 19:45-46)

¹³ Min-Yudiy kakita bo bisagals, sagal towen yagan Kaltuwon. Mapun Yeisuw in Yelusalem.

¹⁴ Isap Yowbad wanbunatum ibanes tasiyas tanuwgwas bulumakaw, o sip, o bwabun, nimeyes aleis vagan gamag babaw mo bigimwals wasigeis; sisiyas tasiyas takaweins money vagan bikatimapus dakul silmanin muloul Yowbad wanbunatum.

¹⁵ Yeisuw ikow vatul, ivkek inanew vagan biaway, mo ikawsapes, babaw isawlins ineis watoulan. Ikawsapes aleis, ineis watoulan. Simoney itigabaw ininein wapwepway; siteibol ikatitan, ikalkalouw ikantanays. ¹⁶ Idibakes tanuwgwas bwabun, ilana, “Kuklawes, kunawes watoulan. Awoum kuvages Tamag nabunatum magina abgimwal.”

¹⁷ Navamul ikikines, mo inuwes Bukitab nilivnek mamagina, “Bo iseiw nuwag mubunatum.”

¹⁸ Min-Yudiy mo ikatiganes Yeisuw, ilansa, “Namam mulin aveiyag bukwatimlakem vagan bakakakin mukwaleiwag, wotet towen silmanin?”

¹⁹ Yeisuw ikatimop asilivan, ilana, “Bukugulekwas bunatum towen, yam kweitoun mo bawlulavaw.”

²⁰ Min-Yudiy ilansa, “Bweilim sinawavas kweinim katanok iwlules Yowbad nabunatum towen. Adok nag kadilokeim bukuwlulavaw kweitoun yam waseg.”

²¹ Tage Yeisuw nag ilivan livānen Yowbad nabunatum, ikabebay silmānin won tatonen.

²² Igaw tut wankuyeim mo ikanig, ikit vayuwein; ikous, navamul mo inuves anilivan towen, mo isimounids Bukitab waseg, o isimounids Yeisuw anilivan waseg.

Yeisuw ikakina ninous gamag babaws

²³ Igaw nises Yelusalem, sagal towen Kaltuwon waseg, babaw gamag ikikines naman mulin mo isimounids waseg.

²⁴⁻²⁵ Tage Yeisuw nag isimounid wasigeis tasiyas, peinan ikakina gamag babaw asisinap. Nag kadilok teitan bikatimlek sinapun gamag, peinan ikakina gamag ninous.

3

Yeisuw son Nikodimos

¹ Palisiy teitan yagan Nikodimos, guyawun ven Yudiy. ² Mtowen inek Yeisuw, boug waseg, ilana. “Tamwey, kakakin Yowbad nikayabeim nukum kwatimlakem yakamey, peinan namam mulin kuvag mamagina Yowbad nawotet. Kukin nag Yowbad soum bilabeim, nag bukuwtel māwan.”

³ Yeisuw ilana, “Mounid anukweim, magat nag bikopweim vayuwein, nag bukukin Yowbad nakaleiwag, nag.”

⁴ Iw to Nikodimos, ilana, “Adok nag kal bikopweig vayuwein! Ta-māwan inag bikopweig vayuwein, peinan yey bo avakaein.”

⁵ Yeisuw ilana, “Yowbad Kululuwan kadilokena bikopweim! Mounid anukweim, kukin Kululuwan Yowbad nag bikopweim yevagam waseg, ta-māwan bukusiw wanuwan Yowbad nakaleiwag. Tage kukin Yowbad Kululuwan bikopweim, bweina bukusiw wanuwan nakaleiwag.

⁶ “Gimgeilin inan bikop gimgeilin-wan; tage Kululuwan Yowbad bikop bo kululuwan-wan.

⁷ “Awoum bisunasun nanoum agulivan towen, ‘Kadiloka bikopweimiy vayuwein.’

⁸ “Yag ampalawen sivinan beitow, butkawan bukuligen, tage nag kukwakin avanuy meinoy neim, o bein avanuy. Māwana tasiyas Yowbad Kululuwan ikopwes.”

⁹ Nikodimos ikatimop anilivan, ilana, “Amāwan youd tasiyas?”

¹⁰⁻¹¹ Yeisuw idibek, “Adok min-Yisleil wasigeis, yākoum takatimlakein gamags, yākoum; tage nag kukwakin youd siyas, ne? Mounid anukweim, aveiyag nakakakin youd siyas kanukweimiy, o yakamiy gog nag kusimounids.

¹² “Peinan ta-kusimounids agulivan, sinapun ven watinow waseg, ta-māwan bakatim-lakeimiy sinapun libālab!

¹³ “Nag kadilok gamag beimwen bein walbalab. Misinak Gimilitoun yey, bo alisow gunaven libālab, abus am watinow, kadilokeig bayum ban walbalab.

¹⁴⁻¹⁵ “Kweiboug wanawoud, Moses itamnow mwatet tanmunum, māwan magin igaw mo bitamnaweigs yey, Gimilitoun yey, vagan kal yak bukusimounid waseg yey mo bukuban mwamovam bises bisigeg.

Mwamov bises bisigeg

¹⁶ “Singay Yowbad isiyoubus ven watinow gimgilis. Natun gog anmwānet bo itam, bo isek vagan bikatinabwes gamag. Kukin kal bisimounid towen waseg nag bigeg, nag; mwamovan son bises bisigeg.

¹⁷ “Yowbad ikayeb natun neim ven watinow nag silmānin biyateles gamag babaw, nag; nikayeb neim vagan kid bikatinabwes gamag.

¹⁸ “Kukin kal bisimounid waseg Yowbad Natun, nag biyātal; nag. Tapiyaveins gog Yowbad Natun siyatāl nises, peinan nag isimounids waseg Yowbad Natun anmwānet-wan, o peinan yagan ipiyaves.

¹⁹ "Silawun yatal towen, peinan kamnat bo isap im ven watinow; tage gamag ipiyaves, sivines kid dadub, peinan siwotet kalbaleb.

²⁰ "Takalbalebs ipiyaves gog kamnat; nag bimeis kamnat waseg, peinan bo bimteil asisinap kalbaleb.

²¹ "Towen gog nawotet mounid bo bimek kamnat waseg, mo bimteil nawotet bwanab-wein, niwwtel Yowbad waseg."

Mtowen butun bivakaein; yey bəbus

²² Wankuyeim Yeisuw sen navamul mo ineis wawnuwan ven Yudiy; misikes ven towen, ibibaptayses gamag.

²³ Yon gog misik ibibaptayses gamag ven yagan Aynon, walasin Selim, peinan ven towen yevagam avakaein nises. Gamags imimeis mo ibaptayses.

²⁴ Nag iyousis Yon vagan beisiw wədeil. Igaw.

²⁵ Yon navamul mwasanin mo ikamnimans sisiy gum-Yudiy teitan, idokes kalisiy sivkakay bwein vagan biwid gamag sikalbaleb.

²⁶ Mapuna inekes Yon, ilansa, "Tamwey, taw towen nukwatimlakem, kulana, 'Yowbad alen towen,' kweiboug soum nukusesus ven towen niweiw, Yoldan nimeim; tut towen bo neim ibaptayses gamags, o gamag babaw ininekes."

²⁷ Yon ilana, "Tanusagan libalab takaleiwag inasiwayoub wasigeis yakids vagan bitamwəsaws. Townen anmwanet takaleiwag.

²⁸ "Yakamiy nukuliganes agulivan mamagina, 'Yey nag Mesay Kelis; nag. Misinaka Yowbad nikayabeig amgwey mtowen Kelis.'

²⁹ "Mtowen, imwəsaw məwana taveivay, peinan taveivay ikow inakwav. Veiyon-vak imwəsaw peinan ikin taveivay ikow inakwav. Yey məwana veiyon towen, aligen aygan, amwəsaw avakaein, mtowen Yeisuw silmanin.

³⁰ "Butun mtowen bo bivakaein; yey gog bo bəbus."

Mtowen meinoy neim walbalab

³¹⁻³² Mtowen meinoy neim walbalab, singay imug. Tage min-pwepway yakids mitanoys nitameis pwepway waseg, tallivans kid livənen ven watinow.

Mtowen meinoy neim walbalab singay imug; aveiyag wamatān nikin, o teigan waseg niligen, mo ikatimlakeids; tage babaw gamag ipiyaves anilivan.

³³ Kukin kal bo biligen anilivan, bisimounid, mamagina bo ikamtel Yowbad ansinap mounid.

³⁴ Mtowen Yowbad nikayeb neim, ikatimlakeids Yowbad ansinap, peinan singaya ikatpel Kululuwan isek towen.

³⁵ Taman Yowbad sivinan Natun, youda babaw nisiwayoub waseg.

³⁶ Kukin kal bisimounid waseg Natun, mwamovan bises bisigeg; togo tapiyavein Natun nag biban mwamovan, peinan Yowbad bikavviken waseg.

Yeisuw ilivans son nen-Samaliy

¹⁻³ Tasiyas Palisiy iliganes livənen Yeisuw peinan ibaptayses gamag babaw mo imlavags navamul; o iliganes livənen Yon ibaptayses gamag nag ibabaw; tage Yeisuw nag ibaptays, navamul gog ibaptayses gamags. Yeisuw ikakin ninous tasiyas Palisiy, mapuna ilisow Yoldan, inoun, vayuwein mo in Galiliy.

⁴ Ked towen waseg kadiloka bikanapel Samaliy mo bein Galiliy.

⁵ Isap gog min-Samaliy wasiven yagan Saykal, walasin pwepway towen Yekob nisek natun Yosep pwamug-o.

⁶ Yevagam towen kweiboug Yekob ikaviyeil. Yeisuw ininoun wəked ee... mo isap, bo isoumat; isin wadadan yevagam.

⁷⁻⁸ Navamul ineis waven bigimwals kan. Bo yanay. Nen-Samaliy mo im beikil soup. Yeisuw idibek, ilana, "Soup kumey, bəmoum."

⁹ Vin manawen mo ilana, “Adok yakoum gum-Yudiy yakoum. Aveiyag wawun kunitoug soup waseg vinen-Samaliy yey?” (Peinan min-Yudiy isisinales min-Samaliy.)
¹⁰ Yeisuw ikatimop anilivan, ilana, “Magat bukukwakin Yowbad nasiwayoub, o magat bukukwakin kavel yey anitoug yevagam waseg yak, adok mo bukunitoug waseg yey vagan kid basekeim soup mwamov silmanin.”

¹¹⁻¹² Vin idibek, ilana, “Ta-kweitan mukwayagweg nises. Ta-mawan bukukil amsoup to kadiveiyov. Avanuy bukukil mo bukusekeig soup mwamov silmanin? Datoveks Yekob kweiboug guyaw avakaein, nikaviyeil yevagam towen, imwamoum, alen imwamoums, nitun tibun imwamoums ee... igawa kamwamoum yakamey. Tabta yakoum bukumgwey tamwey towen Yekob?”

¹³⁻¹⁴ Yeisuw ilana, “Kalisiy beimoums soup towen, igaw vayuwein mo beivag asidak. Tage kokin kal beimoum soup towen yey basek, nag vayuwein beivag anadak; nag. Soup towen basek bimlavag mamagina yuwyeyiwl bibwabwab wanuwan, silmanin mwamovan nag beikous.”

¹⁵ Vin manawen ilana, “O guyaw, soup towen kumey bamoum, vagan beikous agudak; awoum ge bamimeim bakilikil agusoup.”

¹⁶ Yeisuw ilana, “Kun kudibek mumwan, kumeis amiteiy.”

¹⁷⁻¹⁸ Vin manawen ikatimop anilivan, ilana, “Ta-ivag gunamwan.”

Yeisuw ilana, “Mounid amlivan. ‘Ta-ivag gunamwan.’ Adok mumwandas asteinim; towen gog soum kusesus nag mumwan tonen, to amlivan mounid-wan.”

¹⁹⁻²⁰ Vin manawen ilana, “O guyaw, akakin yakoum palopit yakoum. Tammwayas bo ikululs wamatatan Yowbad koy towen waseg; min-Yudiy yakamiy kulansa, ‘Kadilokeids bitakululs Yelusalem waseg.’”

²¹ Yeisuw ilana, “Kadiloka kusimounid agulivan towen. Igaw nag bitakulul wamatatan Yowbad koy towen waseg, o Yelusalem waseg, peinan kweivaw kaleiwag bo bisap.

²² “Yakamiy nag kukwakins aveiyag towen kukululs wamatatan. Yakamey kakakin, peinan wawun katuneib nises wasigeis min-Yudiy yakamey.

²³ “Igaw kweivaw sinap bisilamaw. Mounid bo isilamaw tut towen waseg, peinan tasiyas ikululs mounid wamatatan Yowbad, kululuwes waseg bikululs, sitapwəloul mounid. Peinan Tamads sivinan sinap towen, waseg gamag bitapwəloul bwein.

²⁴ “Yowbad kululuwan mav. Tasiyas gog sivines bikululs wamatatan Yowbad, kadiloka kululuwes waseg bikululs, mounid-wan; awoum bikululs mav.”

²⁵ Vin manawen mo idibek, ilana, “Akakin igaw Mesay beim, mtowen gamag mwasanin idokes Kelis. Igaw beim, mo bikatimlakeids youda babaw.”

²⁶ Yeisuw ilana, “Mesay yey, mtowen nukulivans soum.”

²⁷ Ilivan mawan ikous, navamul mo iyums imeis; bo isunasun ninous peinan Yeisuw ilivans son kudavín; (peinan min-Yudiy idokes nag kadilok taw bilivans son vin watapwan ven); tage nag teitan ilana, “Aveiyag sivinam?” o nag teitan ilana, “Aveiyag wawun kullivans soum manawen vin?” nag. Ikikapays-wan.

²⁸⁻²⁹ Vin gog manawen bo ilisow nakunasoup, inoun in waven, idibakes gamags; ilana, “Kumeis taneis kukines gamag teitan nidibakeig agusinap babaw kweiboug navvag. Tabta mtowen Kelis?”

³⁰ Iliganes, mo ilisawes ven towen, inounas kid binekes Yeisuw.

³¹ Tage navamul bo nisimkakins waseg Yeisuw vagan kid beikam kan to nimeyes.

³² Togo Yeisuw ilana, “Yey kag nises. Yakamiy nag kukwakins.”

³³ Tasiyas ilansa, “Tabta kal-tan kan isek ikam?”

³⁴ Yeisuw ilana, “Yey kag nises. Bo bakanow Yowbad aygan, aveiyag sivinan, mo bayakous nawotet. To silmanin nikayabeig nam. Agusinap towen kag-wan.

³⁵⁻³⁶ “Adok yakamiy kulansa, ‘Kweivas tibukon mo bitatayoys kan.’ Tage kokin bikiplal mitamiy mo bukukines kan bo iyebwel, peinan bo imatuw. Tatayaweins kan ikawes maysan wotet, o itayoys anagin towen, gamag mwamoves nag beikous.

Mapuna mo bimwəsaws tasiyas tasapweins kan sisiyas tatayaweins kan.

³⁷ "Livan towen mounid-wan, mamagina, 'Tasapwein kan kweitan; tatayawein kan kweitan.'

³⁸ "Yey akayabeimiy vagan bukutayoys bag towen. Mwasanin gamag niwteles bag, yakamiy nag; misinaka kutayoys-wan; tage bo niwteles nanawan."

³⁹ Ven towen Samaliy gimgilis babaw mo isimounids Yeisuw waseg, peinan vin anilivan, "Nidibakeig agusinap babaw kweiboug navvag."

⁴⁰⁻⁴² Min-Samaliy tasiyas mo inekes Yeisuw, ilansa, "Kum kuyeiyas wamaven, amab-wabwal yakoum." Itam. Siney tasiyas nisesus akweiy yam, iliganes anilivan. Iliganes, singay babaw mo isimounids waseg; idibakes vin manawen, ilansa, "Kalien amlivan, kakit kasimounid; tage tut towen yakameyan-wan nakaligen anilivan, mo kakakin mounid mtowen takatinabweids ven watinow gimgilis yakids."

Gabman natun Yeisuw ivag mo ibwein

(Matiw 8:5-13; Luk 7:1-10)

⁴³ Yam akweiy ikous mo ilisawes; inoun in Galiliy.

⁴⁴ Yeisuw anilivan tonen mamagina, "Wanven tatonen nagamag nag biliganes palopit anilivan."

⁴⁵ Tutan isap Galiliy mo ibwein ninous min-Galiliy, peinan bo ines Yelusalem, sagal silmanin, bo ikines Yeisuw nawotet sagal towen waseg.

⁴⁶ Vayuwein mo in Ken, wawnuwan Galiliy, kweiboug nivag yevagam to mo imlavag wayn.

Gabman nises, natun ikatoun ven Kapaneyum waseg; natun kudataw.

⁴⁷ Gabman towen iligen Yeisuw bo ilisow Yudiy, meinoy neim Galiliy; mapuna inek Yeisuw, ilana, "Kum, biten, natug kudataw kukin, bo ikatoun avakaein. Adok kakita bikanig. Kuvag beibwein."

⁴⁸ Yeisuw ilana, "Magat bukukines wotet tawtoun, mamagina naman mulin Yowbad, mo bukusimounids. Kukin gog nag, bo nag."

⁴⁹ Iw to Gabman, ilana, "Kum, kukin natug. Mata ge bikanig!"

⁵⁰ Yeisuw ilana, "Kuyum kun. Natum bo ibwein." Gabman mo isimounid peinan Yeisuw anilivan; iyum in silmanin naven.

⁵¹ Iwloubus ininoun ee... ilivatus natouwat mwasanin; bo nikatulags nimimeis, ilansa, "Natum bo ibwein."

⁵² Gabman ikatiganes, ilana, "Asinayin mo ibwein?"

Ilansa, "Nov, yanay kansow, mo iloulun won. Ankatoun bo ikous."

⁵³ Taman mo inuway nov yanay anatut kansow, Yeisuw nilivan, "Kuyum kun. Natun bo ibwein"; mo isimounids sen nagamag asibabaw-wan.

⁵⁴ Tut towen Yeisuw nilisow Yudiy, meinoy neim Galiliy, naman mulin kwayuwein ivag, peinan Gabman natun towen ivag mo ibwein.

Yevagam wadadan ivag teitan mo ibwein

¹ Kweitan tut wankuyeim, Yeisuw mo ikatulag in Yelusalem, min-Yudiy sisagal silmanin. ² Yelusalem waseg, yevagam kweitan; yagan ag-Ibliw "Beteseid", sip sikoukwed walasin. Tavalel bunanim wadadan yevagam. ³ Bunsiyas bunatum takatouns immasis, ikayamats beibwab yevagam. Takatouns tasiyas ikaw mites mwasanin, takagayals mwasanin, tasiyas ipams, takatounsa babaws-wan. ⁴ (-)

⁵ Kudataw teitan immasis, ankatoun nises bweilim sinwatoun kweinim kweitoun.

⁶ Yeisuw ikin taw towen, ikakin nagwadiiven ankatoun nises, ilana, "Tab sivinam bukubwein?"

⁷ Takatoun ilana, "O guyaw, ta-mawanbabwein. Igaw yevagam beibwab ta-kweitan gamag bilabeig vagan banuw waseg. Igaw bayokon banoun ban wayevagam, teitan gog bo imug in inuw."

⁸ Yeisuw ilana, “Kutamanaw, kukow musag, kunoun.” ⁹ Nuwanaw taw towen mo ibwein, ikow nasag, inoun.

Yam towen Sadad, min-Yudiy siS̄abat, tapwäloul peinan. ¹⁰ Min-Yudiy ikines towen ikokew inasag, idibakes; ilansa, “Nagein S̄abat. Nag kadilok bukukow musag.”

¹¹ Ikatimop asilivan, ilana, “Teitan gamag nivageig mo abwein mtowen bo idibakeig, ilana, ‘Kukow musag, kunoun.’”

¹² Ikatiganes, ilansa, “Kavel taw towen nidibakeim ‘Kukow musag?’” ¹³ Togo nag bikakin, peinan Yeisuw bo inoun; gamag singay babaw ven towen.

¹⁴ Wankuyeim Yeisuw mo iban taw towen Yowbad wanbunatum, idibek, ilana, “Yakoum bo kubwein amkwatoun waseg. Awoum amsinap kalbaleb kuvag vayuwein; mata kalbaleb singay avakaein mo bukulouvat geg.”

¹⁵ Taw towen mo inoun inekes min-Yudiy tasiyas, ilana, “Mtowen Yeisuw ivageig mo abwein.” ¹⁶ Mapuna ikamliwes Yeisuw, peinan wotet towen niwtel yam S̄abat waseg.

¹⁷ Yeisuw ikatimop asilivan, ilana, “Tamag yam babaw iwwotet ee... nagein gog igawa iwotet. Yey bo mawan, awwotet-wan.”

¹⁸ Mapun min-Yudiy singaya sivines beiweiys Yeisuw, idokes ansinap akweiya kalbaleb; kweitan igulek S̄abat nakaleiwag; kwayuwein gog idok Yowbad Taman tatonen, mamagina idoki ansinap bo ikadilok tatonen.

Yowbad Natun nakaleiwag tonen

¹⁹ Iw to Yeisuw, ilana: “Yowbad Natun yey. Aw-wotet kadilokeig bawtel gunawotet tatoneig, ne? Tamag nawotet akin iwwtel. Aveiyag Tamag ivvag, Natun yey mo avag mawan. Nag kweitan tobwag wotet bawtel, nag. ²⁰ Tamag gog isiwayoub waseg Natun yey, nawotet babaw-wan aveiyag ivvag, mo ikatimlakeig Natun yey. Igaw singay tawtoun wotet mo bikatimlakeig Natun yey. Yakamiy bukukines, mo beisom ninoumiy. ²¹ Tamag ivag takanigs mo imovs vayuwein, mawan-vak Natun yey asekes simwamov, kalisyi sivinag.

²² “Tamag nag bikatukin bikaleiwag gamag sikalbaleb o sikamnabwein wasigeis. Kaleiwag towen bo isekeig Natun yey, vagan kid bakaleiwag gamag babaw wasigeis.

²³ Gamag babaw ivn̄ases Tamag, peinan Yowbad. Bo isekeig Natun yey gunakaleiwag towen vagan kid gamag babaw mo bivn̄aseigs yey, mawan ivn̄ases Tamag. Kukin kal nag ivn̄aseig yey, mawan-vak nag ivnas Tamag, mtowen nikayabeig nam.

²⁴ “Mounid adibakeimiy, kal yak bukuligen aygag, o bukusimounid waseg towen nikayabeig nam, e, mwamovam bises bisigeg. Yowbad nag biyateleim, nag; peinan kanig bo kulisow, mwamovam bo kuban.

²⁵ “Mounid adibakeimiy, tut kadiyakus, nagein gog nises tut towen, tasiyas takanigs bo biliganes aygag, Yowbad Natun yey; e, kalisyi biliganes mo bimwamovs. ²⁶ Tamag tonen tamwamov, mawan-vak mwamovag tatoneig bo itam waseg Natun yey. ²⁷ O peinan bo amlavag Gimilitoun, bo isekeig gunakaleiwag vagan bamop gamag asisinap wasigeis.

²⁸⁻²⁹ “Awoum bisunasun ninoumiy peinan agulivan towen. Igaw tasiyas wakaluwgwes nisesus, igaw biliganes aygag mo bisaps; tasiyas siwotet bwein beikits waseg mwamoves bo bisigagas; tasiyas siwotet kalbaleb beikits vagan kid bamop asisinap kalbaleb.

Tasiyas ilivans livānen Yeisuw

³⁰ “Nag kadilokeig aveiyag tatoneig bawtel; nag. Mawan baligen, mawan-vak bakaleiwag; o gunakaleiwag didumwal. Peinan nag bakaleiwag nanoug tatoneig; nag. Nanon gog towen nikayabeig nam bakaleiwag. ³¹ Kukin livāneig balivan, nag balivan mounid; nag. ³² Teitan gog livāneig nilivan; akakin geg mounid anilivan towen.

³³⁻³⁴ “Nukukwayabes gamag mwasanin inekes Yon iliganes anilivan mounid, mo ikatpeles isekeimiy. Livāneig bo isekeimiy. Tage nag ivag sivinag gamag asilivan livāneig waseg billivans, nag. Livan towen bo adibakeimiy vagan kid Yowbad mo bikatinabweimiy.

³⁵ “Mtowen Yon mamagina wodam, mititeilin avakaein waseg nigidaged, o bo ivag sivinamiy kumw̄asaws tut nag biveiyov mititeilin towen waseg. ³⁶ Livaneig Yon nilivan. Tage livaneig tawtoun nises waseg gunawotet, peinan gunawotet tawtoun. Wotet towen Tamag nisekeig bawtel beikous. Kukin kalisiy yakamiy bukukines gunawotet towen nawwtel mo bukukwakins Tamads nikayabeig nam.

³⁷⁻³⁸ “Tamag tonen livaneig nilivan. Yakamiy gog nag kweitan tut kuliganes aygan, o nag kukines magin, nag. Aygan nag bises waninoumiy, peinan nag kusimounids waseg yey; Yowbad nikayabeig mo nam. ³⁹ Bukitab waseg kunineivs amisinap; kudokes kid bukub̄anes mwamovamiy towen bises bisegeg. Nag gog; livaneig yey nises Bukitab waseg. ⁴⁰ Kuvinis Bukitab, tage nag sivinamiy bukumekeigs vagan kid mo basekeimiy mwamovamiy towen.

⁴¹⁻⁴² “Nag ivag sivinag ven watinow gimgilis yakamiy bukuyakawaneigs, nag. Peinan akakina nag ivag misiwayoub waseg Yowbad. ⁴³ Yey nam Tamag yagan waseg, mo kupiyaveigs. Magat teitan beim yagan tonen waseg, adok bukutams gamag towen waseg.

⁴⁴ “Ta-mawan bukusimounids, peinan simsimiya kuyakawaneimiy; tage nag ivag sivinamiy Yowbad anmwanet biyakawaneimiy.

⁴⁵ “Awoum kudokes bayateleimiy wamatian Tamag; nag. Town Moses kunmises bilabeimiy, togo bo biyeteleimiy. ⁴⁶ Kukin bukusimounids Moses waseg, mapuna bukusimounids waseg yey, peinan towen Moses livaneig yey nilel. ⁴⁷ Peinan nag kusimounids Moses nakalelel waseg, ta-mawan bukusimounids agulivan waseg.”

6

Ivakamus gamags kweinim tawsan

(Matiw 14:13-21; Mak 6:30-44; Luk 9:10-17)

¹ Yeisuw anilivan towen ikous mo inoun in palata-dadan yevagam avakaein yagan Galiliy, yagan kweitan Tibeliyas. ² Singay babaw gamag ikikuns, peinan bo ikines naman mulin takatouns wasigeis, ivages mo ibweins. ³ Ikatulags koy kweitan, siney navamul, mo isinis. ⁴ Bo kadiyakus tutan sagal, min-Yudiy sisagal, yagan Kaltuwon.

⁵ Yeisuw mo itamnow matan, ikin singay gamag babaw bo nimeis, idibek Pilip, “Avanuy bitaymiyis kaeis tasiyas beikams?” ⁶ Ilivan mawan vagan biyakwen Pilip. Yeisuw bo ikakin aveiyag mo bivag.

⁷ Pilip ilana, “Bitaymiyis kan, lakatuy kina nag kadilok kakit gamag siyas katanok katanok beikams.”

⁸⁻⁹ Inavamul teitan, Saymon Pita bwadan, yagan Andiluw, mo ilana, “Gwad towen nises, anbled kekel kweinim, in mwanay; na-ikadilok gamag siyas singay babaw.”

¹⁰ Yeisuw ilana, “Kunukwes gamag babaw bisinis.” Ven towen awuyow babaw nisesus, mo isinis wakunuwatan awuyow, tawaw babaw, babiweis mamagina kweinim tawsan.

¹¹ Yeisuw ikow bled towen, ikalin nuwan Yowbad waseg, mo ikikivis, isisekes inavamul, ivvageins gamag babaw wasigeis, tasiyas isinis awuyow wakunuwatan. Asiyin mawan, mawan sivines mo iseikes, ikams.

¹² Ikamuweips ikous, mo inukwes navamul, ilana, “Kusiyavis kan koubwag; awoum iyamkwen kan bises mav.” ¹³ Bled kweinim, gamag tasiyas kamkwam ikamwages, mo isiyavis; idagis wanuwan kaynad, bo ikalawt sinwatan kadiney kaynad.

¹⁴ O gamag tasiyas ikines naman mulin Yeisuw mwana nivag, mo ilansa, “Adok mounid palopit towen nitakaymates bo neim.” ¹⁵ Yeisuw ikakin gamag tasiyas sivines kid bimeis mo biyousis, binawes vagan bimlavag siking, mo inoun anmwanet-wan, ikatulag vayuwein in wakoy.

Inoun wakunuwatan yevagam

(Matiw 14:22-27; Mak 6:45-52)

¹⁶⁻¹⁷ Kwayav waseg inavamul iwloubus ineis wakawalaw, inibwis siwag, mo ikalavis bineis Kapaneyum, palata-dadan yevagam. Ibwares peinan bo idadub; tage Yeisuw taineikes. ¹⁸ Yag avakaein mo itow; kaysay ivag igegeyous.

¹⁹ Ikalāvis ee... katanoka veit, mo ikines Yeisuw inoun wakunuwatan yevagam; bo isineikim, bo ivag aspwayat.

²⁰ Iwage Yeisuw ilana, “Yey! Awoum kuweneigs!” ²¹ Sivines kid Yeisuwbeitouw wawag. Nuwanaw mo itālags wasiven.

Yeisuw kan mwamov silmanin

²² Neiyam-nen gamag babaw igawa nisesus palata-dadan yevagam. Nov bo ikines katanoka wag wakawalaw; ta-kwayuwein nises; nag. Ikakins Yeisuw nag itouw sen navamul; siyas-wan itouws ikalāvis. ²³ Tage Tibeliyas wugwanen mwasanin mo ilugs kadilkusana ven towen Yeisuw nivakamus tasiyas, waseg kan towen ikalin nuwan Yowbad waseg. ²⁴ Gamag tasiyas mo ikakins ven makaw; Yeisuw nag ises, navamul nag isesus. Mapuna itouws, ikalāvis ineis Kapaneyum, mo inineivs Yeisuw. ²⁵ Ininiveivs mo ibanes Yeisuw wayevagam wanpalatan towen, ilansa, “Tamwey, asināvin nukum?”

²⁶ Yeisuw mo ikatimop ages, ilana, “Mounid adibakeimiy, nag kuneveigs peinan kukines namag mulin; nag. Bogo avakamumi, kukwamuweips, to kuneveigs.

²⁷ “Awoum kuwwotets peinan kan towen bipsapwas. Tage bweina kuwwotets peinan kan towen silmanin mwamovamiy nag beikous. Gimgilitoun yey basekeimiy kan towen. Tamag Yowbad bo ikatigikeig wotet towen silmanin.”

²⁸ Iliganes, mo ilansa, “Aveiyag bakavag vagan bakawtel Yowbad nawotet?”

²⁹ Iw to Yeisuw, ilana, “Yowbad nawotet mamagina bukusimounids waseg yey, peinan nikayabeig nam.”

³⁰⁻³¹ Tasiyas ilansa, “Namam mulin aveiyag bukuvag, vagan bakakin mo bakasimounid. Tamumwey pwamug-o wanawoud kaeis yagan mana; livānen nises Bukitab waseg, mama-magina, ‘Kaeis libālab avanin issekis, ikamkwams.’ Tage yakoum, aw-wotet bukuwtel?”

³² Yeisuw mo ilana, “Mounid adibakeimiy, Moses nag isekeimiy libālab avanin; tage Tamag bisekeimiy libālab avanin mounid-wan. ³³ Kan towen meinoy neim walbalab vagan Yowbad bisekeimiy mwamovamiy, ven watinow gimgilis yakamiy.”

³⁴ Mapuna idibakes Yeisuw, ilansa, “O guyaw, kadiloka kussekem kan towen; tutababaw bakakamkwam.”

³⁵ Yeisuw ilana, “Yey kan, mwamov silmanin; kal yak bukumekeig nag beivag amumoun; o kal yak bukusimounid waseg yey nag beivag amdak.

³⁶ “Kweiboug adibakeimiy, peinan nukukineigs tage nag kusimounids waseg yey.

³⁷ Gamag tasiyas Tamag bissekeig mo bimmekeigs kid; o yey nag bapiyaves gamag tasiyas; nag.

³⁸ “Peinan yey bo alisow libālab, abus am ven watinow, silmanin bawotet nanon towen nikayabeig Tamag, nanoug tatoneig awoum.

³⁹ “Towen nikayabeig sivinan bisekeig gamag, o sivinan bikayus silmanin gungamag babaw tasiyas, nag tatanok bikabwag; o basekes mwamoves vayuwein, igaw nakabiyokous tut waseg. ⁴⁰ Tamag nanon bo mawan. Kal yak bukukin Natun yey, o bukusimounid waseg yey, mwamovam yak mo bises bisigeg. Igaw nakabiyokous tut waseg, mo bavageim bukukit vayuwein.”

⁴¹⁻⁴² Yudiy gimgilis ivtokes livan Yeisuw, peinan ilana, “Yey libālab avanin, abus am watinow”; ilansa, “Adok towen Yosep natun, Yeisuw. Taman, inan takakins; aveiyag silawun anilivan, ‘Abus am watinow?’”

⁴³⁻⁴⁴ Yeisuw ikatimop asilivan, ilana, “Awoum simsimiyas kuvtokays livan. Misinaka takayabeig Tamag bibiteil gamag, mo bimekeig; nag teitan bimekeig mav; nag. Tasiyas bimekeigs bavages mo beikits vayuwein, igaw nakabiyokous tut waseg.

⁴⁵ “Palopit teitan nilivnek, anilivan nises Bukitab waseg mamagina,

‘Yowbad mo bikatimlakes tasiyas tababaws.’

Mapuna tasiyas biliganes Tamag aygan, bimulis tasiyas, bikakins, mo bimekeigs, asibabaw-wan. ⁴⁶ Nag teitan bikin Tamag magin; nag. Misinaka yey; peinan kweiboug soug Tamag nakases.

⁴⁷ “Mounid adibakeimiy, kal towen tasimounid, mwamovan tonen nag beikous.

⁴⁸ “Yey kan mwamov silmānin. ⁴⁹⁻⁵⁰ Tammwayas siyas tibudayas bo ikams kan yagan mana wanawoud; ikinkanigs. Tage kan towen libālab avanin; bo neim watinow. Kukin kal beikam, nag bikanig; nag.

⁵¹ “Yey libālab avanin, mwamov silmānin; kal beikam waseg yey, mwamovan towen nag beikous. Kan towen woug tatoneig, bo basekeimiy ven watinow gimgilis silmānin mwamovamiy yakamiy.”

⁵² Mapuna min-Yudiy mo ikamminimans sisiyas; mwasanin ilansa, “Ta-māwan taw towen bisekeids won tatonen bitakams.”

⁵³ Iw to Yeisuw, ilana, “Mounid adibakeimiy, kukin nag bukukwams woug, Gimilitoun yey, ta-māwan bukumovs. Kukin nag bukumoums buyāvig, nag bukumovs; nag.

⁵⁴ Kukin kal beikam woug o beimoum buyāvig, mwamovan tonen bises bisigeg; igaw nakabiyokous tut waseg, mo bavag gamag towen bitamanaw vayuwein. ⁵⁵⁻⁵⁶ Peinan woug kan tonen, buyāvig soup tonen. Kukin kal beikam woug, o beimoum buyāvig, soug towen bakases, o yey bases waseg gamag towen.

⁵⁷ “Tamag Tamwamov nikayabeig nam; Tamag mwamovan waseg əmov; māwan-vak kavel bikamwig mo bimwamov waseg mwamovag. ⁵⁸ Kan towen meinoy neim walbalab mounid yey; nag māwan mana towen tammwayas ikamkwams, mo ikanigs; nag. Kukin kal bikamwig, mwamowan bises bisigeg.”

⁵⁹ Igaw ikatimlakay ven Kapaneyum waseg, ansinap towen igeiguy wanuwan sinagog.

Livanen mwamov bisigeg

⁶⁰ Navamul mwasinis ikatilutegs anilivan towen, ilansa, “Keikay sinap towen, ta-kal biligen.”

⁶¹⁻⁶² Yeisuw ikakina wananon inavamul bo ivtokes livan, peinan anilivan keikay, mapuna idibakes, ilana, “Tabta igege ninoumiy, sinap towen, ne? Magat bukukines Gimilitoun yey bayum bāmwen ban walbalab, adok singaya bisunasun ninoumiy. ⁶³⁻⁶⁴ Yowbad Kululuwan bisekeimiy mwamovamiy; ta-māwan kalivimi bilabeimiy; nag. Livan towen nasekeimiy, kululuwamiy o mwamovamiy silmānin; tage mwasanin yakamiy ta-kusimounids agulivan towen.” Peinan wanmugwana Yeisuw ikakin kalisiy bisimounids waseg, o kal bisilakod waseg.

⁶⁵ Ilana, “Peinan kweiboug adibakeimiy: Misinaka Tamag beitam wasigeis gamag kalisiy bimekeigs. Nag teitan bimekeig mav.”

⁶⁶ Ilivan mamagin, navamul mwasinis mo ipiyaves, ilisawes, inounas. ⁶⁷ Yeisuw mo idibakes navamul sinawatan asteiy, ilana, “Sivinamiy-tan bukuneis yakamiy?”

⁶⁸⁻⁶⁹ Iw to Saymon Pita, ilana, “O guyaw, bakalisaweim, kal mo bakanek? Yākoum waseg livānen mwamovem bises bisigeg. Kasimounid o kakakin mounid yākoum Yowbad naMesay yākoum.”

⁷⁰⁻⁷¹ Yeisuw mo idibakes, ilana, “Bo adaweimiy, sinwatan amiteiy; tage Seitan nises waseg tatanok gamag.” Livānen towen Yudas, taman yagan Saymon Iskaliyot; mtowen waseg bod towen, igaw mo bisilkod Yeisuw.

Yeisuw budan nag isimounids

¹ Wankuyeim Yeisuw mo ininoun ven Galiliy waseg. Nag bininoun Yudiy waseg, peinan mwasanin Yudiy sivines kid bikatiates. ²⁻⁴ Kakita bisagals min-Yudiy sisagal towen waseg niwlules tavālel. Budan Yeisuw mo idibakes, ilansa, “Kunoun kun Yudiy, vagan kid muvamul mo bikines mukwawotet. Kukin kal bisesuna wanven bisowm nawotet, nag bivakaein butun tatonen. Yak māwan, kukin bukutawtoun, kadiloka gamag babaw bikines miwotet.” ⁵ Budan-vak nag isimounids waseg, mo ilivans māwan.

⁶ Yeisuw ilana, “Yakamiy bukuneis yam babaw bwein-wan, tage yey nag; igaw tutag waseg mo banoun. ⁷ Ta-māwan ven watinow gimgilis bikamliweimiy; tage bo

ikamliweigs peinan bo akamtel asisinap kalbaleb. ⁸ Yakamiy kukwatulags kuneis sagal towen, yey bases. Igaw tutag beibwein, mo baw.” ⁹ Ilivan ikous, isesuna ven to Galiliy.

Yeisuw Sagal Tavæl waseg

¹⁰ Yeisuw budan ikatulags ineis sagal towen. Yeisuw anmwanet mo inoun ivapananein, peinan nag sivinan gamag babaw bikakins. ¹¹ Min-Yudiy ininineivs Yeisuw sagal towen waseg, ilansa, “Avanuy misikey?”

¹² Gamag babaw ikatimwælags, livænen Yeisuw illivans. Mwasanin ilansa, “Taw towen kamnat.” Mwasanin gog ilansa, “Nag, peinan ikatidavidav gamag wasigeis.” ¹³ Tage asilivan kweitan kweitan, nag bilivans kamnat waseg, ikagsowums, peinan iwenes min-Yudiy situwæveks.

¹⁴ Watapwan sagal Yeisuw mo isiw in Yowbad wanbunatum, ikatimlakay. ¹⁵ Min-Yudiy mo isunasun ninous, ilansa, “Amawan nikakin ansinap towen, peinan ta-iskul avakaein.”

¹⁶⁻¹⁷ Yeisuw ikatimop asilivan, ilana, “Ta-agusinap tatoneig, nag. Towen nikayabeig nam, ansinap tonen. Kukin sivinam bukuwtel Yowbad nanon, mo bukukwakins avanuy meinoy neim sinap towen, takinew Yowbad waseg, o takinew agusinap tatoneig. Bukuwtel Yowbad nanon mo bukukwakin.

¹⁸ “Kavel bilivan ansinap tatonen, sivinan kid bivakaein butun tatonen. Tage kukin kal bikanow natovek aygan, o sivinan butun natovek bivakaein, towen gamag kamnat, didumwal.

¹⁹ “Adok Moses nisekeimiy Yowbad nakaleiwag; tage nag teitan yakamiy bivnas nakaleiwag towen? Wawun sivinamiy bukuweigs?”

²⁰ Iweis gamag babaw, ilansa, “Takabalæwein yækoum! Nag kal beiweim! Adok Baloum bo iyousim.”

²¹ Yeisuw ikatimop asilivan, ilana, “Nawtel gunawotet bwanabwein katanok, Sæbat waseg, mo igege ninoumiy. ²² Tage yakamiy kubwabwes apwaw momwan yam Sæbat waseg, peinan Moses nakaleiwag mæwan. (Nakabsilamaw sinap towen tammwayas wasigeis, wankuyeim Moses anatut igawa ikokews sinap towen.)

²³ “Peinan kubwabwes momwes Sæbat waseg, vagan nag bukugulekjes Moses nakaleiwag, aveiyag wawun kwavikuns takatoun navag neibwein Sæbat waseg? ²⁴ Kikit kukwakins, kwaleiwags, kulansa, ‘Towen bwein; towen kalbaleb.’ Bo ibol mikaleiwag peinan nag kukwakins beibwein. Kadiloka kuneves silawun sinap vagan bukwaleiwags bwein.”

Tabta mtowen Kelis-tan?

²⁵⁻²⁷ Min-Yelusalem mwasanin iliganes anilivan, ilansa, “Adok gamag towen datuwæveks ininineivs mtowen, sivines kid bikatimates. Tut gog towen illivan wamnat, o nag ikatimapus aygan. Tabta mounid ikakins taw towen Mesay Kelis? Adok nag. Adok watinow gamag towen, peinan takakins avanuy meinoy neim; tage igaw Kelis beim, nag kal bikakin avanuy meinoy yay.”

²⁸ Igawa ikatimlakay Yowbad wanbunatum, aygan avakaein ilana, “Mounid kukwakins yey, o kukwakins avanuy manoy nam; tage teitan nikayabeig mo nam. Yey gunakaleiwag nag. Mtowen ikaleiwag, mounid ansinap kamnat; tage nag kukwakins mtowen. ²⁹ Yey akakin mtowen, peinan soug towen nakases, mo ikayabeig nam.”

³⁰ Iliganes anilivan towen, singaya igege ninous, iyokons kid biyousis vagan biyateles, tage nag kadilokes peinan nag ilouvat Yeisuw inakanig tutan; igaw-wan.

³¹ Singay babaw gamag ikatilutegs, mwasanin gog isimounids waseg, ilansa, “Igaw Kelis beim, tabta nawotet bitawtoun mo bitamap waseg towen nawotet? Adok nag.”

Ikayabes siplismans vagan biyousis Yeisuw

³² Gamag babaw livænen Yeisuw ikatimwælags mæwan; tasiyas Palisiy mo iliganes; mapuna tasiyas Palisiy sisiyas tanuwgwes lun situwæveks mo ikayabes siplismans vagan biyousis Yeisuw, yatal silmanin.

³³⁻³⁴ Yeisuw mo ilana, “Sigwey yakamiy basesun tut nag biveiyov, mo banek towen nikayabeig nam. Bukuneveigs, nag bukubaneigs; ta-mawan bukuwekeigs; nag.”

³⁵⁻³⁶ Min-Yudiy sisiyas mo illivans, ilansa, “Avanuy sivinan bein, mo yakids nag bitabanes. Adok sivinan binekes sidayas min-Yudiy tasiyas misikes sisiyas kadiveiyov ven gimgilis, mo bikatimlakay tobwag ven gimgilis wasigeis. Wawun anilivan towen, ‘Bukuneveigs, nag bukubaneigs, ta-mawan bukuwekeigs?’”

Soup bilatay mwamov silmgnin

³⁷⁻³⁸ Yam towen, nakabiyokous sagal waseg, Yeisuw mo itamanaw, aygan avakaein ilana, “Kal yak amdk, kadiloka kumekeig kumoum. Kukin bukusimounid waseg ye, yakkoum livanen Bukitab nises mamagina, ‘Lay kunus bilatays gamag towen wanuwan, soup towen beibwab mwamov silmanin.’”

³⁹ Anilivan towen, livanen gog Yowbad Kululuwan, wasigeis tasiyas tasimounids waseg Yeisuw, peinan Yowbad mo bisek Kululuwan wasigeis tasiyas. Igaw Yeisuw bitawtoun avakaein, beiyum binek Taman, Kululuwan mo beibus bimekes gamag tasiyas tasimounids Yeisuw waseg.

Gamag babaw ninous kweitan kweitan

⁴⁰⁻⁴² Gamag mwasanin iliganes anilivan towen, ilansa, “Adok mounid towen palopit towen takaymates bimug Mesay waseg.” Tage gamag mwasanin ilansa, “Mtowen Mesay tatonen.” Mwasanin gog ilansa, “Mesay Kelis nag beinoy Galiliy. Adok nag. Peinan livanen nises Bukitab waseg, ilana, ‘Mesay natovek Deibid’ o ‘Mesay mo beinoy Betelem,’ Deibid naven tatonen.”

⁴³ Mapuna gamag babaw ilivis, mwasanin ninous kweitan, mwasanin ninous kweitan.
⁴⁴ Mwasanin gog sivines biyousis Yeisuw, tage nag teitan iyous; nag.

Takaleiwags ven Yelusalem ipiyaves Yeisuw

⁴⁵ Tasiyas plismans iyum inekes tanuwgjes lun situwaveks sisiyas tasiyas Palisiy. Situwaveks mo ikatiganes, ilansa, “Aveiyag wawun nag kuyousis Yeisuw?”

⁴⁶ Iweis tasiyas plismans, ilansa, “Nag kweitan gamag anilivan mawan taw towen anilivan.”

⁴⁷⁻⁴⁹ Tasiyas Palisiy mo idibakes, ilansa, “Adok yakamiy-vak bo ikatidavimiy. Ta-kweitan guyaw isimounid waseg gamag towen; nag. Ta-kweitan Palisiy; nag. Tage tasiyas gamaga babaw, kaleiwag itagouwawes, isiplaves kaleiwag, mapuna Yowbad bimop sikalbaleb.”

⁵⁰⁻⁵¹ Nikodimos sisiy tasiyas nisesus; kweiboug nilakwen Yeisuw; mtowen mo ilana, “Tab kadilok bitasilkodes taw towen? Adok nag. Dakaleiwags nises mamagina, wanmugwana bitakatiganes gamag, vagan kid bitakakins ansinap o nawotet amawan; ikous, mo bweina bitakaleiwags.”

⁵² Iweis tasiyas, ilansa, “Adok yakkoum-vak gum-Galiliy yakkoum! Kunev Bukitab wanuwan; ta-kweitan palopit bisap Galiliy waseg.”

⁵³ Ikous, gamag tatanok tatanok mo inineis wasibwan tatineis.

Natan vin iyousis peinan ikanavaya mav

¹ Yeisuw mo ikatulag in wakoy yagan Oliv. ² Walalayis mo iyum in Yowbad wanbuntum; gamag babaw mo inekes, isin, ikatimlakes.

³ Takatimlakeins kaleiwag sisiyas Palisiy mwasanin mo imeyes natan vin nibanes bo imasis son teitan taw; vin manawen mo iseinis wanuwein. ⁴⁻⁵ Idibakes Yeisuw, ilansa, “Tamwey, vin manawen bo igeg ansinap. Na-imasis son namwan; nakaban imasis son tobwag taw. Moses nakaleiwag mamagina, kadiloka bitaweis dakul waseg vinay kalisiy ikanavaya mav. Yakkoum aveiyag bukulivan?”

⁶ Ilivans mawan vagan biyakwanes Yeisuw. Magat beibol anilivan, mo biyateles. Yeisuw gog istotow, naman waseg mo ilel wapwepway. ⁷ Igawa ivvaluts asilivan, ikatiganes Yeisuw, kaleiwag towen silmanin. Mapuna itamanaw, ilana, “Kal yakamiy ta-ivag ansinap kalbaleb, wanmugwana dakul bignilov, babaw yakamiy wankuyeim mo bukulivelovs, beimat.” ⁸ Ilivan ikous, vayuwein mo istotow ilelel wapwepway.

⁹ Iliganes anilivan, mo ininuways, tatanok tatanok mo inounas ineis, tamumwey imugwas, gamaga babaw wankuyeim. Ikous, asteiyun-wan nisesus son vin manawen itamanaw wamatian. ¹⁰ Yeisuw mo itamnow matan, ilana, “Vin yak, avanuy tasiyas tayateleims? Tabta beiweims?”

¹¹ Ilana, “Nag, bo ineis, asibabaw-wan.”

Yeisuw ilana, “Yey mawan; nag bayateleim; nag baweim. Kunoun kun. Awoum kuvgavaw amsinap towen kalbaleb.”

Yeisuw ven watinow gimgilis sikamnat

¹² Vayuwein Yeisuw mo idibakes, ilana, “Yey ven watinow gimgilis sikamnat, yey. Kal yak bukwabkunig, dadub mo beikous muked waseg, peinan bo ivanoum mukwamnat, mwamovam silmanin.”

¹³ Tasiyas Palisiy mo idibakes Yeisuw, ilansa, “Nag kasimounid amlivan, peinan livaneim tatoneim.”

¹⁴ Iw to Yeisuw, ilana, “Livaneig towen alivan, bo mounid-wan; peinan akakin avanuy manoy nam o avanuy ban; yakamiy gog nag kukwakins avanuy manoy nam o avanuy ban. ¹⁵ Ven watinow sinapun waseg kukwaleiwags yakamiy; yey gog nag bakaleiwag wasigeis gamag mwasinis; nag. ¹⁶ Magat yey bakaleiwag, gunakaleiwag mounid-wan, peinan nag agmwanet bakaleiwag. Towen gog nikayabeig nam, Tamag, soug nakases. Mapuna makaleiwag mounid-wan.

¹⁷ “Livan nises wamikaleiwag tatineimiy mamagina: Magat asteiy gamag asilivan bilatans katanok-wan, asilivan bo mounid. ¹⁸ Livaneig amateiy nakalivan, soug Tamag nikayabeig nam.”

¹⁹ Tasiyas mo ilansa, “Avanuy Tamam?”

Yeisuw gog ikatimop asilivan, ilana, “Yakamiy nag kukwakins yey, o nag kukwakins Tamag. Magat bukukwakins yey, mo bukukwakins Tamag.” ²⁰ Igawa Yeisuw ikatimlakay Yowbad wanbunatum, anilivan towen nilivan money Buntuman wanuwan; tage nag kal iyous, peinan nag ilouvat tutan bikanig. Igaw-wan.

Igaw ban ta-bukuwekeigs

²¹ Vayuwein mo idibakes, ilana, “Bo banoun mo bukunineveigs, nag gog; bo bukumtams son amisinap kalbaleb, peinan ta-mawan bukuwekeigs.”

²² Min-Yudiy tasiyas mo illivans, ilansa, “Adok bo tonena bikatimet peinan ilana, ‘Ven towen ban, ta-mawan bukuwekeigs?’”

²³ Yeisuw gog idibakes, ilana, “Yakamiy watinow gimgilis yakamiy; yey gog wanakaew gimgeilin yey. Yakamiy miven towen watinow; yey gunaven kweitan. ²⁴ Bo adibakeimiy bukumtamats son amisinap kalbaleb. Kukin nag bukusimounids yey Mesay yey, mo bukumtamats son amisinap kalbaleb.”

²⁵⁻²⁶ Ilansa, “Kavel yak?”

Yeisuw ilana, “Mawan kweiboug nakatimlakeimiy. Kadilokeig livneimiy babaw balivan o bakaleiwag wasigeis yakamiy; nag gog, peinan towen nikayabeig nam ansinap towen mounid, anilivan tonen naligen, assekeimiy ven watinow gimgilis yakamiy.” ²⁷ Yeisuw bo ilivan livanen Taman, tage tasiyas nag ikakins.

²⁸ Yeisuw ilana, “Igaw wakamweilok bukutamnaweigs Gimilitoun yey, mo bukukwakins yey Mesay yey, o nag alivan gunakaleiwag tatoneig. Peinan Tamag nikatimlakeig mo alivan mawan anilivan tonen. ²⁹ Towen nikayabeig nam; soug towen nakases. Nag bilisaweig agumwanet bases. Peinan tuta babaw gunawotet bo ikadilok nanon waseg.”

³⁰ Tasiyas ikatilutegs anilivan towen, tage mwasanina isimounids waseg.

Sinap mounid bitokeim bukun wamnat

³¹⁻³² Min-Yudiy mwasanin bo isimounids waseg Yeisuw, mo idibakes tasiyas ilana, “Kukin tut babaw bukwakinawes agulivan yey, gunavamul mounid yakamiy. E, mo bukukwakins sinap mounid, vagan kid bilikumi y bukuneis wamnat.”

³³ Ikatimapus aygan, ilansa, “Yakamey Ebelam delen yakamey. Nag kweitan tut nakases wadeil; nag. Aveiyag wawun amlivan, ‘Bilikumi, bukuneis wamnat?’”

³⁴ Yeisuw ilana, “Mounid adibakeimiy, kal yak mukwawotet kalbaleb, mamagina tasiwun deil yakoum, peinan wanuwan dadub kuses. ³⁵ Tasiwun deil nag mawan tasiyas taginvens. Tage ven tanuwagan natun mo bises bisigeg. ³⁶ Magat Natun bitokeim tasiwun deil yakoum mo bukun wamnat, bo mounid bukusesuna bukusigeg.

³⁷⁻³⁸ “Yey akakin Ebelam tibun yakamiy, tage sivinamiy bukuweigs, peinan aygag nag isiw ninoumiy wanuwan. Adibakeimiy sinap towen igaw soug Tamag bo nakin, tage nag kuliganes. Yakamiy gog nukuliganes tibumiy anilivan, mo kuvvages mawan.”

Yakamiy tibumiy Seitan

³⁹⁻⁴¹ Iweis tasiyas, ilansa, “Tibum Ebelam.”

Yeisuw ilana, “Magat Ebelam tibun yakamiy, mo bukuwteles Ebelam nawotet. Tage sivinamiy bukuweigs yey, nasekeimiy livan mounid to naligen Yowbad waseg. Ebelam nag bivag mawan. Yakamiy kuwteles tibumiy nawotet.”

Iweis tasiyas, ilansa, “Inmayas nag ikanavays mav mo ikopwemas, nag. Yakamey tibum anmwaniet Yowbad.”

⁴² Yeisuw ilana, “Adok nag. Magat Yowbad tibumiy mo bukusiwyoubugs, peinan Yowbad waseg manoy nam. Yey gunakaleiwag nag; mtownen nikayabeig nam. ⁴³ Aveiyag wawun nag kukwakins agulivan? Adok peinan nag kadilokeimiy bukuliganes agulivan towen.

⁴⁴ “Yakamiy tibumiy Seitan; sivinamiy gog bukuwteles nanon tibumiy towen. Wan-mugwana tawayin gamag towen; sinap mounid bo ipiyev, peinan ta-ivag ansinap mounid. Misikena tayyaweid towen, tuta babaw anilivan yaweid. Inada tayyaweid mtownen.

⁴⁵ “Yey gog, agulivan mounid, mapuna kupiyaves. ⁴⁶ Kal yak ikadilokeim bukwavteg agusinap kalbaleb? Adok nag kavel. Kukin agulivan mounid, aveiyag wawun nag kusimounids waseg? ⁴⁷ Tage Yowbad angamag bo biligen anilivan. Yakamiy gog nag, nag bukuliganes anilivan, peinan tobwag gamag yakamiy.”

Yey amug Ebelam ikuyem

⁴⁸ Min-Yudiy tasiyas ikatimapus aygan, ilansa, “Adok mounid amalivan, ‘Yakoum gum-Samaliy yakoum, Baloum bo iweim.’”

⁴⁹ Yeisuw ilana, “Nag. Nag iweig Baloum. Bo avnas Tamag Yowbad, tage yakamiy nag kuvnaseigs yey.

⁵⁰ “Nag ivag sivinag yakawanag bivakaein, nag. Teitan gog sivinan yakawanag bivakaein; mtownen mo bikaleiwag. ⁵¹ Mounid adibakeimiy, kukin kal bivnas agulivan, nag bikanig, nag; bo bises bisigeg.”

⁵²⁻⁵³ Min-Yudiy tasiyas mo idibakes, ilansa, “Tut towen mounid kakakin Baloum bo iweim; peinan amlivan, ‘Kukin kal bivnas agulivan, nag bikanig, nag; bo bises bisigeg.’ Datoveks Ebelam bo ikanig. Tasiyas palopits kweiboug bo ikinkanigs ikous. Tabta bukulisow Ebelam, ne? Towen nikanig. Tasiyas palopits nikanigs. Kal yak kudok mugwamag nag bikanig?”

⁵⁴⁻⁵⁵ Yeisuw ilana, “Magat bayakawaneig tatoneig, bo balivana makaw. Tage Tamag iyakawaneig, mtownen kudokes miYowbad. Tage nag kukwakins towen. Yey akakin. Kukin balivan, ‘Yey nag bakakin’ mo bamlavag tayyaweid mawana yakamiy. Mounid akakin towen, akanow aygan.

⁵⁶ “Tabuds Ebelam imwasaw peinan iligen tutag bo bam. Mamagin ikineig, mo imwasaw avakaein silmanig.” ⁵⁷ Min-Yudiy tasiyas mo idibakes, ilansa, “Yakoum ta-ivag ambweilim sinwanim, mo kulivan, ‘Bo akin Ebelam.’ Takabalawein yak!”

⁵⁸ Yeisuw ilana, “Mounid adibakeimiy, yey bo amug; Ebelam anatut wankuyeim.”

⁵⁹ Iliganes anilivan towen, mo ikawes dakul vagan kid beiweiys; tage Yeisuw ivalel gamag inoun, ilisow Yowbad nabunatum.

9

Toukwaw ivag matan mo ikin

¹ Yeisuw inoun waked, ikin taw teitan, kweiboug-o inan ikop ikaw matan, o bo ivakaein igawa ikawkwaw matan. ² Yeisuw inavamul ikatiganes, ilansa, “Tamwey, aveiyag silawun ikaw matan? Silawun adok peinan taman, inan asisinap kalbaleb, o adok taw towen peinan ansinap kalbaleb?”

³ Iw to Yeisuw, ilana, “Nawoum! Nag peinan taman, inan asisinap, o nag peinan ansinap towen kalbaleb mo ikaw matan, nag; tage silmanin Yowbad nawotet bikamat taw towen waseg, bo neikaw matan. ⁴ Tut towen mamagina wudayam, kadiloka bitawteles nawotet towen nikayabeig nam; igaw beiboug, nag teitan gamag biwotet. ⁵ Igawa nases ven watinow, gamag babaw sikamat yey. Balisaweimiy mo bidadub mawan boug.”

⁶⁻⁷ Ilivan mawan ikous mo igiw wapwepway, giwun iyik, ilasipisoup pwepway, ikatipiiek matan taw towen, mo idibek, ilana, “Kun kuwid matam yevagam yagan Silowam.” [Wawun yagan towen “Kayob”.]

Iw gog, iwid matan, iyum im, matan bo ibwein. ⁸ Taw towen naven gimgilis mo ikines, sisiyas gamag tasiyas kweiboug nikines taw towen initoug waked, mo ilansa, “Adok towen taninitoug, tuta babaw nissin towen.” ⁹ Mwasanin ilansa, “Mtowen!”

Mwasanin gog ilansa, “Nag. Tobwag. Peinan magin mawan towen.”

Tage taw towen ilana, “Mounid yey!”

¹⁰ Ikatiganes, ilansa, “Amawan nukuvkek mo ikiplal matam?”

¹¹ Ilana, “Taw yagan Yeisuw igiw wapwepway, ilasipisoup, ikatipiiek matag, ilana, ‘Kun yevagam yagan Silowam, kuwid matam.’ An awid yevagam towen waseg, mo ikiplal matag.”

¹² Ilansa, “Avanuy taw towen?”

Ilana, “Seik-wan.”

Tasiyas Palisiy sivines bikakins silawun wotet towen

¹³⁻¹⁴ Gamag tasiyas mo itokes taw towen mwana neibwein matan, inawes tasiyas Palisiy wasigeis; peinan Sabat waseg Yeisuw neigiw wapwepway, ikatipiiek matan, mo ikiplal. ¹⁵ Tasiyas Palisiy mo ikatiganes taw towen, ilansa, “Amawan nukuvkek mo ikiplal matam?”

Ilana, “Gamag teitan ikow pwepway to bo ilasipisoup, ikatipiiek matag, awid, mo akin.”

¹⁶ Palisiy mwasanin mo ilansa, “Towen nag Yowbad nagamag. Peinan nag ivnas yam Sabat.”

Mwasanin gog ilansa, “Amawan takalbaleb biwtel naman mulin tawtoun, bwanab-wein? Adok ta-mawan.”

Mapuna ilivis, peinan ninous kweitan kweitan.

¹⁷ Vayuwein mo ikatiganes taw towen, ilansa, “Taw towen nivag matam ibwein, ansinap amawan? Aveiyag bukulivan yakoum?”

Ilana, “Mtowen palopit.”

¹⁸⁻¹⁹ Min-Yudiy situwaveks tasiyas nag isimounids towen toukwaw neibwein matan; idokes kid iyaweid. Mapuna idawes taman inan, imeis, ikatiganes vagan bisimounids sinap towen waseg. Ikatiganes, ilansa, “Tabta natun towen? Tabta ikaw matan igaw-o nukukop-yay? Amawan nagein mo ikiplal matan?”

²⁰⁻²¹ Ilansa, “Mounid nitum towen; nakakop-yay-o neikaw matan; tage amawan nagein mo ikiplal matan nag kakakin, o kal ivag matan ibwein nag kakakin. Kadiloka tonena bilivan, peinan bo ivakaein; bweina kwatiganes.”

²²⁻²³ Taman, inan asilivan mawan, peinan iwenes min-Yudiy situw̄aveks. Bogo nanawana sikaleiwag vagan gamag nag bilivans mtowen Mesay Yeisuw. Bilivans mawan mo bikayabes bineis watoulan sinagog; awoum ge bititapw̄alouls sisiyas. Situw̄aveks sikaleiwag mawan, mapuna ivag aspw̄ayat, inan taman, ilansa, “Bo ivakaeina tonen, kwtiganes.”

²⁴ Vayuwein mo idawes taw town mwana neibwein matan, idibakes, ilansa, “Kadiloka kulivan mounid wamatan Yowbad, peinan yakamey kakakin takalbaleb mto Yeisuw.”

²⁵ Taw town mo ilana, “Nag bakakin ansinap, kalbaleb, o nag, amawan? Misinaka akakin kweiboug neikaw matag, nagein gog akinbunik.”

²⁶ Iweis tasiyas, ilansa, “Taw town amawan nivkek waseg yak? Amawan nivag matam nikiplal?”

²⁷ Ikatimop asilivan, ilana, “Bo adibakeimiy, tage nag kuliganes. Aveiyag wawun bavgavaw agulivan town? Tabta yakamiy sivinamiy bukumlavags navamul yakamiy?”

²⁸⁻²⁹ Tasiyas gog mo iyages taw town, ilansa, “Yakoum navamul yakoum; yakamey Moses navamul yakamey. Kakakin Yowbad nilivan waseg Moses; tage taw town nag kakakin silawun ansinap.”

³⁰⁻³¹ Iwage town ilana, “Weinadee...! Taw town nivag matag ibwein; tage nag kukwakins silawun ansinap. Takakinsa Yowbad nag biligen takalbalebs, iligen gog takanaweins aygan; tasiyas gog bivn̄ases Yowbad nanon, Yowbad biligen sikanitoug tasiyas. ³²⁻³³ Pwamug-o nag kal bivag vagan bikiplal matan town nikop-yay waseg nikawkaw matan. Magat nag Yowbad nagamag town, ta-mawan bivkek wotet silmanin.”

³⁴ Tasiyas mo ikatimapus aygan, ilansa, “Mounid kweiboug nikopweims-yay sinap kalbaleb waseg; awoum kwatimlakem yakamey.” Mo ikayabes, inoun, in watoulan.

Tasiyas kululuwes ikaw

³⁵ Yeisuw iligen nikayabes taw town, in watoulan tapw̄aloul. Ininivev mo iban, idibek, ilana, “Tab kusimounid gimgilitoun Mesay waseg?”

³⁶ Ilana, “O guyaw, kwatimlakeig gimgilitoun town, vagan basimounid waseg.”

³⁷ Iw to Yeisuw ilana, “Kukin mtowen, nukulivan soum.”

³⁸ Taw town mo ilana, “O guyaw, yey asimounid”; mo ikulul wamatan.

³⁹ Yeisuw ilana, “Bo nam ven watinow silmanin kweitan kaleiwag; tasiyas toukwaws mo bikiplal mites, o tasiyas ikiplal mites mo bimlavags toukwaws.”

⁴⁰ Palisiy mwasanin sisiy Yeisuw nisesus, mo iliganes anilivan town, idibakes, ilansa, “Adok nukulivan, kulana, ‘Toukwaw yakamiy.’”

⁴¹ Iw to Yeisuw, ilana, “Magat toukwaw yakamiy, nag beivag amisinap kalbaleb; o peinan kulansa, ‘Kakakin-wan,’ to amisinap kalbaleb isesun-wan.

10

Asikal mansiyas sip

¹⁻³ “Mounid adibakeimiy, kukin kavel bipiyev sip anakal awkwedan, tage inaked kweitan mo beisiw bein wanuwan, mounid tavveinaw mtowen. Tage town beisiw wakoukwed waseg, adok mtowen tanuwagan alen sip. Takaymatein koukwed bikaliyow, alen mo bimgwayes binounas bineis.

⁴ “Mansiyas babaw-wan isunaps ikous, mo imgwayes inounas. Mansiyas sip ibukunis peinan ikakins sitovek aygan. ⁵ Nag bikikuns tobwag gamag waseg; nag. Peinan nag bikakins aygan; bo bisawls bineis, bilisawes.”

⁶ Yeisuw nakabebay town, inganegs-wan, tage nag bikakins silawun.

Yeisuw mamagina tamtakavatein alen ansinap go bwein-wan

⁷ Vayuwein Yeisuw mo idibakes, ilana, “Mounid adibakeimiy yey koukwed silmanin sip beisiws bineis wanuwan. ⁸ Tasiyas tamtakavateins sip kweiboug tavveinaws tasiyas, tage sip nag iliganes ages.

⁹ “Yey koukwed yey. Tasiyas beisiws waseg yey mo bibañes sikabmwamov; bisesus bwein; tuta babaw bimimeis, binineis, kaeis bwanabwein bikamkwams, simwamov silmanin.

¹⁰ “Tasiyas tavveinaw imimeis vagan kid biveinaws, o biwaways, biyagages youd babaw. Yey gog nam mwamov silmanin, vagan kid bukumwamovsa singay. ¹¹ Yey tamtakavatein aleig, agusinap bwein; bo batam mwamovag bamat, silmanin aleig bimwamovs.

¹² “Kukin kal bisayin vagan bimtakavatay sip mo maysan wotet bikow, tage gamag towen nag bivnases beibwein, nag. Townen gog tanuwagan bivnases beibwein. Kukin kal bisayin silmanin wotet towen, igaw bikin bulawud awuk avakaen bo neim, mo bisawl, bilisawes mansiyas sip, peinan nag tanuwagan tatonen; bulawud awuk mo biyousis sip mwasanin, asibabaw bikatigayays. ¹³ Townen gog bisawl bein, peinan nag tanuwagan; bweina maysan bikow wotet, tage nag binuway vagan bivnases bwein mansiyas sip.

¹⁴ “Yey tamtakavatein aleig, agusinap bwein. Yey akakin aleig. Tasiyas mawan ikakins yey. ¹⁵ Tamag mawan ikakin yey; yey-vak akakin Tamag. Bo batam mwamovag aleig pines. ¹⁶ Aleig nisesus ven mwasanin asikal kweitan kweitan; kadiloka bameyes tasiyas, mo biliganes aygag. Wanuwan asikal katanok mo bisesus asibabaws-wan; agumwaneta yey mo bamtakavates.

¹⁷ “Mapuna Tamag ikalin nuwan waseg yey, peinan bo atam mwamovag, vagan kid vayuwein mo baban. ¹⁸ Nag kal bikow mwamovag, nag; tatoneig bo atam. Kadilokeig mwamovag basem; kadilokeig bakow vayuwein. Peinan Tamag nakaleiwag waseg yey bo mawan.”

¹⁹ Min-Yudiy tasiyas niliganes aygan towen, mo ilivis, mwasinis ninous kweitan, mwasinis gog ninous kweitan.

²⁰ Mwasanin ilansa, “Baloum bo iwei, to nikabalawein. Aveiyag wawun kuliganes aygan?” ²¹ Mwasanin gog ilansa, “Takabalawein aygan nag mawan anilivan towen. Tabta takabalawein bivag toukwaw vagan bikiplal matan, ne?”

Min-Yudiy mwasanin ipiyaves Yeisuw

²² Tut towen bulbweilim, tutan sagal Yowbad nabunatum silmanin. ²³ Yeisuw ininoun wanuwan bunkakit wanuwan Yowbad nabunatum waseg. Bunkakit bunawen idokes Solomon nakwanow. ²⁴ Tasiyas min-Yudiy situwáveks ikines Yeisuw ininoun, mo ikatuyouns inekes, idibakes; ilansa, “Kweivin yam bikubukub nuwem? Magat yakoum Kelis, kadiloka amlivan kamnat kudibakem.”

²⁵⁻²⁶ Yeisuw ikatimop asilivan, ilana, “Bo adibakeimiy, tage nag kusimounids. Gu-nawotet nawwtel Tamag yagan waseg bo bikatimlakeimiy kavel yey; tage yakamiy nag kusimounids, peinan yakamiy nag mamagina aleig yakamiy, magina tobwag sip yakamiy.

²⁷⁻²⁸ “Aleig tatoneig iliganes aygag, o yey akakin tasiyas; tasiyas-vak ibukunigs. Basekes simwamov bises bisigeg; nag aveiyag biyagages; nag. Takwekway nag bikwayes tasiyas; nag. Sigwey tasiyas bakasigeg.

²⁹ “Tamag bo isekeig gungamag tasiyas. Nag kal towen takwekway kadilok bikwayes Tamag waseg, peinan Tamag Tatawtoun tonen. ³⁰ Yey soug Tamag katanok-wan.”

³¹ Vayuwein mo ikawes dakul, sivines kid beiweiys Yeisuw.

³² Yeisuw mo idibakes, ilana, “Tamag bo isekeig gunawotet babaw bwanabwein, vagan bukukines; e, bo nukukines. Aw-wotet mapun bukuweigs dakul waseg?”

³³ Iweis tasiyas, ilansa, “Awoum bakawein wotet bwanabwein mapun. Tage peinan kullivana mav, mamagina yak Yowbad yak, makava gamag yakoum.”

³⁴ Yeisuw ikatimop asilivan, ilana, “Adok lelel nisses mikaleiwag waseg mamagina, ‘Bo alivan: yakamiy Yowbad mwasanin yakamiy.’ ³⁵⁻³⁶ Livneis tasiyas kweiboug Yowbad nisekes aygan wasigeis, mamagina yowbad mwasanin tasiyas; o ta-mawan bitagidamis anilivan towen. Tage kudibakeigs, kulansa, ‘Kulivana mav,’ peinan agulivan ‘Yey Yowbad Natun yey.’ Mounid gog Tamag nikayabeig nam watinow, nawotet silmanin.

³⁷ “Kukin nag bawtel Tamag nawotet, bweina bukupiyaveigs. ³⁸ Kukin gog bukupiyaveigs, tage bawtel Tamag nawotet, kadiloka bukukines gunawotet mo bukusimounids, *vagan* kid bukukwakins Tamag waseg yey nises, o yey Tamag waseg nases.”

³⁹ Vayuwein mo iyokons *vagan* biyousis Yeisuw, tage bo ilisawes, inoun in.

⁴⁰ Vayuwein mo in palata-dadan Yoldan, ven townen Yon nisilamaw nawotet kweiboug nibaptyses gamag; ven townen Yeisuw misik-yay. ⁴¹ Gamag babaw irinekes, ilansa, “Yon ta-ivag naman mulin tawtoun, tage anilivan babaw, *livanen* Yeisuw, bo mounid-wan.”

⁴² Mapuna, ven townen waseg, namagleis gamag isimounids Yeisuw waseg.

11

Lasalos ikanig

¹ Takatoun teitan, gum-Betaniy yagan Lasalos; nunet asteiy Meliy son *Malid* wanven townen. ² Takatoun townen nunet Meliy naptumin Yeisuw kaken mul waseg, o natanabwein nawen kunun waseg.

³ Vinay tasiyas mo ikayabes teitan binek Yeisuw *vagan* bidibek, ilana, “Guyaw, gamag townen *kusiwayoub* waseg, bo ikatoun.”

⁴ Yeisuw iligen, mo ilivan, “Katoun townen nag silmanin kanig, nag; tage silmanin yakawan Yowbad, *vagan* kid gamag mo bikavasis Yowbad Natun.” ⁵ Yeisuw nisisiwayoub wasigeis *Malid* son bwadan sisiy nusit Lasalos.

⁶⁻⁷ Yeisuw niligen Lasalos ikatoun, mo isesuna ven townen akweiy yam. Wankuyeim mo idibakes navamul, ilana, “Kumeis, bitayums taneis Yudiy.”

⁸ Iweis navamul, ilansa, “Tamwey, min-Yudiy bo iyokons sivines kid beiweims. Aveiyag wawun bukuyum bukun townen?”

⁹⁻¹⁰ Yeisuw ikatimop asilivan, ilana, “Katanok yam wudayam gaboug, *yanay*, kwayav. Kukin kal binoun wudayam waseg, nag bikatpines kaken kid bikalouw, nag; peinan ven nakamnat immiteil; tage kukin binoun boug waseg, adok bikalouw peinan ta-ivag nakamnat.”

¹¹ Livan townen ikous, mo idibakes, ilana, “Veiyouds townen Lasalos bo imasis; ban Yudiy bavgun.”

¹² Navamul idibakes, ilansa, “Kukin bimasis, mo beibwein.” ¹³ Idokes kid imasis kangagay; tage Yeisuw anilivan, “Bo imasis,” peinan bo ikanig.

¹⁴⁻¹⁵ Yeisuw mo ilivan kamnat, ilana, “Lasalos bo ikanig. Nag ikanig wamatag, tage bo ibwein nanoug pinamiy yakamiy *vagan* bukusimounids waseg yey. Bo bitanekes mtownen. Magat kweiboug nakases soug townen, mo bikanig, adok nag bukusimounids beibwein.”

¹⁶ Tomas, townen yagan kweitan Papap, mo idibakes siney, Yeisuw navamul tasiyas, ilana, “Kumeis, taneis; bitakanigs sods datoveks.”

Yeisuw kabmwamov tonen

¹⁷ Mtownen Lasalos bo ikanig, itakus, yam kweivas ikous, mo isap Yeisuw, iban bo itakus kweivas yam.

¹⁸⁻¹⁹ Peinan Betaniy kadilakus Yelusalem, mamagina katanok veit, min-Yudiy kalamwey babaw nimeis, ilakwanes *Malid* son Meliy, ikalin nuwes, ivvalams nusit peinan.

²⁰ Mwasanin idibakes *Malid* ilansa, “Yeisuw bo isap,” iligen manawen mo inoun, inek; Meliy gog igaw-wan wabunatum. ²¹⁻²² *Malid* iwekey Yeisuw, ilana, “E Guyaw, magat *yakoum* soum nagut bukusesus, adok nag bikanig; tage tut townen akakin aveiyag bukunitoug Yowbad waseg, mo bisekeim.”

²³ Yeisuw ilana, “Nanut bo beikit vayuwein.”

²⁴ *Malid* ilana, “Akakin nagut beikit nakabiyokous tut waseg, peinan igaw nakabiyokous tut waseg, gamaga babaw mo bitakits vayuwein.”

²⁵⁻²⁶ Yeisuw idibek, ilana, “Yey mikabeikit yey; yey mikabmwamov yey. Kukin kal yak bukusimounid waseg yey, kukin bukukwanig, mo bukumov. Tababaw yakamiy

bukusimounids waseg yey, mo bukumwamovs, kusesus kusigagas. Tabta kusimounid sinap towen, ne?"

²⁷ Ilana, "O, mounid. Yey asimounid peinan yakoum Kelis, Yowbad Natun yakoum, mwana nukum ven watinow."

Yeisuw ivālam

²⁸ Ilivan ikous, mo iyum inek bwadan, katimwālag idibek, ilana, "Datoveks bo isap, idaweim yak." ²⁹ Iligen, nuwanaw itamanaw inoun inek Yeisuw.

³⁰ Yeisuw ta-beim waven, igaw wāked nises towen son Mālid nilivatuy-yay.

³¹ Min-Yudiy tasiyas sisiy Meliy nivvālams, ikines Meliy nuwanaw itamanaw inoun, idokes kid bein wakalawag vāgan bivālam kid; mapuna ibukunis Meliy.

³² Meliy iw Yeisuw misik-yay, ikin, mo ikulul avakaein wamatān Yeisuw, ilana, "E Guyaw, magat yakoum soug nagut bukusesus, adok nag bikanig."

³³⁻³⁴ Yeisuw ikin Meliy ivvālams sen min-Yudiy tasiyas nibukunis, singaya igeeg nanon, ilana, "Takanig avanuy mukutakus-yay?"

Ilansa, "Kum, kukin."

³⁵ Yeisuw mo ivālam. ³⁶ Min-Yudiy tasiyas ikines Yeisuw ivālam, ilansa, "Singaya ikalin nuwan takanig waseg." ³⁷ Mwasanin gog ilansa, "Towen nivag tasiyas toukwaws mo ikiplal mites, adok ikadilok bikatinob ankatoun waseg veiyon towen vāgan nag bikanig."

Iyamov Lasalos

³⁸ Vayuwein mo igeeg nanon Yeisuw, inoun in wakalawag. Alawag gog takunumwan, dakul avakaein wawadon. ³⁹ Yeisuw ilana, "Kuyatpinis dakul towen."

Takanig nunet yagan Mālid ilana, "E Guyaw, adok awoum; peinan bo ibog; kweivas yam nimsik wakalawag."

⁴⁰ Yeisuw ilana, "Bo adibakeim, kukin bukusimounid waseg yey, mo bukukin Yowbad natawtoun."

⁴¹⁻⁴² Ilivan ikous, iyatpinis dakul, Yeisuw mo itamnow matan, ilana, "Tamag, kalin nuwag peinan nukuligen aygag. Akakin nukunganeg aygag yam babaw; tage bo alivan mawan vāgan tasiyas nitamanaws wadadag mo bisimounids kid yakoum nukwayabeig nam."

⁴³ Initoug ikous, iwak, aygan avakaein ilana, "Lasalos, kume!"

⁴⁴ Takanig sona tibtabwan isunap, namana kaken bo iyawanis kweim waseg, o magin bo isimweilis kweim waseg.

Yeisuw mo idibakes, ilana, "Kulikus won vāgan binoun."

Sivines kid beiweijs Yeisuw

⁴⁵ Min-Yudiy tasiyas tavvālams sisiy Meliy bo ikines Yeisuw nawotet towen, mwasanin bo isimounids waseg. ⁴⁶ Tage mwasanin inekes tasiyas Palisiy mo ikamteles Yeisuw nawotet towen. ⁴⁷⁻⁴⁸ Tanuwgwes lun situwāvek sisiyas tasiyas Palisiy mo idawes takaleiwags babaw bimeis, ilansa, "Aveiyag bitavages, peinan taw towen nawotet singay tawtoun? Kadiloka bitabwabwes nawotet; kukin gog nag, gamag babaw mo bisimounids waseg, mo bigeg ninous Gabman tasiyas mina-Lom; adok bimeis biyagages davanuys towen, mo biyakousis gamag yakids."

⁴⁹⁻⁵⁰ Teitan yagan Kayapas, bweilim towen nawotet tanuwgwes lun sitovek avakaein, towen mo ilana, "Adok tatagouwaws yakamiy. Adok nag kukwakinsa bo kadilok tatanok gamag bikanig, gamag babaw pines. Awoum biyagageids bod Yudiy yakids."

⁵¹ Nag ansinap tonen anilivan towen; tage peinan bweilim towen nawotet tanuwgwes lun sitovek avakaein, mo ilivnek Yeisuw bikanig asibod peinan. ⁵² O nag kid bod Yudiy peinan, nag; Yeisuw gog bikanig pines Yowbad angamag vena babaw wasigeis, vāgan kid mo bimlavags bod katanok.

⁵³ Yam towen, tasiyas mo isilamaws ininuways amāwan mo bikatimates Yeisuw.

⁵⁴ Yeisuw nanon ilana, "Awoum vayuwein bikineigs min-Yudiy"; mapuna inoun in walasin makava nawoud, misikes ven Epleim sen navamul.

⁵⁵ Tut kayakus min-Yudiy mo bisagals Kaltuwon silmanin, vena babaw gimgilis ikatulags ineis Yelusalem sagal towen silmanin, sivines kid bikatinagesa tatineis Yowbad nawotet towen silmanin. ⁵⁶ Tasiyas ineis Yelusalem, sivines kid bikines Yeisuw. Ititamanaws Yowbad wanbunatum, illivans mamagina, “Waninoumiy aveiyag? Towen Yeisuw beim sagal silmanin, ne?”

⁵⁷ Tanuwgjes lun situwavek sisiyas tasiyas Palisiy bo isekes sikaleiwag, ilansa, “Kukin teitan gamag bikakin avanuy Yeisuw misik-yay, kadiloka bikatimlakem vagan bakayous.”

12

Meliy iptum kaken Yeisuw, ven Betaniy waseg

¹ Yam kwenim katanok mo bisilamaws Sagal Kaltuwon, Yeisuw inoun in Lasalos wanven Betaniy, mtownen kweiboug nikanig Yeisuw ivag mo neikit.

² Yeisuw inekes, mo ivages kan; Mälid ikokew kan silmanin Yeisuw sen tawaw beikams. Lasalos siney tasiyas ikamkwams. ³ Meliy mo ikow kwavitanok tagon yagan nad, maysan singay avakaein, iptum kaken Yeisuw, wanaman mo ikow kunun tonen vayvayov, itanob Yeisuw kaken. Nad towen simsiman bo ikalawt bunatum.

⁴⁻⁵ Navamul teitan Yudas Iskaliyot igaw bisilkod Yeisuw, mtownen mo ilivan, ilana, “Aveiyag wawun iyamkwen nad? Maysan towen kadiloka biyamiyis lakatutoun kina; money bitakow, bitavgen tasimavs wasigeis.” ⁶ Anilivan mawan, nag sivinan bilabes tasiyas tasimavs; nag. E, peinan tavveinaw towen Yudas, nawotet imtakavatay simoney Yeisuw sen navamul, ivveinaw waseg.

⁷⁻⁸ Yeisuw ikatimop anilivan, ilana, “Awoum kukwanan waseg manawen vin; nawotet towen silmanin gunakanig. Tasiyas tasimavs tutababaw simiyas nukusesus, tage ye nag, igaw kakit mo balisaweimi.”

Sivines kid beiweiys Lasalos

⁹ Min-Yudiy iliganes Yeisuw nises Betaniy, singay babaw tasiyas mo imeis, sivines kid bikines, o bikines-vak Lasalos, peinan nikanig, Yeisuw ivag mo ikit.

¹⁰⁻¹¹ Tanuwgjes lun situwaveks mo ininuways, ilansa, “Amawan bitaweiys Lasalos, peinan min-Yudiy babaw Lasalos bo ikines mo ilisaweids, inekes Yeisuw, mo isimounids waseg.”

Yeisuw isiw Yelusalem wanuwan

(Matiw 21:1-11; Mak 11:1-11; Luk 19:28-40)

¹² Neiyam-nen gamag babaw tasiyas nikatuyouns nimeis Yelusalem silmanin sagal, mo iliganes Yeisuw bo neim. ¹³ Mapuna ikawes molay, inounas vagan kid binekes Yeisuw, iwkuwaks, ilansa, “Osana! Kalin nuwem yakoum, nukum Yowbad nawotet silmanin, min-Yisleil daguyaws yakoum.”

¹⁴⁻¹⁵ Yeisuw iban donkiy, imwen wakunuwatan, inoun, mawan Bukitab nilivnek mamagina,

“Awoum beivag amipwayat min-Sayon yakamiy!

Kukines miking bo neim,

Isin watapwan donkiy natun.”

¹⁶ Misumkwey towen navamul na-ikakins Bukitab nilivnek Yeisuw nawotet towen; wankuyeim gog Yeisuw iyum in walbalab mo inuwes livan towen, livanen Yeisuw nawotet peinan bo ikamat mawana nilivnek.

¹⁷⁻¹⁸ Gamag mwasanin nikines Yeisuw nidow takanig Lasalos igaw wakalawagan nises mo isap son mwamovan, gamag tasiyas mo ikamteles sinap towen wasigeis gamaga babaw sisiyas; mapuna inekes Yeisuw, peinan iliganes livanen nawotet towen tawtoun.

¹⁹ Tasiyas Palisiy iliganes gamag babaw ninekes Yeisuw; sisiyas mo illivans, ilansa, “Bo igak! Amawan bukuvkakes? Gamag tababawsa ininekes mtownen Yeisuw.”

Min-Gilis sivines bikines Yeisuw

²⁰ Min-Gilis mwasanin nimeis Yelusalem sagal towen silmanin, sivines kid bitap-walouls Yowbad waseg. ²¹ Yeisuw navamul Pilip nises Yelusalem, inaven Beteseid wawnuwan Galiliy, min-Gilis tasiyas mo inekes Pilip, ilansa, “Tamwey, sivinem bakakin Yeisuw.”

²² Pilip in idibek Andiluw; Andiluw son Pilip ineis idibakes Yeisuw.

²³ Yeisuw mo idibakes tasiyas, ilana, “Gimgilitoun yey, bo neim tutag balivet yakawanag tatoneig. ²⁴ Mounid adibakeimiy, kukin kaytul wit nag bein wapwepway bo bisesuna anmwānet; tage kukin bein wapwepway, bikanig mo beivag anagin babaw.

²⁵ “Kukin kal sivinan mwamovan, mo biyamkwen mwamovan tonen; tage bipiyev mwamovan ven watinow, mo biban mwamovan tonen bises bisigeg.

²⁶ “Kukin kal yak sivinam bukumlavag gunavamul, kadiloka bukwabkunig; mo soug yak bitases. Tamag bo bikalin nuwan yākoum, gunavamul yākoum.

Igaw mo bitamnawes Yeisuw kaligweg waseg

²⁷ “Tut towen bo igeg nanoug. Tabta banitoug, balana, ‘Tamag, kwatinabweig; awoum tut towen bakanig.’ Adok nag, peinan wotet towen silmanin bo nam. ²⁸ Tamag, kuvag vagan gamag babaw bikavasims, peinan yak Tatawtoun yak.”

Walbalab aygan mo ikatilutegs, ilana, “Bo avag; igaw mo bavgavaw, yagag yakawanan peinan.”

²⁹ Gamag mwasanin nitomos idokes kid palāpal. Mwasanin gog ilansa, “Gum-libālab nidibek Yeisuw, anelos adok.”

³⁰ Yeisuw ikatimop asilivan, ilana, “Aygan towen nag peinag yey; tage aygan towen pinamiy yakamiy. ³¹ Tut towen Tamag bo bimop sinap kalbaleb wadaban pwepway. Tanugwagan ven watinow towen Seitan, Tamag bo bikayeb. ³² Igaw bitamnaweigs wakaligweg mo babiteilis gamag babaw bimeis waseg yey.” ³³ Yeisuw anilivan towen vagan bikatimlakes amāwan bikanig.

³⁴ Gamag babaw ikatimapus aygan, ilansa, “Kakakin Bukitab ilivnek Mesay bo bises bisigeg; aveiyag wawun amlivan ‘Kadiloka bitamnaweigs wakaligweg, gimgilitoun yey?’ Gimgilitoun yak muwotet amāwan?”

³⁵ Iw to Yeisuw, ilana, “Tut nag biveiyov kamnat bises wasigeis yakamiy. Tut towen kadiloka bukunounas; igaw bidadub, ta-māwan bukukwakins ked. ³⁶ Igaw nases, mikamnat bo ivanoum; kadiloka kusimounids waseg, vagan bukumlavags gamag kamnat yakamiy.”

Yeisuw ilivan ikous, mo inoun in, itoupan vagan nag bibānes.

Min-Yudiy na-isimounids

³⁷⁻³⁸ Tasiyas nikines Yeisuw nawotet singay tawtoun; tage nag isimounids mtowen Mesay; to nikamat palopit Isaya anilivan, kweiboug nilivnek mamagina:

“E, Guyaw, kal bisimounid youd to nakalivan?

Kalisiy bo ikines Yowbad natawtoun?”

³⁹⁻⁴⁰ Mapun ta-māwan bisimounids, peinan Isaya vayuwein nilivnek, ilana, “Bo ivag mites ikawkaw,
bo ivag tiges ikakon tasiyas;
mata mites beikins;
mata ninous bikakins;
mo bikanavin ninous bimekeigs,
vagan kid beibweins tasiyas.”

⁴¹ Anilivan towen Isaya nilivnek, peinan matan isisawl, ikin Mesay natawtoun, livānen mo ilivan.

⁴²⁻⁴³ Min-Yudiy gog takaleiwags mwasanin isimounids waseg Yeisuw, tage nag bikamteles ninous, peinan iwenes tasiyas Palisiy, idokes bibwabwes sitapwaloul. Tasiyas nag ivnāses Yowbad, ivnāses gamag ninous; sivines kid gamag bikavasis, Yowbad nag.

Gamag biyatals Yeisuw anilivan waseg

⁴⁴ Yeisuw iwak, aygan avakaein ilana, “Kukin kal bisimounid waseg yey, nag go isimounid waseg yey, tage isimounid waseg Townen nikayabeig nam.

⁴⁵ “Kukin gog kal bikiniig, bikin-vak Townen nikayabeig nam.

⁴⁶⁻⁴⁷ “Yey nam watinow silmanin mikamnat. Kal yak bukusimounid waseg yey, mo beikous mudadub. Kukin bukwatiligen aygag, tage nag bukuvna aygag, yey nag bamop amsinap kalbaleb, nag. Peinan nag am watinow vagan bayateleimi ven watinow imgilis yakamiy, nag; nam gog vagan kid bakatinabweimiy.

⁴⁸ “Kukin bukupiyev aygag tatoneig, o bukupiyaveig yey, igaw nakabiyokous tut waseg, aygag kakwen biyateleim, mo bukulivet mapun amsinap kalbaleb.

⁴⁹ “Yey nag alivan agulivan tatoneig, nag. Tamag bo ikaleiwag. Tamag gog nikayabeig, nam watinow, mo alivan, mawan nakaleiwag tonen.

⁵⁰ “Yey akakin nakaleiwag towen silmanin mwamovamiy nag beikous. Tamag nakaleiwag waseg isekeig aygan, mo alivan mawan.”

13

Yeisuw iwik inavamul kikeis

¹ Igaw kakit mo beikams Sagal towen Kaltuwon. Yeisuw ikakin-wan tutan bo ilivet beinoy ven watinow, beiyum binek Taman. Tuta babaw issiwyoubus angamag tonen; nakabiyokous tutan Yeisuw watinow mo bikatimlakes nasiwayoub singay wasigeis tasiyas.

² Sagal towen ikamkwams sen navamul. Saymon natun Yudas Iskaliyot nises. Kweiboug Seitan nanon isek Yudas vagan kid bisilkod Yeisuw.

³ Yeisuw ikakin-wan Taman bo itam youda babaw waseg. Ikakin meinoy neim Yowbad waseg, mo beiyum-vak binek Yowbad. ⁴⁻⁵ E, Yeisuw mo itamanaw, inis anakweim mwaynavakaein, taweil isikam, mo iligob soup in wanuwan abmavin, isilamaw biwkiwik navamul kikeis, bititanob taweil towen nisikam waseg. ⁶ Iwik kikeis mwasanin gamag ikous, mo inek Saymon Pita. Pita ilana, “Yak guyaw; awoum kuwik kakeig.”

⁷ Yeisuw ilana, “Nag kukwakin silawun gunawotet towen; igaw mo bukukwakin.”

⁸ Pita ilana, “Nag. Nag kweitan tut bukuwik kakeig.”

Yeisuw ilana, “Kukin bukupiyev, nag veiyoug yak.”

⁹ Saymon Pita ilana, “Gunguyaw yak, bweina kuwik kakeig son namag o kunug.”

¹⁰ Yeisuw ikatimop aygan, ilana, “Deis. Kal yak bo kukwakay ikous, misinaka bawik kakeim mo bigimagim woum meivek-wan. Yakamiy gimagim yakamiy, tage teitan yakamiy nag.” ¹¹ Yeisuw ikakin kal bisilakod waseg, to ilana, “Teitan yakamiy nag.”

¹²⁻¹⁴ Iwik kikeis ikous, ivaligev anakweim, isin wakaban, idibakes, ilana, “Tabta kukwakins gunawotet towen wasigeis yakamiy? Kudokeigs ‘Amatakatimlakay’ o ‘Maguyaw’; bwein mawan, mounid-wan. Kukin yey amitakatimlakay o miguyaw yey bawik kikeimiy, kadiloka kulabes simsimeyas mamagina kuwkiwks kikeimiy simsimeyas wasigeis.

¹⁵ “Bo akatimlakeimiy agusinap wasigeis yakamiy; kadiloka kuvages mawan.

¹⁶ Mounid adibakeimiy nag kal bikaleiwag naguyaw waseg, o guyaw teitan natakayob awoum bikaleiwag waseg natovek; awoum. ¹⁷ Magat bukukwakins sinap towen o bukuwteles mawan, bo bukumwasaws yakamiy.

¹⁸ “Nag alivan livneimiy tababaws yakamiy; nag. Bweina akakin kalisiy yakamiy nadaweimiy; tage teitan bisilkodeig, Bukitab nilivnek mamagina:

‘Towen bo asek kan ikamkwam, mo ipiyaveig.’

¹⁹ “Bo alivnek youd towen, vagan igaw bikamat, mo bukusimounids waseg yey.

²⁰ “Mounid adibakeimiy, guntakayob kal igaw beiw, kal yak bukatam waseg mtowen, mogo bukatam waseg yey; e, bukatam waseg yey, mogo bukatam waseg Tamag towen nikayabeig nam.”

Yeisuw ilivnek peinan teitan bisilkod

(Matiw 26:20-25; Mak 14:17-21; Luk 22:21-23)

²¹ Anilivan towen ikous, singay igeg nanon Yeisuw; idibakes, ilana, “Mounid adibakeimiy teitan yakamiy igaw bisilkodeig!” ²² Navamul mites ikakins sisiyas wasigeis ikabunikays, idokes kavel.

²³ Yeisuw navamul yey, ases kadiykusan Yeisuw; peinan singay nisiwyoubug.

²⁴ Saymon Pita iloukwam waseg yey vagan baktigan Yeisuw, balana, “Kavel towen bisilkodeim?” ²⁵ Mapun asineikim kadiykusan wavytakon Yeisuw, akatimwālag, alana, “Tamwey, kavel towen?”

²⁶ Yeisuw ilana, “Mtowen, basow kan towen mo basek.” E, ikow kan kakit, isow, isek Yudas, mtowen Saymon Iskaliyot natun.

²⁷ Yudas ikam kan towen, Seitan mo isiwanan Yudas. Yeisuw mo idibek, ilana, “Muwotet towen nuwanaw kuwtel.” ²⁸ Yakamey nakakamkwam nag kakakin silawun Yeisuw anilivan towen.

²⁹ O peinan Yudas tamtakavatein mamoney, mwasanin gog idokes Yeisuw nikayeb Yudas vāgan biymiyis kan, sagal silmanin, o adok money mwasanin bikow bisiwayoub tasimavs wasigeis. ³⁰ Yudas ikam kan towen ikous; nuwanaw mo isap in watoulan. Bo iboug tonen.

Yeisuw nakaleiwag kweivaw

³¹ Yudas inoun, Yeisuw mo ilana, “Bo isap tutan yakawanag Gimilitoun yey, o gamag mo biyakawanes Tamag, gunawotet silmanin. ³² Nuwanaw gog, Tamag yakawan mo bisekeig yakawanag yey. ³³ Budag yakamiy, tut kadiyakus sigwey yakamiy bitasesus; igaw mo bukuneveigs; bukunineivs nag. Māwan agulivan wasigeis min-Yudiy situwāveks, alana, ‘Banoun ban; ta-māwan bukuwekeigs.’ E, nagein mo adibakeimiy māwan.

³⁴ “Gunakaleiwag kweivaw asekeimiy, kadiloka bukusiwyoubus simsimiya. Māwan nasiwyoubumi, kadiloka māwan bukusiwyoubus simsimiya. ³⁵ Bukuvāges māwan, gamag babaw mo bikakins gunavamul yakamiy, peinan misiwayoub simsimiya wasigeis.”

Ilivnek Pita bikayan

(Matiw 26:31-35; Mak 14:27-31; Luk 22:31-34)

³⁶ Saymon Pita idibek Yeisuw, ilana, “Tamwey, ama-bukun?”

Yeisuw ilana, “Tut towen banoun ban; ta-māwan bukwabkunigs. Igaw tut wanakougwaw mo bukwabkunigs yey.”

³⁷ Pita ilana, “Tamwey, aveiyag wawun nagein na-ikadilokeig babkunim? Bo bakanig peinam yak.”

³⁸ Iw to Yeisuw, ilana, “Tabta bukukwanig peinan yey, ne? Mounid adibakeim, sivatoun bukwayaneig, igaw gabouw waseg kolcolek mo beigel.”

14

Yeisuw mamagina kidenen Taman

¹ Yeisuw ilana, “Awoum bikubukub nuwamiy yakamiy. Kusimounids waseg Yowbad; kadilok-vak bukusimounids waseg yey.

² “Tamag wanven bunatum babaw nisesus. Kukin gog nag, tabta badibakeimiy, ‘Ban baktineg miven pinamiy yakamiy?’ Tage peinan agulivan māwan, bo mounid.

³ “Ban baktineg miven, igaw mo baw vāgan kid bakawemiy banawemiy wagunaven, sigwey yakamiy mo bitasesus. ⁴ Kukwakins ked towen bānoy.”

⁵ Tomas mo idibek Yeisuw, ilana, “Tamwey, nag bakakakin ama-bukun. Ta-māwan bakakakin ked.”

⁶ Yeisuw ilana, “Yey miked yey; yey mikamounid yey; yey mikabmwamov yey. Kukin kal sivinan binek Tamag, bweina beim waseg yey mo binek Tamag; ta-kweitan ked nises.

⁷ Magat bukukwakin yey, mo bukukwakin Tamag. Nagein gog kukwakins towen, peinan nukukines.”

⁸ Pilip ilana, “Tamwey, kwatimlakem Tamam mobeitout ninom.”

⁹ Iw to Yeisuw, ilana, “O Pilip, kadiveiyov tut sigwey yakamiy nitasesus, aveiyag wawun nag kukwakin yey? Kal yak kukineig yey, kukin-vak Tamag. Aveiyag wawun kulansa, ‘Kwatinmlakem Tamam?’ ¹⁰ Tabta kusimounids yey Tamag waseg nases, o Tamag waseg yey nises? Livan towen nasekeimiy, nag agulivan tatoneig; Tamag anilivan; Tamag gog waseg yey nises, iwotet.

¹¹ “Bweina bukusimounids yey waseg Tamag nases, o kusimounids-vak Tamag waseg yey nises. Kukin gog nag, kadiloka kusimounids peinan kukines gunakawotet. ¹² Mounid adibakeimiy, kukin kal yak bukusimounid waseg yey, gunakawotet towen mo bukuwtel tawtoun waseg, son mukawawotet singaya tawtoun, peinan bo banek Tamag.

¹³ “Aveiyag bukunitougs yagag waseg mo bawtel, *vagan* kid gamag babaw mo biyakawanes Tamag. ¹⁴ Kukin bukuntougigs yagag waseg, mo bawtel *mawan*.

Yowbad Kululuwan igaw mo beim

¹⁵ “Kukin bukusiwyoubugs, kadiloka bukuvn̄ases gunakaleiwag.

¹⁶ “Yey mo banitoug Tamag waseg *vagan* bisekeimiy Teitan bilabeimiy, mo bises bisigeg. ¹⁷ Kululuwan Mounid Townen, ansinap kamnat. Tamag nag bisekes Kululuwan Townen wasigeis gamag babaw; nag. Peinan tasiyas nag kadilok bikines o bikakins Kululuwan Townen. Yakamiy gog kukwakins, peinan wasigeis yakamiy Kululuwan Townen nukusesus simiy.

¹⁸ “Nag makaw bukusesus yakamiy, peinan yey bo baw. ¹⁹ Igaw kakit mo balakanig wasigeis ven watinow gimgilis, tage yakamiy bukukineigs yey. Yey *b̄amov* mapuna yakamiy bukumovs.

²⁰ “Igaw, yam towen waseg, mo bukukwakins yey Tamag waseg nases, o yakamiy waseg yey, o yey wasigeis yakamiy.

²¹ “Kal yak bukuligen gunakaleiwag, o bukuvnas, mounid yak bukusiwyoubug. Kal yak bukusiwyoubug, Tamag mo bisiwyoubum yak; o yey mo bisiwyoubum, tatoneiga bakamat waseg *yakoum*.”

²² Yudas Iskaliyot valeyin yagan Yudas; mtownen idibek Yeisuw, ilana, “Tamwey, aveiyag wawun bukukwamat wasigeis yakamey, tage gamag babaw nag?”

²³ Iw to Yeisuw, ilana, “Kal yak bukusiwyoubug mo bukuvnas aygag; mapuna Tamag mo bisiwyoubum yak, soug Tamag bakawekeim yak mo bitasesus simey *yakoum*. ²⁴ Kal yak bukupiayeig mo bukupiyev aygag, Tamag aygan gog, nikatipel nisekeig agulivan, nikayabeig *vagan* kid basekeimiy aygan towen.

²⁵ “Agulivan towen nasekeimiy, igaw sigwey yakamiy nitasesus. ²⁶ Igaw Teitan biwekeimiy bilabeimiy, mtownen Kululuwan Yowbad. Tamag bo bikayeb Kululuwan, gunakaleiwag waseg, biwekeimiy; Kululuwan Townen mo bikatimlakeimiy youda babaw wasigeis; e, bilabeimiy *vagan* nag bukunumlaves agulivan babaw.

²⁷ “Balisaweimiy, tage bweina beitaw nuwamiy; sinap bwein nasekeimiy *vagan* beitaw nuwamiy. Ven watinow sinapun nag bilabeimiy *mawan* agusinap, nag. Awoum bikubukub nuwamiy; awoum beivag amipwayat.

²⁸ “Nukuliganes agulivan mamagina: ‘Banoun ban, *b̄ayum-vak* baw.’ Magat bukusiwyoubugs bo bukumw̄asaws peinan yey banek Tamag, tage mtownen Tamag Tatawtoun singay.

²⁹ “Nagein gog bo alivnek. Igaw bikamat mamagina, mo bukusimounids waseg yey.

³⁰ Igaw nag balivan avakaen wasigeis yakamiy. Peinan bo neim takalwagein asisinap ven watinow gimgilis; tage ta-*mawan* bivkek waseg yey.

³¹ “Yey awotet *mawan* Tamag nikaliwageig, *vagan* kid gamaga babaw mo bikakins gunsiwayoub waseg Tamag.

“Kutamanaws bo bitanounas.”

¹ Kweitan livan Yeisuw nisekes mawan: “Yey mamagina kay mounid; Tamag mamagina tawtelein bag. ² Kukin yayageig nag beivag anagin, Tamag mo bilav yayag towen bilev. Kukin gog beivag anagin, mo bibob matan vagan anagin bibabaw.

³ “Bo nasekeimiy agulivan, mapuna ivag amisinap kamnat. ⁴ Makava yayagein, kukin wawun nag, ta-mawan beivag anagin. Kadiloka bisesus son wawun kay mo beivag anagin. O yakamiy mawan. Kadiloka bitasesus simiy yey, o yey sigwey yakamiy, mo beivag angimiy; kukin bukusesusa makaw, bo nag.

⁵ “Yey kay yey. Yakamiy yayageig yakamiy. Kal yak soug yey bitases, o yey soum yak, igaw beivag anagim bibabaw; tage ammwānet nag aveiyag bukuwtel.

⁶ “Kukin kal bipiyaveig, mtowen mamagina yayageig ilaves in watoulan, bo biyalay, beimat. Igaw gamag mo bikawes, bigabus wākov. ⁷ Kukin sigwey bitasesus, o gunakaleiwag simiy bukusesus, aveiyag sivinamiy, bweina bukunitougs silmanin, mo bukubānes youd towen.

⁸ “Magat gunavamul mounid yakamiy, mo buku~~vages~~ angimiy bibabaw; mapuna gamag babaw mo bikavasis Tamag. ⁹ Tamag ikalpwākit waseg yey, mawan yey, akalpwākit wasigeis yakamiy. Kadiloka kusesus son agusinap siwayoub. ¹⁰ Kukin bukuvnāses gunakaleiwag mo bukusesus son agusinap siwayoub. Mawan yey, avnas Tamag nakaleiwag to nasesuna son towen ansinap siwayoub.

¹¹ “Bo asekeimiy agulivan towen, vagan kid gunakabmwāsaw waseg bukusesus, o singay bivakaein mwāsaw wasigeis yakamiy. ¹² Gunakaleiwag towen: Kadiloka bukusiwyoubus simsimiyas. Peinan yey nasiwyoubumi, kadiloka bukusiwyoubus simsimiyas bo mawan. ¹³ Kukin kal singaya bisiwyoubus nubein, mo bitam mwamovan, bikanig pines tasiyas.

¹⁴ “Magat bukwanawes aygag mo bukwanubeins waseg yey. ¹⁵ Kweiboug bo adokeimiy guntouwat yakamiy; tut gog towen nadokeimiy nubeig yakamiy. Kalisiy tasiyas tamwey natouwats nag bikakins tamwey nanon; tage yey bo aligen mo akakin Tamag nanon, bo nakatipel nasekeimiy yakamiy. ¹⁶ Nag kuvkakeigs mitovek yey; tage yey bo avkakeimiy nubeig yakamiy; bo akaleiwag vagan bukukwanawes aygag vagan kid angimiy bwanabwein bises bisigeg. Igaw aveiyag bukunitougs waseg Tamag, yagag yey waseg, Tamag mo bisekeimiy youd towen.

¹⁷ “Gunakaleiwag towen: Kadiloka bukusiwyoubus simsimiyas.

Ven watinow gimgilis sikameiliw

¹⁸ “Magat ven watinow gimgilis bikamliweimiy, kadiloka bukunuways wanmugwana yey nikamliweigs. ¹⁹ Magat amisinap mawan asisinap tasiyas, mo bisiwyoubumi. Tage yakamiy amisinap kweitan. Bo nadaweimiy mo nukulisawes ven watinow asisinap, mapuna ven watinow gimgilis ikamliweimiy yakamiy.

²⁰ “Kadiloka bukunuwas agulivan nadibakeimiy mamagina, ‘Natouwat nag bimug waseg natovek; nag.’ Kukin bikamliweigs, mogo bikamliweimiy. Kukin bivnāses aygag, mogo bivnāses agamiy. ²¹ Ven watinow gimgilis biyagageimiy, peinan agugwamag yakamiy, o peinan nag ikakins Town nikayabeig nam. ²² Magat basināles, o magat nag basekes aygag, mogo nag badok asisinap kalbaleb. Tage bo anekes, asekes aygag, igaw Yowbad mo bikamtānis peinan asisinap kalbaleb, ta-mawan bikatimapus aygan; nag.

²³ Kukin kal bikamliweig, mamagina bikamliw-vak Tamag.

²⁴ “Magat nag bikines gunawotet tawtoun, nag badok asisinap kalbaleb. Tage gunawotet singay tawtoun. Nag teitan nawotet tawtoun mawan gunawotet tatoneig. Tage nikines gunawotet, mogo nikamliwemas soug Tamag. ²⁵ Bo ikamliweigs vagan bikamat livaneig nises Bukitab kaleiwag waseg; nilivnek mamagina: ‘Bo ikamliweigs mav; silawun nag.’

²⁶⁻²⁷ “Igaw bakayeb Teitan beiw bilabeimiy. Kululuwan Town ansinap mounid, bo beinoy Tamag waseg biwekeimiy; livaneig mo bisekeimiy. O yakamiy gog livaneig bukusekes gamag babaw wasigeis, peinan sigwey yakamiy nitasesus nakabsilamaw gunawotet waseg ee... sigwey yakamiy tut towen.

16

¹⁻² “Livan towen bo adibakeimiy vagan awoum bukupiyaveigs; igaw tasiyas bibwabwes mitapwäloul, sinagog waseg; o igaw kweitan tut wanakoug gamag mwasanin beiweimiy bukumtämats, o igaw biyageimiy mo bidokes Yowbad bikalin nuwan tasiyas.

³ “Siwotet towen biwteles, peinan nag bikakins Tamag, o nag bikakins yey.
⁴ Bo adibakeimiy sinap towen; igaw youd towen bikamat mo bukunuwes agulivan nadibakeimiy.

Yowbad Kululuwan nawotet tonen

“Wanmugwana nag adibakeimiy sinap towen, peinan igaw sigwey yakamiy nitasesus.
⁵ Tut gog towen bo banek Townen nikayabeig nam, tage nag kal yakamiy ikatiganeig ilana, ‘Ama-bukun?’ ⁶ Peinan nadibakeimiy sinap towen, mo igege amnamiy.

⁷⁻⁸ “Mounid gog adibakeimiy, bweina balisaweimiy. Kukin nag balisaweimiy, nag bakayeb Teitan bilabeimiy; tage bo ban, mogo Townen beiw, mo bikatimlakeimiy ven towen gimgilis babaw yakamiy, vagan kid bukukwakins sinap kalbaleb, sinap bwein, o sinap kalbaleb mapun.

⁹ “Mtowen bikatiboug nuwes kalisiy nag bisimounids waseg yey, mo bikakins asisinap kalbaleb.

¹⁰ “Bikatimlakeimiy agusinap bwein peinan bo bamwen banek Tamag, o igaw nag bukukineigs.

¹¹ “E, bikatimlakeimiy sinap kalbaleb mapun, peinan Tamag bo imop ansinap kalbaleb towen tanuwagan ven watinow.

¹² “Sinap babaw nisesus, igaw mo badibakeimiy, nagein gog ninoumiy igaw moumouvit. ¹³ Igaw beim Yowbad Kululuwan Mounid, mo bimgwayeimiy sinap babaw mounid waseg. Nanon tatonen nag bilivan, nag. Aveiyag biligen, mo bilivan mawan; o bilivnek sinap wanakougwaw silmanin.

¹⁴ “Mtowen bikow agusinap mo bikatimlakeimiy, vagan beivag yakawanag tatoneig.
¹⁵ Tamag navavag mamagina yey gunavavag, to nalivan, alana, ‘Mtowen bikow agusinap mo bikatimlakeimiy.’

Moumouvit beikous mo bukumwgasaws

¹⁶ “Igaw kakit mo balisaweimiy; tut kakit wankuyeim mo bukukineigs vayuwein.”
¹⁷ Navamul mwasanin sisiyas mo illivans, ilansa, ‘Aveiyag anilivan towen, ‘Igaw kakit mo balisaweimiy,’ o ‘Tut kakit wankuyeim mo bukukineigs vayuwein,’ o ‘Bo banek Tamag.’” ¹⁸ Ilansa, ‘Aveiyag wawun anilivan, ilana, ‘Igaw kakit’; tage nag takakins silawun.”

¹⁹ Yeisuw gog ikakin aw-youd sivines bikatugwans waseg, to ilana, “Adok kuneves silawun agulivan towen, ‘Igaw kakit mo balisaweimiy’ o ‘Tut kakit wankuyeim mo bukukineigs vayuwein.’” ²⁰ Mounid adibakeimiy, bigeg ninoumiy, bukuvalams; tage gamag babaw bo bimwgasaws. Mimouvit igaw mo bukwatilawos mwgasaw. ²¹ Mamagina vin, tutan bitup, namouvit ivag; tage bitapouy naman, mo beikous namouvit, mo bimwgasaw, peinan kweivaw gamag bo ikamat.

²² “Yakamiy mawan, tut towen mimouvit nises; igaw gog mo bawekeimiy, mo bukumwgasaws bukusigagas. Ta-kal biyageg mimwgasaw towen; nag.

²³ “Igaw yam towen waseg, nag bukunitougs waseg yey. Mounid adibakeimiy, igaw bukuntougis Tamag, yagag yey waseg, Tamag mo bisekeimiy. ²⁴ Tut kweiboug nag kweitan youd kuntougis Tamag, yagag yey waseg; nag. Kadiloka bukunitougs vagan bukukwawes, mo bivakaein mimwgasaw yakamiy.

Bo atawtoun ven watinow nakaleiwag waseg

²⁵ “Gunakabebay waseg bo adibakeimiy. Igaw kweitan tut beim, mo beikous kabebay; kamnat gog mo basekeimiy livanen Tamag. ²⁶⁻²⁷ Tut towen bukuntougis Tamag yagag yey waseg. Nag balivan, balana, ‘Banitoug Tamag waseg, pinamii yakamiy’; nag. Tamag

tonena nisiwyoubumi, peinan nukusiyoubugs yey, o nukusimounids mānoy nam Yowbad waseg.

²⁸ “Mānoy nam Tamag waseg, nam ven watinow; igaw mo balisow ven towen watinow, bayum gog banek Tamag.”

²⁹⁻³⁰ Navamul mo ilansa, “Tut gog towen amlivan kamnat. Mukwabebay bo ikous. Kakakin-wan yakoum kukwakin youd babaw; nag kadilok teitan bikatiganeim; mapuna kasimounid mukunoy Yowbad waseg nukum.”

³¹ Iwage Yeisuw, ilana, “Tabta mounid bukukwakins, ne? ³² Igaw kweitan tut beim, adok tut towen bo isilamaw, bikatigayeimiy bukuneis wamiven tatineimiy, bukulisewihs, agumwanet yey bases; tage amateiy soug Tamag bakases.”

³³ “Sinap towen bo asekeimiy vāgan bukusimounids waseg yey mo beitaw nuwamiy. Ven watinow mimouvit bukulivatus, tage awoum bigeg ninoumiy, peinan bo atawtoun ven watinow sinapun waseg.”

17

Yeisuw nakanitoug

¹ Yeisuw anilivan towen ikous, mo itamnow matan, ikin libālab, ilana, “Tamag, tutag bo neim. Kusekeig yakawanag, mo bavag gamag babaw biyakawaneims yak.

² “Bo nukutam agugwamag babaw vāgan bayamoves mo bisigagas; o bo nukusekeig gunakaleiwag gamag babaw wasigeis.

³ “Kalisiy bikakinsa yakoum mounid Yowbad yakoum, o nukukwayabeig Mesay Yeisuw yey, mo nam, tasiyas kalisiy bikakins māwan mo beimovs bisigagas.

⁴⁻⁵ “Gunawotet towen nukusekeig bo ayakous, vāgan ven watinow gimgilis mo biyakawaneims. Tut gog towen kusekeig yakawanag tatoneig walbalab wamatam. Māwan nitases nakabsilamaw tut waseg; e, vayuwein kusekeig yakawanag towen.

⁶ “Ven watinow gimgilis tasiyas nukusekeig, bo akatimlakes amsinap yakoum. Amgwamag tasiyas nukusekeig agugwamag, o bo ikanawes aygam yakoum. ⁷ Nagein gog bo ikakinsa gunavavag tasiyas nukusekeig meinoy nimeis waseg yakoum.

⁸ “Livan towen nukusekeig, bo akatipel asekes tasiyas, mo itams waseg. E, ikakins-wan manoy nam waseg yak, o isimounids nukwayabeig nam.

⁹ “Nag banitoug ven watinow gimgilis pines; nag. Misinaka banitoug pines tasiyas nukusekeig, peinan amgwamag tasiyas. ¹⁰ Agugwamag babaw mamagina amgwamag yakoum; o amgwamag mamagina agugwamag yey, o yakawanag peinan.

¹¹ “Tut towen balisow ven watinow, mo baw; tasiyas gog bisesus ven watinow. O Yowbad, kadiloka yagam waseg bukuvnāses gamag tasiyas nukusekeig. E, kuvnāses tasiyas vāgan beivag ninous katanok-wan, māwan nanoud yakid katanok-wan.

¹² “Tutag watinow waseg, sigwey tasiyas bo amtakavates gamag tasiyas nukusekeig; yagam waseg nisesus bwein. Nag kal iyamkwaneig. Misinaka towen Bukitab nilivnek peinan bo bigeg; e, mtowen anmwānet iyamkwaneig.

¹³ “Tut towen bo baw. Ven watinow waseg nasekes livan towen vāgan bimwāsaws avakaein, yey gunamwāsaw avakaein waseg.

¹⁴ “Bo asekes amlivan, ven watinow gimgilis mo ikamliwes tasiyas, peinan idokes tobwag gamag tasiyas; o yey māwan, idokeigs tobwag gamag yey.

¹⁵ “Awoum bantougim bukutokes vāgan bilisawes ven watinow; nag. Misinaka kumtakavates, mata beivag asisinap kalbaleb. ¹⁶ Nag ven watinow gimgilis tasiyas; māwan yey, yey nag gimgeilin ven watinow. ¹⁷ Kuvages amgwamag bikamnat, amlivan mounid waseg.

¹⁸ “Peinan nukwayabeig nam silmanin ven watinow, māwan yey akayabes tasiyas bineis silmanin ven watinow gimgilis. ¹⁹ Yey akatkileig vāgan balabes tasiyas, vāgan kid tasiyas bisesus bwein, asisinap mounid waseg.

²⁰ “Antougim pines tasiyas, sisiyas tasiyas babaw biliganes asilivan mo bisimounids waseg yey.

²¹ “Tama, anitoug *vagan* tasiyas babaw beivag ninous katanok-wan; *mawan* yak waseg yey, o yey waseg yak, nanoud katanok-wan; o sivinag sidayas tasiyas beivag nanouds katanok-wan; ven watinow gimgilis mo bikakins nukwayabeig nam.

²² “Sinap kamnat nukusekeig, bo akatipel asekes tasiyas, *vagan* beivag ninous katanok, *mawan* *yakid* aditeiy.

²³ “Yey sigwey tasiyas bakases, o *yakoum* soug yey; nakabiyokous waseg katanoka bod *yakids* babaw; ven watinow gimgilis mo bikakins nukwayabeig nam, o bikakins kukwalpwākit wasigeis tasiyas, *mawana* waseg yey.

²⁴ “O Tama, sivinag tasiyas biwekeigs wadavanuys. Nakabsilamaw tut waseg nukusiyoubug gunakamnat waseg. Sivinag tasiyas bikines gunakamnat wadavanuys waseg.

²⁵ “Ven watinow gimgilis na-ikakins yak, tadicumwal yak, tage yey akakina yak, o amgwamag tasiyas ikakinsa nukwayabeig nam.

²⁶ “Bo akatimlakes yagam o amsinap; igaw-vak mo bakatimlakes amsinap tatoneim, *vagan* kid *siwayoub* towen nukusiyoubug mo binekes tasiyas, o yey-vak basesuna wasigeis tasiyas.”

18

Iyousis Yeisuw

(Matiw 26:47-56; Mak 14:43-50; Luk 22:47-53)

¹ Anilivan towen ikous, Yeisuw mo inounas sen navamuls, iwloubus, ikanapels lay Kidlon, ikatulags, ineis bigulen oliv, isinis.

² Yudas, towen tasilkodein Yeisuw, ikakina Yeisuw sen navamul inineis ven towen.

³ Mapuna Yudas mo imgwayes takannaviys sisiyas tanuwgwas lun situwāveks siplismans mwasanin, o Palisiy siplismans mwasanin; ikokews wodama, lampa, son naviy youdanen, inounas, ineis bag towen.

⁴ Yeisuw ikakin youd babaw igaw bilivet, *iwage* ilana, “Kal kunineves?”

⁵ Ilansa, “Gum-Nasalet yagan Yeisuw.”

Yeisuw ilana, “Yey.” Yudas gog siney tasiyas nitomos, mtownen tasilkodein Yeisuw.

⁶ E, iliganes Yeisuw anilivan, ilana, “Yey,” mo isineikiks, ikalkalouws, immasis wapwepway. ⁷ Ikous, itamanaws, vayuwein Yeisuw mo ikatiganes, ilana, “Kal kunineves?”

Ilansa, “Gum-Nasalet yagan Yeisuw.”

⁸ *Iwage* Yeisuw, ilana, “Bo adibakeimiy mtownen yey. Bukuyousigs yey, tabta buku-tames tasiyas bineis wasiven; awoum kuyousis tasiyas.” ⁹ Yeisuw anilivan *mawan* *vagan* bikamat livan towen *Bukitab* nilivnek mamagina:

“Gamag tasiyas nukusekeig nag teitan
iyamkwaneig, nag.”

¹⁰ Saymon Pita mo ikow napulut tanmunum, iwei y tanuwgwas-lun sitovek natouwat teitan, yagan Malkos, ibob teigan wanakatay.

¹¹ Yeisuw idibek Pita, ilana, “Kusem mupulut wakaban. Kadiloka bāmoum kwāvig yayan Tamag nisekeig.”

Yeisuw iyatal tanuwgwas lun sitovek avakaiein wamatan

(Matiw 26:57-58; Mak 14:53-54; Luk 22:54)

¹² Takannaviy babaw sisiy sitovek, sisiyas min-Yudiy siplismans, mo iyousis Yeisuw, iyawanis naman. ¹³ E, itokes Yeisuw inawes wanamug Anas wanbunatum, tamwey towen Kayapas yawan; bweylim towen Kayapas tanuwgwas lun sitovek avakaiein.

¹⁴ Mtownen Kayapas nidibakes min-Yudiy sitakaleiwag mamagina, “Kadiloka tatanok gamag bikanig peinads *yakids*, bod Yudiy *yakids*.” (Kukines Yon 11:50)

Pita ikayan Yeisuw

(Matiw 26:69-70; Mak 14:66-68; Luk 22:55-57)

¹⁵⁻¹⁶ Saymon Pita mo ikabwākuns Yeisuw waseg, son navamul teitan; mtownen veiyon tanuwgwas lun sitovek, mapuna isiws wanbunatum sen gamag tasiyas nitokes Yeisuw.

Tage Pita itamanaw iton wamatan bunatum. Mtowen veiyon tanuwgves lun sitovek avakaein mo inek vin manawen ikayamat wakoukwed, ilivans son, mo ikaliyow koukwed vagan Pita beisiw beim.

¹⁷ Vin manawen mo idibek Pita, ilana, “Adok yakoum Yeisuw navamul teitan, ne?” Pita ilana, “Nag.” ¹⁸ Asiloulun; tasiyas tanuwgves lun sitouwats sisiyas plismans mwasanin mo ivlakes kov, itamanaws ikammunuws kov walasin. Pita siney tasiyas ikammunuws.

Tanuwgves lun sitovek avakaein ikatigan Yeisuw

(Matiw 26:59-66; Mak 14:55-64; Luk 22:66-71)

¹⁹ Tanuwgves lun sitovek avakaein mo ikatigan Yeisuw, ilana, “Kalisiy muvamul? O aw-sinap waseg nukumulis tasiyas?”

²⁰ Yeisuw ilana, “Agusinap bo alivan kamnat, gamag babaw wasigeis, Yowbad wanbunatum o sinagog wasigeis. Sitapwaloul waseg min-Yudiy babaw nikatilutegs agusinap nakatimlakay; nag kweitan sinap akatimwālag o akāwum; nag. ²¹ Aveiyag wawun khatiganeig yey? Khatiganes tanageins agulivan, tasiyas-nan; ikakinsa agulivan.”

²² Yeisuw ilivan ikous, teitan plisman wadadan nitamanaw mo iweiy Yeisuw, naman waseg, ilana, “Awoum khatimop tanuwgves lun sitovek anilivan mawan.”

²³ Yeisuw ilana, “Magat agulivan kalbaleb, kadiloka kwamtel aveiyag igege. Kukin gog nag, aveiyag wawun nukuweig?”

²⁴ Yeisuw igawa iyawanis naman, Anas mo ikayeb vagan kid biyatal wamatan Kayapas, mtowen tanuwgves lun sitovek avakaein.

Vayuwein Pita mo ikayan Yeisuw

(Matiw 26:71-75; Mak 14:69-72; Luk 22:58-62)

²⁵ Saymon Pita, igawa itamanaw ikammunuw kov; gamag mwasanin mo idibakes, ilansa, “Adok yakoum navamul teitan, ne?”

Pita ilana, “Nag.”

²⁶ Tanuwgves lun sitovek natouwat nises, mtowen veiyon towen Pita nibob teigan; ilana, “Adok bo akineim wābag soum Yeisuw, ne?”

²⁷ Vayuwein Pita ikayan, ilana, “Nag.” Mo igel kolkolek.

Iyateles Yeisuw wamatan Paylat

(Matiw 27:1-2, 11-14; Mak 15:1-5; Luk 23:1-5)

²⁸ Iyateles Yeisuw wamatan Kayapas ee... walalayis. Ikous, mo inawes gabman avakaein wanbunatum bunavakaein. O peinan min-Yudiy ikatkakils sitapwaloul waseg, yam towen beikams Kaltuwon bulukwan lamiy, nag kadilok beisiws gabman Lom wanbunatum wanuwan. ²⁹ Mapuna Paylat isap in watoulan, idibakes, ilana, “Aveiyag wawun bukuyateles taw towen?”

³⁰ Ilansa, “Kukin nag takalbaleb towen, nag bakamey waseg yakoum.”

³¹ Paylat ilana, “Mikaleiwag nises. Kunawes taw towen, kukwaleiwags waseg.”

Iweis min-Yudiy, ilansa, “Nag ivag makaleiwag vagan bakāweiy gamag.”

³² Min-Yudiy asilivan towen waseg mo ikamat livan towen Yeisuw nilivnek, peinan ilivan, “Beiweigs waklos.”

³³ Paylat mo iyum in wanbunatum, ilana, “Kukines Yeisuw beim.” Im to Yeisuw; Paylat mo ikatigan; ilana, “Tabta yakoum min-Yudiy siking, yakoum; ne?”

³⁴ Iw to Yeisuw, ilana, “Sivinam bukukwakin, ne? O adok min-Yudiy bo idibakeims livaneig towen.”

³⁵ Paylat ikatimop anilivan, ilana, “Yey nag gum-Yudiy, yey. Ambod tasiyas tanuwgves lun nimayeims waseg yey. Aveiyag mukwalbaleb?”

³⁶ Yeisuw ilana, “Ta-ivag gunakabkaleiwag ven watinow; nag. Magat gunakabkaleiwag ven watinow, gungamag mo bikanaviys vagan min-Yudiy nag biyousigs. Tage nag; gunakaleiwag kweitan-wan.”

³⁷ Paylat ilana, “Tabta king teitan yakoum, ne?”

Yeisuw ilana, “Mawanana nukulivan. Inag nikopweig wotet towen silmanin. Mapuna bo nam ven watinow vagan baktimlakay sinap mounid. Kalisiy asisinap mounid mo biliganes aygag.”

³⁸ Paylat ilana, “Aveiyag sinap mounid?”

Min-Yudiy sivines beiweiys Yeisuw

(*Matiw 27:15-31; Mak 15:6-20; Luk 23:13-25*)

Paylat ilivan ikous, vayuwein mo inek min-Yudiy, idibakes, ilana, “Nag aban ansinap kalbaleb waseg taw towen. ³⁹ Tage sagal towen Kaltuwon sinapun balik wadeil teitan baspuj bein wamnat. Sagal towen, kavel baspuj beiw? Takaleiwag yakamiy. Adok balik min-Yudiy miking baspuj beiw, ne?”

⁴⁰ Iwaks avakaen, ilansa, “Taw towen bises; tage Balabas beim.” Mtowen Balabas tavveinaw teitan.

19

¹ Paylat mo ikaliwages natakannaviy, vatul waseg iwaways wawon Yeisuw. ²⁻³ Iwaweiys Yeisuw ikous, tasiyas takannaviy mo isiwakus anapay vatul kulikoul waseg, mamagina doudiw, isenas wakunun, ivaskomis kweim bwabwel waseg, ikululs wamatian, ilansa, “Kalin nuwem min-Yudiy siking yakoum”; isibawes-wan; nimes waseg iwaweiys.

⁴ Vayuwein Paylat mo in watoulan, idibakes min-Yudiy, ilana, “Kukines gamag towen namey wasigeis yakamiy; kadiloka kukwakins nag aban ansinap kalbaleb waseg.”

⁵ Yeisuw mo isap, anapay kulikoul, anakweim bwabwel, Paylat mo idibakes, ilana, “Kukines gimilitoun towen.”

⁶ Tanuwgwas lun situwavek sisiyas siplismans ikines Yeisuw, mo iwaks, ilansa, “Kwatinates waklos!”

Paylat ilana, “Yakamiy kutokes, kunawes, kuweiys; yey nag; nag aban ansinap kalbaleb.”

⁷ Tasiyas Yudiy gimgilis mo ilansa, “Peinan taw towen anilivan, ilana, ‘Yey Yowbad Natun yey,’ kadiloka bikanig. Makaleiwag mawan.”

⁸ Paylat iligen asilivan towen, singay ivag anpwayat.

⁹ Iyum in wanbunatum wanuwan, idibek Yeisuw, ilana, “Avanuy mukunoy nukum?” Tage nag ikatimop anilivan, isesuna ikikapay.

¹⁰ Paylat mo ilivan, ilana, “Bo kukwapway ne? Tabta kukwakin yey takaleiwag. Bakaleiwag balikum, o nag, bukukwanig waklos?”

¹¹ Iw to Yeisuw, ilana, “Misinaka Yowbad beitam aveiyag bukunuwakeig. Kukin gog nag, bo nag. Bukuweig, sinap towen kalbaleb, tage mtowen nimayeig waseg yak, ansinap towen singay kalbaleb.”

¹² Paylat iligen Yeisuw anilivan ikous, mo iyokon vagan bilik; tage min-Yudiy ikuwaks, ilansa, “Kukin bukulik taw towen, Sisal mo bigeg nanon. Peinan taw towen anilivan, ilana, ‘Yey king yey,’ mamagina isilponay Sisal nakaleiwag waseg.”

¹³ Paylat iligen asilivan, isin kabkaleiwag kabanen waseg, waven towen ag-Ibliw waseg idokes Gabat, peinan dakul babaw nisesus wavytakon ven, mo imey Yeisuw vagan bikaleiwag waseg. ¹⁴ Bo iyanay yam towen bikatunags silmanin Kaltuwon sigeilin nubweig. Paylat mo idibakes min-Yudiy, ilana, “Kukines miking.”

¹⁵ Tasiyas gog ikuwaks, ilansa, “Kunawes taw towen, kwatinates waklos.”

Iw to Paylat, ilana, “Tabta bawey miking, ne?”

Iweis tanuwgwas lun, ilansa, “Making anmwānet Sisal.”

¹⁶ Wankuyeim Paylat mo itam Yeisuw vagan binawes beiweiys waklos.

Ikatikavates Yeisuw waklos

(*Matiw 27:32-44; Mak 15:21-32; Luk 23:26-43*)

¹⁷ Itokes Yeisuw, isekes anklos vagan bikow binow ven to yagan Busabwes (Ag-Ibliw waseg idokes Golgot.) ¹⁸ Ven towen waseg mo ikatikavates Yeisuw, ikayagweg waklos.

Asteiy ikatikavates ikayagwegs wasiklos, teitan palatan, teitan palatan, Yeisuw gog wanuwein.

¹⁹⁻²⁰ Paylat ilel livanen, isen wakunuwatan klos, mamagina, “Gum-Nasalet Yeisuw, min-Yudiy siking.” Nileles gog ag-Ibliw waseg, aga-Lom waseg, o aga-Gilis waseg; min-Yudiy singay babaw ivinis, peinan ven towen kadilakus Yelusalem. ²¹ Min-Yudiy babaw mo ivnivins lelel towen: “Min-Yudiy siking,” mapuna tasiyas tanuwgwas lun situwəvek mo idibakes Paylat, ilansa, “Awoum kulel: Min-Yudiy siking. Tage kadiloka kulel: Taw towen anilivan, ilana, ‘Min-Yudiy siking ye.’” ²² Paylat ilana, “Nag; to nalel bo bisesuna, bisigeg.”

²³⁻²⁴ Tasiyas takannaviy ikatikavates Yeisuw ikous, mo ikawes anakweim, ilagus kalguvas; katanok katanok mo ikawes asikweim. Anakweim mwaynavakaein mo iyousis, ilansa, “Awoum bitabwabwes maynawen kweim, peinan aniwniwoun katanok-wan; tativag ankatuvas. Bitalaves youd kweitan, makav bikalouw bein wapwepway, takines kal nakabivatus biton, towen mo bikow anakweim. Sona bikow. Awoum bitabob.”

E, ivages mawan vagan bikamat lelel towen Bukitab nilivnek mamagina.

“Ilagus agukweim, ikokews asikweim;
makava mo ilaves kweitan youd,
idokes kal bikow agukweim tonen.”

Mapuna takannaviys ivages mawan.

²⁵ Yeisuw anklos walasin itowas inan Meliy, son inan kweitan, sisiy Kilopas nakwav yagan Meliy, sisiy vinen-Magdal yagan Meliy. ²⁶⁻²⁷ Yeisuw ikines inan son navamul teitan nitatos, mtowen singay isiwāyoub waseg, mo idibek inan, ilana, “Inag kukin natum towen.” Mo idibek navamul, ilana, “Kukin inam.” Navamul iligen, tut towen waseg mo itok ineis wanven, imlavag inan tonen.

Yeisuw ikanig

(Matiw 27:45-56; Mak 15:33-41; Luk 23:44-49)

²⁸ Wankuyeim Yeisuw mo ikakin nawotet bo ikous, ilana, “Agudak! Ta-mawan!” (Peinan Bukitab kweiboug nilivnek mamagin.) ²⁹ Kwavitan kwāvig wayn yayan nises; yotout ikawes, isenas wakwāvig, ibasis kaligweg yagan yisop wamatān, iyaseles, isekes Yeisuw, imoum.

³⁰ Wankuyeim, ilivan, ilana, “Bo ikous!” Itagud kayon, mo ikanig.

Ibes viligan Yeisuw

³¹ Yam towen iyouluks, ikatunags peinan nubweig Sādad towen mamagina Sābat, sagal Kaltuwon waseg; singay ikayuses mamagina siSābat avakaein; mapuna min-Yudiy initougs waseg Paylat vagan takannaviys bikatupwes kikeis tasiyas ikayagwegs wasiklos, mo beimats, bikawes bilavewas. Awoum takanigs bikayagwegs ven walasin nubweig to Sābat waseg.

³²⁻³³ Mapuna takannaviy inekes teitan ikayagweg waklos, ikatupwes kaken, ikanig; ikous, mo inekes teitan ikatupwes kaken, ikanig; ikous mo inekes Yeisuw, ikines nanawan bo nikanig, to na-ikatupwes kaken, nag. ³⁴ Misinaka takannaviy teitan ikow nakayal, ibes viligan, ilatay buyav son yevagam.

³⁵ Yey atamanaw towen akakin, agulivan mounid peinan bo akin wamatag; agulivan towen asekeimiy vagan kid bukusimounids yakamiy. ³⁶⁻³⁷ Kweiboug Bukitab nilivnek mamagina:

“Awoum bikatup tatuwan tonen.”

Kweitan live nises:

“Bo bikines towen nibasis.”

E, takannaviy ivkakes mawan vagan bikamat Bukitab livanen Yeisuw silmanin.

Itakus Yeisuw

(Matiw 27:57-61; Mak 15:42-47; Luk 23:50-56)

³⁸ Gum-Alimatiy teitan yagan Yosep, kweiboug isimounid Yeisuw waseg, tage nag ikamat, peinan anpwayat min-Yudiy situwəveks wasigeis. Towen Yosep nag sivinan

Yeisuw won tasiyas takannaviys bilaves mav, to initoug waseg Paylat, mo itam Yeisuw won, isek; Yosep ikow inow.

³⁹⁻⁴⁰ Nikodimos mo inek Yosep, kweiboug nikaypuls son Yeisuw, boug waseg. Nikodimos imey kaybuy singay avakaein *vagan* won Yeisuw nag beipwas, mouvitan magina sinwavas kilos; mul son alow nisesus wanuwan kaybuy towen. Kaybuy son itabwes won Yeisuw, iyawanis kweim pwapwakaw waseg, mawan asigulagul tasiyas min-Yudiy.

⁴¹ Walasin ven towen neiweiys Yeisuw, bag kweitan nises, o bag wanuwan alawag kweivaw; kweiboug nag teitan takanig isenas, nag.

⁴² Peinan kadiyakus *siSabat* avakaein, o peinan alawag towen kadiyakus nises, to inawes Yeisuw, itakus.

20

Yeisuw ikit vayuwein

(*Matiw 28:1-10; Mak 16:1-8; Luk 24:1-12*)

¹ Wik kweivaw nakabsilamaw waseg, walalayis, kakit mo beikous dadub, vinen Magdal, yagan Meliy, in wakalawag, iban dakul bo iyatpinis wawadon, in waddadan. ² Meliy isawl, inekes Pita son Yeisuw navamul towen singay *isiwayoub* waseg, idibek tasiyas, ilana, “DaGuyaws alawagan makaw. Bo ikawes, inawes; nag kakakin, seik avanuy misekeyas.”

³ Pita iliganes anilivan, son Yeisuw navamul tayuwein, mo isaps bineis wakalawag.

⁴⁻⁵ Isisawls ee... son itamap, Pita ikuyeim.

Towen nitamap in wakalawag itapop, ikin alawag wanuwan, tibutobwa mav; tage nag isiw wanuwan.

⁶⁻⁷ Wankuyeim Saymon Pita inek, isiw in wanuwan, ikin tibutob palatan; ikin maynatan kweim niyawaniis wakunun sinkatupum imasis palatan. ⁸ Towen nimug nein wakalawag mo isiw in, ikin, isimounid. ⁹ Peinan bo itagouwawes Bukitab nilivnek Mesay beikit kanig waseg. ¹⁰ Tasiyas inavamul asteiy mo iyums ineis wasiven.

Nen-Magdal yagan Meliy ikin Yeisuw

(*Mak 16:9-11*)

¹¹⁻¹³ Meliy gog itamanaw waddadan alawag, ivvalam, itapop ikin wanuwan, ikines min-libalab asteiy, asikweim pwapwakaw, isinis nakabmasis Yeisuw, teitan wakunun, teitan wakaken; ikatiganes Meliy, ilansa, “Aveiyag wawun kuvvalam?”

Ilana, “Peinan guntovek bo inawes; nag bakakin seik avanuy misekeyas.” ¹⁴ Ilivan ikous, itouvin, ikin Yeisuw nitet; tage nag biwtus Yeisuw.

¹⁵ Yeisuw ikatugan, ilana, “Vin yakoum, aveiyag wawun kuvvalam? Kal kuninineiv?”

Wananon idoki towen tawtelein kid bag, ilana, “O tamwey, magat bo kukow, kunow, kadiloka kudibakeig avanuy mukusekey, yey mo ban bakow, bamey.”

¹⁶ Yeisuw ilana, “Meliy!”

Itouvin, iwtus, ilana, “O, guntovek!” (Ages tasiyas “Labonay”; aga-Muyuw gog “Guntovek.”)

¹⁷ Iw to Yeisuw ilana, “Awoum kwabikon wawoug; awoum. Peinan nag anek Tamag; igaw wankuyeim mo bamwen banek. Nagein kun kudibakes budag agulivan mamagina: ‘Yey bo bamwen banek Tamag, Timamiy, mtowen gunaYowbad, miYowbad, daYowbads babaw yakids.’”

¹⁸ Vinen-Magdal manawen Meliy mo inekes inavamul Yeisuw, ilana, “Bo akin datoveks”; mo ikamtel youd babaw to nilivan.

Isap inavamul wasigeis

(*Matiw 28:16-20; Mak 16:14-18; Luk 24:36-49*)

¹⁹⁻²⁰ Yam towen kwayav *Sabat*, inavamul Yeisuw nisesus wasibunatum. Awkwedan bo ikatibog, peinan iwenes min-Yudiy situwavek.

Yeisuw mo isap, itoun wanuwein, ilana, “Beitay nuwamiy yakamiy!”; ikatimlakes naman, viligan.

Bo ibwein ninoos tasiyas, peinan ikines sitovek, bo imwasaws seikwan.

²¹ Vayuwein gog mo ilivan, ilana, “Beitay nuwamiy yakamiy. Tamag nikayabeig, mawān bo bakayabeimiy.”

²²⁻²³ Ilivan ikous, ipwayik wawous tasiyas, mo ilana, “Yowbad Kululuwan biwekeimiy. Kalisiy asisinap kalbaleb bukulavewas, bo bisiw bisigeg. Magat bukulivans bisesus wasigeis, bo bisesus.”

Tomas nag isimounid

²⁴ Yeisuw nisap nilivan mawān wasigeis inavamul tasiyas sinwatan; teitan gog Tomas nag ises wasigeis. Tomas yagan kweitan Papap. ²⁵ Wankuyeim Tomas inekes tasiyas sinwatan, mo ilansa, “Bo nakakin datoveks.”

Tomas gog idok kid iyaweids, ilana, “Magat bakin naman pwapwat mulin, bakawgil didig waseg, o viligan bwabwagan kayal bakawgil namag waseg, mo basimounid. Kukin gog nag, bo nag.”

²⁶⁻²⁷ Yam kweinim kweitoun ikous, inavamul vayuwein ikatuyouns wasibunatum wanuwan nisesus; e, Tomas sisiy nisesus. Yeisuw isap, koukwed katibog kid, itoun wanuwein, ilana, “Beitay nuwamiy yakamiy.” Mo idibek Tomas, ilana, “Kukin namag, viligag; namam kwabkwēn, mo kusimounid; awoum kusesuna mav.”

²⁸ Iwage Tomas ilana, “O guntovek, gunYowbad yak.”

²⁹ Yeisuw ilana, “Tayyaweid yakoum Tomas, kukineig mo kusimounid peinan bo əkit. Tasiyas gog nag ikineigs, o singaya ge isimounids waseg ye, bwanabwein tasiyas adok bimwasaws.”

Silawun buk towen

³⁰ Yeisuw nawotet tawtoun singay babaw; navamul yakamey nakakin. Kweiyuy nalel nises wabuk towen; babaw nises. ³¹ Bo alel tasiyas vagan bukuvinis o bukuliganes, mo bukusimounids peinan Yeisuw Mesay, Yowbad natun tonen. Bukusimounids yagan waseg mwamovamiy mo bukubānes.

21

Yeisuw isap wasigeis navamul teinim teiy

¹ (1,14) Yeisuw ikit kanig waseg, sivay isap inavamul wasigeis; sivtounun mo isap mamagina:

Yevagam katiboul wanawoud yagan Tibeliyas. Yeisuw inekes navamul wadadan yevagam towen. ² Tasiyas katanok bod nisesus, Saymon Pita, Tomas (mtowen idudouws Papap), Nataniyel (mtowen naven Ken, wawnawan Galiliy), sisiy Sebidiy nitun, sisiy Yeisuw navamul asteiy.

³ Saymon Pita mo ilana, “Ban agileloud.”

Tasiyas ilansa, “Simey yak bitaneis.”

Inibwis siwag, ikalavis, igilelouds ee... iyam. Ta-kweitan in ikwanes. Makaw-wan.

⁴ Walalayis Yeisuw iton wakawalaw; tage navamul nag iwtusis. ⁵ Yeisuw idibakes, ilana, “Tawaw! Tabta amiyin?”

Ilansa, “Nag. Makawan!”

⁶ Yeisuw ilana, “Kweitan saw kulaves wamikatay, mo bukukwanes in.”

Ilaves wot in, mo ikwanes asiyin; nag bikawes, peinan singay babaw. Ta-mawān bidagis in wanuwan wag.

⁷ Yeisuw navamul towen isiwayoub waseg, mo idibek Pita, ilana, “Mtowen datoveks.” Saymon Pita sona mwadoyan iwwotet, ikakin mtowen natovek, mo isikam anakweim, inuw wayevagam, igay.

⁸ Yeisuw navamul tasiyas wawag ikalavis ineis wanakaew, isilbiteilis wot peinan bo ikalawt in; nag bikadiveiyov mo italags. ⁹ Ineis wanakaew ikines kov son in bo ikamen, son bled.

¹⁰ Yeisuw idibakes, ilana, “In town nukukwanes, kumeyes mwasanin.” ¹¹ Saymon Pita mo itow in wəwag, iyous wot, ibiteil in wanakaew, bo ikalawt in kavkaveks lakatutan sinwanim mwanqoun. Tage nag ikayboulis wot; bwein-wan.

¹² Yeisuw idibakes, ilana, “Kumeis, kukwams.”

Nag kal bikatugan, bilana, “Kavel yak?” Aspwayat bikatiganes. Ikakins gog sitovek townen.

¹³ Yeisuw im, ikow bled, ivgen isekes; in-vak mo isekes mawan; ikams. ¹⁴ (-)

Kumtakavates aleig sip

¹⁵ Ikams ikous, Yeisuw mo idibek Saymon Pita, ilana, “Yon natun yak. Tasiyas isiwyoobugs. Tabta yəkoum singay bukusiwyoubug, ne?”

Pita ilana, “Mounid; guntovek yak, kukwakin asiwyoubum.”

Yeisuw ilana, “Kumtakavates aleig ləmiy.”

¹⁶ Sivyuein Yeisuw idibek Saymon, ilana, “Yon natun yak, tabta bukusiwyoubug, ne?”

Pita ilana, “Mounid; guntovek yak, kukwakin asiwyoubum.”

Yeisuw ilana, “Kumtakavates aleig sip.”

¹⁷⁻¹⁸ Sivtounun Yeisuw idibek Saymon, ilana, “Yon natun yak, tabta bukusiwyoubug, ne?”

Pita mo igeg nanon, peinan Yeisuw nilivan sivtounun, ilana, “Tabta kusiwyoubug?”; to ilana, “O guyaw, youd babaw kukwakin; kukwakina asiwyoubum.”

Yeisuw ilana, “Kumtakavates aleig sip. Mounid adibakeim, igaw wagwədim nukusikam amkweim, nukuninoun ampalawen sivinam. Igaw bukutovek namam bukudimwes, soum teitan biyawen amuwat, bivakabanim binawein palatan nag ivag sivinam.”

¹⁹ Yeisuw anilivan townen vagan bikamtel amawan Pita bikanig, yakawan Yowbad silmanin. Ikous, mo ilana, “Kwabkunig.”

Yeisuw navamul townen singay isiwayoub waseg

²⁰ Pita itouvin ikin Yeisuw navamul teitan ikabwəkun waseg, mtownen singay isiwayoub waseg, o kamkwam waseg nisineikim kadiyakus wavytakon Yeisuw nikatimwalag, ilana, “Tamwey, kal townen bisilkodeim?” ²¹ Pita ikin navamul townen, idibek Yeisuw, ilana, “Taw townen, aveiyag bilouvat?”

²² Yeisuw ilana, “Kukin bətam vagan mtownen bisesuna ee... mo bayum bam, awoum bigeg nanoum. Misinaka kwabkunig.”

²³ Yeisuw nagamag iliganes livan townen, idokes kid taw townen nag bikanig; tage Yeisuw na-ilivan, “Mtowen nag bikanig”; nag. Misinaka ilana, “Kukin bətam vagan mtownen bisesuna ee... mo bayum bam.”

²⁴ Yeisuw navamul mtownen nikatimlakeids youd tasiyas, nilel nein wəbuk; takakins-wan anilivan bo mounid.

²⁵ Wotet babaw Yeisuw niwtel. Kukin teitan bilel nawotet babaw bein wəbuk, adok ven watinow mo bikalawt buk maynsiyas, tage igawa bilelel.

WOTET

Yowbad Kululuwan Bwanabwein

¹⁻² Kalin nuwag Tiyopil yakoum. Kweitan livan kweiboug nalel neiw. Let towen wanuwan nalel livanen Yeisuw. Yeisuw isilamaw nawotet babaw o nageiguy, iwwotet ee... tutan iyakous nakatimlakay nagamag wasigeis, mo imwen in walbalab. Peinan bo nikatigikes nagamag tasiyas silmanin anilivan bikokews; ikatimlakes waseg Kululuwan Yowbad, ikous, mo imwen in walbalab.

³ Peinan kweiboug mwasanin niyagages Yeisuw, imat, ikit vayuwein; sona mwamovan mo inekes nagamag tasiyas; ikines nawotet tawtouna singay; e, tasiyas isimounids bo imov, peinan siney inounas sinawavas yam waseg, ikkines Yeisuw, o sinapun Yowbad inakaleiwag Yeisuw bo ikatimlakes.

⁴ Misumkwey siney nagamags nikatuyouns nisesus, Yeisuw idibakes, ilana, “Awoum kunounas; tage kukwayamats Yelusalem waseg; Tamag mo bikayeb teitan gamag biwekeimiy vagan kid bilabeimiy; kweiboug nikatigik mawan, o yej nadibakeimiy mawan.”

⁵ “Peinan kweiboug Yon nibaptayses gamags, soup waseg; tage igaw tut nag biveiyov, Yowbad mo bibaptayseimiy yakamiy, waseg kululuwan tatonen.”

Yeisuw imwen in walbalab

⁶ Katuyouns tasiyas mo ikatiganes Yeisuw, ilansa, “Tamwey, tabta bukuvag vayuwein bitawtoun dakaleiwags, yakids min-Yisleil, mawana kweiboug? Tut towen bukuvag mawan? o nag? igaw?”

⁷ Yeisuw ikatimop asilivan, ilana, “Tamag nawotet towen. Nag kadilokeimiy bukuwkins avei-tut o avei-yam Yisleil vayuwein mo bitawtoun; peinan takaleiwag anmwānet Tamag.”

⁸ “Tage yakamiy miwotet kweitan. Igaw Kululuwan Town Bwanabwein biwekeimiy, bikimtuweimiy vagan bukusekes livaneig min-Yelusalem wasigeis, o min-Yudiy asibabaw-wan, o min-Samaliy wasigeis, o vena babaw wadaban pwepway.”

⁹ Igawa illivan mawan o ikkines; Yowbad mo ikow, inow, ilakanig-o lov kweitan wanuwan.

¹⁰⁻¹¹ E, iyeys, ikakins walbalab, Yeisuw nilakanig yay; nuwanaw mo itamanaws wadides tawaw asteiy, asikweim pwapwakaw. Tasiyas mo ilivans, ilansa, “Min-Galiliy yakamiy, aveiyag wawun kutomos kukwakin walbalab? Town Yeisuw mwana nilisaweimiy nein walbalab, igaw mawan, mo beiyum bimekeimiy. Mawana nein, e, beiyum beim mawanwan, ankakin katanok-wan.”

Atimapun Yudas

¹² Ikous, ilisawes koy towen, yagan Oliv, iyums ineis Yelusalem. Ked towen nag biveiyov, kadiyakus-wan, kadiloka gamag binoun yam Tapwaloul waseg.

¹³ Iyums, mo isiws wasibunatum to nisikeyas, mo imnavaws kasiyuwein waseg, tasiyas Pita, Yon, Yemes, Andiluw; tasiyas Pilip son Tomas; tasiyas Batolomiw son Matiw; Alpiyow natun towen Yemes; talliwon towen yagan Saymon; o Yemes natun towen Yudas.

¹⁴⁻¹⁶ Asibabaw tasiyas, ninous kid katanok-wan vagan bininitougs Yowbad waseg. Sisiyas vinay mwasanin, sisiy Yeisuw inan Meliy, siney Yeisuw budan. Babiweis mamagin lakututan sinawey. Misiyamun towen, kweitan yam waseg, Pita mo itamanaw wanuwein gamag siyas babaw, ilana, “Budag yakamiy, kweiboug Yowbad Kululuwan ikatipel ansinap isek Deibid, mo ikatigik nawotet Yudas, towen talabein siyas niyousis Yeisuw; o Deibid anilivan towen nein Bukitab waseg. O kadilok youd siyas bikamats mawan Deibid anilivan kweiboug.

¹⁷ “O towen Yudas sods nitasesus, o datoveks nisek inawotet, mawana yakids.

¹⁸⁻¹⁹ “O towen gog isilakod Yeisuw waseg, mo ikow maysan nawotet towen, igimwel pwepway kweitan. Wankuyeim mo ikalouw kantukov wapwepway towen, nuwan ikatuw, sinewun isap in wamnat. O min-Yelusalem babaw ikakins, mapun idokes pwepway ‘Akeldamak.’ (Kativin bein aga-Muyuw ‘Buyav pwapwaynein’).

²⁰ “O livən Yudas nises Bukitab, kweitan Sam waseg, məwana, ‘Kadiloka naven bikalipet; awoum teitan gamag bisik.’ E, kweitan livan nises, ‘Kweitan gamag bikow nawotet.’ ”

²¹⁻²² Pita mo ilivan, ilana, “Kadiloka taneves atimapun Yudas, kavel tut babaw sods nitasesus; nitakines Yon igaw kweiboug nibaptyses gamags, o nitakines daGuyaws Yeisuw, yam babaw ininoun ee... tutan ilivet mo imwen in walbalab. O sods towen bitakokews livanen Yeisuw nakabeikit waseg; e, bitaneves mtownen atimapun Yudas.”

²³ E, iliganes Pita anilivan, isenas tawaw asteiy; teitan Yosep, yagan pinatoun, kweitan yagan Basabas, kweitan yagan Yusitos; tayuwein isenas yagan Matiyas.

²⁴⁻²⁵ Ikous, mo ikululs Yowbad wamatian, initougs, ilansa, “O Guyaw, kukwakina gamag babaw amasinap, kwatimlakem mukwaleiwag wasigeis tasiyas asteiy, kal atimapun Yudas bikow nawotet, takawein amlivan; peinan Yudas bo ipiyev nawotet towen, inoun in inaven kweitan.”

²⁶ Wankuyeim mo ileles yiges tasiyas asteiy, akweiy youd waseg, mo ilaves makaw; ikalouws, o yagan Matiyas isin wanakaew, mapun Matiyas isiw inekes tasiyas takaweins livanen Yeisuw; tasiyas sinawatan tatanok.

2

Kululuwan Townen Bwanabwein isap

¹ Pentikos anayam waseg, Yeisuw nagamag asibabaw-wan, katanoka bunatum waseg nisesus.

² But meinoy neim walbalab, singay nuwanaw inekes; idokes yag itow avakaein; bo iyavkavek bunatum towen nisinis wanuan.

³ Wamtes gog mamagina mayen kov, ililivis in palatan palatan, mo itonas wasigeis gamag katanok katanok.

⁴ Yowbad Kululuwan Townen Bwanabwein bo inekes, asibabaw-wan, mo igeiguis, asilivan kweitan kaeig kweitan kaeig, peinan asisinap bo isekes Kululuwan Yowbad.

⁵ Misumkwey towen vena babaw gimgilis nimeis sagal towen silmanin, nisesus Yelusalem, tawaw bwanbaweins, gimgilis vena babaw wadaban pwepway.

⁶ Butun towen iliganes; ikatuyouns nimeis, bo iyow nuwes peinan asibabaw iliganes ages tatineis.

⁷⁻¹¹ Singay isom ninous, ilansa, “Adok tasiyas asibabaw-wan min-Galiliy ne? Aməwan asilivan nitaliganes teitan gamag aygan tonen, teitan gamag aygan tonen; tage yəkids aygads babaw, peinan davanuys babaw, Palit, Mediy, Elam, Mesopotemiy, Yudiy, Kapadokiy, Ponit, Esiy, Piligi, Pampiliy, Yidipt; o wawnuwan Aplik ven mwasanin, Saylin walasin; o mina-Lom, mwasanin min-Yudiy nikoulups inies Lom sisiy mina-Lom tasiyas nikawes min-Yudiy datapbaloulus; o min-Kilit, o min-Alebiy; yəkids babaw taliganes livanen Yowbad nawotet tawtoun, o babaw yəkids taliganes aygads tatoneids waseg.”

¹² Bo isom ninous peinan nag ikakins silawun. Sisiyas ikatigənes, ilansa, “Aw-sinap towen?”

¹³ Tage mwasanin isibəwes, ilansa, “Bo ikabaləweins, peinan wayn neimouums adok.”

Pentikos anayam Pita igeiguy

¹⁴ Siney Yeisuw nagamag, tasiyas sinawatan tatanok, Pita mo itamanaw igeiguy, idibakes gamag babaw, ilana, “Sigwey min-Yudiy yakamiy, o Yelusalem gimgilis yakamiy babaw, kuliganes agulivan, mo bakatimlakeimiy sinap kweitan.

¹⁵ “Peinan kulivans, ‘Bo imuums wayn, ikabalawéins,’ nag; nag bakakabalawéin, peinan igaw gaboug. Tasiyas bikabalawéins, wayn kwayav waseg beimoums mo bikabalawéins; tage yakamey bwein.

¹⁶⁻¹⁷ “Youd towen nukukines peinan palopit Yowel kweiboug-o nikatigik, ilana, ‘Yowbad anilivan mawana: Igaw nakabiyokous tut ven watinow, kululuwag bo basekes ven babaw gimgilis, nitimiya, tawaw o vinays, mapuna bigeiguy agulivan waseg.

Tabwabwat wasigeis yakamiy bikines kweivaw youd, mamagina asmikon; ninous waseg bikakins; o tammwayas, asmikon waseg bikamikons.

¹⁸ O yam towen waseg kululuwag bo basekes gungamag, tawaws o vinays, mo bigeiguy.

¹⁹ Aniyag bo basen wanakaew walbalab, o ven watinow. Aniyag buyav waseg o kov son musewun waseg.

²⁰ Kálas biladadub, o tibukon bilabwabwel mawana buyav.

Ikous, mo bikamat Guyaw Yowbad nawotet tawtoun, inayam towen waseg.

²¹ Guyaw towen bo bikatinabwes gamag tasiyas kalisiy bidawes yagan.’

²² “Sigwey min-Yisleil yakamiy, kuliganes agulivan towen. Yowbad bo ikatimlakeids gum-Nasalet towen, yagan Yeisuw, naman mulin waseg, nawotet tawtoun, peinan Yowbad nisek natawtoun tonen silmanin wotet towen; o sods nitasesus, nawotet tawtoun nivvag, o babaw yakamiy kukwakins.

²³ “O kweiboug Yowbad ikakin-wan towen nawotet babaw bo biwtel ven watinow waseg; o Yowbad kweiboug nikaleiwag silmanin takalbalebs biyousis towen Yeisuw, bikatkavates waklos, mo bikatimates. O yakamiy miwotet mawan.

²⁴ “Tage Yowbad bo iyamov Yeisuw, kanig mouvitan bo ilisow. Nag kadilok kanig bitawtoun Yeisuw waseg, nag.

²⁵⁻²⁸ “Livanen mtown kweiboug Deibid bo ilivan Yeisuw anilivan mamagina,

‘Tut babaw nakikineim yak gunguyaw yak wamatag.

Guntawtoun bisigeg, peinan yákoum wagunkatay nukuses.

Mapun, wadoug waseg allivan, peinan gunmwásaw avakaein.

Igaw woug waseg nases ven watinow, bo banmiseim gunguyaw yákoum bukwatinabweig.

Peinan kwayuseig, awoum kululuwag bisesuna waTum.

Awoum woug beipwas; awoum.

Bo nukwatinlakeig ked towen kabmwamov kidenen.

Wamatam bo bukuvag gunmwásaw bivakaein.’

²⁹ “Sigwey yakamiy, adok balivan livanen datoveks towen Deibid; livan kamnat balivan. Towen Deibid bo ikanig, itakus wakalawagan waseg; e, alawag towen, igaw tut towen wadavanuys nises.

³⁰ “O peinan Deibid palopit, bo ikakin sinapun Yowbad; o Yowbad bo itabudabod, idibek Deibid, ilana,

‘Mounid wabuyavim igaw mo bisap tabum yákoum, towen bo biguyaw, bikow kid mukwaleiwag.’

³¹ “O kweiboug, peinan Deibid ikakin mtown Kelis kanig bo bilisow, bitamanaw vayuwein, livanen bo ilivan mamagina:

‘Awoum bisesuna waTum. Awoum won beipwas; awoum.’

³² “Yowbad gog nivag mtown Yeisuw mo itamanaw vayuwein; o yakamey bo nakakin.

³³ “O tut towen, mtown Yeisuw, Taman nisek nakaleiwag avakaein, o nises Taman wanakatay. O peinan Taman anilivan, bo bisek Kululuwan Town Bwanabwein, nagein gog bo isek, katipel mo nisekem yakamey; nawotet towen kukines o kuliganes.

³⁴⁻³⁵ “Deibid ta-imwen in walbalab; Yeisuw gog imwen in walbalab. Livanen Yeisuw nilivan mawana,

‘Yowbad bo idibek gunguyaw, ilana: Kusin wagunkatay.

Tage tasiyas nikamliweims igaw mo bavag beibus, bimlavags mamagina mukwabtatet.’

³⁶ “Kuliganes beibwein, o kadiloka min-Yisleil babaw yakamiy bukukwakins kamnat waseg, Yowbad bo ikatigik guyaw teitan takatinabweids yakids, towen yagan Kelis, mtownen Yeisuw nukuweiys waklos.”

³⁷ Gamag tasiyas iliganes, bo igeeg ninous, ibwayouys avakaein, ikatugwans waseg Pita siney Yeisuw nagamags, ilansa, “Tawaw, bo igak! Amawan bakavkek?”

³⁸ Pita ikatimop asilivan, idibakes, ilana, “Kulavewas amisinap kalbaleb, mo bakabap-tayseimiy tatanok tatanok yakamiy, Yeisuw Kelis yagan waseg; mo biwid mikalbaleb, binumlev, nasiwayoub mo bisekeimiy, Kululuwan Town Bwanabwein.

³⁹ “Peinan Yowbad bo ilivnek mounid bisiwyoubuds yakids sidayas nitidayas, o bisiwyoubus vena babaw gimgilis, kalisiy daGuyaws Yowbad bidawes. E, Kululuwan bo isekeds sidayas tasiyas.”

⁴⁰ Anilivan mawan mo igeiguy avakaein, idibakes, “Kadiloka kulavewas simiyas, peinan takakons tasiyas.”

⁴¹ Gamag mwasanin iliganes anilivan; yam towen mo ibaptayses, mo iyakelesiys tasiyas, babiweis mamagina kweitoun tawsan gamag.

⁴² Tasiyas bo itoukums. Yeisuw nagamags asilivan iliganes, o sisiyas tasiyas nisesus, ininitougs Yowbad waseg; o bled ikikivis, mawan assinap.

Tayakelesiys asisinap

⁴³ Gamag babaw bo igoulus Yowbad; peinan ikines Yeisuw nagamag siwotet singaya tawtoun.

⁴⁴ O tasiyas tanageins livanen Yeisuw, sisiyas nisesus; o sivavag mamagina babaw gamag sivavag; nag kweitan ikayuses, nag.

⁴⁵ O sipwepway o siwliyoug iyamiyises, mayses ivganes tasimavs wasigeis.

⁴⁶⁻⁴⁷ Yam babaw ikatuyouns tasiyas-wan, ineis Yowbad wanbunatum. Tage tatineis wasibunatum, bunatan bunatan, ikikivis bled; sisiyas ikamkwams, ikalin nuwes, bo imwəsaws; ikavvasis Yowbad; o gamag babaw ikalin nuwes tasiyas. O yam babaw Guyaw Yowbad ikatinabwes gamag mwasanin; ikatimweisis nagamag bo ibabaw.

3

Takagayal ivages mo ibwein

¹ Kweitan yam, kelas bo itageg, tutan nitoug Yowbad wanbunatum, Pita son Yon mo ineis, nitoug silmanin.

²⁻³ Teitan taw igaw kweiboug inan nikop yay igayal, bo ivakaein tage angayal isigewan; o yam katanok katanok issin Yowbad nabunatum wawkwedan, koukwed towen yagan Kamnabwein; e, tut babaw issin towen, ininitoug money wasigeis gamag tasiyas nisowsiws wanuwan. Osiney bikokews taw towen biwayes, Koukwed Kamnabwein waseg bisin, yam babaw mo bininitoug; o taw towen ikines Pita son Yon kakita bo beisiws wakoukwed, mo initoug money wasigeis.

⁴ Pita son Yon ikikines taw towen; Pita mo ilivan, ilana, “Kukinem yakamey.”

⁵ Taw towen mo igintoves tasiyas asteiy; idoki bisiwyoubus kid.

⁶ Nag gog, Pita ilana, “Ta-ivag money waseg yey. Kweitan youd nises waseg yey, bo basekeim. Gum-Nasalet yagan Yeisuw Kelis, mtownen yagan waseg adibakeim kunoun.”

⁷⁻⁸ Pita iyous naman wanakatay, mo itamnow. Nuwanaw idamoms kaken, o inatub meivek-wan idamoms; kaspepel, itamanaw, mo inoun; o siney tasiyas asteiy mo isiws Yowbad wanbunatum, inoun palatan palatan, ipilapel, singay iyakawn Yowbad waseg.

⁹⁻¹⁰ Gamag babaw bo ikines taw towen ininoun, o iliganes anayakawn Yowbad waseg; iwtusis tantougein money towen kweiboug nises Yowbad nabunatum watoulan, Koukwed Kamnabwein waseg. Meiveka tasiyas bo isom ninous, mapuna ikalin nuwes, peinan ikines takagayal towen bo ibwein.

Pita igeiguy

¹¹ Taw townen siney Pita, Yon nisesus. Bo isom ninous gamag babaw, isisawls, imimeis kwanow kweitan yagan Solomon nakwanow.

¹² Pita ikin, ikatimop asilivan, ilana, “Min-Yisleil yakamiy, aveiyag wawun isom ninoumiy, o wawun kukinemas yakamey. Ta-ivag matawtoun o amasinap tatinem vagan bakavag beibwein takagayal townen, nag.

¹³ “Townen Yowbad nawotet, mtownen Ebelam naYowbad, o Aysak naYowbad, o Yekob naYowbad, o tamumwey babaw siYowbad; mtownen nivag natun Yeisuw mo iguyaw. E, yakamiy nukupiyaves taw townen, nukusilkodes wamatian Paylat; o Paylat gog sivinan bikaluweg townen Yeisuw bilik bisap.

¹⁴ “O yakamiy gog nukupiyaves taw townen bwanabwein, tadinumwal, o nukwawtagis yagan tawayin gamag, vagan Paylat bikaluweg taw townen bilik bisap.

¹⁵ “Nukuweiys abmwamov tanuwagan townen, o Yowbad gog bo ivag ikit kanig waseg, bo kakin yakamey.

¹⁶ “Waseg natawtoun mtownen yagan Yeisuw, taw townen bo ibwein. O kweiboug nukukines angayal taw townen, o nagein-vak kukines bo idamoms kaken, peinan bo isimounid waseg Yeisuw. E, isimounid waseg Yeisuw, mo isek natawtoun wamitamiy babaw yakamiy.

¹⁷ “Sigwey, nagein akakin nukuwteles mawan peinan tatagouwaws yakamiy, o mituwaveks-vak mawan.

¹⁸ “O Yowbad gog ikakin gamag mwasanin biyagages naKelis, o kweiboug ikatimlakes napalopit mawan; e, mo ilivans mawan tababaw palopit tasiyas; o mawan asilivan kweiboug, mawana tut townen bo ikamat.

¹⁹⁻²⁰ “Kadiloka kuvages ninoumiy bikanavin, kulavewas amisinap kalbaleb, vagan Yowbad biwid, binumlev. DaGuyaws mo bivag beibwein amnamiy. Peinan bo ikaleiwag Yeisuw Kelis nawotet vagan bilabeimi. Magat bikanavin ninoumiy, Yowbad mo bikayeb mtownen biwekeimi.

²¹ “Tut townen Kelis bo nein walbalab, kadiloka bisesuna ee... igaw anatut bikatilow youd babaw mo beiyum beim, mawan pwamug-o nilivnek Yowbad wasigeis napalopits tatonen.

²²⁻²³ “Moses gog anilivan mawana,
‘Igaw palopit teitan daGuyaws Yowbad mo bisek nawotet, mtownen budamiy teitan,
palopit mawana yey;
kadiloka kuliganes anilivan babaw wasigeis yakamiy.
Kavel tapiyavein anilivan palopit townen, bo bagidem taw townen, bilisaweimi, binoun.’

²⁴ “E palopit babaw kweiboug nilivnakes youd townen, asilivan katanok-wan, tage tut townen bo nikamat. Wanmugwana Samwel anilivan mawan, mo tasiyas wankuyeim asilivan bo mawan.

²⁵ “O yakids tut townen mamagin tasiyas palopit tibsiyas yakids o Yowbad nakaleiwag tamumwey wasigeis bo ikaluweg silmanin yakids; anilivan Ebelam waseg, ilana,
‘Igaw ven babaw gimgilis wadaban pweppway mo bimwasaws tabum waseg.’

²⁶ “Wanamug Yowbad bo isekeimiy natouwat pinamiy yakamiy, nikayeb mtownen niwekeimi, vagan bukulavewas amisinap kalbaleb, mo bukumwasaws; wanmugwana yakamiy min-Yudiy, tage vena babaw wankuyeim mo bimwasaws.”

Bo iyateles Pita son Yon

¹⁻² Igaw Pita son Yon illivans gamag wasigeis, mo isaps tanuwgwas lun situwavek, sisiy tulal avakaiein, townen tamtakavatein Yowbad nabunatum, sisiyas tasiyas Sadusiy; bo igeg ninous tasiyas, peinan ikatimlakes gamags, ilansa, “Kanig waseg gamag beikits vayuwein, peinan Yeisuw nikanig, mo itamanaw vayuwein.”

³ Mapuna iyousis tasiyas tawaw asteiy, isenas wadeil, bikayamats yamtan yam kid waseg mo biyateles, peinan bo ikwayav.

⁴ Tage babaw gamag niliganes asilivan, bo isimounids waseg; tawaw siyas isimounids bo ibabaws, mamagina kweinim tawsan.

⁵ Iyam-nen Yelusalem waseg mo ikatuyouns tanuwgwas lun situw^{avek}, o tamumwey, o takatimlakeins kaleiwag.

⁶ Misumkwey towen tanuwgwas lun sitovek avakaein yagan Anas, nimeis siney Kayapas, Yon, Alekisan, sisiy angamag mtownen tanuwgwas lun sitovek.

⁷ Imeyes Pita son Yon itomos wanuwein gamag babaw, mo ikatiganes, ilansa, “Aw-kaleiwag waseg, kal yagan waseg kuwteles sinap towen?”

⁸⁻¹⁰ Kululwan Townen Bwanabwein son Pita nisesus, mapun iwon, ilana, “O matuw^{avek}, o tamumwey yakamiy; magat nagein bukwatiganemas liv^{anen} takagayal towen amawan anvavag neibwein, kadiloka bukuwkins, babawa yakamiy, o min-Yisleil babaws, bo ibwein waseg gum-Nasalet, Yeisuw Kelis; yakamiy nukuweiy s waklos, ikanig, tage Yowbad ivag mo itamanaw vayuwein. E, natawtoun mtownen Yeisuw waseg, takagayal itamanaw wamatads bo ibwein.

¹¹ “Liv^{anen} mtownen waBukitab nises mamagina:
‘Wululay towen tawteleins bunatum nipiavies,
tage bo imlavag anmwamwan bunatum.’

¹² “Mtownen anmw^{anet} Yeisuw bikatinabweids; nag kwayuwein kadilok; nag kwayuwein yagan nises libalab waskawan; misinak yagan towen Yeisuw waseg bitabanes damwamovs, yakids gimgilis ven watinow.”

¹³ Ikines Pita son Yon bo iwons, asilivan tawtoun, o ikakinsa tasiyas nag iskuls avakaein, mamagin ven gimgilis tasiyas, bo isom ninous; mo inuwes tasiyas asteiy sisiy Yeisuw kweiboug nisesus.

¹⁴ O peinan takagayal towen mwana ibwein, sisiy itamanaws, ta-mawan bikatimop asilivan.

¹⁵⁻¹⁶ Mapuna ikayabes bineis bikayamats watoulan bunatum; tasiyas takaleiwags mo illivans sisiyas, ilansa, “Amawan bitavkakes gamag tasiyas? Peinan siwotet tawtoun singay, o min-Yelusalem babaw ikakins. Admwasins. Ta-mawan!

¹⁷ “Adok bo bitakanes, vagan nag bivgavaws liv^{anen} Yeisuw. Nagein gog gamag mwasanin bo iliganes asilivan. Bo deis. Kukin bikatpeles livan towen gamag wasigeis, adok bitakatimapus asisinap vagan bikakin mites. Idakaleiwags mawan!”

¹⁸ Ilivans mawan, ikous, mo idawes Pita son Yon bimeis. Imeis; tawtoun asilivan waseg mo idibakes, ilansa, “Awoum kullivans Yeisuw yagan waseg; awoum kugeiguy o kulivans; singay bwaboum.”

¹⁹⁻²⁰ Pita son Yon ikatimapus asilivan, ilansa, “Tab kadilok wamatan Yowbad bakaligen amilivan yakamiy? O Yowbad anilivan tonen? Kukwaleiwags yakamiy. O youd siyas nakakin o nakaligen, ta-mawan bakayakous amalivan sinap towen waseg.”

²¹⁻²² Vayuwein ikanes avakaein, mo ikayabes bineis kid wasibunatum. Ta-ibanes asisinap kalbaleb aveiyag bikatimapus, nag. Bo iwenes gamag babaw, peinan gamag babaw nikines wotet towen, mapuna iyakawns Yowbad waseg. Peinan taw towen mwana ibwein bo itovek, anbweilim bo iyakous sinawavas; o wotet towen tawtoun, mamagina mulin naman Yowbad.

Tayakeliysi initougs Yowbad waseg

²³ Iyokous, mo iyums inekes tawlisiyas, mo ikamteles livan, tasiyas tanuwgwas lun o tamumwey asilivan.

²⁴ Iliganes ikous, mo ikanavin ninous silmanin nitoug Yowbad waseg, ilansa, “Matovek yakoum, peinan nukuvag libalab, o pweepway, o yol, o youda babaw wapwepway o wayol.

²⁵⁻²⁶ “Gamag siyas sivines bisilbwades muwotet, mawan nilivan mutouwat towen, yakamey tibum Deibid. Peinan kweiboug Kululuwam waseg, mo ikakin sinap towen, ilana,

‘Aveiyag wawun iwons ven babaw gimgilis,
o min-Yisleil ininuways sinap mav?’

King babaw wadaban pwepway itamanaws,
sisiyas guyawaw ikatuyouns imeis,
bikapwanaws kid wasigeis Yowbad son naKelis.'

²⁷⁻²⁸ "Mounid, ven town waseg, bo ipiyaves mutouwat town bwanabwein; ikaw-pwanaws waseg town Yeisuw, mtown nukusek inawotet, nukwayus peinan town Mesay. O peinan mukwaleiwag nukulivnakes mawan, mogo iyagages Yeisuw, tasiyas Elod, o Ponitiy Paylat, o min-Yisleil, sisiyas ven mwasanin gimgilis, bo iyagages Yeisuw.

²⁹ "O Guyaw, tut town bo kukwakin asilivan kalbaleb, sivines kid biyagagemas yakamey; kulabem mutouwat yakamey vagan bakawon beibwein, mo bakalivan amlivan.

³⁰ "O Guyaw kuyasel namam vagan bukulabem, takatouns kuvages beibweins, namam mulin kuvvag, wotet tawtoun waseg, wayagan mutouwat bwanabwein town Yeisuw."

³¹ Initougs ikous, sibunatum mo igogewn, mamagina bo beinik; Yowbad Kululuwan inekes tasiyasa babaw, mapun iwonsa singay, illivans Yowbad anilivan.

Nag ikayuses sivavag

³² Peinan Kululuwan Yowbad nises wasigeis tasiyas, ninous katanok-wan, o sivavag katanok-wan. Nag teitan gamag bikayus navavag; peinan youd tasiyas gamaga babaw sivavag katanok-wan.

³³⁻³⁵ O sitawtoun waseg, takaweins anilivan mo igeiguis livanen Yeisuw, ilansa, "Maguyaw town nikanig, bo ikit vayuwein." Babaw tasiyas singay isiwayoubs. Nag teitan kal tasimav nises, nag; peinan ven tanuwgwes iyamiyises sipwepway o sibunatum; mayses mo ikawes imeyes, isekes Yeisuw nagamag; tasiyas mo ivagens gamag wasigeis, bo isekes mawana gamag babaw sivines.

³⁶⁻³⁷ Teitan taw Yosep, kweivaw yagan Banabas, Yeisuw inagamags nidokes. Wawun yagan town, "Talabein gamags." Gum-Saypilos mtown, anakum Livay, napwepway wanven bo iyamiyis; maysan ikow imey, isen wamtes Yeisuw nagamag, tasiyas takaweins anilivan, sinawatan teiy; bo isekes tasiyas maysan napwepway.

5

Ananiyas son Sapayil

¹⁻² Teitan taw son nakwaw iyamiyises sipwepway, maysan money mwasanin ikawes isenas wamtes tasiyas takaweins livanen Yeisuw, ilansa, "Maysan tamkwalan town-an." Iyaweweids gog; taw town Ananiyas iyaweid, namoney mwasanin ikayus, o nakwaw Sapayil ikakina iyyaweid.

³ Iw to Pita, ilana, "Ananiyas, aveiyag wawun Seitan isiw wananoum yak, vagan kid Yowbad Kululuwan bukwatidev? Peinan kwayus mumoney mwasanin, maysan pwepway.

⁴ "Kweiboug pwepway town tanuwagan yak; wankuyeim nukuyamiyis, maysan money nukukow tanuwagan yak. Aveiyag wawun amsinap nukuvag mawan? Nag kuyawadem yakamey; tage bo kuyaweid Yowbad waseg."

⁵ Ananiyas iligen, ikalouw wapwepway, bo imat. Gamag tasiyas iliganes, mo ivag aspwayat avakaein.

⁶ Tabwabwat mo itamanaws itabwes won town takanig, ikawes inawes, itakus.

⁷⁻⁸ Taw town nakwaw nag ikakin neimat. Veit kweitoun ikous mo isap, Pita ikatugwan waseg, ilana, "Tabta mipwepway maysan mawan town?" Ilana, "E, mawan."

⁹ Pita ilivan, "Aveiyag wawun ninoumiy amiteiy bo bukuyakwanes kid Yowbad Kululuwan? Kukin! Tadibwanins mumwan bo nimeis, wakoukwed nisesus, bo bikaweims binaweims yakoum!"

¹⁰ Nuwanaw mo ikalouw wamatian Pita, imat. Tabwabwats mo isaps ikines nikanig manawen, ikawes, inawes, idibwanis namwan wadadan.

¹¹ Tayakelesiys babaw ivag aspwayat, o taliganeins livan town mo ivag aspwayat meivek-wan.

¹² Takaweins livānen Yeisuw siwotet singay tawtoun, gamag wasigeis; gamag nikines mo ikakins Yowbad nawotet tatonen. Yam babaw asisinap ikatuyouns imimeis Solomon wankwānow.

¹³ Gamag siyas watoulan nag imekes, peinan aspwayat; tage babaw gamag bo iyākawns wasigeis.

¹⁴⁻¹⁵ Gamag mwasanin mo isimounids Guyaw Yeisuw waseg, vinay, tawaw; bo ikatimweisis gamag singaya babaw. Takatouns imeyes, isenas ked wadadan, ampalawen Pita meinoy; e, isenas wakabes o wasag, sivines kululuwan Pita bilumwes kid tasiyas takatouns, mo beibweins.

¹⁶ Ven babaw gimgilis Yelusalem walasin katuyouns imimeis, takatouns imeyes sisiyas tasiyas bwagaw nibugawus; ivages mo ibweins.

Mwasanin ikamliwes Yeisuw nagamag

¹⁷⁻¹⁸ Butun wotet towen mo iliganes tanuwgwes lun sitovek avakaein, siney inabod tasiyas Sadusiy, singay igeg ninous, ikamliwes tasiyas takaweins livānen Yeisuw, mapuna iyousis, inawes wādeil.

¹⁹⁻²⁰ Boug waseg Yowbad natakayob im ikaliyow awkwedan deil, itokes, inawes wamnat, ilana, “Kuneis, kutamanaws Yowbad wanbunatum, kudibakes gamag livānen mimwamov towen Yeisuw nisekeimiy.”

²¹ Iliganes anelos towen anilivan; walalayis mo ineis Yowbad nabunatum, livan mo ikatimlakes gamag. Tanuwgwes lun sitovek avakaein siney angamag mo idawes min-Yisleil astakaleiwags o tammwayas bimeis, mo idibakes inagamags mwasanin, ilansa, “Kuneis, tasiwuns deil tasiyas kutokes, kumeyes.”

²²⁻²³ Ineis, bitokes kid wādeil, iwekes makawan. Iyums, imeis ilansa, “Nakan nakakin deil buntuman bo ikatabagus keikay-wan, o takaymateins deil nitatos wakoukwed; nakāsiw wanuwan, ta-kweitan gamag nises, makawan.”

²⁴ Tulal avakaein sen tanuwgwes lun situwāvek iliganes asilivan, bo isunasun ninous; ikubukub nuwes, peinan na-bikakins aveiyag mo bikamat.

²⁵ Teitan gamag mo isap, ilana, “Gamag siyas nukusenas wādeil bo itamanaws Yowbad wanbunatum, illivans ikatimlakays gamag.”

²⁶ Tulal sen nagamag mo ineis, itokes gamag tasiyas imeyes. Bo ivnāses. Nag ikānes, peinan iwenes gamag babaw. Mata bigeg ninous, peinan idokes kid beiweiys dakul waseg.

²⁷⁻²⁸ Imeyes gamag tasiyas, mo itomos wanuwein tasiyas takaleiwags. Tanuwgwes lun sitovek avakaein mo ikatigānes, ilana, “Livan kamnat waseg nakadibakeimiy, kalana, ‘Awoum kugeiguyas yagan towen waseg;’

tage min-Yelusalem babaw bo iliganes butun towen; o adok sivinamiy gamag kid bilansa, ‘Peinan tanuwgwes lun sikaleiwag bo iweiys Yeisuw.’

Awoum gamag bilivans māwan.”

²⁹ Pita siney takaweins livānen Yeisuw mo ilivans, “Magat mikaleiwag kweitan, o Yowbad nakaleiwag kweitan, kadiloka bakaligen Yowbad nakaleiwag.

³⁰⁻³¹ “DaYowbads towen tamumwey siYowbad bo isek Yeisuw vayuwein namwamov, peinan yakamiy nukwatimates, nukwatiptukwes wakamweilok; tage Yowbad bo isek naguyaw, mamagina takatinabwein gamags, aban nisek wanakātat Yowbad; o nawotet silmanin min-Yisleil yakids, bikanavin nanouds, mo biwid adsinaps kalbaleb, bilev.

³² “O yakamey kakakin livan towen mounid, mapuna kallivan māwan; o Yowbad Kululuwan Bwanabwein bo isekem taliganein anilivan yakamey, o Kululuwan Towen ikatimlakeids sinap towen mounid.”

³³⁻³⁴ Tasiyas iliganes, bo ikapasal nuwes, sivines bikatimates; tage takaleiwag teitan yagan Gamaliyel itamanaw vāgan biliwon. Mtowen Palisiy, takatimlakein Yowbad nakaleiwag; mapuna babaw gamag ivnāses tamwey towen. Ilana, “Kadilok tasiyas takaweins livānen Yeisuw bineis watoulan, tut kadiyakus bisesus, baliwon, beikous mo beisiws bimeis.”

³⁵ E, tasiyas ineis watoulan, Gamaliel mo iliwon, ilana, “Sigwey min-Yisleil yakamiy, kadiloka kuvnəseimiy, aveiyag bukunuwakes gamag tasiyas.

³⁶ “Kunuwes kweiboug teitan gamag yagan Tudas itamanaw, idok guyaw avakaein tonen; gamag babaw mo inekes, mamagin lakatuvas tawaw; wankuyeim mwasanin iweiys taw towen, o taliganeins anilivan bo igayays; butun taw towen bo ikous.

³⁷ “Wankuyeim gum-Galiliy teitan yagan Yudas, anatut yagads gabman nileles wəbuk, mo itamanaw, ikatidavis gamag mwasanin, ikatkunis; wankuyeim mo ikanig taw towen, o taliganeins anilivan bo igayays, bo ikous.

³⁸⁻⁴⁰ “O tut towen adibakeimiy, bweina bisesus gamag tasiyas. Awoum kuyagages. Magat gamag sikaleiwag towen, o gamag siwotet, kakita biyakous; tage kukin Yowbad nawotet towen, ta-mawan bukusilbwades; mata ge bukuvatays waseg Yowbad.” Tasiyas iliganes aygan towen; idawes Yeisuw nagamag, imeis, iwaways, mo idibakes, ilansa, “Awoum kwatimlakays yagan Yeisuw waseg;” mo ikayabes, ineis.

⁴¹ Ilisawes takaleiwags tasiyas, nag ivag asimwasin, imwəsaws-wan, ilansa, “Adok Yowbad sivinan yakids, inakaleiwag vagan abads bigeg, Yeisuw yagan peinan.”

⁴² Yam katanok katanok mo ikatimlakes gamag, Yowbad wanbunatum, o bunatum babaw wasigeis; isekes livan towen bwanabwein, livanen Mesay, mtowen yagan Yeisuw.

6

Tamtakavateins kan siwotet

¹ Misumkwey towen sivamul ikatimweisis singay babaw, musinis takagaGilis, musinis takagibliws; e, tasiyas takagaGilis ivtokes livan siyas takagibliws, ilansa, “Yam katanok katanok ivganies kaeis isekes nakubukwabs wasigeis, o yakamey nakubukwab siyas nag ivag mananen kaeis.”

² Yeisuw nagamag tasiyas sinawatan teiy mo idawes sivamul babaw bimeis, mo ilansa, “Mawotet bakalivan Yowbad anilivan; nag kadilok bakasem wotet towen vagan bakavgen kan.

³ “Kadiloka kukines tawaw toubweins mwasanin yakamiy; gamag tasiyas asisinap tawtoun; o Yowbad Kululuwan wasigeis tasiyas; kadilok kusenas teinim teiy vagan bakasekes siwotet towen.

⁴ “Yakamey bakaysiyous imawotet silmanin Yowbad, bakanitoug waseg, o anilivan bakasekes gamags.”

⁵ Gamag babaw items, ilansa, “Bwein”, mo isenas tawaw teinim teiy; teitan Sitiben, Kululuwan Yowbad nises waseg towen, o bwein isimounid Yowbad waseg; teitan Pilip, teitan Pilokol, teitan Nikanol, teitan Timon, teitan Pamemas, teitan Nikolaw, mtowen gum-Antiyok bo imlavag gum-Yudiy, peinan ikow tapwaloul-nen Yudiy.

⁶ Tasiyas bo itamanaws wamtes takaweins livanen Yeisuw; initougs Yowbad waseg, ikous, mo isenas nimes wawous tasiyas, silmanin bikawes siwotet vagan bimtakavatays kan.

⁷ Singay babaw gamag mo iliganes livanen Yowbad, navamul bo ikatimweisis singay babaw, waseg ven towen Yelusalem. Tanuwgwas lun mwasanin bo iliganes livan towen, mo isimounids waseg Yeisuw.

Bo iyousis Sitiben

⁸ Yowbad nasiwayoub avakaein isek Sitiben, iwotet tawtoun, mamagin Yowbad naman mulin ivag; o gamag babaw ikines.

⁹⁻¹⁰ Gamag mwasanin mo itamanaws ikamnimans waseg Sitiben; mwasanin min-Yudiy sitapwaloul yagan Libetin, sisiyas min-Saylin mwasanin, o min-Aleksanidel, o min-Silisiy, o min-Esiy, tasiyas mo ikamnimans waseg Sitiben; tage nag kadilok bitakayways, peinan kululuwan o ansinap singaya tawtoun.

¹¹ Mapun isilkodes; idibakes mwasanin, ilansa, “Igaw yatal waseg kuyaweidsa, kulansa, ‘Nakaligen anilivan kalbaleb taw towen, ilivan mav, Moses livanen, o Yowbad livanen.’”

¹² E, mo ivtokes livan Sitiben wasigeis gamag babaw; o tamumwey, o takatimlakeins kaleiwag niliganes; gamag babaw mo itamanaws, iyousis Sitiben, inawes vagan biyateles wamtes astakaleiwags min-Yudiy tatineis.

¹³⁻¹⁴ Mo idawes tasiyas tayyaweds bimeis. Imeis, ilansa, “Gamag towen, tut babaw ivtokay livan silmanin Yowbad nabunatum towen, o silmanin Moses nakaleiwag, o nakaligen anilivan, ilana, ‘Gum-Nasalet towen Yeisuw bo bigulek bunatum towen; o sinap kweiboug Moses nisekeids, Yeisuw bo bikatlow.’ Anilivan mawan.”

¹⁵ Takaleiwags isinis, iggintoves magin taw towen Sitiben, ankakin kweitan, magin mawan gum-libalab anelos.

7

Anilivan Sitiben

¹ Tanuwgves lun sitovek avakaein mo ikatigan Sitiben, ilana, “Tabta asilivan mounid? Amawan amlivan yak?”

² Sitiben ikatimop livan towen, ilana: “Talawog yakamiy o tamumwey yakamiy, kuliganes agulivan. Guyaw avakaein Yowbad bo inek datoveks Ebelam, pwamug-o waMesopotemiy, wankuyeim mo ikoulup in Elan.

³ “E, igaw Ebelam nises Mesopotemiy, Yowbad inek, idibek, ilana, ‘Kadiloka muven o talawom kulisow, kun ven kweitan bakatimlakeim.’

⁴ “Mapuna ilisow Kaldiy, ikoulup, in Elan. Taman son nisesus; e taman ikanig ven towen Elan. Wankuyeim mo im isik pwepway towen Kenan, tut towen idavanuys.

⁵ “O Yowbad ta-isek nakiyay towen; igaw. Ta-isek napwepway wawtanok, nag; Yowbad idibek Ebelam, ilana, ‘Igaw basekeimiy simwey tibum mipwepway;’ tage nag ivag natun, nag.

⁶⁻⁷ “Yowbad mo idibek Ebelam, ilana, ‘Tibum bisikes kweitan ven, wunovek, o misikena gimgilis bisekes siwotet avakaein biwotets, o bweylim lakatuvas abes bigeg. Igaw mo bamop sikalbaleb misikena gimgilis tasiyas, igaw tibum mo bisaps bimeis biwotets gunawotet ven towen wanawan.’

⁸ “O peinan Ebelam itam kaleiwag towen waseg, Yowbad mo isek nakabivatus; Ebelam ibwabwes tawaw momwes. Wankuyeim nakwav mo ikop natun Aysak, ikayamat yam kweinim kweitoun, mo ibob momwan; wankuyeim Aysak natun Yekob mawan, o Yekob nitun tawaw sinawatan teiy, tasiyas datuwaveks pwamug-o.

⁹⁻¹⁰ “Datuwaveks tasiyas ikamliwes budas Yosep, isekes gamag mwasanin, ikawes Yosep, inawes Yidipt; tage Yowbad son nisesus, ikatinob Yosep youd babaw kalbaleb nilouvat ven Yidipt waseg; e, isek ansinap avakaein wamatan min-Yidipt siking towen Pelow, mapun ikalin nuwan Yosep waseg, isek nawotet tamtakavatein nabunatum, o tamtakavatein ven towen Yidipt, meivek-wan.

¹¹ “Wankuyeim nag ivag kweis Yidipt waseg, o Kenan waseg; tut singay kalbaleb ilivatus. Kan bo iyakousis datuwaveks wasigeis.

¹² “Wankuyeim Yekob iligen kan nises Yidipt, mo ikayabes nitun; e, tibdayas yakids tasiyas; ikayabes ineis Yidipt, kan silmanin.

¹³ “Sivyuein ikayabes, ineis Yidipt, Yosep mo ikamat wasigeis tuwan. Ikamtel waseg Pelow, ilana, ‘Talawog min-Kenan tasiyas.’

¹⁴ “Yosep mo idawes taman Yekob sen taliven bimeis Yidipt; gamag siyas babiweis sinawanim sinawey teinim.

¹⁵ “Yekob inoun in Yidipt, ven towen waseg nikaniq; e, tibdayas tasiyas nikankanigs.

¹⁶ “Wous ititabwes guyawaw siyas, mo ikokews, innawes, isenas watakurumwan ven Sekam waseg; kweiboug Ebelam igimwel takurumwan towen, maysan silib nisek Emol nitun, ven Sekam waseg.

¹⁷ “Kweiboug Yowbad nilivnek Ebelam waseg, ilana, ‘Bakatinabwes tibum ven towen waseg.’ Kadilakusa bo bilouvats tutan bikatinabwes, min-Yisleil mo ibabawsa singay. Ven towen Yidipt bo ikalawt min-Yisleil.

18-19 “Misumkwey towen mo isap King kweivaw; mtowen nag ikakin Yosep, isilkodes tamumwey, ikaleiwag vagan bilavewas nitsiyas apwaw; sivinan gamag tasiyas bimt̄amats beikous.

20 “Tut towen waseg n̄atan vin mo ikop natun apwaw tamnabwein yagan Moses, isowum tibukon kweitoun, namwan wanbunatum.

21 “Wankuyeim mo isemos wammat; Pelow natun kud̄avin mo ikow, ituy gwad towen, mo imlavag natun tatonen.

22 “Towen Moses ivakaein, iskul, itakayes min-Yidipt asisinap babaw ikous, bo itawtoun anilivan waseg, o nawotet-vak tawtoun.

23 “Anbweilim sinawavas waseg, mo inuway taliven, in kid bilakwanes taliven tasiyas min-Yisleil, idoki bo bilabes.

24 “In ikin gum-Yidipt iyageg gum-Yisleil teitan, imop nakalbaleb, iwei y gum-Yidipt, imat.

25 “Idoki taliven bikakins Yowbad nisek nawotet vagan bikatinabwes tasiyas; tage nag ikakins.

26 “Yamtan yam mo ikines min-Yisleil asteiy ikawpwanaws, idoki bivag beimwas kid, ilana, ‘Tawaw, yakamiy bod katanok-wan, min-Yisleil yakamiy. Aveiyag wawun kuygeg soum?’

27-28 “Towen niyageg son, mo iyabin Moses, ilana, ‘Kal nisekeim muguyaw o mukwalei-wag wasigeis yakamey? Adok bukuweig m̄awana towen nov gum-Yidipt nukuweiy, ne?’

29 “Ilingen anilivan towen, ivag anpwayat Moses, mo isawl, ikoulup, in isik ven yagan Midyan, ivays son nakwav, ikopwes nitun tawaw asteiy.

30 “Isesun ee... bweilim sinawavas ikous, ininoun wanawoud, koy Sinay waseg. Ta-ivag ven, makawan. E, Moses mo ikin gum-libalab son inakov nigidaged amweilok yageivein waseg.

31-32 “Moses ikin, isunasun nanon, isineikim vagan kid bikinbunik, mo iligen aygan Yowbad, ilana, ‘Yey tamumwey siYowbad yey; yey Ebelam naYowbad yey; yey Aysak naYowbad yey; yey Yekob naYowbad yey.’ Moses iligen mo itat won, anpwayat bikin Guyaw Townen.

33-34 “Yowbad idibek ilana, ‘Kwablev musandol, kusew, peinan ven towen waseg nases. Awoum sona musandol bukumey. Bo akin min-Yidipt iyagages gungamag, bo aligen ildeilids, bo abus vagan kid bakatinabwes; e, tut towen kum bakayabeim kid bukun Yidipt, wotet towen silmanin.’

35 “Mtowen Moses, min-Yisleil kweiboug nipiavies, nilansa, ‘Kal nisekeim muguyaw o mukwaleiwag towen?’ O Yowbad gog, gum-libalab waseg, bo isek nakaleiwag o nawotet vagan kid bikatinabwes Yowbad nagamag. Gum-libalab towen Moses nikin amweilok waseg.

36 “Moses mo imgwayes gamag tasiyas, peinan nawotet tawtoun, Yidipt waseg, o Yol Bwabwel waseg, o sinawavas bweilim wanawoud waseg, nawotet tawtoun, mamagina Yowbad naman mulin.

37 “Mtowen Moses nidibakes min-Yisleil, ilana, ‘Igaw teitan wasigeis yakamiy, Yowbad mo bisek nawotet mo bimlavag palopit, mtowen m̄awana yey.’

38 “Towen Moses siney min-Yisleil babaw ininounas wanawoud, o gum-libalab nilivan son Moses koy Sinay waseg, ikatipel ansinap mo iseke tibdayas, tammwayas tasiyas, o mwamov livānen bo isekeids.

39-40 “Tage tammwayas tasiyas nag sivines biliganes Moses anilivan; ipiyaves, waninoune kid sivines beiyums bineis Yidipt. Mapuna idibakes Elon, ilansa, ‘Kubun dayowbads vagan bimgwayeids, peinan mtowen Moses nitokeids nitalisawes Yidipt, nag kakakin amawan nein.’

41 “E, tut towen bo ibunis youd magin m̄awan bulumakaw natun, o iluns o itapwālouls waseg kokotom towen, o imwāsaws waseg youd towen nibunis wanimes.

42-43 “Yowbad mo ilisawes tasiyas, vagan tasiyas bikululs kid wamatān wutun babaw, m̄awana palopit anilivan wanuwan Bukitab mamagina:

'Adok bweilim lakatuvas wanawoud nukuweiys lun bulukwan, min-Yisleil yakamiy, vagan bukuluns waseg ye?'

Tage nukuyousis yowbad kweitan, yagan Molok, nukuwlules nabunatum, nukukokews; o nukukululs wamatan Lepan nawutun, o nukutapwälouls mikalelel waseg.

Mapuna bakaweimiy banaweimiy palata-dadan ven Babilon.'

⁴⁴ "Tammwey tasiyas ikokews Yowbad nabunatum wanawoud, peinan Yowbad nikatimlek Moses ankakin bunatum towen, ilana, 'Kuwlul gunbunatum ankakin mawan.'

⁴⁵ "Wankuyeim Yosuw imgwayes tibdayas, tamumwey tasiyas; sona bunatum towen nikokews, mo iyousis min-Kenan sipwepway, peinan Yowbad ikawmanayes gamag tasiyas, mo isawls wamtes tibdayas. Bunatum bunawen ises ee... mo isilamaw nakaleiwag Deibid.

⁴⁶ "Yowbad isiwayoub waseg mtownen Deibid, o Deibid sivinan biwlul Yowbad nabunatum silmanin sitapwäloul Yekob tibun tasiyas.

⁴⁷ "Togo Deibid nag iwlul nabunatum; natun gog Solomon iwlul Yowbad nabunatum towen.

⁴⁸ "Tage libalab naYowbad towen nag imasis wanuwan bunatum ven watinow waseg, nag. Palopit teitan Yowbad anilivan nilel mamagina:

⁴⁹⁻⁵⁰ 'Yey abag libalab o kakeig nakabyawot wapwepway.

Amata-bunatum bukuwlules yey gunbunatum?

O amata-bunatum bukuwlules vagan bayeiwas wanuwan?

Adok nag kadilokeimiy, peinan wanamag bo abun youd tasiyas.'

⁵¹ Sitiben mo ilivan, ilana, "Singaya takakon yakamiy, Yowbad ta-ivag nakabivatus waninoumiy o watigamiy, nag; tut babaw kuyblebes Yowbad Kululuwan; mawana tamumwey, mawana yakamiy.

⁵² "Ta-kweitan palopit tammwayas ikatibomes, nag; babawa iyagages. O ikimates palopit tasiyas, o palopit asilivan mawana, 'Igaw beim Tadidumwal, mtownen Kelis.' E, Tadidumwal towen nukusilkodes-vak, nukuweiys.

⁵³ "Min-libalab nisekeimiy Yowbad nakaleiwag; tage nukupiyaves nakaleiwag towen; mawana tamumwey, mawana yakamiy."

Iweiys Sitiben

⁵⁴ Iliganes anilivan towen, singay ikapasal nuwes, ikakilis kumtus, singay ikamliwes.

⁵⁵ Tage Yowbad Kululuwan Bwanabwein son Sitiben nisesus, Sitiben ikin walbalab, ikin mititeilin Yowbad, ikin Yeisuw nitamanaw Yowbad wanakatay.

⁵⁶ Sitiben mo ilana, "Towen-o bo akin ikaliyow libalab, o Gimgilitoun towen Yeisuw itamanaw Yowbad wanakatay."

⁵⁷ Tasiyas gog bo iwaks avakaein, nag sivines biliganes livan towen, bo ikibwades tiges; ituts bineis biyousis kid Sitiben.

⁵⁸ Iyousis Sitiben, mo itokes inawes watoulan ven, mo iweiys, dakul waseg. O tasiyas niyyaweids yatal towen waseg inisis asikweim isenas wadadan toubwat teitan yagan Soul, vagan kid bimtakavet asikweim, mo ikawes dakul, iweiys Sitiben.

⁵⁹ Igawa iwaways, Sitiben mo iwak, idow naGuyaw yagan, ilana, "Guyaw Yeisuw, kululuwag kukow."

⁶⁰ Mo ibesen kitatun, iwak avakaein, ilana, "O Guyaw awoum kumop asisinap towen kalbaleb;" mo ikanig. Toubwat towen Soul ikikin, idok wotet towen bwein.

Soul iyagages tayakelesiys

¹ Misumkwey towen gamag mwasanin bo isilamaws kid biyagages tayakelesiys Yelusalem waseg; e, bo iyagagesa singay. Mapuna bo igayays ineis Yudiy o Samaliy, o vena babaw wasigeis. Misinaka takaweins livanen Yeisuw nisesus Yelusalem, tasiyas sinawatan teiy.

² Mwasanin gamag bwanabweins bo idibwanis takanig towen Sitiben, ivalams avakaein silmanin.

³ Tage Soul bo iyagages tayakelesiys, inineves tayakelesiys bunatum katanok katanok wasigeis, iyousis tawaw o vinay, itokes, inawes wadeil.

Livanen Yeisuw ikawes isekes min-Samaliy

⁴ O tayakelesiys tasiyas nigayays bo inawes livanen Yeisuw vena babaw wasigeis.

⁵ Pilip in min-Samaliy wasiven kweitan wunovek waseg, isekes livanen Mesay Kelis.

⁶ O min-Samaliy inganegs anilivan, ikines nawotet tawtoun, ninous katanok-wan vagan biliganes anilivan.

⁷ Pilip nawotet tawtoun; o tasiyas takayyeiliws ivag, mo iwaks avakaein, yeiluw mo ilisawes gamag tasiyas; o taguyagweys o takagayals ivag, mo ibweins.

⁸ Mapuna misikena gimgilis bo imwəsaws avakaein.

⁹⁻¹¹ Tamgameg yagan Saymon nises ven towen; min-Samaliy nikines nawotet, bo isom ninous. Mtowen Saymon bo ilivan, ilana, “Yey tatawtoun yey.” Bo iliganes anilivan, tasiyas guyawaw, o sisiyas toul, gamaga babaw, mo ilansa, “Adok natawtouna tonen, mamagina Yowbad natawtoun.” E, nagwədiven inganegs tamgameg towen, nameg nikines bo isom ninous.

¹² Tage gamag babaw mo isimounids Pilip anilivan waseg, Yowbad nakaleiwag livanen son Yeisuw yagan livanen, ibaptyses tawaw o vinay.

¹³ Townen Saymon mo isimounid, ibaptays; ibaptays ikous, isesus son Pilip, ikikin nawotet tawtoun o naman mulin, bo isom nanon.

¹⁴ Takaweins livanen Yeisuw igaw nisesus Yelusalem, iliganes min-Samaliy bo items Yowbad anilivan waseg, mapuna ikayabes Pita son Yon bikines.

¹⁵⁻¹⁶ Pita son Yon isaps, mo initougs silmanin Yowbad Kululuwan Townen Bwanabwein binekes kid gamag tasiyas; peinan kweiboug nag inekes, deisa nibaptyses yagan Guyaw Yeisuw waseg.

¹⁷ Initougs ikous, mo isenas nimes wawous gamag tasiyas, Yowbad Kululuwan mo inekes.

¹⁸⁻¹⁹ Townen Saymon ikin takaweins livanen Yeisuw siwotet mawan, nisenas nimes gamag wawous, Kululuwan Yowbad mo inekes; towen Saymon mo isekes money, ilana, “Money towen kukow, maysan sinap towen. Sivinag sinap towen, namag kid basen gamag wawous vagan Kululuwan Yowbad binekes.”

²⁰⁻²³ Pita mo ikawtun taw towen, ilana, “Soum-wan mumoney kov waseg bigabum wadiginasim, peinan kudok kid bukugimwel Yowbad nasiwayoub. Yəkoum tobwag gamag. Nag kweitan muwotet nises wasigeis yakamey. Yak nanoum bo ikaydodog wamatian Yowbad. Kadiloka kulavew amsinap towen kalbaleb; kunitoug Yowbad waseg. Adok mo biwid amsinap, peinan akakin-wan amkameiliw son amsinap kalbaleb bo ikalawt nanoum waseg.”

²⁴ Saymon ikatimop anilivan, ilana, “Kunitougs Yowbad waseg vagan kid kalbaleb towen nag bimekeig yey.”

²⁵ Pita son Yon asilivan kamnat waseg mo idibakes gamags livanen siGuyaw Yeisuw, mo iyums ineis Yelusalem; o igawa waked inounas, livan towen bwanabwein mo isekes min-Samiliy, vena babaw wasigeis.

Pilip inek gum-Idiyopi teitan

²⁶ Yowbad ikayeb gum-libaleb teitan inek Pilip, ilana, “Kutamanaw kunoun kun wayals, kunoy ked makadewen meinoy neim Yelusalem nein Ges.” Ked towen waseg ta-ivag ven; makawan.

²⁷⁻²⁸ Itamanaw, inoun, mo inek gum-Idiyopi teitan, mtowen yunak, towen tamtakaveitein Kandas namoney, manawen vin min-Idiyopi sikwin. E, yunak towen nitapwəloul Yelusalem waseg mo iyum in waniven. Hos ibiteilis inawag, isin wanuwan ivnivin Bukitab, palopit Isaya anilivan.

²⁹ Yowbad Kululuwan mo idibek Pilip, ilana, “Kun, kuneck taw towen wanawag nises.”

³⁰ Pilip isawl, inek, iligen ivnivin anilivan palopit towen Isaya. Pilip ikatigan ilana, “Tabta kukwakin silawun livan towen?”

³¹ Iwage towen ilana, “Ta-mawan bavkek bakakin. Magat teitan gamag bikatimlakeig, bo bwein.” Mo ilana, “Kumwen kum, kusin wawag;” mo imwen, isin wadadan taw towen.

³²⁻³³ Bukitab wanuwan bo ivin lelel-nen mamagin, “Mawana lamiy gamag beiweiys, ta-ivag aygan; o mawan bibwabwes wunuwunun sip, nag beiwey, bo bikkapay-wan. O gamag towen mawan, nag bilivan. Asilivan tasiyas yaweid, inayatal waseg. Anmwasin; ta-mawan.

Igaw ta-kal bilivan livanen angamag taw towen, peinan bo ikanig.”

³⁴ Yunak mo ikatugwan Pilip waseg, ilana, “Livanen kavel? Palopit towen livanen? O teitan gamag livanen?”

³⁵ Pilip isilamaw livan towen Bukitab wanuwan, mo ikatimlek livanen Yeisuw, livan towen bwanabwein.

³⁶ Igawa ininounas waked, yunak inganeg livan towen, wankuyeim isaps wayvagam; mo yunak ilivan, ilana, “Kukin yevagam towen. Tab kadilok bukubaptayseig yey.” ³⁷ (-)

³⁸ E, idibakes nagamag bisewas wag wadadan ked, mo ibus tasiyas asteiy, Pilip son yunak, ineis wayvagam, ibaptays son.

³⁹ Ibaptays ikous, igalags, Yowbad Kululuwan mo ikow Pilip, inow. Yunak na-ikin Pilip; anmwāneta ises. Mo inoun in waked, singay imwāsaw.

⁴⁰ Wankuyeim mwasanin ibanes Pilip nises Asot. Inoun in itavin vena babaw, illivan livanen Yeisuw gamaga babaw wasigeis, wankuyeim in isap Sisaliy.

9

Soul ikanavin nanon (Wotet 22:6-16; 26:12-18)

¹⁻² Mtowen Soul singay ikawkunes Yeisuw nagamags, sivinan kid bikatimates. Mapuna inek tanuwgves lun sitovek avakaein, ilana, “Tab kadilok kulel let, vagan bakow banow basekes tanuwgves bunsiyas sinagog ven Damasik waseg; igaw tanuwgves tapwāloul tasiyas bivinis, mo beitams waseg gunawotet vagan banineiv kid kalisiy inoyes Yeisuw inaked, ked towen kalbaleb. Magat vinay o tawaws, mo bayousis gamag tasiyas, bayawen nimes, mo batokes, bameyes Yelusalem.”

³ Mtowen itam, isek nalet, ikow; siney nagamag mo ineis ee... kadilakusana Damasik, mititeilin avakaein imek Soul, ikaligwen matan. Mititeilin towen mawan kavikawn meinoy neim walbalab.

⁴ Ikalouw wapwepway, iligen aygan teitan, ilana, “Soul, Soul, aveiyag wawun kuyibile-beig yey?”

⁵⁻⁶ Iwage Soul, ilana, “O guyaw, kavel yak?”

Ilana, “Yey Yeisuw, nukuyibilebeig. Tage kutamanaw, kun ven towen wamatam, teitan gamag mo bilivnek muwotet vagan bukukwakin.”

⁷ Gamag tasiyas sisiy Soul ineis waked, itamanaws, bo isom ninous, peinan iliganes aygan; tage ta-kweitan gamag ikines.

⁸ Soul itamanaw, bo ikiplal matan, tage nag ikin, magina bo ikaw matan; mapuna iyousis naman mo itokes inawes ven towen Damasik.

⁹ Yam kweitoun isesuna-wan, matan nag ibwein, ta-ikam, ta-imoum, isesuna-wan.

¹⁰ Yeisuw nagamag teitan nises ven Damasik, yagan Ananiyas; anmikon waseg naguyaw idibek Ananiyas, ilana, “Ananiyas.”

Ilana, “Yey-ay.”

¹¹⁻¹² Naguyaw mo ilivan, ilana, “Kutamanaw kun kunoy ked towen yagan Didumwal, e, kun Yud wanbunatum, kunev gamag teitan gum-Talisus yagan Soul, peinan bo intougig.

E, igaw initoug, ikin taw teitan yagan Ananiyas isap, isen naman wawan, vagan matan beibwein.”

¹³⁻¹⁴ Ananiyas ikatimop aygan, ilana, “O Guyaw, gamag babaw ilansa, ‘Taw towen singay takalbaleb, singaya iyagages mugwamag Yelusalem waseg;’ o tut towen ikow inalet tanuwgwas lun sitovek avakaein silmanin kid biyawanim yakamey takavtagin yagam yak.”

¹⁵⁻¹⁶ Naguyaw mo idibek, ilana, “Kun kuwtel agulivan mawan, peinan bo akaluweg nawotet taw towen silmanin bikow yagag vena babaw gimgilis wasigeis, o siguyawaw wamtes, o min-Yisleil warntes. Igaw bakatimlek taw towen youda babaw kalbaleb igaw mo bilouvat peinan yagag yey bikow.”

¹⁷ Ananiyas iligen, inoun, isiw wabunatum towen naGuyaw nikatigik, isen naman wawan Soul, ilana, “Bwadag yakkoum Soul, daGuyaws nikayabeig nam, silmanin matam bavag beibwein, o silmanin Yowbad Kululuwan Town Bwanabwein biwekeim. DaGuyaws towen Yeisuw niwekeim yak waked.”

¹⁸ Nuwanaw mo ilatimatet matan, mo ikin bwein. Itamanaw mo ibaptays.

¹⁹ Kan ikam, amnan mo ibwein.

Soul igeiguy Damasik waseg

Soul siney Yeisuw nagamag ven Damasik waseg nisesus mwasanin yam waseg.

²⁰ Tage nuwanaw igeiguy sinagoga babaw wasigeis, ilana, “Mounid Yowbad natun, mtown Yeisuw.”

²¹ Taliganeins anilivan towen bo isunasun ninous, ilivans, “Tabta taw towen taya-gagein Yeisuw nagamag Yelusalem waseg, mo im wadavanuys silmanin biyousis tayakelesiys, mo binawes kid tanuwgwas lun situwəvek wasigeis?”

²² Tage Soul mo itawtouna singay, anilivan tawtoun waseg mo ikatimlakes min-Yudiy tasiyas misikesa Damasik waseg, vagan kid bikakinsa Yeisuw mounida Kelis; e, tasiyas bo ibol ninous, ta-mawan bikatimapus aygan.

Min-Yudiy sivines biyousis Soul

²³⁻²⁴ Yam mwasanin ikous, min-Yudiy illivans sisiyas, idokes amawan bikatimates Soul; tage teitan gamag idibek Soul mo ikakin ninous. Tasiyas ikayyamats wawkwedan boul yam waseg o boug waseg; ikayyamats kid Soul bisap mo beiweiys. Ven towen nibasis boul watoulan. Gamag nitatos wadunan ked, ikayyamats.

²⁵ Mapuna boug waseg inavamul idagis Soul in wanuwan kaynad avakaein, ikaygwag-wes ee... in iton wapwepway watoulan boul, mo itamanaw inoun.

Soul in Yelusalem

²⁶ Soul inoun in Yelusalem, sivinan kid binekes Yeisuw nagamag; tage tasiyas iwenes, ilansa, “Adok mtown Soul nag ikanavin nanon.”

²⁷ Tage mtown Banabas mo itok, inekes tasiyas takaweins livanen Yeisuw, ilana, “DaGuyaws bo inek taw towen waked, ikin, ilivans son, wankuyeim ven Damasik waseg mo itawtoun, igeiguy Yeisuw yagan waseg.”

²⁸ Min-Yelusalem tasiyas iliganes aygan towen, mo Soul inekes; siney tasiyas nisesus siwotet babaw waseg; e, mo itawtoun, yagan Yeisuw waseg, illivan.

²⁹ E, illivans wasigeis min-Yudiy tasiyas takaga-Gilis, mo ikamnimans waseg, mapuna iyokons kid bikatimates.

³⁰ Tage Yeisuw nagamag ikakinsa ninous bikatimates Soul; mapuna itokes Soul ineis Sisaliy, wankuyeim mo ikayabes in Talisus.

³¹ Tage tayakelesiys babaw nisesusa bwein, wawnuwan Yudiy, o Galiliy, o Samaliy. Nag aveiyag ilivatus; bwein-wan, ikatimweisisa babaws, itawtouns, ivnases Yowbad; peinan Kululuwan Town Bwanabwein bo ilabes, imlavags singaya babaws.

Pita ivag Ayney mo ibwein

³² Pita itəvin inoun vena babaw wasigeis, mo iwloubus inekes Yowbad nagamag mwasanin nisesus ven yagan Lid.

³³ Ven town mo iban taguyagwey teitan yagan Ayney, bweilim kweinim kweitoun immasis wakaban, ta-mawan binoun.

³⁴ Pita idibek, ilana, “Ayney, Yeisuw Kelis bo ivageim kid bukubwein. Kutamanaw, kukow musag.” Iligen, nuwanaw mo itamanaw.

³⁵ Mina-Lid o min-Selon tabebaws-wan ikines, mo isivins, Yowbad nakaleiwag ikawes.

Dokas ikanig, mo imov vayuwein

³⁶ Ven Yop waseg, Yeisuw nagamag nātan yagan Tabit, pinyuwein yagan Dokas; vin manawen nawotet bwanabwein, singaya isiwyoubus tasiyas tasimavs.

³⁷⁻³⁸ Misumkwey town ikatoun avakaein, mo ikanig. Iwidis won, isewas bunatum kasiyuwein wanuwan; o peinan Yop kadilakusana Lid, o peinan Yeisuw nagamag niliganes Pita nises ven town Lid, mo ikayabes tawaw asteiy; inounas, inekes Pita, ilansa, “Nuwanaw kum, taneis Yop.”

³⁹ Pita iligen, itamanaw, siney tasiyas mo ineis. Pita isap, im; itokes Pita inawes bunatum town wanakaew nakanig nimsik-yay. Nakubukwabs babaws-wan itemos wadadan Pita ivvalams, ikatimlakes asikweima babaw, ilansa, “Kukin amakweim. Dokas, igaw son mwamovan nises, nibalal maynsiyas amakweim magayana.”

⁴⁰ Pita ikayabes, ineis watoulan, ibesen kitatun, initoug Yowbad waseg, mo itouvin, inek nakanig, ilana, “Tabit, kukit.” Ilivan ikous, mo ikiplal matan, ikin Pita, ikit.

⁴¹ Pita iyous wanaman, mo itamnow; idawes tayakelesiys sisiyas nakubukwabs tasiyas, mo imeis, ikines Dokas bo imov.

⁴² Butun wotet town in vena babaw Yop walasin, kalamwey babaw gamag mo isimounids Yowbad waseg.

⁴³ Pita nisesuna Yop, yam babaw waseg; mimsikey Saymon wanbunatum, mtown nabalal kaleivin man.

10

Pita inek Koniliy

¹ Gum-Sisaliy yagan Koniliy, mina-Lom sitakanaviys sitovek; takanaviy tasiyas mina-Italiy.

²⁻³ Taw town ansinap bwein, siney angamag ivnāses Yowbad; tuta babaw isiwāyoub gamag wasigeis. E, tuta babaw initoug Yowbad waseg. Kweitan yam, kwayav waseg, igawa initoug, ikin magina gum-libalab teitan imek, idibek, ilana, “Koniliy.”

⁴⁻⁶ Igintov, ivag anpwāyat, mo ilivan, ilana, “O guyaw, aveiyag sivinam?”

Gum-libalab mo ilivan, ilana, “Peinan munitoug babaw, sona musiwayoub wasigeis tasimavs, mapuna Yowbad mo inuweim yakoum. Tut town bweina kwayabes mugwamag mwasanin bineis Yop, bidibakes Saymon beim. Mtown Saymon, yagan kwayuwein Pita, nises valeyin Saymon wanbunatum, town tawtelein kaleivin man; nabunatum wakawalaw nises.”

⁷⁻⁸ Anelos ilivan ikous, inoun, in; Koniliy mo idawes nagamag asteitoun; tawwotets wanuwan nabunatum asteiy, sisiy natakanaviy tatanok. Takanaviy town ansinap bwein, tuta babaw iwotet natovek waseg, mamagina takanawein aygan. Anelos anilivan ikatipel isekes ikous, mo ikayabes bineis kid Yop.

⁹ Iyam-nen, yanay waseg, igawa waked inounas, ineis kadilakusan ven town Yop, Pita mo imwen wakunuwatan bunatum silmanin binitoug waseg Yowbad. Peinan sibunatum mamanas kunuwatan.

¹⁰ Pita ivag anamoun, sivinan beikam. Igawa ikaleibwans wabunatum, matan makava isisawl, ikin magina youd kweitan.

¹¹ E, ikin libalab itavis, o mamagin kweim avakaein, matan palavas vatul iyawanis mo ikaygwagwes, italaves vatul waseg ee... in, iton watinow.

¹² Wanuwan kweim town man babaw nisesus, mansiyas inounas wapwepway kikeis waseg, o mansiyas itatets wapwepway o mansiyas sam pinpineis iyoyows wanakaew.

¹³ Pita ikin, mo iligen aygan teitan, ilana, “Pita, kun, kuweiy mansiyas man vagan bukukwam.”

¹⁴ Pita ikatimop aygan, ilana, “O Guyaw, adok nag, ta-mawan bakan man tasiyas, bwaboum. Kweiboug nag; adok nagein-vak nag.”

¹⁵ Vayuwein mo ilivan, ilana, “Magat Yowbad bivag bwein, bo bwein; awoum kupiyev; awoum kulana, ‘Bwaboum;’ awoum.”

¹⁶ Sivatoun ivag mawan, youd towen mo iyum in walbalab.

¹⁷⁻¹⁸ Igawa Pita ininuway, ilana, “Aveiyag silawun youd towen nakin?” Koniliy nagamag tasiyas mo isaps, ikatugwans wasigeis mwasanin gamag, ilansa, “Avanuy Saymon nabunatum?” Tasiyas mo ikatimlakes nabunatum mo ineis bunatum towen waseg. E, itamanaws wakoukwed, ikatugwans, ilansa, “Tabta amibwabwal mtowen Saymon Pita, ne?”

¹⁹⁻²⁰ Pita, igaw wanakaew, ininuway waseg youd towen mwana nikin, Yowbad Kululuwan mo ilana, “Kutamanaw. Gamag mwasanin watinow nisesus, inineveims yakoum. Kun, kuneses, mo simwey tasiyas kunounas; awoum nuwam bikubukub, peinan yey tatorneig nakayabes nimeis.”

²¹ Pita mo ibus, inekes, ilana, “Yey-yaya, kunneveigs. Aveiyag wawun nukumeis?”

²² Ilivans, “Matovek teitan takalikay, ansinap kamnat, tuta babaw igoul Yowbad aygan, o min-Yudiy babaw ikakinsa ansinap bwein. E, Yowbad natakayob bo idibek matovek, ilana, ‘Kudow Saymon Pita beim wambunatum, anilivan kuligen.’ Mapuna nikayabem nakam.”

²³ Pita ilana, “Bwein, kumeis wabunatum kumasis, peinan bo ikwayav. Nubweig mo tanounas bitaneis.” Iyam nen mo ineis, sisiyas tayakelesiys mina-Yop mwasanin.

²⁴ Akweiy Yam mo isaps Sisaliy. Koniliy bo inmis Pita bo beim, mapuna mo idawes taliven sisiyas ansinvalams nikatuyouns nimeis.

²⁵ Pita mo isap wanbunatum towen, Koniliy inek Pita, ikulul wamatian.

²⁶ Tage Pita bo iyous wanaman itamnow, ilana, “Awoum kukulul wamatag, awoum; yey gamag mawana yak.”

²⁷ Igawa ilivans son Koniliy, isiws wanuwan bunatum, Pita mo iban gamaga babaw, nisinkunouks wabunatum nisesus.

²⁸⁻²⁹ Pita mo ilivan wasigeis, ilana, “Kukwakins gum-Yudiy nag bimek tobwag ven gimgeilin, nag bilakwen, nag bikaypuls son; bwaboum. Tage tut towen agumikon waseg, Yowbad bo ikatimlakeig bweina banekes tobwag ven gimgilis; awoum badok bwaboum. Mapuna nukudaweigs nam, nag apiyev. Kadiloka kudibakeigs wawun nukudaweigs nam.”

³⁰⁻³² Wankuyeim Koniliy mo ilivan, ilana, “Yam kweivas nein wankuyeim, kwayav waseg, kelas itageg, mawana tut towen nagein; e tutan nitoug kwayav Yam towen waseg, yey ases wagunbunatum anitoug waseg Yowbad. Igawa aninitoug mo akin taw teitan itamanaw wamatag, anakweim gimagim seikwan. Taw towen mo ilivan ilana, ‘Koniliy, peinan munitoug babaw, o peinan musiwayoub babaw wasigeis tasimavs, Yowbad bo inuweim yak. Tuta towen kwayabes mugwamag mwasanin bineis Yop, bidibakes Saymon beim. Mtowen kwayuwein yagan Pita; valeyin anbwabwal nisesus son. Valeyin tawtelein kaleivin man; nabunatum wakawalaw-o nises.’

³³ “Mapuna akatimales gungamag mwasanin, niwekeims, o bo ikalin nuwag yakoum peinan nukum. O tut towen yakamey babaw wamatian Yowbad nakases, sivinem bakaligen daGuyaws nakaleiwag; aveiyag nidibakeim yak, kwatipel babaw kusekem.”

Pita ilivan Koniliy nagamag wasigeis

³⁴⁻³⁵ Pita mo isilamaw anilivan, ilana, “Mounid akakin wamatian Yowbad gamaga babaw yakids katanok-wan; o vena babaw gimgilis toubweins, kukin bivnases Yowbad, Yowbad mo bikalin nuwan gamag tasiyas wasigeis.

³⁶ “O Yeisuw Kelis, gamaga babaw daGuyaws towen. O Yowbad bo isek anilivan bwanabwein silmanin min-Yisleil yakamey, vagan beitaw nuwem.

³⁷⁻³⁸ “O yakamiy kukwakins livanen gum-Nasalet towen Yeisuw; e, kweiboug Yon nigeiguy, nibaptayses gamag, wankuyeim Yeisuw isilamaw nageiguy Galiliy, ininoun in vena babaw Yudiy wasigeis; livanen Yeisuw vena babaw ibekena, peinan Yowbad natawtoun iligob Yeisuw waseg, magina Kululuwan Town Bwanabwein inek; mapuna ininoun ililabesa gamag babaw, o tasiyas Seitan niyagages, ilivan mo ibweins, peinan Yowbad son. Livanen towen kukwakins-wan.

³⁹ “O yakamey nakakin youda babaw nivvag vena babaw wanawan Yudiy, o Yelusalem waseg; mo iweiys ikatikavates wakamweilok.

⁴⁰⁻⁴² “Yam kweitoun Yowbad ivag, mo itamanaw vayuwein; gamag mo ikinbunikes. Tage gamaga babaw nag ikines; misinaka yakamey, kweiboug Yowbad nikatigikem takawein bulagan Yeisuw yakamey; bo nakakin neimov vayuwein; simey nakakam; simey nakamoum; mo isekem mawotet vagan bakageiguy gamag wasigeis. E, kaggeiguy vagan gamag bikakins Yowbad nikatigik Kelis towen igaw mo bikaleiwag vagan bimop asisinap tamwamovs sisiyas takanigs.

⁴³ “O towen Kelis, palopit tasiyas kweiboug nilivnakes towen tawidin sinap kalbaleb wasigeis tasiyas kalisiy bisimounids yagan waseg.”

Yowbad Kululuwan inekes tobwag ven gimgilis

⁴⁴ Pita igawa illivan anilivan towen, Yowbad Kululuwan mo inekes tasiyas taliganeins livan towen.

⁴⁵⁻⁴⁷ O min-Yudiy tayakelesiys tasiyas sisiy Pita nimeis bo isom ninous, peinan ikines Yowbad isiwyoibus tobwag ven gimgilis, Kululuwan Town Bwanabwein bo ininekes tasiyas asibabaw-wan. Ikines tasiyas singaya iyakawanes Yowbad, o ilivans kaeig kweitan kweitan wasigeis, peinan Yowbad Kululuwan nises wasigeis tasiyas. Min-Yudiy tasiyas bo iliganes siyakawn o sikapleon amav, mapuna Pita ikatiganes, ilana, “Kal bisilbwed sibaptays tasiyas? Tago-mawan bitasilbwed. Bweina bitabaptayses peinan Yowbad Kululuwan bo inekes, mawana yakids kweiboug.”

⁴⁸ Pita mo ikaleiwag bibaptayses kid Yeisuw Kelis yagan waseg. Sibaptays ikous, mo ilivans, ilansa, “Simayas yakamiy bweina tasesus, igaw yam mwasanin waseg mo bukuyums.”

11

Sinap towen Pita mo ikamat Yelusalem waseg

¹ Yudiy waseg, takaweins livanen Yeisuw sisiyas tayakelesiys bo iliganes sinap towen, mamagina tobwag ven gimgilis bo itimakes Yowbad anilivan.

²⁻³ Iyum Pita in Yelusalem, tayakelesiys tasiyas Yowbad nakabivatus wasigeis, mo ivtokes livan Pita, ilansa, “Yakoum bo kuneke tasiyas nag ivag Yowbad nakabivatus? Kwamtans simwey, ne? Bo igak!”

⁴⁻⁵ Pita mo itakud livanen nawotet towen, mamagina; “Yey nases Yop, anitoug Yowbad waseg; matag makava isisawl, kweitan youd akin, mamagina kweim avakaein, vatul iyawanis kweim to matan palavas, mo italaves ee... in iton watinow, wamatag-wan.

⁶ “Yey akinbunik, wanawan kweim man babaw, mansiyas sam kikeis inounas watinow, o mansiyas bulawud kawkavek, o mansiyas ta-ivag nimes tage itatets wapwepway, o mansiyas sam pippineis iyoyows wanakaew.

⁷ “Wankuyeim mo aligen aygan teitan idibakeig, ilana, ‘Pita, kun, kuweiy mansiyas man silmanin bukukwam.’

⁸ “Yey akatimop livan towen, alana, ‘O Guyaw, ta-mawan bakan mansiyas man, bwaboum. Kweiboug nag. Adok nagein-vak nag.’

⁹ “Vayuwein aygan towen, libalab waseg, mo ilana, ‘Magat Yowbad bivag bwein, bo bwein; awoum kupiyev; awoum kulana; ‘Bwaboum.’ Awoum.’

¹⁰ “Sivatoun ivag mawan, youd towen mo iyum in walbalab.

¹¹ “Misumkwey towen tawaw teitoun mo itamanaws wawkwedan bunatum towen nakasikey-yay; peinan gum-Sisaliy nikayabes nimekeigs.

¹² “Yowbad Kululuwan mo idibakeig, ilana, ‘Simwey tasiyas kunounas; awoum bisunusun nanoum; bwein-wan.’ Sigwey tayakelesiys asteinim tatanok, tasiyas-nan, nakan, kāsiw taw towen wanbunatum.

¹³⁻¹⁴ “Towen Koniliy nidibakem ilana, ‘Akin gum-libalab nitamanaw wagunbunatum, ilana: ‘Kwayabes mwasanin gamag bineis Yop bidawes Saymon Pita beim; mtowen Pita mo bisekeimiy sinap bwanabwein; e, sinap to waseg, Yowbad mo bikatinabweimiy simwey tasiyas mugwamag wambwabwan nisesus.’”

¹⁵ “Asilamaw agulivan wasigeis tasiyas, Yowbad Kululuwan mo inekes tasiyas, māwana yakids kweiboug.

¹⁶ “Wankuyeim mo anuw daGuyaws anilivan mamagina, ‘Yon bo ibaptays soup waseg, tage yakamiy igaw Yowbad mo bibaptayseimiy Kululuwan Town Bwanabwein waseg.’

¹⁷ “Wanmugwana yakids nitasimounids daGuyaws Yeisuw Kelis waseg, mo isiwyoubuds Yowbad Kululuwan waseg; tut towen mo isiwyoubus tasiyas māwan. Yey tamāwan bavkek basilbwed Yowbad nawotet.”

¹⁸ Min-Yudiy tasiyas iliganes Pita anilivan, ta-māwan bikatimapus aygan. Tage ikavasisa Yowbad, ilansa, “Tage Yowbad bo isiwyoubus tobwag ven gimgilis, vagan asisinap kalbaleb bilavewas, mo sona simwamov bisigagas.”

Tayakelesiys ven Antiyok waseg

¹⁹ Kweiboug tanuwgves-lun neiweiys Sitiben, ikous, mo iyablebes tayakelesiys Yelusalem waseg; mapuna igayays, mwasanin ineis Pinisiy, mwasanin ineis Saypilos, mwasanin ineis Antiyok; vena babaw waseg ikatpeles līvanen Yeisuw, tage misinaka isekes min-Yudiy tasiyas nikoulups nisesus ven wunsiyas; nag isekes līvan towen gamaga babaw wasigeis, nag.

²⁰ Tage sisiyas tasiyas min-Saypilos mwasanin o min-Saylin mwasanin ineis Antiyok mo isekes Guyaw Yeisuw līvanen bwanabwein, mina-Gilis wasigeis.

²¹ O peinan Yowbad ilabes, babawa gamag ikanavin ninous; mo isimounids Yeisuw waseg; mo ikatimweisis singaya babaw gamag.

²² Tayakelesiys tasiyas nisesus Yelusalem iliganes, mapuna ikayabes Bānabas bein kid Antiyok.

²³ Towen Bānabas isap, ikakin Yowbad singay isiwayoub wasigeis tasiyas, mapuna ikalin nuwan avakaein; e, idibakes gamag tasiyas, ilana, “Kadiloka kusimkines, kutoukums daGuyaws inawotet waseg.”

²⁴ Mtowen Bānabas gimilitoun towen, singaya isimounid Yowbad waseg, o itawtoun, peinan Kululuwan Yowbad son nisesus. Misiyamun towen Yeisuw nagamag ikatimweisis; bo ibabaw.

²⁵⁻²⁶ Wankuyeim Bānabas in Talisus inineiv Soul, iban, mo itok; asteiy mo iyums ineis Antiyok. Nisesus Antiyok bweilim katanok, sitapwaloul waseg bo ikatimlakes tayakelesiysa babaw. Wanmugwana Antiyok waseg idokes magawen yeg Kelistiyan mo idawes tayakelesiys yiges tasiyas.

²⁷ Misumkwey towen palopit mwasanin meinoy nimeis Yelusalem, imeis isaps Antiyok.

²⁸ Teitan yagan Agabous; Kululuwan Yowbad ikatipel ansinap isek mtowen Agabous, mo itamanaw ilivan, ilana, “Kadilakusa bo bitalivatus tut kalbaleb, vena babaw wasigeis, peinan nag beikweis kweis, o nag beivag kan.” Magina bo ilivnek līvan towen. E, anatut Kalodiw nakaleiwag waseg mo ikamat youd towen.

²⁹ Mapuna tayakalesiys Antiyok waseg, tasiyas sam sivavag, idokes kid katanok katanok bimulouls; o muloul towen igaw mo biwyabes vagan bilabes tayakelesiys tasiyas Yudiy nisesus.

³⁰ Imulouls ikous, mo isekes Bānabas son Soul, ikawes, inawes Yelusalem, silmanin tayakelesiys situwāveks ven towen waseg.

12

Iweiys Yemes, mo Pita isenas wadeil

¹ Misumkwey towen King Elod iyousis tayakelesiys mwasanin vagan kid biyagages.

²⁻³ Yemes, mtowen Yon tuwan, bo ibob kayon, pulut tanmunum waseg. Mapuna ikalin nuwes tasiyas min-Yudiy. O peinan ikalin nuwes, Elod mo iyous Pita, wik towen waseg min-Yudiy nag beikams bled son yist, bwaboum.

⁴ E, iyousis Pita, inawes wadeil, Elod siwotet isekes natakanaviys vagan bimtakavates Pita, natakanaviy tasiyas babiweis sinawatan tenim tatanok. Wananon idok, igaw beikous sagal towen yagan Kaltuwon, mo bitok Pita bisekes min-Yudiy vagan kid biyateles.

⁵ Igaw Pita nises wadeil, tayakelesiys singay ikalin nuwes, initougs, igilagels Yowbad waseg, vagan kid bileb towen Pita.

Gum-liblab ikatinob Pita

⁶ Pita nises wadeil Yam mwasanin ikous, Elod idok yamtan Yam mo biyatal waseg. E, bo iboug, Pita imasis wanuwein takanaviys, teitan palatan, teitan palatan, immasis, o sen bo iyawanis naman Pita, walitan palatan, walitan palatan; o takanaviys mwasanin itamanaws wakoukwed, imtakavatays deil towen.

⁷⁻⁸ Igaw immasis, Yowbad natakayob isap, itamanaw wadadan Pita; mititeilin im imteil nuwan bunatum. Gum-liblab towen im igipit Pita waviligan, iwgung, ilana, “Kutamanaw! Nuwanaw!” Anasen tatonen mo ikabilow wanaman. Mo ilana, “Amuwat kuyawen, musandol kuvaligev.” Ivag mawan, mo ilivan, ilana, “Amukweim kusikam, mo kum kwabkunig yej.”

⁹ Nuwanawa inek, ikabkun; ineis; nag isimounid waseg youd towen gum-liblab nivag; idoki mamagina matan isisawla mav.

¹⁰ Isaps koukwed kweitan, iwekes takanaviys nisesus; isiws isaps koukwed kwayuwein waseg, iwekes takanaviy nisesus; isiws isaps koukwed avakaen waseg, tanmunum; tatonen ikaliyow, mo isaps wavtakon ven; e inounas wavtakon ven, gum-liblab nuwanaw mo inoun in.

¹¹ Wankuyeim Pita mo ikakin, ilana, “Bo akakin mounid daGuyaws nikayeb gum-liblab towen nikatinabweig Elod waseg, isilbwed gog asisinap waninous tasiyas min-Yudiy takalbalebs.”

¹² Nanon idumwal mawan, mo inoun in Meliy wanbunatum, manawen Yon inan, Yon yagan kwayuwein Mak; o bunatum towen waseg, babaw gamag nikatuyouns nimeis innitougs Yowbad waseg.

¹³⁻¹⁴ Igipit wakoukwed; nakubukwab nawtotet, yagan Lod, mo in ilivan, “Kal yak kuggipit?” Iligen aygan Pita, sona namwasaw isiwlayum; nag ikaliyow koukwed, isawl in wanuwan bunatum, ilana, “Pita bo isap, nitet watoulan.”

¹⁵ Ilansa, “Adok nakabalawein yak.”

Iw manawen, ilana, “Mounida Pita nises.”

Mo ilansa, “Adok aluwan-nan.”

¹⁶ Igaw Pita iggipit, mo ikaliyowes koukwed, ikines Pita; singaya bo isom ninous.

¹⁷ Tage Pita naman itamnow, ikatitun asilivan, mo itakud mawan siGuyaw nikatinob wadeil, mo ilana, “Kudibakes Yemes sen nagamag,” mo inoun in kweitan ven.

¹⁸ Iyam gaboug mo ivag mouvit wasigeis takanaviys siyas, peinan nag ibanes Pita.

¹⁹ Elod siney natakanaviys mo inineivs Pita; inineivs, bo nag. Mapuna iyateles natakanaviys, ikaleiwag mo ikatimates tasiyas. Wankuyeim mo ilisow Yudiy, iwloubus in Sisaliy, nisikey-yay.

Elod ikanig

²⁰ Elod singay ikawkunes min-Tayil sisiy min-Sidon; o tasiyas sivines beimwas, mapuna isineikimas; wanmugwana imwas waseg Bilasit, mtowen nawtotet King Elod

wanbunatum; wankuyeim asilivan mo ikow isek King Elod vagan kid beimwas siney tasiyas. Ivages mawan peinan niggimweles kaeis Elod waniven.

²¹ Elod ikatigik siyam, ilana, “Yam towen waseg mo kumeis.” E, imeis, mo isap wamtes gamag tasiyas; bo isikam King kweiman, singay maynamnabwein, isin wakaban, mo iliwon wasigeis tasiyas.

²² Illivan ikous, mo iwaks, ilansa, “Nag kweitan gamag aygan mawan; towen mamagina yowbad aygan.”

²³ Nuwanaw Yowbad natakayob mo iweiy King towen, peinan ibakew Yowbad yakawanan; ikasimwamwat nuwan, mo ikanig.

²⁴ Wankuyeim babaw gamag mo iliganes Yowbad aygan, vena babaw wasigeis.

²⁵ O peinan siwotet bo ikous, Banabas son Soul mo ilisawes Yelusalem, sisiy itokes teitan gamag yagan Yon, yagan kwayuwein Mak.

13

Isekes siwotet Banabas son Soul

¹ Ven Antiyok waseg, tayakelesiys wasigeis palopit mwasanin nisesus, o mwasanin takatimlakeins Yowbad nakaleiwag. Teitan yagan Banabas; tayuwein Simiyon, mtowen yagan kwayuwein Wobug; tatounun gum-Saylin yagan Lukiyos; tavasin Manen, son Elod asibweilim katanok-wan, kweiboug niskuls son towen, min-Galiliy siguyaw avakaein Elod; o tanimen yagan Soul.

² Tasiyas ivnases Yowbad nawotet, ipsapos silmanin; Kululuwan Townen Bwanabwein mo inekes, ilana, “Kadiloka kutames Banabas son Soul silmanin wotet kweitan bakatigik siwotet.”

³ Mapuna ipsapos innitougs Yowbad waseg, mo isenas nimes wawous tasiyas, ikayabes silmanin wotet towen.

Ineis Saypilos igeiguy

⁴ Peinan Yowbad Kululuwan nakaleiwag mawan towen, bo ikayabes, iwloubus, ineis Selusiy, itouws wawag, ikuks ineis Saypilos.

⁵ Ineis wanakaew ven yagan Salamis, mo igeiguy Yowbad anilivan, min-Yudiy sisinagog nisesus ven kweitan kweitan wasigeis. Sisiy Yon, mtowen illabes.

⁶ Sim towen ikanpeles, isaps palatan, ven yagan Pepos, mo ilouvats sisiy tamgameg teitan, gum-Yudiy, yagan Bayosuw; gamag babaw idokes palopit teitan; nag gog, tayyaweid.

⁷⁻⁸ Gabman-nen ven towen, yagan Segipawl, tassinap teitan. Mtowen Bayosuw son Segipawl nisesus. Segipawl idawes Banabas son Soul bimeis, sivinan kid biligen Yowbad aygan, tage tamgameg towen Elaymas idoki bisilbwed; nag sivinan gabman towen biligen Yowbad nakaleiwag. (Yagan Bayosuw takativin bein kaeig kweitan Elaymas.)

⁹⁻¹⁰ Mapuna Soul, nidokes yagan piniyuwein Pawl, bo itawtoun singay, peinan son Kululuwan Yowbad, ikinbunik tamgameg towen, ilana, “Seitan natun yakkoum, singay takalbaleb o tayyaweid yak; tuta babaw kusilbwed sinap bwein, tuta babaw sivinam Yowbad inaked bukukididog.

¹¹ “E, tut towen Yowbad bo beiweiy matam; tut mwasanin nag matam beikin klas mititeilin, peinan bo beikaw matam.” Nuwanawa matan mo ikaligwen, wankuyeim mo ikaw singay dadub. Ininoun, inineiv kavel biyous naman vagan bitok, peinan ta-mawan bikin inaked.

¹² Gabman towen Segipawl ikin wotet towen, mo isimounid Yowbad waseg; iligen daGuyaws nakaleiwag, waseg isom nanon.

Paul son Banabas ineis Antiyok ven Pisidiy waseg

¹³ Pawl siney nagamag mo ikuks, ilisawes Pepos ineis Pelig, wawnuwan ven avakaein Pampiliy; tage Yon ilisawes, iyum in Yelusalem.

¹⁴ O tasiyas ikanpeles Pelig ineis Antiyok, ven Pasidiy waseg; isaps ven town; Sədad waseg mo isiws wanuwan sinagog, tapwäloul silmanin.

¹⁵ Tapwäloul waseg ivinis Bukitab, Moses nakaleiwag kweitan yageivein o palopit asilivan kweitan yageivein; ivinis ikous, mo tanuwagan sinagog idibek teitan ikatugwan wasigeis Pawl son Bənabas, ilana, “Sigwey yakamiy, kukin amisinap nises, kadiloka kugeiguy gamag babaw wasigeis.”

¹⁶ Pawl mo itamanaw, itamnow naman, ilana, “Min-Yisleil yakamiy, o tagouluns Yowbad yakamiy, kunages agulivan.

¹⁷ “Min-Yisleil yakids, daYowbads bo idawes tamumwey, igawa nisesus Yidipt; e, ilabes mo itawtounsa singay; o natawtoun waseg imgwayes, mo isaps vəgan bineis kid wasiven tatineis.

¹⁸ “Wankuyeim sinawavas bweilim wanawoud mo imgwayes tasiyas, o singay moumouvit, peinan tuta babaw takakons tasiyas.

¹⁹⁻²⁰ “DaYowbads mo iweleys ven kweinim kwei, Kenan wawnuwan. Yowbad nisekes tamumwey sipwepway town; e nisesus ven town bweilim babaw, lakatuvas sinawanim bweilim. Wankuyeim mo isekes situwəvek vəgan bikaleiwags wasigeis. Tasiyas ikaleiwags bweilim babaw ee... mo isilamaw nakaleiwag palopit town Samwel.

²¹ “Wankuyeim mo ivag sivines siking kid beivag; initougs waseg Yowbad, mo isekes siking teitan, Kis natun yagan Soul, anakum Binyamin, anbweilim sinawavas.

²² “Wankuyeim Yowbad mo ipiyev king town Soul; siking kweivaw mo ikatipel isek mtown Deibid. Livanen Deibid Yowbad nilivan, mamagina, ‘Bo aban Desiy natun Deibid, ikalin nuwag waseg; mtown biwtel youda babaw mawana nanoug yey.’

²³ “O məwana Yowbad kweiboug-o nilivnek; tut town bo isek Deibid tabun nawotet vəgan bikatinabweids min-Yisleil yakids. O Deibid tabun town yagan Yeisuw.

²⁴ “Yon bo ikidumwal ked wamatān Yeisuw, inageiguy min-Yisleil babaw wasigeis, vəgan bilaves kid asisinap kalbaleb, mo bibaptəyses.

²⁵ “Yon nawotet iyakous, mo ilivan mamagina, ‘Kuninuways kavel yey. Yey nag Kelis mtown kukwayamats, nag. Tage watibweloug teitan bo beim; nag kadilokeig bakulul wamatān vəgan bakablev nasandol, nag. Peinan town guyaw avakaein.’

²⁶ “Sigwey, Ebelam tibun yakamiy, o kalisiy yakamiy kugoulus Yowbad, anilivan bo isekimiy vəgan bikatinabweimiy.

²⁷ “O min-Yelusalem sisiyas situwəveks nag bikakins mtown Yeisuw bikatinabweids; o nag bikakins palopits asilivan Bukitab wanuwan. Asilivan tasiyas Sədad katanok katanok, tapwäloul waseg, ikatilutegsa mav tage nag bikakins silawun. Mapuna mo iyateles mtown Yeisuw; o məwana nikatigik kweiboug-o livanen Yeisuw, Bukitab waseg, nagein gog mo ikamat livanen məwana nilivnek.

²⁸ “E nag ibanes ansinap kalbaleb vəgan beiweiys, tage bo initougs takaleiwag town Paylat bikatimet kid.

²⁹ “E livanen babaw nises Bukitab wanuwan, mo iwteles məwan; e, imat, ikaygwagwes wakamweilok ee... inibwis, mo ikawes inawes, isewas watakunumwan.

³⁰ “Yowbad mo iyakit, itamanaw vayuwein.

³¹ “Tasiyas kweiboug sisiy Yeisuw nitanouys ven Galiliy waseg ineis Yelusalem; e, tasiyas yam babaw ikines Yeisuw, bo imov. Asilivan tasiyas mo isekemas yakamey, o isisekes-vək gamag babaw wasigeis.

³²⁻³³ “O livan town bwanabwein kasekeimiy yakamiy, o youd town kweiboug-o Yowbad nilivnek tamumwey wasigeis. O nagein gog youd town bo ikamat wasigeis yakids, tamumwey tibsiyas yakids, peinan Yeisuw igawa wakanig nises, Yowbad mo iyakit vayuwein. Livanen nises Sam kwayuwein waseg, mamagina: ‘Yəkoum natug yak. Nagein mo nukumlavag natug.’

³⁴ “Igawa wakanig nises bo ikit; nag bikanig vayuwein, nag. Won nag beipwas, nag. Livanen nises, Yowbad anilivan mamagina:

‘Gunasiwayoub waseg Deibid, tage igaw mo basekeim yak.’

³⁵ “E, livan nises kweitan Sam waseg, mamagina,
‘Mugwamag towen kukwayus, nag bukutam won beipwas, nag.’

³⁶ “Deibid inatut ven watinow waseg, bo ikokew Yowbad nakaleiwag; mo ikanig, inekes timen, won tonen bo ipwas.

³⁷ “Tage Yeisuw won nag ipwas, peinan Yowbad bo iyakit vayuwein.

³⁸⁻³⁹ “O sigwey yakamiy, kunages amalivan, kadiloka kukwakins towen anmwānet biwid adsinaps kalbaleb. Adsinapsa babaw, Moses nakaleiwag waseg na-ikadilok biwid; tage kukin bitasimounids waseg Yeisuw, mo biwid adsinaps kalbaleb, babaw-wan; Yowbad mo binumlev, beikous.

⁴⁰⁻⁴¹ “Palopit kweiboug-o anilivan mamagina:

‘Tayyagays yakamiy, kukines gunawotet, beisom ninoumiy, mo bukumtāmats.

Peinan mitut waseg gunawotet bawtel;

gamag mwasanin bikatimlakeimiy gunawotet towen,
tage nag bukusimounids; nag.’

E, palopit anilivan mamagin. Kadiloka kuvnāseimiy, mata ge tut wanakougwaw livan towen bikwaneimiy.”

⁴² Pawl nageiguy ikous, isaps wamnat, gamag babaw mo initougs wasigeis, sivines kwayuwein Sādad mo bisekes livan towen.

⁴³ Ikous tapwāloul, sinagog towen waseg, gamag babaw bo ikabwākuns wasigeis Pawl son Bānabas, min-Yudiy babaw, sisiyas tawaw tadiendumwals mwasanin, tasiyas kweiboug nikawes min-Yudiy asisinap. Pawl son Bānabas mo ilivans wasigeis tasiyas, iguyes silmānin bisimkines Yowbad nasiwāyoub waseg.

⁴⁴ Katanok wik ikous, Sādad waseg, ven towen gimgilis babaw ikatuyouns nimeis, sivines kid biliganes livānen Yowbad.

⁴⁵ Tage Yudiy gimgilis, ven towen waseg, bo igeg ninous, peinan gamag babaw sivines biliganes anilivan Pawl, mapuna ikamnimans sisiyas Pawl nagamag, sona siyagay.

⁴⁶ Pawl son Bānabas mo iwons, ilansa, “Kadilok wanmugwana bakasekeimiy Yowbad livanen. O peinan kupiyaves livan towen, o peinan kupiyaves ked silmānin mwamovamiy nag beikous, takaleiwagsa yakamiy. Adok livan towen bo bakasekes tobwag ven gimgilis wasigeis.

⁴⁷ “DaGuyaws nikalawagem māwan, peinan Bukitab waseg anilivan nises mamagina, ‘Bo akalawageim, vena babaw sikannat yakoum;
Vagan bukuymoves vena babaw gimgilis wadaban pwepway.’”

⁴⁸ Vena babaw gimgilis iliganes Pawl anilivan towen, bo imwāsaws; ikalin nuwes Yowbad waseg, anilivan towen silmānin. O peinan Yowbad nikaleiwag mwasanin son simwamov mo bisigagas, tasiyas bo isimounids Yowbad waseg.

⁴⁹ Gamag tasiyas mo ikawes livānen Yowbad, inawes vena babaw wasipalatan.

⁵⁰ Tage min-Yudiy bo ikamliwes Pawl son Bānabas, mo ivtokes livan. Mwasanin iliganes asilivan, guyvinay siyas nasiwāyoub, sisiyas tamumwey mwasanin; wankuyeim mo ivages asisinap kweitan, ipiyaves Pawl son Bānabas, iyagages; ikayabes kid bineis kweitan ven.

⁵¹ Tage tasiyas Pawl son Bānabas ikatsapis kikeis, musamusun ven towen waseg, peinan ipiyaves ven towen gimgilis. Tasiyas mo inounas wāked, ineis Ikoniyam.

⁵² Tasiyas gog nikawes livānen Yeisuw bo imwāsaws, peinan Kululuwan Yowbad sisiy tasiyas.

² Tage min-Yudiy mwasanin ipiyaves asilivan, ivtokes live; mapuna tobwag ven imgilis ikanavin ninous mo ikamliwes Yeisuw nagamag.

³ Isesus ee... imwemway-nen; e, illivans liveñen Yeisuw nasiwayoub; nag iwenes gamag, nag. O Yeisuw bo ilabes, siwotet tawtoun mo iwteles, wayagan Yeisuw; magina naman mulin Yowbad.

⁴ Gamaga babaw ven town waseg mo ilivis, mwasanin ilabes Yudiy imgilis, mwasanin ilabes takaweins liveñen Yeisuw.

⁵ Wankuyeim tasiyas tapiyaveins liveñen town mo islamaws sinap kweitan. Min-Yudiy mwasanin, sisiyas vena babaw imgilis, sisiyas ven town gabman-nen, asibabaw idokes biyagages Pawl son Banabas, beiweiys dakul waseg, bikatimates kid.

⁶⁻⁷ Tasiyas Pawl son Banabas bo iliganes liveñen town, mo isawls ineis Lisitil o Däbiy o vena babaw wawnawan ven avakaein Lakeyoniy; mo igeiguy liveñen Yeisuw, vena babaw wasigeis.

Pawl son Banabas ven Lisitil waseg

⁸ Taguyagwey teitan isin ven Lisitil waseg, kaken paleyuna ipam; ta-mawan binoun. Igaw-o inan nikopweyay mawan-wan.

⁹⁻¹⁰ Pawl isap, ilivan gamag babaw wasigeis, o taw town iligen. Pawl mo ikinbunik taw town, ikakin inanamis nises waseg Yeisuw vagan bivag kid mo beibwein; mapun mo ilivan, aygan avakaein, ilana, "Kutamanaw, kutadamoms;" taw town mo ipel, itamanaw, inoun.

¹¹ Gamag babaw ikines Pawl nawotet town, mo iwaks, aga-Lakiyoniy waseg, ilansa, "Dayowbads bo imlavags gamag, bo ibus, ilakewaneids yakids gamag ven watinow."

¹² Banabas idokes Yupiter, peinan siyowbad yagan Yupiter; Pawl idokes Makiyul, peinan talliwon.

¹³ E, tanuwagan lun silmanin Yupiter nises ven town, o lun buntuman nises ven town koukwed wadadan. Town ivaniyel asipay bulumakaw wasigeis, mo itokes, sivinan kid beiweiys bulumakaw mansiyas, vagan gog beiluns wasigeis Banabas son Pawl, o gamag babaw ninous bo mawan, bo bilabes tanuwagan lun.

¹⁴⁻¹⁵ Tasiyas Pawl son Banabas iliganes, mo isiledes asikweim, peinan singaya igeg ninous, mo isawls, inekes gamag babaw. Ages avakaein ilivans, ilansa, "Tawaw yakamiy, awoum kuvages mawan. Yakamey gamag mawana yakamiy gamag; sinap bwanabwein bakasekeimiy vagan gog bukulavewas makava sinap townan. Kadiloka kumekes Yowbad town tamwamov, tabunin libalab, o pweepway, o yol, o youda babaw waseg.

¹⁶ "Tut kweiboug Yowbad itames vena babaw imgilis binoyes siked tatineis.

¹⁷ "Tage peinan Yowbad sivinan bukukwakins kid ansinap bwanabwein, nissekeimiy kweis o kaeimiy bweylim katanok katanok, vagan bukukwamuweips, bukumwasaws."

¹⁸ Pawl ilivan mawan, o singay keikay siwotet vagan bisilbwades ninous tasiyas; peinan singay sivines beiluns wasigeis.

¹⁹ Wankuyeim min-Yudiy mo isaps, Antiyok o Ikoniyam imgilis, ivalutsa liveñen issekis gamag babaw wasigeis, iliganes mo iweiyis Pawl, dakul waseg, mo ibiteilis, ilaves in watoulan ven; idokes kid bo imat.

²⁰ Yeisuw nagamag ikatuyouns inekes Pawl nimmasis wapwepway; mo itamanaw, isuwvaw vayuwein wanuwan ven. Iyam ne-gaboug Pawl son Banabas mo ineis Däbiy.

Iyums ineis Antiyok, ven Siliy waseg

²¹ Ven town Däbiy waseg mo igeiguy, gamaga babaw iliganes asilivan, Yeisuw liveñen. Ikous, mo iyums ineis Lisitil; ilisawes Lisitil mo ineis Ikoniyam, ilisawes Ikoniyam ineis Antiyok.

²² Vena babaw wasigeis tasiyas asteiy ilabes Yeisuw nagamag silmanin kid bitawtouns; idibakes, ilansa, "Kadiloka kusimkines misimounid Yeisuw waseg, peinan tuta babaw abads bigeg mo bitasiws wanuwan Yowbad nakabkaleiwag."

²³ Vena babaw wasigeis sivines tamumwey mwasanin, kalisiy bimtakavates tayakeleys, mapuna itamnawes gamag mwasanin tasimounids Guyaw Yeisuw waseg, ipsapos

katanok yam o akweiy, ininitougs waseg Yowbad, mo itapwalouls, isenas nimes wawous gamag tasiyas, intougs Yeisuw vagan bikimtuwes silmanin siwotet towen.

²⁴ Ikous, ikanpeles Pisidiy, ineis Pampiliy.

²⁵⁻²⁶ Illivans livanen Yeisuw ven Pelig waseg, mo iwloubus ineis Ataliy; itouws wawag, ikuks, iyums ineis Antiyok, ven Siliy waseg. Kweiboug ven towen tayakelesiys nisekes siwotet, ininitougs silmanin Yowbad bilabes; e, misumkwey towen mo iyakousis siwotet.

²⁷ Iyums ineis Antiyok, tayakelesiys mo ikatuyouns, imeis; itakuds livanen Yowbad nawotet tawtoun to niwtel wasigeis tasiyas, peinan bo ikaliyow koukwed vagan tobwag ven gimgilis mo bisimounids, beisiws bimekes Yowbad.

²⁸ Pawl son Banabas tut kalamwey kadiveiyov nisesus sisiyas tayakelesiys tasiyas.

15

Ikaleiwags ven Yelusalem waseg

¹ Isesusa ee... imwemway-nen mo gamag mwasanin meinoy nimeis Yudiy isaps Antiyok, ikatimlakes tayakelesiys, ilansa, “Kukin bukuklawes nakabivatus Ebelam, mawana Moses nakaleiwag, bweina bikatinabweimiy Yowbad; kukin gog nag, bo nag.”

² Pawl son Banabas mo itamanaws, ikamnimans sisiyas; mapuna tayakelesiys mwasanin ilansa, “Simiyas mwasanin kuneis Yelusalem vagan bukullivans simsimiyas min-Yelusalem tasiyas tayakelesiys situwaveks o tasiyas takaweins livanen Yeisuw; e, livanen Ebelam nakabivatus kwambuvisis vagan nanouds bidumwal.”

³ Mapuna ilisawes tayakelesiys ven Antiyok waseg, itanouys mo ikanpeles Pinisiy. Ikous, mo ikanpeles Samaliy. Vena babaw ititavins ikatimlakays, ilansa, “Tobwag ven gimgilis bo ikanavin ninous, isimounids waseg Yeisuw.” Tayakelesiys tasiyas iliganes, mo imwasaws avakaein.

⁴ Wankuyeim mo isaps Yelusalem, tayakelesiys babaw imulouls sisiyas tasiyas, o situwaveks imulouls, o takaweins livanen Yeisuw imulouls. Pawl son Banabas mo itakuds Yowbad nawotet babaw niwtel siney tasiyas.

⁵ Takaweins Yeisuw anilivan mwasanin, tasiyas Palisiy kweiboug niyakelesiys, tasiyas mo itamanaws, ilansa, “Kadiloka tobwag ven gimgilis bibwabwes momwes, bikanawes Moses nakaleiwag, mo beisiws biyakelesiys.”

⁶ Mapuna ikatuyouns takaweins livanen Yeisuw, sisiyas tayakelesiys situwaveks, vagan bikaleiwags silmanin sinap towen.

⁷ Illivansa babaw ee... ikous, wankuyeim mo Pita itamanaw, ilana, “Sigwey yakamiy, kukwakins kweiboug-o Yowbad nakaleiwag waseg yey, vagan bakow livanen Yeisuw, banow tobwag ven gimgilis wasigeis, vagan biliganes, mo bimwasaws.

⁸ “O peinan Yowbad ikakin ninous gamaga babaw, bo itimakes tasiyas; Kululuwan Towen Bwanabwein mo isekes, mawana yakids kweiboug.

⁹ “Bo isimounids waseg Yowbad, mo iwid asisinap kalbaleb, mawana yakids. Youda babaw ivag wasigeis tasiyas, mawana yakids.

¹⁰ “Tut towen awoum bitayagages nanon Yowbad, awoum bitakaleiwag moumouvit wasigeis budidayas tasiyas. Peinan tammwayas ilapes Moses nakaleiwag; mawana yakids, bo ilapeids, nag kadilokeids.

¹¹ “Deisa towen daGuyaws Yeisuw bo isiwoubuds vagan bitasimounids waseg, mo bikatinabweids; o tasiyas gog bo mawan.”

¹² Tasiyas babaw bo iliganes, isesusa ge ikikapays; wankuyeim mo itakuds Banabas son Pawl, isekes livanen Yowbad nawotet tawtoun, mamagin naman mulin nivag tobwag ven gimgilis wasigeis; o nawotet towen niwtel wasigeis tasiyas Banabas son Pawl.

¹³⁻¹⁵ Iliganes, igawa ge ikikapays; Yemes mo iliwon, ilana, “Sigwey yakamiy, kuliganes agulivan. Saymon bo idibakeids: Wanmugwana Yowbad ilokon tobwag ven gimgilis wasigeis vagan bidawes gamag mwasanin bikawes ansinap, o bikawes yagan tonen. E, mo ikamat youd towen, palopit kweiboug nilel Yowbad anilivan, mamagina:

¹⁶⁻¹⁸ “Ikous, mo bayum baw, bawlulavaw Deibid nabunatum towen nigulekxes,

Naven nises makaw; igaw mo bawlulavaw, mo biton bitadumwal beibwein.

Bawtel mawan vagan vena babaw gimgilis mo bineveigs siGuyaw ye.

O silmanin tobwag ven gimgilis tasiyas nadawes gungamag tasiyas.'

DaGuyaws anilivan mawan, o nawotet towen pwamug-o ikamtel tammwayas wasigeis.

¹⁹ "Mapuna akaleiwag, awoum youd moumouvit bitasekes vena babaw gimgilis, tasiyas mwana nitouvins inekes Yowbad.

²⁰ "Deisa takaleiwags wasigeis tasiyas vagan bipiyaves kan nimgwavis silmanin tobwag yowbad; awoum bisubwans; awoum beikams viniyonan man bo niskwen kayon neimat nanawan, o viniyonan man sona buyavin. Misinak.

²¹ "Peinan nagwadien ivnivins Moses nakaleiwag Sdad katanok katanok, vena babaw wasigeis. E, vena babaw sisinagog wasigeis tageiguyis ivinis Moses nakaleiwag, igeiguyis."

Kaleiwag towen ikawes inawes Antiyok

²² Takaweins livanen Yeisuw, sisiyas tayakelesiys situwavek, sisiyas tayakelesiysa babaw, idokes bikayabes sigamag mwasanin, sisy Pawl o Banabas bikawes silet binawes Antiyok. E, ikayabes tayakelesiys guyawaw asteiy, teitan Yudas, yagan kwayuwein Basabas, tayuwein yagan Saylas.

²³ Let towen nikawes nakalelel mamagina:

"Kalin nuwem budimayas yakamiy, Antiyok gimgilis, o Siliy gimgilis, o Silisy gimgilis, tobwag ven gimgilis tayakelesiys yakamiy. Yakamey takaweins livanen daGuyaws Yeisuw, simayas tayakelesiys situwavek ven Yelusalem waseg.

²⁴ "O peinan nakaligen simayas mwasanin bo ivages moumouvit wasigeis yakamiy, o ibol ninoumiy yakamiy asilivan waseg. O yakamey nag kakayabes tasiyas, nag; ninousa tasiyas niweis.

²⁵⁻²⁶ "Mapuna ninom yakamey bo katanok-wan vagan bakakayeb tawaw mwasanin biwekeimiy, sisiyas Banabas son Pawl. O yakamiy o yakamey, babaw yakids ikalin nuwads tawaw tasiyas Banabas son Pawl, peinan tuta babaw inounas abkanig waseg, daGuyaws Yeisuw Kelis silmanin.

²⁷ "Mapuna nakakayabes Yudas son Saylas, biwekeimiy, mo bidibakeimiy mawana nakalel malet towen waseg.

²⁸⁻²⁹ "O simey Yowbad Kululuwan kadok kid nag kweitan kaleiwag moumouvit bakasekeimiy; tage kadiloka kupiyaves kalbaleb sinap tasiyas, viniyonan man nimgwavis silmanin tobwag yowbad, o buyav, o viniyonan man bo niskwen kayon neimat nanawan, o makava kanavay.

"Magat bukuvnases kaleiwag towen bo bukusesusa bwein, bukutawtouns.

Taneimiyo."

³⁰ Bo itanouys, mo inounas, ineis Antiyok. Tayakelesiys babaw ikatuyouns imeis, mo isekes silet towen.

³¹ Ivinis let towen, bo imwasaws, peinan bo ikambuvic ninous, bo idumwal.

³²⁻³³ O Yudas son Saylas, peinan palopit tasiyas, asilivan babaw wasigeis mo igeiguyis tayakelesiys wasigeis, mapuna itawtouns. Nisesus sisiyas ee... imwemway-nen; mo imulouls wasigeis, itanouys, iyums, inekes tayakelesiys tasiyas kweiboug nikayabes niweis. ³⁴ (-)

³⁵ Pawl son Banabas sisiy tageiguyis mwasanin, nisesus Antiyok, illivans livanen Yeisuw, o Yowbad anilivan bwanabwein ikitimlakays.

Banabas ilisow Pawl

³⁶ Yam mwasanin ikous, Pawl mo idibek Banabas, ilana, "Kum, taneis, takines tayakelesiys vena babaw, kweiboug-o nitaguyes livanen Yeisuw; mo bitakin amawan sikasis."

³⁷ Banabas itam, ilana, "Bwein;" ilana, "Adok sod Yon bitanounas." Yon yagan kwayuwein Mak.

³⁸ Pawl ipiyev, ilana, “Nag, peinan kweiboug nilisaweid ven Pampiliy waseg, ipiyev dawotet, iyum. Nag kadilok sod bitanoun. Bweina bises.”

³⁹ Mapuna ikamnimans. Bənabas son Mak mo ilisawes Pawl, ikuks ineis Saypilos.

⁴⁰⁻⁴¹ Tage Pawl idow Saylas; tayakelesiys initougs waseg Yowbad, sivines kid Yowbad bilabes tasiyas asteiy mo inounas, ikanpeles Siliy o Silisiy, vena babaw wasigeis ilabes tayakelesiys, vagan kid bitawtouns.

16

Timotiy inekes Pawl son Saylas

¹ E, isaps Dəbiy, ikanpeles, mo ineis Lisitil. Ven townen waseg mo ibanes taw teitan, kweiboug-o niligen livənen Yeisuw. Mtowen yagan Timotiy, inan vinen-Yudiy, isimounid Yeisuw waseg; taman gog guma-Gilis.

² Tayakelesiys ven Lisitil waseg o Ikonyam waseg idokes kid Timotiy singay tadidumwal.

³ Pawl sivinan taw townen sisiy bineis, mapuna ibob momwan, magina Ebelam nakabivatus; peinan gamag babaw ikakins Timotiy taman guma-Gilis; o peinan min-Yudiy babaw nisesus ven townen, o Pawl nag ivag sivinan tasiyas bivtokes livan, mapuna mtowen Timotiy ibob momwan.

⁴ Igawa ikaninapels ven katanok katanok wasigeis, mo ikatpeles sikaleiwag isekes, kweiboug nikalawages Yelusalem waseg. Tasiyas takaweins livənen Yeisuw, o tayakelesiys situwaveks, isekes sikaleiwag, ilansa, “Kadiloka kuvnases.”

⁵ Mapuna tayakelesiys iyamweis sisimounid; o Yam katanok katanok ikatimweisis, mo ibabaws.

⁶ Ikanpeles ven avakaein Piligi, ikous mo ikanpeles ven avakaein Galetiy. Yowbad Kululuwan mo isilbwades, awoum bisekes asilivan min-Esiy wasigeis.

⁷ Wankuyeim mo ineis Misiy, sivines kid bineis Bitiniy; iyokonsa, nag; peinan nag beitam Kululuwan Yeisuw.

⁸ Misiy ikanpeles ikous, mo iwloubus ineis Tilowas.

⁹ O boug waseg, Pawl matan isisawl mav, magina ikamikon, ikintuwen ikin wəyol ikin gum-Masidoniitamanaw iton palatan, ilana, “Kudopel kum wamaven Masidoni, kulabem yakamey.”

¹⁰ Pawl ikikin ikous; bo ikatimamal, sivinan kid bidopel bein Masidoni; kadok kid Yowbad nidawem bakan bakasekes tasiyas livənen Yeisuw. Ninom katanok-wan.

Lidiy iyakelesiy

¹¹ Kakilev Tilowas, kadumwala kan Samotiles kamasis; neiyam nen kəkuk ee... kəlug Niyapolis.

¹² Niyapolis waseg kabus kan Pilipay, ven townen wunovek wawnuwan Masedoniy; mina-Lom babaw o mina-Lom sitakanaviy babaw nisesus ven townen waseg. Yam mwasanin kasesuna ven townen.

¹³ Sədad waseg kadoki gamag mwasanin ininitougs o ititapwəloul Yowbad waseg wadadan lay kweitan; mapuna kasap adunan ked kan lay townen, kawekes vinay mwasanin, kakaypul simayas; kallivan.

¹⁴ Guyouvin nətan yagan Lidiy, vinen-Tayatil, taymayisein kweim bwabwel, tutababaw nititapwəloul Yowbad waseg; e, manəwen mo iligen amalivan. Peinan Yowbad bo ikatiboug nuwan vagan biligen kid Pawl anilivan.

¹⁵ Peinan iligen livənen Yeisuw, mo nakabaptyses Lidiy sen angamag. Ikous, Lidiy mo idibakem ilana, “Magat bukudokeig nasimounid yeys daGuyaws waseg, kadiloka kumeis wagunbunatum, agubwabwal yakamiy.” Ivvalut ee... mo kətam.

Imapumas wədeil ven Pilipay waseg

¹⁶ Yatam Yam nakan tapw_{aloul} silm_{anin}, kaninoun ee... mo ilivatum nukubukwab n_{atan}, kululuwan waseg ikatigigik aveiyag igaw bikamat, o nawotet maysan singay avakaein ikawes taliven.

¹⁷ Vin n_{awen} ikabkunim yakamey simey Pawl, iwkuwak, ilana, "Yowbad Tatawtoun nagamag tasiyas; tasiyas ikatimlakeids ked towen waseg Yowbad bo bikatinabweids."

¹⁸ Nawkuwak anilivan m_{awana} Yam babaw. Mapuna igeg nanon Pawl, itouvin, idibek yeiluw towen, ilana, "Akalawageim wayagan Yeisuw Kelis, kulisow man_{awen} vin, kunoun." Mitiyamun towen yeiluw mo inoun.

¹⁹ Vin man_{awen} taliven ikakins bo iyakous wawun simoney, igeg ninous, iyousis Pawl son Saylas, ibiteilis tasiyas ineis wavytakon ven v_{agan} kid biyateles wamtes tasiyas takaliwageins ven.

²⁰⁻²¹ E, itokes, inawes takalleiwags wasigeis; ilansa, "Min-Yudiy tasiyas kalbaleb sinap ivages wadavanuys, peinan sivines kid bisekemas sinap kweitan, o asisinap towen bwaboum wasigeis yakamey mina-Lom."

²² Gamag babaw mo ilabes, sivines kid biyagages Pawl son Saylas. Takaleiwags mo ilansa, "Kunisis asikweim, mo kuweiys amweilok waseg."

²³ Iwaways avakaein wawous; ikous, mo ikalabus, idibakes takaymatein deil ilansa, "Kukwaymates tasiyas beibwein. Awoum bisaps bineis watoulan."

²⁴ Towen iligen, isenas w_{adeil} bunatum tawtoun waseg, ilokes kikeis amweilok akiy wanuwein; ta-m_{awan} biyaganis kikeis.

²⁵ Watapwan boug Pawl son Saylas ikululs wamatan Yowbad, initougs waseg, ikan-nuwels asiwous. Tasiwuns deil mwasanin ikatilutegs.

²⁶ Mo ivag nik avakaein, kakolan bunatum dakul igogewns-wan; koukweda babaw ikaliyowes, o sen o amweilok niyousis tasiwuns deil nimes o kikeis bo ipalpaleiks o itigttagut ikous.

²⁷ Takaymatein deil mo ilaktukit, ikin koukweda babaw bo ikaliyowes, idok kid bo isawls tasiwuns deil babaw; igeg nanon, ikow napulut tanmunum v_{agan} kid bibes nipowun tatonen, beimat.

²⁸ Pawl ikin, aygan avakaein ivag, ilana, "Awoum kuygageim toneim yak. Yakamey-yaya, amababaw-wan."

²⁹ Takaymatein deil idow teitan bimey lamp; mo ikow, isawl, isiw wanuwan deil, itatat won, ikulul wamtes Pawl son Saylas.

³⁰ Wankuyeim mo itokes ineis wamnat, ilana, "Adok guntuw_{avek} yakamiy, kadiloka kudibakeigs aveiyag bavag silm_{anin} kid Yowbad bikatinabweig."

³¹ Ilansa, "Kadiloka kusimounid daGuyaws Yeisuw waseg, mo bikatinabweimiy simwey amgwamag."

³² Mo idibakes tasiyas livanen Guyaw Kelis, siney gamaga babaw nisesus wanbunatum.

³³ Mitiyamun towen boug waseg, tanuwagon deil ikow yevagam, buyavis wawous itawis. Ikous, mo ibaptyses sen nagamag.

³⁴ Ibaptyses ikous, mo isiws wanbunatum, kaeis isekes, ikams, peinan imw_{asaws} avakaein sineya-wan angamag; livanen Yowbad niliganes.

Ikous, mo iyums ineis w_{adeil}.

³⁵ Iyam nen gaboug takaliwageins ven mo ikayabes sipilismans ineis w_{adeil}, ilansa, "Kulavewas tasiyas asteiy, bineis."

³⁶ Tanuwagon deil ikow asilivan towen, isek Pawl, ilana, "Takalawageins ven bo ikayabeimiy bukunounas. Bweinabeitout ninoumiy, kuneis."

³⁷ Pawl idibakes, ilana, "O yakamey mina-Lom yakamey; bo iwemas wamtes gamag babaw nov, o nag iyatelemas v_{agan} bikakins amasinap aveiyag kalbaleb. Makaw isenamas w_{adeil}; nagein gog bikakiws asimwasin, bikawumemas mo bikayabemas. Kapiyev. Bakasesuna. Kadiloka tasiyas bimeis bitokemas bakan wamnat, mo bikayabemas."

³⁸ Tasiyas pilismans mo inekes takaliwageins ven; asilivan ikatpeles isekes. Kweiboug nag bikakins Pawl o Saylas mina-Lom tasiyas; e, tut towen mo ikakins, asimwasin seikwan.

³⁹ Aspwayat inekes Pawl son Saylas, asilivan siwayoub, mo itokes ineis wamnat, ikayabes bineis kid kweitan ven.

⁴⁰ Ilisawes deil mo inekes Lidiy, inekes tayakelesiys, iguyes, mo itanouys, inounas, ineis.

17

Moumouvit ilivatus ven Tesalonik waseg

¹ Inounas mo isaps Ampipol; ilisawes Ampipol mo ineis Apoloni; ilisawes Apoloni mo ineis Tesalonik. Min-Yudiy sibuntuman tapwəloul yagan sinagog nises Tesalonik.

²⁻³ Mawan ansinap vena babaw waseg, Pawl mo isiw wanuwan sinagog ikatimlakes silawun Bukitab. Kweitoun Sədad waseg ikatiboug nuwes min-Yudiy tasiyas. Isekes ninous mawan; ilana, “Kadiloka gamag biyagages Kelis, bikanig, mo beikit vayuwein. Livānen nises Bukitab waseg, bo mawan. Silawun gunkatimlakay Yeisuw, mtowen mounid Kelis.”

⁴ Pawl ivvalut ee... mo isimounids mwasinis gamag, mapuna ikatuvases sisiyas Pawl son Saylas; mina-Gilis-vak tavnaſeins Yowbad isimounids singaya babaw, sisiyas guyvinays mwasanin.

⁵ Tage min-Yudiy mwasanin bo ikameiliws, ivtokes livan. O mwasanin tasiyas tabgumats bo iliganes asilivan, ikatuyouns gamag babaw, sivines kid bikawpwanaws wasigeis Yeisuw nagamag, ineis Yeson wanbunatum, iwkuwaksa; ilansa, “Kadilok tasiyas Pawl son Saylas bimeis wamnat.” Peinan min-Yudiy ninous bo biyagages Pawl son Saylas.

⁶⁻⁷ Iyyokons, bo nag; mapuna itokes Yeson siney Yeisuw nagamag mwasanin, inawes takaliwageins ven wamtes, iwkuwaks, ilansa, “Gamag tasiyas niyagages vena babaw, nagein mo imeis wadavanuys yakids, Yeson anbwabwal tasiyas nisesus. Tawaw tasiyas bo ibwabwes Sisal nakaleiwag, peinan ilansa, ‘King kweitan nises, yagan Yeisuw.’”

⁸⁻⁹ Gamag babaw iliganes livan towen, mo igege ninous, sisiyas takaliwageins ven; mapuna idibakes, ilansa, “Yakamiy simiy Yeson kadiloka kupayins, money mwasanin kusekemas, mo kunounas. Igaw kukin bukusesusa bwein, o nag kweitan sinap bukuvages mawan kalbaleb sinap towen, igaw tut wanakoug mo bakayamen mimoney.”

Takaweins livānen Yeisuw ineis Belyo

¹⁰ Yeisuw nagamag ikitimāmals, boug waseg ikayabes Pawl son Saylas, bineis Belyo. Isaps Belyo mo ineis wasinagog, isiws wanuwan, livānen Yeisuw mo isekes min-Yudiy tasiyas.

¹¹ E, tasiyas asisinap bwein, nag mawan min-Yudiy tasiyas nisesus Tesalonik; bo iseit nuwes Pawl anilivan towen sivines binganegs-wan; e, yam babaw ivnivins Bukitab vagan bikakins kid livan towen mounid, o nag, yaweid.

¹² Babaw gamag mo isimounids, sisiyas vinay-nen Gilis guyvinays, sisiyas tawaw mwasanin.

¹³ Wankuyeim min-Yudiy tasiyas nisesus Tesalonik mo iliganes Pawl nises Belyo igeiguy livānen Yowbad; mapuna inounas imeis Belyo, ivtokes livan, vagan beivag aspwayat gamaga babaw, mo bikamliwes towen Pawl.

¹⁴ Mapuna Yeisuw nagamag tayakelesiys ven towen mo ikitimāmals ikayabes Pawl biwloubus kid bein wayol. Tage Saylas son Timotiy nisesusa ven towen Belyo.

¹⁵ Gamag mwasanin itokes Pawl, itouws wāwag, ikuks, ineis Atens; Pawl mo idibakes tasiyas, ilana, “Kuyums kuneis kukines Saylas son Timotiy nuwanaw bimekeigs,” mo iyums ineis Belyo.

Pawl nises ven towen Atens

¹⁶ Pawl, igawa nises Atens ikaymatest Saylas son Timotiy bimeis; bo igeeg nanon peinan ikinas tasiyas taginvens singay imgamegs. O babaw siyowbad tobwag wasigeis ikululs wamtes.

¹⁷ Mapuna yam babaw Pawl mo isen kweitan livan, Yowbad livānen, min-Yudiy sisinagog waseg, o tavnaseins Yowbad wasigeis, o gamag mwasanin ilivatus wavytakon ven, igeiguy wasigeis.

¹⁸ Tassinaps mwasanin tasiyas Epikul sisiyas tasiyas Sitowik illivans sisiy Pawl. Mwasanin iliganes, ilansa, “Taw towen, makava illivan. Aveiyag illivan?” Mwasanin gog ilansa, “Livānen kweitan ven siyowbad illivan.” peinan Pawl anilivan Yeisuw inakanig silmanin o neikit vayuwein.

¹⁹⁻²⁰ Mapuna itokes Pawl inawes buntuman Konsel waseg, yagan Aliyopag, ilansa, “Tabta bukwatimlakes amsinap towen kweivaw, towen nukulivan wasigeis gamaga babaw; kadok kid youd kweitan towen isowsiw watigem yakamey. Sivinem gog bakakakin silawun sinap towen.”

²¹ Peinan min-Atens sisiyas asibwabwal tuta babaw sivines bikatilutegs youd kweivaw, o livānen youd kweivaw billivans sisiyas; mapuna tuta babaw inineivs sinap kweivaw.

²²⁻²³ Pawl mo itamanaw wakabgeiguy bunatum Aliyopag wanawan, ilivan. Ilana, “Min-Atens yakamiy, bo akin singay tamgamegs yakamiy. Bo atāvin miven akikinenew wuliyoungwan tapwaloul, bo aban abeilun kweitan. Lelel-nen mamagina, ‘Silmanin yowbad tamtawas.’ Yakamiy nag kukwakins Yowbad towen nukululs wamatian, yey mo bakatimlakeimiy yagan towenan.

²⁴ “Yowbad towen bo ibun youda babaw, o peinan towen tanuwagan libalab, o ven watinow, nag bimasis wabunatum towen tawlules wanamads; nag.

²⁵ “O nag ivag sivinan aveiyag namads biwtel silmanin towen, peinan bo nisekeids damwamovs o kululuwads, o dawliyous babaw-wan.

²⁶ “O tabuds anmwanet-wan Adam waseg, bo ibunids, nitamlavags vena babaw gimgilis wadaban pwepway. Bo ikaleiwag idatuts, o dakablivis pwepway ven katanok katanok wasigeis.

²⁷ “O bo ikaleiwag vagan kid bitaneves mtowen Yowbad; igaw takinew mo bitaban, peinan kadirakus nises wasigeis yakids katanok katanok.

²⁸ “Mtowen waseg tamwamovs, taninounas, tasesus. Mawan tawutun wous nilivan wasigeis yakamiy,

‘Peinan yakids Yowbad tibun yakids.’

²⁹ “E, peinan Yowbad tabuds yakids, awoum bitanuways Yowbad kid mawana goul o silib o dakul, o aveiyag gamag teitan binuway mo bibun wanaman, nag.

³⁰⁻³¹ “O Yowbad gog inumlev tut kweiboug dadub; tut gog towen ikaleiwag vena babaw gimgilis vagan bikanavin ninous, peinan nikatigik tutan katukin wanakougwaw, yam towen bo bikatukin gamag babaw wasigeis, amtowen bwein, amtowen kalbaleb; e, teitan taw bo itamnow, takaleiwag tatonen. Kakakin anilivan mounid, peinan taw towen nikanig, Yowbad ivag mo ikit vayuwein.”

³² Ikatiliganes livānen dakabeikits kanig waseg, mwasanin mo igigs peinan nag isimounids; mwasanin gog ilansa, “Igaw, kweitan tut mo bukuwgavaw amlivan towen vagan bakaligen.”

³³⁻³⁴ Pawl iligen asilivan, mo ilisawes, inoun. Mwasanin gamag bo isimounids anilivan waseg, mo ikatuvese sisiy Pawl, teitan Diyonisiy, mtowen takaleiwag teitan bunatum Aliyopag waseg, nañan Damalis, sisiyas mwasinis gamag.

bilisawes naven towen Lom, mapuna ilisow Ital^y; e, mwana nimeis Kolinit son nakw^a Piliskil.

³ Town nawotet, ikow man kulivis mo ibsibas ivag bunatum. O peinan Pawl ikakin sinap towen, mo inekes, sisiy nisesus, iwwotets.

⁴ Tapw^{al}oul waseg, S^{ad}ad katanok katanok illivans siney Min-Yudiy, o mina-Gilis, isimkakin vagan bisimounids waseg Yeisuw.

⁵ Wankuyeim Saylas son Timotiy meinoy nimeis Masidoni^y isaps Kolinit, igawa Pawl ivvalut wotet towen, ikatimlakes min-Yudiy v^agan bikakins beibwein mtown Yeisuw mounid Kelis.

⁶ Wankuyeim tasiyas mo ipiyaves Pawl anilivan, itawyages, asilivan kalbaleb waseg; mapuna ikatsap anakweim v^agan bikakins bo ipiyaves tasiyas, ilana, “Deis! Peinan kupiyaves livan towen, igaw bukumtamats; takaleiwag yakamiy. Bweina bo batouvin basekes livan towen tobwag ven gimgilis, v^agan bo biliganes.”

⁷ Ikous, mo ilisawes, isiw wanbunatum tavna^{se}in Yowbad teitan, yagan Titos Yusitos, nabunatum nises sinagog wadadan.

⁸ Tanuwagan sinagog, yagan Kili^sip, bo iliganes livanen Guyaw Yeisuw, sen angamags babaw; o min-Kolinit babaw bo iliganes, mo ibaptayses.

⁹⁻¹⁰ Kweitan tut, boug waseg, Pawl immasis, anmikon waseg mo ikin naguyaw Yeisuw, ilana, “Pawl, awoum beivag ampwayat, kusimkakin livaneig waseg; awoum kukwapay, peinan agugwamag namagleis nisesus ven towen. Ta-kweitan gamag beiweim o biyageim, peinan soum yey tases.”

¹¹ Mapuna Pawl isesuna katanok bweilim ikous, mo tibukon kweinim katanok. Misumkwey towen waseg ikatimlakes ven towen gimgilis v^agan kid bikakins livanen Yowbad.

¹²⁻¹³ Mitiyamun towen, min-Akay sigabman avakaein, yagan Galiyon, nises ven towen. Min-Yudiy ninous katanok-wan mo itamanaws iyousis Pawl itokes inawes Galiyon wankabkaleiwag, aban towen wamat^an, ilansa, “Taw towen sivinan bibob dakaleiwags, ikatimlakay tobwag tapw^{al}oul v^agan bitateiy gamag ninous.”

¹⁴⁻¹⁵ Pawl sivinan bisilamaw anilivan, tage Galiyon mo idibakes min-Yudiy tasiyas, ilana, “Min-Yudiy yakamiy, magat towen ansinap kalbaleb, o magat biyageg son, bweina baligen amilivan; o peinan sinap towen yakamiyana amisinap, sinapun imiven, o livanen imiven, kadiloka yakamiyana bukwaleiwags; yey apiyev.”

¹⁶ Ilivan m^awan, mo ikayabes, ilisawes nakabkaleiwag towen.

¹⁷ Gamag babaw mo iyousis tanuwagan sinagog yagan Sositen, iwaways-wan kabkaleiwag towen wamat^an; tage Galiyon nag ige^ag nanon sinap towen waseg.

Pawl iyum in Antiyok

¹⁸ Wankuyeim Pawl isesuna ven towen, yam mwasanin. Ikous, mo ilisawes Yeisuw nagamag, itanouys siney Piliskil son Akwil; ikuks, bineis Siliy. Isaps ven Kenikil waseg, Pawl iduy kunun peinan anilivan k^atout Yowbad waseg.

¹⁹ Ikuks ee... ilugs Epesos, Pawl mo ilisawes tasiyas, isiw wanuwan sinagog mo illivans sisiyas min-Yudiy; v^agan bivag ninous bikanavin.

²⁰⁻²¹ Tasiyas mo idibakes Pawl, ilansa, “Kadilok kadiveiyov tut y^akom simey yak tasesus.” Ilana, “Nag; bo banoun. Kukin nanon Yowbad m^awan, igaw mo bayum bam.” Mo itouw wawag, ikuks, itanes min-Epesos.

²² Ilugs Sisaliy, ikatulag in Yelusalem, imulouls siney tasiyas tayakelesiys; mo inoun in Antiyok.

²³ Isesuna yam mwasanin waseg; ikous, mo inoun ilakwanes tayakelesiys ven katanok katanok wasigeis; isilamaw ven katanok katanok wawnuwan ven Galetiy; iyakous, mo ikanapel in ilakwanes ven katanok katanok wawnuwan Piligi; ilabes tayakelesiys v^agan kid bitawtouns.

Apolos igeiguy ven Epesos waseg

²⁴ Gum-Yudiy tassinap teitan mo isap Epesos, towen yagan Apolos, naven Aleksanidel, singay ikakin Bukitab, o itawtoun geiguy waseg.

²⁵ Kweiboug mwasanin gamag bo ikatimlakes, mapuna ikakin Yowbad inaked. E, bo iseiw nuwan livanen Yeisuw bilivan, anilivan mounid-wan. Ikatimlakes gamag mwasanin anilivan towen. E, ikakin sinapun tabaptaysein gamag towen Yon. Tage sinapun Yeisuw nag iyakous.

²⁶ Anilivan kamnat mo isilamaw sinagog wanawan. Piliskil son Akwil iliganes, mo idawes im wasibunatum, ikatimlakes Yowbad inaked, mo ikakin bwein.

²⁷⁻²⁸ Iyakous nawotet ven towen, mo ivag sivinan kid bein Akay. Yeisuw nagamag ilivans, “Bwein;” mo ilelels let silmanin ven towen tayakelesiys-nen, vagan bivnases mtownen Apolos, anbwabwal tasiyas. Isap wasiven, mo ikatimweis asisinap tayakelesiys tasiyas. Kweiboug-o Yowbad nilabes mo isimounids Yeisuw waseg, misiyamun towen asisinap mo ikatimweis peinan Apolos ilabes; o anilivan itamap wasigeis min-Yudiy asilivan, peinan anilivan tawtoun waseg ikatimlakes silawun Bukitab, vagan bikakins kid mounid Kelis mtownen Yeisuw.

19

Pawl nawotet ven Epesos waseg

¹⁻² Igaw Apolos nises Kolinit, Pawl ikaninapel ven tasiyas wanawoud. Ikous mo isap Epesos; mo ilivatus Yeisuw nagamag mwasanin; idibakes, ilana, “Nukuliganes livanen Yeisuw, Yowbad Kululuwan Towen Bwanabwein iwekeimiy tan, o nag?” Ikatimapus aygan; ilansa, “Nag. Nag bakaligen livanen Kululuwan Bwanabwein.”

³ Pawl mo ikatugwan; ilana, “Amawan nukubaptays?” Ilansa, “Nakaligen Yon nageiguy, mo ibaptaysem yakamey.”

⁴ Iw to Pawl, ilana, “Yon bo ibaptayseimiy vagan bikanavin ninoumiy, o vagan bukulavewas amisinap kalbaleb, sinap bwanabwein bukuyousis; o Yon nidibakeimiy ilana, ‘Kadiloka bukusimounids waseg mtownen nibkunig ye.’ Anilivan gog livanen Yeisuw.”

⁵ Gamag tasiyas bo iliganes Pawl anilivan, mo ibaptyses Guyaw Yeisuw wayagan.

⁶ Pawl isen naman wawous tasiyas, Yowbad Kululuwan mo inekes, ilivans kaeig kweitan kweitan wasigeis, o ipalopisays Yowbad anilivan waseg ilivnakes.

⁷ Babiweis tawaw tasiyas adok sinawatan teiy.

⁸ Pawl mo isiw wanawan sinagog, anilivan kamnat waseg igigeiguy kweitan tibukon; livanen Yowbad nakaleiwag isekes, vagan kid bisimounids waseg.

⁹ Wankuyeim mwasanin gamag ipiyaves anilivan, ikapidabs, ivtokes livan Yeisuw inaked, e wamtes gamag babaw ivtokays maawan. Mapuna Pawl itokes inagamag ilisawes, isiw wanawan Tilan nabunatum, sikul buntuman, yam katanok katanok mo ikatimlakes gamag.

¹⁰ Nawotet towen niwtel akweiyuna bweilim waseg, min-Esiy babaw-wan mo iliganes livanen Guyaw Yeisuw, min-Yudiy sisiyas mina-Gilis.

¹¹ Yowbad nawotet niwtel Pawl naman waseg. Inawotet kweitan-wan, singay tawtoun.

¹² E, gamag ikawes Pawl anakweim o kweim towen itanob magin waseg, isen takatouns wawous, inimul, mo ibweins, o yeiluw ilisawes mwasanin gamag mo ibweins.

¹³⁻¹⁴ Min-Yudiy tamgameg mwasinis mo isaps, iyokons kid bikayabes yeiluw, Yeisuw yagan waseg. Tasiyas ininounas vena babaw ikikayabes yeiluw; maysan wotet towen ikokews. Tawaw tenim teiy, times tanuwagan lun avakaein, Sikev yagan; tasiyas iyokons kid bikayabes yeiluw, Yeisuw yagan waseg; ilansa, “Kadibakeimiy Yeisuw wayagan kunounas; yeg towen Yeisuw, Pawl nikavvatag waseg.”

¹⁵ Yeiluw towen ikatimop asilivan, ilana, “Akakin Yeisuw, akakin Pawl, tage yakamiy kalisiy yakamiy?”

¹⁶ Takayeiluw towen mo ipel iwawaysa mav tasiyas, itawtoun wasigeis, ikididul wous ibuybuyav-wan; mapuna sona mwadiyes mo isawls ineis wamnat, aspwayat nag bikakit vagan.

¹⁷ Min-Epesos babaw iliganes youd towen, mo ivag aspwayat, tasiyas min-Yudiy sisiyas mina-Gilis misikes Epesos. Mapuna mo igoulus mtowen Guyaw Yeisuw.

¹⁸ Babaw gamag tasiyas mwana niliganes livanen Yeisuw mo ikamteles asisinap kweiboug dadub waseg.

¹⁹ O tamgamegs babaw simeg nileles nein wasibuk, nimeyes sibuk maynsiyas, mo igabus wamtes gamaga babaw. Maysan buk tasiyas ivinis, singay avakaein, sinawanim tawsan kina.

²⁰ Wotet babaw waseg livanen Yeisuw mo itawtoun, gamaga babaw o sinap babaw wasigeis.

Min-Epesos ikawpwawanaws

²¹ Wotet towen ikous, Kululuwan Teiwen Bwanabwein mo isek nanon Pawl, ilana, “Singay sivinag batavin Masidoni o Akay, mo ban Yelusalem. Wankuyeim gog mo banoun ban Lom.”

²² Mapuna ikayabes natouwat asteiy, ineis Masidoni, yiges Timotiy son Elasit. Town gog Pawl isesuna Esiy tut kayakus waseg.

²³ Misiyamun towen, gamaga babaw inoyes Yeisuw inaked, mapuna ven towen Epesos imgilis mo ilivatus moumouvita singay.

²⁴ E, takatanak teitan yagan Dimitil, mtowen tawtelein didawag silib, ibwabubs sen nagamag; biyakousis, mo bimeis gamaga babaw bigimwals; bikawes binawes vagan simeg bidagis wanuwan didawag towen; imgamegs silmanin siyowbad nañan yagan Dayan, vagan kid bilabes. Didawag tasiyas singay kawkawek mayses.

²⁵ O gamag babaw inganegs Pawl anilivan, mo ipiyaves meg silmanin nañen Dayan; mapuna Dimitil idawes nagamag sisiyas takatanaks babaw; ikatuyouns imeis, Dimitil mo ilwon; ilana, “Tawaw, kukwakins dawotets towen waseg kads tabanes vagan bitakams.

²⁶ “O kukwakins Epesos imgilis, o imgilis ven tasiyas Esiy wawnuwan, bo iliganes aygan Pawl, mo ipiyaves adgeileiws tatoneids, peinan Pawl anilivan mañana, ‘Yowbad tasiyas kubunis wanimamii, yowbad tobwag tasiyas.’

²⁷ “Adok tut kalbaleb bitalivatus; peinan gamag bipiyaves Dayan navavag tasiyas tabunins; o dayowbads avakaein nañen bidokes tobwag yowbad, bipiyaves kid nabunatum; mo biyakous yakawan manawen Dayan. Bo igak, peinan babaw yakids takululs-wan wamatian Dayan, min-Esiy yakids, o imgilis vena babaw wadaban pwepway.”

²⁸ Iliganes, mo ikavikuns avakaein, iwkuwaks, ilansa, “Min-Epesos yakids dayowbads Dayan, manawen singay natawtoun.”

²⁹ Wankuyeim gamaga babaw ven towen waseg mo islamaws wak, makava ikawnweins, mamagina takabalaweweins tasiyas. Wankuyeim babaw gamag mo isawls, iyousis min-Masidoni tasiyas Gayus son Alistak, mo ibiteilis inawes buntuman kaleiwag waseg. Kweiboug tasiyas sisiy Pawl nimeis wañed.

³⁰ Pawl sivinan beisiw bein buntuman kaleiwag wanuwan, tage tayakelesiys bo isilbwades.

³¹ Tasiyas guyawun Esiy mwasanin, kweiboug-o nisiwayoubs waseg Pawl, tasiyas mo ikayabes sigamag vagan kid bidibakes Pawl, ilansa, “Awoum yakoum bukun buntuman kaleiwag wanuwan; awoum!”

³² Gamag babaw, asilivan kweitan iwkuwaks, ta-kal biligen; o babaw gamag nag ikakins aveiyag wawun ikatuyouns nimeis, iwkuwaksa mav.

³³ Min-Yudiy mo idibakes Alekisan, ilansa, “Kulivan vagan babaw gamag bikakins yakamey ta-ivag silawun sinap towen;” gamag babaw mo iyabinis towen Alekisan, in wamtes gamag babaw, itamnow naman vagan bikapays, mo bilivan.

³⁴ Gamaga babaw ikakins gum-Yudiy towen, mo iwaks, ages ikobobt-wan, akweiy veit waseg iwkuwaks, ilansa, “Min-Epesos yakids daguyaws Dayan, manawen singay natawtoun.”

³⁵ Tanuwagan ven isap, mo ikatitun sikawnawein, ilana, “Min-Epesos yakamiy, vena babaw imgilis ikakins davanuys bulagan peinan yakids tamtakavateins nabunatum

dayowbads avakaein Dayan, sona nadakul nises, kweiboug-o meinoy neim libalab nikalivatow neim watinow.

³⁶ “Peinan youd tasiyas mounid, nag kadilok teitan gamag bisen kweitan livan, nag. E, kadilokena kukwapays kusesus, peinan nag aveiyag bivag, nag. Awoum kuwkuwaks, o kwawnaweinsa mav, awoum.

³⁷ “Gamag tasiyas nukumeyes nag ineis iveinaws Dayan wanbunatum; nag ivtokes livan dayowbads manawen, nag.

³⁸ “Magat Dimitil sivinan biyatel teitan gamag, o magat takatanaks yakamiy simiy Dimitil sivnamiy bukuyateles teitan gamag, yatal nises, o gabman nisesus; kadiloka bukuyateles simiy, gabman mo bikaleiwags.

³⁹ “Kukin bikabwag sikaleiwag tasiyas gabmans, igaw tutan gamag babaw bikatuyouns bimeis, mo babawa gamag bikaleiwags sinap towen silmanin.

⁴⁰ “Nag ivag silawun sinap towen nagein kwawnaweinsa mav. Magat daguyaws avakaein biligen, mo bikatiganeids, nag kweitan livan nises waseg yakids vagan bitakatimapus anilivan; moumouvit mo bitalivatus. Kadiloka kunounas kuneis wamibunatum tatineimi.” Iliganes, mo inounas, ineis wasibunatum. ⁴¹ (-)

20

Pawl in Masidoni mo inoun in Gilis

¹ Bo iyakousis asisinap to nikawnaweins mav; nag ivag kweitan kawnawein, nag ivag kweitan tamwageg, nag. Bo ikous. Pawl mo idawes ven towen tayakelesiys-nen, iguyes tasiyas, imulouls siney, mo inoun in Masidoni.

² Itavon ven tasiyas Masidoni wawnuwan; anilivan babaw igeiguy wasigeis, mo inoun in Gilis.

³⁻⁴ Isesuna ee... kweitoun tibukon, min-Yudiy mo asisinap ikitilawos sivines kid beiweiys Pawl. Misiyamun towen Pawl nanon ivag bo beikuk bein Siliy; mo iligen livanen asisinap kalbaleb, mapuna ikanavin nanon, mo inounas waked, ikanapels Masidoni, siney gum-Beloy teitan, Pilos natun yagan Sopetal, sisay min-Tesalonik asteiy, Alisitak son Sikanid; sisayas gum-Dabiy yagan Gayus son Timotiy, sisayas min-Esiy tasiyas Tikikos son Tilopim.

⁵ Tasiyas imgwayemas, mo ikaymatemas ven Tilowas waseg.

⁶ Ikous sagal to nag bitakams bled son yist, mo katouw ven Pilipay waseg, kakuk ee... Yam kweinim ikous mo kālug Tilowas, mo kanekes tasiyas; kases simayas katanok wik.

Pawl itanouy min-Tilowas wasigeis

⁷ Wik kweitan nakabsilamaw, Sabat waseg, kakatuyoun nakam, vagan bakakiv bled bakākam, māwan Yeisuw nakaleiwag. Pawl mo iguyes tasiyas; o peinan bo binoun nubweig, singay iveiyov anilivan wasigeis tasiyas.

⁸ Mabunatum wanakaew, o imalamp babaw wabunatum towen.

⁹ Watapwan boug, Pawl igawa illivan; tawlat teitan yagan Yutikos isin wasintaboul, matan inanup; o Pawl igawa illivan, taw towen imasis kangagay, mo ikalouw bunatum kastounun waseg, in watinow. Gamag ineis watinow, ikines imasis, inupes bo imat.

¹⁰ Pawl ibus, ibasin kitatun, mo iwliboub wāwon taw towen, ilivan, idibakes gamag, ilana, “Awoum bigeg ninoumiy; mwamovan nises.”

¹¹⁻¹² Pawl imwen in wanakaew, sinsiney mo ikivis bled ikams, illivans ee... walalayis mo inoun in. Gwad towen itokes inawes wanbunatum, imwāsaws seikwan, peinan sona mwamovan.

Ikuks ineis Milit

¹³ Yakamey nakan nakatouw wawag, nakakuk silmanin Asos vagan bakakayamat Pawl ven towen waseg; towen gog sivinan kid beinoy wāked, o nidibakem māwan.

¹⁴ E, imekem Asos waseg, simey towen nakakuk nakan Mitilin.

¹⁵ Neiyam nen mo kākul kan Kiyo walasin; neiyam nen mo kasap Samos; neiyam nen mo kālug Milit.

¹⁶ Nakakalipouy Epesos peinan nanon Pawl bo mawan; nag ivag sivinan yam babaw bisesuna Esiy, ikatimamal nuwanaw kid bisap Yelusalem, silmanin Kaltuwon anayam mo bilouvat Yelusalem waseg.

Pawl iguyes tayakelesiys situwaveks Epesos

¹⁷ Ven Milit waseg Pawl idawes min-Epesos tayakelesiys situwaveks bimeis.

¹⁸ Isaps mo idibakes mamagina, “Kukwakinsa agusinap tuta babaw nases wasigeis yakamiy. Wanmugwana asap Esiy waseg nukukineigs ee... bweilima babaw agusinap bo mawan-wan.

¹⁹ “Nawtotet daGuyaws nawtotet, ta-akaypom sinap; tut babaw nanoug igeg, navvalam-wan, o min-Yudiy tut babaw biyagegeigs kid, abag nivages singaya igeg.

²⁰ “Nag akayus agulivan wasigeis yakamiy, nag. Ivag sivinag balabeimiy; babaw bo asekeimiy, bo akatimlakeimiy buntuman tapwaloul waseg o wamibunatum-vak tatineimiy.

²¹ “O min-Yudiy bo adibakeimiy, o mina-Gilis bo adibakeimiy, alana, ‘Kadiloka bikanavin ninoumiy, bukunekes Yowbad, o bukusimounids daGuyaws Yeisuw waseg.’

²²⁻²³ “Tut gog towen Yowbad Kululuwan bo isimkineig ban kid Yelusalem. Nag akakin aveiyag balouvat ven towen waseg; deisa vena babaw wasigeis Kululuwan Townen Bwanabwein ikatimlakeig abag bo bigeg, o bisenags wadeil ven to Yelusalem waseg.’

²⁴ “O peinan daGuyaws Yeisuw nawtotet bo isekeig gunawtotet towen, akokew kid livanen nasiwayoub Yowbad, bassekes kid gamag babaw wasigeis; o nag akayus mwamovag tatoneig; deisa bayakous Yeisuw nawtotet towen.

²⁵ “Kweiboug-o nageiguy aguyeimiy livanen Yowbad nakaleiwag; o nagein gog kamnat akakin-wan nag vayuwein bayum bam bukukines magig, nag.

²⁶⁻²⁷ “Nagein adibakeimiy mounid bo asekeimiy Yowbad anilivan vagan biymoveimiy; nag kweitan akayus, nag akawum, nag. Kukin kavel yak bukupiyev, mo bukukwanig; takaleiwag yakoum.

²⁸ “Kuvnaseimiy yakamiy, o kuvnases Yowbad nagamags, Kululuwan Townen Bwanabwein nisekeimiy miwotet vagan kid bukumtakavates tasiyas; kadiloka kumtakavates Yowbad alen mamagina tayakelesiys tasiyas, peinan bo iyamayises tasiyas buyavon tonen waseg.

²⁹ “Yey bo banoun; akakin-wan takalbalebs mwasanin igaw mo biweis wasigeis yakamiy; biyagages tayakelesiys; o tasiyas magina awuk bulawud, bikapasal nuwes bikananeiys; o tayakelesiys magina sip, mamagina awuk bulawud bigades, bikatimates.

³⁰ “Akakin mwasanin gamag yakamiy igaw bukutamanaws, bukwatidavis tayakelesiys mwasanin, vagan kid bikabkunimiy yakamiy.

³¹ “Kadiloka kuvnaseimiy. Kununuways-wan kweitoun bweilim nases wasigeis yakamiy, adibakeimiy, aguyeimiy katanok katanok yakamiy; iwtawout mitinagig, yam katanok katanok waseg, o boug katanok katanok waseg.

³² “Tut towen nagein kadilok Yowbad bimtakavateimiy, kadiloka kuliganes livanen nasiwayoub wasigeis yakamiy, mo bikatimweis kululuwamiy, bikayuseimiy simiyas yakamey, angamag tonen babaw yakids.

³³ “Kweiboug simiy yey nitasesus, nag apwakit soug namoney o anakweim o nawliyoug; nag.

³⁴ “Kukwakinsa wanamag tatoneig nawtel silmanin kag o gunavavag, o bo awotet vagan bagimwel sigwey sivavag o kaeis tatineis.

³⁵ “Agusinap towen waseg, bo akatimlakeimiy vagan kid bukukwkins bweina bitawots mawan, vagan bitalabes sidayas tasiyas tougweys. Kadiloka kid taninuways daGuyaws Yeisuw anilivan mamagina, ‘Soum bisiwyoubum mo bukumwasaw; tage bukusiwyoub soum bukumwasaw singay avakaein.’”

³⁶ Illivan ikous, mo ikululs siney tasiyas, initoug Yowbad waseg.

³⁷⁻³⁸ Ikous, mo ivalams asibabaw-wan, iwlolibous Pawl wawon, imulouls sisiy. Ivalams avakaein peinan anilivan Pawl mamagina, “Nag yamtan yam bukukines magig, nag.”

Igawa ivvalams mo sisiy Pawl ineis wawag.

21

Pawl ikuk silmanin Yelusalem

¹ Pawl itouw wawag, mo itanouy sineyas wasigeis. Yakamey katanouy, ikous, kakuk, kadumwala Kos. Neiyam nen, mo kan Lods; kakilev Lods mo kan Patal.

² Ven Patal waseg mo kaban wag akitan, kakita bikilev silmanin Pinisiy, mapuna katouw mo kakuk.

³ Kakuk kasisawl ee... mo kaban ven Saypilos, inoy wamakimaw, kasawl mo kan Siliy, kālug ven yagan Tayil vagan wuliyoug babaw wawag beibus bein wanakaew.

⁴ Kanineiv tayakelesiys, kaban mwasanin, mo kasesuna simayas tasiyas katanok wik; o peinan Yowbad Kululuwan ikatimlakes, ikkins-wan igaw min-Yelusalem biyagages kid Pawl, mapuna illivans, “Awoum kun Yelusalem.”

⁵⁻⁶ Bo ikous matut simayas tasiyas mo katamanaw kanoun. O simayas tasiyas, sisiyas sikwasas o nitsiyas, nakan watoulan ven, kabasin kititum wakawalaw kanitoug Yowbad waseg, mo kamuloul simsimeyas tasiyas, katouw wawag, mo katanouy; tasiyas mo iyums ineis wasiven.

⁷ Kakilev Tayil kasisawl ee... mo kālug Pitolimey, kanekes tayakelesiys, kamuloul simayas tasiyas, kases-vak wasibunatum katanok yam.

⁸ Neiyam nen nakatanouy nakaw Sisaliy, mo kāsiw Pilip wanbunatum, anbwabwal yakamey. Mtowen Pilip nawotet igeiguy-wan livan bwanabwein, livānen Yeisuw. Kweiboug-o takaweins livānen Yeisuw nisekes siwotet towen siney tawaw teinim tatanok, ven Yelusalem waseg.

⁹ Nitun nakubukwabs nānim nay; Yowbad nisekes asisinap, mo ilivnakes Yowbad anilivan.

¹⁰⁻¹¹ Kasesun ee... bo imwemway-nen, teitan palopit meinoy neim Yudiy; mtowen yagan Agabous, imekem mo ikow Pawl anpalit iyawen naman o kaken tatonen; ilana, “Yowbad Kululuwan ilivan māwana: Ven Yelusalem waseg min-Yudiy biyawani naman o kaken tanuwagan palit towen, bisilkodes vagan kid tobwag ven gimgilis mo biyagages.”

¹² Kaligen anilivan māwan; simayas tasiyas misikena gimgilis ven towen; yakamey mo kadibek Pawl; kalana, “Awoum kun Yelusalem; bweina kuses.”

¹³ Pawl mo ikatimop agem, ilana, “Awoum kuvalams; māwan bo bigeg nanoug. Nanoug bo atam vagan kid tasiyas biyagageigs, daGuyaws Yeisuw peinan. Bweina biyousigs; bweina bikatimateigs; bwein-wan.”

¹⁴ Tage Pawl nag biligen amalivan, mapuna kasesun-wan, kalana, “Magat Yowbad nanon māwan, bweina bivag.”

¹⁵⁻¹⁶ Ikous, mo kakatunag bakan Yelusalem, simayas tasiyas min-Sisaliy tayakelesiys mwasinis. Tasiyas imgwayemas nakan Mineson wanbunatum, kamasis. Mtowen gum-Saypilos, wanmugwana niligen livānen Yeisuw.

Pawl ilakwen Yemes

¹⁷ Nakasap Yelusalem, tayakelesiys mo ikinemas, singaya imwāsaws pinem.

¹⁸ Neiyam nen simey Pawl mo kanekes Yemes siney tayakelesiys situwāveksa babaw.

¹⁹ Pawl imuloul siney tasiyas ikous, mo ikamtel youd katanok katanok Yowbad niwtel tobwag ven gimgilis wasigeis, peinan Yowbad son Pawl niwteles wotet towen.

²⁰ Iiliganes, iyakawns Yowbad waseg, mo idibakes Pawl; ilansa, “Gwade, adok kukwakin min-Yudiy singay babaw tawsans bo niliganes livānen Yeisuw; tasiyas babaw-wan ivnases bwein Moses nakaleiwag waseg.

²¹ “Bo niliganes livāneim mamagina, ‘Towen Pawl ipiyev Moses nakaleiwag, o ika-timlakes min-Yudiy vena babaw wadaban pwepway, vagan nag bibwabwes momwes nitsiyas, o bipiyaves kid adsinaps kweiboug Moses nisekeids.’

²² “Amāwan bitavkek? Peinan bo biliganes livāneim yak, mwana nukum Yelusalem waseg.

²³⁻²⁴ “Adok kuvag mawan. Tawaw tayakelesiys simayas teivas nisesus; peinan asilivan waseg Yowbad, kakita bo biduyes kunus mo bisiwayoubs Yowbad waseg, mawan Moses nakaleiwag. Kadiloka kuneke simwey tasiyas, kuwidis woumiy, money kusekes vagan beiluns beibwein Yowbad waseg, mo biduyes kunus tasiyas. Gamag babaw bikineimiy simwey tasiyas, mo bikakins livaneim to niliganes kweiboug iyyaweids-wan, peinan nukutam Moses nakaleiwag waseg, o kuvnas nakaleiwag towen.

²⁵ “Makaleiwag wasigeis tobwag ven gimgilis, kalisiy isimounids waseg Yeisuw, nakalel silet nein wasigeis tasiyas, nakakaleiwag vagan kid bipiyaves kan niimgwavis silmanin tobwag yowbad, o buyav, o viniyonan man bo niskwen kayon neimat nanawan; o nag bikanavays mav.”

²⁶ Pawl iligen, itam. Neiyam nen itokes gamag tasiyas, iwidis wous, mo isiw Yowbad wanbunatum, Pawl mo idibek tanuwagan lun; ilana, “Yakamey amalivan Yowbad waseg; yam tasiyas beikous bakaduy kunum, bo bakalun Yowbad waseg, mawan Moses nakaleiwag.”

Iyousis Pawl Yowbad wanbunatum

²⁷⁻²⁸ Asiwik kakita beikous, Pawl sen tawaw tasiyas nisesus Yowbad wanbunatum; min-Yudiy siven Esiy waseg mo ikines, ikabuts gamaga babaw, iyousis Pawl; iwkuwaks; ilansa, “Tawaw, min-Yisleil yakamiy kulabemas. Taw towen tutababaw ikatimlakes vena babaw gimgilis vagan kid bikasigumids yakids, o bikasigumis adsinaps, o Yowbad nabunatum towen. Tut gog towen bo imeyes mina-Gilis, isiws wanuwan Yowbad nabunatum bunawen nikayus silmanin min-Yudiy yakids. Bo igak!”

²⁹ Ilivans mawan peinan kweiboug nikines gum-Epesos towen Tilopim son Pawl nisesus waven; idokes kid Pawl itok taw towen ineis Yowbad wanbunatum.

³⁰ Ven towen gimgilis asibabaw-wan mo isaps, isisawls, ikatuyouns imimeis, iyousis Pawl, ibiteilis Pawl, in watoulan Yowbad nabunatum, awkwedan mo ikatibagus.

³¹ Tasiyas iwaweiys Pawl, sivines kid bikatimates. Mina-Lom sitakanaviy babaw nisesus Yelusalem. Teitan gamag mo inek takanaviys sitovek, ikow livanen asisinap tasiyas min-Yelusalem, peinan ikawnaweinsa mav.

³² Takanaviys sitovek mo idawes takanaviys sisiyas sitakalikays, nuwanaw isawls vagan binekes gamag tasiyasa babaw. Tasiyas ikines takanaviys sisiy sitovek bo nimeis, mo ipiyaves anawayay Pawl.

³³ Takanaviy sitovek mo iyous Pawl, idibakes natakanaviy biyawonis kid Pawl naman palayun-wan sen waseg, mo ilana, “Kal mtown? Aveiyag inuwe?”

³⁴ Gamag babaw mo iwkuwaks, livan kweitan kweitan illivans. Ta-mawan biligintun livanen taw towen; idibakes natakanaviy; ilana, “Kutokes taw towen, kumeyes; taneis wadabunatum.”

³⁵⁻³⁶ Mo itokes Pawl, inawes wasibunatum. Ikapasal nuwes gamaga babaw ikab-wakunsa watiblous, silmanin beiweiys kid, iwkuwaks ilansa, “Kuweiys! Kuweiys!” Ilivatus wætet, takanaviy tasiyas mo inupes Pawl, inounas, peinan gamaga babaw sivinesa biyousis.

Pawl iyatal

³⁷⁻³⁸ Kakita beisiws wanuwan takanaviy sibunatum, Pawl mo idibek sitovek; aga-Gilis waseg ilivan; ilana, “Tab kadilok balivan waseg yak?” Sitovek ilana, “Kukwakin aga-Gilis, ne? Adok yækoum gum-Yidipt towen mwana nukumgwayes kweivas tawsan tawaw, tasiyas tawayins gamag, nukuneis wanawoud sivinamiy kid bukwanaviy wasigeis Gabman Lom takanaviy yakamey.”

³⁹ Pawl ilana, “Nag, ye gum-Yudiy, gunaven avakaein yagan Talisus wawnuwan ven avakaein Silisiy. Tab kadilok balivan gamaga babaw wasigeis?”

⁴⁰ Takanaviy sitovek itam. Pawl iton tet towen wakunuwatan, itamnow naman, mo ikapays tababaws-wan; wankuyeim Pawl mo ilivan aga-Ibliw waseg, ilana:

22

¹ “Sigwey, timog budag yakamiy, kuliganes agulivan, mamagina akayan wasigeis yakamiy.”

² Tasiyas iliganes aga-Ibliw waseg illivan, mo ikikapays vagan kid binganegs bwein. Mo ilivan.

³ Ilana, “Yey gum-Yudiy yey. Inag nikopweig ven Talisus waseg, wawnuwan ven avakaein Silisiy; tage bo askul ven towen Yelusalem waseg. Tamwey towen yagan Gamaliyel ikatimlakeig, mo akakin dakaleiwags yakids, akakinbunik, iseiw nuwag Yowbad nawotet, mawana babaw yakamiy tut towen.

⁴ “O gamag tasiyas inoyes kadetan ked, bo amop asisinap; mwasinis akatimates. Vinay o tawaw ayousis asenas wadeil.

⁵ “Tunuwgwes lun sitovek avakaein, o tammwayas babaw ikakins agulivan towen mounid. Peinan bo isekeigs let silmanin budidayas ven Damasik waseg, anounana waked silmanin Damasik vagan bayousis gamag, bameyes Yelusalem, vagan kid takaleiwags mo bimop asisinap.

Kweiboug Pawl ikanavin nanon

(Wotet 9:1-9; 26:12-18)

⁶ “Yanay waseg anoun kadiyakusa Damasik, mo mititeilin avakaein imekeig, mawana kavikawn meinoy neim walbalab.

⁷ “Akalouw wapwepway aligen aygan teitan; ilana, ‘Soul, Soul, aveiyag wawun kuybilebeig yey?’

⁸ “Akatinop aygan, alana, ‘O guyaw, kavel yak?’ Ilana, ‘Yey gum-Nasalet Yeisuw, mtownen tut babaw nukuybileb.’

⁹ “Tasiyas sigwey nakan, bo ikines mititeilin, tage nag biliganes aygan towen, soug yey nakallivan.

¹⁰ “Wankuyeim mo alivan; alana, ‘O guyaw, aveiyag bavag?’ Guyaw towen mo idibakeig, ilana, ‘Kutamanaw kun Damasik, igaw teitan gamag mo bikatimlakeim muwotet, aveiyag bakaleiwag vagan bukuwtel.’

¹¹ “Peinan mititeilin ikaligwen matag, ta-mawan bakin. Misinaka iyousis namag itokeigs, mo kan Damasik.

¹² “Ven towen waseg taw yagan Ananiyas; min-Yudiy tasiyas misikes ven towen ikakinsa tadicumwal, peinan tavnasein Moses nakaleiwag towen.

¹³ “E, mtownen imekeig itamanaw item mo ilivan; ilana, ‘Bwadag yakoum Soul, towen bukukin.’ Ilivan ikous mo akinbunik, akin taw towen Ananiyas.

¹⁴⁻¹⁶ “Mo ilivan, ilana, ‘Tammwayas siYowbad bo ikaliwageim vagan kid bukukwakin nanon, o bukukin tadicumwal towen, o bukuligen aygan tonen; o amsinap towen bisekeim kadiloka bukwatipel kusekes gamag babaw wasigeis. E, tut towen aveiyag kukwayamat? Kutamanaw, kutam mtownen waseg, mo babaptayseim, yagan tonen waseg, bo biwid mukwalbaleb, vagan beikous.’

Ikayeb Soul binekes kid tobwag ven gimgilis

¹⁷⁻¹⁸ “Ikous, nayum nam Yelusalem, akulul, annitoug Yowbad wanbunatum, matag mo isisawla mav, akin Guyaw towen idibakeig; ilana, ‘Nuwanaw kun kulisow Yelusalem, peinan min-Yelusalem bipiyaves amlivan, livaneig yey.’

¹⁹⁻²⁰ “Yey alivan; alana, ‘O Guyaw, tasiyas ikakins sinagoga babaw wasigeis bo ayablebes taliganeins livaneim yak; mwasinis awaweiys vatul waseg, mwasinis asenas wadeil. Kweiboug neiweiys takanawein aygam mtownen Sitiben, yey bo atam wotet towen waseg, natamanaw akikin, bo amtakavet asikweim tawayins taw towen.’

²¹ “Guyaw towen mo idibakeig, ilana, ‘Kunoun, bakayabeim bukun kadiveiyov, silmanin tobwag ven gimgilis.’ ”

Pawl ilivans son takanaviyi sitovek

²² Anilivan babaw iligintunis, tage iliganes livan towen “Tobwag ven gimgilis,” mo iwaks avakaein, ilansa, “Singaya takalbaleb towen; kuweiys taw towen. Na-ikadilok son mwamovan bises.”

²³ Iwkuwaksa, ilivelovs asikweim, musamuson pwepway ilivelovs ininein wanakaew, singay ikapasal nuwes.

²⁴ Takanaviy sitovek mo ilivan; ilana, “Kutokes taw towen kunawes wanawan buntum, kuweiys vatul waseg vagan bikamtel aveiyag anilivan waseg ikawkunes.”

²⁵ Iyawanis won Pawl; ta-mawan bigogewn naman o kaken. Takalikay teitan itamanaw wadadan. Pawl mo idibek takalikay towen; ilana, “Nag kadilok bukwatimaveigs, guma-Lom yey. Kadiloka kuyateleigs, magat bukubanes agusinap kalbaleb, mo kuweigs.”

²⁶ Takalikay iligen anilivan towen, inek natovek, idibek, ilana, “Aveiyag bukuvag? Taw towen guma-Lom teitan.”

²⁷ Takanaviy sitovek mo inek Pawl, ikatigan, ilana, “Adok yakoum guma-Lom yakoum, ne?”

Pawl ilana, “Mawan.”

²⁸ Takanaviy sitovek ilana, “Money avakaein bo asek, mo amlavag guma-Lom.”

Pawl ilana, “Peinan kweiboug-o tamag imlavag guma-Lom, mo inag nikopweig guma-Lom tatonen yey.”

²⁹ Iliganes tasiyas, ikakiws wous peinan kakita bo beiweiys Pawl; sitovek-vak anpwayat seikwan, peinan guma-Lom towen bo iyawanis naman o kaken.

Pawl mo iyatal

³⁰ Iyam nen gaboug mo ilikus vatul wawon Pawl, o peinan takanaviy sitovek sivinan bikakin wawun min-Yudiy sikavikun waseg Pawl, mo idibakes bimeis tasiyas tanuwgwas lun situwaveks sisiyasa takaleiwags babaw; teitan mo itok Pawl, imey, itamanaw wamtes tasiyas.

23

¹ Pawl ikinbunikes takaleiwags tasiyas, ilana, “Tuwag yakamiy, yam babaw nases agusinap bwein wamatian Yowbad, nagein gog bo mawan.”

² Tanuwgwas lun sitovek avakaein Ananiyas mo idibakes tasiyas nitamanaws wadadan Pawl, ilana, “Kuweiys wadon taw towen, singay kalbaleb anilivan.”

³ Pawl mo idibek Ananiyas, ilana, “Yowbad bo beiweim yak, magina budakay kalbaleb yakoum, yalig isin, magin ibwein, tage bo ipwas, bukuyateleig Moses nakaleiwag waseg; tage bo kugulek nakaleiwag towen, peinan kudibakes tasiyas kid beiweigs mav.”

⁴ Tasiyas itomos wadadan Pawl, ilansa, “Oo ne! Bo kuyeg Yowbad nagamag towen, ne?”

⁵ Pawl ilana, “Nag bakakin mtowen tanuwagan lun sitovek avakaein. Akakin Bukitab livanen mamagina, ‘Awoum kuyeg mitovek.’”

⁶ Pawl mo ikines tasiyas mwasanin Sadusiy, mwasanin Palisiy, aygan avakaein mo idibakes takaleiwags tasiyas, ilana, “Tuwag yakamiy, yey Palisiy yey, tamag gog Palisiy. Bo ayatal peinan bo anamis vagan bitakits vayuwein kanig waseg.”

⁷⁻⁸ Ilivan mawan ikous, tasiyas Palisiy bo ikamnimans sisiyas tasiyas Sadusiy; ilivis, ivages bod akweiy. Peinan tasiyas Sadusiy idokes gamag nag bekits vayuwein; ta-kweitan anelos nises; ta-kweitan kululuwan nises; tasiyas gog Palisiy idokes gamag bekits vayuwein, o anelos nises, o kululuwads nises-vak.

⁹ Tasiyas babaw-wan mo ikamnimans avakaein. Igawa ikamnimans takatimlakeins Palisiy sikaleiwag mwasanin mo itamanaws, ages avakaein, ilansa, “Kadok nag kweitan kalbaleb nises taw towen waseg; nag. Adok anelos teitan o kululuwan teitan bo ikatimlek ansinap.”

¹⁰ Tasiyas babaw-wan singay ikavikuns; takanaviy sitovek idok kakita biyousis Pawl bikalisid kid won, mapuna idibakes natakanaviy biyousis Pawl, bikawes, binawes wasibunatum.

¹¹ Boug towen waseg naGuyaw Yeisuw mo itamanaw wadadan Pawl, ilana, “Awoum beivag ampwayat. Mawan kweiboug livaneig nukusek ven Yelusalem waseg, igaw ven Lom waseg bo mawan.”

Min-Yudiy sivines beiweiys Pawl

¹²⁻¹³ Iyam nen gaboug, min-Yudiy tabebaws-wan, sinawavas o sinawanim, mo ivtames sisiyas vagan beipos kid mo beiweiys Pawl. Ilansa, “Kalisiy yakamiy bukukwams o bukumouums, Yowbad bo beiweimiy. Igaw bitaweiy Pawl, mo bitakams.”

¹⁴⁻¹⁵ Tasiyas mo inekes tanuwgwas lun situwáveks sisiy takaliwageins ven, ilansa, “Yakamey amilivan Yowbad waseg, bo bakapos ee... tonena bakáweiy Pawl. O yakamiy kamnat amilivan kusekes takanaviys sitovek, kulivans mamagina, ‘Taw towen Pawl kutok kumey, sivinem bakaytel, kweitan sinap silmanin, vagan bakakinbunik.’ E, kukin takanaviys sitovek beitam, Pawl bimey, yakamey bakakayamat, tutan bo beim, mo bakáweiy.”

¹⁶ Gwad teitan, Pawl kadan, bo iligen asilivan, mo in, isiw takanaviys wasibunatum, livan towen mo ikatipel isek Pawl.

¹⁷ Pawl mo idow takalikay teitan, ilana, “Gwad towen sinap kweitan nisisiy. Kadiloka kutok, kuneis mutovek waseg, igaw kweitan livan mo bisek.”

¹⁸ Itok gwad towen, inekes natovek, ilana, “Tasiwun deil towen Pawl bo idaweig, ilana, ‘Kutok gwad towen kunekes mutovek waseg, anilivan mo bisek.’”

¹⁹ Natovek mo itok gwad towen, asteiyuna ineis palatan, mo ilana, “Aw-youd bukunuk-weig?”

²⁰⁻²¹ Ilana, “Tasiyas min-Yudiy ninous mawana, nubweig kid bivatams waseg yakoum vagan kid bukuyamanes towen Pawl kusekes takaleiwags tasiyas wasigeis, mamagina biyateles, bikatugwans waseg, vagan ansinap bikakins kid. Nag gog, peinan mwasanin ikayamats, sivines kid beiweiys. Awoum kutam. Tawaw tasiyas sinawavas o sinawanim tapsapos sivines beiweiys. Bo itabudabods Yowbad waseg bivages kid mawan. Bo ikatunags ikous, ikaymatesta ge amlivan yakoum.”

²² Takanaviys sitovek ilana, “Bwein-wan. Kadiloka kunoun. Bo talivan aditeiy bo deis; awoum bukudibakes simwayas; awoum!”

Ikayeb Pawl inek gabman avakaein Piliks

²³ Takanaviys sitovek mo idawes takalikays asteiy bimeis, mo idibakes; ilana, “Kukin takanaviys lakatuy bikatunags bineis Sisaliy, sisiyas tasiyas sihos sam sinawanim sinawey, sisiyas takaweins kayal lakatuy. Igaw bidadub, kwayav, mo kuneis.”

²⁴ “Kuneves hos vagan Pawl beimwen, kuvnases beibwein, kunawes binek guyaw towen Piliks.”

²⁵ Takanaviys sitovek ilel let silmanin Piliks, mamagina:

²⁶⁻²⁷ “Kalin nuwag guntovek avakaein yakoum Piliks. Yey Kalodiw Lisiyas; gunalet beiw. Peinan min-Yudiy niyousis taw towen, kakita beiweiys; akakina guma-Lom towen, mapuna kakatinob sigwey guntakanaviys.”

²⁸ “O sivinag bakakin wawun askameiliw waseg taw towen, atok wasigeis tasiyas min-Yudiy takaleiwags vagan kid biyateles.”

²⁹ “Tage nag ivag ansinap kalbaleb vagan bikatimates o bises wadeil, nag. Misinaka ilivans, ‘Bo igulek makaleiwag min-Yudiy yakamey.’”

³⁰ “Wankuyeim, mo aligen asisinap ikitilawos idokes kid beiweiys taw towen, mapuna akayeb vagan biwekeim yak; o min-Yudiy tasiyas bo adibakes, ‘Kunekes guyaw avakaein Piliks vagan bukuyateles taw towen Pawl.’”

³¹ Sitovek nakaleiwag bo mawan, takalikay tasiyas mo inawes Pawl, boug waseg, ineis Antipatil, imasis.

³² Iyam nen gaboug, tasiyas wakwakway inounas mo iyums wasiven; tasiyas tatouweins hos igaw binawes Pawl.

³³ Inounas ee... Sisaliy, inekes guyaw towen avakaein, mo isekes Pawl son let.

³⁴ Ivin let ikous, mo ikatigan Pawl, ilana, “Muven avakaein amiyagan?” Ilana, “Silisy.”

³⁵ Piliks mo ilana, “Ga bimeis tasiyas biyateleims, baligen amilivan, mo bakaleiwag.” Ikous, mo idibakes nagamag, ilana, “Kadilok kumtakavates taw towen wanuwan buntum bunavakaein, kweiboug Elod nabunatum.”

24

Iyateles Pawl

¹ Yam kweinim ikous, iwloubus tanuwgwas lun sitovek avakaein Ananiyas son tallivan teitan yagan Telitul sisiyas tamumwey mwasanin. Inekes gabman avakaein, sivines kid biyateles Pawl.

²⁻³ Idow Pawl beim; Pawl im; Telitul mo isilamaw anilivan, iyatel Pawl mamagina, “Kalin nuwem maguyaw avakaein yakoum, peinan mukwaleiwag bwein. Nag kweitan kawpwanaw nises wamaven. Bwein-wan nakases. O mukwaleiwaga babaw nilabemas min-Yisleil yakamey. Mapuna tut babaw o vena babaw gimgilis yakamey ikalin nuwem maguyaw yakoum.

⁴ “Adok nag biveiyov agulivan, sivinag gog kusiwyoubum bukuligen kid amilivan kakit waseg yakoum.

⁵ “Taw towen kakakin singay takakon, ivages min-Yudiy vena babaw wasigeis vagan bikawpwanaws, peinan imgwayes tasiyas min-Nasalet nidokes, mo ivages moumouvit vena babaw wasigeis.

⁶ “Taw towen idok biyageg Yowbad nabunatum, tage kasilbwed, nakayous. ⁷(-)

⁸ “Igaw kukwatigan taw towen, mo bukukinbunik nakalbaleb towen nalivan.”

⁹ Igaw Telitul ilivan, min-Yudiy tasiyas itimatams, ilansa, “E, mawan! Mounid.”

Pawl ilivan

¹⁰ Guyaw towen Piliks mo ikin Pawl, itam vinum, mo Pawl ikatimop asilivan, ilana, “Peinan bweilim babaw nukusesun matovek yakoum, bweina basekeim agulivan.

¹¹ “Yam sinawatan akweiy nein wankuyeim mwana asap Yelusalem vagan batap-waloul. Igaw kukwatugwans min-Yudiy wasigeis mo bilivans mawan.

¹²⁻¹³ “Nag kal ikineig aliwon Yowbad wanbunatum, nag; nag alivan vagan gamag bikatuyouns biliganes aygag, nag. Nag ikatuyouns wasinagog; nag ikatuyouns waven, nag. Nag kakamnimman soug teitan gamag, nag. Nag kadilok teitan bisimounid asilivan tasiyas mwana nilivans, nag.

¹⁴ “Misinaka batam kweitan sinap waseg; makadewen ked atapwaloul maYowbad waseg, ked towen idokes ked kalbaleb, kid; isibawemas, mapuna idokem min-Nasalet yakamey. Tage yej asimounid maBukitab sinapun, Moses nakaleiwag babaw, o palopit tasiyas asilivan babaw-wan.

¹⁵ “Sigwey min-Yudiy tasiyas kanmis Yowbad bivag, mo bitakits kanig waseg, tadidumwals o takalbalebs, yakidsa babaw.

¹⁶ “Mapuna tut babaw sivinag agusinap bwein wamatian Yowbad, o gamaga babaw wamtes.

¹⁷ “Bweilim babaw ikous, mwana nam wagunaven, gunmuloul asekes, o basiwayoub kid waseg Yowbad.

¹⁸ “Bo awid woug, asiw Yowbad wanbunatum; sigwey nag ivag gamaga babaw, nag ikawnaweins, nag.

¹⁹ “Wankuyeim mo isaps min-Yudiy mwasanin siven Esiy; o tut towen nag bimeis vagan bikamteles aveiyag agusinap kalbaleb.

²⁰ “O min-Yudiy tasiyas-nan nikineigs kweiboug naton takaleiwags wamtes, kadilok bikamteles aveiyag agusinap kalbaleb.

²¹ “Misinaka agusinap towen, sigwey tasiyas nakatamanaw mo awak, alana, ‘Silawun gunyat^al nagein, peinan asimounid bitakits kanig waseg.’ ”

²² Townen gog Piliks bo ikabunik ked makadewen, Pawl nilivan; mtowen Piliks mo ilana, “Ga-is-es, ga-beim takanaviy sitovek townen Lisiyas, mo bakaleiwag.”

²³ Mo idibek natakalikay, ilana, “Bweina biyeiwas wədeil, mtowen Pawl; o taliven bweina bimeyes kan vagan bikamkwam.”

Pawl nises wədeil

²⁴ Yam mwasanin ikous, mo isaps Piliks son nakwaw Dilusil, manawen vinen-Yudiy; mo idawes Pawl beim vagan bikatilutegs livanen Yeisuw Kelis, livan townen Pawl nisimounid waseg.

²⁵ Pawl mo idibakes livanen sinap didumwal, o livanen kapatul, o livanen Yowbad nakaleiwag igaw mo bikatukin vena babaw wasigeis. Pawl igawa illivan, Piliks gog mo ivag anpwāyat, ilana, “Ga-is-es. Tut townen kunoun. Igaw kweitan tut bwein waseg, mo badawein bukuyum bukum, amlivan bukusekeig.”

²⁶ Bo inimis Pawl bisiwayoub waseg; mapuna kutukuta ididow, illivans son; ininamis gog nag, peinan Pawl ta-isek Piliks namoney vagan bilik Pawl, nag.

²⁷ Akweiy bweilim ikous Piliks atimapun neim, yagan Posiw Pestos. Tage Piliks sivinan bilabes min-Yudiy, mapuna ikaleiwag vagan Pawl bisesuna wədeil.

25

Pawl sivinan Sisal bikaleiwag

¹ Pestos isilamaw nakaleiwag, isesuna ven Sisaliy kweitoun yam, mo in Yelusalem.

²⁻³ Tanuwgwes lun situwəvek sisiyas min-Yudiy tamumwey mo inekes Pestos, ilansa, “Takalbaleb townen Pawl nises wədeil Sisaliy. Tabta ikadilok bukukwayeb townen beim wamaven Yelusalem vagan gog bakaytel?” Sivines kid bikayamats wadadan ked. Igaw beim Pawl mo beiweiys.

⁴⁻⁵ Pestos ilana, “Nag. Bweina bises Sisaliy. Igaw kakit mo bayum ban Sisaliy. O sigwey guyawaw mwasanin yakamiy bitaneis Sisaliy, inayatal silmanin; magat nakalbaleb nises, kadiloka guyawaw tasiyas biyateles.”

⁶ Ises Yelusalem nag bibabaw yam, adok kweinin-kweitoun o sinawatan, mo iwloubus in Sisaliy, imasis. Iyam nen gaboug mo isin wakaban idibakes nagamag wasigeis vagan kid Pawl bimeyes.

⁷ Pawl imeyes, wankuyeim mo isunaps min-Yudiy tasiyas meinoy nomeis Yelusalem, itowas mo iyateles, ikavtagis Pawl ansinap babaw-wan kalbaleb nivvag kid; tage asilivan nag bikamnat, mapuna takaleiwag nag isimounid asilivan waseg.

⁸ Pawl ikatimop asilivan, ilana, “Nag agulek min-Yudiy makaleiwag, nag. Nag ayageg Yowbad nabunatum, nag. Nag agulek Sisal nakaleiwag; nag.”

⁹ Togo Pestos sivinan bisiwayoub min-Yudiy wasigeis; mo idibek Pawl, ilana, “Tab kadilok bukun Yelusalem mo bakaleiwag amsinap ven townen waseg?”

¹⁰ Pawl ilana, “Tut townen bo atamanaw Sisal wanakabkaleiwag. Kaleiwag kadilok town-an waseg. Nag ayablebes min-Yudiy. Kukwakin agulivan townen mounid. Na-ikadilok tasiyas bikaleiwags waseg yey.

¹¹ “Magat agusinap singaya kalbaleb, mawan asilivan tasiyas, mogo bweina bakanig; nag bakakiws; nag. O peinan tasiyas tayateleigs iyyaweids-wan, na-ikadilok bukutameig vagan kid tasiyas bikimateigs, nag. Kadiloka Sisal tonen bikaleiwag.”

¹² Pestos iligen anilivan townen, mo ineis palatan sen nagamag tassinaps mwasanin, sinsineyas illivans. Ikous, Pestos iyum, im, ilivan; ilana, “Sivinam bukunek Sisal vagan kid bikalawageim; mapuna bo bakayabeim bukunek mtowen Sisal.”

Agalip son Belinis ikatiliganes anilivan Pawl

¹³ Tut nag biveiyov wankuyeim King townen Agalip son nakwaw Belinis mo imeis Sisaliy vagan kid bimuloulis sisiy townen Pestos.

¹⁴ Yam babaw nisesus sisiy Pestos anbwabwal tasiyas. Livanen Pawl mo isek King townen, ilana, “Tutan Piliks inoun yey mo asap, teitan taw nises wədeil.”

¹⁵ “Wankuyeim an Yelusalem, tanuwgves lun situw̄aveks sisiyas tamumwey, ven towen Yudiy waseg, mo idibakeigs; ilansa, ‘Taw towen takalbaleb; kadiloka bukumop ansinap kalbaleb.’

¹⁶ “Akatimop asilivan, alana, ‘Yakamey mina-Lom, nag ivag amasinap māwan. Kadiloka kuyateles taw towen wamatan, o towen biyamen amilivan; kukin ansinap kalbaleb nises, mo bakamop; kukin gog nag, bo nag.’

¹⁷ “Wankuyeim imeis tasiyas, nag akabiyun, nag. Neiyam nen mo asin wakabag vāgan kid bakaleiwag, adibakes gungamag bimeyes taw towen.

¹⁸⁻¹⁹ “Adok ansinap kalbaleb; nag gog, tasiyas itamanaws iyateles, nag ikavtagis ansinap kalbaleb; misinaka livānen sitapwāloul tatineis, o livānen teitan taw yagan Yeisuw nikanig, o Pawl ilivan namwamov igawa nises.

²⁰ “O yey nag bakakin amawan bakaleiwag sinap towen waseg, akatugwan taw towen waseg, alana, ‘Tab kadilok bukun Yelusalem mo bakaleiwag sinap towen waseg?’

²¹ “Towen gog ilana, ‘Nag. Sivinag datoveks avakaein bikaleiwag.’ Mapuna akaleiwag alana, ‘Ga-bises wādeil mo banineiv amata ked waseg baban, mo bakayeb binek datoveks towen Sisal.’ ”

²² Agalip mo idibek Pestos, ilana, “Sivinag baligen taw towen anilivan.”

Pestos ilana, “Bwein. Nubweig mo bukukin.”

²³ Iyam nen gaboug Agalip son Belinis mo ineis wabuntuman liwon, sisiyas takanaviys situw̄aveks o guyawuns ven towen, asikweim maynamnabwein nisikams, askatubub singaya bwanabwein nivages. Pestos mo idawes nagamag bimeyes Pawl, mo imeyes, itamanaw wamtes.

²⁴ Pestos mo ilivan; ilana, “Agalip, making yākoum, o tawaw babaw yakamiy wabunatum towen, kukines gamag towen. Min-Yudiy, Yelusalem waseg o ven towen waseg, intougigs vāgan bamop ansinap, niwkuwaks, ilansa, ‘Kuweiy. Nag kadilok son mwamovan bises.’ ”

²⁵ “Bo akatiligen asilivan, akatugwan waseg, akakin nag ivag ansinap kalbaleb. Na-ikadilok bāweiy taw towen. O towen nilivan, ‘Sivinag guntovek avakaein bikaleiwag’; mapun bakayeb binek Sisal.

²⁶ “Kukin bakayeb, nago akakin ansinap, aveiyag balel wālet. Mapuna bo amey taw towen wamitamiy, yākoum making Agalip simwey guyawaw tababaws, vāgan kid bukunganegs anilivan; adok bitabanes ansinap kweitan, mo balel wālet, vāgan Sisal bikaleiwag.

²⁷ “Adok na-ikadilok makava bakayeb, nag.”

26

Pawl ilivan wamatan Agalip

¹ Agalip mo idibek Pawl, ilana, “Kadiloka kulivan.” Pawl itamnow naman, ilivan mamagina:

² Ilana, “Peinan min-Yudiy niyateleigs, ilivans kid agusinap kalbaleb, o tut nagein ikalin nuwag peinan yākoum bo kuligen agulivan, matovek avakaein yākoum.

³ “Peinan kukwakin amasinap, min-Yudiy yakamey, o kukwakin silawun makamni-mana babaw, sivinag kwaptuleim bukuligen agulivan.

⁴⁻⁵ “Min-Yudiy babaw ikakins agusinap. Ikakins igaw-o wagwādig gungamag wasigeis, o ven Yelusalem waseg, gum-Yudiy yey; o tut kadiveiyov ikakins agusinap, Palisiy teitan yey. O yakamey Palisiy singaya kavnas min-Yudiy makaleiwag babaw. Kukin tasiyas sivines, mobeitams waseg agulivan towen; peinan mounid.

⁶ “Nagein tasiwun del yey, o tasiyas bo iyateleigs peinan animis Yowbad bivag māwan anilivan wasigeis tamumwey min-Yudiy yakamey.

⁷ “O yakamey, amakum sinawatan akweiy, meiveka yakamey kasimkakin yam babaw o boug babaw kakanow aygan Yowbad, kadoki bisekem māwan anilivan. O yey anmis sinap towen, igaw kanig waseg bitakits vayuwein, mapun min-Yudiy tasiyas bo iyateleigs.

⁸ “O guyaw, aveiyag wawun isunasun ninoumiy livan towen, ‘Takanigs beikits vayuwein.’

⁹ “O kweiboug ivag sivinag basilbwed nawotet gum-Nasalet mtowen Yeisuw.

¹⁰ “Yelusalem waseg navvag mawan. Tanuwgwes lun situwaveks nisekeigs gunakalei-wag vagan bayousis tayakelesiys basenas kid wadeil; o igawa niyyatals ye y bo atam vagan bakakatimates.

¹¹ “O sinagog babaw wasigeis bo amop asisinap tasiyas, adok kid mo bipiyaves siguyaw towen Yeisuw. Singay kapasal nuwag, aneves tayakelesiys vagan bamop asisinap kadiveiyov ven wasigeis.

Pawl ilana, “Bo ikanavin nanoug”

(Wotet 9:1-19; 22:6-16)

¹² “Misumkwey towen tanuwgwes lun situwavek bo itams gunawotet towen waseg, ilansa, ‘Bweina bukun Damasik bukuyousis tayakelesiys tasiyas-one.’

¹³ “Igawa waked, yanay waseg, bo akin kamnat singay avakaein meinoy neim walbalab. Kalas mititeilin kalamwey-nen, tage towen mititeilin singay avakaein; imteilim yakamey sigwey tasiyas nakaninoun.

¹⁴ “Kakalouw wapwepway, kamasis, mo aligen teitan aga-ibliw waseg idibakeig; ilana, ‘Soul, Soul, aveiyag wawun kuygageig? Tut babaw kwatipiyow kayal toneima ibasim avakaein.’

¹⁵⁻¹⁶ “Yey alana, ‘O guyaw, kavel yak?’

Ilana, ‘Yey Yeisuw, mtowen tuta babaw nukuyageg. Tut gog towen kutamanaw kutom. Bo amekeim, vagan kid basekeim muwotet. Kadiloka kwanow aygag, kusekes gamaga babaw livaneig yey peinan nukukineig nagein; o igaw tut wanakougwaw sinap mo bakamtel waseg yakoum, kadiloka bukusekes-vak livaneig mawan.

¹⁷ “‘Bakayabeim bukun tobwag ven gimgilis wasigeis. Igaw tasiyas beivag sivines biyagageims yakoum, sisiyas mugwamag min-Yudiy mwasinis; yey mo bakatinabweim yakoum.

¹⁸ “O vena babaw gimgilis wasigeis, yakoum bukuvag beilal mites, vagan kid bipiyaves sinap dadub, kamnat biyousis; o bipiyaves Seitan nakaleiwag, mo binekes Yowbad, vagan kid biwid asisinap kalbaleb. E, tasiyas dadub mo binekes tasiyas tasimounids waseg yey, peinan akayuseimiy simiyas tasiyas, asekeimiy amisinap kweivaw, bwanabwein.’

Pawl nawotet livnen

¹⁹ “O King yakoum, peinan Yeisuw meinoy neim walbalab nidibakeig mawan, tamawan bapiyev aygan.

²⁰ “Bo naguyes min-Damasik, wankuyeim min-Yelusalem, o vena babaw wawnuwan Yudiy, mo tobwag ven kadiveiyov wasigeis; adibakes, ‘Kadilok bikanavin ninoumiy, vagan kid bukunekes Yowbad. Awoom ninoumiy bikanavin makaw; kadilok sinap bwein kuwteles.’

²¹ “Peinan gunawotet towen nawtel, min-Yudiy mo iyousigs Yowbad wanbunatum, sivines kid beiwigs.

²² “Yam babaw Yowbad nilabeig, nagein gog bo mawan; lilabeig vagan kid baguyes gamaga babaw, takinew toul, o takinew guyaw; gamaga babaw wasigeis agulivan katanok-wan; mawan tasiyas palopits sisay Moses nilivnakes, mawana yey agulivan; nag kid kweitan livan balivan; nag.

²³ “Mawan tasiyas kweiboug, yey alana, ‘Kadilok aban Kelis bigeg, bikanig, o kanig waseg mtowen biginikit, mo anilivan bwanabwein bimteilis nagamag min-Yudiy, wankuyeim vena babaw.’”

Pawl igeiguy King Agalip waseg

²⁴ Igawa Pawl illivan mawan, Pestos mo ilivan; aygan avakaein, ilana, “O Pawl, takabalawein yakoum; peinan buk babaw kuvnivin mo kukwabalawein.”

²⁵ Pawl ilana, “Nag akabalawein. Guntovek yakoum kukineig nanoug idumwal, agulivan mounid-wan.

²⁶ “King Agalip ikakina sinap towen, mapun nag ivag agumwasin, peinan nag itagouwaw sinap towen waseg; peinan bo ikamat wavtakon ven. ²⁷ O King yakoum, tabta kusimounid tasiyas palopit asilivan? Akakina kusimounid-wan.”

²⁸ King Agalip mo ilivan, ilana, “Kudokeig yey kakita bamlavag Kelis nagamag, ne?”

²⁹ Pawl ilana, “Igaw tut kadiveiyov o tut kayakus, yakamiy babaw bukumlavags Kelis nagamag yakamiy, bo bwein. Yowbad ikakin nanoug bo mawan. Sivinag nagein bukumlavags mawana yey, yakoum making yakoum, simwey gamag tasiyas babaw niliganes aygag. O nag sivinag bukusiws wadeil; sivinag bukumlavags Kelis nagamag yakamiy, mawan yey.”

³⁰⁻³¹ King towen mo itamanaws siney Piliks o manawen Belinis, sisiyas tasiyas nisinis bunatum towen, mo isaps. Sisiyas mo illivans, ilansa, “Taw towen nag ivag ansinap kalbaleb; nag kadilok bisesuna wadeil; nag kadilok min-Yudiy beiweiys, nag.”

³² Agalip mo idibek Pestos; ilana, “Magat gamag towen nag sivinan Sisal bikaluweg; bweina bitakaluweg vagan bisap bein bininoun wamnat.”

27

Ikuks silmanin Lom

¹ Ikaleiwags kid bikayabem, kakuk, bakan Italiy, isekes takalikay nawotet vagan bikaymates Pawl siney tasiwuns deil mwasanin. Takalikay towen yagan Yuliyas. Natakanaviys nisesus. Meivek-wan tasiyas Ogoustos inabod.

² Katoow wag kaytan, meinoy neim Adilamiteim bein ven wunsiyas Esiy wakawalaw; simey kakuk Alistak, gum-Masidoni teitan, naven Tesalonik.

³ Neiyam nen mo kalug Sidon. Peinan takalikay towen isiwayoub, itam waseg Pawl vagan kid binek taliven nisesus ven towen, bimasis, asbwabwal towen.

⁴ Neiyam nen mo kakuk Sidon, kasawl. Peinan yag kalbaleb kanoy wangwanan sim towen Saypilos.

⁵ Wankuyeim kakuk kadoupouy awasas avakaein walasin ven yagan Silisy o Pampiliy, mo kalug Mayl, wawnuwan ven avakaein Lisiy.

⁶ Ven Mayl waseg matalikay iban min-Aleksanidel siwag akitan, mo katoow wag akiwen waseg, peinan kid bein Italiy.

⁷ Singaya youviy to nakakuk; peinan yag meinoy neim wamitem; yam babaw ikous, mo kalug Nidas. Igaw yag nitotow wamitem, mapuna kayawatein kan wangwanan sim yagan Kilit waseg, kan kadounip silbunun yagan Salomon.

⁸ Singay keikay to nakadavayal wadadan ven, nakan ee... mo kalug wamunon, yagan Munon Bwanabwein, kadiyakusan ven yagan Lasey.

⁹⁻¹⁰ Bo kalasibwen yam mwasanin nein wankuyeim, peinan yag igeg, o bo ikous yam towen min-Yudiy yakamey kapsapos, bo tutan yag avakaein bisilamaw; mapuna Pawl idibakes tasiyas; ilana, “Tawaw, bweina bitayeiyas munon towen waseg; kukin bitakuks, adok bukuyamkwanes kaydod o wag, o yakids babaw adok bitamtamats.”

¹¹⁻¹² Tage taginiwig son takavaveis ilansa, “Munon towen kalbaleb; bweina bitadokons; kukin bitalugs kweitan ven, bo bwein.” Takalikay iligen asilivan tasiyas, ipiyev Pawl anilivan. Tabebaws-wan sivines beikuks, bidokons kid bineis munon yagan Piniks, mo bakayeiwas munon towen waseg.

Piniks wawnuwan sim to Kilit; munon towen wadon isekew wayals, awasas-nen isekew wayavat.

Kalouvat bwaw avakaein

¹³ Yag yals mo iygil, idokes bweina bakadavayal bakan Piniks, mo ikawes lon, kakuk kadavayala ven Kilit wadadan.

¹⁴ Yag mo itet in wabomat, meinoy neim waven, singaya tawtoun, mamagina sinkawein!

¹⁵ Ta-mawan bakakuk peinan yag meinoy neim wamtem, singay avakaein, mo mweg kweitan kakit kákuk mo isigogonem oko wabwanit.

¹⁶ Kan wangwanan sim kakit yagan Kilod, mawotet singay keikay waseg kakatimwen kewow, in wakunuwatan wag, kayawen.

¹⁷ Ikous, ikawes yiwayon, mo isays wag. Aspwayat wag kid bitul wakunabub yagan Silitus, mapuna kálug, mo iyalaves.

¹⁸ Neiyam nen igaw itotow yag, ilaves kaydod in wabwanit.

¹⁹ Neiyam nen mo ikawes wuliyoug-wan wag, ilaves in wabwanit.

²⁰ Yam babaw libgagay ivag; nag kakin kálas, nag kakin wutun, yag singay avakaein itotow. Kadoki bo bakamtamat.

²¹ Yam babaw waseg, nag kakamkwam kan. Kweitan yam Pawl mo itamanaw wamitem; ilana, “Tawaw, kadiloka bukuliganes aygag kweiboug; bitayeis ven Kilit bo bwein; tut towen bo tayagages, bo tayamkwanes youda babaw.

²² “Tage tut towen awoum beivag amipwayat, peinan nag bitamtamat; nag. Misinaka bitayamkwanes wag.

²³⁻²⁴ “Yey atapwáoul Yowbad waseg. Boug waseg gunaYowbad natakayob imekeig, ilana, ‘O Pawl, awoum beivag ampwayat; bo bukunek Sisal. O peinan kwanow Yowbad aygan, bo itam simwey tasiyas tababaws-wan, bo bikatinabweimiy.’

²⁵⁻²⁶ “Kadilok beibwein amnamiy, peinan animis Yowbad; bo bikamat mawanana nilivnek. Dawag gog bo bilag wásim.”

²⁷ Akweiy wík iyalavem wabwanit towen yagan Ediliy. Watapwan boug tasiyas wunataw mo idokes ven kid kadiyakusa nises.

²⁸ Mo bitakwanes bwanit amawan vayovan; mo ivinis ovávin. Ovánim, ovánim, ovánim, ovánim; e, mo imlavag sinawey. Wankuyeim vayuwein mo itakwanes, mo imlavag sinawatan ovánim vayovan bwanit towen.

²⁹ Aspwayat bakan wadakul, mata ge igulek wag, mo ilaves lon walivas wawawun wag; sivines kid ga-iyam.

³⁰ Wunataw inibwis kewow, ilansa, “Lon mwasanin bakanow wadabwen wag bakalev;” iyaweids gog, sivines kid bikalávis, bisawls kid bilisawemas.

³¹ Pawl mo idibek takalikay sen natakanaviys; ilana, “Kukin tasiyas bilisaweids, bo bitamtamat babaw yakids. Kukin bisesus, bo bwein.”

³² Mapuna takanaviys tasiyas mo ibwabwes vatulen kewow, ikalouw in wayol, iyetuwen.

³³⁻³⁴ Wankuyeim kakita beiyam. Pawl mo iguyem vagan bakakam; ilana, “Yam sinawatan kweivas nukusesus, ikubukub nuwamiy, nag kukwams. Kadiloka kukwams vagan gog biyamoveimiy; nag aveiyag bivag, nag; bwein-wan bitasesus.”

³⁵ Ilivan ikous, mo ikow bled, ikalin nuwan Yowbad waseg, initoug wamtem meiveka gamag yakamey, bled ikiv, mo islamaw ikam.

³⁶ Amnem mo ibwein babaw yakamey, mo kákam.

³⁷ Meiveka yakamey wag makaywen adagan, lakatuy sinawanim sinawey teinim tatanok gamag.

³⁸ Kákam, kakamuweip, mo kalev kan, in wayol vagan kid wag bikayay.

Ikatugulek wag

³⁹ Iyam nen gaboug, nag teitan gamag iwtus ven towen, tage kaban awasas kakit alekel kikit nises; tasiyas wunataws idokes biyokons kid beikuks vagan wag bein wanuwan, mo bilag wag.

⁴⁰ Mapuna ibwabwes yiwayon, lon kalisow wayol; kweiboug niyawonis avaveis naman vagan awoum bigogewn kid, tut towen mo ilikus vitulen avaveis vagan bigogewn; kanagon mo isenas, mo kákuk silmanin kawalaw towen.

⁴¹ Kákuk ee... wag mo itul kunabub waseg, dabwen ibilag, kaysay iwaway wag wawawun, mo ikatagulek.

⁴² Takanaviyi idokes bweina bikatimates tasiyas tasiwuns deil, mata iegays ge igalags mo bisawls.

⁴³⁻⁴⁴ Tage takalikay towen sivinan biyamov Pawl, mapuna isilbwed asisinap; ilana, “Tasiyas kalisiy ikakins gegay kadiloka bikaspepel bineis wayol bigegays bimgwayemas bineis wanakaew. Yakamey wankuyeim kaypap waseg mo bakagay bakan wanakaew.”

E, mawan sona mwamovem meiveka yakamey kan wanakaew mo kasap waven.

28

Kases sim yagan Melit

¹ Kagalag kan wanakaew; ven towen gimgilis imeis mo ikavtagis siven yagan Melit.

² Tasiyas nag isinalemas, nag; bo isiyoubumas. Amaloulun, peinan kweis, mapuna ilabemas, ikavlakes imakov, kakamunuw.

³ Pawl in ikow amweilok sinivtanok, isen wakov, mwatet gog nises amweilok towen wanuwan; muymuyan kov isimkwen, isap, igned naman Pawl.

⁴ Ven towen gimgilis ikines mwatet towen ikakuvatay wanaman Pawl, mo ilansa, “Mounid tawayin gamag taw towen; nag kadilok son mwamovan bises; nag iwgwel wabwanit, tage mwateta nawen mo igned, vagan kid bikatimet.”

⁵ Pawl ikatsap mwatet wanaman, mo ikalivatow, in wakov; nag ikatoun, bwein-wan ises.

⁶ Idokes kid naman beitol, o bikalouw wapwepway beimat kid; ikayamats ee... nag aveiyag ivag; mo ikanavin ninous, idokes kid yowbad teitan.

⁷ Sim towen gimgilis siguyaw avakaein Pubiliy, napwepway nises ven towen waseg; anbwabwal yakamey kasesuna ee... kweitoun Yam, singaya ge isiyoubum, guyaw towen.

⁸ Misumkwey towen Pubiliy taman nises wabunatum, ikatoun, itakalon won, mwaliyes isawel. Pawl isiw wanbunatum, initoug Yowbad waseg, isen naman wawon, mo ibwein.

⁹ Wankuyeim takatounsa babaw sim towen gimgilis nimeis, Pawl initoug pines, mo ibweins.

¹⁰ Mapuna isiyoubumas bwanabwein, o igaw tutan bo bakakuk mo itanouys wuliyoug makaw isekemas.

Pawl isap Lom

¹¹ Tibukon kweitoun ikous, mo katouw wag akitan nikayamat wasim towen bulbweilim waseg. Min-Aleksanidel siwag makaywen antabuy mamagina tawaw papap asteiy.

¹² Kalug Sulakous kases kweitoun Yam.

¹³ Kakuk mo kayeyewousa kayeyewous ee... mo kalug Legiyam, kamasis. Iyam nen gaboug, yag in yals mo kakuk silmanin Putiyol, akweiy Yam mo kalug.

¹⁴ Ven Putiyol waseg kaban Yeisuw nagamag mwasanin, ilivans, “Kadiloka kumeis wamabunatum, amabwabwal yakamiy.” Katam, kases katanok Wik. Wankuyeim mo kanoun waked silmanin Lom.

¹⁵ Yeisuw nagamag, tayakelesiys mwasanin nisesus Lom; bo iliganes livnem yakamey bo bakan Lom, mo imeis waked silmanin bakalouvat; e, imekemas ven yagan Apiyos Maket, o kweitan ven Buntuman Masis Bunatoun. Pawl ikines budan tasiyas mo ikalin nuwan Yowbad waseg, ibwein amnan.

¹⁶ Kasap Lom, gabman mo itam Pawl nabunatum tatonen vagan kid bisikes son takanaviy teitan bikayyamat.

Pawl igeiguy ven Lom waseg

¹⁷ Yam kweitoun nein wankuyeim mo idawes min-Yudiy situwaveks bimeis. Ikatuyouns imeis, mo idibakes, ilana, “Tuwag yakamiy; ye makava asiw wadeil. Nag aveiyag avag sidayas wasigeis, o nag apiyev datammwayas asisinap, nag. Tage bo iyousigs Yelusalem waseg mo itameigs mina-Lom takaleiwags wasigeis.

¹⁸⁻¹⁹ “Bo iyateleigs, nag go ibanes agusinap kalbaleb, nag. Tasiyas mina-Lom takalei-wags idokes bweina basap wamnat banoun; tage min-Yudiy ilansa, ‘Awoum. Kuweiys

taw towen, peinan takalbaleb.' Mapuna alivan, alana, 'Sivinag Sisal bikaleiwag.' Nag sivinag bayateles min-Yudiy wamatian Sisal; nag. Gunaked kaditanok-wan, ked towen waseg manoy.

²⁰ O silawun gunyatāl towen sivinag bitalivans sigwey yakamiy, mapun to nadaweimiy bukumeis waseg yey. Kukines agusen wanamag niyawanis, o min-Yisleil yakids tanmises Yowbad igaw mo bikatinabweids, o inawotet towen silmanin yey nasiw wadeil."

²¹ Tasiyas ikatimapus aygan, ilansa, "Min-Yelusalem nag ileles malet vagan bika-timlakemas livaneim yak, o min-Yudiy meinoy nimeis palawen, livaneim kalbaleb nag isekemas, liwon waseg o asilivan waseg, nag.

²² "Sivinem bakaligen nanoum yakoum, peinan kakakin ven babaw gimgilis ivtokays livan sinap towen waseg, Yeisuw nagamag amisinap."

²³ Ikaleiwags kweitan yam igaw mo bimeis biliganes Pawl anilivan. Yam towen nimeis wanbunatum, singaya babaw gamag. Gaboug islamaw anilivan, ee... in kwayav mo iyakous. Yowbad nakaleiwag livanen nisekes. Moses nakaleiwag ivin, o tasiyas palopits sikaleiwag ivin, ikatimlakes wawun asilivan, vagan kid bisimounids Yeisuw waseg.

²⁴ Mwasanin gamag mo iliganes anilivan Pawl, isimounids; mwasanin nag, ipiyaves.

²⁵ Ta-mawan ninous bilatanes bimlavags katanok-wan, mo inounas. Nakabiyokous Pawl anilivan mawan, "Mounid anilivan Yowbad Kululuwan tamumwey wasigeis. Palopit towen Isaya nikatipel nisekes anilivan towen-an.

²⁶ "Ilana, 'Kunekes gamag tasiyas,

kudibakes mawan:

Bukuliganes, tage nag bukukwakins.

Bukukines, tage nag bukuwtusis.

²⁷ Peinan gamag tasiyas ninous bo imouvit, bo ituy tiges; bo ikaw mites; mata ge mites waseg beikins, o tiges waseg beinegs, bikakins mo bikanavin ninous, bavages kid beibweins tasiyas. Nag gog.'

²⁸ "Kadiloka bukukwakins Yowbad anilivan bo nisekem yakamey, ikayabem, bakan tobwag ven gimgilis bakasekes; tasiyas bo biliganes; e, Yowbad mo bisiwyoubus tasiyas, bikatinabwes." ²⁹ (-)

³⁰⁻³¹ Akweiy bweylim Pawl misik wanbunatum tatonen, peinan bo iyamiyis bunatum towen; nikaypuls siney tabebaws tasiyas ininekes, bo iguyes Yowbad nakaleiwag waseg, o ikatimlakes sinapun daGuyaws Yeisuw Kelis. Bwein-wan illivan, peinan nag teitan gamag isilbwed anilivan.

LOM

Let towen Pawl nilel mina-Lom pines, vagan bikakins sinapun tapwaloul; ilana, “Babaw yakids adsinaps kalbaleb. Kukin gog bitasimounids Yeisuw Kelis waseg mo biwi-dids adsinaps kalbaleb waseg, bikidumwäluds kid, silmanin mwamovads nag beikous.”

Kweiboug mawan, mtowen Ebelam isimounid Yowbad waseg, mapuna Yowbad idok kid tadidumwal towen.

Kweiboug Yowbad nakaleiwag vagan bitakakins adsinaps kalbaleb. Kukin gog bitasimounids Yowbad waseg, Kululuwan mo bisekeids kweivaw adsinaps, tawtoun, bwanabwein.

Wankuyeim Pawl ilel livanen Yowbad nakaleiwag silmanin min-Yudiy. Ilel-vak livanen tayakesiys yakids adsinaps ven watinow waseg.

Nakabsilamaw

¹ Yey Pawl, Yeisuw Kelis natouwat yey; Yowbad bo ikaluweg gunawotet, silmanin bakokew livanen Yowbad; livan towen bwanabwein.

² Livan towen bo ilivnek isekes inapalopit wasigeis, mo ileles Bukitab waseg.

³ Livan towen livanen Yowbad Natun, Deibid delen ven watinow waseg.

⁴⁻⁷ Tage takakins mtowen Yowbad Natun tatonen. Natawtoun nises, peinan Kululuwan Yowbad nises waseg. Kanig waseg ikit vayuwein, mo takakins Yowbad Natun, mtowen daGuyaws Yeisuw Kelis. Mtowen bo isiwyoobum, isekem mawotet mo kakokew livanen, ven babaw iliganes mo isimounids yagan Kelis waseg. Yakamiy-vak, ven babaw gimgilis Yowbad bo idaweimiy vagan bukumlavags Yeisuw Kelis angamag yakamiy. Mtowen Yeisuw Kelis bo idaweimiy mina-Lom yakamiy, kalisiy Yowbad nikalin nuwan wasigeis yakamiy; mamagina bo ikayuseimiy angamag yakamiy. Mtowen daGuyaws Yeisuw Kelis son Tamads Yowbad bisiwyoubumi mo beitaw nuwamiy.

Pawl sivinan beikin ven Lom

⁸ Kalin nuwag waseg Yowbad, peinan tababaws yakamiy kusimounids bwein waseg Yeisuw Kelis; butumi y bo nein ven babaw wasigeis.

⁹⁻¹⁰ Yowbad ikakin agulivan mounid, bo iseiw nuwag Natun bulagan akokew. E, mounid aninuweimiy tut babaw, aninitoug pinamiy, kukin nanon Yowbad mawan mo bitam gunaked bwein bawekeimiy. E, gunakanitoug mawan.

¹¹ Sivinag gog bakineimiy bakatimweis kululuwamiy, Yowbad nasiwayoub waseg, vagan bukutawtouns.

¹² Mamagina bitalabeids meiveka yakids, yakamiy o yey, peinan tasimounids Yeisuw waseg.

¹³ Sigwey, awoum kutagouweweigs peinan tut babaw ivag sivinag baw; ayyokon gog, bo nag, peinan gunaked nag. Sivinag baguyeimiy mo bukusimounids mwasanin yakamiy, mawan vena babaw aguyes mo isimounids.

¹⁴ Kadiloka baguyes gamaga babaw, takinew mina-Gilis, o takinew min-koyakoy gimgilis; takinew tassinaps, o takinew tablabols; baguyes asibabaw-wan.

¹⁵ Yakamiy-vak mina-Lom yakamiy, bo iseiw nuwag basekeimiy livan towen bwanabwein.

Livanen Yeisuw Singaya Tawtoun

¹⁶ Akakin-wan livanen Yeisuw Kelis singay tawtoun. Livan towen waseg, Yowbad bikatinabwes gamag, kalisiy tasiyas bisimounids waseg, wanmugwana min-Yudiy yakamey, wankuyeim mo vena babaw gimgilis yakamiy.

¹⁷ Livan towen waseg ikamat Yowbad ansinap didumwal, Yowbad itoukum pines tasiyas isimounids waseg, peinan Bukitab livanen nises mamagina:

“Kal yak tadidumwal yak, peinan kusimounid Yowbad waseg, mo bukuban mumwamov.” Misinaka tasimounid; nag kweitan ked nises.

Gamag asisinap kalbaleb

¹⁸ Gamag mwasanin asisinap kalbaleb, issilbwades sinap mounid. Takakins gog libalab tanuwagan bikamtanis peinan ansinap bo ipiyaves; asisinap gog tasiyas kalbaleb.

¹⁹ Sinapun Yowbad bo ikamnat wasigeis tasiyas, peinan bo ikatimlakes.

²⁰ Takines bwein nakabwabub Yowbad, nibun natawton tonen waseg, e, natawtoun bo isigeg-wan; mapuna nanouds waseg takakins Yowbad; matads nag bikin, misinaka nanouds. Kweiboug ibun ven, gamag ikines, tut babaw mawan ee... nagein mo takines yakids. Tasiyas ikines inakabwabub, kadiloka bikakins tabunin Yowbad, nag gog itagouwawes.

²¹ Kweiboug ikakins Yowbad tage nag iyakawns waseg, nag ikalin nuwes, nag. Tage ininuways sinap tobwag waseg, mo ninous ibol, mamagina bo idadubs tasiyas.

²²⁻²⁴ Idokes tassinaps tasiyas, tage bo ikabalaweins, ibubunis siyowbad, magin mawana gamag o mansiyas man iyoows o mansiyas inounas waven o itatets wapwepway, atimapun Yowbad ibunis. Tage Yowbad towen ises isigeg, yakawanan avakaein, ipiyaves, ilisawes; o aw-sinap kalbaleb wous sivinan bivages, sisiyas wasigeis mo ivages, iyagages wous sisiyas.

²⁵ E, asisinap mawan, peinan sinapun Yowbad bo ipiyaves, bo iyyaweids tasiyas, ikululs wamatian youd towen nibunis, ikanawes aygan, bo ipiyaves Yowbad tatonen. Yowbad bo ibun youd babaw. Kadilokena bitakavasis Yowbad tut babaw. Eimen.

²⁶ Mapuna Yowbad bo ipiyaves, ilisawes igaw bivages kalbaleb, mawan asivikey bivages mawan. Vinay bo ipiyaves kanavay sisiyas tawaw; tatineisa ikanavays sisiyas wasigeis.

²⁷ Tawaw mawan bo ipiyaves kanavay wasigeis sikwavas, tage singay sivines bikanavays wasigeis tawaw, mo iyagagays sisiyas wasigeis. Kalbaleb towen mapun tatineis mo ibanes, wawous.

²⁸ Peinan nag ivag sivines, mo ipiyaves-vak Yowbad. Mapun Yowbad bo ipiyaves tasiyas, vagan bininuways kalbaleb mo sinap tobwag bivages.

²⁹⁻³¹ Mo ikalawt ninous sinap kalbaleb waseg, asisinap kaydodog, mwamon mites, takapidabs tasiyas, singay ikammeiliws, o iwaweiys sisiyas, ikammnimans, ikatidavidavs, ivtokays livan, isilponays o isilakods, ikamliwes Yowbad; bo bipiyaves aygan mo ikaypamwes asisinap, inineivs kid asisinap kalbaleb, ipiyaves ages timsiyas o insiyas; nag ikakins sinap bwein, nag isimounids, nag ikalin nuwes gamag wasigeis; nag inok nuwes, nag.

³² Bo ikakins Yowbad nakaleiwag kadiloka bimtamats tasiyas asisinap mawan, igawa ivvaluts sinap towen waseg, mo ikavasis sisiyas kalisuy asisinap mawan.

2

Yowbad nakaleiwag bwanabwein

¹ Kal yak kwasigum soum, magina kwasigumim tatoneim, peinan amsinap kalbaleb mawana towen. Ta-mawan bukwatimop aygan takaleiwag towen bikamtanim.

² Taninuways Yowbad ansinap, bweina bikamtanis takalbalebs, siyas nalel asisinap.

³ Awoum wananoem bukulana, “Bweina bakasigum takalbaleb mo bawtel mawan ansinap towen, Yowbad igaw bikamtan towen, yey gog nag.” Awoum kulivan mawan.

⁴⁻⁵ Awoum kudokes tougwey Yowbad, peinan singay iyamanum waseg yak, ikapatul, ikalin nuwan yak. Iyamanum waseg yak vagan kid bukulavew amsinap kalbaleb. Nag gog, singay takakon yak, mapun singay Yowbad bikatimop amsinap kalbaleb, igaw tutan bikatkines gamag asisinap, inakaleiwag didumwal waseg.

⁶⁻⁸ Yowbad bimapuds tatanok tatanok yakids mawan dawotets. Kukin bitawotet bwein o bitakapatul vagan bitakamnat o Yowbad bikavasid o mwamovad bisigeg, e, Yowbad mo bisekeid mwamovad nag beikous. Tage kukin bitanineiv daked tatoneid, o bitapiyev Yowbad ansinap mounid, o bitakanaway sinap kalbaleb, e, mo singay Yowbad bikamtanid.

⁹ Kalisiy gamag takalbalebs simouvit mo bilivatus, abes singay bigeg, wanmugwana min-Yudiy, wankuyeim ven babaw gimgilis.

¹⁰ Tage toubweins bilivatus sikamnat son yakawanes mo beitaw nuwes, wanmugwana min-Yudiy, wankuyeim ven babaw gimgilis.

¹¹ Yowbad nakaleiwag ven babaw wasigeis katanoka ivkek.

¹² Min-Yudiy ikakins Yowbad nakaleiwag; kukin beivag asisinap kalbaleb mo bim-tamats, peinan bo isiplaves Yowbad nakaleiwag. Ven mwasanin gimgilis nag ikakins Yowbad nakaleiwag, bivag asisinap kalbaleb mo bimtamats-vak tasiyas.

¹³ Tasiyas Moses nakaleiwag iliganesa mav, nag mamagina tадidumwals tasiyas, nag Misinaka takanaweins Moses nakaleiwag, Yowbad mo bidok tадidumwals tasiyas.

¹⁴ Tobwag ven gimilis kalisiy nag ikakins Moses nakaleiwag, tage tatineis-wan biwteles bo mawan Moses nakaleiwag, mo ivag sikaleiwag ibwein wasigeis tasiyas.

¹⁵⁻¹⁶ E, bitakin kaleiwag bwein waninous, o ninous tatineis ikatimlakes mo ikakins takinew asisinap kalbaleb, o adok bwanabwein. E, ninous bikatimlakes, igaw tutan Yowbad bikatukin nanouds aveiyag nitasowum nises. E, Yowbad bidibek Yeisuw Kelis mo bikatukin, bikaleiwag, mawan allivan, aggeiguy livanen Yowbad bwanabwein.

Min-Yudiy Moses nisekes sikaleiwag

¹⁷⁻²⁰ Kal takatimlakay yak bukudokeim kid gum-Yudiy yakoum, o kudoki Moses nakaleiwag bikatinabweim, o tagagas yak peinan Yowbad nagamag yak, o nanon Yowbad kukwakin o Moses nakaleiwag kukwakin ikous, mapuna kukwaves aw-sinap bwanab-wein, o kukwakin tamgwayein kaw yak, o tadarubs sikamnat yak, o takatimlakein sinap tablabols wasigeis o gamagal wasigeis, peinan Moses nakaleiwag waseg kudoki sinap mounid nises.

²¹ Yak kukwatimlakes gamag mwasanin, adok nag bukwatimlakeim tatoneim. Kuguyes gamag awoum bibakews, adok bo kubakew, ne?

²² Kulana, “Awoum kwaninavay mav,” adok bo kwanavay mav, ne? Kwasigum tobwag yowbad, adok bo kubakew waseg tobwag yowbad nabunatum, ne?

²³ Kukwayapam sinap peinan kukwakin kid Moses nakaleiwag, adok bo kusiplev nakaleiwag, magina kuyageg Yowbad ne?

²⁴ Bukitab waseg livneimi min-Yudiy yakamiy, mamagina:

“Ven mwasanin gimilis bo iyages Yowbad yagan,
peinan amisinap kalbaleb.”

²⁵ Ebelam nakabivatus kubwabwes momwamiy. Sinap towen bwein magat buwanawes Moses nakaleiwag. Kukin gog bukusiplaves Moses nakaleiwag, nag bivag mikabivatus, bo biyadeveimiy.

²⁶ Mawan magin, kukin kal nag ivag Ebelam nakabivatus mo ikanow Moses nakaleiwag, tadok nakabivatus Ebelam waseg gamag towen, ne?

²⁷ Gamag tasiyas nag Ebelam nakabivatus wawous tage ikanawes Moses nakaleiwag, mo biyateleimi peinan nakabivatus wawoumiy o Moses nakaleiwag buk-nen nises wasigeis yakamiy, o kusiplaves gog.

²⁸ Kavel bibob momwan mawan gum-Yudiy tage nag gum-Yudiy tatonen. Ebelam nakabivatus wakaleivim-wan nag ikadilok, nag.

²⁹ Tage gum-Yudiy wanuwan mounid gum-Yudiy tatonen; o Ebelam nakabivatus kadiloka beisiw wakateid o wakululuwad, kaleivid awoum. Yakawanads Yowbad waseg, nag gamag wasigeis.

¹ Adok Yowbad singay bilabeids peinan min-Yudiy yakids, ne? Ikalin nuwan peinan Ebelam nakabivatus wawouds, ne?

² Magen, bo ilabeids youd babaw waseg. Nakabsilamaw waseg, Yowbad nilivnek anilivan min-Yudiy wasigeis.

³ Min-Yudiy mwasanin mo isiplaves aygan Yowbad, tage Yowbad nag ibob ansinap didumwal wasigeis yakids.

⁴ Nag. Magat babaw gamag bitakapidabs, Yowbad mo bisesuna tадidumwal tonen. Livанen Yowbad nises mamagina:

“Amlivan bakanuw mo bakaban amsinap didumwal,
o igaw yatal waseg bukutawtoun mo bukutamap yak.”

⁵⁻⁶ E, taninuways adsinaps kalbaleb mo takakins Yowbad ansinap didumwal, wankuyeim tabta bitalivans, talansa, “Yowbad takalbaleb, peinan ikawkuneids”? Awoum bitalivans mawan. Livan kalbaleb. Gamag mwasanin asisinap mawan. Kukin Yowbad ansinap bigeg, ta-mawan bikatukin wasigeis gamag yakids.

⁷⁻⁸ Tayyaweids mwasanin ilansa, “Pawl imageiguy mamagina,
‘Bayaweid singay mo bitakakins Yowbad ansinap mounid, mapuna bitakavasis.
Adok awoum biyateleig peinan agusinap kalbaleb. Kadiloka beivag adsinap kalbaleb
vagan kid Yowbad ansinap bwanabwein mo bisap.’”
Tayyaweids mwasanin idokes gungeiguy mawan. Kadilok Yowbad bikamtanis peinan asilivan mawan.

Nag kal ansinap didumwal

⁹ Amawan? Tabta min-Yudiy yakids bitamugwas? Nag. Agulivan mamagina adsinaps kalbaleb, babaw yakids, takinew min-Yudiy, o takinew ven babaw gimgilis tasiyas.

¹⁰ Livанen nises mamagina:

“Nag kal ansinap didumwal.

¹¹ Nag teitan ikakin; nag teitan inineiv Yowbad.

¹² Asibabaw bo ipiyaves inaked, ininounas ked kalbaleb waseg;

Nag anmwanet gamag ansinap bwanabwein, nag.

¹³ Asilivan kalbaleb, wudos mawan alawag,

Wudos waseg ikatidavidavs.

Mwatet napwatuw yayanen wawudos nises.

¹⁴ Wudos bo ikalawt bwalat son sinap yayan.

¹⁵ Bo iseiw nuwes anaway gamag.

¹⁶ Ininounas, igugweileks youd babaw.

¹⁷ Niwal inaked nag ikakins.

¹⁸ Nag bikakins Yowbad; nag bigoulus, nag.”

¹⁹ Bukitab anilivan towen silmanin tasiyas wanuwan Moses nakaleiwag, vagan Yowbad bibob adilivans, o ven babaw yakids mo bitakakins adsinaps kalbaleb.

²⁰ Nag kadilokeid bitakanow Moses nakaleiwag vagan bitasesuna wamatian Yowbad tадidumwal yakid, nag. Kaleiwag towen bikatimlakeid mo takakin adsinap kalbaleb.

Tasimounids waseg Yeisuw mo ivag adsinaps didumwal

²¹ Tut towen takakins didumwалun Yowbad inaked kweitan. Moses nakaleiwag nag mawanaka ked towen, nag; tage livанen ked towen nises Moses nakaleiwag waseg, o tasiyas palopit sikalelel waseg.

²² Ked towen, bitasimounid waseg Yeisuw Kelis, mo Yowbad bisekeid didumwal tonen. Gamag babaw yakids idakeds katanok-wan.

²³ Babaw yakids adsinaps kalbaleb; Yowbad nakannat bo ilisaweids.

²⁴ Nasiwayoub mo ikatinabweids Yeisuw Kelis waseg, mo tamlavags tадidumwals yakids.

²⁵ Yowbad bo itam Yeisuw mamagina lun bulukwan buyavin biwid adsinaps kalbaleb, magat bitasimounids waseg. Lun towen waseg, Yowbad ikamtilakeids ansinap didumwal, peinan bo ikaltuwen adsinap kweiboug kalbaleb.

²⁶ Bo ikapatul wasigeis yakids mo takakins ansinap didumwal, tut towen ikidumwалuds ansinap didumwal waseg, peinan tasimounids waseg Yeisuw.

²⁷ Tabta bitakaypamwes adsinaps waseg? Adok nag. Aveiyag wawun? Adsinaps waseg nag bitamlavags tадidumwals; misinaka bitasimounids waseg Yeisuw mo bitamlavags tадidumwals yakids.

²⁸ Mapuna takkins misinaka bitasimounids waseg Yeisuw mo bitamlavags tадidumwals; sinapun Moses nakaleiwag waseg nag aveiyag bitabanes.

²⁹ Tabta Yowbad misinaka min-Yudiy daYowbads? o adok vena babaw siYowbad? Mounid vena babaw siYowbad.

³⁰ Magen, Yowbad anmwānet, mapuna bikidumwāluds min-Yudiy yakids peinan tasimounids Yeisuw waseg, o bikidumwālus vena babaw gimgilis peinan isimounids Yeisuw waseg.

³¹ Tabta bitasimounid waseg Yeisuw mo bitagulekjes Moses nakaleiwag? Nag. Bitakatimweisis mo bitawtoun.

4

Livanen Ebelam

¹ Bitaninuways tabuds ven watinow, yagan Ebelam. Amawan bitalivans?

² Kukin Ebelam ansinap didumwal peinan nawotet bwein, kadiloka bikaypom ansinap; tage nag kadilok bikayapam wamatian Yowbad, nag.

³ Aveiyag Bukitab nilivan? Ilana:

“Ebelam isimounid Yowbad waseg, mapuna idoki tадidumwal.”

⁴ Kukin bitawotet, maysad nag mamagina siwayoub, nag; maysan dawotet.

⁵ Kukin nag bitawotet, misinaka tasimounid waseg towen takidumwālun dakalbaleb yakid, mo bidokeid tадidumwal yakid.

⁶ Mawan-vak Deibid anilivan bwanabwein wasigeis gamag kalisiy nag iwotets vagan Yowbad bikidumwālus, ilana:

⁷⁻⁸ “Bweina kumwāsaws yakamiy peinan bo inumlev amisinap kalbaleb, bo iwid.

Kumwāsaws peinan daGuyaws nag binuway amisinap kalbaleb.”

⁹ Tabta ilivan mawan misinaka min-Yudiy bimwāsaws peinan Yowbad biwid asisinap kalbaleb, o adok vena babaw gimgilis. E, taninuways.

“Ebelam isimounid Yowbad waseg mo idoki tадidumwal.”

¹⁰ Avei-tut waseg mo nidoki tадidumwal? Misumkwey nivag nakabivatus? Nag. Idoki tадidumwal, bweilim mwasanin ikous mo Yowbad isek nakabivatus.

¹¹⁻¹² Kweiboug nag ivag nakabivatus, tage isimounid Yowbad waseg, mo idok tадidumwal; wankyeim mo isek nakabivatus, mamagina naman mulin towen, peinan bo idok tадidumwal. Takinew bitakow Ebelam nakabivatus, o takinew nag bitakow, deisa tasimounid waseg Yeisuw, mo Yowbad bidokeids tадidumwals o bitamlavags Ebelam tibun yakids, takinew tobwag ven gimgilis yakamiy, o takinew min-Yudiy yakamey. Yakamey Ebelam nakabivatus wawom nises. Magat bakasimounid mo bakamlavag Ebelam tibun mounid. Kukin gog nag, bo nag. Peinan kweiboug Ebelam nag ivag nakabivatus, isimounid mo Yowbad idoki tадidumwal towen.

Bitasimounid Yowbad waseg mo bitalivet youd bwanabwein

¹³ Yowbad bo ilivnek Ebelam siney tibun igaw bikawes ven babaw watinow, sikiyay tasiyas. Nag ibanes sikiyay towen peinan ikanawes Moses nakaleiwag, nag. Deisa isimounids waseg Yowbad, to nidoki tадidumwals tasiyas, mo ibanes sikiyay towen.

¹⁴ Amawan bitaban dakiyays? Bitakanow Moses nakaleiwag, o adok bitasimounid Yowbad anilivan to nilivnek? Adok bitasimounid-wan. Tasiyas idokes bikanawes Moses nakaleiwag mo bibanes, nag gog; tasiyas bo ibwabwes simounid waseg Yowbad anilivan to nilivnek.

¹⁵ Moses nakaleiwag nitasipley mapuna Yowbad bikawkuneid. Magat kaleiwag nag, nag beivag adsinap kalbaleb.

¹⁶⁻¹⁷ Tasimounids mo bitabanes youd towen bwanabwein. Yowbad bo ilivnek youd towen bisekeids peinan nasiwayoub avakaein wasigeis yakids. Ebelam delen mounid

bikawes. Tasiyas takanaweins Moses nakaleiwag mwasanin sisiyas yakids, peinan tasimounids mawana Ebelam nisimounid waseg Yowbad; mamagina Ebelam tabuds babaw yakids. Livānen Ebelam nises mamagina,

“Bo akatigikeim ven babaw tibus yakoum.”

Youd towen Yowbad nilivnek bo bisek Ebelam delen, peinan bo isimounid wamatān Yowbad, taykitun takanigs; mtowen bidibek aveiyag makaw, bilana, “Kusap,” mo bisap.

¹⁸ Innamis vagan biban natun. Innamis-wan ee... bo itovek, igaw-wan innamis, peinan isimounid mo bimlavag tibus ven babaw, peinan Yowbad anilivan mamagina: “Deleim igaw mo bibabaw.”

¹⁹ Ininuway ee... ikakin wāwon, ilana, “Bo atovek; kakita bakanig. Agbewilim bo imlavag lakatutan.” E, inuway nakwaw Sela peinan vinakal; tage nag igwey, isimounid-wan waseg Yowbad.

²⁰ Nag ipiyev simounid, peinan iysiyous Yowbad anilivan waseg; tage iyākawn waseg Yowbad mo nasimounid itawtoun.

²¹ Singay isimounid, ikakina Yowbad ikadilok biwtel māwana nilivnek.

²² Isimounid waseg Yowbad mapuna mo idok tадidumwal towen.

²³⁻²⁴ Livan towen “Idok tадidumwal towen” nag ilel peinan Ebelam anmwanet tадidumwal. Yakids-vak peinads. Igaw bitasimounid waseg Yowbad to nivag daGuyaws Yeisuw ikit kanig waseg, mo bidokeid tадidumwal yakids.

²⁵ Bo iweijs Yeisuw adsinaps kalbaleb peinan, ivag mo ikit vagan kid mo bikidumwālud.

5

Yowbad ikidumwāluds mo tamwāsaws

¹⁻² Tasimounids waseg Yeisuw, mapuna Yowbad bo ikidumwāluds. Kadiloka bitamsamwas waseg Yowbad, peinan daGuyaws Yeisuw Kelis bo nilabeids mo tabānes Yowbad nasiwayoub, waseg tasinis bwein. E, bitamwāsaws, peinan bo bitasiws Yowbad wanakamnat waseg.

³⁻⁵ Bitamwāsaws-vak peinan gamag biyageids. Biyageids mogo takaptuleids-wan, takaptuleids bo beivag adsinaps bwein, o bitanamis vāgan Yowbad bilabeids. Nag bitanamis mav, peinan Yowbad bo isekeids Kululuwan Bwanabwein, waseg bo ikatimweis nasiwayoub, mo ivakaein wasigeis yakids.

⁶ Kweiboug igaw tougwey yakids, bo ilouvat anatut, Kelis nikanig silmanin takalbalebs yakids.

⁷ Adok nag kal bikanig vagan bileb tадidumwal teitan, nag. Adok bitatawtoun-wan mo bitakanig vagan bitaleb teitan ansinap bwein.

⁸⁻⁹ Singay gog Yowbad nisiwyoubuds peinan Kelis ikanig peinads, kweiboug igaw takalbalebs yakids. Buyāvin Kelis waseg mo ikidumwāluds, mo bikatinabweids Yowbad nakavikun wasigeis yakids.

¹⁰ Kweiboug nitakamliwes Yowbad, tage Natun mo ikanig mamagina lun bulukwan mo tamsamwas sods Yowbad; towen Kelis mo bikatinabweids, mwamovan tonen waseg.

¹¹ E, mo tamwāsaws waseg Yowbad peinan daGuyaws Yeisuw Kelis iluns son Yowbad mo tamsamwas babaw yakids.

Adam ansinap kweitan: Kelis ansinap kweitan

¹² Tatanok gamag waseg sinap kalbaleb nisilamaw wadaban pwepway, mapun kanig mo isap. Babaw gamag takankānigs peinan meivek yakids adsinaps kalbaleb.

¹³ Kweiboug Moses nakaleiwag nag, gamag asisinap kalbaleb; tage nag idokes asisinap kalbaleb, peinan kaleiwag nag.

¹⁴ Tutan Adam waseg kanig itawtoun wasigeis gamag oko in ilouvat Moses inatut waseg. Kanig bo itawtoun wasigeis tasiyas asisinap kalbaleb māwan Adam ansinap,

sisiyas tasiyas asisinap kalbaleb kweitan kweitan. Taninuways Adam waseg kabebay nises, peinan Adam mamagina teitan gamag. Tayuwein gog wankuyeim mo neim.

¹⁵ Yowbad nasiwayoub nag mawan Adam ansinap kalbaleb; kweitan-wan. Adam ivag ansinap kalbaleb mo babaw ikankanigs; tage singay Yowbad nasiwayoub singay mo itam tayuwein gamag mtownen Yeisuw Kelis, mo ikatimweis nasiwayoub singaya avakaein wasigeis yakids adbabaws.

¹⁶ Kweiboug teitan gamag ansinap kalbaleb, gamag babaw mo ivag asisinap kalbaleb; Yowbad mo ikamtanis. Tage Yowbad nasiwayoub anagin kweitan, waseg ikidumwäluds yakids, adsinaps babaw kalbaleb.

¹⁷ Teitan gamag kweiboug ansinap kalbaleb, mapun kanig mo itawtoun wasigeis gamag; tayuwein gog, Yeisuw Kelis, bo biyamoves tasiyas itams nasiwayoub avakaein waseg, peinan nag kweitan maysan tasekes, tage makava ikidumwäluds.

¹⁸ Taninuways teitan ansinap kalbaleb mo Yowbad bikamtan gamag babaw wasigeis. Tayuwein mawan, inawotet didumwal mapun tamwamovs o tadiendumwals tababaw yakids.

¹⁹ Teitan bo isiplev Yowbad aygan, babaw gamag mo ikawes ansinap kalbaleb. Wankuyeim tayuwein ikanow Yowbad aygan mo bitamlavags tadiendumwals, yakids babaw.

²⁰ Moses nakaleiwag isap mo ikatimweis kalbaleb sinap ivakaein. Sinap kalbaleb ikatimweis ivakaein, tage Yowbad nasiwayoub singaya bo ikatimweis, ivakaein singay.

²¹ E, taninuways. Sinap kalbaleb mapun kanig bo itawtoun wasigeis gamag. Yowbad nasiwayoub mo bitawtoun wasigeis gamag peinan ikidumwäluds vagan bitamovs bitasi-gagas, peinan daGuyaws Yeisuw Kelis nasiwayoub wasigeis yakids.

6

Talatans waseg Kelis

¹ Amawan? Adok bitavvaluts adsinaps kalbaleb waseg vagan Yowbad biwdiwid, mamagina nasiwayoub bikatimweis wasigeis yakids, ne?

² Nag. Sinap kalbaleb bo ikanig wasigeis yakids; ta-mawan bitavvaluts waseg.

³ Kuninuways peinan tababaw yakids nibaptayseids Yeisuw Kelis waseg, nitalatans sods, inakanig waseg.

⁴ Mawan nidibwanis Yeisuw, bo nibaptayseids mamagina nidibwanids takanigs yakids. E, mawan Tamads natawtoun waseg iyakit Kelis, mawan magin bo iyakituds, mo tanounas, mwamovads kweivaw waseg. E, bo nitamtamats sods Kelis vagan tut towen bitabanes mwamovads kweivaw.

⁵ Nitakanigs mamagina talatans sods Kelis, nakanig waseg; mapun mo takits vayuwein, mamagina talatans sods Kelis, nakabeikit waseg.

⁶ Taniniways adsinaps kweiboug bo ikatimet son Kelis, mo ikous woud kalbaleb nakaleiwag, peinan ilikuds sinap kalbaleb ankaleiwag wasigeis yakids.

⁷ Bo ikous sinap kalbaleb nakaleiwag wasigeis tasiyas takanigs.

⁸ Nitakanigs sods Kelis mapuna tamwamovs sods Kelis. E, tasimounids mawan.

⁹ Taninuways Kelis nakanig, waseg itamanaw, nag vayuwein bikanig. Kanig nakaleiwag bo ikous waseg Kelis.

¹⁰ Sivtanok ikanig, sinap kalbaleb silmanin; tut towen mo imov silmanin Yowbad.

¹¹ Yakamiy-vak, kadiloka kudokeimiy takanigs yakamiy silmanin sinap kalbaleb; awoum bukuvgavaws; tage kumovs simiy Yeisuw Kelis, silmanin Yowbad nawotet.

¹² Awoum sinap kalbaleb bikaluweg woumiy ven watinow; awoum bukwanawes aygan, aveiyag sivinan bivag.

¹³ Awoum kutames woumiy wuliyougwan vagan biwtel sinap kalbaleb nawotet, tage kutams Yowbad nawotet waseg, peinan bo niyamoveimiy mikanig waseg, o kutames woumiy wuliyougwan silmanin Yowbad nawotet didumwal.

¹⁴ Awoum ge sinap kalbaleb bikaleiwag wasigeis yakamiy, peinan dakaleiwags kweivaw, siwayoub waseg. Moses nakaleiwag bo ikous wasigeis yakids.

Kadiloka kutams sinap bwein silmanin

¹⁵ E, dakaleiwags kweivaw waseg siwayoub. Tabta beivag adsinaps kalbaleb peinan bo ikous Moses nakaleiwag wasigeis yakids, ne?

¹⁶ Nag. Tabta kukwakins igaw bukutams mitovek waseg, bukukwanawes aygan, mo bukumlavags natouwats. Takinew mitovek yagan sinap kalbaleb, mapun mo bukubanes kanig. Takinew gog mitovek yagan toukum, mapun mo bukubanes amisinap didumwal.

¹⁷⁻¹⁸ Kalin nuwag Yowbad. Kweiboug sinap kalbaleb natouwat yakamiy, mo kateimiy nukutames waseg livanen Yowbad. Bo ikous sinap kalbaleb nakaleiwag wasigeis yakamiy, mo sinap didumwal ikaleiwag wasigeis yakamiy.

¹⁹ Allivan mamagina sinapun ven watinow waseg, peinan ninoumiy igaw bulabol yakamiy. Kweiboug nukutames woumiy wuliyougwan silmanin sinap kalbaleb biktawis bivakaein wasigeis yakamiy, kadiloka kutames silmanin sinap didumwal mo bukukawes Yowbad anmwanet nawotet.

²⁰ Igaw kweiboug sinap kalbaleb natouwat yakamiy, sinap didumwal nag ikaleiwag wasigeis yakamiy, nag.

²¹ Tut gog towen amimwasin peinan nukuvages mawan. Tage lalan bo kubanes tan? Adok nag. Maysan sinap towen yagan kanig.

²² Tut towen bo ikous sinap kalbaleb nakaleiwag wasigeis yakamiy, mo nukumlavags Yowbad natouwat yakamiy, lalan bo kubanes Yowbad inakamnat, nakabiyokous waseg mwamovamiy nag beikous.

²³ Sinap kalbaleb maysan kanig; tage Yowbad bo isiwyoobuds daGuyaws Yeisuw Kelis waseg, mwamovads nisekeids nag beikous.

Veivay kabebay-nen

¹ Sigvey yakamiy, kulinuways Moses nakaleiwag. Bo kukwakins Moses nakaleiwag, ne? Igaw bitamtamat mo beikous kaleiwag towen waseg yakid.

² Kavel manawen navaveig kadiloka bisesus son namwan, peinan Moses nakaleiwag mawan. Igaw namwan beimat mo beikous kaleiwag-nen veivay, peinan bo imlavag nakwab.

³ Tage igaw namwan nises, kokin binek tobwag taw, mo bimlavag naggeinawl. Tage kokin namwan bikanig mo beikous veivay kaleiwag-nen, bweina bivevaw son tayuwein taw. Nag bimlavag naggeinawl, nag.

⁴ Yakamiy mawan, won Kelis waseg, mamagina nukumtamat, mo ikous Moses nakaleiwag wasigeis yakamiy. Mamagina mitovek kweiboug bo imat. Mitovek kweivaw nises, mtowen neikit kanig waseg vagan mo bitawteles beibwein nawotet Yowbad.

⁵ Yakids kweiboug igaw mamagina ven watinow gimgilis yakids, Moses nakaleiwag bo iyakit nanouds silmanin sinap kalbaleb, wouds wuliyougwan mo iwotet kalbaleb, maysan mo talivatus, yagan kanig.

⁶ Tage mo ilik Moses nakaleiwag wasigeis yakids, mamagina inadeil wanuwan takanigs vagan beikous deil nakaleiwag wasigeis yakids, mo tasaps taneis wamnat. Bo ikous Moses nakaleiwag wasigeis yakids, towen nilel wabuk, tage takanawes kaleiwag kweivaw, Kululuwan mwamov-nen waseg.

Moses nakaleiwag livenen

⁷ Aveiyag bitalivans? Tab tadokes Moses nakaleiwag mamagina sinap kalbaleb, ne? Nag. Tage kokin kaleiwag nag, nag bakakin sinap kalbaleb. Kaleiwag kweitan mamagina: "Awoum kupwakit soum navavag."

Kokin nag beivag kaleiwag towen, nag bakakin pwakit.

⁸ Tage Moses nakaleiwag bo ileb sinap kalbaleb waseg yey, mo avag pwakit babaw. Magat kaleiwag nag beivag, nag bitakakins adsinaps kalbaleb.

⁹ Magat kweiboug kaleiwag nag, bo bamov, wankuyeim kaleiwag isap, iyakit sinap kalbaleb, mo akanig.

¹⁰ Moses nakaleiwag silmanin mwamov mamagina bo ikatimateig.

¹¹ Nakaleiwag bo ileb sinap kalbaleb, mo ikatidavig, vagan kaleiwag towen beiweig.

¹² Tage Moses nakaleiwag katanok katanok bwanabwein, didumwal.

¹³ Tage youd bwanabwein bikatimateig tan? Nag. Sinap kalbaleb ikatimateig. Kaleiwag bwanabwein, tage sinap kalbaleb ikatimateig, vagan bitakakins sinap kalbaleb tonen; o kaleiwag bwanabwein waseg mo bitakakins sinap towen singaya kalbaleb.

¹⁴ Taninuways Moses nakaleiwag bwanabwein, peinan meinoy neim Yowbad waseg. Tage woug igwey, peinan sinap kalbaleb ikalawageig.

¹⁵ Nag akakin agusinap tatoneig. Aveiyag ivag sivinag nag bawtel mawan. Tage sinap towen akasigum mo avag mawan.

¹⁶ Nanoug itam ilana, "Moses nakaleiwag bwanabwein," peinan nag sivinag bawotet kalbaleb, tage bo avag mawan.

¹⁷ Nag yey agusinap towen, misinaka sinap kalbaleb nises wanuwag.

¹⁸ Akakin-wan nag aveiyag bwanabwein wananooug nises, peinan woug igege. Sivinag sinap bwanabwein, ta-mawan bawtel.

¹⁹ Sinap bwanabwein sivinag, nag gog; bapiyev sinap kalbaleb tage mo avag kalbaleb.

²⁰ Sinap kalbaleb bapiyev mo bavag, peinan nag yey agusinap tage sinap kalbaleb towen nises wananooug.

²¹ Bo aban sinap kweitan. Kukin sivinag bawtel bwein, sinap kalbaleb mo bimekeig.

²² Wananooug singay ivag sivinag Yowbad nakaleiwag.

²³ Tage bo aban tobwag kaleiwag woug wuliyoungwan waseg. Kaleiwag kalbaleb ikanaviy waseg kaleiwag bwein, wananooug nises; mo akanow sinap kalbaleb woug wuliyoungwan waseg nises.

²⁴ Singay ayakalin, peinan nag kavel ikadilok bikatinabweig woug ankalbaleb waseg, peinan kanig nises.

²⁵ Kalin nuwag Yowbad, peinan daGuyaws Yeisuw Kelis bikatinabweig. Nanoug tatoneig ikanow Yowbad nakaleiwag, tage woug bikanow sinap kalbaleb nakaleiwag.

8

Yowbad Kululuwan iyamoveids

¹ Magat yakids waseg Yeisuw Kelis bitases, Yowbad ta-mawan biyateleid.

² Yowbad Kululuwan iyamoveids yakids sods Kelis. Kululuwan kaleiwag-nen bo ilikud waseg sinap kalbaleb inakaleiwag vagan nag bitakanig.

³ Yowbad kadilok wotet towen, Moses nakaleiwag nag kadilok bilabeids peinan wouds igwey. E, Yowbad nawotet towen, mamagina, Natun ikayeb neim, ikow kaleivin mawana gamag takalbaleb yakids; itawtoun waseg adsinaps kalbaleb, peinan won tonen imlavag mamagina lun bulukwan.

⁴ Iwotet mawan vagan bitayakousis Moses nakaleiwag, peinan bo bitakanawes Yowbad Kululuwan nakaleiwag; wouds inakaleiwag awoum.

⁵ Kukin kal yakamiy bikanow woun nakaleiwag mo beivag sivinan woun wuliyoungwan; kukin gog bikanow Yowbad Kululuwan nakaleiwag mo beivag sivinan Yowbad Kululuwan wuliyoungwan.

⁶ Kukin beivag sivinad woud wuliyoungwan mo bitakanig, tage kukin beivag sivinad Yowbad Kululuwan wuliyoungwan, mwamovad mo bitaban son niwal.

⁷⁻⁸ Kukin kalisiy sivines wous wuliyoungwan mo bikamliwes Yowbad, nag beitams Yowbad nakaleiwag waseg. E, ta-mawan gamag tasiyas beitams Yowbad nakaleiwag waseg; o ta-mawan Yowbad bikalin nuwan gamag tasiyas wasigeis, nag.

⁹ Peinan wous ikalawages tatineis; yakamiy gog miked kweitan, peinan Kululuwan Yowbad simiy bikalawageimiy. Kal yak Kelis kululuwan ikəbwag waseg yak, nag Kelis angamag yakoum, nag.

¹⁰ Tage Kelis niwekeimiy, woumiy bo imtəmats waseg sinap kalbaleb, tage kuluwamiy imwamovs amisinap didumwal waseg.

¹¹ Yowbad bo iyamov Yeisuw kanig waseg, mo Kululuwan Yowbad simiy nukusesus, woumiy Yowbad biyamov Kululuwan waseg, peinan nises wanuwamiy.

¹²⁻¹³ Sigwey, awoum bitawotets wouds wutalan. Awoum bitakanawes wouds nakaleiwag. Ked towen beinoy bein kanig waseg. Tage kadiloka bitawotets Yowbad Kululuwan wutalan; waseg bitakatimet wouds inawotet, mo bitamovs.

¹⁴ Kukin Yowbad Kululuwan bikaluwageid, mamagina Yowbad nitun yakid; kukin nag bikaluwageid, tobwag gamag nitun yakid.

¹⁵⁻¹⁶ Magat Yowbad nag bisekeids nanouds mamagina nitun yakids, adok mo bivgavaw adpwāyats, mamagina natawwotet yakids. Tage bo isekeids nanouds mamagina nitun tatonen, mo tadowes talansa, “Tamad.” (Aga-Iblīw waseg ilansa “Aba.”) Kululuwan tatonen nanon māwana kululuwads yakids, mo takakins Yowbad nitun yakids.

¹⁷ O peinan Yowbad nitun yakids mo bitakawes dakiyays. Yowbad bisekeids dakiyays sods Kelis, peinan abads bigeg sods Kelis, yakawanads mo bitabānes sods Kelis.

Tut wanakoug mo bitamwāsaws

¹⁸ Nanoug māwan. Adok abads bigeg tut towen waseg, tage nag bivakaein mouvitan peinan singay bitamwāsaws igaw tutan Yowbad yakawanad mo bitabānes yakids.

¹⁹ Yowbad nakabwabub meivek-wan ikayamat avei-tut Yowbad nitun bikamat waseg mtowen, mo bikines; e, singay sivines bikines.

²⁰ Kweiboug bo iyamkwēn inakabwabub. Nanon bo māwan. Nanon nag inek youd tasiyas. Tage tasiyas inmises igaw bikatlow mo beibwein.

²¹ Tut towen nakabwabub babaw ipsāpwās. Nag kweitan youd bises bisigeg. Igaw Yowbad mo bilikus youd tasiyas; mo bisesus wamnat bimwāsaws bisigagis, māwan Yowbad nitun yakids.

²² Taninuways peinan youd katanok katanok meiveka Yowbad nakabwabub nilidelids sigidaged waseg ee... tut towen bo māwan.

²³ Yakids-vak bo māwan talidelids. Yowbad Kululuwan anagin bo isilamaw wasigeis yakids, tage nanouds waseg talidelids, takayamats avei-tut Yowbad bikanatun wasigeis yakids mamagina bikatinob wouds yakids.

²⁴ E, bo ikatinabweids son danamis, peinan igaw wouds mo bikatuneib. Bitakin nawotet towen mo beikous danamis, peinan bobeitout nanoud.

²⁵ Tut towen yakids nag takines tage bitanmises, bitakaymates sona dakapatuls.

²⁶ Yowbad Kululuwan māwan ilabeids, peinan tougwey yakids; nag takakins amāwan igaw bitanitougs waseg Yowbad, tage Yowbad Kululuwan tonen initoug peinads, singaya igel waseg Yowbad. Nag bitalivan!

²⁷ Yowbad ikakina nanouds yakids. E, mapuna Kululuwan nanon ikakin-wan, kululuwan tonen initoug peinads yakids tayakelesiys māwana Yowbad nanon.

²⁸ Taninuways. Kukin nanoud waseg bitasiwyoubus Yowbad, mtowen mo bikaleiwag youd bwanabweins wasigeis yakids, nidaweids, nitimek nanon wasigeis yakids.

²⁹ Kweiboug ikakin yakids mo ikaleiwag vāgan bitamlavags māwana Natun ankakin tatonen; mtowen wanamug, budan yakids wankuyeim.

³⁰ E, kweiboug bo ikaluweg mo idaweids; idaweids mo ikidumwāluds; ikidumwāluds mo isekeids yakawanads.

Yowbad nasiwayoub

³¹ Adok livan towen bo misinak. Peinan Yowbad bilabeids, nag kal bisilbwadeids.

³² Nag ikayus Natun tatonen, tage bo itam peinads yakids, igaw mo bisekeids youd babaw son Kelis.

³³⁻³⁴ Nag kal biyateleids peinan Yowbad bo ilivnek nagamag yakids. Yowbad bo ikidumwäluds; nag kal biban adsinaps kalbaleb. Yeisuw Kelis nikanig mo ikit vayuwein, mtownen misikey Yowbad wanakatay, ininitoug kid peinads yakids.

³⁵ Nag aveiyag kadilok bisilbwed Kelis nasiwayoub wasigeis yakids. Takinew gamag biyageideis, o bikamliweids; takinew beivag adamouns, o bitamwadoys, o bitakatouns; takinew gamag beiweids; nag gog.

³⁶ Livanen nises Bukitab waseg mamagina:
“Mugwamag yakamey, bo iwawemas,
bakamtamat yam katanok katanok.
Yakamey mamagina mansiyas sip, yakamey;
idokes beiwemas mo bigabumas.”

³⁷ E, abad bigeg youd katanok katanok waseg, tage mtownen nisiwyoubuds ilabeids mo tatakayways singay.

³⁸⁻³⁹ Mounid akakin nag aveiyag bigidem Yowbad nasiwayoub wasigeis yakids. Yakids bitasesusa bwein; takinew bitakanig, o takinew tamwamov, takinew Seitan siney nagamag biyageideis, o aveiyag binuwakeids tut town o takinew tut wanakougwaw; takinew takaleiwags mwasanin biyageideis, o bikaweid binaweid wanakaew, o takinew bigimkuluds wabwanit; peinan nag aveiyag nises son natawtoun vagan bigidem Yowbad nasiwayoub wasigeis yakids, nag. Nasiwayoub town singay avakaein daGuyaws Yeisuw Kelis nisekeids.

9

Yowbad nikatigikes nagamag min-Yisleil

¹⁻² Agulivan mounid, mamagina Kelis waseg. Awoum bayaweid. Yowbad Kululuwan ilabeig. Nanoug waseg mo akakina agulivan mounid. Peinan singaya ikalin nuwag talawog, tasiyas min-Yudiy. E, tut babaw igeg nanoug pines tasiyas.

³ Sivinag Yowbad biyageideis o bigidem Kelis nasiwayoub waseg ye, vagan kid bisiwyoubus tasiyas talawog.

⁴⁻⁵ Mounid min-Yisleil tasiyas. Yowbad dilenen tasiyas bo isekes yakawan tonen, bo ikaveiyon wasigeis tibsiyas, isekes nakaleiwag, o sitapwäloul, o ilivnek youd bwanabwein igaw mo bisekes. E, anilivan mawan wasigeis tammwayas, tasiyas Ebelam, Aysak, Yekob; e, gimgilitoun Kelis delen mtownen Ebelam. Mapuna takavasis Yowbad tut nag beikous, mtownen takaleiwag youd babaw wasigeis. Eimen.

⁶ Awoum bitadokes Yowbad ikatigikes mav. Tasiyas Yisleil dilenen mwasanin mounid min-Yisleil, mwasanin gog tobwag.

⁷ O Ebelam tibun mwasanin dilenen mounid, mwasanin gog tobwag. Misinaka Aysak tibun Yowbad idoki dilenen Ebelam. Bo idibek, ilana,
“Aysak tibun bimlavags deleim yakoum.”

⁸ Mamagina Yowbad nag nitun tasiyas Ebelam tibun nikopwes ven watinow waseg, nag. Tage peinan anilivan mounid isek, mo yakids bitamlavags Yowbad angamag yakids.

⁹ Kweiboug Yowbad nilivnek; isek Ebelam anilivan mawan:
“Igaw tut bwanabwein waseg mo bayum baw, igaw Sela mo bikop natun kudataw.”

¹⁰⁻¹² Mawan-vak Libek neivays son tabuds Aysak mo isum papaps wanuwan, Yowbad idibek, ilana,
“Kunutaw bikanow aygan digumasus.”

Igaw wanuwan ines nisesus; nag ivag asisinap bwanabwein o kalbaleb, nag. Tage Yowbad bikaleiwag vagan bilivnek angamag, nag peinan asisinap; misinaka bilivnek mawan nanon. Mapuna Yowbad idibek Libek, ilana,

“Kunutaw bikanow aygan digumasus.”

¹³ Livanen nises Bukitab waseg, mamagina:
“Sivinag Yekob; Isaw gog apiyev.”

¹⁴ Aveiyag bitalivan? Adok bitalana, “Yowbad ansinap nag idumwal?” Awoum bitalivan mawan.

¹⁵ Anilivan gog Moses waseg, ilana,
“Kukin kal sivinag basiwyoub;
kukin kal binok nuwag, mo binok nuwag.”

¹⁶ Yowbad binok nuwan yakid nag peinan nanoud o dawotet, nag. Misinaka nasiway-oub tatonen waseg mo binok nuwan yakid.

¹⁷ Livanen Pelow nises Bukitab waseg, peinan Yowbad idibek Pelow, ilana,
“Bo asekeim guyaw vagan bakamtilakes gamag babaw, bikines guntawtoun waseg yak,
mo ven babaw gimgilis biliganes butug. O yagag yey bikavtagis.”

¹⁸ E, taninuways, kalisiy Yowbad sivinan binok nuwan mo bisiwyoubus; tage kalisiy sivinan bivag bikakons mo ivag ikakons.

Yowbad takaleiwag tatonen

¹⁹ Adok bukudibakeigs, kulansa,
“Kukin Yowbad bikalawageid mawan nanon, ta-mawan bitasilbwed. Igaw beivag adsinap kalbaleb peinan bo ivag nanon mawan, adok awoum biyateleid.”

²⁰ Awoum kal gamag yakoum kuvtok livan Yowbad, awoum. Magat loutan beivag nanon, tab kadilok bidibek tawtelein, bilana, “Aveiyag wawun nukuvageig agukwakin mawan?” Adok awoum bilivan mawan.

²¹ Adok tawtelein loutan bikaleiwag bidapwat waseg, ne? E, kadiloka bikow bidapwat babaw, simultanok waseg bivag loutan kweitan anlelel bwein; o som kwayuwein bivag loutan kweitan silmanin wotet, anlelel nag.

²² Kadilok Yowbad bikaleiwag mawan, peinan sivinan gamag yakids bitakines inayatal o natawtoun wasigeis takalbalebs, ikapatul wasigeis tasiyas ee... igaw mo bigulekxes.

²³ O peinan sivinan gamag yakids bitakines ansinap singay kammat wasigeis yakids nisiwyoubuds, o kweiboug nibun dakannats peinads yakids.

²⁴ E, bo idaweids nag misinaka min-Yudiy yakids, tage tobwag ven gimgilis mwasanin-vak nidawes tasiyas.

²⁵ Livanen nises palopit Osey anilivan mamagina:
“Tasiyas nag gungamag
Mo badokes balana, ‘Agugwamag tasiyas.’
Peinan bod towen, gamag nag sivines,
Mo badokes gunabod tasiyas.

²⁶ Ven tasiyas nidibakes, ilana,
‘Nag gungamag yakamiy.’
E, ven wunsiyas mo bidokes bilana,
‘Yowbad tamwamov nitun tasiyas.’”

²⁷⁻²⁸ Isaya kweiboug iwak, livanen Yisleil ilana,
“Adok Yisleil tibun bibabaw mawana alekel babewein,
Tage teiyuy Yowbad bikatinabwes.
Babaw biwaweiys, ven watinow gimgilis,
Peinan bitawtoun, nuwanaw, nawotet towen waseg.”

²⁹ Isaya mawan nilivnek, ilana,
“Kukin libalab guyawun nag bikatibom
nitidayas mwasanin, mo biyagageids beikous,
mawan Sodom kweiboug, o mawan-vak Gomol, biyagageids beikous.”

Min-Yisleil ideivs

³⁰ Aveiyag bitalivan? Adok tobwag ven gimgilis igaw dadub nag ivag sivines asisinap bididumwal, tage bo ibanes asisinap didumwal peinan isimounids waseg Yowbad.

³¹ Tage min-Yisleil sivines bikanawes Moses nakaleiwag silmanin sinap didumwal, iyokons, bo nag, peinan nag ikanawes bwein Moses nakaleiwag.

³² Aveiyag wawun? Iyokons, tage nag isimounids Yowbad waseg. Idokes misinaka biwotets bwein mo biban̄es. Nag gog. Mamagina kikeis ikatpines wululay nimmasis wapwepway mo ikalkalouws.

³³ Kabebay-nen nises Bukitab waseg mamagina:
“Kukines, ven Sayon waseg basen gunawlulay vagan bikatpines kikeis, mamagina dakul kikeis bikatpines mo bikalkalouws.
Tage kukin kal bisimounid waseg wululay towen nag beivag anmwasin.”

10

¹ Sigwey, singay sivinag Yowbad bikatinabwes tasiyas min-Yisleil, aninitoug Yowbad waseg pines tasiyas.

² Akakin iseiw nuwes silmanin Yowbad, tage tatagouwaws tasiyas.
³ Nag ikakins sinap didumwal meinoy neim Yowbad waseg, mo iyokons kid bivages tatineis asisinap didumwal; tage nag itams Yowbad ansinap didumwal waseg.
⁴ Peinan Kelis mwana neim, bo iyakous Moses nakaleiwag vagan kid bikidumwal adsinaps yakids, peinan tasimounids waseg.

Yowbad bikatinabwes ven babaw gimgilis

⁵ Moses nilel mamagina:
“Kukin kal bikanow kaleiwag towen, mwamovan mo biban waseg.”
⁶ Tage bitasimounid waseg Yowbad vagan bikidumwäluds, inakaleiwag kweitan; ilana, “Awoum kuninuways ‘Kal bein walbalab?’” (mamagina Kelis bitatok bitamey watinow).
⁷ “Awoum kuninuways ‘Kal beibus bein wanuwan leg?’” (mamagina bitayakit Kelis, kanig waseg). “Awoum.”
⁸ Tage ilana, “Livan towen nises, wawdoumiy o waninoumiy.” Livan towen mamagina simounid livanen, waseg nakageiguy.
⁹ Kukin bitatam wadoud daGuyaws Yeisuw waseg, o wananaoud bitasimounid peinan Yowbad iyakit kanig waseg, e, Yowbad mo bikatinabweid.
¹⁰ Gamag yakid nanoud bitasimounid, Yowbad mo bikidumwal adsinap; o bitatam wadoud waseg mo bikatinabweid.

¹¹ Livanen nises Bukitab waseg, mamagina:
“Nag kal bisimounid waseg towen, mo beivag anmwasin, nag.”
¹² Nag ilivis min-Yudiy palatan, ven mwasanin gimgilis palatan, nag. Babaw yakids daGuyaws kanatok-wan. Magat bitanitoug waseg mo bisiwyoubud bwein.
¹³ Adbabaws-wan bitadouws daGuyaws wayagan, mo bikatinabweids.
¹⁴ Tage gamag mwasanin ta-mawan bidawes yagan, peinan nag isimounids waseg. Tamawan bisimounids peinan nag ikakins yagan. Nag ikakins yagan, peinan tageiguy nag.
¹⁵ Kukin go bikayabes tageiguy, mo binekes, biliganes, bisimounids mo bidawes yagan o bikatinabwes. Livanen tageiguy nises mamagina:

“Adbwabwals singay bwein peinan igeiguy livan bwanabwein waseg!”
¹⁶ Tage babaw gamag nag itams waseg livan towen bwanabwein. Isaya anilivan kweiboug mamagina:

“O Guyaw nag kavel isimounid agulivan waseg.”
¹⁷ Tage bigeiguy livanen Kelis mo biliganes mwasanin, bisimounids.
¹⁸ Tage bulagan inekes, tan? Magen! Livanen nises mamagina:

“Ages bo iliganes ven babaw wasigeis.
Asilivan bo ikitiliganes ven babaw wadaban pwepway.”

¹⁹ Tage min-Yisleil nag ikakins. Wanamug Moses anilivan mamagina:
“Igaw min-Yisleil yakamiy bukukines makava gamag mwasanin, mo bavag dibamiy bimouvit.
Bod tasiyas tablabols bukukines, mo bavag bikapasal nuwamiy min-Yisleil yakamiy.”
²⁰ Wankuyeim Isaya ikitiginaney, ilel Yowbad anilivan mamagina:

“Tasiyas nag ineveigs tage bo ibaneigs.

Tasiyas nag ikatugwans silmanin yey mo akamat wasigeis."

²¹ Tage livanen min-Yisleil ilel mamagina:

"Tut babaw adudouw wasigeis gungamag tasiyas takapidabs o takakons; adudouw, bo nag."

11

Bikatinabwes min-Yisleil mwasanin

¹ Adok Yowbad bo ipiyev angamag tasiyas min-Yisleil, ne? Nag. Yey gum-Yisleil teitan yey. Ebelam delen teitan yey, agukum Binyamin.

² Yowbad nag ipiyev inagamags tasiyas kweiboug nilivnek. Kuninuways livanen Ilaytiy Bukitab waseg, peinan idibek Yowbad, ivtokes livan min-Yisleil, ilana,

³ "O Guyaw bo iweiys mupalopits, bo igulekwas mukwabeilun. Agumwaneta yey mugwamag nases, mo sivines kid beiweigs."

⁴ Tage Yowbad ikatimop anilivan, ilana,

"Bo akayus gungamag kweinim kweiy tawsan nisesus. Nag ikululs wamatan Bal, gungamag tasiyas."

⁵ Mawan kweiboug Yowbad ikayus nagamag mwasanin, mawan tut towen bo idawem min-Yisleil mwasanin yakamey, peinan nisiwyoubum.

⁶ Deisa isiwyoubum mo idawem. Nag idawem peinan mawotet bwanabwein; nag. Siwayoub-wan.

⁷ Amawan? Min-Yisleil mwasanin inineivs Yowbad nasiwayoub, tage nag ibanes, yakamey gog nilivnek mo nakaban; tasiyas babaw bo ikakons.

⁸ Livneis nises Bukitab waseg mamagina:

"Yowbad bo iyabol ninous tasiyas.

Mites nag bikines; tiges nag biliganes ee... tut towen bo mawan."

⁹ Deibid-vak anilivan mamagina:

"Kadiloka sisagal bimlavag mamagina sik o mamagina wot.

O mamagina leg vagan bikatimop asisinap kalbaleb wasigeis.

¹⁰ Kadiloka beikaw mites; awoum bikines.

Kunes moumouvit waseg tut nag beikous."

Ven babaw gimgilis

¹¹ Adok min-Yudiy ikatpines kikeis, bikalouws ne? Nag. Bo bitamanaws vayuwein. Min-Yudiy bo ikalows, tage Yowbad bo isek nasiwayoub wasigeis tobwag ven gimgilis yakamiy, vagan bikatinabweimiy. Min-Yisleil bikineimiy mo bimouvit dibes.

¹² Tut towen min-Yisleil bo ikalouws mo ven mwasanin yakamiy kumwasaws. Kukin vayuwein bitamanaws tasiyas min-Yisleil, o beisiws Yowbad nakaleiwag waseg, mo singay bitamwasaws.

¹³⁻¹⁴ Adibakeimiy tobwag ven gimgilis yakamiy, peinan gunawotet akokew livanen Kelis bassekeimiy ven babaw yakamiy; mo atawtoun gunawotet waseg vagan bukusi-mounids yakamiy mo min-Yisleil tasiyas bimouvit dibes, mo bisimounids mwasanin tasiyas, o Yowbad bikatinabwes.

¹⁵ Yowbad bo ipiyaves tasiyas min-Yisleil mo imsamwas siney ven mwasanin gimgilis. Igaw Yowbad beitam wasigeis min-Yisleil mo singay bimsamwas siney tasiyas. Tut towen nag isimounids; mamagina takanigs tasiyas. Tut wanakougwaw mo bisimounids mamagina takanigs tasiyas bo beikits vayuwein.

¹⁶ Tammwayas Yowbad inagamag, mawan tut towen mo imlavag nagamag min-Yisleil. Kabebay-nen mamagina:

Pwalaw ivisan-wan bitakatibom silmanin Yowbad, vagan tamkwalan mo bimlavag Yowbad navavag.

Youpeis-vak bitakatibom silmanin Yowbad, beisob mo bimlavag Yowbad nakamweilok. Tammwayas mawana youpeis; kay mawana asibod avakaein.

¹⁷ Min-Yisleil mamagina Yowbad nakamweilok, yayagein mwasanin bo iwwutus ikalouws, o yakamiy mamagina tobwag kay yayagein yakamiy kunekees kay towen atimapun tasiyas nikalouws, mo kay tonen sipinen iwmwamweimiy.

¹⁸ Awoum kwayapams peinan yayagein tasiyas nikalouws. Kukin bukwayapams kadiloka kuninuways awoum bukwaleiwags kay-nen waseg, tage kay wawun bikaleiwag wasigeis yakamiy.

¹⁹ Adok bukulana, “Min-Yisleil mamagina kay; yayagein tonen bo iwut vagan tobwag gamag yey ban bikativaseig kay towen waseg.”

²⁰⁻²¹ Mounid. Bo iwtuwut tasiyas peinan nag isimounids. Tage yakoum nukuses bwein peinan kusimounid. Mata ge bukwayapam. Kadiloka bukuwen Yowbad. Nag ikayus yayagein tatonen; adok nag bikayuseim peinan tobwag yayagein yak.

²² Kukines Yowbad nasiwayoub son nakaleiwag tawtoun. Nakaleiwag tawtoun wasigeis tasiyas nikalivatouws, tage nisiwyoubumi yakamiy magat bukutoukums nasiwayoub waseg. Kukin gog nag, mo biwutumiy yakamiy.

²³ Tasiyas-vak, kukin nag bivvalutsa kapidab waseg, mo bikativases vayuwein kay towen waseg, peinan Yowbad kadilok bivag mo bikatuvas vayuwein.

²⁴ Yowbad inakaleiwag kweitan wasigeis yakamiy, peinan bo iwutumiy tobwag kay waseg mo ikaweimiy ikativaseimiy waseg nakaligweg tatonen. Tage sivinan bikow yayagein tatonen bikativases kay-nen waseg, vayuwein mo binekes.

Min-Yisleil

²⁵⁻²⁶ Sigwey, awoum kwaypamwes sinap. Sinap kweiboug nisowm, bo ikamat. Sivinag bukukwakins mamagina: Min-Yisleil mwasanin bo ikeikay dibes, ikapidabs ee... igaw tobwag ven gimgilis beisiws Yowbad nakabkaleiwag, babewein bikadilok; mo Yowbad bikatinabwes min-Yisleil asibabaw-wan. Livānen nises Bukitab waseg mamagina:

“Towen takatinabweids, Sayon waseg beinoy beim.

Bivag mo beikous kalbaleb sinap Yekob delen wasigeis.

²⁷ Igaw gunakaleiwag basekes tasiyas, peinan bakow asisinap kalbaleb, banow, balev.”

²⁸ Min-Yisleil bo ikamliwes Yowbad, pinamiy yakamiy, vagan bukuliganes livānen Yeisuw; tage Yowbad sivinan tasiyas, peinan ilivnek nasiwayoub wasigeis tibsiyas.

²⁹ Yowbad bidawes gamag mwasanin o bisiwyoubus, ta-māwan bigidem anilivan tatonen.

³⁰ Ven mwasanin gimgilis yakamiy kweiboug nukusiplaves aygan Yowbad; tasiyas-vak min-Yisleil isiplaves aygan Yowbad, mapuna inok nuwan yakamiy.

³¹ Tasiyas nikapidabs, mo Yowbad inok nuwan yakamiy. Waseg mo binok nuwan tasiyas.

³² Yowbad bo ilivan babaw gamag takapidabs yakids mo binok nuwan yakids, bikatinabweids. Nanon bo mawan.

³³ Yowbad ansinap singaya ivakaein wananon. Inakaleiwag nag takakins. Nawotet waseg bo isom nanouds.

³⁴ Ta-kal iyakous daGuyaws nanon. Ta-kal bikatimlek Yowbad ansinap.

³⁵ Ta-kal bisiwyoub Yowbad waseg vagan Yowbad mo bimop nasiwayoub, nag.

³⁶ Yowbad tonena ibun youd babaw, nisesus, peinan towen. Mapuna bitayakawanes tut nag beikous. Eimen.

12

Bitatames wouds silmanin Yowbad

¹ Aguyeimiy sigwey, peinan Yowbad ikalin nuwan yakids; kadiloka bukutāmes woumiy mamagina lun bulukwan, kadilok Yowbad nawotet. E, kululuwamiy waseg kutams Yowbad nawotet waseg, peinan tut towen mwamovamiy son kusesus.

² Awoum kulatanes son ven watinow sinapun; tage beivag ninoumiy kweivaw vagan bikatilow amisinap, mo bukukwakins Yowbad nanon, aveiyag kamnat, aveiyag bwein, o aveiyag bikalin nuwan waseg.

³ Yey agusinap nisiwyoubug, mapuna adibakeimiy tababaw yakamiy; “Awoum bukwaypamwes sinap, tage ninoumiy bidumwal mawan Yowbad nilabeimiy, o nukusimounids, katanok katanok yakamiy.”

⁴ Taninuways woun wuliyougwan babaw siwotet kweitan kweitan.

⁵ Mawan yakids, babaw gamag yakids, tage Kelis waseg nitamlavags katanoka woun o tatanok tatanok yakids talabeids sidsidayas.

⁶ Yowbad nasiwayoub waseg yey kweitan, waseg yak kweitan, wasigeis sidayas kweitan kweitan; kadiloka bitawotets mawan. Kukin Yowbad bisiwyoub kavel vagan bikakin anilivan bilivnek; e, kadiloka bisimounid waseg, mo bilivan mawan.

⁷ Kukin kavel Yowbad bisek sinapun wotet, kadiloka biwtel mawan. Kukin kavel Yowbad bisek katimlakay sinapun, kadiloka bikatimlakay mawan.

⁸ Kukin kavel bisek geiguy sinapun, kadiloka bigeiguy mawan. Kukin kavel bisek sinapun muloul, kadiloka bimuloul beibwein. Kukin kavel bisek nawotet vagan bilabes sidayas kadiloka biseiw nuwan towen silmanin. Kukin kavel bisek nawotet vagan binok nuwan sidayas, kadiloka bimwasaw waseg nawotet towen.

Kaleiwag silmanin tayakelesiys

⁹ Kadiloka kusiwayoubus mounid; sinap kalbaleb kulavewas, tage sinap bwanabwein kuyousis.

¹⁰ Bikalin nuwamiy, mo bukusiwyoubus simiyas. Kal singaya bivnas son? Kadiloka biseiw nuwamiy vagan bukuvnases simiyas!

¹¹ Kadiloka tuta babaw biseiw nuwamiy Yowbad nawotet. Yowbad Kululuwan biwekeimiy mo bukukwammats. Kadiloka bukutoukums daGuyaws nawotet waseg.

¹² Kumwasaws minamis waseg. Igaw gamag biyagageimiy bweina kwaptuleimiy. Kadiloka tut babaw bukuninitougs Yowbad waseg.

¹³ Kumulouls vagan bukulabes tasiyas tayakelesiys. Kutams tasiyas amibwabwal wasigeis.

¹⁴ Amilivan siwayoub kusekes tasiyas niyagageimiy; e, kusiwyoubus; awoum kubulates. Awoum.

¹⁵ Kumwasaws simiyas tasiyas tammwasaws. Kuvalams simiyas tasiyas tavvalams.

¹⁶ Kadiloka kumsamwas simsimmiyas wasigeis. Awoum bukumliguyaws, kadiloka kutams tasiyas toul wasigeis. Awoum kukwaypamwes sinap. Awoum.

¹⁷ Tasiyas iyagageimiy awoum kuyagages tasiyas; tage beivag amisinap bwein wamtes gamag babaw.

¹⁸ Magat kadilokeimiy bukumsamwas simiyas meiveka gamag. Kadiloka kuyokons silmanin.

¹⁹ O kalin nuwag sigwey, awoum kwatimapus asisinap tasiyas niyagageimiy; bisiw; igaw Yowbad mo bikatimop. Livanen nises mamagina:

“Yey bakatimop asisinap kalbaleb.

Yey gunawotet towen.”

DaGuyaws anilivan mamagin.

²⁰ Awoum kwatimapus asisinap. Tage towen nikamliweim, igaw beivag anamoun, bweina kusek kan beikam. Kukin beivag anadak, bweina kukil soup kusek beimoum, mo beivag anmwasin.

²¹ Awoum sinap kalbaleb bitakayway wasigeis yakamiy, tage beibwein amisinap vagan bukutakayways waseg sinap kalbaleb.

Tasiyas gabman sikaleiwag

¹ Kadiloka yakids bitatams tasiyas gabman sikaleiwag waseg. Asbabaw-wan Yowbad bo isekes sikaleiwag. Anmwanet Yowbad kaleiwag isekes gamag.

² Kukin bitapiyev sikaleiwag, mamagina bitapiyev Yowbad nawotet; igaw mo bikati-mop adsinap kalbaleb.

³ Tasiyas asisinap bwein nag biwenes tasiyas takaleiwags; nag. Tage takalbalebs biwenes. Kadiloka beibwein amisinap, mo takaleiwag bikalin nuwan yakamiy, *vagan* bikavasimiy. Nag bukuwenes, nag.

⁴ Yowbad bo isek inakaleiwag towen *vagan* bilabeim. Tage kukin beivag amsinap kalbaleb mo bukuwen. Nakaleiwag nises *vagan* beiweiy gamag. Mtowen Yowbad natouwat *vagan* beiweiys tasiyas takalbalebs.

⁵ Kadiloka bitakanaway gabman sikaleiwag. Kukin gog nag, Yowbad mo bikawkuneid. E, kadiloka bitakanawes.

⁶ Kadiloka-vak bukupayins gabman waseg. Takaleiwags tasiyas itoukums Yowbad nawotet pinamiy yakamiy.

⁷ Kutams asibabaw wasigeis. Kupayins wasigeis tasiyas takaweins *p̄ayin*. Sitakis kusekes tasiyas takaweins takis. Kugoulus tasiyas guyawaw, o kuvn̄ases tammwayas.

Siwayoub

⁸ Awoum kukwawlavags wasigeis gamag mwasanin. Misinaka bukusiwayoubs simiyas wasigeis. Bitasiwayoub mo bitakanow Moses nakaleiwag bitayakous.

⁹ Livan avakaein nises mamagina:
“Kuvnas soum m̄awanana kuvn̄aseim tatoneim.”
E, wanuwan livan towen kaleiwag babaw nisesus, mamagina:
“Awoum kusubwan, awoum kuweiy gamag, awoum kuveinaw, awoum matam bimwamon soum navavag.”

¹⁰ Towne tasiwayoub bivn̄ases siney, nag biyagages, nag. Kukin bitasiwayoubs mo bitakanawes Moses nakaleiwag bitayakous.

Sinap kamnat

¹¹ E, kuvages m̄awan, peinan kukwakins datuts bo talivatus. Kadiloka kwannakons tut towen. Kweiboug nitasmounids, tage datuts bo ikous. Yowbad kakita bikatinabweids.

¹² Boug bo ikous. Kakita beiyam. Kadiloka bitapiyaves dadub sinapun, bitakawes kamnat youdanen *vagan* bitakanaviys waseg sinap kalbaleb.

¹³ Kadiloka bitavn̄ases adsinaps beibwein, mamagina kamnat gimgeilin yakids. Awoum bitamwamoums wiskiy o aveiyag mo bitakabalawehins. Awoum bitakaninavays mav. Awoum bitakavikuns o bitakamnimans, awoum.

¹⁴ Kadiloka kuklawes daGuyaws Yeisuw Kelis ansinap. Tage awoum kutams waseg woumiy nakaleiwag, aveiyag sivinan, awoum.

14

Awoum tавtokay livan

¹ Gamag mwasanin isimounids, tage nag isimounids bwein waseg Kelis; kadiloka kutams amibwabwal tasiyas, tage awoum kwamnimans simiyas amibwabwal tasiyas, awoum kuyakeikays livan wasigeis. Awoum

² Teitan gamag ilana, “Bweina bitakam kan babaw.” Tayuwein mamagina tougwey ipiyev viniyon, ilana, “Nag kadilok bitakams.”

³ Towne takamkwam awoum biksigum son, peinan ipiyev viniyon. Towne-vak tapiyevein viniyon awoum bilana, “O takalbaleb towen peinan ikam viniyon.” Yowbad bo ikalin nuwan gamag towen; awoum kuvtokays livan.

⁴ Yakamiy awoum kuyages mtowen, teitan gamag natouwat towen. Natovek tatonen bikaleiwag. Kukin natovek bikalin nuwan, bikimtuw mo bisesuna bwein; kukin gog nag, mo bikalouw.

⁵ Teitan gamag ivnas yam mwasanin, tayuwein gog idoki yam babaw katanok-wan. Gamag nanon tatonena bikaleiwag mo bivag m̄awan.

⁶ Kukin kal bivnas yam mwasanin, ivnas peinan igoul daGuyaws waseg. Kukin kal bikamkwam, ikam peinan igoul daGuyaws, ikalin nuwan waseg; kukin kal ipiyev kan, ipiyev peinan igoul daGuyaws, ikalin nuwan waseg.

- ⁷ Nag bitamov silmanin tatoneid. Nag bitakanig silmanin tatoneid.
- ⁸ Igaw bitamov, silmanin daGuyaws mo bitamov. Igaw bitamat, silmanin daGuyaws bitamat. Peinan daGuyaws angamag yakids; takinew bitamov o takinew bitamat.
- ⁹ Kelis nawotet mawan. Bo ikanig mo imov vayuwein vagan biguyaw wasigeis sidayas takanigs o wasigeis yakids tamwamovs.
- ¹⁰ Kukin bwadam ansinap kweitan, awoum kulana, “Takalbaleb towen.” Awoum kuyeg, awoum! Igaw yakids babaw mo bitatamanaws wamatian Kelis vagan bikatkineids.
- ¹¹ Livanen nises mamagina:
“DaGuyaws ilana, ‘Peinan yey tamwamov yey, gamag babaw bikululs wamatag. E, babaw gamag wudous waseg mo bikavasigs yey Yowbad.’”
- ¹² E, Yowbad bikatiganeids mo livaneids bitasekes, aveiyag bwein, o aveiyag kalbaleb.

Mata ge sod bikalouw

- ¹³ Yowbad tonena bikatukin. Awoum yakid bitalivan, talana, “Towen ansinap kalbaleb,” awoum. Tage kadiloka taninuway adsinap tatoneid. Awoum ge sod bikineid bidok adsinap kalbaleb, mo bigeg nanon.
- ¹⁴ Yey akakin-wan nag kweitan aveiyag bwaboum. DaGuyaws Yeisuw nikatimlakeig mo akakin nag kweitan aveiyag bwaboum. Tage kukin kal bidok aveiyag bwaboum, mounida bouman gamag towen.
- ¹⁵ Kukin soum idoki kweitan kan bwaboum mo bukukwam kan towen, soum bikineim nukukwam mo bigeg nanon mtowen. Adok bo kupiyev siwayoub waseg soum. Kelis nikanig peinan soum. Awoum kam soum biyageg.
- ¹⁶ Kan towen bwein-wan peinam yak, tage awoum kukwam, mawan gamag mwasanin mo biyageims.
- ¹⁷ Yowbad nakaleiwag nag silmanin kan o soup, tage sinap didumwal, niwal, mwasan. Yowbad Kululuwan waseg bo mawan.
- ¹⁸ Mawan bitakanow ayan Kelis, Yowbad bo beitam waseg yakid, o gamag mo bikalin nuwes wasigeis yakid.
- ¹⁹ Kadiloka bitayousis sinap tasiyas silmanin niwal vagan bitalabes sidayas.
- ²⁰ Awoum kugulek Yowbad nawotet peinan kam. Mounid kan babaw bwein. Tage awoum aveiyag bitakam mo bigeg nanon sod.
- ²¹ Aw-viniyon o avei-soup tawtoun o aveiyag sod bikineid waseg, bo bigeg nanon, bweina bitapiyev youd tasiyas.
- ²² Yakoum kudok youd tasiyas bwanabwein o Yowbad ikakin nanoum. Kukin nag bukuyeg sod wasigeis youd tasiyas, mo bukumwasaw.
- ²³ Kukin gog bisisiyuw nanoud mo bitakam, Yowbad igaw bikamtanid, peinan nag tasimounid bwein. Adsinaps kalbaleb peinan nag tasimounids bwein.

15

Bitalabes sidayas

- ¹ Yakids magat bitasimounids bwein, kadiloka bitalabes tasiyas tougweys. Awoum yakids nanoud tatoneids bitavag.
- ² Tatanok tatanok yakids kadiloka bitalabes sidayas, aveiyag sivines vagan bikatimweis isasisinap beibwein.
- ³ Kelis-vak nag tatonena nanon iwtel, nag. Livanen Bukitab waseg nises, peinan idibek Yowbad mamagina:
“Peinan ivtokeims livan mamagina bo iyagageigs yey.”
- ⁴ Bukitab anilivan tasiyas nileles kweiboug-o. Bo ileles vagan bikatimlakeids, mo bitakaptuleids, o livan towen biguyeids mo bitanamis Yowbad waseg.
- ⁵ Yowbad waseg kapatul nises son geiguy. Sivinag Yowbad bilabeimiy mo bukum-samwas simsimiya singay bwein, mawan Yeisuw Kelis nanon.

⁶ E, mo beivag ninoumiy katanok o amilivan katanok, waseg bukuyakawanes Yowbad, mtownen daGuyaws Yeisuw Kelis taman.

⁷ Kadiloka bukutameimiy simsimeiyas amibwabwal yakamiy, mawan Kelis nitameimiy, yakawanen Yowbad silmanin.

⁸⁻⁹ Adibakeimiy mamagina: Kelis bo imlavag min-Yudiy sitouwat, peinan Yowbad nilivnek mounid wasigeis tammwayas, ilana,

“Igaw mo baw balabeimiy o balabes tobwag ven gimgilis peinan inok nuwag tasiyas.”

E, tasiyas mo biyakawanes Yowbad. Livanen nises Bukitab waseg mamagina:

“Mapuna bakakavasim sigwayas tobwag ven gimgilis, o yagan waseg bakanuwel.”

¹⁰ Kweitan livan nises mamagina:

“Kumwasaws tobwag ven gimgilis yakamiy, simiyas Yowbad inagamag.”

¹¹ Kweitan livan-vak:

“Kukwavirus daGuyaws, tobwag ven gimgilis yakamiy. E, kadiloka gamag babaw bikavasis.”

¹² Isaya anilivan-vak mamagina:

“Yeisuw delen igaw mo beim, mtownen bitamanaw bikaleiwag tobwag ven gimgilis wasigeis. E, tasiyas mo binnamis waseg.”

¹³ Nitannamis waseg Yowbad. Ivag sivinag bukusimounids waseg, vagan namis bivakaein wasigeis yakamiy mo beitaw nuwamiy o bukumwasaws. E, Kululuwan Townen Bwanabwein bikatimweis minamis singay bivakaein.

Pawl inawotet

¹⁴ Sigwey yakamiy, mounid akakin amisinap bwein, tawtoun, o kadilokeimiy sinap kwatimlakes simiyas.

¹⁵⁻¹⁶ Tage agulivan tawtoun mwasanin bo alel wamilet townen waseg, vagan bukuninuways. Yowbad bo isiwyoubug vagan bakokew sinapun Yeisuw Kelis banuwakes ven babaw gimgilis wasigeis. Gunawotet mawan tanuwagan lun, akokew Yowbad anilivan bwanabwein assekeimiy ven babaw gimgilis yakamiy, bukumlavags mawan lun bulukwan. E, Yowbad mo bikalin nuwan wasigeis yakamiy, peinan Kululuwan Bwanabwein biwekeimiy mo bukwamnats.

¹⁷ Yeisuw Kelis waseg yey, gunawotet townen silmanin Yowbad. Kadiloka beimwan woug peinan.

¹⁸⁻¹⁹ Agulivan bitawtoun sinap katanok waseg. Nag kwayuwein livan bakaypom. Misinaka Kelis iwotet waseg yey mo ven babaw gimgilis itams waseg, isimounids waseg o ikanawes aygan. Kelis nilabeig natawtoun waseg, mo ageiguy o awotet tawtoun, mamagina naman mulin Yowbad, o Yowbad kululuwan ikintuweig. E, Kelis waseg yey, gunawotet bo ageiguy livanen Yeisuw vena babaw ikous. Asilamaw Yelusalem, aninoun ven babaw ee... Ililikam. Mayum yay.

²⁰ Peinan nanoug bo mawan. Awoum bageiguy ven tasiyas ikakins Kelis livanen. Kadiveiyov ven wasigeis bo ageiguy. Kukin teitan gamag bikelay kakol, awoum yey wululay basen wakunuwatan. Awoum ban ageiguy ven tasiyas bo ikakins.

²¹ Livanen gunawotet nises Bukitab waseg, mamagina:

“Livanen townen nag kal idibakes, tage bikines mo bikakins.”

Sivinan bikin Lom

²² Gunawotet ven tasiyas wasigeis singay babaw. Ta-mawan baw bakineimiy.

²³ Bweilim babaw nein wankuyeim sivinag baw, bo nag. Tage tut townen gunawotet bo ayakous ven tasiyas.

²⁴ Igaw bakilev ban Spein wanamugwa balug wamiven bakineimiy, bitamsamwas sigwey yakamiy tut kayokus waseg, mo kutaneigs bauk ban Spein.

²⁵ Nagein gog ga banow muloul silmanin tasiyas tayakelesiys ven Yelusalem.

²⁶⁻²⁷ Tasiyas min-Masidoni y sisiyas min-Akay sivines, mo imulouls pines tasiyas tasimavs tayakelesiys nisesus Yelusalem. Peinan ninous mawan. E, kadiloka bimulouls wasigeis min-Yelusalem peinan min-Yudiy yakamey nakakow livanen Kelis nakasekes ven babaw gimgilis, vagan bimwasaws. E, kadiloka ven babaw gimgilis bilabes tasiyas simoney waseg.

²⁸ E, bakow simuloul towen, banow basekes, mo baw balakwaneimiy beikous, mo bakilev ban Spein.

²⁹ Yey akakin igaw mo baw waseg Kelis nasiwayoub avakaein mo bitamwasaws sigwey yakamiy.

³⁰⁻³¹ Aguyeimiy sigwey, daGuyaws Yeisuw Kelis waseg, o Kululuwan nasiwayoub waseg, kadiloka bitatawtouns sigwey yakamiy, bitannitougs waseg Yowbad. E, sigwey, kunitougs peinag, vagan Yowbad bikatinabweig. Peinan min-Yudiy tasiyas tapiyavein Kelis sivines kid biyagageigs. E, kunitougs peinag vagan tasiyas tayakelesiys Yelusalem mo bikalin nuwes waseg muloul towen; awoum ge bipiyaves.

³² E, kuntougis Yowbad bikaliyow gunaked mo baw, mwatasaw waseg. Magat Yowbad nanon mawan mo beibwein amnag sigwey yakamiy.

³³ DaYowbads waseg niwal nises. Mtowen simiy yakamiy mo beitaw nuwamiy. Eimen.

16

Ikalin nuwan tayakelesiys wasigeis

¹⁻² Kalin nuwag nadeits Pibiy, peinan ililabes tayakelesiys ven Kenikil waseg. Igaw tutan beiw, kadiloka kutams vin manawen waseg, kuvkakes amibwabwal, peinan numit daGuyaws waseg; o tayakelesiys babaw bweina kutams waseg. E, kadiloka kulabes manawen Pibiy, kukin aveiyag sivinan. Peinan bo nilabem sigwayas babaw gamag.

³ Kumulouls wasigeis tasiyas Piliskil son Akwil. Sigwey tasiyas nakawtel Yeisuw Kelis nawotet.

⁴ Igaw kweiboug tasiyas takamliweigs idokes kid beiweigs, siyas gog son nakwv ilivatus kalbaleb, peinan ikayuseigs. E, kalin nuwem tasiyas, sigwayas tayakelesiys vena babaw waseg.

⁵ Kumulouls simiyas tasiyas tayakelesiys wasibunatum. Kumulouls simiy Epinet. Singay apwakit waseg taw towen. Ven Esiy waseg mtowen iginsimounid waseg Kelis.

⁶ Kumulouls simiy Meliy. Singay itoukum inawotet pinamiy yakamiy.

⁷ Kumulouls simiyas tasiyas talwog Andlonikus son Duniy. Kweiboug sigwey tasiyas nakases wadeil. Buluges avakaein wasigeis takaweins livanen Kelis. Kweiboug iginsi-mounids tasiyas; yej wankuyeim.

⁸ Kumulouls simiy Ampiliy. Singay apwakit waseg daGuyaws angamag towen.

⁹ Kumulouls simiy Uliban, sods mtowen tawteles Kelis nawotet. Kumulouls simiy Sitakiys. Apwakit waseg taw towen.

¹⁰ Kumulouls simiy Apeles, Kelis angamag mounid towen. Kumulouls simiyas tasiyas Alistobulus taliven.

¹¹ Kumulouls simiy veiyoug towen Elodiy. Kumulouls simiyas Kelis angamag tasiyas nisesus Nalisis wanbunatum.

¹² Kumulouls simiyas tawteleins daGuyaws inawotet tasiyas asteiy Tilipen son Tilipos. Kumulouls simiy Pelisis; taw towen bwanabwein singay itoukum daGuyaws nawotet waseg.

¹³ Kumulouls simiy Lup. Bo itawtoun daGuyaws nawotet waseg. Kumulouls simiy Lup inan, mamagina yej inag.

¹⁴ Kumulouls simiyas tasiyas Asinkilit, Pilegon, Emas, Patlobas, Emes, sisiyas tawlisiyas nisesus.

¹⁵ Kumulouls simiyas tasiyas Pilologus, Duliy, Nelewas son nunet, sisiy Olimpas, sisiyas tayakelesiys babaw sisiyas nisesus.

¹⁶ Kumulouls beibwein wasigeis simsimmiyas, peinan daGuyaws angamag yakamiy, Kelis natayakelesiys ven katanok katanok asilivan siwayoub wasigeis yakamey.

¹⁷ Aguyeimiy sigwey, kukinbunikes tasiyas kalisiy ivages moumouvit o ablivis wambod yakamiy, peinan isilbwades sinap towen nakakamtilakeimiy. Kadiloka kusināles tasiyas.

¹⁸ Gamag kalisiy asisinap mawan, nag ikanawes aygan daGuyaws Kelis. Asivikey ikalawages tatineis. Kamnag asilivan mo ikatidavis tasiyas nag imatuw ninous.

¹⁹ Gamag babaw ikakins amisinap, peinan kukwanawes daGuyaws aygan. Mapuna amwasaw waseg. Sivinag bukukwakins aw-sinap bwein o bukutaguwawes sinap kalbaleb.

²⁰ E, daYowbads nuwanaw mo bigulek Seitan nakaleiwag, bukuvans waseg, mo beitaw nuwamiy. Sivinag daGuyaws Yeisuw Kelis bisiwyoubumiy.

²¹ Timotiy, soug yej nakawotet. Mtowen anilivan siwayoub wasigeis yakamiy. Tasiyas-vak Lukiyos son Yeson sisij veiyoug towen Sosipat, tasiyas ikalin nuwes yakamiy.

²² Yey Talitus bo alel Pawl inalet mwaynawen; agulivan siwayoub wasigeis yakamiy, daGuyaws angamag yakamiy o yej.

²³ Mtowen Gayus amatouwos sigwey tayekelesiys babaw, anilivan siwayoub wasigeis yakamiy. Ilasit tamtakavatein money ven towen avakaen waseg, son Kwalitus asilivan mawan. ²⁴(-)

²⁵⁻²⁶ Yowbad kadiloka bikimtuweimeiy mawan agulivan bwanabwein naguyeimey waseg. Livan towen livanen Yeisuw Kelis. Kweiboug ansinap towen nisowum tut singay kadiveiyov ee... nagein gog bo ikamat, o tasiyas palopit kweiboug wasiven ileles, tage ven babaw nag ikakins; nagein gog mo ikakins. O Yowbad tut babaw nises o inakaleiwag vagan babaw gamag nagein mo bisimounids o bitoukums waseg Kelis.

²⁷ Yowbad annwanet tassinap. Natun Yeisuw Kelis bilabeids mo bitayakawanes Yowbad tut nag beikous. Eimen.

1 KOLINIT

Kweiboug Pawl itavin ven Kolinit waseg, igeiguy; gamag mwasanin mo isimounids waseg Yeisuw, iyakelesiys. Ven towen ises katanok bweilim, kwayuwein bweilim watapwan mo inoun, in Siliy. Itavin ven mwasanin ikous, iyum in wanven.

Gamag tasiyas niyakelesiys ven Kolinit waseg mwasanin ivag asisinap kalbaleb. Pawl iligen bulagan, mapuna ilel let towen, iwyeb, inekes min-Kolinit mo ivinis. Let towen wanuwan livanen asisinap kalbaleb, son Pawl anilivan bwanabwein. Asisinap kalbaleb peinan ilivis, ivages bod babaw, o peinan teitan gamag ininagow, o peinan iyatals wamatatan takaleiwag teitan nag isimounid waseg Yeisuw, o peinan gamag mwasinis imgwavis kan mo isekes tasiyas tayakelesiys beikams, o peinan nag ivnases tasiyas takaweins livanen Yeisuw, o peinan daGuyaws inakamkwam waseg mwasanin gamag tagoveks tamwamoums, mwasanin gog isesus-wan asimoun.

Pawl anilivan towen nilel peinan tasiyas asisinap kalbaleb, o peinan min-Kolinit mwasanin nag isimounids waseg livanen Yeisuw neikit kanig waseg; o nag ikakins Kululuwan Teiwen Bwanabwein anavagein tayakelesiys wasigeis; o nag ikakins sinap bwanabwein, yagan siwayoub, nag.

Nakabsilamaw

¹⁻³ Yey Pawl, gunawotet akokew livanen Yeisuw Kelis, peinan Yowbad nakaleiwag mawan. Soug bwadag Sosten nilabeig let towen waseg vagan bukuvinis, Yowbad nayakelesiy yakamiy Kolinit waseg. Yeisuw Kelis waseg bo ikayuseimiy, mo nukumlavags angamag bwanabwein, simiyas ven babaw gimgilis, kalisiy nikavtagis yagan siGuyaw Yeisuw Kelis; mtownen daGuyaws babaw yakids. E, daGuyaws towen son Tamads bisiwyoubumi mo beitaw nuwamiy.

⁴⁻⁷ Tut babaw bo ikalin nuwag Yowbad, peinan isiwyoubumi yakamiy, Yeisuw Kelis waseg. Youda babaw nisekeimiy, vagan bukukwakins o bukulivans sinap mounid waseg. Yakamiy wasigeis bo ikamat livanen Yeisuw Kelis, mawan nalivan. Nag kweitan navagein Yowbad ikabwag wasigeis yakamiy, nag. Mikasis bwein-wan, tut towen nitakayamats daGuyaws Yeisuw Kelis igaw beiyum beim ven watinow.

⁸⁻⁹ Yam babaw Yeisuw imtakavateids, o tut wanakougwaw mawan ee... igaw daGuyaws beiyum beim igawa tadicumwals yakids. Yowbad tonen bo idaweids vagan bitamsamwas sods daGuyaws Yeisuw Kelis, mtownen natun. E, ansinap Yowbad mounid-wan.

Awoum kulivis bukumlavags bod babaw

¹⁰ Sivinag baguyeimiy budag yakamiy vagan kid beivag ninoumiy katanok-wan. Alivan daGuyaws Yeisuw yagan waseg, awoum kutawleyeimiy. Awoum beivag bod babaw. Awoum! Kadilokena ninoumiy bilatan simsimeyas wasigeis, amilivan bimlavag katanok-wan.

¹¹⁻¹⁵ Kilow nagamag mwasanin bo ikamats waseg yey, idibakeigs livanen mikamniman yakamiy, peinan teitan yakamiy bilana, “Yey Pawl nagamag yey”; teitan yakamiy bilana, “Yey Apolos nagamag yey”; teitan yakamiy bilana, “Yey Pita nagamag yey”; teitan yakamiy bilana “Yey Kelis nagamag yey”; mamagin bo kulakes Kelis, vagan kid bibabaw. O budag yakamiy, tabta beiweigs yey Pawl waklos pinamiy? Adok nag. Tabta wayagag yey nibaptayseimiy yakamiy? Adok nag. Bo ibwein nanoug peinan nag abaptayseimiy yakamiy. Misinak abaptayses asteiy Kalisip son Gayus. Magat babaptayseimiy, adok bukulivans, “Bo ibaptaysem Pawl, wayagan tonen waseg.” Awoum bukulivans mawan.

¹⁶ O mounid, bo anuw, abaptayses Stepan sen nagamag. Adok misinak tasiyas.

¹⁷ Peinan wawun gunawotet Kelis nisekeig nag babaptayseimiy, misinaka basekeimiy anilivan bwanabwein. Kukin bageiguy sinapun ven watinow, livanen Yeisuw neiweiys waklos nag bileb gamag, nag. Awoum bageiguy sinapun ven watinow.

Kelis neiweiys waklos

¹⁸⁻¹⁹ Livānen Kelis neiweiys waklos; gamag tasiyas ikankānigs idokes livan makaw; yakids gog, peinan Yowbad ikatinabweids, takakinsa Yowbad natawtoun nises waseg livan towen. Yowbad anilivan nises Bukitab waseg mamagina:

“Tassinaps asisinap bo bagulek.

Babob asilivan tasiyas.”

²⁰ Aveiyag bivages tasiyas tassinaps? Aveiyag bivages tasiyas tamtakavateins kaleiwag? Aveiyag bivag talliwon? Adok nag aveiyag bivages tasiyas. Bitakines Yowbad ansinap tawtoun, mo takakins sinapun ven watinow nag aveiyag bivag. Makaw-wan.

²¹ Asisinap waseg, ven watinow gimgilis nag bikakins Yowbad, nag. Yowbad nanon bo bikatinabwes tasiyas nisimounids anilivan waseg. Ven watinow gimgilis idokes livan towen livan makaw. Yowbad nakaleiwag mawan. Bwein-wan ansinap towen.

²²⁻²⁴ Peinan min-Yudiy sivines bikines naman mulin Yowbad, o mina-Gilis inineivs asisinap; o yakids talivans livānen Kelis neiweiys waklos; min-Yudiy gog ikasigumis livan towen, o ven babaw gimgilis idokes livan makaw; tage yakids kalisiy Yowbad nidaweids, tasimounids livan towen waseg, takinew min-Yudiy yakamey o takinew mina-Gilis yakamiy; yakidsa babaw takakins Yeisuw Kelis, peinan Yowbad natawtoun waseg Yeisuw, o Yowbad ansinap waseg Yeisuw.

²⁵ Yowbad kadilok bitakayway gamag wasigeis, gagab-wan. Anilivan tonen, gamag idokes livan makaw, tage bo iton livan towen.

²⁶ Sigwey, adok kukines tasiyas kalisiy Yowbad nidawes; tassinap ven watinow nag bibabaw nidawes; tatawtouns nag bibabaw, guyawaw nag bibabaw; nag.

²⁷⁻²⁸ Tage bo idawes tasiyas asisinap nag, vagan bitakayways wasigeis tasiyas tassinap; bo nidawes tougweys ven watinow vagan bitakayways wasigeis tatawtouns, mo beivag asimwasin. Bo nidawes siyas toul vagan guyawaw beivag asimwasin. Bo nidawes tasiyas butus nag ivakaein, vagan bigidamis siyas butus avakein.

²⁹ Nag kadilok gamag teitan bikaypom sinap wamatān Yowbad; nag.

³⁰ Yowbad ammwanet, natawtoun waseg, ikaleiwag Yeisuw Kelis mo iyamoveids; ikatipel isekeids Yowbad ansinap; ikatinabweids; ikayuseids; ivageids tadiendumwals yakids.

³¹ Peinan Bukitab waseg livan nises, “Kal bilivan tawtoun waseg, kadiloka livānen daGuyaws bilivan.”

2

¹⁻² Sigwey, kweiboug nawey Yowbad anilivan mounid nasekeimiy, nag mawan mitovek yey, agulivan tawtoun waseg, o agusinap avakaein; adok nag. Peinan wanānoug misinaka Yeisuw Kelis neiweiys waklos; adok bo basekeimiy livan towen; nag kweitan livan; nag.

³⁻⁴ Bo asap wasigeis yakamiy, aguyeimiy livānen Kelis, gunagwey waseg, agupwayat waseg, mamagina matapwad yey. Ta-balivan sinap tawtoun waseg; ta-bakaleiwag; nag. Deisa natawtoun Yowbad Kululuwan waseg bo alivan; mo nukuliganes, nukusimounids yakamiy.

⁵ Sinapun Yowbad bo itawtoun wasigeis yakamiy; mapuna kusimounids sinapun Yowbad, sinapun gamag awoum!

Sinapun Yowbad

⁶⁻⁸ Sinapun Yowbad kalivan sigwey tasiyas mamatuw asisinap, sinapun ven watinow awoum, guyawaw asisinap awoum; peinan nuwanaw beikous tasiyas. Talivānes sinapun Yowbad. Gamag babaw nag bikakins peinan bo ikawum wasigeis. Pwāmug-o nakaleiwag bo bisiwyoubuds yakids vagan bitamwasaws avakaein. Guyawaw ven watinow nag bikakins sinap towen, magat bikakins, adok libālab tanuwagan nag beiweiys waklos.

⁹ Livānen mwasaw towen nises Bukitab waseg, mamagina,

“Tasiyas isiwyoubus Yowbad, o ivnāses nakaleiwag; nasiwayoub bo ikatineg vagan bisekes.

Tut gog townen gamag mites nag bikines,
tiges nag biliganes,
ninous nag bikakins,
peinan nasiwayoub singay avakaein, bwanabwein.”

¹⁰ Kululuwan Yowbad bo ikatipel sinap townen isekeids; Kululuwan tonen ikakin Yowbad sinapun, aw-sinap gagab, aw-sinap moumouvit, kadilok bikatipel bisekeids.

¹¹ Misinaka kululuwan gamag ikakin nanon gamag, aveiyag nises wanuwan. Mawan Kululuwan Yowbad ikakin nanon Yowbad; nag tayuwein ikakin, nag.

¹²⁻¹³ Yowbad nanon nag mawan nanouds yakids. Kululuwan waseg ikatipel nanon isekeids, vagan bitakkins youda babaw bisiwyoubuds. Sinap townen kalivan, nag mawan ven watinow gimgilis asisinap nillivans, nag. Sinapun Kululuwan Yowbad, kallivan gog amalivan. Kalisiy Kululuwan Yowbad nises wasigeis, mo biliganes livan townen, bikakins.

¹⁴⁻¹⁶ Gamag makaw nag bikakins sinapun Kululuwan Yowbad, idokes kid kabala Wein; tatagouwaws tasiyas. Siyas gog Kululuwan Yowbad nises wasigeis, kadilok tasiyas bikakins. O yakids mawan, youda babaw takakins, aveiyag bwein, aveiyag kalbaleb. Gamag makaw nag bikakin silawun sinapun Yowbad; nag kadilok bikaleiwag wasigeis yakids.

“Peinan gamag makaw nag bikakin daGuyaws nanon,
nag kal bikatimlek Yowbad, nag.”

Yakids gog, nanon Kelis nises wasigeis yakids.

3

Yowbad nagamag siwotet kweitan kweitan

¹⁻³ O sigwey, sivinag bakatimlakeimiy sinapun Yowbad; o nag gog, nag kadilok bukukwakins, nag. Adok Yowbad Kululuwan nag bises wasigeis yakamiy. Adok yakamiy mawana gamag makaw, mawan apwaw yakamiy; to nasekeimiy sus kusus, kan nag; peinan nag kadilokeimiy kan bukukwams. Igaw mawana ven watinow gimgilis yakamiy. Peinan kwamnimans simsimeyas, kuttavileys; mawana ven watinow gimgilis yakamiy.

⁴ E, peinan teitan yak kulana, “Yey Pawl nagamag yey.” Teitan yak kulana, “Yey Apolos nagamag yey.” Mawana ven watinow gimgilis yakamiy.

⁵ Nag Apolos takaleiwag avakaein. Yey nag takaleiwag avakaein. Takaleiwag kid daGuyaws tonen. Natouwat yakamey. Mawotet bo isekem, teitan gamag kweitan nawotet, teitan gamag kweitan nawotet. Anilivan kakokew vagan bukusimounids waseg.

⁶ Mamagina youpeis bo asop yey, Apolos mo ikokew soup ivvmoum; Yowbad gog ivag kan igaw bisap.

⁷ Nag tasapwein kan, nag tavnwamwein soup, misinaka Yowbad anmwænet tavægin kan.

⁸⁻⁹ Yakamey mamagina tabgubag yakamey. Nag teitan bimug son waseg, nag. Igaw maysem bakakow, kadilok mawotet. Datoveks Yowbad, kawotet simey; mamagin inabag yakamiy; o mamagin nabunatum yakamiy.

¹⁰ Yowbad isiwyoubug vagan bakakin gunawotet mamagin tawtelein bunatum, kakol akelay bo ibunek; teitan gog isen sol, mo iwlulays wakunuwatan. Kadilok tawteleins bunatum biwlules bwein.

Kadiloka tawlulays bwein

¹¹ Dakakols Yeisuw Kelis tatonen; nag kweitan kakol bwanabwein bitakelays; nag.

¹²⁻¹⁵ Adok mwasanin bikawes biwlules akulouy, yed, akidous; mwasanin gog bikawes biwlules kilim, alviluw, awduvid.

Igaw yam townen Yeisuw Kelis bikaleiwag mayses tasiyas, biyakwanes sibunatum, amtowen bwanabwein, amtowen gaganen.

Tasiyas iwlules bwein, sibunatum bisesus tawtoun, maysan bwanabwein bikawes. Bunsiyas gaganen bigulekxes, bigob biyakous; tawteleins bunsiyas bunatum biyamkwanes siwotet, makava bikatimoves tatineis; mamagin tasiyas bilouvats kov avakaein; youd babaw bigob kov biyakous, makava gog bikatimoves gamag tasiyas.

¹⁶⁻¹⁷ Adok nag kukwakins yakids mamagina Yowbad nabunatum yakids; Kululuwan Yowbad nises wasigeis yakids. Kukin teitan bigulek Yowbad nabunatum, igaw Yowbad biyageg gamag towen. Yowbad ikayus nabunatum vagan bisesuna bwanabwein; nabunatum tonen yakids.

¹⁸ Awoum kwatidavimiy tatineimiy. Kukin teitan idok tassinap ven watinow, kadilok bimlavag toubol, mo bikow Yowbad ansinap mounid.

¹⁹⁻²⁰ Peinan tassinap ven watinow mamagina toubol wamatian Yowbad. Livanen nises Bukitab waseg, mamagina,

“Tassinaps, Yowbad ivag; mo asisinap ikwanes tatineis.”

Kweitan livan nises,

“DaGuyaws ikakina tasiyas tassinaps
asisinap makaw-wan.”

²¹⁻²² Awoum kwamnāmwans mituwāveks wasigeis. Peinan Kelis bo isekeimiy youda babaw.

Yey Pawl pinamiy yakamiy, o towen Apolos pinamiy yakamiy, o towen Pita pinamiy yakamiy, yakamey amababaw-wan pinamiy yakamiy.

Vena babaw nisesus pinamiy; o mimwamov pinamiy, o mikang pinamiy igaw mo bilabeimiy. Youda babaw tut towen waseg ilabeimiy, o youda babaw igaw tut wanakougwaw mo bilabeimiy.

²³ Peinan Kelis angamag yakids, mtowen Kelis Yowbad Natun.

4

Kelis nagamag abes igeg

¹⁻² Kuninuways Kelis nagamag yakamey. Gamag babaw nag bikakins ansinap Yowbad. Kelis bo isekem mawotet vagan bakakatipel ansinap bakasekeimiy gamag yakamiy. Kadiloka bakawtel mawan beibwein.

³⁻⁴ Magat bukwatukins agusinap, aveiyag bwein, aveiyag kalbaleb; nag bukwatukins bwein. Nag kadilokeimiy. Nag kadilok kweitan gamag bikakin o bikaleiwag bwein. O yey mawan; nag kadilokeig bakakin bunik gunawotet. Wananoug adok gunawotet bwein, o yey nag bakakin kamnat. Igaw daGuyaws beim, mo bikaleiwag.

⁵ Nag kadilokeimiy bukwatukins wasigeis gamag siwotet. Igaw daGuyaws beim, mo bikamat adsinaps babaw-wan, aveiyag bwein, aveiyag kalbaleb; e, mo bikamat aveiyag nises wananouds. Yowbad mo bisekeids katanok katanok yakids mawan adsinaps; kukin bwein mo bikavasid; kukin gog nag, bo nag.

⁶ Sigwey, livnem amateiy soug Apolos bo alel vagan bukuwakins bwein, o kaleiwag bwein bukuvnases. Mata ge bukulansa, “Guntovek towen bwein, tayuwein kalbaleb.” Awoum!

⁷ Awoum kwaypamwes sinap. Amisinap Yowbad nisekeimiy; nag amisinap tatineimiy, nag.

⁸ Bo kukwamuweips yakamiy. Bo kuguyaws adok. Bo kukwaleiwags yakamiy; yakamey nag. Sivinag mounid bukuwaleiwags, vagan sigwey yakamiy bitakaleiwags babaw yakids.

⁹ Takaweins Yowbad anilivan yakamey adok bo ivagem mamagina toul yakamey, mamagina tasiyas takankanigs, vagan vena babaw gimgilis mo bikasigumimas; minibalab adok o ven watinow gimgilis bikasigumimas yakamey.

¹⁰⁻¹¹ Yakamey mamagina takabalaweins yakamey, Kelis nawotet silmanin; o yakamiy mawan tassinaps yakamiy. Yakamey tougweys, tage yakamiy tatawtouns. Gamag

ikavasimiy yakamiy, o yakamey nag, amamwasin kasesun-wan. Igaw amamoun, amadak, amakweim nag; gamag iyagagemas; mabunatum nag. Makaw-wan!

¹²⁻¹³ Kawwotet wanimem tatinem. Iyagemas tasiyas, nag kakatimop ages; kalivan bwein wasigeis tasiyas. Iyablebemas, nag aveiyag kavag; kasesun-wan. Ivtokemas livan; amalivan siwayoub kasekes. Bo nakamlavag kalbaleb gamag, mamagina sim, yakamey. Igaw-wan tut towen bo mawan.

¹⁴⁻¹⁶ Ta-balel mawan, vagan beivag amimwasin, nag. Deisa bamulimi vagan beibwein amisinap, mamagina nitug bwanabwein yakamiy. Babaw gamag bikatimlakeimiy sinapun Yeisuw waseg; tage timamiy nag bibabaw, timamiy agumwanet yey. Peinan yey bo asekeimiy livanen Yeisuw Kelis, vagan kid bukusimounids towen waseg. Kadiloken-wan kukikunis gunaked.

¹⁷ Mapun bo akayeb Timotiy biwekeimiy bikatimlakeimiy vagan bukuninuways agusinap. Tayakelesiys vena babaw akatimlakeimiy gunaked, peinan Kelis inaked. Timotiy mamagina natug bwanabwein; peinan ikaninow daGuyaws aygan bo imlavag natug yey.

¹⁸⁻¹⁹ Gamag mwasanin ikaypamwes sinap, idokes kid ta-baw. Tage nuwanaw bo baw, magat daGuyaws nanon mawan; mo bakin sitawtoun tasiyas takaypamweins sinap, o nag, amawan? Adok asilivan makaw.

²⁰ Yowbad nakaleiwag nag mamagina livan makaw; nag. Yowbad nakaleiwag natawtoun waseg ikaleiwag.

²¹ Aveiyag sivinamiy? Igaw bawekeimiy bakkaneimiy-wan? O nag, adok bo bimakwein wou? Takaleiwag yakamiy.

5

Taninagow

¹ Bo aligen kid teitan nises wasigeis yakamiy, ikanavaya mav. Ansina singaya kalbaleb; peinan imasis son taman nakwaw. Gamag siyas igaw dadub nag bininagows mawan.

² O yakamiy gog kwaypamwes sinap. Bo igak! Kadiloka bigeg ninoumiy, taninagow towen silmanin. Kadiloka kwayabes gamag towen, binoun.

³⁻⁵ O ye yadiiveiyov nases, magina kululuwag simiy tasesus; gunakaleiwag mawan: Kwatuyouns yakamiy, kululuwag ye simiy, bo bitakaleiwags; daGuyaws yagan waseg. DaGuyaws Yeisuw natawtoun waseg bo bitakaleiwags mawan. Bo bitakayabes taw towen binek Seitan vagan biyageg won taw towen, mo bikatimov kululuwan, igaw yam towen daGuyaws beiyum beim.

⁶⁻⁸ Kalbaleb nukwaypamwes yakamiy. Adok kutagouwawes. Magat kalbaleb kikit nises, igaw sona mo bigeg. Kulavew kalbaleb towen nises wasigeis yakamiy, vagan bukusesus bwanabwein. Mamagin Sagal Kaltuwon silmanin talavewas yist, bled kweivaw bwanabwein tagabus, bled makaw. Peinan sinap kalbaleb mawan yist. Kadiloka taw towen anmwānet kwayabes, peinan ansinap kalbaleb.

Sagal Kaltuwon bulukwan lāmiy bo iweiys peinads, mtowen Kelis. Kadiloka bitassagals Kelis waseg, adsinaps nag mawan kweiboug, kalbaleb. Kadiloka nanouds katanok, didumwal, adsinaps mawana bled kweivaw bwanabwein.

⁹⁻¹⁰ Kweiboug gunalet neiw, nalel mamagina, "Awoum simiyas takalbalebs kusesus." Nag mamagina bukusinales tasiyas tassubwans, o tasiyas tamtimwamons, o tasiyas tavveinaws, o tamgamegs; kukin bukulisawes tasiyasa babaw, adok bo bukulisawes vena babaw.

¹¹ Tage gunakaleiwag mawan: Kukin simiy teitan idok Yeisuw angamag tonen, mo bikanavaya mav, o biyageg son, o bimgameg, o biyaweid, o biyyagay o bimwamoum wiskiy o aveiyag mo bikabalawein, o biveinaw, kadiloka kusinales gamag towen. Awoum bukwamtans simiy.

¹²⁻¹³ Bo bitakaleiwags wasigeis tasiyas tayakelesiys; tasiyas watoulan awoum. Yowbad igaw bikaleiwag wasigeis tasiyas watoulan.

Peinan taw towen taninagow tayakelesiy teitan, kadiloka kwayabes, bein watoulan.

6

Yatal

¹ Kweitan sinap kalbaleb nises wasigeis yakamiy. Kuyateles simiy, wamatan takaleiwag gabman towen nag isimounid Yeisuw waseg. Bo igak! Magat bukuyateles, kadiloka kuneves tayakelesiys mwasanin bikaleiwags wasigeis yakamiy.

² Kuninuways, tasiyas iyakelesiys mounid igaw mo bikaleiwags youda babaw wasigeis. Igaw bukukwalawages youda babaw, adok ikadilokeimiy kakit sinap bukukwaleiwags, tut towen waseg, ne?

³ E, kuninuways; igaw bitakaleiwags min-libalab wasigeis. Tab ikadilokeimiy bukukwaleiwags ven watinow? Adok ikadilokeimiy.

⁴⁻⁵ Tut towen sivinamiy siyas toul bikaleiwags wasigeis yakamiy. Bo igak! Agulivan towen vagan beivag amimwasin. Adok tassinap teitan nises wasigeis yakamiy, kadilok towen bikaleiwag. Igaw simiy asteiy biyatel son, tassinap towen mo bikaleiwag.

⁶ O nag gog, tut towen iyatel son, o towen takaleiwag nag isimounid Yeisuw waseg. Bo igak!

⁷ Sinap towen singaya kalbaleb. Bweina kuses, kukin soum biyablebeim o biyagageim, bweina kuses. Sinap towen bwanabwein.

⁸ O nag gog, yatal waseg kuyablebes simiyas, o kusilponays simiyas wasigeis, tayakelesiys babaw-wan yakamiy. Bo igak!

⁹⁻¹⁰ Kukin amisinap kalbaleb ta-mawan bukusiws Yowbad nakakkaleiwag wanuwan, nag. Takalbalebs nag beisiws, nag; tasiyas ikaninavays mav, nag; tawaw, o vinay ikaninavays mav, nag; gamagal ikaninavaysa mav, nag; tamgamegs nag; tassubwans nag; takkaylas nag; tayablebeins pwadaw nag; tasimomons nag; tavveinaws nag; takwekways nag; tamwamweins wiskiy o aveiyag bikabalawehins, tasiyas nag; tasiyas tayyagays nag; tabbakews nag. Asibabaw nag beisiws Yowbad nakakkaleiwag, nag.

¹¹ Kweiboug yakamiy mwasanin amisinap mawan. Nagein gog daYowbads bo iwid amisinap towen, ikayuseimiy, bo ikidumwal amisinap, daGuyaws Yeisuw Kelis waseg, o Yowbad Kululuwan waseg.

Awoum kusubwans

¹² Adok teitan yak bukulivan kid, kulana, “Kadilokeig sinap babaw.” E, mounid. Kadilokeid sinap babaw bitakow, tage sinap mwasanin nag bikatimweisid. Awoum bamlavag mamagina sinap mwasanin natouwat yey.

¹³ Kan toub silmanin, o toub kan silmanin; tage igaw Yowbad bigidem kan son toub. Taninuways-vak woun. Woun nag silmanin subwan, nag; woun silmanin daGuyaws; e, daGuyaws silmanin woun.

¹⁴ Yowbad natawtoun waseg ivag, Yeisuw mo ikit vayuwein; igaw yakids mawan.

¹⁵ Taninuways wouds mamagina wuliyougwan Yeisuw Kelis won tonen. Nag kadilok bitamlavags magasin wuliyougwan nawlays. Awoum.

¹⁶ Kukin kal imasis son na wen nawleyas ikatuvases son, wous asteiy imlavags magasin wous katanok. Livan nises Bukitab waseg,
“Tasiyas asteiy ilatan wous katanok-wan.”

¹⁷ Tage kal ikatuvas son daGuyaws, kululuwes katanok-wan.

¹⁸ Kadiloka kupiyaves sinap towen kaninavaya mav. Sinap babaw kalbaleb gamag bivag mo biyageg son teitan; tage kal bikanavaya mav mo biyageg won tatonen.

¹⁹⁻²⁰ Taninuways wouds yakids mamagina nabunatum Yowbad Kululuwan Towen Bwanabwein. Bo iyamiyiseids Yowbad. Mtowen tanuwagan yakids. Yey nag tanuwagan; yakamiy nag tanuwagan; Yowbad tanuwagan. Maysads yakids, Yowbad Natun. Mapuna ikayus wouds yakids. Kadiloka bitakayuses wouds silmanin sinap bwein; mo bikalin nuwan Yowbad.

Veivay

¹⁻² O milet neim waseg yey. Sinapun veivay nukwatugans waseg yey. Nanoug bo mawan: Magat yakamiy tawaw nag bukunekes vinay, sinap towen bwein. Tage nag kadilok. Peinan gamaga babaw ikaninavaysa mav, kadiloka kuveivays, teitan taw nakwav tonen, teitan taw nakwav tonen. Awoum bimasis tobwag gamag son.

³ Kukin taw bikanavays son nakwav, awoum bisilbwed, peinan nakwav. O kukin vin bikanavays son namwan, awoum bisilbwed, peinan namwan.

⁴⁻⁵ Kukin taw sivinan bimasis son nakwav, awoum vin bikayus won tatonen; taw bikaleiwag. Mawan-vak, kukin vin sivinan namwan bimasis son, kadiloka beitam.

Misinaka bivatam nakwav waseg o namwan waseg, mo bimasis tanaban tut nag biveiyov vagan binnitougs Yowbad waseg. Beikous, mo bilatans, bimasis son. Kukin gog bimasis tanaban tut kadiveiyov adok Seitan mo biyakwanes, peinan iwaway wous.

⁶⁻⁷ Kalisiy sivines beivays, bweina beivays. Kukin teitan sivinan bisesuna anmwānet, bweina bises. Adok bweina gamag babaw bisesus mawan yey. O adok nag, peinan Yowbad ikaleiwag teitan gamag isek kweitan sinap, o teitan gamag kweitan sinap.

⁸⁻⁹ Adok nakubukwabs o nakwabs bisesus mawan yey, sinap towen bwein-wan. Kukin nag kadilok bikaptules, bweina beivays tasiyas. Wous biyaways kalbaleb; beivays bwein-wan.

¹⁰⁻¹¹ Tasiyas kweiboug neivays, daGuyaws nakaleiwag mawan (yey gunakaleiwag nag; daGuyaws nakaleiwag): awoum vin bipiyev namwan. Magat nipeiyaws kweiboug, manawen vin inaked akweiy bwein-wan. Kweitan ked bisesun-wan. Kwayuwein ked beiyum binek namwan. Tawaw mawan, awoum bipiyaves sikwavas.

¹² Kukin kal iyakelesiy o nakwav nag isimounid Yeisuw waseg, o nawen sivinan bisesus son, awoum taw bikayeb; bweina bises nakwav. Nanoug bo mawan. Nag kaleiwag Kelis isekeig; misinaka nanoug yey.

¹³ Mawan-vak, kukin kal vin iyakelesiy, o namwan nag isimounid Yeisuw waseg, o towen sivinan bisesus son, awoum vin bipiyev namwan towen.

¹⁴ Magat vin ansinap bwanabwein, o namwan ansinap igege; adok igaw taw mo bikayles nakwav ansinap bwanabwein. O magat taw ansinap bwanabwein, o nakwav ansinap igege; adok igaw vin mo bikayles namwan ansinap bwanabwein. Kukin nag beibwein asisinap bo bigeg asisinap nitimiya. Tut gog towen nisesus bwein.

¹⁵⁻¹⁶ Magat vin kavel nag isimounid Yeisuw waseg, o namwan isimounid Yeisuw waseg, o vin sivinan bilisow namwan, bweina binoun. Awoum bikayus. Bikayus, adok bikamnimansa son. Yowbad nag ivag sivinan kamniman. Vin n̄awen bweina binoun. O magat taw kal nag isimounid Yeisuw waseg, o nakwav isimounid Yeisuw waseg, o taw sivinan bilisow nakwav; bweina bilisow, binoun. Igaw nakwav bisimounid Yeisuw waseg? O nag? amawan? Nag bitakakins. O vin namwan igaw bisimounid Yeisuw waseg? Nag takakins.

Awoum tapiyev qbad

¹⁷ Yākids babaw tasesus, teitan gamag kweitan wotet, teitan gamag kweitan wotet, mawan Yowbad nakaleiwag. Bweina tases wakabad tatoneid. Adibakeimiy tayakelesiy amibabaw mawan.

¹⁸ Kal momwan nibob mamagin Ebelam nakabivatus, igaw Yowbad bidow, mo bisimounid Yeisuw waseg; awoum bigeg nanon nakabivatus silmanin. Kukin nakabivatus nag, awoum bibob momwan. Bweina bises.

¹⁹ Anaboub momwan nag bivakaein wotet; o momwan bises, sinap towen nag bivakaein. Misinaka takanaweins Yowbad nakaleiwag siwotet bwein, avakaein.

²⁰ Amawan muwotet; tutan Yowbad bikatigikeim vagan bukuyakelesiy, awoum kupiyev muwotet tatoneim; e, kadiloka kuwotet bwein.

²¹ Kukin bukuwtel mutovek nawotet, awoum bigeg nanoum. Igaw bikaleiwag bukuyum, bweina kunoun.

²² Kukin Yowbad bikatigikeim, vagan bukuyakelesiy, mutovek natouwat ven watinow yakoum, Yowbad bo bilikum sinap kalbaleb waseg, mo bukumlavag mamagina guyaw yakoum. O kukin bikatigikeim, magat guyaw yakoum, bo bukumlavag Kelis natouwat yakoum.

²³ Maysads yakids Yeisuw nisen, mo ikaweids angamag yakids. Nag kadilok bita-mlavags sitouwat ven watinow gimgilis.

²⁴ O soug yakoum, amawan muwotet, igaw daGuyaws nikatigikeim, awoum kupiyev muwotet; peinan Yowbad sod tases.

Nakubukwabs

²⁵⁻²⁷ Livanen nakubukwab nukwatugans waseg yey. Nag kweitan livan daGuyaws isekeig, nag. Misinaka ilabeig, nanoug waseg isekeig sinap. Adok kadiloka kusimounids agusinap towen. Peinan tut towen kalbaleb, adok kadilok gamag babaw bisesus-wan. Kukin mukwav sam, bweina kusesus. Kukin mukwav nag, bweina kuses mav.

²⁸ Taveivay nag ivag kalbaleb; tage kalisiy beivays mo singay bigeg abes. O peinan tut towen singaya kalbaleb, nag sivinag abamiy bigeg.

²⁹⁻³¹ O sigwey, agulivan mamagina, “Kakit beikous tut towen ven watinow waseg.” Igaw siyas sikwavas sam, bweina bisesus mav, mawan tasiyas sikwavas nag, nisesus mav. Tavvalams bweina bisesus mawan tasiyas nag ivalams. Tasiyas tammwasaws bweina bisesus mawan tasiyas nag imwasaws. Tasiyas iyamiyises sivavag, bweina bisesus mawan tasiyas siwliyoug nag. O tasiyas iguyaws, bweina bisesus mamagina tasiyas toul. Peinan kakita beikous sikaleiwag ven watinow. Kaleiwag kweivaw mo bisilamaw.

³²⁻³⁴ Awoum bibabaw nanoum. Kukin mukwav sam, nanoum waseg youda babaw, ven watinow wuliyougwan, aveiyag sivinan mukwav. Kukin mukwav nag, nanoum katanok-wan, anmwanet daGuyaws nakaleiwag, aveiyag sivinan. O vinay simwanas sam, ninous wasigeis youda babaw, ven watinow wuliyougwan, aveiyag sivines simwanas. O nakubukwabs o vinay, simwanas nag, waninous anmwaneta daGuyaws nakaleiwag, aveiyag sivinan. Vinay tasiyas ikayuses wous o kululuwes silmanin daGuyaws nawotet.

³⁵ Bo alivan mawan, vagan balabeimiy; nag vagan basilbwed miked, nag. Agulivan towen vagan kid bukusesus bwein; sivinag bukuwtets daGuyaws nawotet waseg, ninoumiy bo katanok-wan.

³⁶ Kal angamag nakubukwab, bikayus, bikaleiwag bo bisesun-wan; tage kukin bigeg nanon peinan bo iwnabwat, namwan gog nag; o sivinan beivays son namwan, bweina beivays; nag ivag ansinap kalbaleb, bwein-wan.

³⁷ O kukin gog, towen nanon katanok, o sivinan nakubukwab bisesun-wan, o nag kweitan gamag biyageg nanon; o nakaleiwag vagan bisesun nakubukwab, bweina bikayus; nag ivag ansinap kalbaleb, nag.

³⁸ Kukin kal beivays son nakwav, ansinap bwein-wan. Kukin gog nag beivays, singay bwein ansinap towen.

³⁹ Vin kavel namwan mwamov, bo ilatans son. Kukin namwan bikanig, bweina bivevaw; tage kadiloka beivays son gamag kamnat, daGuyaws angamag teitan, kavel sivinan.

⁴⁰ Kukin gog bisesun-wan, singaya bwein ansinap manawen vin. Nanoug mawan. Adok Kululuwan Yowbad nanon bo mawan.

Kan imgawis

¹ Kweitan livan nukwatugans waseg yey, livanen kan towen ivisan, tasiyas igaw dadub imgamegs waseg. Kulivans, “Tayyaweids tasiyas. Sinap babaw kakakin yakamey”; tage yak kudok amsinap avakaein, mo kwayapam, bo igeg amsinap; kadiloka gog bukusiwayoub mo bikatimweis amsinap bwein.

²⁻³ Kukin kal towen nag isiwayoub mo idok tassinap tonen, nag ikakin bwein. Kukin bisiwayoub waseg Yowbad, Yowbad mo bikakin taw towen takamnat.

⁴ Kulivans kid, “Yowbad anmwanet. Tasiyas imgamegs siyowbad wasigeis, o kaeis ikamkwams, ivavagsa mav.” E, mounid.

⁵⁻⁶ Kukin yowbad bibabaws ven watinow o walbalab, o guyawaw bibabaws, tayyaweids gog tasiyas. Peinan daYowbads anmwanet, Tamads, nibun youda babaw, o mwamovads isekeids silmanin towen. DaGuyaws kid anmwanet Yeisuw Kelis; o Yeisuw son Taman ibubun youda babaw, o ibunids-vak yakids.

⁷ Gamag mwasanin nag bikakins Yowbad anmwanet. Mwasanin igaw dadub nisesus; nagein gog mo ikawes sinapun Yowbad, o nag ikawes bwein; idokes yowbad babaw nisesus; o iwenes kan towen ivisan-wan, peinan nimgwavis. Tasiyas igaw beikams, mo biwenes Yowbad, peinan Yowbad nag ivag sivinan meg.

⁸ Tage nag kweitan kan bitakoum, vagan Yowbad bisiwyoubud, nag. Kan towen, bitakoum, nag bikatimweisid, nag. Bitapiyev, nag biyagageid, nag.

⁹ O peinan yakoum amsinap avakaein, o sod gog ansinap igwey, awoum kuyageg sod.

¹⁰⁻¹² O sod, igaw teitan bikiniem bo kukwam kan towen ivisan-wan, teitan neimeg waseg; o sod igaw beikam, mo bikubukub nuwan peinan iwen meg. Yakoum amsinap avakaein, bukukwam, nag aveiyag bukulivet; tage bo bukuyageg sod. O Kelis nikanig sod peinan, vagan biyamov, awoum ge kuyageg sod. Kukin amsinap mawan bukuyageg sod, mawana bo kuyageg Kelis.

¹³ Magat kag kweitan biyageg sod, bo bapiyev kan towen. Nag kweitan tut bakam; nag. Awoum bayageg sod; awoum.

9

Takaweins livanen Yeisuw

¹ Awoum teitan gamag bikaleiwag waseg ye. Guntovek anmwanet Yowbad. Gunawotet akokew livanen Yeisuw. DaGuyaws towen bo akin wamatag; o yakamiy nukuliganes livan towen; yakamiy mamagina gunawotet anagin yakamiy, daGuyaws Yeisuw waseg.

² Gamag mwasanin bilivans, “Towen Paul, nag takawein livanen Yeisuw”; yakamiy gog kukwakins mounid gunawotet towen; o livanen Yeisuw bo asekeimiy. Gamag mwasanin bikiniemiy, nukumlavags daGuyaws angamag yakamiy, mo bisimounids Yeisuw nawotet waseg ye nises.

³ Tasiyas ivtokeigs livan, akatimop asilivan livneimiy waseg, peinan nukumlavags daGuyaws angamag yakamiy.

⁴ O peinan gunawotet towen, kadilok bukuvakamugs ye.

⁵ O magat gunakwaw sam, tayakelesiy natan, kadilok bukuvakamumas; peinan tayakelesiy ivakamus sikwavas tasiyas takaweins livanen Yeisuw, o sikwavas budan Yeisuw, o nakwaw towen Pita.

⁶ O nag gog, amateiy soug Banab kawotet wanimem silmanin bakakam. Peinan takaweins livanen Yeisuw yakamey, maysan wotet bakakam? o nag? amawan?

⁷ Tabta tasiyas gabman mawana sitakknaviys binineivs kaeis tatineis, ne? Adok nag. Maysan wotet beikamsa mav. Tabta tasiyas tasapweins kan bisesus asimoun, ne? Adok nag. Anagin wotet bo beikams. Tabta tatuyein kweitan gamag alen bises anamoun ne? Adok nag. Bo beikam.

⁸⁻¹⁰ Sinapun ven watinow towen; o Moses nakaleiwag-vak nises mamagina: “Bulumakaw iwotet wit waseg, bweina beikam wit anagin.”

Tabta kaleiwag towen peinan Yowbad ikalin nuwan bulumakaw? Adok nag. Adok nakaleiwag towen peinan ikalin nuwan yakids. Adok anakabebay towen, kweiboug nilel vagan kid tasiyas tawteleins Yowbad nawotet, mo bikawes kaeis beikams. Tasiyas tawayins yagoug sisiyas tatayaweins kan inmises igaw kaeis beikams. Mawan ge tawteleins Yowbad nawotet igaw beikams mav, maysan wotet.

¹¹ O peinan Yowbad anilivan waseg nakavkamumi, mapuna kaeimiy kadiloka kuvkamumas.

¹² Peinan kuvakamus gamag mwasinis igeiguis wasigeis yakamiy, tage kadiloka singaya bukuvkamumas yakamey. O nag ivag sivinem kaem bukuvkamumas, nag. Bweina bakases amamoun. Kukin makaleiwag bimouvit wasigeis yakamiy, adok mo bukupiyaves Kelis nasiwayoub bwanabwein wasigeis yakamiy.

¹³ Kukwakins gog tasiyas iwtets Yowbad wanbunatum, kaeis ikawes, maysan wotet towen. Lun bulukwan iweiys ikous, mo ilakes, ilagus, amtowen bigob Yowbad silmanin, amtowen bisemos kaeis tatineis.

¹⁴ Mawana daGuyaws ikaleiwag pines tasiyas takaweins anilivan bwanabwein, anagin wotet kaeis beikams.

¹⁵ O yey gog nag sivinag maysan gunawotet kag bakow, nag. Sivinag bawotet mav. Nag balel let towen vagan kag bukusekeigs, nag. Awoum bakayus kag towen. Bweina agumoun bakanig. Bweina bawoteta mav, bakanig agumoun. Awoum bimouvit gunakaleiwag wasigeis yakamiy.

¹⁶ Kukin bakow liven towen bwanabwein, liven Yeisuw, gamag nag bikavasigs. Kadilok bo bavag mawan. Kukin nag bawtel wotet towen, bo bigeg nanoug, adok bo balouvat kalbaleb.

¹⁷ Kukin nanoug mawan bo bawtel gunawotet, igaw maysan gunawotet mo bakow. Tage silawun gunawotet Yowbad nakaleiwag. Awoum bawotet silmanin maysag; awoum. Peinan Yowbad nakaleiwag waseg yey, kadiloka bawoteta mav.

¹⁸⁻¹⁹ Na-ivag maysan gunawotet. Sivinag bawoteta mav, mo beibwein nanoug. Peinan basekeimiy liven Yeisuw, liven towen bwanabwein, kadiloka kuymiyiseigs. O nag, sivinag bawoteta mav. Nanoug bo mawan. Nag teitan kadilok bikaleiwag waseg yey, nag; tage bo amlavag magina babaw gamag sitouwat yey, vagan biliganes liven Yeisuw, namagleis-e gamag meivek-wan.

Gamag asisinap kweitan kweitan

²⁰ O ivag agusinap mawana gum-Yudiy yey, vagan kid tasiyas min-Yudiy mo biliganes Yeisuw nakaleiwag. O magat bakases sigwey tasiyas takanaweins Moses nakaleiwag, mo bamlavag magina tasiyas, vagan kid tasiyas mo biliganes Yeisuw nakaleiwag. Tage Moses nakaleiwag nag bitawtoun waseg yey, nag.

²¹ O magat bakases sigwey tasiyas tadaub, watoulan Moses nakaleiwag nisesus, mo beivag agusinap mamagina tasiyas, vagan kid tasiyas mo biliganes Yeisuw nakaleiwag. Tage nag bapiyev Yowbad nakaleiwag, nag; tuta babaw akokew Yeisuw Kelis nakaleiwag.

²² Tougweys sigwey bakases, mo bamlavag mamagina tougwey yey, vagan tasiyas biliganes Yeisuw nakaleiwag. O tasiyas sigwey, asisinap kweitan, bamlavag mamagina tasiyas, vagan biliganes Yeisuw nakaleiwag, mwasanin tasiyas. O gamaga babaw sigwey nakases, agusinap mawan.

Itawtoun vagan biwtel nawotet bwein

²³ Gunawotet towen babaw awtel, peinan sivinag bakokew liven Yeisuw Kelis, o sivinag gunawotet towen bawtel beibwein, mo bamwasaw waseg.

²⁴ Bitaninuways, kalisiy igaw mo bimwasaws? Magat babaw bikawlideiys bisisawls wavytakon ven, tatanok bitamap, maysan mo bikow. O yakoum mawan, kadiloka kunoun wamked ven watinow, mutawtoun waseg, vagan kid maysan mo bukukow.

²⁵ O tawtelein wag itas kalalav, iwtel bwein, silmanin igaw wag babaw mo bikavvalaks bisisawls, nawag makaywen mo bitamap. Maysan gog bikow. Nag bivakaen maysan. O yakid gog bitawtel dawotet bwein, igaw maysad avakaen mo bitakow; maysads towen bo bisigeg.

²⁶⁻²⁷ O yey, asawl vagan batamap kid; akavaveis bunik vagan wag bidumwal; akaleiwag waseg woung tatoneig vagan sinap tawtoun bakow. Yey bakaleiwag, woung nag. Magat woung bikaleiwag agusinap kalbaleb, maysan bwein nag bakow, nag. Magat basekeimiy liven Yeisuw, o woung igaw mo bikaleiwag agusinap kalbaleb, maysag bo biyamkwaneig.

10

Tobwag Yowbad

1-2 O sigwey, taninuways tammwayas wanawoud pwamug-o, Yowbad isen wakunuwties lov imgwayes, o igaw Yol Bwabwel isilbwed siked, isiws wanuwan, ineis, isaps palatan. Mamagin ibaptyses Moses waseg, lov waskawan o yol wanuwan, peinan itams Moses nakaleiwag waseg.

3-4 O siyas babaw nikamcoums libalab kan-nen, nimwamoums libalab sipinen; mtownen sisiy ineis yagan Kelis, mamagina dakul ibwabwab yevagam, peinan yam babaw kuluwes imwamoums libalab sipinen, towen Kelis iwmwamwes kululuwes tasiyas.

5 Tage Yowbad nag ikalin nuwan tasiyas babaw, mapun ikankanigs; wous tasiyas ikatigayays wanawoud, ven makaw, waseg.

6-7 Youd tasiyas ilivatus adsinaps silmanin, vagan bikatimlakeids, mo bitakawes adsinaps bwein; awoum sivinads sinap kalbaleb mawan tasiyas; awoum bitayousis yowbad tobwag mawan tasiyas niyousis. Peinan kweiboug nivages mawan, livanen nises Bukitab waseg, mamagina, “Isinis kid beikams kan, o beimoums; wankuyeim mo itamanaws kalimwasaw silmanin, iwliwals tobwag yowbad silmanin.”

8 Awoum takanavaysa mav, mawan tasiyas kweiboug, yam katanok waseg mo ikabalams singay babaw tawsans, sinawey kweitoun tawsan gamag imtamats ikous.

9 Awoum tayakwanes daGuyaws, mawan tasiyas ivtokes livan, kan silmanin; wankuyeim mo isekes mwatet ibsibas tasiyas, ikankanigs wanawoud.

10 Awoum tavtokays livan, mawan tasiyas ivtokays livan, mo ikayeb tawayin gamag, iwaweiys gamag tasiyas, imats.

11 Ilouvats youd tasiyas kalbaleb, vagan kid yakids-vak mo bitakakins sinap bwein; peinan kweiboug sinap babaw mo ilivatuds, nagein, nakabiyokous tut waseg.

12 Kukin kal idok ansinap tawtoun, kadiloka bivnas, mata ge bikalouw, sinap kalbaleb waseg.

13 Aveiyag talivatus biyakwaneids, kweiboug niyakwanes gamag babaw wasigeis. Yowbad gog mounid bo bilabeids, nag beitam sinap kweitan biyakwaneids vagan bibinak wouds, nag. Dakabiyokons towen, magina dakul silupouy; talivatus wabwanit; Yowbad gog bikatimlakeids aniked mo bitalavays; mamagin bitatawtouns waseg dakabiyokons, kweitan kweitan.

14-16 E sigwey, kuninuways. Kadiloka kupiyaves yowbad tobwag. Peinan tassinap yakamiy, kukwakins agulivan mounid. Kelis nakwavig towen nisiwyoubuds waseg; o kalin nuwads silmanin; e, tamwamoums mamagina buyavin tonen. Sods Kelis, mo tamlavags katanoka bod yakids. Mawan kan towen takivis takams, mamagina won Kelis tonen, tamlavags katanoka bod yakids, peinan talatans sods Kelis.

17 Peinan kan katanok-wan mamagina bled katanok, o yakids babaw gamag takams kan towen katanok-wan, mo tamlavags katanoka bod yakids, peinan kads katanok-wan.

18 Kuninuways min-Yisleil asisinap. Tasiyas tanuwgves-lun iwaweiys lun bulukwan, mwasanin igabus wakabeilun, mwasanin isemos kaeis beikams; mamagina bo ilatans waseg Yowbad nakabeilun.

19-20 Taninuways kan imgwavis tobwag yowbad silmanin, iyyaweids-wan; o yowbad tasiyas iyyaweids-wan. Tasiyas igaw dadub nag beiluns waseg Yowbad, tage iluns waseg baloum. Awoum bukulatans simiyas baloum.

21-22 DaGuyaws nakabniniway kwavig-nen nises; baloum nakwavig nises. Nag kadilok kwaviy bukumoum. Nag kadilok bukukwams daGuyaws napwasiw waseg, mo bukukwams baloum napwasiw waseg; awoum. Bitavages mawan mo bikamliweids Yowbad. Awoum bitasilkodes daGuyaws, mata bigeg nanon. Ta-mawan bitatawtouns waseg.

23-24 Kadilokeids sinap babaw bitakow, tage sinap mwasanin nag bilabeid, vagan bitatawtoun, nag. Kadilokeid kan babaw bitakams, tage kan babaw nag bilabes sidayas. Kadiloka beivag sivinad sidayas sikamnabwein, dakamnabwein tatoneid awoum.

Viniyon imgwavis

²⁵ Kadilok bukukwams kana babaw. Viniyoun aveiyag kugimwel bweina kukwam. Igaw bukugimwal, awoum kukwatugan, kulana, “Viniyon towen imgwavis? o nag?” Kukin teitan bilivan, “Viniyon towen bo imgwev kid,” adok bo bigeg nanoum.

²⁶ Bweina tatagouwaw yak kukwama mav; peinan, “Tanusagan ven watinow daGuyaws; mtowen tanuwagan youda babaw nisesus waseg.”

²⁷ Magat soum nag isimounid Yeisuw waseg, o bilana, “Kum kukwam,” o sivinam bukukwam, bweina kukwam. Awoum kwatugwan, kulana, “Kan towen kumgwev tan, ne?” Awoum! Deisa kukwam-wan.

²⁸ Tage kukin gamag teitan bilivan, “Viniyon towen bo imgwavis siyowbad silmanin”; awoum kukwam kan towen. Bukukwam mo bigeg soum nanon.

²⁹⁻³⁰ Nanon soum bikaleiwag, nanoum yakoum nag. Awoum ge soum bigeg nanon. Adok kulana, “Ampalawen sivinag bweina bənoy. Aveiyag sivinag bweina bəkam. Aveiyag wawun nanon soug bikaleiwag? O magat bikalin nuwag kan towen bəkam, aveiyag wawun bivtokeigs live, gamag mwasanin?” Awoum bukulivan məwan.

³¹ Awoum! Kadiloka bukuvages youda babaw yakawan Yowbad silmanin. Kan aveiyag bukukwams, o aveiyag bukumoums, kadiloka kuvages vəgan gamag biyəkawns Yowbad waseg.

³² Awoum bitavages kid aveiyag mo bigeg ninous sidayas; takinew sidayas min-Yudiy, o takinew tobwag ven gimgilis, o takinew natayakelesiys Yowbad. Awoum bitavages kid aveiyag mo bigeg ninous sidayas.

³³ Nanoug yey, bo bavag vəgan beibwein ninous babaw gamag. Nag ivag sivinag gunavavag babaw; nag. Sivinag kid aveiyag mo bilabes sidayas, vəgan Yowbad bikatinabwes tasiyas, mo bimwəsaws kid.

11

¹ Məwana yey akabkun inaked Yeisuw Kelis; mapun yakamiy kwabkunis ked towen.

Kweim kalbaleb

² Bo ikalin nuwag peinan kuninuways o kuyousis kaleiwag towen nasekeimiy.

³ Kweitan youd nises. Sivinag bukukwakinsa Kelis bikaleiwag tawaw wasigeis; tawaw bikaleiwags sikwavas wasigeis; Yowbad gog ikaleiwag Kelis waseg.

⁴ Kal taw bigeiguy o binitoug Yowbad waseg, igaw antanugweib wakunun, bo biyageg datoveks.

⁵ Kukin kal vin bigeiguy o binitoug Yowbad waseg, anakweim kalbaleb, mo namwan beivag anmwasin. Sinap towen məwan magina kunun bibob beikous bikakunəduy; mo beivag anmwasin waseg.

⁶ Kukin vin bisikam anakweim kalbaleb, kadiloka mo bibob kunun beikous, bikakunəduy. O kukin nag sivinan bikakunəduy, kadiloka bisikam anakweim bwein.

⁷ Nag kadilok kudətaw bisen antanugweib buntuman tapwəloul wanuwan, peinan kudətaw magin məwana Yowbad, yakawan Yowbad silmanin, o kudəvin yakawan taw silmanin.

⁸ Yowbad wanmugwana nibun kudətaw, taw waseg mo ibun kudəvin; ta-imug kudəvin; nag. Taw imug.

⁹ Ta-ibun taw, vin silmanin; nag. Ibun vin, taw silmanin.

¹⁰ Mapun, vin kadiloka bisikam anakweim bwein, peinan min-libəlab bikines.

¹¹ DaGuyaws inaked waseg, gamag beivays ikous, kadilok vin son namwan asteiy bikaleiwags; awoum anmwənet gamag bikaleiwag.

¹² Peinan Yowbad nibun vin, kudətaw waseg, wankuyeim vinay ikopwes tawaws; e, silawun youda babaw Yowbad waseg.

¹³ Ninoumiy yakamiy aməwan? Kadilok vin binitoug Yowbad waseg, anakweim kalbaleb? o nag? aməwan?

¹⁴⁻¹⁵ Kukwakins ven watinow sinapun; vinay bweina bisikams asikweim bwein, kunus vayvayov, silmanin yakawanes; tage awoum taw bisikam vin anakweim; kunun awoum bivag magina vin kunun, nag; bo beivag anmwasin.

¹⁶ Makaleiwag mawan. Magat teitan gamag sivinan bitakamnimans sods, nag kweitan kaleiwag nises; nag. Nag kweitan kaleiwag nises tayakelesiys wasigeis.

DaGuyaws inakamkwam

¹⁷ Kweitan livan asekeimiy, o nag bakavasimiy youd towen waseg. Tutan khatuyouns yakamiy, nag ivag amisinap bwein, singay kalbaleb.

¹⁸ Peinan mitapwäloul waseg, bo aligen kulivis mibod yakamiy, kuvages bod babaw, o kikit bo asimounid livneimiy towen.

¹⁹ (Kadilok gog bukulivis vagan bitakakins kalisiy yakamiy amisinap bwein, o kalisiy asisinap kalbaleb.)

²⁰⁻²¹ Khatuyouns yakamiy nag bukukwams bwein daGuyaws inasagal, peinan tatanok tatanok yakamiy kukwams kaeimiy tatineimiy; teitan isesun-wan anamoun, tayuwein igovek, tatounun gog imoum, mo ikabalawein.

²² Tabta mibunatum sam bukukwams o bukumoums waseg, ne? O adok bukkwasigmis Yowbad angamag, tasiyas katuyouns nimeis; peinan ivag asimwasin tasiyas tasimavs. Aveiyag balivan? Tabta bakavasimiy youd towen silmanin? Adok nag.

²³⁻²⁴ DaGuyaws bo isekeig sinap towen nasekeimiy mawan: misumkwey inavamul teitan bisilkod Yeisuw; e, boug towen, Yeisuw mo ikow bled wanaman, ikalin nuwan Yowbad waseg, ikiv, isekes beikams, ilana, “Towen woug pinamiy yakamiy. Kadiloka kuvvages mawan, vagan bukuninuweigs ye.”

²⁵ Ikams ikous, mo ikow kwavig, ilana, “Kwaviwen kwavig silmanin kaleiwag kweivaw, buyavig tatoneig waseg. Kadiloka kuvvages mawan; igaw bukumwamwes, vagan gog bukuninuweigs.”

²⁶ Igaw bukukwams kan towen, o kwavig mkwaviwen bukumoums, bukukwamats daGuyaws nakanig. E, kuvvages mawan ee... mo beiyum beim daGuyaws towen.

²⁷ Mapuna kal beikam mav kan towen, o beimoum mav daGuyaws nakwavig mkwaviwen, gamag towen ansinap kalbaleb, biyageg won daGuyaws, o biyageg buyavin daGuyaws.

²⁸ Kadiloka tanuways adsinaps tatoneids, aveiyag bwein, o aveiyag kalbaleb; wankuyeim mo bitakams kan towen, o bitamoums mkwaviwen kwavig.

²⁹⁻³⁰ Kal yak kukwam mav o kumoum mav, nag kukwakin won towen, igaw Yowbad mo bikatimop amsinap to kalbaleb. Tut towen, amisinap mawan, mapuna kuguyagweys babaw yakamiy, o kukwatouns, o kumtamats mwasanin yakamiy.

³¹ Kukin bitaninuway adsinap, aw-sinap kalbaleb bitapiyev, Yowbad nag bimop adsinap kalbaleb.

³² Tut towen waseg daGuyaws bimop adsinap kalbaleb, vagan bikakin matads; tage igaw tut wanakougwaw nag bikamtanid. Bo bikamtanis sidayas takalbalebs; yakids nag.

³³ O sigwey, igaw bukukwams tapwäloul towen waseg, kadiloka bukwaymates simiyas.

³⁴ Kukin teitan beivag anamoun, kadiloka beikam wanbunatum tatonen; vagan nag beivag amisinap kalbaleb. Beivag amisinap kalbaleb, Yowbad mo bimop amisinap to kalbaleb. Kaleiwag towen nasekeimiy. Kaleiwag mwasanin nisesus; igaw bawekeimiy, mo balivan.

Kululuwads wuliyougwan

¹ Sigwey nukuleles livanen kululuwads wuliyougwan. Sivinag bukukwakins sinapun towen.

² Bo kunuwes kweiboug, igaw dadub yakamiy, yowbad tobwag nukuyousis; yowbad tobwag nag kadilok bilivans; tayyaweids tasiyas. Tage nukukwawes asisinap tasiyas, sikaleiwag katanok katanok bo kuyousis.

³ Mapun adibakeimiy yakamiy, nag kal bilivan Kululuwan Yowbad waseg, mo bitouyeg Yeisuw, nag. Misinaka Kululuwan Townen Bwanabwein binek gamag, mo bilana, "DaGuyaws anmwanet Yeisuw."

⁴ Wuliyougwan kululuwads singay babaw, tage anmwanet Kululuwan Townen bo ivgen isekeids.

⁵ Wotet mawan, singaya babaw, tage datoveks anmwanet-wan.

⁶ Sinap mawan singaya babaw, Yowbad gog anmwanet-wan ikaleiwag teitan teitan wasigeis, silmanin dawotets bitawteles kweitan kweitan.

⁷ O dawotet kweitan kweitan Yowbad Kululuwan bo isekeids vagan bitalabes sidayas.

⁸⁻¹⁰ Bo ivgen isek teitan ansinap vagan bilivan bwein, teitan isek ansinap vagan bikamtel livan mounid; teitan isek nasimounid tawtoun Yowbad waseg; teitan isek natawtoun vagan bivag beibweins takatouns; teitan Yowbad nabubun tawtoun biwtel; teitan bipalopisay Yowbad anilivan; teitan bikakin kalisiy tayyaweids o kalisiy siwotet mounid Yowbad Kululuwan waseg; mayen teitan billivan wasigeis kaeig kweitan kwei-tan; teitan gog bikakin bikativin kaeig tasiyas.

¹¹ Kululuwan Townen anmwanet ivgen isekeid yakids tatonok tatanok, mawan bikalei-wag, mo biwteles wotet townen.

¹² E, woun katanok, tage wuliyougwan woun babaw; mawan-vak Kelis katanok, o yakids babaw magina wuliyougwan Kelis.

¹³ Kululuwan anmwanet waseg ibaptayseids mo tamlavags mamagina woun katanok. Takinew min-Yudiy yakamey, o mina-Gilis yakamiy, takinew touwat yak, o takinew tamwey yak, Kululuwan Townen anmwanet waseg iwmwamweids babaw yakids.

¹⁴ Wuliyougwan woun nag katanok, singay babaw.

¹⁵ Kukin kwakway bilivan, "Peinan nag nim yey, adok nag wuliyougwan woun yey," mounid anilivan, ne? Adok nag. Wuliyougwan woun townen kwakway.

¹⁶ Mawan teg bilivan, "Peinan nag mat yey, adok nag wuliyougwan woun yey," mounid anilivan, ne? Adok nag. Wuliyougwan woun townen teg.

¹⁷ Kukin woun bikalawt matan waseg, ta-mawan biligen. O kukin woun bikalawt teigan waseg, ta-mawan biskwen manisin.

¹⁸ Yowbad nakaleiwag bo ibun woun wuliyougwan babaw-wan, siwotet kweitan kweitan, mawan nanon Yowbad.

¹⁹⁻²⁰ Magat wuliyougwads katanok, nag beivag wouds tatonen. Tage woun wuliyougwan babaw, woun gog katanok-wan.

²¹ Nag kadilok mat bidibek nim, bilana, "Nag sivinag yakoum." Mawan kunukun; nag kadilok bidibek kwakway, bilana, "Nag sivinag yakoum."

²²⁻²³ Nag! Magat wuliyougwan won aveiyag gamag idok nag ivag sivinan, tatagouwaw gamag townen; singay gog sivinan wuliyougwan townen. O aveiyag idok yakawan nag, singay iyakawanes wuliyougwan townen; tavnas bwein wouds wuliyougwan, aveiyag admwasins waseg, mo talumwes, tavnas bwein.

²⁴ Wouds wuliyougwan babaw ilatans, imlavag wouds katanok; Yowbad bo ibun mawan. Wuliyougwan aveiyag yakawan nag kakit, Yowbad ivag vagan yakawan bivakaein kid.

²⁵ Ivag wouds mawan, vagan kid wuliyougwan katanok katanok mo bilabes o bivnas sisiyas; awoum wouds wuliyougwan bilivis bivag bod babaw.

²⁶ Magat won wuliyougwan katanok bilivet mamayuy, bo bigeg wuliyougwan babaw. Magat won wuliyougwan katanok bilouvat yakawan, babaw mo bimwassaws.

²⁷⁻²⁸ Mamagina Kelis won, gamag yakids; teitan teitan mamagina wuliyougwan kweitan kweitan. Peinan Yowbad nikaleiwag tayakelesiys yakids dawotets kweitan kweitan. Takaweins livanen Yeisuw imugwas. Wankuyeim tasiyas palopit siwotet igeiguy Yowbad nanon. Wankuyeim takatimlakeins sinapun Yowbad. Wankuyeim tasiyas iwwotets singay tawtoun. Wankuyeim tasiyas ivvages vagan beibweins takatouns.

Wankuyeim tasiyas ilabes sisiyas. Wankuyeim tasiyas magina takavaveis, ikaleiwags sisiyas wasigeis. Wankuyeim tasiyas tallivan kaeig kweitan kweitan wasigeis.

²⁹⁻³⁰ Tabta babaw yakids takaweins livanen Yeisuw? Adok nag. Tabta babaw palopits, bitageiguy nanon Yowbad, babaw yakids? Adok nag. Tabta babaw yakids takatimlakeins sinapun Yowbad? Adok nag. Tabta babaw yakids dawotets tawtoun? Adok nag. Tabta babaw bitavages vagan beibweins takatouns? Adok nag. Tabta babaw yakids bitallivans kaeig kweitan kweitan wasigeis? Adok nag. Tabta babaw yakids takakins takativinis asilivan tasiyas? Adok nag.

³¹ Kadiloka beivag sivinamiy vasein bwein Kululuwan Yowbad bisekeimiy. Tage ked singaya bwein bakatimlakeimiy.

13

Siwayoub

¹ Ked singaya bwein yagan siwayoub. Magat agulivan mamagina tassina yey, o magina gum-libalab teitan yey; tage nag basiwayoub, agusinap gog makawan, agulivan mamagin kup iwawaysa mav.

² Magat balivnek nanon Yowbad, o magat bakakin youd babaw ven watinow waseg, o youd babaw libalab waseg, o magat balivan koy kweitan binoun bein palatan, basimounid, mo bivag mawan; tage nag basiwayoub, tasimav gog yey; basesuna mav.

³ Magat bavgen gunwuliyoug beikous, o magat batam woug tatoneig bigabus kov, beikous, tage nag basiwayoub, nag kweitan maysan bakow wotet towen, nag.

⁴ Kukin kal bisiwayoub, mo bikapatul, bikalin nuwan, nag bikaypom son navavag, nag bikaypom sinap, o nag bikaypom butun, nag.

⁵⁻⁶ Kukin kal bisiwayoub, awoum kalbaleb ansinap, nag sivinan bikaleiwag, nag bikavikun, nag bininuway kalbaleb; o kukin biligen sinap kalbaleb nag bikalin nuwan, deisa bikalin nuwan sinap bwein waseg.

⁷ Kukin kal bisiwayoub kadilok tut babaw bikapatul; tut babaw bisimounid o binamis son waseg; nag bikawegweis won, nag.

⁸ Siwayoub nag beikous. Takinew siyas palopit nisesus; igaw siwotet biyakous. Takinew wudous tasiyas illivans kaeig kweitan kweitan wasigeis, igaw siwotet biyakous. Takinew sinap nises, igaw biyakous.

⁹⁻¹⁰ Nagein gog kakit takakins, adsinaps nag bivakaein geiguy silmanin. Igaw avakaein sinap biton, mo biyakous adsinaps, to kakit.

¹¹ Igaw wagwadig agulivan wadadan-wan, agusinap makaw, bulabol nanoug, peinan igaw gwad yey. Wankuyeim bo avakaein, sinapun gamagal mo alev.

¹² Nagein gog sinap avakaein nag bakakin, misinaka kakit-wan mamagina kululuwan akin; igaw wanakougwaw mo bakinbunik. Nagein nag akakin bwein, igaw wanakougwaw bakakin bwein, mamagina Yowbad bweina ikikineig yey.

¹³ Kweitoun sinap nisesus bwanabwein; kweitan simounid waseg Yowbad, kwayuwein namis, kwatounun siwayoub; youd tasiyas bisesus bisigagas. Tage sinap towen siwayoub singaya bwein, bo imug sinap babaw wasigeis.

14

Kaeig kweitan kweitan

¹ Kadiloka bukusiwayoubs singay. Kadilok beivag sivinamiy kululuwamiy wuliyoug-wan bwanabwein, o singay sivinamiy bukalopisays Yowbad anilivan.

² Kukin gamag kweitan kaeig waseg bilivan, anilivan nag idibek gamag wasigeis; Yowbad gog iligen livan towen, peinan ikakin silawun. Gamag babaw nag biliganes. Kululuwan waseg ilivan. Gamag babaw nag bikakins silawun anilivan bo ikawumen-wan.

³ Kukin bukugeiguy Yowbad anilivan, gamag mwasanin biliganes, bukwatimweisis tasiyas, vagan kid biwotets bwein, mo beitaw nuwes.

⁴ Kukin gog kal kweitan kaeig waseg bilivan bo tonena ansinap bikatimweis; tage kukin kal bigeiguy Yowbad anilivan mo bikatimweisis tayakelesiys babaw.

⁵ Sivinag babaw yakamiy kaeig kweitan kweitan wasigeis bukullivans, o singay sivinag bukupalopisays, peinan wotet towen singaya bwein. O magat teitan bilivan kweitan kaeig waseg bo bisunasun ninous gamag; o magat teitan bikativin anilivan towen mo bidumwal ninous, mo bikatimweisis tasiyas tayakelesiys.

⁶ O sigweyas, nagein gog, magat bawekeimiy mo kweitan kaeig waseg balivan, balabeimiy-tan? Adok nag. Misinak bakamat sinapun Yowbad, o balivnek Yowbad nanon, o bakatimlakeimiy sinap bwein, mo balabeimiy yakamiy.

⁷ O kukin gamag teitan makava bivkek ałen, pikolel o git, mamagina biwawayा mav, nag beivag wous, gamag nag bikanuwels o nag bisilasals; nag.

⁸ O magat teitan biyik bwagig, o nag biyik bwein, gamag nag bidumwal ninous, nag bikatunags naviy silmanin; nag.

⁹ Mawan-vak yakoum, bukulivan kweitan kaeig waseg, gamag nag bidumwal ninous, nag bikakins aveiyag kulivan; mamagina kullivana mav.

¹⁰ Wadaban pwepway kaeig singaya babaw, kweitan ven ages kweitan, kweitan ven ages kweitan. Silawun gamag tasiyas misikesa-yay ikakins.

¹¹ Magat teitan gamag aygan kweitan, o yey nag bakakin aygan towen, igaw bakalivan amateiyun-wan, anilivan towen limwelem waseg yey, mapuna aygag yey limwelem waseg gamag towen.

¹² E, sivinamiy wuliyougwan kululuwamiy bwanabwein. Singaya kadilok beivag sivinamiy kululuwamiy wuliyougwan vagan bikatimweisis tayakelesiys babaw.

¹³ O towen kweitan kaeig waseg bilivan, kadiloka binitoug Yowbad waseg, vagan bikamtel anilivan silawun, mo bikamat babaw gamag wasigeis.

¹⁴ Magat kweitan kaeig waseg banitoug Yowbad waseg, misinaka kululuwag binitoug, tage nanoug nag.

¹⁵ Aveiyag bavag? Adok banitoug nanoug waseg, sona kululuwag. E, wous bakanuwel nanoug waseg, sona kululuwag.

¹⁶ Magat tobwag gamag nises wasigeis takayelesiys yakamiy, igaw bukuyakawen Yowbad, kululuwam yakoum waseg bukulivan kweitan kaeig waseg, mogo nag bikakin silawun amlivan, tobwag gamag towen, nag beitam bilana, “Mounid”; nag. Peinan nag bikakin.

¹⁷ Yakoum kuyakawn bwein, mogo towen nanon ta-bukwatimweis.

¹⁸⁻¹⁹ O, kalin nuwag Yowbad, peinan singaya allivan kweitan kaeig waseg, o yakamiy kukuyeims; tage sigwey tayakelesiys yakamiy sivinag agulivan misinaka kweinim, kamnat, nanoug waseg; bukuliganes, mo bakatimlakeimiy sinap bwein. Awoum kweitan kaeig waseg, agulivan singay babaw tawsan, peinan nag sinap kweitan bakatimlakeimiy, nag.

²⁰ O sigwey yakamiy, awoum beivag ninoumiy mawanana gamagal. Kadiloka kusinaps bwein vagan gog bimatuw amisinap. Tage kadiloka bukutagouwaws sinap kalbaleb waseg.

²¹ Bukitab kaleiwag-nen nises mamagina:

“Igaw tasiyas ages kweitan bikawes agulivan bisekes gungamag.

Ages tasiyas billivans wasigeis, tage nag biliganes.”

Yowbad ilivan mawan.

²² Magat kweitan kaeig bukutay, mamagina naman mulin Yowbad, silmanin tasiyas nag isimounids Yeisuw waseg; nag silmanin tasiyas tasimounids. Tage bukulivnek Yowbad nanon bukulabes tasiyas tasimounids Yeisuw waseg, tobwag gamag nag.

²³⁻²⁵ Igaw bukwatuyouns tayakelesiys yakamiy, kaeig kweitan kweitan wasigeis bukullivans, o teitan beiw, tobwag gamag o kavel nag isimounid Yowbad waseg, adok bilivan, bilana, “Kwabalaweweins yakamiy”; tage beiw biligen kulivnakes Yowbad nanon babaw yakamiy, bo bigeg nanon peinan ansinap kalbaleb aveiyag nisowum wananan mo bikamat wananon gamag towen, mo bikalivatow bikantukov binitoug Yowbad waseg

vagan bileb, peinan ansinap kalbaleb; e, bilivan, bilana, "Mounid Yowbad nises wasigeis yakamiy."

26 Livan towen nalivan kuliganes. Igaw k watuyouns yakamiy, tapw̄aloul silmanin, teitan anawous bikanuwel, teitan bikatimlakay sinap, sinap kāwum nikamat teitan waseg mo bisek, o teitan bilivan kaeig kweitan waseg, o teitan bikativin livan towen. Youd babaw kuvages vagan bikatimweis amisinap yakamiy tayakelesiys babaw yakamiy.

Youd babaw didumwal

27-28 Tasiyas tallivan kaeig kweitan wasigeis, deisa asteiy o asteitoun. Awoum bibabaw. Teitan bimug, teitan bikuyeim. Kadilok teitan bikativin asilivan. Kukin takativinin livan nag, awoum kweitan kaeig waseg billivans, tapw̄aloul waseg; misinaka wananon billivan, asteiy son Yowbad biliganes.

29 Tasiyas talivnakeins Yowbad anilivan, asteiy o asteitoun bilivans, tage tababaws yakamiy kwatukins asilivan, aw-sinap bwein, aw-sinap makaw.

30-31 Igaw teitan bisin tapw̄aloul waseg, biligen-wan, Yowbad mo bikatimlakay ansinap kweivaw; kadiloka bitamanaw bikamat ansinap towen; tageiguy tonen bikapay. Kadiloka babaw yakamiy bukulivnakes Yowbad nanon, sivātan teitan bilivnek, ikous, sivātan mo teitan bilivnek, vagan bukulabes gamag babaw, mo bikkins sinap babaw, vagan bitawtouns.

32-33 Talivnakeins Yowbad anilivan ikaleiwags wasigeis kululuwes tatineis, peinan Yowbad nag bikaleiwag makaw; tage bwein-wan.

34 Kadiloka vinay ven babaw mitapw̄aloul waseg bikapays; awoum bilivans, awoum bikatimlakes tawaw. Biliganes-wan. Moses nakaleiwag māwan; o tayakelesiys babaw dakaleiwags māwan.

35 Magat vin nātan sivinan kweitan sinap bikakin, kadiloka bikatugwan waseg namwan wasibunatum tatineis. Magat vinay bilivans tapw̄aloul waseg, bo beivag admwasins.

36 Awoum kwaypamwes sinap yakamiy, mamagina Yowbad anilivan nakabsilamaw o nakabiyokous wasigeis yakamiy, awoum. Awoum kudokes ven mwasanin gimgilis tatagouwaws tasiyas.

37-38 Kal yak kudok palopit yākoum? O kal yak kudok Yowbad Kululuwan wuliyougwan nises waseg yākoum? Kadiloka kukwakins kaleiwag towen nalel, milet towen waseg, daGuyaws nakaleiwag tatonen. Kukin kal yak nag bukusimounid, bo bukusesuna tatagouwaw yākoum.

39 O sigweyas, livan towen kuninuways, kuneves amisinap vagan gog bukugeiguis. O tasiyas tallivans kaeig kweitan wasigeis, awoum kusilbwades.

40 Youda babaw didumwal-wan kuvages tapw̄aloul waseg, kadilokena beibwein amisinap yakamiy.

15

Yeisuw ikanig mo ikit vayuwein

1-2 O sigweyas, kukwakins livan towen bwanabwein kweiboug nasekeimiy, nukusimounids waseg, tut towen kuyousis waseg, līvānen Yeisuw, nikatinabweids yākids. Mitawtoun waseg bukuyousis livan towen nasekeimiy, mounid mo bikatinabweimiy; kukin gog nag bukuyousis, adok nag bikatinabweimiy.

3 Yeisuw Kelis bo isekeig gunawotet vāgan bakokew līvānen towen, nikanig peinads, adsinaps kalbaleb silmanin, māwan līvānen nises Bukitab waseg. Silawun līvānen Kelis towen, bo nakow nawey nasekeimiy yakamiy.

4 E, livan towen, Mesay Kelis ikanig peinads, itakus watakurumwan waseg, yam kweitoun mo ikit vayuwein, māwana Bukitab nilivnek.

5 Ikit; Pita mo ikin; wankuyeim navamul sinawatan teiy mo ikines.

6 Wankuyeim simayas lakatunim mo ikines; tasiyas sona mwamoves igawa nisesus, asteiyuy nikanigs.

⁷ Wankuyeim Yemes mo ikin; wankuyeim tasiyas takaweins livānen Yeisuw tababaws-wan.

⁸⁻⁹ Tut kadiveiyov wankuyeim, yey mo akin daGuyaws town. O yey magina tobwag gamag yey, agusinap kalbaleb. Bo igak! Bo awawaiys Yowbad nagamag tayakelesiys babaw! Mapuna singay abus takaweins livānen Yeisuw wasigeis. Mamagina takawein livānen Yeisuw, tobwag gamag yey.

¹⁰ O kalin nuwag Yowbad, bo isiwyoobug, isekeig agusinap kweivaw, to nises nisigeg waseg yey. O nag isiwyoobug mav, gunawotet waseg bo alisawes tasiyasa babaw. O nag guntawtoun tatoneig; misinaka Yowbad ikalin nuwan waseg yey, soug Yowbad isiwyoobug, ilabeig mo awotet bwein.

¹¹ O yey awwotet, tasiyas iwwotets. Awoum taninuways kalisiy siwotet tawtoun. Deisina bo nakalivan, bo kuliganes livānen Yeisuw.

Mwasanin ilansa, “Nag kal beikit vayuwein”

¹² Amalivan mamagina Yeisuw Kelis ikanig mo ikit vayuwein; tage mwasanin yakamiy kulivans kulansa, “Nag kal bikanig mo beikit vayuwein.” Aveiyag wawun kulivans mawan?

¹³ Magat nag teitan beikit vayuwein, mapuna Kelis nag beikit.

¹⁴ Magat nag beikit Kelis, adok bitageiguy mav, o bitasimounidsa mav.

¹⁵ Peinan talivans kid, “Yowbad ivag Kelis mo ikit vayuwein”; o kukin nag teitan beikit vayuwein, nag ikit Kelis, adok tayyaweids yākids, Yowbad livānen waseg.

¹⁶ Magat takanigs nag beikits, Kelis igaw wakanig nises.

¹⁷ Magat Kelis towen igaw wakanig nises, adok bo tasimounidsa mav; adsinaps kalbaleb igawa nises.

¹⁸ O magat Kelis igaw wakanig nises, adok nag bimwāsaws tasiyas nisimounids towen waseg mo ikankanigs; adok bo ikous gimgilitous tasiyas.

¹⁹ Kelis bo ilabeids ven watinow waseg, tage yakamiy kulivans kulansa, “Igaw bitakanigs Kelis nag bilabeids.” Kukin bitaninuways māwan, nag bitamwāsaws tut towen waseg. Gamag mwasanin bimwāsaws, yākids nag.

²⁰ Tut gog towen Kelis bo ikit kanig waseg. Bo imug, takanigs babaw wankuyeim.

²¹ Peinan gamag teitan ivag ansinap kalbaleb, mo imug kanig waseg; o peinan tayuwein ivag ansinap bwein mo imgwayes tasiyas takanigs, peinan ikit vayuwein.

²² O peinan gamag babaw yākids takikunis Adam, kanig talivatus; sods Kelis mo bitabānes damwamovs.

²³ Tatanok tatanok yākids adatuts tatoneids bo tabānes damwamovs. Kelis bo imug, igaw wanakougwaw beiyum beim ven watinow, mo bitakuyeims angamag yākids, bitakits vayuwein.

²⁴ Igaw tutan nakabiyokous ven watinow Yeisuw Kelis bo bigulekwes kululuwan tasiyas sikaleiwag kalbaleb, bitakayway wasigeis tasiyas. Ikous, Yeisuw nakaleiwag tawtoun mo bisek Taman Yowbad.

²⁵ Peinan Kelis bo bikaleiwag, bitawtoun ee... igaw mo bikaleiwag wasigeis tasiyas nikameiliws waseg, mamagina Kelis bivānis tasiyas.

²⁶ E, kanig-vak mo bivan, bitawtoun waseg, mo beikous kanig sinapun.

²⁷ E, Yowbad ivag Kelis mamagina takaleiwag youda babaw wasigeis. Bukitab nilivnek mawan. Tage Kelis nag bikaluweg Yowbad, peinan Yowbad bo bisek nakaleiwag tonen.

²⁸ E, Yowbad bisek Natun nakaleiwag youda babaw wasigeis; Natun mo beitam Taman nakaleiwag waseg, vagan kid Yowbad anmwanet bisesuna takaleiwag tonen.

²⁹ Kweitan youd nises. Gamag mwasanin ibaptyses takanigs pines. Kukin takanigs nag beikits vayuwein, aveiyag wawun ibaptyses pines? Silawun nag.

³⁰ O kukin nag bitakits vayuwein, aveiyag wawun nakātam tuta babaw abem kalbaleb waseg? Adok bweina bakapiyev mawotet towen.

³¹ Tawaw! Yam babaw kakita bakanig; tabudaboda Tamad! Adibakeimiy māwan peinan ikalin nuwag yakamiy, nukumlavags daGuyaws Yeisuw Kelis angamag yakamiy.

³²⁻³³ Kukin nag bakit vayuwein, aveiyag wawun nakavvatay sigwey bulawud babaw, ven Epesos waseg. Wotet towen ta-ivag anagin ven watinow. Adok bitaligen kweitan livan mamagina, “Bo bitakams, bitamoums peinan nubweig mo bitakanigs.” Awoum! Awoum kuliganes livan towen. Magat gamag mwasanin simiyas asisinap kalbaleb, igaw mo bukwaylasisis asisinap to kalbaleb.

³⁴ Kadiloka kusinaps bwein, vagan kid biyakous amisinap kalbaleb. Adok mwasanin yakamiy nag kukwakins Yowbad. Alivan mawan vagan beivag amimwasin. Kadiloka kusinaps bwein.

Wouds kweivaw

³⁵ Mwasanin gog bikatugwans, bilansa, “Tasiyas takanigs amawan beikits? Awei-woun waseg bisaps?”

³⁶⁻³⁷ Bo beibol nanoum bukulivan mawan. Kuninuways. Bukusop youpeis wabag, youpeis towen bikanig, namwamov vayuwein mo biban, igaw mo bimlavag kay. Nag kusop kay avakaein; misinaka youpeis kuspusoup, o veitun mayis o aveiyag-vak bukusop.

³⁸ Kweitan youpeis-nen kaytan kay, kweitan youpeis-nen kaytan kay. Yowbad ibubun mawana nanon towen. Mamagina askakin ivag wunuweina-wan.

³⁹ O man mawan, ivag wous kweitan kweitan. Buluk woun tonen kweitan magin, man iyoyow woun tonen kweitan magin, in woun tonen kweitan magin; gamag yakids wouds toneids kweitan magin.

⁴⁰ O min-libalab wous kweitan, o gamag yakids wadaban pwepway wouds kweitan. Yakawanes min-libalab kweitan; yakids yakawanads kweitan.

⁴¹ Yakawanad kelas kweitan, peinan mititeilin avakaein. Yakawanad tibukon kweitan. Wutun yakawanes kweitan kweitan, peinan kweitan mititeilin avakaein, kweitan mititeilin kakit.

⁴² Mawan-wan bo bitakits, dakabkanig mo bitalisawes. Mamagina bisapwes wouds bo beipwas, bitakits wanakougwaw wouds nag beipwas.

⁴³ Bo bisapwes wouds admwasins waseg, wouds wanakougwaw bitakits yakawanads waseg. Wouds iguyagweys bisapwes, tage igaw wanakougwaw wouds tawtoun waseg mo bitakits vayuwein.

⁴⁴ Bo bisapwes wouds mamagina man babaw wous ven towen, tage wouds wanakougwaw bitakits mamagina min-libalab yakids. Peinan woun nises watinow, mogo woun nises wanakaew.

⁴⁵ Livanen nises Bukitab waseg, mamagina,
“Gamag wanamug yagan Adam nikow mwamovan kaleivin waseg.”
Tage gamag wankuyeim yagan Kelis, kululuwan imov, iyamoves gamag.

⁴⁶ Ta-imug kululuwads. Wouds wanamug; kululuwads wankuyeim.

⁴⁷ Wanamug Yowbad ibun gamag ven watinow, pwepway waseg. Gamag wankuyeim naven libalab.

⁴⁸ Kalisiy mawan Adam wous mamagina pwepway; o kalisiy siven libalab mamagina Kelis, wous kweitan.

⁴⁹ Igaw ven watinow wouds mamagina pwepway; igaw libalab beivag wouds mawan magina Kelis.

⁵⁰ O sigwey, agulivan mawan, vagan bukukwakins kaleivids nag beisiw Yowbad nakabkaleiwag; nag. Wouds wadaban pwepway bo biyakous, nag bisesuna bisigeg; nag beisiw Yowbad nakabkaleiwag; nag.

⁵¹⁻⁵² Sinap kweiboug ikawum-wan, nagein bakatimlakeimiy. Babaw yakids nag bitakanigs, tage wouds nuwanawa bikatilow mawana libalab woun-nen. Igaw biyik bwagig, mo bikatilow wouds, magat yakids igaw tamwamovs yakids; tage tasiyas takanigs bo beikits.

⁵³ Tut towen wouds imtamats, bipsapwas; ikadiloka bikatilow wouds kweivaw, nag bitakanigs, tasesusa bitasigagas.

⁵⁴⁻⁵⁵ Igaw Yowbad bivag mawan, mo bikamat livanen kweiboug nilivnek mamagina:

“Bo bitakayway kanig waseg.
 Kanig nag bitakayway; nag.
 Kanig bo biyakous.
 Kanig mamyuyan bo beikous.”

⁵⁶ Takakins sinap kalbaleb peinan Moses nakaleiwag nises; o peinan adsinaps kalbaleb, kanig mamyuyan mo talivatus.

⁵⁷ O kalin nuwads Yowbad, peinan daGuyaws Yeisuw Kelis nilabeids mo tatakayways sinap kalbaleb waseg, o kanig waseg.

⁵⁸ Sigwey bwanabwein yakamiy, bweina kutoukums, kutawtouns, tut babaw kuwteleś bwein daGuyaws nawotet. Peinan kukwakinsa bitawotet daGuyaws waseg, nag bitayamkwen wotet anagin.

16

Muloul

¹ Kweitan youd, muloul Yowbad nagamag silmanin. Mawan bo akaleiwag min-Galetiy tasiyas tayakelesiys wasigeis, kadiloka kuvages mawan.

² Wik nakabsilamaw, yam tapwəloul waseg, kumulouls. Babaw yakamiy kusemos mimuloul; mawan wotet anagin bukunan, mo bukumuloul mawan. Igaw mo baw, mimuloul nanawan.

³ Igaw baw, yakamiy mo bukwaleiwags kalisiy bikawes mimuloul binawes Yelusalem; yey bo balel let silmanin min-Yelusalem, basek gamags tasiyas, vagan bikawes son mimuloul, binawes Yelusalem.

⁴ Kukin sivinamiy, sigwey tasiyas bo bakan Yelusalem.

⁵⁻⁶ Igaw ban Masidoni, wankuyeim mo bawekeimiy, peinan banekes min-Masidoni, mo bawekeimiy wankuyeim. Yey amibwabwal yey basesun-wan. Adok biyakous bulbweilim mo bukutaneigs ampalawen banoy.

⁷ Nag sivinag baw mo basinanam balisaweimiy, nag; kadiloka tut kalamwey biveiyov wasigeis yakamiy bases; magat daGuyaws nanon mawan waseg yey.

⁸⁻⁹ Basesun Epesos, ee... sagal yagan Pentikos beikous, mo baw. Peinan ven towen Epesos waseg kadilokeig wotet avakaein bawtel, o gamag babaw sivines kid bisilbwades gunawotet.

¹⁰ Igaw Timotiy beiw, kukines aban beibwein wasigeis yakamiy, peinan iwtel daGuyaws nawotet, mawan yey nawtel.

¹¹ Awoum teitan gamag bikasigum mtowen Timotiy. Igaw bilisaweimiy, bimekeig, kadiloka kutanes bwein, peinan akaymates towen siney tayakelesiys mwasanin.

¹² Livānen veiyouds towen Apolos nukulivans, bo asimkin towen binoun biwekeimiy siney tasiyas tayakelesiys mwasanin. Asimkakina nag; peinan idoki bikayamat kweitan tut bwein, mo beiw.

¹³⁻¹⁴ Kadiloka kuvnəses amisinap vagan tut babaw bukusimounids Yowbad waseg. Kukwapwapouts, kutawtouns. Youda babaw kuvages siwayoub waseg.

¹⁵⁻¹⁶ O sigwey, sivinag bukuvnəses bwein Sitepanas sen nagamags. Tasiyas wana-mugwana ven Akay waseg isimounids Yeisuw waseg; gamag babaw sisimounid ikuyeim. O tasiyas Sitepanas sen nagamag bwein imtakavates Yowbad angamags. Kadiloka kwanawes ages Sitepanas, sen gamag kalisiy biwotets siwotet mawan towen.

¹⁷⁻¹⁸ Bo isaps tasiyas Sitepanas, Poltunet, Akeikos, mapuna ikalin nuwag seikwan, peinan yakamiy kadiveiyov nag kadilok bukulabeigs, o tasiyas bo ilabeigs bwein, mo itaw nuwag, o adok yakamiy mawan. Kadiloka bitavnəses gamag tasiyas beibwein.

¹⁹ Tasiyas tayakelesiys ven avakaein Esiy waseg asilivan siwayoub wasigeis yakamiy. Tasiyas Akwil son nakwav Pilisik singay ikalin nuwes yakamiy, daGuyaws silmanin; o tasiyas babaw nitapwəlouls wasibunatum asilivan mawan.

²⁰ Yowbad nagamag babaw asilivan siwayoub wasigeis yakamiy. Kadiloka kuyaseles nimamiy simiyas wasigeis, kumulouls beibwein.

²¹ Gunamuloul towen nalel namag toneig waseg niwekeimiy. Yagag kukines Pawl.

²² Kukin teitan bipiyev daGuyaws, kupiyaves gamag towen, kwayabes bein watoulan. Nuwanaw bo beim daGuyaws tonen.

²³ DaGuyaws Yeisuw bisiwyoubumi.

²⁴ Yey asiwyoubumi babaw yakamiy, Yeisuw Kelis peinan.

Yey Pawl.

2 KOLINIT

Pawl inalet kweitan nimug nein Kolinit, silmanin tayakelesiys ven towen bikakins asisinap kalbaleb. Wankuyeim mo ipiyaves asisinap kalbaleb; mapuna asisinap bwanab-wein bulagan ikow Titos, inow Pawl waseg. Mapuna imwasaw Pawl, mo kwayuwein-vak silet ilel min-Kolinit pines.

Kweiboug mwasanin nag itams Pawl nakaleiwag waseg, mapuna ilel kwayuwein let towen, ikkanes. Anilivan-vak nilel silmanin muloul; ilana, “Mtowen Titos bikow mimuloul pines tasimavs tasiyas niyakelesiys Yelusalem waseg.”

Anilivan-vak nilel livanen nawotet moumouvit, peinan ititavon, igeiguy bulagan Yeisuw, mapuna igeeg aban vena babaw waseg.

Nakabsilamaw

¹ Kalin nuwag min-Kolinit yakamiy.

Yey Pawl, takawein livanen Yeisuw Kelis, yey; peinan Yowbad nanon mawan. Yey soug bwadads Timotiy nakalel milet neiw, kuvinis, Yowbad natayakelesiys yakamiy ven Kolinit waseg, simiyas tasiyas tayakelesiys ven avakaen Akay waseg.

² Tamads Yowbad son daGuyaws Yeisuw Kelis bisiwyoubumi mo beitaw nuwamiy.

Aban igeeg tage ikalin nuwan

³ Kalin nuwem Yowbad. Mtowen daGuyaws Yeisuw Kelis Taman. Mtowen anmwānet ililabeids, mo itout nanouds.

⁴ Kweiboug abem igeeg ilabem vāgan bakalabes tasiyas abes igeeg. E, bakalabes tasiyas Yowbad inalab to nilabem.

⁵ Kelis namouvit singay kalilivet, mo singay-vak ililabem.

⁶ Takinew abem bigeg mo bakalabeimiy vāgan beitout ninoumiy, peinan abamiy igeeg yakamiy. Takinew abem bwein, bakalabeimiy vāgan beibwein abamiy. Yowbad ililabem mo kakamtilakeimiy vāgan bukukwakins Yowbad bilabeimiy, magat bukwaptuleimiy waseg abamiy kalbaleb, mawan abem yakamey.

⁷ Kakakin-wan bukusesus bwein. Abamiy igeeg mawan abem yakamey, tage Yowbad bilabeimiy mawan yakamey.

⁸ Sigwey, awoum kutagouwāwes kweiboug abem igeeg ven Esiy nakases. Singay kawtāmat, kadokena kid mwamovem bo ikous.

⁹ Kadoki bo beiwemas; tage Yowbad tatawtoun, taykitun takanigs; bo ikaluweg abem kalbaleb vāgan bakanamis mtowen bikatinabwem; awoum bakanamis waseg matawtoun tatinem.

¹⁰ E, kakita bakakanig tage Yowbad ikatinabwem; e, tut wanakoug mo bikatinabwem. Kaninamis-wan peinan bo bikatinabwem waseg abem igeeg.

¹¹ Yakamiy kulabemas peinan kuntougs Yowbad bikatinabwem; e, kunitougs simiyas babaw gamag, mo biligen Yowbad, bikatinabwem, mo bikalin nuwads simayas yakamiy.

Pawl sivinan binekes min-Kolinit

¹² Amalivan tawtoun peinan kakakin-wan amasinap bwanab-wein, kamnat. Nag mawan ven watinow sinapun, tage peinan Yowbad nisiwyoubum ivagem mo nakamlavag takamnat yakamey, amasinap bwein wasigeis babaw gamag; singay gog wasigeis yakamiy.

¹³⁻¹⁴ Imilet nakalel kuvinis amalivan didumwal, kamnat. Kalamwey-nen kukwakins; sivinag geg bukuyakousis sinap kamnat, mo tutan daGuyaws Yeisuw beiyum beim mo bukumwāsaws pinem tawlimiyas yakamey, o yakamey-vak bakamwāsaw pinamiy tawlimiyas yakamiy.

¹⁵ Kweiboug akakina bukuyakousis amasinap kamnat, mo ivag sivinag wanmugwana baw balakwaneimiy sivay, vāgan bukumwāsaws sivay.

¹⁶ Ivag sivinag balakwaneimiy mo banoun ban Masidoni; bayum baw, mo bukutaneigs ban Yudiy.

¹⁷⁻¹⁸ Awoum kudokes isisiyuw nanoug peinan nag aw. Ven watinow gimgilis mwasanin itimatamsa mav. Yey nag mawan, nag batam mav. Tabudabod tatoukum Yowbad.

¹⁹ Kweiboug sigwey Silvanos son Timotiy nakageiguy livanen Yowbad Natun Yeisuw Kelis; mtowen nag itimatama mav, tut babaw beitam mounid.

²⁰ Mtowen Kelis waseg tabanes youd babaw bwanabwein, kweiboug Yowbad nilivnek. Mapuna tayemens waseg Yeisuw, Yowbad yakawan silmanin.

²¹⁻²² Yowbad gog bo nivageids Kelis angamag simayas yakamiy, mo isekeids dawotets; mamagina napulsilas bo isekeids Kululuwan tonen wanuwads, mo takakins ikayuseids.

²³ Tage nag aw Kolinit, peinan nag sivinag bakaneimiy. Tabudabod Yowbad.

²⁴ Nag peinan tayakeikay yakamey, tapwoloul waseg, nag. Kalabeimiy vagan bukumwasaws, peinan nukutawtouns mitapwoloul waseg.

2

¹ Kweiboug nanoug mawan, awoum vayuwein baw, bavag amimwasin. Misinaka alel milet neiw.

² Kadiloka bukuvages amnag beibwein. Kukin gog bakaneimiy mo bavag amimwasin, ta-kal bivag beibwein amnag; nag.

³⁻⁴ Imilet towen nalel, singay igeg nanoug, woung singay moumouvit, sona gunvalam let towen alelel. Nag alelel vagan beivag amimwasin, tage bukukwakins singay asiwayoub wasigeis yakamiy. Agulivan bo alel gunalet waseg vagan tutan baw, nag bigeg nanoug amisinap kalbaleb waseg, peinan akakina-wan bo beivag amisinap bwein mo bamwasaw o yakamiy-vak bukumwasaws.

Biwidis ansinap takalbaleb towen

⁵ Bo alel milet towen vagan bayakwaneimiy, bakin bukwanawes aygag, o nag. Bo alel livanen teitan yakamiy takalbaleb. Mtowen nag iyageg nanoug agumwaneta yey, tage yakamiy; adok kakit-vak bo iyageg ninoumiy yakamiy. Awoum bikeikay wadoug wasigeis yakamiy.

⁶ Town ansinap kalbaleb bo kumapus yakamiy; bo misinak. Nanoug mawan.

⁷ Nagein gog kadiloka bikanavin ninoumiy mo kunumlaves ansinap kalbaleb mo beitout nanon. Kadiloka kulabes gamag towen. Awoum singay nanon bigeg; bininuway mo biwtamat.

⁸ E, kadiloka kusiwyoubus gamag towen beibwein.

⁹ Wawun milet towen nalel vagan mamagina bayakwaneimiy mo bakin bukwanawes agulivan babaw, o nag.

¹⁰⁻¹¹ Kal ansinap kalbaleb bukuwid kunumlev, yey mawan banumlev. Kukin aveiyag bawid; pinamiy yakamiy wamatan Kelis, vagan basilbwed Seitan. Awoum towen bitawtoun wasigeis yakids. Kakakin-wan non kalbaleb.

Nag itaw nuwan Pawl

¹² Misumkwey nan Tilowas vagan bageiguy livanen Kelis, daGuyaws mo ikaliyow gunaked silmanin inawotet.

¹³ Tage nag itaw nuwag peinan nag aban bwadag Titos, ven towen waseg. Mapuna alisawes, itaneigs, anoun an Masidoni.

¹⁴ Kalin nuwem Yowbad, peinan Kelis waseg, tut babaw imimgwayem mo katakayway, kakatimlakes sinapun Kelis ven babaw wasigeis, mamagina atanoun manisin iskwanes, simasim seikwan.

¹⁵ Bo iskwanemas, tasiyas Yowbad ikatinabwes sisiyas tasiyas biyagages; manisin alisivan mamagina Kelis inawotet silmanin Yowbad.

¹⁶ Tasiyas Yowbad biyagages biskwanemas mamagina kanig manisin peinan bikankanigs. Tasiyas gog ikatinabwes biskwanemas mamagina mwamov manisin peinan biyamoves. Asteivin kadilokes mawotet towen? Adok nag ibabaw.

¹⁷ Yakamey nag mawan tayyaweids tasiyas, kalisiy sivines bigeiguy's livanen Yowbad, vagan maysan bikawes. Tage amasinap kweitan, kamnat; Kelis angamag yakamey, Yowbad nisekem mawotet mo kageiguy wamatian.

3

Pawl ansinap

¹ Tabta livnem bwanabwein bakasekeimiy, ne? Nag. Gamag mwasinis sivines silet mamagina:

“Takawein let towen ansinap bwein.”

Nag ivag sivinem bukulel malet mawan, o gamag mwasinis bileles malet mawan, nag.

² Malet yakamiy, gamag babaw bivinis, mamagina bikines amisinap kamnat mo bikakins mawotet bwein. Nukutams waseg Kelis mo kumlavags mamagina let, Kelis nilel vagan gamag bivinis.

³ Yakamiy mamagina let, Kelis nilel, nakakow, kasekes tasiyas mo ivinis. Nag ilel pansel waseg, nag. Bo ilel waseg Kululuwan Yowbad tamwamov. Nag ilel wadakul mamanas, tage bo ilel wakates gamag yakamiy.

⁴ Mapuna kakapwapout wamatian Yowbad, peinan Kelis ilabem.

⁵⁻⁶ Nag kadilokem bakalivan bakalana, “Matawtoun tatinem mo kawtel mawan.” Nag. Yowbad natawtoun bo isekem mo ikadilokem bakakow livanen inakaleiwag kweivaw, mo kasekeimiy. Kweiboug kaleiwag dakul waseg nilel tage kweivaw kaleiwag mo Kululuwan waseg isekeids. Kaleiwag towen nilel wadakul bikatimateids, tage Kululuwan iyamoveids.

Kaleiwag kweiboug o kweivaw

⁷ Kweiboug kaleiwag silmanin kanig, nilel wadakul, Yowbad nisek Moses nakaleiwag towen son mititeilin avakaein, ikatipel inek Moses, magin mo ikamnat; ilakamnat singay ee... mo irenom-nen; Moses iyum, inekes tasiyas min-Yisleil; ta-mawan bikinbunikes magin, peinan mititeilin avakaein.

⁸ Tage kaleiwag kweivaw, Kululuwan waseg nisekeids son mititeilin singay avakaein.

⁹ Kweiboug kaleiwag waseg niyateles gamag iyagages; mititeilin gog nises. Tage kweivaw kaleiwag bikidumwäluds mo beivag mititeilin singay avakaein.

¹⁰ Mamagina kweiboug kaleiwag mititeilin bo ikous, peinan kweivaw kaleiwag mititeilin singay bo ilisow.

¹¹ Kweiboug kaleiwag nag bises bisigeg; tage kweivaw bises bisigeg, mapun singaya immteil.

¹² Danamis peinan kweivaw kaleiwag waseg bo bikatinabweids; mapuna takap-wapouts.

¹³ Yakids nag mawan Moses. Peinan Moses bo ipulum magin vagan min-Yisleil nag bikines nakabiyokous mititeilin, peinan niyyenom-wan ee... mo ikous.

¹⁴ Tage ninous moumouvit, nag ikakins. Nagein tut towen ivnivins kweiboug kaleiwag, kweim towen igawa ililum mites. Nag ikines mititeilin Yowbad. Misinaka Kelis bikaliyow mo bikakins.

¹⁵ E, tut nagein towen ivinis Moses nakaleiwag tage kweim igawa ililum ninous. Nag ikakins.

¹⁶ Igaw, kukin kal bitouvin binek DaGuyaws, mo bikaliyow kweim towen.

¹⁷ DaGuyaws towen mamagina Kululuwan. DaGuyaws Kululuwan bilikud mo biten wamnat.

¹⁸ Yakids bo ikaliyow magids, takikines DaGuyaws mo imteilids, mo kakit kakit ikatlow magids imlavag mawana magin tonen. DaGuyaws inawotet towen, peinan kululuwan mav.

4

Tasiyas nag isimounids

¹ Yowbad inok nuwan yakamey, mo isekem mawotet towen. Mapuna nag kagwey waseg.

² Bo kapiyev kalbaleb sinap, o aveiyag kalbaleb nisowmes. Nag kakatidavis gamag. Nag kakatilow Yowbad anilivan. Tage amalivan mounid, kamnat; kukinemas katamanaw wamtamiy, kuliganes amalivan, mo bukukwakins amasinap kamnat. Yowbad ikakin mawan.

³⁻⁴ Kukin aw-sinap bisowm makageiguy wanuwan; bo isowm wasigeis tasiyas takankanigs. Nag bikakins tasiyas. Nag isimounids. Peinan ven watinow gimgilis sitovek kalbaleb bo ivag ninous ikanig, vagan livanen Kelis nag bimteilis tasiyas; Kelis takamnat tonen, mawan Yowbad.

⁵ Nag kageiguy livnem, tage livanen Yeisuw Kelis, peinan datoveks, o yakamey mitouwat yakamey, silmanin bakawtel Yeisuw nawotet.

⁶ Yowbad kweiboug nilivan, ilana, “Kadiloka kamnat bimteil ven, peinan dadub.” Mtowen bo imteil kateids mo takakins yakawan Yowbad, nises Kelis waseg.

Pawl aban igeg

⁷ Sinapun libalab wakatem mamagina veigun bwanabwein wanuwan kaynad kweiboug; peinan tougwey yakamey. Yowbad nakaleiwag mawan vagan babaw gamag bikakins tatonen natawtoun singay; yakamey nag.

⁸ Babaw gamag iyagagemas, tage nag kakalouw. Isunasun ninom, tage nag kapiyev wotet.

⁹ Bo iyagagemas, tage Yowbad nag ilisawem. Iwawemas, tage nag ikatimatemas.

¹⁰ Wom waseg kakokew Yeisuw inamouvit, vagan mwamovan Yeisuw mo bikamat wawom.

¹¹ Igaw mwamov yakamey tut babaw biyagagemas bakakanig, peinan Yeisuw angamag yakamey, vagan bukukines mwamovan Yeisuw wawom.

¹² Yakamey wanuwan kanig, tage yakamiy kumwamovs.

¹³ Kweiboug teitan nilel mamagina:

“Asimounid mapuna alivan.”

Yakamey kasimounid mawan, mapuna kalivan.

¹⁴ Kakakin Yowbad niyakit daGuyaws Yeisuw Kelis kanig waseg, igaw mo biyakituds sods Yeisuw, bitokeids simayas yakamiy bimayeids mo bitatomos wamatian.

¹⁵ Mawotet towen pinamiy yakamiy vagan Yowbad nasiwayoub biwekeimiy simiyas babaw gamag, mo bikalin nuwads singay, yakamiy o yakamey; babaw yakkids bitayakkaws Yowbad waseg.

¹⁶ Mapuna nag kagwey. Kaleivids biguyagweys, tage Yowbad ikkatimweis kululuwads yam katanok katanok mo tatawtouns.

¹⁷ Gamag iyagagemas, tage nuwanaw mo beikous. Wankuyeim anagids bivakaein, mamagina, Yowbad nasiwayoub nag beikous.

¹⁸ Youd tasiyas wamatads takines, tage nag taninuwes. Nuwanaw mo beikous. Tage taninuwes youd tasiyas nag takines. Yowbad navavag tasiyas nag beikous.

Dabunatus walbalab

¹ Takakins gog wouds mamagina buntuman ven watinow. Kukin bigulekwes, dabunatus kweitan nises, Yowbad nisekeids. Nag bitawlulavaw namad waseg. Bises gog bisigeg walbalab.

²⁻³ Igaw ven watinow waseg nitabwayouys, sivinads kid bitakatlawos wouds, dabunatus walbalab mo bitakawes. Awoum tayamkwaneids.

⁴ Igaw dabunatus towen nitasesus, ikubukub nuwads. Nag sivinad bitasem woud tasiyas, tage sivinad kweivaw woud bikatilow. Mamagina mwamov bikanpwen woun towen ipsapwas, mo beikous.

⁵ Yowbad bo ikatinabweids silmanin mwamovads, mo isekeids Kululuwan mamagina adalivataws.

⁶ Tut babaw mo bitakapwapouts. Takakins igaw wadabunatum ven watinow nag tasitans sods daGuyaws.

⁷ Tasimounids waseg mo tawotets. Nag takines, nag.

⁸ Takapwapouts, sivinads bitalisawes wouds mo bitanekes daGuyaws.

⁹ Tut babaw sivinads aveiyag nikadok nanon, takinew sods kaleividts bitasesus o takinew bitalisawes.

¹⁰ Igaw babaw yakids mo bitatowas wamatan. Kelis aban waseg bikatkineids, mo bikaleiwag mapun dakalbalebs o dakamnabweins, bo ikunek dawotets ven watinow waseg.

Kweivaw gamag

¹¹ Kagoul Yowbad, mapuna kakatimlakes gamag mo isimounids. Yowbad ikakin amasinap. Adok yakamiy-vak waninoumiy kukwakins-wan.

¹² Awoum vayuwein bakakamtilakeimiy vagan bukukwakins amasinap bwein. Deisa bukukwakins amasinap bwein vagan bukukwayapams wasigeis yakamey mo bukutampus asilivan tasiyas ilansa, “Matuw̄avek bwanabweins,” tage situw̄avek wanuwes asisinap kalbaleb.

¹³ Gamag mwasanin idokemas takabalawein yakamey. Kukin bakakabalawein, kaka-balawein silmanin Yowbad. Kukin gog ninom bidumwal, vagan bakalabeimiy.

¹⁴⁻¹⁵ Kelis nasiwayoub waseg bo isimkinem silmanin nawotet. Kakakina bo ikanig peinads babaw yakids; mamagina takanig babaw yakids, mo tamwamovs silmanin nawotet mtownen, dawotets tatoneids awoum. Mtownen gog bo ikanig peinads, mo iyakit vayuwein.

¹⁶ Bo ikous makanuway kweiboug, mamagina gamag babaw idokes kalisuy bwein, kalisuy kalbaleb, peinan ikines askakin watoulan. Kweiboug mawan kadok Kelis takalbaleb; tage bo ikous makanuway mawan townen.

¹⁷ Kelis waseg bo bitamlavag kweivaw gamag. Kweiboug bo ikous. Kweivaw bo isap.

¹⁸ Yowbad nawotet townen, peinan itam Kelis silmanin lun bulukwan, mo ilun wasigeis yakids, mo isekeids dawotets vagan gamag babaw bo beitams waseg Yowbad inalun.

¹⁹ Peinan Yowbad son Kelis nises mo ilun wasigeis yakids ven watinow gimgilis. Nag inuw addinaps kalbaleb vagan bimop, nag. Ilun wasigeis yakids mo isekeids dawotets vagan gamag babaw mo beitams waseg Yowbad inalun.

²⁰ Mapuna kakokew Kelis anilivan. Yowbad bo iguyeimiy wudom waseg. Kelis anilivan waseg kaguyeimiy kadiloka kutams Yowbad inalun wasigeis yakamiy.

²¹ Kelis nag ivag ansinap kalbaleb tage Yowbad ivag Kelis mo imlavag mamagina sinap kalbaleb tonen peinads yakids, mo sods Kelis bitakawes Yowbad ansinap didumwal.

Ikalin nuwan min-Kolinit wasigeis

¹ Simey Kelis mo kawotet, kagilagel wasigeis yakamiy, kalana, “Awoum bukutams mav Yowbad nasiwayoub waseg.”

² Bo ilivan gog, mamagina idibakeim yak, ilana, “Bo kadilok tut town mo aligen amlivan mapuna alabeim yam town nakatinabweim.”

Kuninuways avei-tut ikadilok. Nagein gog. Nagein Yowbad mo bikatinabweimiy.

³ Nag kweitan abkalouw bakasein gamag wasiked; nag. Mata ge bakawotet kalbaleb mo bukuvtokemas livan.

⁴ Tage makawotet bukukines mo kukwakins mounid Yowbad natouwat yakamey. Singay kakaptulem moumouvit waseg, iyagagemas, abem igeg singay.

⁵ Bo iwawemas, iseinimas wadeil, bo ikawnaweins mav. Kawwotet ee... bo ikalalav nimem, nag kamasis bwein, kasesun-wan amamoun.

⁶⁻⁷ Tage amasinap bwein, nag kayamen asisinap kalbaleb, tage kasiwyoubus, Kuluwan Bwanabwein nilabem, mo kasinap bwein, masiwayoub mounid wasigeis gamag babaw. Amalivan mounid, Yowbad natawtoun waseg. Nakayous sinap didumwal wuliyougwan wamakatay wamakimaw vagan bakatawtoun.

⁸⁻⁹ Kweitan tut ivnəsemas, kweitan tut mo iyagemas. Kweitan tut idokemas kalbaleb; kweitan tut idokemas bwein. Ilansa, "Takatidavidavs tasiyas," tage amasinap mounid. Idokemas tobwag gamag yakamey, tage Yowbad ikakin amasinap bwein. Idokes kid bakamtāmat, tage bwein sona mwamovem. Bo imapus amasinap; iwemas tage nag kakanig.

¹⁰ Kalbaleb kalivet mapuna igeg ninom, tage kamwəsaw tut babaw. Tasimavs yakamey tage kassekes gamag babaw mo iguyaws. Mawliyoug nag, tage youd babaw yakameyana mavavag.

¹¹ O sigwey min-Kolinit agulivan babaw peinan nuwaneimiy waseg yey nises.

¹² Nag kasinaleimiy. Tage yakamiyana nukusinalemas, mo kupiyavemas.

¹³ Ikalin nuwag yakamiy. Kadiloka bikalın nuwamiy yey, peinan mamagina nitug yakamiy.

Kadiloka bipiyaves youd kalbaleb

¹⁴ Awoum kwativases simiyas tasiyas nag isimounids. Tabta sinap didumwal bikatuvas son sinap kalbaleb, ne? Tabta kamnat beimwas son dadub, ne?

¹⁵ Tabta Kelis beitam son Baloum, ne? Kukin bukusimounid waseg Kelis, amawan bukwaveiyons soum towen nag isimounid Kelis waseg?

¹⁶ Yowbad Tamwamov nabunatum yəkids. Awoum bitatams tobwag yowbad youdanen waseg. Yowbad anilivan mamagina:

"Yey basik baninoun wanuwes tasiyas,
siYowbad yey o tasiyas gungamag."

¹⁷ Yowbad anilivan mamagina:

"Kadiloka kulisawes tasiyas takalbalebs, kusinəles.

Awoum kwabkwanes youd bwaboum, kupiyaves,
mo bikalin nuwag wasigeis yakamiy."

¹⁸ "Yey bamlavag timamiy yey, o yakamiy nitug, tawaw vinay yakamiy."

Yowbad Tatawtoun anilivan məwan.

7

¹ Sigwey, Yowbad bo ilivnek youd tasiyas bwanabwein peinads yəkids. Kadiloka bitawidis wouds bigimagim, o kululuwads bikamnat, mo beivag adsinaps kamnat tatonen, peinan tagoulus Yowbad.

Pawl ikakina asisinap ibwein mo imwəsaw

² Bikalin nuwamiy yakamey. Nag kayageg teitan gamag. Nag kasilakod. Nag kasilponay; nag.

³ Nag alivan məwan vagan bakanemiy, nag. Kweiboug alana, "Nuwaneimiy wasigeis yakamey nises; takinew bitamats simayas yakamiy; takinew tamwamovs simayas yakamiy."

⁴ Akakin-wan amisinap bwein; singay ikalin nuwag pinamiy, mo ibwein nanoug. Igaw əbag igeg, tage amwəsaw avakaein.

⁵ Tutan makənōy nakam Masidoni y mo mamouvit kalivet. Nag kamasis bwein peinan youd babaw iyagagemas. Wouds watoulan, naviy; tage wanuwads pwayat.

⁶ Yowbad gog ililabes tasiyas ninous igeg. Ilabem yakamey, peinan Titos neim.

⁷ Bo ikalin nuwag peinan akin Titos, bulgamiy iwyakeig, ilana, "Tasiyas asisinap bwein, akines. Bo ikalin nuwag. Tasiyas sivines yəkoum, asimwasin waseg mo ivalams, itoukums peinam." Aligen mo itaw nuwag, amwəsaw nag bikakit vagan.

⁸⁻⁹ Kweiboug milet nalel neiw kuvinis mo igege ninoumiy; ye-yak igege nanoug. Tage yakamiy igege ninoumiy Yam mwasanin mo kupiyaves amisinap kalbaleb; nagein mo amwəsaw peinan alel milet mo kuliganes aygag. Nag amwəsaw peinan ayageg ninoumiy, nag. Tage peinan ikanavin ninoumiy inek Yowbad. Bo ayageg ninoumiy, tage nag ayagageimiy yakamiy.

¹⁰ Magat Yowbad biyageg nanoud vāgan bitapiyev adsinap kalbaleb, mogo bikatinab-weid. Awoum bitapiyev Yowbad nakaleiwag towen. Magat bigeg nanouds peinan youd aveiyag ven watinow, tage nag bitanuways Yowbad, mtowen nag bikatinabweids. Bo bigak mwamovads.

¹¹ E, kuvinis let mo igege ninoumiy, ne? Bo iseiw nuwamiy vāgan beibwein amisinap, ne? Mitawtoun waseg bo kupiyaves sinap kalbaleb; kuwenes sinap kalbaleb, sivinamiy gog sinap bwein; bo kutoukums, ne? Peinan kumapus simiy mtowen ansinap kalbaleb. Youda babaw waseg akakin amisinap bwein.

¹²⁻¹³ Bo alel milet nag silmānin simiy towen-nan takalbaleb, nag silmānin tayuwein towen simiy nisilkod. Silawun gunalet misinaka bukukines wamatān Yowbad singaya kuvnāsemas yakamey. Ninoumiy ibwein yakamiy, mogo ibwein ninom yakamey.

E, Titos ikineimiy mo itaw nuwan, imwəsaw. Yakamey-vak kakin mtowen Titos mo ibwein ninom, kamwəsaw.

¹⁴ Kweiboug nag asilponay mav, tage akayapam, adibek Titos, alana, “Min-Kolinit asisinap bwein.” Nag bayaweid vāgan mo beivag agumwasin, nag. Māwan amalivan babaw mounid nakadibakeimiy, mo gunakayapam waseg Titos ikakin mounid.

¹⁵ Kweiboug amisinap kalbaleb, amipwayat; itatat woumiy, mo kutams towen Titos waseg, nukukwanawes aygag, mapuna nagein tut towen singay nuwaneimiy ivag waseg Titos.

¹⁶ Nagein amwasaw peinan akakin amisinap bo ibwein.

8

Muloul

¹ Sigwey, ivag sivinag bukukwakins Yowbad bo ilabes tasiyas tayakelesiys ven Maside-doniy waseg, mo imulouls bwein.

² Abes singay igege. Tasimavs tasiyas, tage imwəsaws avakaein, waseg imulouls singay bwein.

³ Bo ikadilokes māwan mo imulouls; ikous, mo imulouls sivyuein; singay sivines. Wamatag bo akin.

⁴ Bo igilagels wasigeis yakamey, ilansa, “Singay sivinem bakalabes tasiyas tayakelesiys Yelusalem waseg.”

⁵ Ninom nag māwan tage singay imulouls. Wanmugwana, tatineisina itāmes, daGuyaws nagamag o yakamey magamag tasiyas peinan Yowbad nanon māwan. Tatineisina itāmes, mo imulouls wankuyeim.

⁶ Titos bo isilamaw wotet towen wasigeis yakamey mapuna kadibek kalana, “Kadiloka kulabes min-Kolininit vāgan bimulouls bwein.”

⁷ Yakamiy kumugwas youd babaw waseg. Kusimounids bwein, kugeiguy bwein, amisinap avakaein, bo iseiw nuwamiy silmānin miwotet, o kusiwayoub bwein wasigeis yakamey. Kadiloka bo bukumugwas muloul waseg.

⁸ Nag tayakeikay yey, tage alivan māwan vāgan bukukwakins ven mwasanin gimgilis iseiw nuwes muloul silmānin, mo bakin, mounid misiwayoub, o nag.

⁹ Kukwakins nasiwayoub daGuyaws Yeisuw Kelis, guyaw avakaein tage peinads yakids mo imlavag tasimav towen. Tasimav towen bivageids mo bitamlavags guyawaw yakids.

¹⁰ Nanoug māwan. Kadiloka bukuyakousis wotet towen nukusilamaws bweilim nein wankuyeim. Yakamiy wanamug sivinamiy wotet towen. Wanamug-vak mo kusilamaws wotet towen, muloul silmānin.

¹¹⁻¹² Mawanana niseiw nuwamiy nukusilamaws-yay, mo biseiw nuwamiy bukuyakousis muloul towen. Mivavag nises silmanin wotet towen. Awoum kuninuways, kulansa, “Nag aveiyag nises waseg yey.” Awoum. Bweina biseiw nuwamiy mo kusekes aveiyag mivavag nises, Yowbad mo bikalin nuwan peinan ninoumiy mawan.

¹³ Nag ivag sivinag mimuloul bivakaein singay, mo bigagab ven mwasinis simuloul, nag.

¹⁴ Misinak tut towen, peinan miwlioug babaw kumulouls bwein mo kulabes sidayas, peinan tasimav tasiyas. Igaw siwlioug bibabaw tasiyas tasimavs, o bikabwag wasigeis yakamiy, mo bilabeimi. Mamagina bo bikobobt-wan.

¹⁵ Livanen nises mamagina:
“Tasiyas kaeis nisiyavis avakaein nag ivag anatup,
tage tasiyas tasiyas nisiyavis kakit, kaeis bo ikadilok.”

Titos siney budan

¹⁶ Kalin nuwag Yowbad peinan nanon isek Titos mo sivinan bilabeimi, mawanana yakamey sivinem.

¹⁷ Kadibek Titos biwekeimi, bo itam; tagé singay sivinan beiw, peinan nanon mawan.

¹⁸ Kakayabes biweis Titos son bwadads towen butun niliganes tayakelesiys ven babaw wasigeis, peinan singay bwein igeiguy livanen daGuyaws Yeisuw.

¹⁹ Tasiyas tayakelesiys mo isekes-vak nawotet mo simey towen katavin ven babaw kakokew mimuloul, vagan bakalabeimi, Yowbad yakawan silmanin.

²⁰ Awoum gamag mwasanin bivtokemas livan, bilansa, “Muloul towen avakaein, tagé nag imtakavates bwein.”

²¹ Tagé sivinem beivag amasinap bwein daGuyaws wamatan, o gamag babaw wamtes.

²² Kakayeb siyas asteiy sisiy tatounun teitan bwadads. Tut babaw nakayakwen bwadads towen mo kaban ansinap tawtoun. Tut gog towen ikakina amisinap bwein, mapuna bo iseiw nuwan silmanin wotet towen wasigeis yakamiy.

²³ Veiyoug towen Titos ililabeig gunawotet waseg mo bakalabeimi. Sisiy Titos gamag tasiyas budidayas, tayakelesiys nikayabes silmanin Kelis nawotet bwanabwein.

²⁴ Kadiloka misiwayoub beibwein wamtes tayakelesiys babaw. Livanen misiwayoub nakadibakes tawaw tasiyas. Igaw bikineimi mo bikakins amalivan mounid.

9

Bimulouls silmanin tasiyas tasimavs

¹⁻² Nag kadilok balel milet, balana, “Kadiloka bukumulouls silmanin tasiyas tayakelesiys,” peinan nanawana bo kukwakins. Bo iseiw nuwamiy silmanin wotet towen. Bo kukwatinages bweilim nein wankuyeim. Yey adibakes min-Masidoni, alana, “Min-Kolinit, ven Akay waseg, bo iseiw nuwes, bo ikatinages simuloul bweilim nein wankuyeim.” Tasiyas iliganes, mo iseiw nuwes mwasanin, mawanana yakamiy.

³ Yey mo akayabes budidayas biwekeimi, alana, “Bo ikatinages simuloul, nises.” Awoum biwekeimi mo bibanes agulivan yaweid, awoum.

⁴ Igaw wankuyeim mo bakaw sigwey min-Masidoni mwasanin. Kukin nag kukwatinages mo beivag amamwasin, peinan tayyaweid yakamey. O yakamiy-vak beivag amimwasin seikwan.

⁵ Adok kid kadiloka budidayas tasiyas bimgwayeigs, alana, “Kumgwayeigs kulivakas simuloul towen nilivanes. Igaw baw mo bitames simuloul towen beibwein. Awoum tasiyas bidokes muloul mamagina kid payin, nag.”

⁶ Kadiloka kukwakins silawun, peinan muloul mawanana youpeis. Kukin youpeis bisapwes nag ibabaw mapun mo bitayoys kakit. Kukin gog youpeis babaw mapun bitayoys babaw.

⁷ Tatanok tatanok gamag yakamiy, kavel nanon mawan, bweina bimuloul mawan. Awoum kumulouls sona miwnayuw, kadiloka kutams-wan kusenas mimuloul. Yowbad gog sivinan gamag bininatouts mo bimulouls.

⁸ Yowbad nasiwayoub kadiloka bikatimweis bibabaw wasigeis yakamiy. Nag aveiyag bikabwag wasigeis yakamiy, vagan bukumulouls bwein silmanin wotet babaw bwanabwein.

⁹ Livanen daGuyaws nises Bukitab waseg mamagina:
“Nawliyoug ilivelov, ivvagein issekes tasiyas tasimavs.
Ansina siwayoub bises bisigeg.”

¹⁰ Yowbad anyoupeis ivagein, isekes tasiyas tabgubags, o kads ivag mo isekeids bitakams. Mtowen bo bikatimweis amiyoupeis bibabaw, mo bivag bisibwasobs bivakaein vagan bukusiwayoutubs waseg; anagin mo bukubanes.

¹¹ Mamagina bukumliguyaws yakamiy mo bukusiwayoutubs bwein. Yakamey bakalabeimi, mo gamag babaw bikavasis Yowbad.

¹² Miwotet towen waseg kulabes tayakelesiys tasiyas tasimavs, mo gamag babaw bikavasis Yowbad.

¹³ Mamagina Yowbad iyakwaneimi. Kukin bukusimounids, o bukutams waseg livanen Kelis, mo bukumulouls bwein silmanin tayakelesiys tasiyas tasimavs, sisiyas babaw gamag. E, tasiyas tasimavs mo bikavasis Yowbad.

¹⁴ Gamag tasiyas sivines yakamiy, initougs Yowbad waseg vagan bilabeimi, peinan Yowbad bo ilabeimi mo nukumlavags tasiwayoub tatonen yakamiy.

¹⁵ Nag bitalivan, Yowbad nasiwayoub singay avakaein. Kalin nuwads silmanin Yowbad.

10

Pawl nawotet

¹ Yey Pawl toneig-wan agilagel wasigeis yakamiy. Peinan Kelis ansinap bo iyamanum. Yey agusinap-vak wamtamiy aymānum tage kulansa, “Kadiveiyov nises mo iwon.”

² Agilagel wasigeis yakamiy. Igaw mo baw nag sivinag bawon bakaneimi, awoum. Mwasanin yakamiy kuvtokeigs livan, kulansa, “Paul nanon tatonena iwtel.” Kukin nag bikanavin ninoumiy mo baw bakaneimi, Yowbad natawtoun waseg.

³ Yey guntawtoun nag mawan ven watinow sinapun. Nakases ven watinow tage nag kakanaviy mawan tasiyas ven watinow gimgilis.

⁴ Nag kakokew naviy wuliyougwan, tage libalaba wuliyougwan kakokew, mo ikadilokem bakatawtoun Seitan nakaleiwag waseg.

⁵ Mogo kagidem tawtoun livan son sinap kayyapam; o kagidem sinap silabod waseg bisilbwades livanen Yowbad; mo katawtoun waseg nuway babaw, vagan gamag babaw mo bikanawes aygan Kelis.

⁶ E, bo batawtoun wasigeis yakamiy. Igaw bukwanawes kaleiwag babaw bwanabwein, mo bamop asisinap tasiyas takapidabs.

⁷ Askakin wamitamiy kukines. Tage kukin kal idok Kelis angamag towen, kadiloka binuweig Kelis angamag yey, mawan towen.

⁸ Kukin bakaypom kaleiwag, nag beivag agumwasin. Peinan datoveks bo isekeig gunakaleiwag vagan bakatimweis amisinap bitawtoun. Nag isekeig gunakaleiwag vagan biyageimiy.

⁹ Awoum balel milet tawtoun mo beivag amipwayat. Awoum.

¹⁰ Gamag mwasanin ilansa, “Let waseg anilivan tawtoun, tage igaw beim mo bukukines aygan igwey, o nag igeiguy bwein.”

¹¹ Kukin kalisiy asilivan mawan mo badibakes tasiyas, “Aveiyag balel walet igaw baw mo bavag wamtamiy.”

¹² Nag ikadilokeig balana, “Yey agusinap tawtoun,” nag. Simiyas mwasanin asilivan mawan. Tasiyas gog iblabol ninous, ilansa, “Tasiyas asisinap bwein, yakids bwein singay.” Tage nag ikakins sinap tatonen.

¹³ Yey misinaka balivan agusinap tatoneig o gunawotet tatoneig; peinan Yowbad bo isekeig gunawotet wasigeis yakamiy.

¹⁴ Kukin gunakaleiwag nag iwekeimiy Kolinit waseg mo balivan mav wasigeis yakamiy. Nag gog, wanmugwana bo asekeimiy livanen Kelis.

¹⁵⁻¹⁶ Nag akayapam kaleiwag waseg. Peinan nag tayuwein tawwotet iwekeimiy, nag. Adok kid bukusimounids beibwein mo makaleiwag bikatimweis bivakaein wasigeis yakamiy, simiyas ven kadiveiyov gimgilis, tasiyas niweiw-o. Awoum bakayapam waseg wotet towen niwtel teitan gamag.

¹⁷ Kukin kal tallivek, awoum bilivan livanen ansinap tatonen; bweina bilivan daGuyaws livanen.

¹⁸ Yowbad nag bikaypom gamag kavel idok tonen ansinap bwein; tage Yowbad bikakin ansinap bwein, mo bikaypom.

11

Pawl nag mawana tasiyas takatidavidavs

¹ Yey alivan mawana takabalawein yey. Awoum bikawegweis woumiy, mo bakamtel nanoug.

² Yey apwakit wasigeis yakamiy mawan Yowbad ipwakit wasigeis yakamiy.

Bo abokeimiy simiy Kelis mamagina vin naptabod binek namwan anmwānet. Sivinag mawan batokeimiy bukunekes Kelis.

³ Tage agupwayat Seitan, peinan kweiboug mamagina mwatet ansinap tawtoun ikatidev Iv. Adok yakamiy mawan igaw bikatidaveimiy mo bukupiyaves tapwāloul kamnat waseg Kelis.

⁴ Nakageiguy livanen Yeisuw. Tage igaw kal beiw bigeiguy tobwag Yeisuw, o tobwag kuluwan biwekeimiy, o livan towen bwanabwein nukuliganes kukin bukupiyaves, mo bukutams tobwag livan waseg. E, bo kutams waseg, mwasanin yakamiy.

⁵ Takaweins livan towen, kudokes singay bwein gamag; tage nag bilaveigs yey.

⁶ Kukin nag balivan tawtoun, tage agusinap tawtoun. Youd babaw bo akatimlakeimiy ikous.

⁷ Kweiboug sigwey yakamiy nasekeimiy bwanabwein livanen Yowbad. Nag kweitan muloul akow. Yey abus vagan bayamweneimiy. Tabta agusinap towen kalbaleb, ne?

⁸ Mamagina nitavenos simoney tasiyas ven mwasanin tayakelesiys, peinan bo akow simuloul wasipalatan vagan bawotet yakamiy wamipalatan.

⁹ E, igaw kweiboug sigwey yakamiy nitasesus mo ikabwag gunwuliyoug, nag anitoug wasigeis yakamiy. Sidayas gog min-Masidoni yimeis mo isekeigs.

Mapuna nag anitoug. Nag kweitan mumuloul avag vagan bimouvit wasigeis yakamiy, nag. Igaw nag bavag, nag.

¹⁰ Agulivan tawtoun towen. Nag teitan bisilbwed agulivan towen ven Akay waseg. Tabudabod Kelis.

¹¹ Wawun nalivan mawan, peinan singay asiwyoubumi. Yowbad ikakin.

¹² Gunawotet mawan, waseg bavvalut ee... mo babob asilivan tasiyas nikayapams peinan idokes siwotet mawana yakamey.

¹³ Tasiyas idokes tatineis takaweins livanen Kelis. Tayyaweids gog. Siwotet waseg ikatidavis gamag, peinan askakin mawana takaweins livanen Kelis.

¹⁴ Magen! Seitan-vak ivag ankakin mawana gum-libalab, kamnat waseg.

¹⁵ Igagaba natouwat tasiyas bivages askakin mawan takaweins sinap didumwal. Sikabiyokous kalbaleb, peinan siwotet kalbaleb.

Tut babaw aban igeg Pawl

¹⁶ Vayuwein alana, "Awoum kudokeigs takabalawein yey." Tage bukudokeigs takabalawein, kadiloka balivan kakit mawana tasiyas takabalaweins, mo kuliganes agulivan.

¹⁷⁻¹⁸ DaGuyaws nag ikaluweg agulivan vagan bakaypom sinap, tage bakaypom mawana takabalawein yey, mawana tasiyas ikaypamwes sinapun ven watinow.

¹⁹ Yakamiy kutams bwein wasigeis tasiyas takabalaweins, peinan adok amisinap tawtoun yakamiy!

²⁰ Bukutams bwein, kukin kalisiy bikaweimiy binaweweimiy silmānin siwotet bukuwteles, o kukin bikwekways mivavag o bisilkodeimiy, o bikaypamwes asisinap, mo beiweiys mitamiy. E, mo bukutams waseg mituwāvek tasiyas.

²¹ Nag ivag guntawtoun silmānin wotet māwanana tasiyas. Mapuna agumwasin ivag. Kukin kal bitawtoun mo bikaypom; o yey-vak kukin batawtoun bakaypom mo bamlavag takabalāwein yey. Tage bo bakaypom.

²² Adok tasiyas min-Iblīw. Yey māwan. Adok tasiyas min-Yisleil. Yey māwan. Adok tasiyas Ebelam delen. Yey bo māwan.

²³ Adok tasiyas Kelis natouwats. Bo alisawes tasiyas. (Agulivan māwanana takabalāwein.) Yey alisawes wotet waseg, o deil waseg; peinan tutababaw gamag niwaweigs, kakita bakanig.

²⁴ Sivānim min-Yudiy iyousigs mo iwaweigs vatul waseg. Vatul waseg biwaweigs babewein sinawatoun kweinim kweivas.

²⁵ Sivātoun iyousigs mo iwaweigs amweilok waseg. Sivtanok dakul ikawes, ilivelovs, imimekeig, iwaweigs. Sivātoun amukul wāwag. Sivātan iyatuwaneig wakunuwatan yol katanok yam katanok boug.

²⁶ Tut babaw atitāvin, alouvat youd kalbaleb nisesus wālay. Waked-vak tavveinaws tawayins gamag nisesus. Agugwamag sivines kid beiweigs; tobwag ven gimgilis sivines kid beiweigs. Sivines kid beiweigs waven o wanawoud o wabwanit. Sidayas tasiyas tayyaweids beiweigs kid.

²⁷ Gunawotet waseg son agupulikas, sona moumouvit; nag amasis ibwein, agumoun, agudak, tut babaw ikamateig moun, son aguloulun amasis wamnat.

²⁸ Sona youd tasiyas yam katanok katanok ikubukub nuwag waseg imouvit gunawotet wasigeis tayakelesiys vena babaw.

²⁹ Kukin kal beigwey mo bigeg nanoug; o kal bikalouw mo bikapasal nuwag peinan youd towen ivakaben.

³⁰ Kukin balivan, peinan vāgan bukukwakins amāwan tougwey yey.

³¹ Awoom bayaweid. DaYowbads, daGuyaws Yeisuw taman, ikakin agusinap mounid. Kalin nuwads Yeisuw tut nag beikous.

³²⁻³³ Ven Damasik waseg, tutan Aletas king ven towen waseg, Tanuwagan ven inagamag ikaymates awkwedan ven, sivines kid biyousigs. Tage taliwog ikaliyowes sintāboul ven boul-nen waseg, yey asin wanuwan kaynad, ikaygwagweigs ee... an aton watinow, anoun, mo alisow towen nikamliweig.

12

Inoun ikin libālab

¹ Bo bakaypam. Nag bilabeig; tage bakaypom sinap, peinan daGuyaws sinapun bo akin, isisawl matag, mo ikatimlakeig.

² Sinawatan kweivas bweilim nein wankuyeim taw teitan waseg Kelis inoun libālab kasilatoun waseg. Adok won waseg o adok kululuwan waseg. Nag akakin. Yowbad ikakin.

³ Yowbad bo ikow taw towen inow naven bwanabwein waseg. Adok won waseg o adok kululuwan waseg. Nag akakin. Yowbad ikakin.

⁴ Libalab waseg gamag towen iligen sinap kweitan. Nag kadilok gamag bikamtel o bikavteg ven watinow; bwaboum.

⁵ Bakaypom ansinap taw towen, tatoneig awoum. Misinaka balana, “Tougwey yey.”

⁶ Tage kukin sivinag bakayyāpam, nag beibol agulivan, nag bayaweid, peinan mounid agusinap. Tage nag bakaypom sinap. Misinaka kukines agusinap o kuliganes.

⁷ E, Yowbad bo ikatimlakeig sinap babaw. Tage nag sivinan bamwāsaw avakaein; mapuna ivag kaligweg kweitan kakat ibes viniyonag, mamagina Seitan nagamag towen ivvasiganig. Mata ge bamwāsaw avakaein.

⁸⁻⁹ Sivatoun anitoug silmanin daGuyaws bikablev youd towen, tage bo ipiyev, ilana, “Gunsiwayoub bo ikadilokeim. Mugwey waseg mo bikamat guntawtoun.” Singay sivinag balana, “Touguey yey,” vagan Kelis natawtoun mo bimekeig.

¹⁰ Mapuna ikunakeig gunagwey, yagay, moumouvit, silakod, o aveiyag biyagageig, peinan Kelis angamag yey.

Igaw touguey yey tage wanuwag tawtoun.

Pawl ikubukub nuwan silmanin min-Kolinit

¹¹ Mamagina takabalawein agulivan towen. Peinan kusimkineigs. Tage kadiloka bukwavasigs. Takaweins livanen Kelis tasiyas tawtous nag ilisawegs, tasimav yey.

¹² Namag mulin gunawotet navvag bo kukines, singay tawtoun, o tut babaw akap-tuleig, peinan mounid takawein livanen Yeisuw yey.

¹³ Aveiyag asekes tasiyas tayakelesiys ven babaw, tage nag asekeimiy yakamiy? Misinaka youd towen. Nag akow muloul wasigeis yakamiy. Magat agusinap towen kalbaleb kadiloka kunumlavies.

¹⁴ Kakita baw mo beivag sivatoun bakineimiy. Nag bakow miwliyoug. Nag ivag sivinag mivavag. Sivinag yakamiy. Awoum nitug yakamiy bukumulouls waseg timamiy yey. Kadilokeig bamuloul wasigeis nitug yakamiy.

¹⁵ Bweina bavgen gunwiliyoug beikous o mwamovag beikous silmanin kululuwamiy. Sivinag yakamiy, mo bukupiyaveigs, ne?

¹⁶ Mounid nag akow mivavag, tage kulansa, “Bo ikitidavids.”

¹⁷ Tage tasiyas nakayabes niwekeimiy, tabta ikitidavimiy tan? Ne?

¹⁸ Bo aguy Titos vagan biwekeimiy, mo iweis son bwadads. Tage Titos ikitidavimiy tan? Ne? O yey agusinap amawan? Amasinap katanok-wan. Nag kakatidavimiy, nag.

¹⁹ Waninoumiy waseg agulivan mawana, vagan bikalin nuwamiy waseg yey? Nag. Kelis angamag yey alivan wamatian Yowbad. Sigwey yakamiy sivinag bakatimweis amisinap, mo bitawtoun.

²⁰ Awoum bawekeimiy amisinap kweitan, bo bapiyaveimiy. Adok nag beivag sivinamiy agusinap towen. Adok kwamnimans, imouvit dibamiy, kapasal nuwamiy, kusilakods, kuyagays, kuvtokays livan, kwayyapams sinap, mikaleiwag kalbaleb.

²¹ Awoum ge vayuwein baw mo Yowbad bivag agumwasin o bigeg nanoug wamtamiy. Magat taggeinawls tasiyas nag bipiyaves asisinap kweiboug kalbaleb o peinan ikani-navays mav.

13

Nakabiyokous anilivan

¹ Igaw baw mo beivag sivatoun tut bakineimiy. Kukin bukuyateles simiy, amiteiy o amiteitoun bikavtagis ansinap kalbaleb, kadilok mo bukumapus.

² Sivyuein nawekeimiy bo adibakes tasiyas takalbalebs sisiyas asibabaw, alana, “Kukin sivtounun baw mo bamop amisinap kalbaleb.” Tut towen kadiveiyov ases mo adibakeimiy mawan.

³ Sivinamiy bukukwakins Kelis ikatipel anilivan isekeig, waseg allivan. Igaw baw mo bukukwakins. Kelis ansinap wasigeis yakamiy nag igwey; tawtoun igegeyous.

⁴ Mamagina touguey towen bo iweiys, ikimates waklos, tage bo imov, Yowbad natawtoun waseg.

Yakamey tougweys mawan Yeisuw, tage Yowbad natawtoun waseg bakamov simey Yeisuw, vagan bakalabeimiy.

⁵ Kuyakwaneimiy vagan bukukwakins, tabta kusimounids waseg Kelis, o nag? Tabta bukukwakins Yeisuw Kelis simiy kusesus? Ne? Tage kukin kal yak nag kusimounid, adok nag.

⁶ Sivinag bukukwakins yakamey bo kasimounid waseg Kelis, kawotet bwein.

⁷ Kanitoug waseg Yowbad vagan nag beivag amisinap kalbaleb. Kanitoug mawan, nag vagan gamag bikakins imawotet bwein. Tage sivinem amisinap beibwein. Kukin bidokes imawotet nag ibwein, bweina mawan.

⁸ Ta-mawan bakasilbwed sinap bwein. Deisa bakawotet silmanin sinap bwein.

⁹ Kamwasaw tougwey yakamey, peinan kutawtouns yakamiy. Kanitoug waseg Yowbad silmanin bikatimweis amisinap, bitawtoun.

¹⁰ Nagein kadiveiyov ases alel milet towen. Igaw baw, awoum bakaneimiy waseg gunakaleiwag daGuyaws nisekeig, vagan bakatimweis amisinap, bitawtoun. Gunakaleiwag towen nag vagan bayagageimiy, nag.

¹¹ Adok misinak agulivan sigwey yakamiy. Taneimiy-o. Kusinaps beibwein. Kunages gungeiguy towen. Kutameimiy simiyas wasigeis. Niwal waseg kusesus; simiy daYowbads, ansinap siwayoub, niwal.

¹² Kumulouls beibwein simsimmiyas wasigeis, peinan Yowbad angamag babaw yakids.

¹³ Tasiyas tayakelesiys asilivan siwayoub wasigeis yakamiy.

¹⁴ DaGuyaws Yeisuw Kelis bikalin nuwan wasigeis yakamiy; Yowbad bisiwyoubumiy. Kululuwan Townen Bwanabwein simiy bukusesus. Eimen.

Yey Pawl.

GALETIY

Kweiboug Pawl igeiguy ven Galetiy waseg, isekes livanen Yeisuw neiweiys waklos; isimounids mwasanin, iyakelesiys. Ikous, Pawl itavín ven babaw igeiguy, mo iyum in wanven.

Wankuyeim min-Yudiy mwasanin ineis Galetiy, sigeiguy kweitan; ilansa, “Bo ikabwag amisinap yakamiy. Yowbad ikalin nuwan wasigeis min-Yudiy yakamey, misinak. Yakamiy nag. Kukin sivinamiy Yowbad bikalin nuwan yakamiy, momwamiy kubwabwes, bukumlavags mawana min-Yudiy yakamey; ikous, bweina kusimounids waseg Yeisuw Kelis, mo Yowbad bikalin nuwan yakamiy.”

Min-Galetiy iliganes, bo sunasun ninous, peinan Pawl anilivan kweitan, tasiyas asilivan kweitan.

Wankuyeim bulagan sinap towen iyum inek Pawl, singay igeeg nanon, peinan bo iyyaweids min-Yudiy tasiyas. Igeeg nanon, ilel let towen, iwyeb inekes min-Galetiy, bivinis mo bikakins misinaka bisimounids Yeisuw waseg, Yowbad mo bikalin nuwan wasigeis. Awoum bibwabwes momwes o bikawes min-Yudiy asisinap; awoum.

Pawl ilivan, “Bitasimounids waseg Yeisuw mo beivag Yowbad Kululuwan anagin bwanabwein wasigeis yakids; kukin gog nag, kaleivids anagin beivag kalbaleb.”

Nakabsilamaw

¹ Yey Pawl alel milet neiw biwekeimiy min-Galetiy tayakelesiys yakamiy. O yey gunawotet akokew livanen Yeisuw Kelis. Kanig waseg Yowbad ivag mo imov. Yowbad son Natun nisekeigs gunawotet towen. Gunawotet nag isekeigs gamag mwasanin, nag; Yowbad inakaleiwag.

² Yey sigwey Yeisuw nagamag mwasanin wamaven towen, ikalin nuwem min-Galetiy tayakelesiys yakamiy.

³⁻⁴ Tamads Yowbad son daGuyaws Yeisuw Kelis bo isiyobumi mo itaw nuwamiy. Peinan daGuyaws Yeisuw bo itam bikanig adsinaps kalbaleb peinan, vagan kid bikatin-abweids ven towen kalbaleb waseg, peinan Yowbad nanon bo mawan.

⁵ Mapuna bitayakawanes Tamads towen, tut nag beikous. Eimen.

Livan anagin

⁶ Bo igeeg nanoug peinan nuwanaw nukupiyaves livanen Kelis. Kweiboug nukuliganes bo isiyoubumi; nagein gog kupiyaves Yowbad aygan; bo kuliganes livanen tapwäloul tobwag.

⁷⁻⁹ Nag kwayuwein livan bwanabwein nises. Tage gamag mwasanin bo iwekeimiy, ilivanekaleiwag kweitan moumouvit, mo isunasun ninoumiy, e, livan bwanabwein bo iyagages tasiyas.

Yowbad igaw bikatimop siwotet kalbaleb.

Kweiboug nalivan, bo kuliganes; nagein-vak bo alel mamagina: Kukin kavel bikatilow amalivan, bisen kweitan, kadiloka beisiw keb kalbaleb waseg.

Livan bwanabwein nakageiguy wasigeis yakamiy, livan towen mounid. Kukin kal bisap bikatilow livan towen, kadiloka beisiw keb kalbaleb waseg. O yey, kukin bakatilow livan towen, kadiloka basiw keb kalbaleb waseg. Kukin gog gum-libalab teitan bikatilow livan towen, kadiloka beisiw keb kalbaleb waseg.

¹⁰ Tabta gamag ages bakanow vagan mo bikalin nuwes, ne? Tage Yowbad aygan bakanow. Tabta banoy kweitan ked vagan gamag bikalin nuwes? Adok nag. Adok banoy makadewen ked Yowbad inaked, vagan bikalin nuwan yey.

Kukin gog baninuway gamag babaw ninous waseg, adok nag mawan bakanow aygan Kelis.

Kweiboug Pawl imlavag takawein livanen Yeisuw

¹¹ Sigweyas, kadiłoka kukwakins livānen Yeisuw, towen nasekeimiy; nag gamag mwasanin asilivan, nag.

¹² Nag teitan gamag isekeig liveñ towen. Nag teitan gamag ikatimlakeig, nag. Anmwanet Yeisuw Kelis nikatipel sinap towen nisekeig.

¹³ Nukuliganes kweiboug gum-Yudiy yey, agusinap mawana tasiyas min-Yudiy asisinap, singaya ayagages Yowbad nayakelesiys, sivinag kid bayakousisa tasiyas.

¹⁴ Singaya amug wasigeis sigwey min-Yudiys, singaya sivinag tammwayas asisinap.

¹⁵⁻¹⁶ Nag gog, Yowbad nidaweig Yeisuw nawotet silmanin. Idaweig igawa inag wanuwan, peinan isiwyoubug. Bweilim babaw ikous ee... misiyamun towen mo bwein Yowbad nanon waseg, Natun mo ikamat waseg yey vāgan kid bakow liveñ Natun towen, banoy ven kadiveiyov wasigeis.

Nag akatugan gamag wasigeis, vāgan bakow asisinap, nag.

¹⁷ Nag anoun Yelusalem bakatugwan wasigeis takaweins liveñ Yeisuw, nag. Tage an Alebiy asesuna, wankuyeim mo ayum am Damasik.

¹⁸ Bweilim kweitoun ikous, mo an Yelusalem alokon waseg Pita, anbwabwal yey asesuna ee... yam sinawatan kweinim.

¹⁹ Nag akines Yeisuw nagamag mwasanin, nag. Misinaka daGuyaws bwadan mtowen Yemes.

²⁰ Tasiyas nag ikatimlakeigs liveñ Yeisuw. Mounid agulivan towen nalel, tabudabod Tamads.

²¹ Wankuyeim mo anoun an Siliy o Silisy.

²² Tasiyas min-Yudiy tayakelesiys Kelis waseg nag ikines magig, nag.

²³ Misinaka niliganes liveñeig mamagina, “Towen kweiboug sivinan biyagageids peinan ikamliw Yeisuw nakaleiwag, tut towen mo igeiguy kaleiwag towen waseg.”

²⁴ Liveñeig towen iliganes mo iyakawns Yowbad waseg.

2

Yeisuw nagamag itams Pawl nageiguy waseg

¹ Bweilim sinawatan kweivas ikous, soug Bānab mo nakakatulag nakan Yelusalem. Yey atok Titos mo nakan.

² Peinan Yowbad nikaleiwag mo an Yelusalem, anekes tayakelesiys situwāvek, nakakaypul sigwey tasiyas, asekes liveñen Yeisuw to nageiguy vena babaw wasigeis. Wananoğ adok awoum bageiguy liveñ tobwag waseg; awoum bawoteta mav.

³ Iliganes tasiyas, mo ilansa, “Bwein.” Nag ikaleiwags vāgan Titos bibob momwan mo bimlavag gum-Yudiy, nag. Peinan guma-Gilis towen Titos, soug nakan Yelusalem.

⁴ Tage tayakelesiys mwasinis imeis, tayyaweids tasiyas; nag iyakelesiys mounid. Sivines kid bikines Yeisuw Kelis nakaleiwag bwanabwein wasigeis yakids, bikatidavimas vāgan bisenas sikaleiwag moumouvit wasigeis yakamey. Idokes kadilok bibwabwes Titos momwan mo bimlavag gum-Yudiy.

⁵ Kapiyev sikaleiwag tasiyas. Awoum bikatilawos Yeisuw nakaleiwag mounid, pinamiy yakamiy o peinads babaw yakids.

⁶ O tasiyas situwāvek, tayakelesiys idokes guyawaw mwasanin; o yey nag bakakin guyawaw o aveiyag. Yowbad gog wamatan, guyawaw o touns askakin bo katanok-wan. Situwavek tasiyas nag kweitan sinap ikatimweisis waseg yey, nag.

⁷⁻⁸ Tasiyas gog ikakins kweiboug Yowbad nisek Pita nakaleiwag mo igeiguy min-Yudiy wasigeis, mawān-vak bo isekeig yey mo ageiguy tobwag ven gimgilis wasigeis; tasiyas nag ibwabwes momwes. Peinan Yowbad Kululuwan isek Pita natawtoun silmanin nawotet towen, o mawana yey gunawotet silmanin.

⁹ E, tasiyas idokes situwāvek, Yemes, Pita, Yon, tasiyas mo ikakins amawan Yowbad nisiwyoubug, mo iyaseles nimes, soug Bānab nakamuloul simayas tasiyas. Ilansa, “Bweina kuneis tobwag ven gimgilis wasigeis, yakamey adok bo bakageiguy min-Yudiy wasigeis. Muwotet mawana yakamey mawotet.”

¹⁰ Nag kweitan kaleiwag bisekemas, nag. Misinaka ilansa, “Kadiloka kunuwes magamag tasiyas tasimavs, vagan bukulabes.” E, wotet towen silmanin bo iseiw nuwag.

Ven Antiyok waseg Pawl ikan Pita

¹¹ Wankuyeim ayum an Antiyok, Pita mo inoun imekeig Antiyok waseg. Bo akan mtowen Pita, peinan ansinap kalbaleb.

¹² Wanmugwana bwein, peinan ikammutans siney tobwag ven tayakelesiys tasiyas nag ibwabwes momwes. Wankuyeim Yemes nagamag mwasanin mo isaps, tasiyas tapiyaveins gamag kalisiy nag ibwabwes momwes. O peinan Pita iwenes tasiyas mo isiniales tayakelesiys ven mwasanin, nag ikamutans siney tasiyas.

¹³ Simeyas tasiyas min-Yudiy tayakelesiys mo ikaylasis Pita ansinap kalbaleb. Wankuyeim Banab iyaweid-vak mamagina tasiyas.

¹⁴ O peinan akin ikayal, nag isimounids Yeisuw nakaleiwag waseg, mo adibek Pita wamtes tasiyas, alana, “Yakoum Pita gum-Yudiy yak, tage tobwag ven asisinap nukukow, o nukulavew sinapun Yudiy; aveiyag wawun kusimkkines tobwag ven gimgilis, kulana, ‘Kadiloka kwaylasis min-Yudiy amasinap mo bukuyakelesiys’? Adok tayyaweid yak.

Kelis anmwqnet bikidumwäluds

¹⁵⁻¹⁶ “Vena babaw gimgilis, igaw dadub nisesus. Yakids davanuys Yudiy, nag ivag adsinaps dadub mamagina tasiyas; tage takakins dakaleiwags kweiboug na-ikadilok bikidumwal adsinaps. Misinaka tasimounids Kelis waseg vagan bikidumwäluds. E, tasimounids Yeisuw Kelis anmwqnet bikidumwäluds. Awoum bitakanow min-Yudiy dakaleiwags vagan kid bikidumwäluds. Kweiboug kaleiwag nag bikidumwal teitan gamag, nag.

¹⁷ Sivinads Kelis bikidumwäluds peinan takalbalebs yakids babaw, yakamey mawana yakamiy. Gamag mwasanin mo bilansa, “Kelis sivinan sinap kalbaleb, peinan ilabes tasiyas takalbalebs.” Adok awoum.

¹⁸ Kukin bawgow min-Yudiy makaleiwag to napiyev, singaya takalbaleb yey, peinan min-Yudiy sikaleiwag nag kadilok bikidumwälug.

¹⁹⁻²⁰ Moses nakaleiwag kweiboug bo ikatimateig vagan kid biyakous kaleiwag towen waseg yey, tut towen mo amov Yowbad waseg. Wanaklos Kelis, soug Kelis nakakanig vagan sinap kweiboug beikous waseg yey; mapuna bo amov. Tage nag mwamovag tatoneig, Kelis namwamov waseg yey. Tut towen kaleivig waseg namov, peinan asimounid waseg Yowbad Natun towen nisiwyoubug, nikanig peinag.

²¹ Awoum bapiyev Yowbad nasiwayoub towen. Awoum banineiv mwamovag kaleiwag kweiboug waseg; awoum. Magat kaleiwag kweiboug ikadilok bikidumwälud, adok Kelis bo ikaniga mav.

3

Tasimounid Kelis waseg

¹ O min-Galetiy, mamagina takabaläweins yakamiy. Kal niyabol ninoumiy? Kweiboug nukuliganes, nukusimounids Yeisuw Kelis neiweiys waklos; nagein gog bo nukunumweilovs.

² Tut gog towen sivinag katanoka youd bukwatimlakem. Aveiyag silawun Yowbad Kululuwan niwekeimiy? Silawun nag peinan kukwanawes kweiboug kaleiwag, nag. Tage peinan nukuliganes livanen Yeisuw. Bo kuliganes kusimounids waseg Kelis, mo iwekeimiy Yowbad Kululuwan.

³ Yowbad Kululuwan waseg nukusilamaws sinap bwein, mo kudokes mitawtoun tatineimiy bukuyakousis kid sinap towen. Adok ninoumiy nag.

⁴ Kweiboug abamiy igege, Yeisuw silmanin. Adok nukukwawesa mav mimouvit towen.

⁵ Towen nivakamumi Kululuwan waseg nisekeimiy mitawtoun, nawotet silmanin. Tabta bisekeimiy Kululuwan peinan nukukwawes nakaleiwag kweiboug? Adok nag.

Misinaka kuliganes livanen Mesay Yeisuw, o kusimounids waseg, Kululuwan mo isekeimiy.

⁶ Ebelam kweiboug isimounid waseg Yowbad, mapuna idok tадidumwal.

⁷ Kadiloka kukwakins siyas tasimounids waseg Yowbad imlavags Ebelam delen tasiyas, yakamiy mawana yakamey.

⁸ Bukitab waseg nilivnek Yowbad igaw bivageimiy tадidumwals, peinan kusimounids waseg; ven tobwag gimgilis yakamiy. Kweiboug anilivan Ebelam waseg mamagina, “Vena babaw gimgilis igaw mo bimw̄asaws waseg yakoum.”

⁹ Mapuna tasimounids waseg Yowbad mo bisekeids damw̄asaws sods tasimounid towen Ebelam.

¹⁰ Tage tasiyas sivines bikanawes Moses nakaleiwag, Yowbad mo bikamtanis. Peinan Bukitab waseg livan nises mamagina,

“Kal yak nag bukwanow livan babaw nises w̄abuk towen, Yowbad igaw mo bikamtanis.”

¹¹ Moses nakaleiwag nag ikadilok bikidumwal gamag, Yowbad wamatān; nag. Livan kamnat nises,

“Kal yak tадidumwal yak, peinan kusimounid Yowbad waseg, mo bukuban mumwamov.”

Simounid kweitan; Moses nakaleiwag kweitan

¹² Na-ikadilok gamag bisimounid waseg Moses nakaleiwag vagan biban namwamov, nag. Misinaka bikanow kaleiwag silmānin mwamovan. Peinan kweitan livan nises mamagina,

“Takanaweins kaleiwag bo beimovs.”

¹³ O peinan na-ikadilokeids bitakanawes kaleiwag towen, Yowbad bikamtanids; tagē Kelis bo ikatinabweids, damoumouvits towen waseg, peinan tonen ikatimapuds. Kweitan lelel nises mamagina, “Yowbad bikamtan gamag kal beiweiys bikayagweg wakaligweg.”

¹⁴ Yeisuw Kelis ikanig waklos vagan bikatinabweids, peinan Yowbad sivinan vena babaw yakamiy bukumwasaws simiy Ebelam. O peinan nikatigik Kululuwan bimekeids, o sivinan misinaka bitasimounids waseg Kelis mo bikayeb Kululuwan Town vagan bimekeids.

Yowbad ilivnek nasiwayoub

¹⁵ Sigweyas, kadiloka kunuwes adsinaps ven watinow gimgilis yakids. Kukin kal bikaluweg nakiyay, teitan gamag ta-mawan bikatilow anilivan, nag. Mawana tanuwagan nilivnek, mawana bisesunwan.

¹⁶ Yowbad anilivan mounid waseg Ebelam son tabun. Nag ilivan, “Basiwyoubumiy simwey tibum,” nag. Ilana, “Basiwyoubumiy soum tabum.” Tabun towen anmwānet Mesay Kelis.

¹⁷ Yowbad isek anilivan towen. Anilivan isesun-wan ee... bweilim lakatuvas sinawatoun ikous, mo isek nakaleiwag waseg Moses. Kaleiwag towen waseg nag igidem Yowbad anilivan to nilivnek Ebelam waseg. Anilivan towen bo isigeg.

¹⁸ Kukin Yowbad bisekeids dakiyays Moses nakaleiwag waseg, ta-mawan bisekeids dakiyays anilivan tonen waseg. Tage Yowbad bo ilivnek anilivan Ebelam waseg, mo isek dakiyays.

¹⁹ Taninuways Moses nakaleiwag. Aveiyag wawun Moses nakaleiwag? Wanamug anilivan mounid Yowbad nilivnek. Tage wankuyeim mo isek Moses nakaleiwag vagan gamag bikakins asisinap kalbaleb. Wankuyeim gog neim Ebelam tabun, Yowbad mo isek nakiyay towen, peinan bo ilivnek.

Nakaleiwag kweiboug anelos wasigeis Yowbad nisek Moses vagan bikatipel bisekes gamaga babaw.

²⁰ Tage anilivan bo isek Ebelam wamatān tonen. Nag tayuwein ikatipel; nag. Yowbad anmwānet-wan nisek.

Moses nakaleiwag

²¹⁻²² Moses nakaleiwag kweiboug tabta bigidem Yowbad anilivan? Adok nag. Kukin bisekeid kaleiwag kwayuwein vagan biymoveid, adok anagin kaleiwag towen gamag asisinap bwanabwein.

Nag gog. Bukitab nikatigik babaw gamag yakids takalbalebs yakids, vagan kid kalisiy yakids tasimounids waseg Yeisuw Kelis mo bitakawes nasiwayoub, mawan Yowbad anilivan mounid.

²³ E, taninuways simounid. Kweiboug Moses nakaleiwag niyyousids, mamagina iyawanids yakids. Wankuyeim Kelis neim, tasimounids waseg, ilikuds, mo taneis wamnat.

²⁴ Mamagina kaleiwag towen imtakavateids ee... mo Kelis neim. Bitasimounids waseg Kelis mo bitamlavags tadiumwals yakids.

Simounid

²⁵ Peinan tasimounids Kelis waseg, nag ivag sivinads kaleiwag vayuwein bimtakavateids, nag.

²⁶ Tasimounids waseg Yeisuw Kelis mo bitamlavags Yowbad nitun yakids, yakamiy o yakamey.

²⁷ Kukin kal Kelis waseg ibaptays, mo bikow Kelis ansinap.

²⁸ Yeisuw Kelis waseg, yakids katanok bod yakids, takinew min-Yudiy yakamey o mina-Gilis yakamiy, takinew touns o adok guyawaw, takinew tawaw o vinay, yakids katanok bod yakids.

²⁹ Peinan Kelis angamag yakids mo tamlavags Ebelam tibun babaw yakids, mapuna takawes dakiyays towen Yowbad nilivnek Ebelam waseg.

4

Yowbad nitun yakids

¹⁻² Kuninuways guyaw teitan igaw wagwadin bikow nakiyay, na-ikadilok bikaleiwag; magina tamwey teitan natouwat towen. Kadan o taman teitan bikaleiwag. Igaw anatut bivakaein, gwad towen mo bikow nakaleiwag tonen, peinan taman kweiboug nilivnek ilana, “Igaw tutan waseg mo bikow nakaleiwag.”

³⁻⁵ O yakids mawan. Kweiboug mamagina daGeileiws sitouwat yakids; tut gog towen nitamlavags Yowbad nitun. Igaw wagwadids nitakawes daGeileiws nakaleiwag ee... misiyamun towen bo ikadilok Yowbad waseg, mo ikayeb Natun, im watinow wasigeis tasiyas takaweins Moses nakaleiwag. Kudavin natan ikop mo imlavag gamag, vagan biymiyiseid angamag yakids, bitalisawes Moses nakaleiwag mo bitamlavags Yowbad nitun yakids.

⁶ Mapuna isekeids Natun kululuwan, ilana, “Tamad!” Yakids mo talansa, “Tamad!”

⁷ Nag magina kweiboug kaleiwag natouwat yakids, nag. Yowbad nitun yakids. O peinan Yowbad nitun yakids mo isekeids dakiyays.

Pawl ikalin nuwan min-Galetiy wasigeis

⁸ Kweiboug nag kukwakins Yowbad. Tobwag yowbad natouwat yakamiy. Tasiyas nag mounid yowbad tasiyas; nag. Iyyaweids-wan.

⁹ Nagein gog bo kukwakins Yowbad, o togo mamagina ikakin yakamiy. Aveiyag wawun nukuyums kuneke amigelei kweiboug? Tougueys o tasimavs tasiyas. Sivinamiy kid bukuwgavaws siwotet tasiyas. Bo igak!

¹⁰ Mawan amigelei kweiboug kuvnases min-Yudiy sikaleiwag, magina kuvnases Yam mwasinis o tibukon mwasinis o wuwal o bulbweilim wasigeis.

¹¹ Bo igeg nanoug. Adok bo awoteta mav wasigeis yakamiy.

¹²⁻¹³ Sigwey, bo amlavag mawana yakamiy. Singay sivinag bukumlavags mawana yej.

Nag kuygageigs, nag. Wanmugwana agukwatoun mo asekeimiy livanen Yeisuw; tage ta-kupiyaveigs, nag.

¹⁴ Ta-kukwasigumigs peinan woug kalbaleb, nag. Nukutams waseg yey mamagina gum-lib_{alab} yey, o mamagina Yeisuw Kelis tonen.

¹⁵ Adok kunuwes singay nitams_{am}was sigwey yakamiy. Tut kweiboug magat kadilokeimiy bukugutes mitamiy bukusekeigs silm_anin matag, peinan singay nukusiyoubugs yey; tut gog towen bo kwamliweigs.

¹⁶ Adok nukwamliweigs peinan agulivan mounid wasigeis yakamiy.

¹⁷ Bo adibakeimiy livanen tasiyas niwekeimiy. Tasiyas ivag sivinamiy, tage tayyaweids tasiyas. Sivines kid bukupiyaves gunakaleiwag, v_agan beivag kid sivinamiy sikaleiwag tasiyas.

¹⁸⁻¹⁹ Magat asisinap bwein, bweina bikaveiyons wasigeis yakamiy, tutan yey sigwey yakamiy tasesus, o tutan yey nases kweitan ven. Yakamiy mamagina nitug yakamiy. Bo igeg nanoug pinamiy. Igaw bukumlavags mamagina Kelis mo beitaw nuwag.

²⁰ Tage ivag sivinag sigwey yakamiy bitasesus, bagilagel wasigeis yakamiy. Tut towen bo ikubukub nuwag pinamiy yakamiy.

Egal nag mawan Sela

²¹ Yakamiy sivinamiy bukukwawes Moses nakaleiwag. Adok nag kuliganes kaleiwag towen.

²²⁻²³ Bukitab waseg livanen Ebelam nises. Nakwav Sela vinakal. Nayuwein vin Sela natouwat yagan Egal. Egal won bwanabwein; ikop natun kud_ataw. Sela vinakal, natun nag. Yowbad ilivnek, mo ikop natun yagan Aysak.

²⁴⁻²⁵ Kabebay nises wasigeis vinay tasiyas asteiy. Vinay asteiy mamagina kaleiwag akweiy. Egal mamagina Moses nakaleiwag. Koy yagan Sinay ven Alebiy waseg, Moses bo ikow kaleiwag towen, isekes min-Yudiys. E, min-Yudiys siven Yelusalem, igawa ivvaluts sikaleiwag moumouvit waseg, mamagina sinyawan tasiyas.

²⁶ Y_akids dakaleiwags kweitan meinoy neim walbalab, mamagina davanuys Yelusalem kweitan, walbalab nises. Y_akids nag mawan sinyawan, bwein-wan y_akids, mamagina Sela nitun y_akids.

²⁷ Bweina tamwasaws, tasiyas nag. Livan nises Bukitab waseg mamagina:
“Bweina kumw_asaw vinakal yak.

Natum nag; tage bweina kuwak, kumw_asaw.

Peinan nitum bibabaw.

Nayuwein gog sam namwan,
nitun nag bibabaw.”

²⁸ Yakamiy mawan yakamey, Yowbad nitun babaw y_akids. Kweiboug ilivnek mo Sela ikop natun Aysak. Y_akids mawan, anilivan mounid ilivnek mo nitamlavags nitun Yowbad, y_akids.

²⁹ Egal ikop natun won tatonen waseg.
Sela ikop natun peinan Yowbad ilivnek; kululuwan ileb mo ikop natun Aysak.

Wankuyeim Egal natun mo ikamliw Aysak. Mawan magin takanaweins Moses nakaleiwag mo ikamliweids tut towen waseg.

³⁰ Ikamliweids; nag gog, peinan kweitan livan nises Bukitab waseg, mamagina:
“Kwayeb mutouwat manawen son natun.

Awoum natun bikow mukiyay.

Mukwav tonen natun bikow mukiyay meivek-wan.”

³¹ Y_akids nag mawan Egal nitun, nag. Y_akids mawan Sela nitun; dakiyays mounid nises.

² Yey Pawl agulivan mamagina. Kukin bukubwabwes momwamiy mamagina min-Yudiy sikaleiwag bukukwawes. Kelis nag bilabeimiy.

³ Vayuwein alivan mamagina: Kukin kal yak kubob momwam, kadiloka kuvnas Moses nakaleiwag meivek-wan.

⁴ Bukudokes kid min-Yudiy sikaleiwag bikidumwälumi, nag gog, kusilbwades Kelis. Peinan kupiyaves nasiwayoub tonen bo kukwalouws kid.

⁵ Yakids gog tanmises Yowbad Kululuwan bikidumwäluds, peinan tasimounids waseg.

⁶ Yeisuw Kelis waseg, takawein min-Yudiy asisinap nag bimlavag tadicumwal, nag. Tapiyavein sinap towen nag bimlavag tadicumwal, nag. Misinaka kal bisimounid waseg Kelis, binamis waseg Kelis, mamagina bikalpwäkit waseg towen Yeisuw Kelis, mo bimlavag tadicumwal towen.

⁷⁻⁸ Nukusilamaws sinap mounid waseg. Kal nisilbwadeimiy? Mo kupiyaves kid Yowbad ansinap. Peinan Yowbad nidaweimiy ansinap bwein waseg, nag beitam kweitan sinap; tage teitan gamag neiteiy ninoumiy kweitan sinap waseg.

⁹ Yist kakit binek pwalaaw avakaein, tamkwalan mo beitol kid. Awoum kutams kakit sinap kalbaleb waseg.

¹⁰ Nanoug nises daGuyaws bilabeimiy mo bukupiyaves sinap to kalbaleb; tage Yowbad bikatimop ansinap kavel towen niyabol ninoumiy.

¹¹ Sigwayas, magat baguyes tasiyas niyakelesiys Kelis waseg vagan bibwabwes momwes, mogo min-Yudiy nag bikamliweigs. Tage bo ikamliweigs peinan alana, “Yeisuw Kelis nikanig waklos vagan bikidumwäluds.”

Kukin gog badibakes tobwag ven gimgilis, “Kadiloka bibob momwamiy, vagan bukumlavags min-Yudiy yakamiy,” mo beibwein ninous min-Yudiy tasiyas. Nag gog, min-Yudiy bo ipiyaves agulivan towen, livanen Yeisuw neiweiys wäklos.

¹² Tasiyas sivines bibwabwes momwamiy, bweina bikablaves powes tatineis.

¹³ Sigwayas, Yowbad nidaweimiy nakaleiwag kweivaw waseg. Bo ikous mouvitan kaleiwag kweiboug wasigeis yakamiy. Kal yak bukutam kaleiwag kweivaw mo beibwein nanoum. Awoum kaleivim bikaluweg nanoum, awoum. Tage siwayoub bikalawageim vagan bukuvnases simiyas.

¹⁴ Livan katanok bo kadilok kaleiwag babaw. Livan towen mamagina, “Kadiloka kuvnas soum mawanaka kuvnaseim tatoneim.”

¹⁵ Tage beivag kakat wudoumiy, bukuygages simsimiya, adok bukuyakousis bod yakamiy.

Kululuwan anagin kweitan, kaleivin anagin kweitan

¹⁶⁻¹⁷ Sinap towen kunages: Magat Yowbad Kululuwan bikaluweg ninoumiy, tamawan kalivimi yikalawageimiy. Peinan kaleivid sivinan bisilbwed Yowbad Kululuwan nakaleiwag, o Kululuwan sivinan bisilbwed kaleivid nakaleiwag; mamagina ivvatays, mapuna aveiyag sivinad ta-mawan bitawtel.

¹⁸ Magat Yowbad Kululuwan bikaleiwag mo biyakous Moses nakaleiwag wasigeis yakids.

¹⁹⁻²¹ Takinbunikes kaleivid nawotet mamagina: kanavay mav, subwan, kalimwäsaw, meg, bwagaw, kameiliw, kamniman, moumouvit dabat, kavikun, gidukis, silponay, silakod, sinal, kananeiy, govek, o sinap mamagina tasiyas imwamoums wiskiy mo imlavags takabaläweins tasiyas. Kweiboug nadibakeimiy, kweivaw bo alivan-vak mawan: Tasiyas mawan asisinap kalbaleb nag beisiws Yowbad wanakabkaleiwag, nag.

²²⁻²³ Tage Yowbad Kululuwan nawotet mamagina: siwayoub, mwäsaw, niwal, kapatul, sinap didumwal, guyaw, simounid, mānum, sinap kamnat. Nag kweitan kaleiwag bitawtoun waseg sinap towen bwanabwein.

²⁴ Magat Yeisuw Kelis angamag yakids bo nitaweiys kaleivids waklos vagan kid kaleivids ansinap kalbaleb nag bikaleiwag wasigeis yakids.

²⁵ Kukin Yowbad Kululuwan biymoveids, kadiloka bikaluwageids, mamagina dakavaveis Kululuwan Town.

²⁶ Awoum bitakayapam. Awoum sivinad gamag babaw bikavasid o bigoulud; awoum. Adok sidayas mo bimouvit dibes o bikamliweids. Awoum bitavages mawan; awoum.

6

Bitalabes sidsidayas

¹ Kukin bwadads teitan bikalouw, ansinap kalbaleb bivag, kadiloka kukidumwalus gamag towen, Kululuwan Yowbad wasigeis yakamiy. Kadiloka kumanums gamag towen beibwein, siwayoub waseg. Tage kuvnaseimiy-vak, mata ge bukukwalouws yakamiy.

² Kulabes simsimmiyas waseg aveiyag kalbaleb bukulivatus. Kuvages mawan, peinan Kelis nakaleiwags.

³ Magat teitan ansinap nag, idoki sinap bikaypom kid, singaya ibol nanon tonen; ikatidavina tonen.

⁴⁻⁵ Tatanok tatanok yakamiy kadiloka binuway ansinap totonen. Kukin bwein, mo beibwein nanon. Awoum binuway son ansinap. Peinan bitakawes kwanads tatoneids, tatanok tatanok yakids.

⁶ Kukin teitan bikatimlakeim sinapun Yeisuw Kelis waseg, kadiloka kusiwyoub taw towen youda babaw bwanabwein waseg.

⁷⁻⁸ Awoum teitan bikatidavimiy. Ta-mawan bukubob Yowbad nakaleiwag. Aveiyag bukusop, youd towen mo beisob. Kukin bukusop kaleivim waseg, igaw bukutayoy youd kalbaleb, ipsapwas. Kukin bukusop Yowbad Kululuwan waseg, igaw bukutayoy mumwamov towen bises bisigeg.

⁹ Awoum bitasoumats dawotets bwanabwein waseg. Bitavvaluts, nag bikawegweis wouds ee... tayoy anatut mo bitatayoys anagin bwanabwein.

¹⁰ Mapun kadiloka bitalabes gamag tababaws-wan, peinan adatuts nises. Singaya bitalabes sidayas tasiyas nisimounids daGuyaws Yeisuw waseg.

Livan nakabiyokous waseg

¹¹ Kukines lelel singay avakaein yey nalel namag waseg.

¹² Min-Yudiy nikamliweids peinan adlivans mamagina: “Tasimounid waseg Kelis neiweiys waklos, mo Yowbad bikidumwalus.”

Gamag mwasinis isimkineimiy vagan bibwabwes momwamiy. Sivines kid youd bwanabwein ankakin watoulan. Kukin bukubwabwes momwamiy, mo beikous sisiyas askameiliw wasigeis tasiyas.

¹³ Tage tasiyas nibwabwes momwes nag ivnases min-Yudiy asisinap meivek-wan; nag. Sivines kid bibwabwes momwamiy vagan bikaypamweimiy yakamiy.

¹⁴ Yey gog awoum bakaypom. Misinaka bakaypom anklos daGuyaws Yeisuw Kelis. Anklos waseg mamagina ven watinow sinapun bo ikanig, mo iyakous nakaleiwag waseg yey; o yey gog waninous ven watinow gimgilis mamagina takanig yey.

¹⁵ Min-Yudiy sikabivatus nag bilabeid; vena babaw asisinap nag bilabeid; misinaka sinap kweivaw, vagan bitamlavags gamag kweivaw.

¹⁶ Tayyousins sinap towen yakamiy Yowbad binok nuwan wasigeis yakamiy mo beitaw nuwamiy, simiyas Yowbad inabod kweivaw, mamagina min-Yisleil babaw yakids.

¹⁷ Igaw tut wanakougwaw awoum teitan bivag gunamouvit. Bo misinak! Yeisuw peinan, agupout nises wakaleivig.

¹⁸ Sigweyas yakamiy, daGuyaws Yeisuw Kelis bisiwayoub kululuwamiy waseg. Eimen. Yey Pawl.

EPESOS

Let towen Pawl nilel vagan tayakelesiys bikakins Yowbad nasiwayoub avakaein, nivag dakasis ibwein, Yeisuw waseg. Kadilokena bitatoukums silmanin Yowbad nakaleiwag.

Nakabsilamaw

¹ Yey Pawl, takawein livanen Yeisuw Kelis ye; peinan Yowbad nanon mawan. Kalin nuwag tayakelesiys yakamiy, ven Epesos waseg nukusesus, o kusimounids Yeisuw Kelis waseg.

² Tamads Yowbad son daGuyaws Yeisuw Kelis bisiwyoubumiy mo beitaw nuwamiy.

Kelis nasiwayoub bwanabwein

³ Singaya ikalin nuwads Yowbad, daGuyaws Yeisuw Kelis taman; Yeisuw Kelis waseg, bo isiwyoubuds, isekeids libalab wuliyougwan kweitan kweitan, vagan kululuwads bikatimweis bitawtoun.

⁴ Igaw-wan, nag ibun ven watinow, mo ikatigikeids Kelis waseg vagan kid beivag adsinaps bwein, didumwal, siwayoub, wamatian mtownen Yowbad.

⁵⁻⁶ Nanon towen bwanabwein waseg ilivnek vagan bitamlavag nitun tatonen yakids, Yeisuw Kelis waseg, vagan kid bitayakawanes nasiwayoub towen singay avakaein, peinan Natun bwanabwein waseg ikalin nuwan yakids.

⁷ Natun buyavin bo iwout peinads, niwidids adsinaps kalbaleb waseg; bo ikow adsinaps kalbaleb, inow, ilavew. Peinan singaya avakaein nasiwayoub wasigeis yakids.

⁸⁻¹⁰ Nasiwayoub towen singaya avakaein, peinan ikatimweis adsinaps o nanouds mo itawtoun, mo takakins nanon tonen. Kweiboug nag takakins; nagein gog bo ikatiboug nuwads mo takakins nanon, peinan nilivnek Kelis waseg. Igaw nakabiyokous tut waseg mo youda babaw bilivkases Kelis waseg, takinew libalab youdanen o takinew ven watinow youdanen.

¹¹ Kelis waseg, Yowbad inakiyay isekem yakamey, peinan ikatigikem nanon tonen waseg; peinan nawotet tut babaw mawanana nanon tonen.

¹² Wanmugwana yakamey nakasimounid Kelis waseg; Yowbad inakiyay bo isekem, vagan kid bakamlavag angamag, yakawan tonen silmanin, o butun tonen silmanin.

¹³⁻¹⁴ Yakamiy-vak nukuliganes livan towen bwanabwein waseg ikatinabweids, nukusimounids livan towen mounid, livanen Kelis; mo Yowbad Kululuwan iwekeimiy mama-gina amilivatawn, mawan yakamey, peinan bo ilivnek. Yowbad Kululuwan waseg bo ilivtuwanids, mapuna takakins dakiyays nises. Igaw mo bitakawes; o singaya bitakavasis inaguyaw waseg.

Pawl inanitoug

¹⁵⁻¹⁷ O ye, bo aligen nukusimounids daGuyaws Yeisuw waseg, o ikalin nuwamiy tasiyas tayakelesiys wasigeis. Aligen, mo ikalin nuwag yakamiy tut babaw waseg, o akavteg yigamiy yakamiy gunanitoug waseg Yowbad, mtownen Yeisuw Kelis naYowbad, towen; o towen Tamads wanakaew. Aninitoug gog vagan bisekeimiy non bwanabwein o bikatiboug nuwamiy mo bukukwakins mtownen Yowbad.

¹⁸⁻²⁰ Waninoumiy mo bukukwakins youd towen bwanabwein nikatigik igaw mo bisekeimiy, o bukunmises silmanin youd towen; e bukukwakins nakiyay singay bwanabwein towen nisekeids tayakelesiys yakids. E, bukukwakins natawtoun singaya avakaein wanuwads yakids tasimounids. Natawtoun towen waseg nivag Kelis, kanig waseg iyakit, in isin walbalab wanakatay waseg.

²¹ E, nakaleiwag walbalab bo ikow, ikaleiwag takaleiwag babaw wasigeis, o anelos bwanabwein o anelos kalbaleb wasigeis, o guyawaw babaw wasigeis; takinew tut towen waseg, o takinew tut wanakougwaw.

²² E, Yowbad bo isek Kelis nakaleiwag youd babaw wasigeis, mo imlavag datoveks, yakids tayakelesiys, vagan kid bikaleiwag youd babaw wasigeis yakids.

²³ Peinan yakids nitamlavags mamagina won Kelis, mo ikadilok youd babaw wasigeis.

2

Kanig talisawes, mwamov tabqnes

¹⁻² Yakamiy kweiboug mamagina takanigs yakamiy peinan amisinap kalbaleb o nukusiplaves Yowbad nakaleiwag, o peinan amisinap mamagina ven watinow sinapun, o peinan nukwanawes aygan takaleiwag townen kalbaleb, bwagaw kweitan kweitan sitovek, o gamags-vak takapidabs sitovek.

³ O yakids kweiboug mawana tasiyas, advikeiys nikaliwageids, aveiyag wouds sivinan o nanouds. Kadiloka Yowbad bikamtanids mawana tasiyas.

⁴ Tage Yowbad, singaya inok nuwan yakids, o isiwyoobuds avakaein.

⁵ Yakids mamagina takanigs yakids peinan adsinaps kalbaleb, mo iyakituds sods Kelis. Bo ikatinabweids nasiwayoub townen waseg.

⁶ E, Yeisuw Kelis waseg iyamoveids mo isekeids idakaleiwags, vagan bitakaleiwags sods Kelis walbalab waseg.

⁷ Mapuna tut wanakougwaw babaw gamag tut babaw mo bikakins nasiwayoub singay avakaein, peinan ikalin nuwan yakids, Yeisuw Kelis waseg.

⁸ Tasimounids waseg Yeisuw, mo Yowbad ikatinabweids, adsinaps kalbaleb waseg, peinan inok nuwan yakids. Ta-mawan bitakatinabweids tatoneids yakids, nag. Tage Yowbad nasiwayoub waseg.

⁹ Nag aveiyag tawtoun bitawteles mo Yowbad bikalin nuwan, bikatinabweids, nag. Bo isiwyoobuds mav. Kukin bikatinabweids peinan dawotets tawtoun, mo bitakaypamwes kid sinap. Awoum.

¹⁰ Yowbad bo iwotet wanuwads, Kelis waseg, silmanin adsinaps bwanabwein; Yowbad inawotet townen. Kweiboug nikatigik dawotets bwanabwein vagan bitawteles, nagein gog mo iwotet wanuwads.

Sods Kelis katanoka gamag yakids

¹¹ Kuninuways, tobwag ven gimgilis yakamiy. Min-Yudiy nimes waseg ibwabwes momwes, o idokeimiy tobwag gamag yakamiy, peinan ta-ivag anaboub momwamiy.

¹² Mitiyamun townen nag kukwakins Kelis, nag kukwakins Yowbad nakaleiwag min-Yisleil wasigeis, peinan tobwag gamag yakamiy. Bo ilivnek nasiwayoub wasigeis tasiyas; yakamiy nag. Kweiboug nag kunmises vagan Yowbad bilabeimiy; nag. Nag ivag miYowbad bwanabwein, nag.

¹³ Kweiboug kadiveiyov nukusesus, tage nagein mo nukusineikimas; peinan buyavin Kelis neiwout pinamiy yakamiy, o pinem yakamey; mapuna yakamiy bo imayeimiy yakamey wadidem.

¹⁴⁻¹⁵ Mtowen Yeisuw mamagina niwal peinads yakids; yakamey min-Yudiy simayas vena babaw gimgilis yakamiy, bo tamlavags bod katanok-wan. Won Yeisuw waseg bo igulek ablivis townen wanuweinids yakids; ablivis townen yagan kameiliw; mo iyakous min-Yudiy yakamey makaleiwag babaw, vagan biyakous bod kweitan, kweitan. Sivinan kid beivag katanoka bod, kweivaw bod yakids sods mtowen, mo bitamsamwas babaw yakids.

¹⁶ E, bo ikanig waklos vagan bukumwas simiy Yowbad yakamiy, o bakamwas simey Yowbad yakamey, mo bitamlavags bod katanok yakids; peinan anklos waseg bo ikatigulek sinap townen yagan kameiliw bo iyakous.

¹⁷⁻¹⁸ Mapuna mtowen bo isunap, igeiguy vagan kid kameiliw beikous; bo iguyeimiy yakamiy, kadiveiyov nukusesus, o iguyem yakamey, kadiyakusan nakases. E, Yeisuw bilabeids mo bitanekes Yowbad, peinan Kululuwan katanok-wan, mtowen imgwayeids babawa yakids mo tanekes Tamads Yowbad.

¹⁹ Kweiboug yakamiy mawan bwabwal o taggobwaws yakamiy; nagein gog nukumlavags Yowbad angamag simiyas tayakelesiys babaw.

²⁰ Yakids mamagina Yowbad nabunatum. Yeisuw Kelis kakolan tatonen; tasiyas takaweins livanen Yeisuw sisiyas tasiyas palopit mamagina siy; yakamiy gog wululay.

²¹ Kelis waseg takativaseids sidayas mo tamlavags bunatum katanok-wan, o Yowbad ikayus nabunatum towen bwanabwein.

²² Yowbad Kululuwan ikativaseids mo tamlavags Yowbad nabunatum. Yakamiy-vak Kelis waseg, nukumeis silmanin bunatum towen, kwativases waseg.

3

Pawl nawotet ven babaw gimgilis wasigeis

¹ Mapuna akulul anitoug Yowbad waseg. Gunawotet bo isekeig silmanin tobwag ven gimgilis yakamiy, o nagein gog yey nases wadeil Yeisuw Kelis peinan.

² Adok bo kuliganes butun gunawotet, Yowbad nisiwyoubug nisekeig gunawotet towen, yakamiy pinamiy.

³⁻⁴ Yowbad ansinap to kweiboug nikikawum, nagein gog bo ikamtel waseg yey; mawan gunalet kakit nalel neiw; kuvinis mo kukwakins yey akakin sinapun Kelis, mawan yey akakin.

⁵ Tammwayas kweiboug nag ikakins sinap towen; tage tut towen, Yowbad Kululuwan bo ikatimlakes tasiyas takaweins livanen Kelis, sisiyas palopits mwasanin, mo ikakins.

⁶ Sinap towen mamagina, tobwag ven gimgilis yakamiy bweina bukukawes Yowbad nakiyay; bweina bukuliganes livanen Kelis, bukukawes aveiyag nikatigik peinads gamag yakids, o bukusiws Kelis aygan takaweins wasigeis.

⁷ Yowbad natawtoun waseg, bo isiwyoubug isekeig gunawotet vagan ballivan bwanabwein livan towen, livanen Kelis.

⁸⁻⁹ O yey mamagina toul yey, abus wasigeis tayakelesiys babaw; tage bo isiwyoubug isekeig gunawotet, ikayabeig aninoun tobwag ven gimgilis wasigeis allivan, alana, "Singaya Yowbad isiwyoubumi, Yeisuw Kelis waseg"; vagan kid bukukwakins nanon towen tabunin youd babaw, Yowbad; peinan tut kweiboug tammwayas nag ikakins, nagein gog mo ikamtel wasigeis tayakelesiys yakids.

¹⁰ Nanon Yowbad mawan, vagan tasiyas takalleiwags kalbaleb wanakaew mo bikinieds tayakelesiys yakids, tut nagein, mo bikakins Yowbad ansinap kweitan kweitan.

¹¹ Peinan nagwadiyen nanon bo bikatinabweids yakids, min-Yisleil yakamey o tobwag ven gimgilis yakamiy, daGuyaws Yeisuw Kelis waseg.

¹² O Yeisuw waseg mo takapwapouts, bweina bitanekes Yowbad, peinan tasimounids Kelis waseg.

¹³ Kukwakins-wan peinan abag igeg pinamiy yakamiy; tage awoum bigeg ninoumiy, mo bukugweys. Agumouvit towen silmanin balabeimi yamam.

Kelis nasiwayoub singaya avakaein

¹⁴ Mapuna akulul wamatian Tamads.

¹⁵ Mtowen wawun kumwakum katanok katanok, takinew walbalab, o ven watinow; peinan Yowbad Tamads towen.

¹⁶ Anitoug Yowbad waseg Kululuwan bikimtuweimiy yakamiy, inatawtoun waseg, bikatimweis kululuwamiy bukutawtouns; peinan daGuyaws Yowbad natawtoun singaya avakaein.

¹⁷⁻¹⁹ Anitoug vagan bukusimounids waseg Kelis mo beisiw wakateimiy. Anitoug silmanin misiwayoub, vagan bukusiwayoub amisinap babaw waseg, simiyas Yeisuw angamag babaw, mo bukukwakins Kelis nasiwayoub, vakaeanan, vayovan, kopkopan. Nag bitalivans, peinan singaya avakaein, nasiwayoub towen. Anitoug mawan peinan sivinag Yowbad ansinap singaya avakaein bikatpilekeimiy mo bikadilokeimiy.

20-21 Yowbad natawtoun singaya avakaein. Kukin aveiyag bitanitoug waseg, bo ikadilok gagaba waseg bisekeid; kukin aveiyag bitanuways, bo ikadiloka youd tasiyas, peinan wanuwads iwtuwotet; yakawanan towen bivakaein tayakelesiys wasigeis, Yeisuw Kelis peinan, gudwouvaws bimimeis tut nag beikous; yakawanan towen bo bisigeg. Eimen.

4

Woun katanok-wan

1 Yey nases wādeil daGuyaws peinan, o yey aguyeimiy silmanin amisinap beibwein, peinan bo idaweids vāgan bitanekes ansinap bwanabwein waseg.

2 Awoum kwayāpams, kadiloka kumānumbs-wan, kwaptuleimiy, kusiwayoubs o kuvnases simiyas.

3-4 Kutawtouns vāgan bukusesus ninoumiy katanok-wan, Kululuwan Yowbad waseg, mamagina bod katanok, niwal waseg woun katanok-wan, son Kululuwan-vak katanok-wan. Bo idaweids vāgan danamis bitaseinis katanok-wan.

5-6 DaGuyaws gog anmwanet, dasimounids katanok, o dakabaptays katanok-wan; Yowbad anmwanet, babaw yākids Tamads, Takaleiwag youda babaw wasigeis, Tabunin youda babaw; e, youda babaw wasigeis nises.

7 Bo isiwyoubuds katanok katanok yākids, mamagina Kelis ivgen isekeids.

8 Livan nises mamagina:

“Mitiyāmun neimwen nein wanakaew, bo iyous antameiliws babaw, itokes inawes nakakkaleiwag waseg, mo ivgen nasiwayoub inagamag wasigeis.”

9 (Silawun livan towen: ‘Beimwen bein wanakaew,’ peinan wanmugwana neibus neim watinowa singay.

10 Mtowen neibus neim, wankuyeim mo imwen ilisow libālab in-o wanakaewa singay; mo ikadilok ven babaw wasigeis, vāgan bisesuna bikalileiwag.)

11 Nasiwayoub itam gamag wasigeis, sinap ikatipel isekes māwana, mwasanin imlavags takanaweins aygan, mwasanin palopits, mwasanin takaweins livan bwanabwein, mwasanin tamtakavateins alen, mwasanin takatimlakays.

12 Vāgan kid bikimtuwes tayakelesiys bitawtouns silmānin nawotet o bikatimweis Kelis won bitawtoun.

13 Mo bivag dasimounids bimlavag katanok-wan, babaw yākids; nanouds katanok, bitakakina-wan Yowbad Natun; adsinaps bo bikadilok, mamagina Kelis ansinap tonen, peinan ansinap ikadiloka youda babaw wasigeis.

14 Kweiboug adsinaps māwana gamagals, nitaliganes takatidividavs sikaleiwag kweitan kweitan mo isunasun nanouds. Nagein gog bo imatuw adsinaps.

15-16 Tut nagein adilivans mounid, siwayoub waseg, ikatimweis adsinaps mo imatuw, mo tanekes datoveks Kelis, mamagina kunun waseg tayakelesiys yākids, o yākids mamagina won tonen, antuvas babaw wasigeis, o won wuliyougwan katanok katanok yākids, tamlavags woun katanok mo iwotet bwein, ikatimweis siwayoub waseg, mo ivakaein.

Adsinaps kweiboug o kweivaw

17-18 DaGuyaws waseg gunakaleiwag mamagina, “Awoum beivag amisinap māwana tasiyas tadaub.” Ninous makava dadub; nag ikakins mwamovan Yowbad, peinan kates keikay mo ibol ninous.

19 Nag ivag asimwasin wamatān Yowbad; sivines kid sinap singay kalbaleb o bikibik, bipwākits waseg.

20 Tage Kelis nag ikatimlakeids sinap māwan.

21 Adok towen waseg nukuliganes sinapun Yeisuw; kusimounids ansinap mounid waseg.

22 Mapuna towen, kadiloka kupiyaves sinap kweiboug kalbaleb; peinan vikeiyan iyagageimiy; o ikatidev ninoumiy.

²³⁻²⁴ E kweiboug sinap kupiyaves, kuninuways gog sinap kweivaw mo bukumlavags mamagina kweivaw gamag yakamiy; amisinap mawanana Yowbad ansinap mounid o didumwal.

Sinap kweivaw inakaleiwag

²⁵ Kadiloka kupiyaves livan yaweid; tage bukulivans mounid wasigeis simiyas, peinan babaw yakids wuliyoungwan Kelis yakids.

²⁶⁻²⁷ Kukin bikapasal nuwam, awoum beivag amsinap kalbaleb. Awoum biveiyov mukwavikun. Awoum kwavvikuna ee... beiboug; awoum. Awoum kutam Seitan nakaleiwag waseg.

²⁸ Tavveinaw, kadiloka bipiyev sinap kalbaleb; tage naman waseg bweina biwotet beibwein mo biban inawotet anagin, vagan mo bivagein bisekes tasiyas tasimavs.

²⁹ Awoum livan kalbaleb bisunap wawdoumiy, awoum. Misinaka livan bwanabwein bukulivanes vagan tasiyas tanganegs bikatimweis asisinap bivakaein, mo bitawtouns, mawan sivines.

³⁰ Awoum bukuyagages nanon Yowbad Kululuwan Townen Bwanabwein. Mtowen waseg, Yowbad bo ilivtuwanids yakids, vagan bitakakins igaw mo bikatinabweids.

³¹ Kupiyaves sinap kalbaleb; awoum dibamiy bimouvit; awoum bukwavikuns, awoum bikapasal nuwamiy, awoum kutawyages simiyas.

³² Tage kadiloka kusiwayoub beibwein, bikalin nuwamiy simiyas wasigeis, igaw simiyas biyablebeimi, kadiloka kunumlaves, peinan Yowbad, Kelis waseg, bo inumlev amisinap kalbaleb yakamiy.

5

¹ Peinan Yowbad isiwyoobumi mamagina nitun yakamiy, kadiloka beivag amisinap mawanana Yowbad ansinap tatonen.

² Tut babaw kusiwyoubus simsimmiyas, peinan Kelis bo isiwyoobuds, bo itam won tonen, mamagina lun bulukwan; o nasiwayoub townen manisin bwanabwein, silmanin Yowbad bikalin nuwan.

³ Peinan Yeisuw angamag yakamiy, awoum teitan gamag bikin sinap kalbaleb wasigeis yakamiy; awoum bukusubwans; awoum kumtimwamons; bikibik sinap babaw kupiyaves, peinan Yeisuw angamag yakamiy.

⁴ Awoum kwammugwals; awoum kubbasis; awoum kullivans mav, simiyas geg ivag asimwasin, awoum. Tage amilivan bukulivans sona kakalin nuwamiy Yowbad waseg.

⁵ Kadiloka kukwakins tasiyas takalbaleb nag beisiws nakabkaleiwag Kelis son Taman, nag. Tassubwans nag, tabbasims nag, tamtimwamons nag. Tasiyas tamtimwamons ivages mamagina siyowbad tobwag.

Kumlavags kamnat gimgeilin yakamiy

⁶ Gamag mwasanin makava illivans; idokes kid bikatidavimiy; awoum bukuliganes asilivan; awoum. Tasiyas gog tapiyaveins Yowbad nakaleiwag, issubwans o ikayylas, o ibbasims o imtimwamons; igaw Yowbad mo bikamtanis gamag tasiyas.

⁷ Kadiloka kusinales gamag tasiyas.

⁸⁻⁹ Kweiboug tadaubs yakamiy; tut gog townen daGuyaws waseg mo nukumlavags kamnat gimgilis yakamiy. Kadiloka amisinap kamnat waseg bukuninounas; peinan kamnat anagin mamagina sinap bwanabwein, o didumwal, o mounid.

¹⁰ Kunineivs amisinap bwein, aveiyag daGuyaws nikalin nuwan waseg.

¹¹ Kadiloka bukupiyaves sinap dadub; peinan anagin nag ibwein, nag; kadiloka bukusilbwades sinap townen.

¹² Tasiyas asisinap singaya kalbaleb, bo ikawumes. Livan bitaliganes mo beivag admwasins.

¹³ Aveiyag bimteil sinap babaw vagan bitakines bwein o kalbaleb? Adok kamnat tatonen.

¹⁴ Kukin bimteil mo bitakinbunikes. Livanen nises mamagina:

“Kukit tammasis yakoum,
Takanig yakoum kutamanaw,
Kelis mo bimteilim yak.”

¹⁵ Mapuna kuvnaseimiy vagan beibwein amisinap; awoum kusimavs mawana tablabols yakamiy; kadiloka kusinaps beibwein.

¹⁶⁻¹⁷ Tuta babaw kuwtuwotets beibwein; awoum kusimavs mawana patabods yakamiy; peinan tut towen kalbaleb; kadiloka kuninuways daGuyaws nanon, mo bukuvages mawani.

¹⁸⁻¹⁹ Awoum kumwamwes wayn mo bukwablaweins; bukumwamwes adok biyagageimiy; tage Kululuwan Yowbad bikadilok wasigeis yakamiy, mo beitam amilatas, bukwanweles amiwous vagan simiyas beinegs; bukwanweles, bukuyakawns daGuyaws waseg; e, bukwanweles sam o wous tapwoloul, o kweivaw wous-vak bukuwutus, peinan Kululuwan bikatimlakeimiy.

²⁰ Tut babaw bikalin nuwamiy Tamads Yowbad waseg, silmanin youda babaw; daGuyaws Yeisuw Kelis peinan.

²¹ Kadiloka bukutameimiy simsimmiyas wasigeis, peinan kugoulus Kelis.

Livanen veivay kudataw son kudavin

²² Vinay yakamiy, kutams mimwanas sikaleiwag waseg, mawana nukutams daGuyaws waseg.

²³ Peinan Kelis takaleiwag tayakelesiys yakids wasigeis; mawana kudataw bikaleiwag nakwav waseg. Kelis ikatinabweids tayakelesiys yakids, mamagina won tatonen.

²⁴ Kadiloka vinay beitams simwanas sikaleiwag katanok katanok waseg, mawana yakids tayakelesiys tatams Kelis nakaleiwag waseg.

²⁵ Tawaw yakamiy, kadiloka kusiwyoubus mikwavas, mawana Kelis nisiwyoubuds tayakelesiys yakids, mwamovan tatonen itam peinads.

²⁶⁻²⁷ E, ikayuseids, sinap bwanabwein silmanin; anilivan waseg bo iwidids yevagam waseg; sivinan kid yakids bitakamnats, bitamlavags angamag tonen yakids, nag aveiyag kalbaleb ankakin wasigeis yakids, peinan sivinan adsinaps bwanabwein o kamnat tatonen.

²⁸ Kadiloka tawaw bivnases sikwavas, mawana tasiyas wous tatineis. Kukin kal bivnas nakwav, mawana bo ivnas tatonen.

²⁹⁻³⁰ Ta-kal bikamliw won tatonen, nag; tage ivnas won, ituy; mawana Kelis nivnaseids tayakelesiys yakids, peinan yakids mamagina won tatonen.

³¹ “Mapun-vak taw bilisow inan o taman, mo bilatans son nakwav; tasiyas asteiy mo bimlavags woun katanok.”

³² Livan towen tawtoun, mamagina kabebay, livanen Kelis siney tayakelesiys.

³³ Tage kadiloka tatanok yakamiy bukusiwyoubus mikwavas, mawana nukusiyoubumi yaktineimiy; kadiloka mikwavas bigoulumi yakamiy.

6

Gamagal sisiy timsiyas

¹ Gamagal yakamiy, kadiloka kwanawes inmiyas o timmiyas ages, vagan amisinap beibwein.

²⁻³ Wanmugwana Yowbad isek nakaleiwag towen vagan bitaliganes mo bisiwyoubuds; nakaleiwag mamagina:

“Kuvnas tamam inam, mo bukusesus bwein,
mukwasis biveiyov ven watinow waseg.”

⁴ Tawaw yakamiy, awoum kuyamwages nitimiwas, tage kuyadumwalus, kwatimlakes daGuyaws ansinap o nakaleiwag.

Kuvnases mituwaveks

⁵⁻⁷ Tawtotets yakamiy, kwanawes mituwaveks ages ven watinow waseg, kugoulus beibwein. Awoum bisisiyuw ninoumiy; tage bukuvnases tasiyas, mawan nukuvnases

Kelis. Kukin gog nag, adok bukuwotets wamatan mitovek, tage kukin binoun mo bibgumat woumiy. Tage yakamiy kadiloka bukutoukums mituwaveks siwotet waseg, peinan Kelis natouwat yakamiy, kutames atemiy silmanin Yowbad nakaleiwag. Mapuna kutams mituwaveks siwotet waseg; biseiw nuwamiy, mo bukuvages beibwein; peinan mamagina daGuyaws nawotet tonen.

⁸ Kadiloka bukukwakins daGuyaws bisekeimiy maysamiy, miwotet bwanabwein silmanin, takinew touwat yak o takinew tamwey yak.

⁹ O magat situwəvek yakamiy, yakamiy-vak kuvages amisinap beibwein; awoum kukwānans, kulinuways mitovek anmwānet nises walbalab, nakaleiwag katanoka ivkek wasigeis tasiyas mitouwat o wasigeis yakamiy. Bo bikaliwageimiy mawana tasiyas.

Naviy wuliyougwan silmanin Yowbad nawotet

¹⁰ Livan babaw bo ayakous, kweitan nises mamagina, simiy daGuyaws bukumlavags tatawtoun yakamiy, peinan mtown natawtoun singay-wan.

¹¹ Naviy youdanen Yowbad bisekeimiy, kukwawes mo bukutakayways Seitan ansinap waseg.

¹² Yākids nag bitakanaviys wasigeis gamag, nag; tage takanaviys wasigeis bwagaw tasiyas mamagina baloum o yeiluw, takaleiwags tasiyas tadaub, mamagina anelos kalbaleb tasiyas.

¹³ Kadiloka bukukwawes naviy youdanen meivek-wan Yowbad nisekeimiy, igaw tut kalbaleb waseg bukutawtouns ee... mo bukutakayways.

¹⁴⁻¹⁵ Kadiloka bukutamanaws, amiwat yagan sinap mounid; sinap didumwal kuvaligaves wavtikoumiy; misandol mamagina līvānen Kelis, niwal silmanin; beisiw wanuwamiy livan towen.

¹⁶ Bukukimgwayes mikawlawal bisilbwed woumiy, towen yagan simounid Yeisuw waseg, vāgan mtown takalbaleb nakayal bukuyoubwis meivek-wan.

¹⁷ Amitanugweib naviy silmanin, yagan katuneib; Yowbad Kululuwan napulut kukwawes yagan Yowbad anilivan.

¹⁸ Yowbad Kululuwan bilabeimiy mo bukunitougs tuta babaw. Nitoug silmanin kadiloka bukutoukums, kuvvaluts, kugilagels vāgan Yowbad bilabes tayakelesiys babaw.

¹⁹⁻²⁰ E, kunitougs peinag yey, vāgan Yowbad bisekeig sinap, bakapwapout baggeiguy wasigeis gamag, vāgan bikakins līvānen Kelis bwanabwein, to nikamtel wasigeis yākids. Livan towen nakakokew, silawun to niyousigs nisenags wādeil, tage ikadiloka bakapwapout livan towen waseg.

Kalin nuwag yakamiy

²¹⁻²² Bo akayeb bwadads Tikikos neiw, vāgan bisekeimiy līvāneig gunakasis waseg, o gunawotet līvānen, youda babaw mo bikamtel wasigeis yakamiy. Taw towen bwadads bwanabwein, daGuyaws inawotet waseg itakum; līvnem yakamey bisekeimiy vāgan bikimtuweimiy mo bukutawtouns.

²³ Tamads Yowbad son daGuyaws Yeisuw Kelis bisiwyoubumi, budimayas yakamiy, vāgan bukusimounids beibwein mo beitaw nuwamiy.

²⁴ Kalisiy yakamiy nag bukutineilos daGuyaws Yeisuw Kelis waseg, Yowbad bo bisiwyoubumi, beibwein.

PILIPAY

Kweiboug Pawl igeiguy ven Pilipay, Lidiy inaven. Ikalin nuwan tayakelesiys ven towen Pilipay. Wankuyeim simuloul iwyabes inek Pawl, ikalin nuwan peinan sisiwayoub; silet waseg ilelel mawan. Idibakes-vak awoum bikamliwes sisiyas, tage ninous bilatans, katanok-wan, mawan Yeisuw Kelis nanon.

Nakabsilamaw

¹⁻² Kalin nuwag yakamiy, min-Pilipay yakamiy tayakelesiys Yeisuw Kelis waseg, simiyas mituwäveks o mitulals. Milet neiw kukines. Yey Pawl soug Timotiy, Yeisuw Kelis natouwat yakamey. DaGuyaws Yeisuw Kelis son Tamads Yowbad bisiwyoubumiy vagan beitaw nuwamiy.

Pawl initoug pines tasiyas

³ Aninuweimiy amisinap bwanabwein, mapuna ikalin nuwag Yowbad waseg.

⁴⁻⁵ Tut babaw nanoug ibwein wasigeis yakamiy, mapuna aninitoug pinamiy yakamiy; peinan nukulabeigs Yeisuw nawotet waseg, tut wanmugwana mawan ee... nagein gog bo mawan.

⁶ Akakin-wan Yowbad biyakous amisinap bwanabwein, peinan bo isilamaw nawotet towen. Igaw mo biyakous, tutan Yeisuw Kelis beiyum beim.

⁷ Bweina baninuweimiy amibabaw, peinan akalpwäkit wasigeis yakamiy. Peinan nukulabeigs wadeil nases, o nitageiguis livanen Yeisuw, o gamag babaw niliganes, peinan Yowbad nisiwyoubuds.

⁸ Yowbad ikakin, singay ikalin nuwag wasigeis yakamiy, Yeisuw Kelis nasiwayoub waseg.

⁹⁻¹⁰ Gunakanitoug mawana silmanin bukusiwayoubs beibwein, o bikamnat ninoumiy vagan bukukwakins sinap bwanabwein. Igaw tutan Kelis beiyum beim mo beivag amisinap kamnat didumwal.

¹¹ E, Yeisuw Kelis bikatimweis bibabaw anagin amisinap bwanabwein, mo bitakavasis Yowbad o bitakatubaws Yowbad waseg.

Silawun mwamovag Kelis waseg

¹² Sigwey, sivinag bukukwakins mouvitan Kelis nalivet, tage babaw gamag mo iliganes livanen Kelis, isimounids waseg.

¹³ Mina-Lom tasiyas takannaviy sisiyas touwos ikakins yey ases wadeil, peinan Kelis angamag yey.

¹⁴ O peinan yey wadeil nases, tasiyas tayakelesiys daGuyaws waseg kalamwey babaw bo ikapwapouts, aspwäyat bo ikous, mo illivans livanen Yowbad.

¹⁵⁻¹⁶ Gamag mwasanin dibes imouvit waseg yey mo igeiguis livanen Kelis, tage nag sivines bilabeigs. Mwasanin gog igeiguis siwayoub waseg, ikakins yey ases wadeil peinan aysiyous livanen Kelis; idokes kid bilabeigs.

¹⁷⁻¹⁸ Bwein-wan. Peinan igeiguis livanen Kelis. Mapuna amwåsaw, takinew bigeiguis wudous mav waseg, o takinew bigeiguis son ninous waseg.

¹⁹ Amwåsaw-wan. Akakin-vak kuninitougs peinag yey, kululuwan Yeisuw Kelis mo bilabeig, wankuyeim mo bilikugs.

²⁰ Asimounid peinan anamis Kelis bilabeig vagan nag bagwey; tage mawan kweiboug Kelis nakaleiwag waseg akapwapout, tut babaw bo mawan-wan, vagan gamag bikavasis Kelis, takinew son mwamovag bases, o takinew bakanig.

²¹ Kukin sona mwamovag bases, Kelis waseg yey bisesun-wan, o bamwåsaw. Kukin gog bakanig, banek Kelis, mo singay bamwåsaw.

²²⁻²⁴ Kukin son mwamovag basesun-wan mo beivag anagin gunawotet. Tage nag akakin aveiyag bakamkwini, peinan ked akweiy sivinag-wan. Singay sivinag balisaweimiy banek Kelis; kukin gog basesuna ven watinow mo balabeimiy yakamiy.

²⁵⁻²⁶ Akakin-wan bweina bases wasigeis yakamiy, *vagan bayamweis mitapwäloul bitawtoun, sona mimwåsaw.* Akakin-wan igaw mo baw balakwaneimiy balabeimiy, *vagan gog bikalin nuwamiy, bukuyåkawns Yeisuw Kelis waseg.*

²⁷ Kadiloka Kelis ansinap bibunakeimiy, peinan tanganegs *livånen Kelis yakamiy.* Takinew baw o nag, tage ivag sivinag baligen bulagan amisinap bwanabwein, peinan kwativases ninoumiy imlavag katanok-wan, mo kutawtouns silmanin Kelis natapwäloul bwanabwein.

²⁸ Awoum kuwenes tasiyas tasilbwadeimiy; awoum. Tasiyas bikineimiy ta-ivag amipwayat, mo bikakins Yowbad bo bikatinabweimiy yakamiy, tasiyas gog mo biyagages.

²⁹⁻³⁰ Yowbad bo ikalawageimiy *vagan bukusimounids Kelis waseg, o abamiy-vak bigeg Kelis peinan.* Kweiboug bukukineigs avvatay sinap kalbaleb waseg, mapuna åbag igeg o nagein livåneig nukuliganes mawan; e yakamiy-vak abamiy bigeg peinan kuvvatays sinap kalbaleb waseg.

2

Kelis nag ikaypom sinap

¹⁻² Kelis waseg bweina bitaguyes sidayas *vagan beibwein asisinap, o bitasiwyoubus tasiyas, o bitamsamwas kululuwan waseg, o bikalin nuwads sidayas wasigeis.* Mapuna kadiloka bukulatañes ninoumiy simsímiyas wasigeis, bimlavag katanok-wan, son misiwayoub; kululuwamiy o kateimiy bimlavag katanok-wan. Baligen amisinap mawan, yey singay bamwåsaw.

³ Awoum bukwayapams amisinap; awoum! Awoum bukuyamweneimiy mamagina guyawaw yakamiy, tage kadiloka bukuseibweimiy, bukuñums, simsímiyas wasigeis.

⁴ Awoum bukutawleyes simiyas mo bukuwotets yakamiy miwotet; awoum. Tage bukumtakavates beibwein simiyas.

⁵⁻⁶ Ninoumiy kuvåges mawana Yeisuw Kelis nanon. Mtowen mounid Yowbad tatonen, tage nag ikayus Yowbad nakaleiwag o yakawanan, nag.

⁷⁻⁸ Tage nisew yakawanan tonen wanakaew, ibus imligamag, ikow nawotet mamagina touwat. E, gimilitoun towen, vayuwein mo ibus, peinan itam won kanig waseg, mo ikanig waklos.

⁹⁻¹¹ Mapuna Yowbad bo iyamwen, mo isek yagan towen bimgwayes yeg babaw wasigeis, *vagan gamag babaw yakids mo bitakululs Yeisuw yagan waseg, takinew minlibalab, o takinew ven watinow gimgilis yakids, o takinew mina-Tum, bitakululs bitalivans mamagina, “Yeisuw Kelis guyaw tonen.”* Mapuna gamag babaw mo bitayakawanes Tamads Yowbad.

Ven watinow nakamnat yakids

¹² Sigwey yakamiy, bweina kutåmes ateimiy, mawana Kelis. Peinan tut babaw kukwanawes aygag; o peinan kweiboug sigwey yakamiy nitasesus nukkwanawes aygag, tage tut towen kadiveiyov ases, kadiloka bukutawtouns, son amipwayat bukugouls Yowbad waseg, *vagan bikatinabweimiy, tatanok tatanok yakamiy.*

¹³ Yowbad gog wananouds niwtuwotet mo taninuways aveiyag sivinan mo bitavages mawan.

¹⁴ Igaw bukuwwotets, awoum kubwayouys o kuvtokays livan; awoum.

¹⁵⁻¹⁶ Bweina beivag amisinap kamnat, bwanabwein, Yowbad nitun yakamiy, mamagina wodam yakamiy simiyas tasiyas tadaðubs. Tasiyas gog takalbalebs tage yakamiy amisinap kamnat; *livånen mwamov nises wasigeis yakamiy.* Kukin beivag amisinap kamnat, igaw yam towen Kelis beiyum beim mo bakineimiy bamwåsaw balana, “Anagin gunawotet tasiyas. Nag awotet mav wasigeis tasiyas.”

¹⁷ E, peinan kusimounids o kutoukums Yeisuw waseg, mikawotet mamagina lun bulukwan silmanin Tamads Yowbad. Kukin ye-yakamiy, silmanin Yowbad, mo bikalin nuwag, bitamwåsaws sigwey yakamiy.

¹⁸ O yey, o yakamiy-vak, ikadiloka bitamwasaws babaw yakids.

Timotiy son Epaplodit

¹⁹ Adok daGuyaws Yeisuw bilabeig, kadilakusa mo bakayeb Timotiy beiw, mo bimey bulagamiy, baligen mo bamwasaw.

²⁰⁻²¹ Amateiyun-wan kaninuweimiy yam babaw soug Timotiy, ikalin nuwem yakamiy. Tage babaw gamag sikanuway kweitan-wan, sivines sivavag tatineis biwteles; nag ivag sivines Kelis nawotet.

²² Bo kukwakins Timotiy ansinap bwein; mamagina natug tatoneig nililabeig Yeisuw Kelis nawotet silmanin.

²³ Igaw bakatiluteg kaleiwag silmanig, adok mo bakayeb Timotiy beiw.

²⁴ Yey-vak, adok daGuyaws bilabeig, tut kadilakus waseg mo baw.

²⁵⁻²⁶ Kadiloka bakayeb Epaplodit-vak beiw. Mtowen bwadads, ililabeig vagan bakatamap waseg Seitan, atmapumiy yakamiy bo imtakavateig. Singay sivinan beiw bilakwaneimiy. Igeg nanon peinan nukuliganes bulagan ankatoun, tage nag sivinan bukuliganes.

²⁷ Ankatoun avakaein, kakita bikanig, tage Yowbad inok nuwan mo iyamov; o yey-vak, Yowbad inok nuwan yey; awoum valam kutukut ballouvat.

²⁸ E, singay sivinag bakayeb mtowen beiw, bukukines vayuwein, mo bukumwasaws; o yey-vak bobeitout nanoug.

²⁹⁻³⁰ Igaw beiw kadiloka bukutams waseg amibwabwal mtowen, sona-vak bikalin nuwamiy peinan daGuyaws nagamag towen. Kadiloka kuvnases babaw tasiyas asisinap mawan mtowen Epaplodit. Yakamiy bukulabeigs, nag gog, miked nag. Mtowen gog Epaplodit ililabeig, singay keikay inawotet, waseg kakita bikanig, Kelis inawotet towen.

3

Sinap didumwal

¹ Adok bo misinak livan towen. Sigwey yakamiy, bweina bukumwasaws daGuyaws waseg. Kaleiwag towen bweina balivnow vayuwein, vagan bililabeimiy mo beibwein mikasis.

² Kukkineimiy; tasiyas sivines bibwabwes momwamiy sikawotet kalbaleb, mamagina awuk, gamag tasiyas.

³ Tage Yowbad nakabivatus wakululuwads nises. Awoum bitakaypamwes Ebelam nakabivatus wakaleivids; awoum. Kululuwads bitatam Yowbad waseg, o bitamwasaws-vak daMesays Yeisuw waseg.

⁴ Tage yey, bweina bakaypom sinapun ven watinow, waseg alisawes gamag babaw.

⁵⁻⁶ Yisleil gimgeilin yey, agukum Binyamin, gum-Ibliw mounid yey. Igaw apwaw yey, aguyam kweinim kweitoun mo ibwabwes momwag, mawan Moses nakaleiwag. Tasiyas Palisiy sikaleiwag bo akatkakil waseg. Bo ayakous Moses nakaleiwag. Iseiw nuwag mo ayablebes tasiyas tayakelesiys.

⁷ Kweiboug adoki bilabeig kaleiwag tasiyas, tut gog towen bo apiyev. Kelis waseg atameig.

⁸⁻⁹ Bitakakin daGuyaws Yeisuw Kelis, singay mwasaw nises waseg. Mtowen silmanin bweina biyamkwaneig youda babaw waseg, o bakasigum youda babaw wasigeis, vagan kid baban Kelis, o towen kid bibaneig, o basimounid waseg Kelis mo bisekeig agusinap didumwal. Awoum banuway Moses nakaleiwag vagan bikidumwalug, peinan na-ikadilok. Adsinaps gog didumwal, Yowbad nasiwayoub bo isekeids adsinaps didumwal, peinan tasimounids Kelis waseg.

¹⁰⁻¹¹ Sivinag kid bakakin Kelis sona natawtoun neikit kanig waseg, son-vak namouvit, igaw-vak bigeg  bag yey, mawan towen; vagan gunakanig mawan towen; peinan sivinag batawtoun vagan baki vayuwein.

¹² Yey nag atawtoun, nag. Nag ayakous Kelis ansinap. Igaw. Tage ayyokon silmanin Kelis ansinap bayakous, peinan Kelis bo ikatigikeig silmanin ansinap towen.

¹³⁻¹⁴ Sigwey, yey akakin-wan nag ayakous Kelis ansinap. Igaw. Nag anuw aveiyag bo nein wankuyeim. Ta-ivag nanoug akweiy, tage aninuway agusinap tut wanakougwaw, navvalut silmānin bagut doy. Peinan Yowbad nikatgikeid Yeisuw Kelis waseg silmānin doy-nen libalab.

¹⁵⁻¹⁶ Kalisiy yakamiy bo imatuw amisinap, kadiloka beivag ninoumiy māwan. Kukin gog ninoumiy kweitan, Yowbad mo bikatimlakeimiy vagan bukukwakins sinap towen. Tage kadiloka bitayousis sinap to aveiyag bo takakins.

¹⁷ Sigwey yakamiy, kadiloka bukutakayasis agusinap māwana yey. Kukwakins asisinap tasiyas māwana yey, mo bukutakayasis māwan.

¹⁸ Tage kalamwey babaw gamag asisinap kweitan. Tut babaw bo adibakeimiy; nagein gog mo awgavaw livan towen, sona gunavalām; peinan tasiyas ikamliwes livānen Kelis, o anklos livānen.

¹⁹ Sikabiyokous tut waseg, Yowbad biyagages tasiyas, peinan siyowbad tatineis mamagina asvikeiy; singay sivines sinap kalbaleb, ven watinow sinapun.

²⁰ Tage yakids davanuys walbalab; o takaymates gog towen takatinabweids beinoy walbalab beim, mtownen daGuyaws Yeisuw Kelis.

²¹ Tut towen wouds anmwasin ivag; igaw mtownen takatinabweids beim, natawtoun waseg mo bikatlow wouds mamagina won tatonen, singaya kamnat. Peinan natawtoun nises vagan bikaluweg youda babaw wasigeis.

4

¹ O budag, singay ikalin nuwag wasigeis yakamiy. Yakamiy mamagina anagin gunawotet yakamiy. Amwasaw wasigeis yakamiy. Kadiloka kuliganes agulivan towen mo bukutagagays peinan daGuyaws simiy.

Geiguy

² Vinay yakamiy Iwodiy soum Sintik baguyeimiy vagan bukumwas, ninoumiy bukulantes, bimlavag katanok, māwana daGuyaws nanon.

³ O taw yakoum, soug yak dawotet katanok-wan, mapuna adibakeim, alana, “Kadiloka kulabes vinay tasiyas, peinan sigwey tasiyas nakatawtoun Yeisuw nawotet waseg, simayas Kelemen siney tasiyas babaw nilabeigs wotet towen waseg; yiges bo ilel Kelis wanabuk, mwamoves silmānin.”

⁴ Tut babaw bukumwasaws daGuyaws waseg. Vayuwein alana, “Bweina kumwāsaws.”

⁵ Kadiloka gamag babaw bikakins amisinap mamānum, peinan daGuyaws nuwanaw bo beim.

⁶ Awoum kweitan sinap waseg bikubukub nuwamiy; awoum. Tage igaw youd kweitan kweitan bukulivatus bweina bukukululs bukunitougs; minitoug bukusekes Yowbad sona bikalin nuwamiy.

⁷ Yowbad bisiwyoubumi mo beitaw nuwamiy, mamagina niwal waseg bukusesus, kamtabwein seikwan; ninoumiy bwein, peinan Yeisuw Kelis bimtakavateimiy.

⁸⁻⁹ Adok bo misinak agulivan towen, sigwey; kadiloka kuninuways sinap mounid, o sinap didumwal, o sinap bwanabwein, o sinap kamnat, o aveiyag gamag sivines, o bikavasis, o bikatubaws waseg. Agusinap towen bo akatipel asekeimiy, o nukuliganes, o nukukwakins gunakawotet māwan; kadiloka bukuvāges amisinap māwana nadibakeimiy. Yowbad simiy yakamiy bukusesus bwein, mo beitaw nuwamiy.

Min-Pilipay sisiwyoub waseg Pawl

¹⁰ Singay ikalin nuwag daGuyaws waseg, peinan vayuwein nukusiyoubugs. Kwei-boug ivag sivinamiy bukusiyoubugs, tage miked nag.

¹¹⁻¹² Nag alivan māwan peinan sivinag youd mwasanin, nag. Bo akakin sinap vāgan beitaw nuwag gunakabsis katanok katanok wasigeis. Takinew əbag bigeg, bwein-wan. Takinew beibwein əbag, bwein-wan. Takinew bamlavag toul yey, bwein-wan. Takinew bamliguyaw, bwein-wan. Takinew beivag agumoun, bwein-wan. Takinew əkam bakamuweip, bwein-wan.

¹³ Yowbad soug ikimtuweig atawtoun mo ikadilokeig sinap babaw wasigeis.

¹⁴ Tage adok singaya tasiwayoub yakamiy, akakina peinan əbag igege, mo kulabeigs.

¹⁵ Min-Pilipay yakamiy, kukwakinsa kweiboug, nakabsilamaw Yeisuw nawotet waseg, manoy nam Masidoni, tayakelesiys yakamiy mo nitakaveiyons sigwey yakamiy, muloul silmanin. Nag kweitan ven tayakelesiys ivages mawan; nag. Misinaka yakamiy.

¹⁶ Igaw kweiboug nases Tesalonik mo nukumulouls waseg ye. Sivtanok ikous, mo sivyuein mimuloul nukuwyabes neim.

¹⁷ Nag alivan vagan mivavag bukusekeig; nag. Sivinag kid misiwayoub bikatimweis bivakaein; anagin bwanabwein mo bukubanes.

¹⁸ Mimuloul waseg ye yekusekes Epaplodit nimay, meiveka bo aban. Bo ikatimweis gunwuliyoug ibabaw, mo singay amwəsaw. Mimuloul waseg ye mamagina lun bulukwan, Yowbad iskwen manisin, simasim seikwan, mo ikalin nuwan wasigeis yakamiy.

¹⁹ GunaYowbad mo bisiwyoubumi aveiyag sivinamiy, Yeisuw Kelis waseg, peinan Yowbad Guyaw tatonen, natawtoun igegeyous.

²⁰ Mapuna bitakavasis Tamads Yowbad, tut nag beikous. Eimen.

Nakabiyokous

²¹ Amalivan siwayoub kusekes tasiyas tayakelesiys tatanok tatanok, peinan Yeisuw Kelis angamag tasiyas. Budidayas tasiyasa sigwayas nakases asilivan siwayoub-vak wasigeis yakamiy.

²² Tasiyas tayakelesiys babaw asilivan mawan; o mwasanin-vak Sisal nagamag singaya asilivan mawan; ilansa, “Kalin nuwem yakamiy.”

²³ DaGuyaws Yeisuw Kelis bisiwyoubumi, vagan kid kululuwamiy bitawtoun. Yey Pawl.

KOLOS

Takatimlakays mwasanin iyyaweids, ikatimlakes tayekelesiys ven Kolos waseg, ilansa, “Yeisuw Kelis anmwānet nag kadilok bikatinabweids adsinaps kalbaleb waseg.” Ilivansvak, “Yeisuw Kelis natawtoun kalamwey, nag tatawtoun tatonen.”

Pawl iligen siyaweid, mapuna ilel min-Kolos silet towen, ilana, “Kelis Yowbad natun, anmwānet tatawtoun mtownen, bweina kadilok youd babaw.”

Nakabsilamaw

¹⁻² Yey Pawl, peinan Yowbad nisekeig gunawotet, akokew livanen Yeisuw Kelis banow ven mwasanin wasigeis. Soug Timotiy milet towen nakalel biwekeimiy min-Kolos yakamiy tayekelesiys, o tatoukums yakamiy waseg Kelis. Tamads Yowbad bisiwyoubumi vagan mo beitaw nuwamiy.

Pawl ikalin nuwan pines tasiyas

³⁻⁶ Yakamey wamapalatan nakases, tut babaw kannitoug pinamiy yakamiy, ikalin nuwem peinan nakaligen nukutoukums bwein waseg Yeisuw Kelis, o nukusiwayouubs bwein wasigeis tasiyas tayekelesiys. E, kuyousis sinap towen, peinan kuninuwes minamis igaw mimwāsaw walbālab mo bukulivatus. Mapuna yakamey kanitoug pinamiy, waseg Yowbad, mtownen daGuyaws Yeisuw Kelis Taman.

Libālab bulagan kweiboug nukuliganes, livan to mounid, bwanabwein. Vena babaw iliganes livan towen, anagin ivag wasigeis, ikatimweis mo ivakaein; o yakamiy-vak māwan. Wanmugwana nukuliganes livan towen, mo kukwakins Yowbad nasiwayoub mounid.

⁷ Kweiboug Epapil nikatimlakeimiy sinap towen, simey towen mawotet katanok-wan. Mtownen gamag bwanabwein, itakum Kelis nawotet peinads yakids.

⁸ Townen Epapil idibakem, ilana, “Yowbad Kululuwan ansinap siwayoub ikatipel wasigeis tasiyas min-Kolos.”

Kelis nawotet

⁹⁻¹⁰ E, nakaligen livneimiy towen, mapuna tut babaw kakkulul wamatān Yowbad, kannitoug pinamiy yakamiy vāgan Yowbad nanon silmānin yakamiy bukukwakins beikous, o Kululuwan bikatipel sinap towen bisekeimiy; o vāgan amisinap waseg mo bitimek daGuyaws, o bikalin nuwan wasigeis yakamiy, peinan bukutoukums silmānin miwotet babaw bwanabwein, o bukuyakousis sinapun Yowbad.

¹¹⁻¹² Kannitoug pinamiy yakamiy vāgan Yowbad bikimtuw mitawtoun waseg natawtoun tonen singay avakaein, vāgan kid youd babaw waseg abamiy bigeg mo bukwaptuleimiy o bukuvaluts miwotet bwein sona mimwāsaw. Bikalin nuwamiy Tamads waseg, peinan bo itam inakaleiwag kamnat, waseg nitasesus sidayas inagamag.

¹³ Bo ikatinabweids dadub kaleiwag-nen waseg, mo isekeids dakabsis wanuwan nakalewag Natun bwanabwein.

¹⁴ Mtownen Yeisuw niyamiyiseids, vāgan bilikuds adsinaps kalbaleb waseg.

¹⁵ Nag teitan gamag bikin magin Yowbad, tage ankakin Yeisuw māwana Taman. Yowbad nabubun meivek-wan daban Yeisuw.

¹⁶ Yeisuw gog ileb Yowbad mo nibun youda babaw, walbālab watinow; youd mwasanin takines, mwasanin nag. O Yeisuw waseg mo ibun kaleiwag babaw, mwasanin kaleiwag-nen libālab, mwasanin kaleiwag-nen ven watinow. Bo ileb Taman mo ibun youd babaw silmānin Yeisuw.

¹⁷ Yeisuw imug; youd babaw wankuyeim; o Yeisuw natawtoun waseg youd babaw nisesus sikabsis waseg.

¹⁸ Mtownen daban, woun waseg, mamagina tayekelesiys tanuwagan towen. Mtownen tamgwayein-kit, iginikit kanig waseg; mapuna youd babaw waseg tamgwayein mtownen.

¹⁹⁻²⁰ Peinan Yowbad itam nakamnat meivek-wan isesuna Natun waseg, o Natun waseg mo ivag ked towen silمانin youd babaw o gamag babaw bitalataxes sods Yowbad, takinew yakids ven watinow o takinew tasiyas min-libالاب. Buyاvin iwtawout waklos mo ivag ked towen.

²¹ O peinan kweiboug yakamiy mamagina takammeiliws yakamiy nukusinaleس Yowbad, amisinap kalbaleb.

²² Nagein gog nukulataxes simiy Yowbad, peinan neiweiys Natun, won ikanig; tage bo itokeimiy imayeimiy wamatani Yowbad, amisinap kalbaleb bo ikous. Sivinan bivag amisinap beibwein, kamnat.

²³ Kadiloka bukutoukums mitawtoun waseg, vagan bukusesus bwein wamatani Yowbad. Awoum bukupiyaves livan towen bwanabwein nukuliganes; kadiloka bukunmises. Livan towen kallivan vena babaw wadaban pwepway. Yey Pawl gunawotet towen.

Pawl nawotet wasigeis tayekelesiys

²⁴ Nagein gog abag igeg pinamiy yakamiy; nag igeg nanoug, nag. Ikalin nuwag peinan wouг waseg alivet moumouvit, vagan Kelis won baleb. Kweiboug moumouvit nilivet Kelis, silمانin won; o won Kelis mamagina tayekelesiys yakids. Yey-vak mawan, alivet moumouvit pinamiy; mamagina akatimweis Kelis namouvit vagan kid mo bikadilok.

²⁵ Peinan Yowbad bo isekeig gunawotet vagan bakatimlakay wasigeis yakamiy mo bukukwakins anilivan vagan bukuyakousis.

²⁶⁻²⁷ Livan towen kweiboug nikawum-wan. Tammwayas pwامug nag ikakins; tage nagein Yowbad mo ikamtel angamag wasigeis, peinan sivinan tobwag ven gimgilis yakamiy o min-Yudiy yakamey, babaw yakids bitakakins sinkاwum sinap singay tawtoun. Sinap towen mamagina Kelis bo isap wasigeis yakamiy, mapuna bitanmises igaw ابادس mo beibwein Yowbad naven waseg.

²⁸ Livanen Kelis kageiguy gamag babaw wasigeis; sinap babaw kakatimlakes gamags vagan mo biyakousis Kelis ansinap bwanabwein.

²⁹ Bo iseiw nuwag silمانin wotet towen, atawtoun, peinan Kelis waseg yey itawtoun, iwwotet wananoغ.

2

¹ Sivinag bukukwakins gunawotet tawtoun pinamiy yakamiy, simiyas min-Leyodisiy sisiyas tasiyas na-ikakins magig yey ven watinow waseg.

²⁻³ Sivinag bikimtuw kululuwamiy, vagan bukusiwyoubus simsimsiyas, o bukukwakins beibwein sinap babaw, son sinap nikawum-wan. Sinap towen livانen Kelis, peinan sinap tawtoun meivek-wan nises Kelis waseg.

⁴ Adibakeimiy livan towen bo bakatiboug nuwamiy; awoum ge gamag mwasanin bikatidavimiy; awoum asilivan kamnag bukuliganes o binek ninoumiy; awoum.

⁵ Kadiveiyov ases, tage nuwaneimiy waseg yey nises. Amواسaw peinan akakin kusesusa bwein, o peinan kutams bwein Kelis nakaleiwag waseg.

Tasesus bwein Kelis waseg

⁶⁻⁷ Peinan nukutams waseg daGuyaws Yeisuw Kelis, kadiloka simiy Kelis bukunounas. Nukusilamaws Kelis waseg, o towen Kelis bikatimweisimiy mo bukutawtouns. Kadiloka bukusimounids bwein livانen Kelis to nukuliganes mo bikalin nuwamiy singay.

⁸⁻⁹ Kumtakivateimiy. Awoum teitan gamag bikatidavimiy nakatimlakay kweitan waseg. Gamag mwasanin sikatimlakay yaweid-wan mawan tammwayas asisinap. Sinap towen meinoy neim siGeileiw waseg, Kelis nag. Tage Kelis won waseg sinapun Yowbad meivek-wan nises.

¹⁰ Kelis waseg singay sinap bwanabwein bo talivatus, peinan anelos o bwagaw situwaveks wasigeis bo itakayway.

¹¹ Kelis waseg nibwabwes momwamiy; nakabivatus nag ivag wakalivimiy, nag. Tage nakabivatus waninoumiy, mamagina ibob woun nakaleiwag wasigeis yakamiy.

¹² Nakabaptayseimiy mamagina nukukwanigs simiy Kelis, nukubus alawagamiy, mo nukukits vayuwein simiy Kelis, peinan kusimounids waseg Yowbad, peinan nitawtoun mo iyakit Kelis vayuwein.

¹³⁻¹⁵ O yakamiy, kweiboug mamagina takanigs yakamiy, peinan amisinap kalbaleb, o Kelis nag ivag nakabivatus wasigeis yakamiy; Yowbad mo iyamoveids sods Kelis, inumlev adsinaps kalbaleb; o livan waseg niyateleids peinan nitasiplaves Yowbad nakaleiwag, mo iwid livan towen, isew tanaban, ikatikavates Kelis anklos waseg. Yowbad bo itakayway wasigeis tasiyas Seitan siney bwagaw sikaleiwag, mo imwan won, imwasaw; tasiyas gog wamnat ivag asimwasin. Peinan Kelis anklos waseg itawtoun wasigeis tasiyas.

¹⁶ Awoum teitan gamag bivtokeimiy livan, peinan kaeimiy o amisoup, o aw-sagal bukupiyev, takinew tibukon kweivaw o takinew S̄abat kweitan; awoum.

¹⁷ Min-Yudiy makaleiwag towen mamagina kululuwan mav. Kweiboug nitakines kaleiwag makava kululuwan; nagein gog kaleiwag tonen anagin bo isap, mtowen Mesay Kelis.

¹⁸⁻¹⁹ Awoum teitan gamag bipiyaveimiy peinan nag kukululs avakaein wamtes min-libalab mwasanin. Town adok bilivan, bilana, “Matag isisawl mav, amikon waseg mo asinap mawan.” Tage nanon waseg ikayapam mav sinapun ven watinow, tage nag iyous dabon tonen, yagan Kelis. Woun antuvas meivek-wan ikatives imlavag woun katanok, tage dabon bikaleiwag mo bikidumwal won babaw; bivakoum mo bikatimweis won, bivakaein, bitawtoun, Yowbad natawtoun waseg.

Mwamovads kweivaw Kelis waseg

²⁰⁻²² Peinan bo takanigs sods Kelis, Geileiw sikaleiwag mo beikous wasigeis yakids. Aveiyag wawun nukuvvaluts ven watinow kaleiwag-nen? Gamag mwasanin sikaleiwag kuliganes, ilansa, “Awoum kuyousis youd towen; bwaboum. Awoum kwamkwén kan towen; bwaboum. Awoum kwabkwén youd towen; bwaboum.” Youd tasiyas nagein bo takines, siwotet nises; tage kweitan tut bo bikanig kawkawan.

²³ Gamag tasiyas askakin mamagina tassinaps, peinan ivkakes sitapwäloul tatineis, imlavags mamagina tasimavs wamtes min-libalab, ikatkakils, idokes bikaliwages wous tatineis; tage vikeiy bo ikaliwages tasiyas.

3

¹ Kanig waseg nukukits simiy Kelis, kadiloka kuneves libalab sinapun, peinan Kelis nissin walbalab, Yowbad wanakatay.

² Kuninuways libalab youdanen; youdanen ven watinow awoum.

³ Nitakanigs gog, mwamovads son Kelis nises, nikawum nises waseg Yowbad.

⁴ Igaw Kelis bisap vayuwein, mtowen mwamovads mounid, simiy Kelis mo bukusaps yakamiy, nakamnat avakaein waseg.

⁵ Kwatimates kid youdanen ven watinow, subwan, kalokay. Awoum amivikeiy bikalawageimiy silmanin sinap kalbaleb. Awoum kumtimwamons waseg wuliyougwan ven watinow, mamagina miyowbad tobwag bukuvages wadaban pwepway; awoum.

⁶ Peinan gamag mwasanin asisinap mawan, Yowbad mo bikawkunes bimapus.

⁷ Kweiboug yakamiy amisinap mawan, mamagina ven watinow gimgilis yakamiy.

⁸ Nagein kadiloka kupiyaves sinap tasiyas, kavikun, kameiliw, yagay, vtokay livan, kalokay.

⁹⁻¹⁰ Awoum kwaitidavis simiyas; peinan nukulisawes sinap kweiboug; sinap kweivaw bo kuklawes, peinan tut babaw Yowbad ikatimweis amisinap, sinapun tonen waseg, vagan bukuyakousis sinapun Yowbad.

¹¹ Nagein gog Kelis waseg yakids, katanoka bod yakids, takinew mina-Gilis o min-Yudiy, tasiyas ibwabwes momwes o tasiyas nag ibwabwes momwes, o tasiyas tablabols, o min-koyakoy, o tasiyas tawtotets o tasiyas situwaveks, meiveka yakids katanoka bod, Kelis waseg, peinan daGuyaws towen anmwænet wanuwads nises.

¹² Peinan Yowbad nikatigikeimiy, nikayuseimiy, o ikalin nuwan wasigeis yakamiy, kadiloka bukuyousis sinap bwein, binok nuwamiy simiyas wasigeis, bukusiwayoubs, awoum kwayapams sinap waseg, bweina bukuvn̄as simiyas, o kukwaptuleimiy.

¹³ Kal yak, kokin soum biyagageim, awoum bikapasal nuwam; bweina bukunumlev ansinap kalbaleb; peinan bo m̄awan adsinaps kalbaleb daGuyaws binumlev.

¹⁴ Amsinap babaw son siwayoub; siwayoub bikatimweis sinap babaw mo bilaten.

¹⁵ Yowbad nikatigikeimiy vagan Kelis lubuluban waseg mo niwal bukulivatus. Inabod yakids nikatigikeids silmanin niwal towen. Bweina bitasiws lubuluban waseg, mo bikalin nuwads.

¹⁶ Tut babaw, livānen Kelis bises waninoumiy, vagan bukusinaps beibwein. Sinap babaw kwatimlakes simiyas, vagan bidumwal asisinap. Bikalin nuwamiy Yowbad mo bukwanweles sam o wous tapwāloul, o kweivaw wous-vak bukuwutus, peinan Kululuwan bikatimlakeimiy.

¹⁷ Aveiyag bukulivānes o aveiyag bukuwwteles, youd katanok katanok kuvvages daGuyaws Yeisuw yagan waseg, mo bikalin nuwamiy Tamads Yowbad waseg.

Sinap bwanabwein

¹⁸ Vinay yakamiy kukwanawes mimwānas ages. Sinap towen singaya bo ibunek daGuyaws waseg.

¹⁹ Tawaw yakamiy kusiwyoubus mikwavas; awoum kukwānes.

²⁰ Gamagal yakamiy, kadiloka bukwanawes timmiyas o inmiyas ages, youd katanok katanok waseg. DaGuyaws sivinan amisinap m̄awan.

²¹ Tawaw awoum kuyamamanis nitimiya, mamagina bo bikawegweis wous.

²² Tawwotet yakamiy kadiloka bukwanawes ages mituwāveks nisesus ven watinow, sikaleiwag katanok katanok waseg. Kadiloka bukugoulus daGuyaws, mo bukutoukums silmanin mituwāveks siwotet. Kukin gog nag, adok bukuwotets wamatān mitovek, tage kukin binoun mo bibgumat woumiy.

²³ Bweina biseiw nuwamiy silmanin miwotet, aveiyag bukuwteles; kwanawes ages mituwāveks, mamagina ayan daGuyaws bukwanawes.

²⁴ Peinan yakamiy daGuyaws natawwotet yakamiy, kuninuwes maysamiy igaw wankuyeim mo bisekeimiy vagan bukusesus bwein bukusigas.

²⁵ Yowbad igaw mo bimop takalbalebs asisinap; nakaleiwag teitan teitan wasigeis katanoka binuwek.

4

¹ Guyawaw yakamiy, kadiloka kumtakavates mitawwotet beibwein, tatanok tatanok wasigeis, mikaleiwag didumwal bukuvages peinan yakamiy mitovek walbalab nises.

² Tatanok tatanok yakamiy kadiloka bukutoukums nitoug, tuta babaw bukuninitougs Yowbad waseg. Nanoum katanok waseg bukunitoug, bikalin nuwam waseg Yowbad.

³ Kunitougs-vak pinem yakamey vagan Yowbad bikaliyow maked silmanin anilivan bwanabwein bakageiguy waseg. Livānen Kelis kweiboug gamag na-ikkins, nagein gog mo ikannat, ageiguy; mapuna niyousigs nisenags wādeil.

⁴ Kunitougs Yowbad waseg bilabeig vagan bageiguy livānen Kelis kamnat waseg. Kadiloka bageiguy m̄awan.

⁵ Kadiloka kuvages amisinap beibwein simiyas tasiyas watoulan nisesus. Awoum kuymādes mitut.

⁶ Amilivan tut babaw son siwayoub, sabal; bukwatimapus bwein teitan teitan asilivan.

Nakabiyokous

⁷ Bwadads bwanabwein Tukik singay tatoukum daGuyaws nawotet waseg. Igaw beiw mo bikamtel livāneig meivek-wan.

⁸ Silmanin towen nakayeb niwekeimiy, bilivan wasigeis yakamiy, bukuliganes mo bukukwakins am̄awan makasis yakamey. Silmanin-vak biguyeimiy bikimtuw ateimiy.

⁹ Tukik son Onesim-vak biweis. Teitan miven gimgeilin mtowen Onesim, mamagina bwadag bwanabwein, tatoukum. Asteiy son Tukik bisekeimiy livnem wamapalatan towen.

¹⁰ Alistak yeys soug nakases wədeil, anilivan siwayoub wasigeis yakamiy; mawan-vak Banab nubein, yagan Mak, anilivan siwayoub wasigeis yakamiy. Kweiboug nadibakeimiy, kokin mtowen beiw kadiloka kutams bises amibwabwal towen.

¹¹ Yeisuw-vak anilivan siwayoub wasigeis yakamiy, mtowen idokes yagan kweitan Yusitos, gum-Yudiy teitan. Min-Yudiy tasiyas asteitoun sigwey nakawotet Yowbad nakaleiwag silmanin. Min-Yudiy yakamey misinaka amateivas. Singay gog ililabeigs tasiyas.

¹² Tayuwein miven gimgeilin simey nakases, yagan Epapil, anilivan siwayoub wasigeis yakamiy. Mtowen Kelis natouwat; singay ininitoug pinamiy yakamiy, vagan bukutatuws son amisinap bwanabwein, o bukuyakousis Yowbad nanon silmanin yakamiy.

¹³ Akakin-wan mtowen Epapil inawotet singay avakaein pinamiy yakamiy, o pines tasiyas min-Leyodisiy, o pines tasiyas min-Ayelapol.

¹⁴ Luk son Dimas asilivan siwayoub wasigeis yakamiy. Mtowen Luk madoket bwanabwein.

¹⁵ Agulivan siwayoub kusekes tasiyas tayekelesiys ven Leyodisiy; mawan-vak manawen Nimip siney tayekelesiys wanbunatum nisesus.

¹⁶ Kuvinis milet towen beikous, mo kusekes tasiyas tayekelesiys ven Leyodisiy. Tasiyas vak mo bivinis tapwəloul waseg; o yakamiy-vak kuvinis silet nalel nein silmanin tasiyas.

¹⁷ Kudibakes Alikip, kulansa, “DaGuyaws nawotet nisekeim, kadiloka bukutoukum waseg, kuyakous.”

¹⁸ Namag mulin towen yagag Pawl. Kuninuweigs yeys wədeil nases. Yowbad bisiwyoubumi.

1 TESALONIK

Kweiboug Pawl it̄avin, in Tesalonik, ikatimlakes sinapun Kelis, mo ilisawes, inoun. Wankuyeim gog mo ikayeb Timotiy, bein biguyes; ikous, mo iyum inek Pawl, ilana, “Min-Tesalonik isimounids bwein, issiwayoubs.” Mapuna Pawl ikalin nuwan, ilel silet towen, waseg ikatimlakes o iguyes silmānin Yeisuw inaked.

Nakabsilamaw

¹ Yey Pawl sigwey Saylos son Timotiy, malet niwekeimiy min-Tesalonik yakamiy nukuyekelesiys Tamads Yowbad waseg, o daGuyaws Yeisuw Kelis waseg. Yowbad bo bisiwyoubumi, mo beitaw nuwamiy.

Min-Tesalonik asisinap bwanabwein

²⁻³ Tut babaw ikalin nuwem daGuyaws waseg, peinan amisinap bwanabwein. Kaninitoung daGuyaws Yowbad waseg, kaninuweimiy, kakavvataq yigamiy, peinan nukusimounids Yeisuw waseg, o miwotet waseg sona siwayoub, o kunmises vagan daGuyaws Yeisuw Kelis bikatinabweimiy. E, amisinap mawan bwanabwein, Tamads Yowbad wamatān.

⁴ E sigwey, kakakin-wan Yowbad bo isiwyoobumi mapuna mo ikatigikeimiy angamag yakamiy.

⁵ Kweiboug nukuliganes amalivan bwanabwein peinan nakatimlakeimiy livānen Yeisuw. Nag kukwatalutegs mav, nag. Tage Kululuwan Yowbad waseg livan towen, mapuna itawtoun wasigeis yakamiy, o yakamey singay kasimounid waseg. O nukukines amasinap igaw simayas yakamiy nitasesus, mo nukutakayasis.

⁶ Abamiy singaya kalbaleb, tage Kululuwan Yowbad nilabeimiy mo kumwāsaws, nukutakayasis amasinap yakamey, mawan daGuyaws bo kutakayasis, peinan anilivan bo kutimakes.

⁷ Amisinap bwanabwein, mamagina sikabtakayas yakamiy, tasiyas tayekelesiys ven Masidoniw waseg, o ven Akay waseg.

⁸ E, nukusimounids Yowbad waseg, bulagan amisinap bwanabwein mo inekes ven babaw gimgilis, mo iliganes livānen daGuyaws Yeisuw, tasiyas min-Masidoniw sisiyas min-Akay. Mapuna nag ivag sivinem bakalivan bulagan misimounid, peinan bo ikakins nanawan.

⁹⁻¹⁰ Tasiyas gog livneimiy isekemas yakamey, peinan kweiboug nakasap wasigeis yakamiy mo nukuliganes agem, nukupiyaves tobwag yowbad, o nukutams Yowbad mounid waseg, vagan Tamwamov Town kukwanawes aygan, o bukukwayamats Natun tonen igaw beinoy walbalab beim. Mtown Yeisuw, igaw kanig waseg Yowbad niyakit, mo itamanaw vayuwein vagan kid bikatinabweids. Awoum igaw Yowbad bikamtānid adsinaps kalbaleb silmānin.

Pawl nawotet ven Tesalonik waseg

¹ Sigwey, kulinuways kweiboug nag kawekeimiy mav, peinan anagin mawotet nakanban wasigeis yakamiy.

² Deisin-wan min-Pilipay bo iyagagemas, amamwasin, tage nag kagwey; kakapwapoutwan. DaGuyaws bo ilabem mo kadibakeimiy livānen Yowbad, vagan bukumwāsaws kid. Deisin-wan gamag mwasanin isibwademas, tage bo kageiguy.

³ Mageiguy waseg nag kayaweid; nag sinapun geinawl, nag. Amalivan waseg nag bakatidaveimiy, nag.

⁴ Tage peinan Yowbad itam nanon, idoki kadiloka bisekem livānen bwanabwein, mapuna kageiguy. Nag vagan gamag bikalin nuwes; nag. Tage sivinem Yowbad bikalin nuwan. Peinan Yowbad ikakin aveiyag wanuwads nises.

⁵ Kuninuways amalivan; nag kateiy ninoumiy amalivan kamnag waseg; nag. Nag tayyaweid yakamey; nag. Nag amalivan kamnag *vagan* bakakwey mivavag; nag. Yowbad ikakin amalivan mounid.

⁶⁻⁷ Nag ivag sivinem gamag bikavasimas; nag. Takinew yakamiy, o ven mwasanin gimgilis; nag. Tage bweina bakalivan aveiyag bukusekemas, peinan takaweins *livanen* Kelis yakamey. Nag gog, yakamey *tammānum* wasigeis yakamiy. Amasinap *mawanana* vin nañan bituyes nitun, o bivnases beibwein.

⁸ E, nakakalpw^akit wasigeis yakamiy; sivinem kid *livanen* Yowbad bakasekeimiy mo bitamsamwas simayas yakamiy, peinan singay sivinem yakamiy. Atem meivak-wan nakatam pinamiy yakamiy.

⁹ Sigwey, kuninuways kweiboug mawotet avakaein wamiven nakases, kawwotet iboug ee... iyam, kaem silmanin. Nakasekeimiy bwanabwein *livanen* Yowbad, tage awoum beivag mimouvit silmanin kaem.

¹⁰ Kukwakins-wan, o Yowbad-vak ikakin, igaw simayas yakamiy nitasesus, amasinap bwanabwein, didumwal; nag kayagageimiy tayekelesiys yakamiy; nag.

¹¹⁻¹² Kuninuways nakaguyeimiy tatanok tatanok yakamiy, *mawana* timamiy yakamey; sivinem bakalabeimiy o bakakimtuweimiy *vagan* amisinap beibwein mo bikalin nuwan Yowbad. Peinan bo ikatigikeids silmanin nakaleiwag son nakamnat.

¹³⁻¹⁴ Sigwey, tut babaw ikalin nuwem Yowbad waseg, peinan *livanen* Yowbad nakalivan nukuliganes, nag mamagina gamag asilivan; nag. Peinan kukwakinsa Yowbad anilivan tatonen. Nukuliganes *livanen* Yowbad, kuninuways mo nukusimounids waseg. Kusi-mounids mo nukutakayasis tasiyas tayekelesiys. E, nukutakayasis asisinap min-Yudiy tasiyas niyakelesiys Yeisuw Kelis waseg, peinan miven gimgilis bo iyagageimiy yakamiy, *mawan-vak* Yudiy gimgilis niyagages Yowbad angamag tasiyas.

¹⁵⁻¹⁶ Min-Yudiy kweiboug neiweiys tasiyas palopits, wankuyeim-vak daGuyaws Yeisuw neiweiys. Wankuyeim mo ikayabemas yakamey. Yowbad igege nanon wasigeis min-Yudiy tasiyas, peinan tasilabods. E, sivines bisilbwadem; mata ge bakasekeimiy *livanen* Yeisuw, tobwag ven gimgilis yakamiy, mo Yowbad bikatinabweimiy. Singay ikatimweis asisinap kalbaleb mo ivakaein. Nakabiyokous waseg, Yowbad ankavikun mo ilivatus tasiyas.

Pawl sivinan vayuwein binekes tasiyas

¹⁷ Sigwey, nakalisaweimiy tut kadiyakus waseg, tage nuwaneimiy singaya wasigeis yakamey nises. Sivinem kid vayuwein bakaw kalakwaneimiy.

¹⁸ Yey Pawl tut babaw ayyokon, bo nag. Peinan Seitan bo isilbwed maked.

¹⁹⁻²⁰ Nuwaneimiy singaya wasigeis yakamey nises. Igaw daGuyaws Yeisuw beiyum beim, nag kalisiy wasigeis bakamwasaw; misinaka yakamiy. E, kannamis *vagan* igaw aei-tut Yeisuw beiyum beim, mo beimwan wom wasigeis yakamiy.

3

¹⁻² Singaya nuwaneimiy, kawnamat waseg, kalana, “Kadiloka Timotiy takayabes binekes. Bweina aditeiy bitases Atens.” Mtowen Timotiy neiw, bwadads mtowen; simey kakanow aygan Yowbad, kageiguy bwanabwein *livanen* Kelis. Nakakayeb Timotiy neiw *vagan* bikimtuweimiy bukutawtouns o bukusimounids beibwein Kelis waseg.

³ Deisina gamag bo iyagageimiy, tage Timotiy beiw biguyeimiy; mata ge bukuk-walouws. Kukwakinsa tut towen bo bigeg abads.

⁴ Kweiboug wamiven nitasesus simayas yakamiy, nakalivan kalana, “Igaw abamiy bigeg.” Nagein kukines bo ikamat anagin.

⁵ Akakina abamiy igege, singaya nuwaneimiy waseg yeys nises. Ta-mawanbeitout nanoug o bakaptuleig; nag. Mapuna mo akayeb Timotiy, beiw ilakwaneimiy, *vagan* bulagan misimounid bimey bidibakeig. Peinan agupwayat waseg mtowen takatsilakay; adoki bikatsilakeimiy mo biyageg gunawotet wasigeis yakamiy.

⁶ Misiyamun Timotiy neiw, neiyum gog neim, mo imey bulgamiy ilana, “Min-Tesalonik tasiwayoubs, isimounids bwein waseg daGuyaws, tut babaw ininuweids-wan, sivines kid

bukunekes bukulakwanes." Yakamey-vak ninom bo mawan-wan, sivinem bakawekeimiy bakalakwaneimiy.

⁷ Kaligen bulgamiy yakamiy, mo itout ninom. Tage abem bo ige, tage deisa kamwasaw-wan, peinan nukusimounids daGuyaws waseg.

⁸ Kukin bukutoukums waseg mo beimwan wom.

⁹ Ta-mawan bakavkek bakayakawn Yowbad waseg, mamwasaw singay avakaein wamatatan Yowbad pinamiy yakamiy.

¹⁰ Yam babaw o boug babaw singaya kaninitoug pinamiy yakamiy, kalana, "O Guyaw, sivinem bakakin migis tasiyas. Kukin nag isimounids bwein, bakakintuwes mo bitawtouns."

¹¹ Sivinag Tamads Yowbad son daGuyaws Yeisuw bikaliyow gunaked mo baw.

¹² Anitoug waseg, alana, "Kwatinweis sisiwayoub bivakaein wasigeis sisiyas, o wasigeis gamag meivek-wan, mawan yakamey masiwayoub wasigeis tasiyas.

¹³ "Igaw maGuyaw Yeisuw beiyum beim siney tasiyas angamag min-libalab, mo tasiyas bitamanaws wamatam yakkoum, Yowbad Timem, sona ates gimagim-nen, asisinap tawtoun, kamnat." Gunanitoug pinamiy yakamiy mawan.

4

Adsinaps beibwein mo bikalin nuwan Yowbad

¹ Sigwey, kweitan livan-vak nises, waseg baguyeimiy daGuyaws Yeisuw peinan. Kweiboug nakakatimlakeimiy mo kukwakins amisinap bwanabwein, waseg Yowbad ikalin nuwan. Nagein amisinap mawan, tage kadiloka kwatinweis amisinap bwanabwein bivakaein.

²⁻³ Kukwakins-wan daGuyaws Yeisuw nakaleiwag bo nakasekeimiy. Peinan Yowbad sivinan bikayuseimiy silmanin veivay mounid. Awoum kwaninavaysa mav; awoum.

⁴ Tatanok tatanok yakamiy kadiloka bukuninuways veivay mounid, amisinap kamnat waseg mo bukuvays.

⁵ Vikeiy awoum bikalawageimiy mo bukugeinawls mawan tasiyas tadaubs, peinan nag ikakins Yowbad.

⁶ Awoum teitan yakamiy bigeinawl mo biyageg son nakaveivay. DaGuyaws mo bimop asisinap tasiyas takalbalebs. Kweiboug bo kakatiboug nuwamiy, mageiguy tawtoun waseg.

⁷ Yowbad nag ikatigikeids makava kanavay silmanin, nag; tage silmanin sinap kamnat.

⁸ Kaleiwag towen nag teitan gamag nakaleiwag, tage Yowbad nakaleiwag. Mata ge bukusiplaves, peinan tavganein Kululuwan Bwanabwein.

⁹ Awoum livanen siwayoub balel vagan bukusiwyous bus simiyas, peinan Yowbad bo ikatimlakeimiy. Nanawana bo kukwakins.

¹⁰ Nukusiwyous bus tasiyas tayekelesiys babaw ven avakaein Masidoniw waseg. Kaguyeimiy vagan kwatinweis misiwayoub bivakaein.

¹¹ Kadiloka bukuyokons vagan bukusesus niwal waseg. Amisinap tatineimiy kuninuways. Awoum kwatpunugis simiyas, vagan miwotet tatineimiy bukuwteles. Kweiboug nadibakeimiy mawan.

¹² Awoum bukumlavags mawan tabgumat yakamiy; igaw mo bukunekes simiyas bukusibukways kaeis bisekeimiy bukukwams kid. Bukuvages mawan, tasiyas nag iyekelesiys bikineimiy mo bikayuweimiy. Awoum!

DaGuyaws beiyum beim

¹³ Sigwey, awoum bukutagouwaws silmanin tasiyas takankanigs. Babaw gamag nag isimounids beikits vayuwein, mapuna ninous singaya moumouvit kanig waseg. Tage yakamiy awoum beivag ninoumiy mawan.

¹⁴ Tasimounids peinan Yeisuw ikanig mo ikit vayuwein. Tasiyas-vak Yeisuw angamag nikankanigs, Yowbad mo biyakitus, bitokes bimeyes sisiy Yeisuw.

¹⁵ Mounid daGuyaws anilivan kadibakeimiy, kukin son mwamovads bitasesus, igaw daGuyaws beiyum beim, tasiyas kweiboug nikankanigs mo bimgwayeids. Yakids nag bitamgwayes tasiyas; nag.

¹⁶⁻¹⁷ DaGuyaws gog beiwak, tasiyas anelos sitovek-vak beiwak, bwagig-nen libalab biyikis, daGuyaws beibus beim, mo tasiyas nikanigs Yeisuw waseg wanmugwana beikits, wankuyeim mo yakids tamwamovs yakids. Sidayas tasiyas mo bikaweids bitaneis wanakaew, mo bitanekes daGuyaws lov wanuwan, sods mtowen mo bitasesus bitasiga-gas.

¹⁸ Sinap towen waseg kugeiguis simiyas wasigeis vagan amnamiy beibwein.

5

¹ Sigwey, nag kadilok balel sinap vagan bukukwakins avei-tut nakabiyokous ven watinow, peinan nanawana bo kukwakins.

² Bo kukwakins bwein tutan daGuyaws beiyum beim mo bilabuboleids mawana tavveinaw watapwan boug bisap.

³ Gamag bilivans, bilansa, "Tut towen tasesusa bwein," simouvit gog waseg nuwanaw mo bisiblutes biyagages, mawana gidaged bisiblutes vinay igaw bitapouy nimes. Tamawan bivkakes.

⁴ Sigwey, nag mamagina tadaubs yakamiy, yam towen nag bilabuboleimiy mawana tavveinaw; nag.

⁵ Yakamiy kamnat gimgeilin yakamiy; peinan nag dadub gimgeilin yakids. Wudayam waseg bitanoun.

⁶ Awoum bitammasis mawana gamag mwasanin; tage kadiloka bitalalals vagan nanouds bidumwal.

⁷ Tasiyas gog tammasis boug waseg immasis, o tasiyas tamwamoums boug waseg imwamoums, ikabalawein.

⁸ Tage yakids tanounas wudayam waseg, kadiloka nanouds bidumwal, mo bitasi-mounids o bitasiwayoubs beibwein, kululuwads ankawlawal silmanin; o bitanmises Yowbad vagan bikatinabweids, nanouds ankawlawal silmanin.

⁹ Peinan Yowbad nakaleiwag, awoum bikamtanids; tage Yowbad nikatigikeids vagan bikatinabweids daGuyaws Yeisuw Kelis waseg.

¹⁰ Yeisuw bo ikanig peinads yakids, sivinan kid siney yakids bitamwamovs, takinew bitasesus ven watinow, o takinew bitakanigs.

¹¹ Mapuna kuguyes vagan bukwatimweisimiyas sinap bwein waseg, mawana tut towen nukuvvages.

Nakabiyokous anilivan

¹² Sigwey, kadiloka bukuvnases tasiyas mitamumugwas, peinan igeiguis wasigeis yakamiy, daGuyaws inawotet silmanin.

¹³ Kadiloka bukugoulus tasiyas, siwayoub waseg, peinan siwotet bwanabwein. Kadiloka niwal waninoumiy bises.

¹⁴ Sigwey, kadiloka bukuguyes tasiyas tabgumats. Kukimtuws tasiyas tawnayuws mo bitawtouns. Kulabes tasiyas kalisiy nag isimounids bwein. Kwaptuleimiy babaw gamag wasigeis.

¹⁵ Kukin kal biyagageim, awoum kumop ansinap. Bweina tut babaw bukuswayoubs simsimeiyas wasigeis, o babaw gamag wasigeis.

¹⁶ Tut babaw kummwasaws-wan.

¹⁷ Awoum kuyeiyas nitoug waseg Yowbad.

¹⁸ Bikalin nuwamiy youd babaw silmanin. Yowbad nanon mawan, peinan Yeisuw Kelis angamag yakids.

¹⁹ Awoum kusiwmates Yowbad Kululuwan.

²⁰⁻²² Awoum kupiyaves sigeiguy tasiyas palopits, tage kuninuways beibwein, mo kwatukins, sinap kalbaleb kulavewas, sinap bwanabwein kuyousis beibwein.

²³ Sivinag Yowbad tonena bikatimweis kululuwamiy mo beitaw nuwamiy, peinan ikayus kululuwamiy, mwamovamiy, woumiy meivek-wan, vagan bukusesus bwein, amisinap kamnat-wan, tutan daGuyaws Yeisuw Kelis mo bisap vayuwein.

²⁴ Mtowen nikatigikeids angamag yakids bitikum, bivag wasigeis yakamiy mawana nilivan.

²⁵ Sigwey, kadiloka bukunitougs pinem yakamey.

²⁶ Bikalin nuwamiy, bukumulouls simiyas, peinan meivek yakamiy tayekelesiys yakamiy.

²⁷ DaGuyaws yagan waseg adibakeimiy, kadiloka bukuvinis let towen, tayekelesiys babaw biliganes.

²⁸ DaGuyaws Yeisuw Kelis bisiwyoubumi.

Yey Pawl.

2 TESALONIK

Wankuyeim Pawl iligen bulagan min-Tesalonik, peinan nag ikakins sinapun Yeisuw nakabeiyum. Sivyuein mo ilel silet *vagan* bikakins Yeisuw bo beiyum sivyuein beim ven watinow.

Nakabsilamaw

¹ Yey Pawl sigwey Saylos son Timotiy malet neiw kuvinis min-Tesalonik yakamiy nukuyekelesiys Tamads Yowbad son daGuyaws Yeisuw wasigeis.

² Tamads Yowbad son daGuyaws Yeisuw Kelis bisiwyoubumi mo beitaw nuwamiy.

Kelis beiyum beim bikatukin gamag wasigeis

³ Sigwey, kadiloka tut babaw bikalin nuwem Yowbad waseg, peinan misimounid bo ikatimweis ivakaein. Misiwayoub-vak simiyas wasigeis bo ikatimweis ivakaein.

⁴ Mapuna kakamumwaneimiy wasigeis tayektelesiys vena babaw, kalana, “Tasiyas min-Tesalonik singaya takapatuls. Deisina gamag iyagages, abes igege, tage ikappatuls-wan, peinan isimounids Yowbad waseg.”

⁵ O abamiy kalbaleb tut towen kulivatus peinan nukukwawes Yowbad nawotet. Tage abamiy kalbaleb waseg, Yowbad mo bikatimweis amisinap bwanabwein mo bukutawtouns bukusiws nakabkaleiwag wanuwan. Mapuna takakins-wan Yowbad nakaleiwag didumwal.

⁶ Yowbad nakaleiwag didumwal, peinan idoki bweina bimop asisinap tasiyas niyagageimiy.

⁷ Tage yakamiy niyagageimiy igaw mo bisekeids dakabiyeiwas simayas yakamiy. E, igaw tutan daGuyaws Yeisuw bikamat walbalab, bimeis siney natakyobs tasiyas tawtous mo bisekeids dakabiyeiwas.

⁸ Kov kakayeil waseg mo bimop asisinap tasiyas nag ikakins Yowbad, o takapidabs tasiyas nag iliganes livanen daGuyaws Yeisuw.

⁹ Mapuna biyagages tut nag beikous, ven dadub waseg. Ven towen nag bikines daGuyaws magin, o natawtoun, o nakamnat; nag.

¹⁰ E, igaw tutan bisap, mo bikayabes bineis watoulan; angamag ven watinow mo biyakawns waseg, o tasiyas tasimounids beisom ninous waseg; o sigwey yakamiy mo bitayakawanes Yeisuw, peinan nukusimounids livanen Yeisuw to nakasekeimiy.

¹¹⁻¹² Kweiboug Yowbad nikatigikeimiy angamag yakamiy. Sivinem kid Yowbad bivkakeimiy angamag yakamiy mawana nikatigik kweiboug. Yakamiy-vak sivinamiy amisinap beibwein sona misimounid silmanin wotet bwein. Yakamey gog makanitoug *vagan* Yowbad natawtoun waseg mo bikantuweimiy silmanin sinap towen bwanabwein. Gamag mwasanin bikineimiy amisinap mawan, mo bikavasis yagan daGuyaws Yeisuw Kelis, o bikavasimiy yakamiy, daGuyaws silmanin. Peinan daYowbads son daGuyaws Yeisuw Kelis singaya bisiwyoubumi.

2

Towen tasiplatein Yowbad nakaleiwag

¹ Sigwey, ivag sivinem bukukwakins daGuyaws nakabsunap. Mtowen Yeisuw Kelis beiyum beim, mo bitakatuyouns bitanekes.

² Igaw bukuliganes gamag mwasanin askamikon, o asilivan mamagina, “DaGuyaws nakabsunap tut towen waseg.” Awoum ge bikubukub nuwamiy, o beiyow nuwamiy; awoum.

O kukin gamag mwasanin bilivans, bilansa, “Pawl nalet waseg ilel, idoki daGuyaws nakabsunap tut towen waseg,” awoum bikubukub nuwamiy, peinan tayyaweids tasiyas.

³⁻⁴ Awoum teitan gamag bikatidavimiy. Kadiloka bukukwakins gamag babaw wan-mugwana bipiyaves Yowbad nakaleiwag, wankuyeim mo bisap Yeisuw.

Towen tasiplatein Yowbad nakaleiwag bisap wanamug; tage Yeisuw wankuyeim. Dadub gimgeilin towen, peinan takamnamwan towen, biyyagay yowbad babaw o Geileiw babaw, bikamumwan tatonen mo bisin Yowbad wanbunatum, bilana, ‘Yey Yowbad ye?’

⁵ Kweiboug sigwey yakamiy nitasesus mo adibakeimiy mawan. Tabta kunuwes?

⁶ Kadiloka kunuways aveiyag waseg isilbwed towen takamnamwan, peinan tutan bikadilok mo bisap.

⁷⁻⁸ Nakawotet kalbaleb nagein nises ven watinow, o nag bitakakins silawun. Tayuwein gog, isilbwed takamnamwan towen, bisilbwadena oko igaw mo bein tanaban, tasiplatein gog kaleiwag mo bisap, o gamag babaw bikines; tage daGuyaws Yeisuw bisap son nakamnat avakaein, mo beiweiy taw towen wadon muymuyan waseg.

⁹⁻¹⁰ Seitau nileb mtowen takamnamwan, tayyaweid towen, im iwtel naman mulin babaw-wan tawtoun, vagan bikatidavis gamag mwasanin, mo bimtamats; peinan nag sivines sinap mounid, mata ge Yowbad bikatinabwes.

¹¹⁻¹² Mapuna Yowbad niyabol ninous vagan kid bisimounids sinap yaweiid waseg, mo bimop asisinap tasiyas babaw tapiyaveins sinap mounid, peinan sivines kid sinap kalbaleb.

Yowbad nikatigikeids vagan bikatinabweids

¹³ Sigwey, daGuyaws angamag yakamiy, yakamey tut babaw ikadilokena bikalin nuwem Yowbad waseg, peinan tut nakabsilamaw waseg nikatigikeimiy vagan kid bikatinabweimiy. Kululuwan gog waseg nikayuseimiy vagan kid bukuliganes anilivan mounid.

¹⁴ Livan towen, livanen Yeisuw Kelis, nakadibakeimiy mo kuliganes vagan daGuyaws Yeisuw Kelis nakamnat waseg bimteili Miy; peinan Yowbad nanon mawan.

¹⁵ E sigwey, kadiloka bukutamanaws sona mitawtoun, bukuyousis beibwein livan towen nakasekeimiy, wudom waseg nakadibakeimiy, o malet-vak niwekeimiy.

¹⁶⁻¹⁷ Tamads Yowbad singay isiwyoobuds, ikimtuweids vagan tut babaw nanouds beibwein peinan taninuways aveiyag bwanabwein bisekeids tut wanakougwaw. Tamads towen son daGuyaws Yeisuw Kelis bikimtuweimiy vagan bukurinatouts, bukuwotets wotet babaw bwanabwein son amilivan bwanabwein.

3

Kunnitougs Yowbad waseg pinem yakamey

¹ Sigwey, kweitan youd-vak balel. Sivinag bukunitougs Yowbad waseg pinem yakamey, vagan kid bakageiguy daGuyaws livanen, tawtoun waseg; livan towen mo bitakayway wasigeis gamag babaw, mawana kweiboug wasigeis yakamiy.

² Kunitougs-vak vagan Yowbad bikatinabwem wasigeis tasiyas takalbalebs. Peinan mwasinis gamag nag isimounids Yowbad waseg.

³ Tage daGuyaws Tatoukum bo bikimtuweimiy, bisilbwed kalbaleb wasigeis yakamiy.

⁴ O daGuyaws waseg, kakakina yakamiy nukuliganes amilivan, mo bukuwanawes.

⁵ DaGuyaws bikatimweis amisinap, nasiwayoub tatonen waseg, o Kelis nakapatul waseg, mo bukusiwayoub, o bukwaptules yakamiy.

Awoum bukupiyaves wotet

⁶ Sigwey, kadibakeimiy daGuyaws Yeisuw Kelis yagan waseg, kadiloka bukusinales budidayas tasiyas tabgumats, peinan tapiyaveins agem tasiyas.

⁷⁻⁸ Kukwakins-wan kadiloka bukwabwakuns imaked waseg. Kweiboug simiyas yakamey nitasesus nag kapiyev wotet, nag; tage Yam katanok katanok o boug katanok katanok wasigeis nakawwotet-wan, mo nakakam kaem tatinem. Mata ge kakamiyev kaemiy.

⁹ Bweina bukuvakumas, tage nag bakalivan kan livanen. Kadiloka bukukinbunikemas tawwotet yakamey mo bukwaylasis ked towen.

¹⁰ Kweiboug simiyas yakamey, makaleiwag mamagina, “Kukin kal bipiyev wotet, awoum beikam kan.”

¹¹ Nakaligen gog mwasanin yakamiy tabgumats, mwasanin yakamiy tabugumatuws.

¹² DaGuyaws Yeisuw Kelis yagan waseg, kadibakes gamag tasiyas, kalana, “Awoum bukubugumatuws. Bweina bukuwwotets, mo bukukwams kan.”

¹³ Sigwey yakamiy, awoum ge bikawegweis woumiy wotet bwanabwein waseg.

¹⁴⁻¹⁵ Malet towen neiw kuvinis. Kukin kal bisiplev amalivan, kusinales gamag towen mo beivag anmwasin. Awoum kwamliwes gamag towen, peinan budāmiy. Bweina bukuguyes vagan bikakin.

Taneimiy-o

¹⁶ DaGuyaws tonen ansinap mamagina niwal. Mtowen bisiwyoubumi vagan beitaw nuwamiy tut babaw, o mikabsis katanok katanok waseg, peinan mtowen simiy bukus-esus.

¹⁷ Kalin nuwag yakamiy. Namag mulin tatoneig nalel gunaleta babaw nakabiyokous waseg.

Yey Pawl.

¹⁸ DaGuyaws Yeisuw Kelis bikalin nuwan wasigeis yakamiy.

1 TIMOTIY

Kweiboug Pawl isek Timotiy nawotet vagan bimtakavates tasiyas ven Epesos waseg nisesus. Nalet towen ilel inek Timotiy vagan bivin mo bikakin amawan bivkek biwotet bwein tayekelesiys pines.

Kalin nuwag

¹⁻² Kalin nuwag yakoum Timotiy. Nukusimounid daGuyaws waseg, mapuna natug mounid yakoum. Yey Pawl alel mulet neiw. Mtowen takatinabweids Yowbad nisekeig gunawotet vagan bakokew livanen Yeisuw Kelis. Kelis-vak nisekeig gunawotet towen. Mtowen Kelis waseg tammises vagan bilabeids:

Tamads Yowbad son daGuyaws Yeisuw Kelis bisiwyoubum, asteiy son Taman binok nuwes yakoum, mo beitaw nuwam.

Kadiloka kupiyev livan yaweid

³⁻⁴ Kweiboug gunakaleiwag bo asekeim, mo anoy an Masidoni, alana, “Kusesun ven towen Epesos vagan bukuguyes gamag mwasanin kugidamis sikatimlakay kalbaleb; kudibakes, kulana, ‘Awoum bukutaleiliws o bukutkuds sona mikamniman; awoum. Makava taleiliw nag bikatimweisimiy sinapun Yowbad waseg, nag.’”

⁵ Tage makaleiwag wasigeis yakamiy vagan bigimagim ateimi, o ninoumiy bikamnat, o bukusimounids beibwein, mo sinap yagan siwayoub biton wasigeis yakamiy.

⁶ Gamag mwasanin bo iyamkwanes sinap towen, inoyes kweitan ked, livan makaw illivans.

⁷ Idokes takatimlakeins Yowbad nakaleiwag tasiyas tatineis, mapuna tawtoun waseg illivans; tage nag ikakins silawun asilivan, o na-ikakins kaleiwag towen.

⁸ Takakins Yowbad nakaleiwag bwanabwein, magat bitavnases nakaleiwag towen.

⁹⁻¹⁰ Tage nag isen nakaleiwag toubweins pines, nag; nakaleiwag towen pines tasiyas tapiyaveins kaleiwag, o takapidabs, tapiyaveins tapwaloul, takalbalebs, takallokays, tawayins timsiyas o insiyas, o takatimateins gamag, tassubwans, o tayablebeins pwadaw, o tabakeweins gamag, o tayyaweids, o tasiyas itabudabods mav, o aveiyag waseg bibwabwes sinap bwanabwein, o bibwabwes livanen bwanabwein daYowbads.

¹¹ E, daYowbads waseg kamnat son mwasaw, mtowen nikayabeig vagan livanen bakokew gamag babaw wasigeis.

Kalin nuwag Yeisuw peinan

¹² Kalin nuwag daGuyaws Yeisuw Kelis waseg, peinan guntawtoun nisekeig silmanin nawotet towen, o peinan idokeig tatoukum yey mo isekeig gunawotet.

¹³ Kweiboug agusinap kweitan bo ayeg Yeisuw yagan, mo akamliwes inagamag, ayagages. Tage deisina inok nuwan yey, peinan tatagouwaw yey, nag asimounid waseg.

¹⁴ Nasiwayoub-vak mo isiwyoubug singay, vagan basimounid mo basiwayoub Yeisuw Kelis waseg.

¹⁵⁻¹⁶ Livan towen mounid; kadiloka tasimounids waseg. Peinan Yeisuw Kelis neim wadaban pwepway vagan kid bikatinabweids takalbalebs yakids. Yey gog bo amug takalbalebs babaw wasigeis; tage bo inok nuwan yey, vagan Yeisuw Kelis bikatimlakay nakapatul avakaein waseg singay takalbaleb yey, takalbalebs babaw mo bikakins, o bisimounids Yeisuw waseg, mo bibanes mwamoves nag beikous.

¹⁷ Tut nag beikous bikalin nuwads Yowbad, bitayakawanes, nakaleiwag tonen isigeg, Yowbad Towen nag takines, tage isigeg-wan, Yowbad anmwanet-wan. Eimen.

¹⁸ Natug yak Timotiy, kweiboug tasiyas palopits nilivnakes muwotet, nagein akalawageim, kadiloka bukuwteles asilivan mawan, mo bukutawtouns wotet towen waseg.

¹⁹⁻²⁰ Kadiloka kusimounid bwein, o kununuway sinap bwein waseg. Gamag mwasanin bo ipiyaves sinap bwanabwein mo ikalouws kid; asteiy tasiyas Aymenay son Alekisan, bo asekes Seitan waseg vagan bikakin mites; awoum ge biyages Yeisuw.

2

Nitoug Yowbad waseg

¹ Nakabsilamaw sinap bwanabwein, nitoug. Kadiloka tut babaw kuninitougs pines sidayas; kadiloka kugilagels Yowbad waseg vagan mo bilabes gamag babaw; nitoug waseg kadiloka bikalin nuwamii peinan Yowbad ilabes tasiyas.

² Kadiloka tanitougs pines tasiyas king sisiyas takaleiwags babaw, vagan bimtakavateids mo bitasesus bwein, mamagina niwal waseg, o bitavnases Yowbad nakaleiwag beibwein, adsinaps bwanabwein waseg.

³⁻⁴ Yowbad sivinan adsinaps mawan. Mtowen ikatinabweids, o sivinan kid bikatinabwes gamag babaw, o sivinan gamag babaw bikakins sinap mounid.

⁵⁻⁶ Sivinan bitakakins kid Yowbad anmwānet. Tayuwein-vak anmwānet bilabeids vagan Yowbad bikalin nuwan wasigeis yakids; mtowen gimilitoun Yeisuw Kelis, won tatonen itam ikanig vagan biymiyiseids yakids. Tutan bo ikadilok mo ikamtel Yowbad nakaleiwag towen, klos waseg nikanig.

⁷ Mapuna bo isekeig gunwotet vagan bakokew livānen Kelis, bakatimlakes tobwag ven gimgilis sinap mounid vagan bisimounids waseg. Nag bayaweid, nag. Mounid Yowbad nisekeig gunawotet towen.

⁸ Sivinag tawaw ven babaw bininitougs Yowbad waseg. Awoum bikameiliws o bikamnimans; awoum. Bweina bitamnawes nimes mo binitougs sinap bwanabwein waseg.

⁹⁻¹⁰ Vinay kadiloka bisikams dibes bwanabwein, awoum bunadog bibasis bibabaw; awoum tākas singay bitoumis bibabaw; awoum botobot babaw bisenas wakayous; awoum dob bitoumis bein wanakaew. Deisa bisiwayoubs son siwotet bwanabwein biwteles. Sinap towen bwanabwein tapwäloul silmanin.

¹¹ Tapwäloul waseg kadiloka vinay bikkapays-wan, biliganes livan.

¹² Nag bātam vinay bikatimlakes tawaw o bikaleiwags wasigeis; awoum. Kadiloka bikapays-wan.

¹³ Peinan Yowbad wanmugwana ibun Adam; Iv wankuyeim.

¹⁴ O Seitan nag ikatidev Adam; nag. Ikatidev gog kudāvin; ansinap mo ivag kalbaleb.

¹⁵ Tage vin kavel bisimounid Yeisuw waseg, o bisiwayoub, nag bikalimwasaw, tage ansinap kamnat, Yowbad mo bikatinob vin manawen, inakopway waseg.

3

Tayekelesiys sitovek ansinap

¹ Livan towen mounid: Kukin kal beitam nanon vagan bimlavag tayekelesiys sitovek teitan, bwein-wan, peinan wotet towen bwanabwein.

² Tage kadiloka beivag ansinap kamnat; nakwav anmwānet; takkapatul; tavvnasein kaleiwag; awoum biwliy Yowbad nawotet waseg; kadiloka bivnāses anbwabwal beibwein; o bikatimlakay sinapun Yowbad.

³ Awoum bimwamoum bikabalawein; awoum bikammeiliw, tage biyamanum wasigeis gamag; awoum bikamnimans; awoum bikayapam youd babaw silmanin.

⁴⁻⁵ Kadiloka nakaleiwag bivag beibwein inagamag wasigeis; kadiloka nitun bivnāses times, bigoulus o bibkunis anilivan. (Kukin nag bikaleiwag beibwein inagamag wasigeis, ta-mawan bimtakavates Yowbad natayekelesiys, nag.)

⁶ Awoum teitan taw teivaw niyekelesi kuyamwenes, vagan nuwanaw mo bitovek tayekelesiys wasigeis; awoum. Adok mo bikaypom sinap, bikalouw; mawan Seitan nikaypom kweiboug mo ikalouw.

⁷ Kadiloka tayekelesiys sitovek beivag ansinap bwanabwein wamtes tasiyas watoulan; awoum tasiyas bivtokes livan mamagin beikon Seitan inasik waseg mo bikalouw.

Tasiyas tulals asisinap

⁸ Kadilok tasiyas tulals beivag asisinap bwanabwein; awoum biwliyes Yowbad nawotet waseg; awoum binuwanaw wudous; awoum kutukut bimwamoums bikabalaweins; awoum bikaypamwes youd babaw.

⁹ Kadiloka biyyousis sinapun Yeisuw, ninous kamnat waseg.

¹⁰ Wanmugwana kuyakwanes mitulals; magat asisinap beibwein mo kuyamwenes bimlavags tulals.

¹¹ Kadiloka sikwavas beivag asisinap kamnat, bwanabwein; awoum bikākat wudous; awoum bimwamoums mananan; kadiloka bitoukums wotet babaw waseg.

¹² Tasiyas tulals awoum biwosals; kadiloka beibwein sikaleiwag wasigeis nitsiyas sisiyas sigamag.

¹³ Tasiyas tulals kalisiy bitoukums siwotet waseg mo beibwein bulges gamag babaw wasigeis, o bikapwapouts bwanabwein peinan inmises Yeisuw Kelis bilabes.

Sinapun datapwəlouls kweiboug ikawum-wan

¹⁴ Mulet towen nalel, neiw; tage sivinag nuwanaw baw.

¹⁵ Kukin gog bayouviy peinan gunaked nag, kuvin let towen vāgan mo bukukwakin kaleiwag silmānin Yowbad nabunatum, mtown Tamwamov, o nabunatum yakids tayekelesiys babaw. Yowbad mtown dakakols. Sol imlavag sinap mounid kakol wakunuwatan.

¹⁶ Tage mounid sinapun datapwəlouls singay avakaein.

Wawun datapwəlouls gimgilítoun towen,

Kululuwan waseg mo itawtoun wamtes tasiyas min-libālab.

Livānen towen ven babaw niliganes.

Gamag babaw isimounids waseg, mo iyum, in walbālab.

4

Igaw gamag mwasanin bipiyaves sinap bwanabwein

¹⁻² Yowbad Kululuwan anilivan kamnat, ikatimlakeids, vāgan bitakakins nakabiyokous tut waseg, gamag mwasanin mo bipiyaves tapwāloul bwanabwein, mo biliganes Seitan anilivan yaweid, son-vak asilivan tasiyas bwagaws kweitan kweitan. Takatimlakeins livnes tasiyas singaya tayyaweids, takatidavins gamag; asisinap kalbaleb, tage nag igeg ninous.

³ Ilansa, “Awoum kuveivays” o “Awoum kukwams kan towen.” Tage kusimounids o kukwakins sinapun Yowbad, peinan ibun kan babaw; sivinan kid bitakams, mo bikalin nuwads waseg.

⁴⁻⁵ E, Yowbad nibun kan babaw, mapun babaw bwein. Awoum tapiyev; awoum. Tage bweina bitanitougs Yowbad waseg, anilivan bitanuways, bikalin nuwads kads peinan, wankuyeim mo bikimtuw wouds bitawtoun.

Yowbad natouwat bwanabwein

⁶ Magat bukkwatinlakes tayekelesiys sinap towen, mounida Yeisuw Kelis natouwat bwanabwein yak; peinan livānen Yeisuw Kelis nukuligen, livan towen bwanabwein, bikatimweis amisinap beibwein.

⁷ Tage makava taleiliw awoum kuligen. Nag Yowbad antaleiliw māwan vāgan gog bukuligen. Kadiloka bukutoukum vāgan kululuwam bitawtoun sinapun Yowbad waseg.

⁸ Wouds bitavnāses mo bitamwasaws yagada mwāsaw; tage kululuwads bitavnāses mo bitamwāsaws avakaein, tut towen o tut beim walbalab.

⁹ Livan towen mounid. Kadilok gamag babaw bitimakes.

¹⁰ Nitatawtouns singay silmanin wotet towen tawteles, peinan tanamis waseg Tamwamov Yowbad vagan bilabeids, peinan towen takatinabwein gamag babaw. Mounid ikatinabweids yakids, peinan tasimounids waseg.

¹¹ Kadiloka kuguyes gamag vagan bikakins sinap towen.

¹² Awoum bikasigumims peinan tawlat yak; tage beivag amsinap beibwein, amlivan bwein, muwotet bwein, kusiwayoub beibwein, kusimounid, amsinap kamnat waseg, vagan tayekelesiys bikines amsinap mo bitakayasis.

¹³ Bweina bukutoukum tapwäloul waseg. Kuitoukum ee... igaw mo baw. Bukitab kuvnivin vagan gamag biliganes, kuguyes, kwatimlakes.

¹⁴ Bweina bukuvnas Yowbad nasiwayoub Kululuwan Town nisekeim yak, mawan kweiboug tasiyas mituwäveks nisenas nimes wawoum mo ilivnakes Yowbad nasiwayoub waseg yak.

¹⁵ E, Yowbad bo isiwyoobum vagan kid bukuwotet beibwein. Kadiloka kutoukum vagan gamag babaw bikiniems, bilansa, "Taw towen bo itawtoun Yowbad nawotet waseg."

¹⁶ Kuvnaseim yak vagan amsinap bidumwal o mukwatimlakay beibwein, Yowbad mo bikatinabweimiy simwey tasiyas tanageins amlivan.

5

Sinapun siwayoub gamag wasigeis

¹⁻² Awoum kukwanes tamumwey, tage kuyyowal mawana timom wasigeis; o tawbwats mawana budam; nummwey mawana inom; vinabwats mawana nimut, amsinap bikamat wasigeis.

³ Kumtakavates siyas nakwabs gewagews, ta-ivag tawlisiyas.

⁴ Tage kokin nakwab nitun sam o tibun sam, kadiloka bisiwyoubus nakwab manawen bikatimapus nasiwayoub kweiboug wasigeis tasiyas. Sinap towen bwanabwein wamatian Yowbad.

⁵ Tage nakwab nawan naguwagew, anmwænet bises, binnimis Yowbad anmwænet bileb, yam babaw o boug babaw bininitoug waseg o biyowal waseg.

⁶ Kokin gog nakwab bikalimwåsaw-wan, o bikamkwam-wan, mamagina takanig, kululuwan manawen.

⁷ Kaleiwag towen kuguyes vagan kid asisinap bikamat.

⁸ Kadilok gamag tatanok tatanok bimtakavates asigamag. Kokin teitan gamag nag bimtakavates tasiyas wanbunatum nisesus, mtown mamagina tapiyavein Yowbad nakaleiwag. Tasiyas igaw dadub nag ivag asisinap mawan, peinan singay kalbaleb.

⁹⁻¹⁰ Magat vin bises, namwan anmwænet nikanig, o ansinap siwayoub, peinan nituyes gamagal, o nimtakavates anbwabwal, o nivnæses tasiyas tayekelesiys, o nilabes tasiyas abes igeg wasigeis, o nawotet babaw bwanabwein, igaw anbweilim sinawanim sinawatan, bweina kutam vagan tayekelesiys bimtakavates manawen vin.

¹¹ Tage nakwabs tasiyas igaw vinabwats awoum, peinan igaw ninous bibabaw o binumlaves Kelis, mo biveaws.

¹² Kweiboug ikatouts asilivan waseg Kelis, wankuyeim mo biwidis; kalbaleb asisinap mawan.

¹³ E, adok mo bikatudabs mav, bunatum babaw bikikeipuls, livanen gamag babaw billivans, mamagina nabugmatuws tasiyas, kakat wudous.

¹⁴ Adok nakwab tasiyas vinabwats kadilok biveaws, bituyes nitsiyas, bimtakavates siven. Awoum tayekelesiys natán beivay ansinap kalbaleb, mo tasiyas nikamliweids bikiniems, mo biyyageids; awoum.

¹⁵ Adok nakwab mwasanin bo ikalouws, inoyes Seitan inaked.

¹⁶ Kal vin iyekesi, o taliven nakwabs nisesus, kadiloka bimtakavates tasiyas. Awoum wotet avakaein wasigeis tayekelesiys babaw, peinan tayekelesiys bimtakavates nakwabs tasiyas naguwagews.

¹⁷ Kuvnəses beibwein tasiyas takalleiwags wasigeis tayektelesiys yakamiy. Tasiyas iggyeimiy Yowbad anilivan waseg, o ikatimlakeimiy sinapun Yowbad, kadiloka kumtakavates beibwein.

¹⁸ Livan nises Bukitab waseg mamagina,
“Bulumakaw iwwotet wit, bweina beikam wit waseg.”

Livan kwayuwein nises,
“Tawwotet, bweina bikow maysan wotet.”

¹⁹ Awoum gamag makava biyateles wasigeis tayektelesiys situwāveks; awoum. Kukin gamag asteiy o asteitoun bikakins sitovek ansinap kalbaleb, asilivan mounid bilivans mo bukuligen vagan biyateles tamwey towen.

²⁰ Kuguyes tasiyas takalbalebs wamtes gamag babaw, gamag babaw mo biwenes sinap kalbaleb.

²¹ Adibakeim yak wamatān Yowbad, o wamatān Yeisuw Kelis, o wamtes min-libālab tasiyas Yowbad nagamag, kaleiwag siyas nalel let towen waseg tamtakavatein yākoum. Kaleiwag tasiyas kuvkek bimlavag katanok-wan. Awoum teitan gamag kusiwyoub mo son kuyageg; awoum.

²² Awoum nuwanawa bukusek nawotet tayektelesiy teitan vagan bimlavag mamagina misinal; adok bukutagouwaw ansinap kalbaleb nises, gamag mwasanin mo bidokes bukuleb towen ansinap kalbaleb, o bidokeims-vak takalbaleb yākoum. Kuvnas amsinap tatoneim beibwein.

²³ Awoum yevagam mav kumwamoum, tage wayn kakit kumwamoum nuwam peinan, o peinan amlel nises wāwoum.

²⁴ Gamag mwasanin tawtusis-wan asisinap kalbaleb, mapun nuwanaw bilivatus kalbaleb. Tage mwasanin gamag asisinap kalbaleb ikawumes, tut wanakougaw mo bilivatus kalbaleb.

²⁵ Sinap bwanabwein māwan, babaw gamag bikinbunikes; kukin gog bisowmes, igaw wankuyeim mo bikamat.

6

¹ Tasiyas tawwotet, kukin beitams situwāveks siwotet waseg, kadiloka bivnəses, bikaninaways ages. Kukin gog nag, adok tasiyas watoulan mo biyages datapwālouls o daYowbads waseg.

² O kukin tasiyas situwāveks biyeklesiys mo bimlavags mamagina tuwsiyas, awoum tasiyas tawwotet bikatudabs peinan situwāvek niyakelesiys; awoum. Tage bweina bitoukumsa singay, peinan situwāveks sisiyas nisimounids waseg Yeisuw mapuna bisiwyoubus tasiyas situwāveks.

Kadiloka bukumtibabeits

Kaleiwag tasiyas kuguyes o kukwatimlakay tayektelesiys wasigeis.

³⁻⁵ Kukin kal nakatimlakay kweitan, o bipiyev bwanabwein liveñen daGuyaws Yeisuw Kelis, o bipiyev katimlakay silmānin sinap bwanabwein; mtowen takaypamwein sinap tage nag ikakin sinap tatonen; ansinap igege peinan sivinan kamnimana, liveñen babaw wasigeis. Gamag tasiyas asisinap māwan, singaya takammnimans, bikameiliws, bikavikuns, biyagays, bitilikons; e, tuta babaw mo bikammnimans sisiyas wasigeis, peinan ninous kalbaleb, o peinan ipiyaves sinap mounid, idokes kid sinapun tapwāloul biyousis mo bikawes siwlioug babaw vāgan kid bimwāsaws.

⁶ Nag gog. Tage tayektelesiys tasiyas tamtibabeits, asisinap bwanabwein, mo bimwāsaws kid.

⁷ Peinan nitasaps wadaban pwepway dawliougs nag; igaw bitalisawes ven towen, nag kweitan youd bitakawes, nag.

⁸ Tage tut nagein, kukin sam kads son adakweims, bweina beitout nanouds.

⁹ Tasiyas gog sivines sivavag bibabaw, Seitan biyakwanes mo beikons anasik. Tasiyas ninous nag, beivag asivikeiy vavag kalbaleb waseg. Asivikeiy bikalawages mo biyagages.

¹⁰ Kukin kalisiy sivines siwliyoug bibabaw, mo inoyes ninous silmanin youd babaw singaya kalbaleb. Peinan gamag mwasanin sivines siwliyoug bibabaw mo bipiyaves sinapun Yowbad, o simouvit babaw mo ilivatus.

¹¹ Tage Yowbad angamag yakoum, sinap towen kupiyev. Kuyyokon vagan beivag am-sinap didumwal, kamnat, bukusimounid Yowbad waseg, bukusiwayoub, bukukwapatul, bukummanum simwey wasigeis.

¹² Kutawtoun vagan bukunamis beibwein mo bukutakayway; kuyous mwamovam nag beikous, peinan tut kweiboug nukukwamat musimounid wamtes gamag babaw, mo Yowbad ikatigikeim silmanin mwamovam nag beikous.

¹³⁻¹⁴ Wamatan Yowbad mtowen tayamouvein youd babaw, o wamatan Yeisuw Kelis, (towen wamatan Ponitiy Paylat livanen Yowbad nilivan bwein), e, wamtes tasiyas asteiy adibakeim yak kuvvnas Yowbad nakaleiwag beibwein; awoum kakit bikabwag. Kadiloka kuvvnas nakaleiwag ee... mo bisap vayuwein daGuyaws Yeisuw Kelis.

¹⁵⁻¹⁶ Peinan tutan bikadilok Yowbad waseg mo bispuy Yeisuw bimekeids. Takaleiwag bwanabwein, mtowen anmwanet Yowbad, king babaw siking towen, o guyawaw siguyaw; mtowen anmwanet isigeg-wan, naven nag takikines peinan singaya kamnat; kweiboug ta-kweitan gamag bikin magin, o nagein gog ta-kal bikin, naguyaw o natawtoun isigeg-wan. Eimen.

¹⁷⁻¹⁹ Kudibakes tasiyas guyawaw ven watinow, kulana, “Awoum kwaypamwes sinap yakamiy; awoum bukunnamis waseg mivavag vagan kid bilabeimiy; awoum. Tage kadiloka kumises Yowbad, towen tavyagein youd babaw vagan bitamwasaws waseg. Kadiloka kusiwayoub; miwotet bwanabwein bibabaw; kuvvageins mivavag, vagan kid maysan tawtoun igaw mo bukulivatus, towen mwamovamiy mounid-wan.”

²⁰⁻²¹ O Timotiy, towen nukukow, kuvnas beibwein. Livan mwasanin gamag idokes sinap; nag gog, kalbaleb. Awoum. Kulavew! Peinan tasiyas asilivan nag ilatanes, o gamag mwasanin niyousis waseg, mo iyamkwanes sinamis Yowbad waseg.

Yowbad bisiwyoubum yak.

Yey Pawl.

2 TIMOTIY

Wankuyeim Pawl igaw nises wādeil ven yagan Lom, mo ilel Timotiy nalet, sivyuwein inek. Mtowen Pawl ikakin kakita beimat, tage isimounid bwein Yeisuw Kelis waseg. Iguy Timotiy, ilana, “Bweina kutawtoun silmānin Yeisuw nawotet.” Ilelel-vak, ilana, “Sivinag gunawliyoug mwasanin, kukow, kum, kumyakeig.”

Nakabsilamaw

¹⁻² Kalin nuwag natug bwanabwein yākoum Timotiy.

Yey Pawl balel mulet beiw mo kuvin.

Peinan Yowbad nanon waseg yey māwana, līvānen Yeisuw Kelis akokew, vāgan kid gamag biliganes mo bibānes simwamov. Yowbad nakaleiwag māwan.

Tamads Yowbad son daGuyaws Yeisuw Kelis bisiwyoubum, binok nuwes yākoum, vāgan mo beitaw nuwam.

Yeisuw livnen bwanabwein

³⁻⁴ Yey singaya akkulul guntovek Yowbad wamatan, singaya tut babaw akaninow aygan, māwan-vak timog, tibug. Aninuweim yak tut babaw mo aninitoug peinam, yam katanok katanok, o boug katanok katanok wasigeis.

Anuway misumkwey nukutaneig nukuvlamweig gog. Yey singaya sivinag bakineim vayuwein mo bamwāsaw avakaein.

⁵ Singaya aninuweim peinan nukusimounid bwein Yowbad waseg; māwan-vak tabum kudāvin Lowis, wanmugwana isimounid, wankuyeim mo inam Iwnis isimounid, tatounun-vak yākoum. Akakin-wan singaya kusimounids bwein.

⁶ Mapuna adibakeim awoum bukusigan Yowbad nasiwayoub nises waseg yak, nisekeim kweiboug misumkwey yey namag nasen wāwoum. Kutoukum vāgan nasiwayoub towenan wanuwam bitawtoun waseg yakoum.

⁷ Yowbad Kululuwan ivagein waseg yākids nag ivag adpwayats, tage tawtoun, siwayoub o kapatul isekeids.

⁸ Bweina bukulivan līvānen daGuyaws. Awoum bukumsin. Awoum kumsineig yey, peinan wādeil nases. Yakoum-vak bukugeiguy līvānen Kelis mo bigeg abam, tage Yowbad bikimtuweim bukutawtoun mo bukutam waseg.

⁹ Yowbad gog nikayuseids silmānin nawotet, nag peinan adsinaps bwanabwein, nag; tage peinan nikatigikeids, mo isiwyoubuds Yeisuw Kelis waseg, tut kweibouga tonen.

¹⁰ Nasiwayoub bo nikaluweg kweiboug, nagein gog mo ikamat, peinan Takatinabweids bo isap, mtowen Yeisuw Kelis, iyakous kanig, mo ikitilow isen mwamovads nag beikous. Līvānen Yeisuw inawotet bo māwan.

¹¹ Yowbad bo ikaliwageig, līvānen bwanabwein isekeig vāgan banoy ven babaw wasigeis, bakatimlakay.

¹² Mapuna gamag iyagageigs, waseg abag igege; tage nag ivag agumwasin, nag. Peinan bo asimounid towen waseg, mapuna akakin-wan, aveiyag gunawotet towen nisekeig, bo bimtakavet mtowen, bisesuna ee... tut wanakougwaw nakaleiwag mo bisap ven watinow waseg.

¹³ Yeisuw Kelis waseg kusimounid, kusiwayoub mo bukulivan mounid, māwan yey agulivan nukuligen. Kadiloka kuyous līvānen towen beibwein.

¹⁴ Peinan Yowbad kululuwan wanuwads nises, ansinap bo isekeim amsinap yākoum. Līvānen towen kumtakavet beibwein.

¹⁵ Adok kukwakin-wan tasiyas min-Esiy bo ipiyaveigs, sisiyas tasiyas Pigelus son Emogenes.

¹⁶⁻¹⁷ Sivinag Yowbad binok nuwan Onesipol sen inagamags, peinan tut babaw issiwyoubugs-wan, mo ibwein amnag. Nag imsineig yey nases wādeil; im ven towen Lom iligen bulagag, im ininineiv ee... mo ibāneig.

¹⁸ Igaw Yam towen waseg daGuyaws nakaleiwag bisap, sivinag daGuyaws binok nuwan waseg taw towen. Kukwakin-wan inawotet babaw ven Epesos waseg.

2

Yeisuw Kelis natakanaviy bwanabwein

¹ Natug, bweina bivakaein Yeisuw Kelis nasiwayoub waseg yakoum, vagan bilabeim mo bukutawtoun yak.

² Livan towen, misumkwey wamtes tasiyas tayektelesiys nakatipel nasekeim, bweina bukwatimlakes tasiyas tatoukums, wankyeim mo bikatimlakes gamag babaw.

³ Bweina simey yak bigeg abads, peinan Yeisuw Kelis natakanaviy bwanabwein yakids. Awoum kupiyev; bweina kwaptuleim wotet towen waseg.

⁴ Awoum takanaviy bikiwayuw, nakayal wanakatay, nawlioug wanakimaw. Natovek bo ikabut silmanin naviy, kadiloka bilavew ven wuliyougwan.

⁵ Kutoukum, kuvnas Yeisuw nakaleiwag beibwein. Mawan kawlideiy, kukin kal bitamap, igaw lalan mo biban; tage kukin nag bivnas kawlideiy kaleiwag-nen, bo nag.

⁶ Mawan-vak tabgubag, kukin bitawtoun wanmugwaw bo beikam kan.

⁷ Kuninuway agulivan kabebay towen. Yowbad bilabeim vagan mo bukukwakin youd babaw.

⁸ Kuninuway Deibid tabun, mtowen Yeisuw Kelis, neikit kanig waseg; ye gunakageiguy bo mawan.

⁹ Ageiguy livan bwanabwein waseg, mapuna abag singaya igeg. Iyawanis namag vatul tanmunum waseg, mawan takalbaleb tatonen ye; tage ta-mawan biyawani Yowbad anilivan wanuwads nises, nag.

¹⁰ Mapuna akaptuleig-wan moumouvit waseg, vagan kid balabes Yowbad nagamag tasiyas bo nikatigikes; sivinag kid Yeisuw Kelis bikatinabwes silmanin sikamnat nag beikous.

¹¹ Livan towen mounid-wan; kukin sods Kelis bitakanigs, sods-vak Kelis bitamwamovs.

¹² Kukin bitakaptuleids; mo bitaguyaws sods Kelis. Kukin gog bitakayan, towen mo bikayneids.

¹³ Kukinegog bitapiyaves, towen-vak bisesuna-wan, peinan ansinap bwanabwein bo ikunek. Ta-mawan bipiyev.

Yeisuw natouwat bwanabwein

¹⁴ Livan towen, kugyes gamags wasigeis, vagan binuways beibwein. Kudibakes wamatian Yowbad, kulana, "Awoum kwamnimans livan kweitan kweitan wasigeis, awoum. Kamniiman tasiyas nag bilabeimi; nag. Tage mounida biyagageimi, mounid."

¹⁵ Kutoukum yak, sinap mounid kulivan bwein, vagan Yowbad bikineim, mo beitam waseg yakoum; wankyeim nag beivag ammwasin, nag.

¹⁶⁻¹⁷ Tage awoum kwamnimans may, kusinale tasiyas takammnimans peinan asilivan biyagages tatineis, mapuna bikatimweis asisinap kalbaleb, mawan gamag bikasipom, kisikis gog biyamweis mo bivakaein ansipom. Mawan tasiyas Aimenay son Piletus, asilivan kalbaleb.

¹⁸ Tasiyas asteiy bo ipiyaves livan mounid, peinan asilivan ilansa, "Gamag sikabeikit vayuwein bo ikous. Bo nein-o wankyeim." Ilivans mawan, gamag mwasanin iliganes, mo ipiyaves sitapwäloul, peinan nag isimounids bwein.

¹⁹ Tage Yowbad nakawutun waseg silmanin tapwäloul mounid, anlelel mamagina: "DaGuyaws ikakin kalisiy inagamag."

Kwayuwein lelel mamagina:

"Kukin kalisiy bidokes siGuyaw Yowbad, kadiloka bilavewas asisinap kalbaleb."

²⁰ Bunsiyas bunatum bunuvkäveks wanuwan, abmavin mwasanin nisesus, wous goulwan, mwasanin gog silib, mwasanin amweilok, mwasanin gog bidapwats; mwasanin silmanin guyawaw, mwasanin gog sim vagan.

²¹ Kukin kal bipiyev sinap gaganen, gamag towen mamagina abmavin silmanin guyawaw; natovek gog mo bikayus taw towen, silmanin inawotet, ikadilokena wotet babaw bwanabweins.

²² Bweina kupiyev sinapun wulat, peinan tawlat yak; tage kunineiv amisinap bwanab-wein, simounid, o siwayoub, sona miniwal, simwey tasiyas asisinap kamnat, mo initougs daGuyaws waseg.

²³ Kadiloka kupiyaves kamnimana mav, peinan tasiyas billivans mav, mo bikammeiliws, wankuyeim mo bikawpwanaws.

²⁴⁻²⁶ Peinan yakoum daGuyaws natouwat yakoum, awoum kwamnimans wasigeis, tage bweina kusiwyoubus gamags, kwatimlakes beibwein, o bukuyamanum wasigeis. Kukin mwasanin bisilbwadeims, bweina kuyamanum wasigeis, vagan bukwatimlakes mo bikakins tasiyas asisinap kalbaleb. Adok igaw Yowbad mo bilabes vagan bipiyaves asisinap kalbaleb, mo bikakins sinap mounid. Wankuyeim mobeitout Seitan anasik, bisawls. Peinan Seitan anasik bo ikwanes tasiyas silmanin inawotet tatonen biwteles.

3

¹ Bweina kukwakins nakabiyokous tut waseg, mo tut kalbaleb bitalivatus, ven watinow waseg.

²⁻⁵ Peinan gamag mwasanin tatineisina bisiwyoubus, bipwakits silmanin ney, bikayapams sinap, nag beitams kaleiwag waseg, biyyagays, bisiplaves ages timsiyas, o insiyas, nag bikalin nuwes, peinan tadaubs, nag binok nuwes, bivtokays livan, takatiginaneys tasiyas, kapasal nuwes, bipiyaves sinap kamnat. Bo bisilakods, asisinap tatineis nag bipwaloves, bigagasa tatineis, nag sivines Yowbad, sivines kid simwasawa tatineis, tage askakin mamagina tatapwalouls, tage Yowbad natawtoun ipiyaves. Bweina kusinales gamag tasiyas.

⁶⁻⁷ Mwasanin tasiyas bisousiws wanuwan bunatum, silmanin vinay mansiyas asisinap igwey. Nalbalebs n̄asin, peinan vikeiyan wous ikaliwages; livan babaw binganegs, tage nag bidumwal ninous.

⁸ Mawan kweiboug Danis son Damalis sivines kid bisilbwades Moses, tasiyas mawan sivines kid bisilbwades sinap mounid; peinan ninous kalbaleb, nag isimounids bwein.

⁹ Gamag tasiyas singaya nuwanaw bisabwans, peinan gamag babaw mo bikakins tasiyas asisinap mamagina balawein. Mawan kweiboug Danis son Damalis sivines bisilbwades Moses, mo gamag babaw ikines asisinap balawein.

Pawl ikaleiwag waseg Timotiy

¹⁰ Gunakatimlakay bo kukwakin, agusinap kukwakin-wan, gunaked kukwakin-wan, peinan asimounid, o akaptuleig, o asiwayoub, atoukum.

¹¹ Bo kukwakin tasiyas niyagateig, mo abag igege. Antiyok waseg, o Ikoniyam, o Lisitil. Wunsiyas ven wasigeis, singaya abag igege, tage daGuyaws mo ikatinabweig mouit babaw wasigeis.

¹² Magat kalisiy gamag tasiyas sivines asisinap beivag kamnat Yeisuw Kelis waseg, mo bigeg abes, peinan gamag mwasanin biyagages.

¹³ Tage tasiyas takalbalebs sisiyas tasiyas takatidividavs bikatimweis asisinap kalbaleb mwano bivakaein singay, bikatidavis gamags, peinan Seitan bo ikatidavis tasiyas.

¹⁴⁻¹⁵ Yakoum gog amsinap awoum bukuvag mawan tasiyas, tage sinap to nakakatim-lakeim kweiboug nukusimounid, kadiloka kutoukum sinap towen waseg. Kukwakin-wan yakamey kweiboug nakakatimlakeim mawan, o yakoum igaw-o wagwadim nukukwakin gog Yowbad inabuk. Kukin livan towen bukuligen, mo bukusimounid waseg Yeisuw Kelis, vagan Yowbad bikatinabweim.

¹⁶⁻¹⁷ Bukitab meivek-wan Yowbad anilivan; ikadiloka bitavin mo bikatimlakeids adsinaps kalbaleb waseg yakids, bikidumwaluds mo bitakakins, vagan bitatawtouns sinap didumwal waseg, mo bitayakousis sinap kamnat, o bikadilokeids-wan woteta babaw bwanabwein; mamagina Yowbad angamag yakids.

4

¹⁻² Wamtes Yowbad son Yeisuw Kelis kuligen agulivan towen beibwein, peinan Kelis takaleiwag, igaw mo bikatukin wasigeis tasiyas tamwamovs sisiyas tasiyas kweiboug nikankanigs, igaw tut wanakougwaw mo bisap, silmānin nakaleiwag. Agulivan mamagina: Bweina bukugeiguy līvanen Yowbad. Bweina biseiw nuwam silmānin geiguy tut babaw, takinew tut bwanabwein waseg, o takinew tut kalbaleb waseg. Bweina kugeiguy vagan bisimounids, kuyadumwālus vagan asisinap beibwein, bitawtoun. Bweina kwaptuleim tuta babaw geiguy waseg.

³ Igaw tut wanakougwaw gamag mwasanin mo bipiyaves katimlakay mounid, tage sivines kid ninous tatineis, mogo sivines sitakatimlakay bibabaw vagan bigeiguy mo biliganes tasiyas, bilansa, “Tageiguy towen bwanabwein, sinap to nilivan singaya sivinag.”

⁴ Bo biliganes sitakatimlakay tasiyas, mo bipiyaves līvan mounid, tage sivines kwaneib, o makava taleiliw binganegs.

⁵ Tage yakoum kutitoukum muwotet waseg. Kukin gog abam bigeg bweina kwaptuleim, bweina kukokew līvanen Yeisuw, vagan bukwatimlakes gamag babaw, mo bikadilok muwotet gamag wasigeis.

⁶ Yey gog kakita bo beiweigs, mamagina lun bulukwan yey. Kakita bo balisow ven watinow.

⁷ Singaya bo avatay waseg Seitan, gunawotet bo ikous, peinan tut babaw singaya asimounid waseg Yeisuw Kelis.

⁸ Igaw tut wanakougwaw daGuyaws mo bisekeig agupay, vagan sinap didumwal. DaGuyaws bo ikatineg peinag yey. Igaw mo bikaleiwag bwein wasigeis gamags, o yam towen adapays bisekeids sigwey kalisiy sivines nakabsunap ven watinow.

⁹ Kuyokon vagan nuwanawa bukum.

¹⁰ Peinan Dimas bo ilisaweig, bo ipwakit ven watinow wuliyoughan, ipiyaveig, mo inoun in Tesalonik. Kilisens-vak bo inoun in Galetiy. Titos-vak bo nein Dalimatiy.

¹¹ Amateiyuna nakases, soug Luk. Kudibek Mak, kutok, amiteiy kumeis, peinan guntouwat bwanabwein towen Mak.

¹² Tikikos bo akayeb nein Epesos.

¹³ Agukweim mwaynavakaein kukow kumey, bo alisow ven Tilowas waseg, Kalip-o wanbunatum waseg, kukwawem-vak gunabuk son sinbilbil mwaynatan, singaya inok nuwag sinbilbil towen.

¹⁴ Tawtelein tanmunum mtowen vagan Aleksandel, singaya bo iyagageig mounid, igaw daGuyaws mo bimop ansinap kalbaleb.

¹⁵ Yakoum-vak kuvnāseim, peinan taw towen singaya tasilbwadein dakageiguy.

¹⁶ Tasiyas mina-Lom sivtanoka iyateleigs ikous, tage nag kal ilivan vagan bilabeig, asibabaw-wan aspwayat mo ilisaweigs. Awoum geg Yowbad bimop kid asisinap kalbaleb.

¹⁷ Tage Yowbad ilabeig, itoun wadadag ikimtuweig mo atawtoun, ageiguy līvanen Yeisuw mo ayakous, vagan gimgilis ven dadub asibabaw-wan mo binages agulivan. Mapuna Yowbad ikatinabweig layon wadon waseg.

¹⁸ Tage Yowbad igaw mo bikatinabweig, kalbaleb babaw wasigeis, mo bāsiw wanuwan nakaleiwag walbalab. Mapuna bitakavasis Yowbad tut nag beikous. Eimen.

¹⁹ Agulivan siwayoub kudibakes Pilisik son Akwil, sisiyas Onesipol sen inagamags wanbunatum nisesus.

²⁰ Elasit bo alisow, nises ven Kolinit. Tilopim ikatoun bo alisow ven Miletus waseg.

²¹ Kuyokon tut towen nuwanaw bukum, igaw-yay niwal, peinan wuwal anatut, mamagin geg bulbweilim bisilbwadeim ta-māwan bukum. Ewbilis anlivan siwayoub waseg yak. Māwan-vak tasiyas Pudens, Linos, Kilodiy, sisiyas tasiyas tayekelesiy asibabaw-wan.

²² DaGuyaws bikimtuw kululuwam, mo bukutawtoun. Yowbad bo bisiwyoubumiy.

Yey Pawl.

TITOS

Kweiboug Pawl isek Titos nawotet vagan bimtakavates tayekelesiys sim Kilit waseg. Mapuna ilel nalet towen vagan bikakin amawan bivkek biwotet beibwein pines tayekelesiys tasiyas min-Kilit.

Nakabsilamaw

¹⁻⁴ Kalin nuwag yakoum Titos. Mamagina natug mounid, yakoum, peinan yakoum-vak nukusimounid Yeisuw Kelis waseg. Takatinabweid towen son Taman Yowbad bisiwyoubums vagan mo beitaw nuwam.

Yey Pawl, Yowbad natouwat, takawein livanen Yeisuw Kelis, yey. Gunwotet silmanin gamag tasiyas Yowbad nikatigikes angamag tatonen. Alilabes tasiyas vagan bisimounids beibwein o bikakins tapw^{aloul} mounid, mo binmises vagan bibanes mwamoves nag beikous. Peinan pwamug-o Yowbad nilivnek mawan towen. Yowbad nag biyaweid, nag. Tut gog towen mo ikamat anilivan towen. Takatinabweids Yowbad bo isekeig gunawotet vagan batoukum waseg anilivan towen, bageiguy angamag wasigeis.

Titos nawotet sim yagan Kilit waseg

⁵⁻⁶ Wotet towen silmanin bo nalisaweim sim Kilit waseg, vagan bukwambuvis wotet to nitayabweg, o ven katanok katanok waseg kukwaleiwag tayekelesiys wasigeis, kuvton teitan sitamumug vagan bimtakavates tasiyas. Kweiboug akatimlakeim asisinap tasiyas tamumugwas tayekelesiys wasigeis. Awoum bivages sinap kalbaleb, awoum biwwosals, kadiloka nitsiyas bisimounids waseg Yowbad; awoum nitsiyas beivag bulges kalbaleb, mamagina takakons o takapidabs tasiyas.

⁷ Tayekelesiys situw^{aveks} Yowbad natouwat tasiyas, kadiloka bivages asisinap beibwein. Awoum bitawlewo kaleiwag. Awoum bikavvikuns. Awoum bimwamoums wiskiy. Awoum bivvatays. Awoum bimtapwags youd babaw wasigeis.

⁸ Awoum bipiyaves bwabwal, kadiloka bisiwayoub, biyamanums, bikaptules, bidumwal asisinap, bikannat.

⁹ Kadiloka biyyousis sinapun Yowbad to nitaliganes, vagan kid bikatimlakes gamag sinap bwanabwein waseg, bilabes; o bitagagays wasigeis tasiyas asilivan kweitan-wan.

¹⁰ Peinan tasiyas tapiyaveins kaleiwag singay babaw, tabugumatuws mwasanin, mwasanin takatidavidavs. Tasiyas-vak tabwabweins momwes gamag singay babaw takapidabs tasiyas.

¹¹ Kadiloka kugidem asilivan. Awoum kweitan sinap bisenas vagan bimgwayes bunatum babaw gimgilis binoyes ked kalbaleb. Ikatidavis geg mo bikwayes sivavag.

¹² Gum-Kilit teitan, min-Kilit tasiyas sipalopit anilivan mamagina:
“Min-Kilit asibabaw tayyaweids, takalbalebs, tabgumats, tagoveks, mawan bulawud tasiyas.”

¹³⁻¹⁴ Anilivan towen mounid. Mapuna amlivan tawtoun bukuguyes mo bisimounids bwein daGuyaws waseg. Kadiloka bipiyaves minYudiy sitaleiliw o bipiyaves-vak sikaleiwag tasiyas tapiyaveins sinap.

¹⁵ Toubweins wasigeis youd babaw bwanabwein. Tage tasiyas tapiyaveins Yowbad nakaleiwag asisinap bikibik, nag aveiyag bwein bibanes, peinan ninous bikibik.

¹⁶ Ilansa, “Yakamey kakakin-wan Yowbad,” tage siwotet kweitan, singaya kalbaleb; takapidabs. Ta-mawan biwotets bwein.

² Kuguyes tammwayas awoum bimwamoums mananan. Kadiloka beivag asisinap bwanabwein, sona ninous didumwal. Kadiloka bisimounids bwein Yowbad waseg. Kadiloka bisiwayoubs bwein, o bikaptules.

³⁻⁴ Kuguyes mwamwayas-vak bivn̄ases asisinap tatineis. Awoum biw̄awal wudous. Awoum tut babaw bimwamoums soup tawtoun, awoum. Kadiloka bikatimlakays sinap bwein, vagan kid tasiyas vinabwats mo bikakins sinap bwein, bivn̄ases simw̄anas o nitsiyas.

⁵ Kadiloka vinabwats bidumwal ninous, sinap bwanabwein waseg; subwan bipiyaves; kadiloka biwotets bwein, o bisiwayoubs. kadiloka bikanawes simw̄anas ages. E, kukin bitoukums biwotets bwein, tasiyas watoulan nag biyages Yowbad nakaleiwag, nag.

⁶ Kuguyes tasiyas tabw̄abwats m̄awan, vagan ninous bidumwal.

⁷⁻⁸ Yākoum-vak, mukwawotet tatoneim beibwein vagan bukwatimlakes sinap bwanabwein. Kulivan mounid, didumwal; amlivan mo bitawtoun wasigeis tasiyas kalisiy sivines bisenas livan kweitan, mo beivag asimwasin; peinan ta-m̄awan biyageids tayekelesiys yakids.

⁹⁻¹⁰ Kuguyes tasiyas tawteleins situw̄avek siwotet vagan bikanawes ages youd babaw wasigeis, mo bikalin nuwes tasiyas situw̄aveks. Awoum bikamnimans sisiyas situw̄aveks. Awoum bibakews, tage wotet babaw bweina bitoukums waseg, vagan gamag bikines asisinap bwanabwein mo bikavasis Yowbad nakaleiwag, mtownen Takatinabweids.

¹¹⁻¹² Nagein gog bo ikamat Yowbad nasiwayoub vagan bikatinabweids babaw gamag yakids, o bikatimlakeids sinap bwein, mo bitapiyaves sinap kalbaleb son ven watinow vikeiyan, tage bitavn̄ases Yowbad, o bitakaptuleids, adsinaps didumwal waseg.

¹³⁻¹⁴ Nagein takayamats tut wanakougwaw mw̄asaw-nen peinan takatinabweids Yeisuw Kelis igaw mo bisap, mtownen daYowbads tawtoun; bo nitam won tatonen vagan bikatinabweids, bitokeids mo bitalisawes sinap tasiyas kalbaleb, bivag kid adsinaps bikamnat angamag tatonen, biseiw nuwads silmanin wotet bwanabwein.

¹⁵ Sinap townen kuguyes. Amlivan tawtoun waseg kukw̄anes. Awoum gamag mwasanin bipiyaves mukwaleiwag; awoum.

3

Wotet bwanabwein

¹⁻² Kuguyes, kulana, “Kunuways gabman sikaleiwag, kwanawes. Kutams waseg wotet babaw bwanabwein. Awoum kuyagays. Awoum kwamnimans. Tage bweina bukuyamanums. Gamag babaw bukuvn̄ases beibwein.”

³ Kweiboug yakids tadaidubs, takapidabs yakids. Idakeds kalbaleb peinan advikeiys nikaliwageids, nitamw̄asaws sinap kalbaleb waseg. Yam katanok katanok imouvit dabads, peinan gamag mwasanin nikamliweds, o yākids-vak nitakamliwes.

⁴ Tage Yowbad bo inok nuwan yākids, nasiwayoub mo ikamat vagan kid bikatinabweids.

⁵ Ikatinabweids, nag peinan dawotets didumwal, nag. Misinak ikalin nuwan, mo isiwyoubuds; iwid adsinaps kweiboug, kweivaw nisekeids Kululuwan Bwanabwein waseg.

⁶⁻⁷ E, Yeisuw Kelis nikatinabweids dakalbalebs waseg, Yowbad Kululuwan mo ika-timweis ivakaein wasigeis yakids, vagan bikidumwaluds, nasiwayoub tonen waseg, mo bitasiws wanuwan Yowbad nakabkaleiwag, peinan bo tanmises mwamovads bises bisigeg.

⁸ Livan townen mounid-wan. Sivinag yākoum mutawtoun waseg livan townen kudibakes simwey. Tasiyas nisimounids Yowbad waseg biliganes mo bininuways aw-wotet bwein biwteles. Sinap townen bwanabwein vagan bilabes gamag.

⁹ Awoum kutitakuds mav mo kwamnimans, Moses nakaleiwag livanen, o tammwayas livnes. Awoum bukwatayegs mav. Kamniman tasiyas nag bilabeimi, nag.

¹⁰⁻¹¹ Kukin kal sivinan bikamnimav, kukwan sivtanok o sivay. Magat bikəkin matan bo bwein. Kukin gog nag, kupiyev kalbaleb gamag towen, tapiyavein kaleiwag. Tatonena ikakin ansinap kalbaleb.

Kaleiwag mwasanin

¹² Takinew bakayeb Atimas o adok Tukik igaw biwekeim. Biwekeim mo kunuwanaw kum, kumekeig yei ven Nikopol waseg, peinan nanoug mawan bulbeilim waseg bweina basesuna Nikopol.

¹³ Denas son Apolos simwey nukusesus. Mtowen Denas ikakin yatal sinapun. Nuwanaw kutanes tasiyas asteiy bimeis. Awoum aveiyag bikabwag wasigeis tasiyas.

¹⁴ Kwatimlakes dagamags vagan bikakins wotet bwanabwein biwteles, mo bilabes tasiyas kalisiy abes ieg. Awoum bisimavs; awoum.

¹⁵ Tasiyas sigwey nakases asilivan siwayoub waseg yakoum. Amalivan siwayoub wasigeis Yeisuw nagamag tasiyas nisiwyoubuds. Mtowen Yeisuw bisiwyoubumi yakan.

Yey Pawl.

PILIMON

Pilimon tayekelesiy teitan, tage natouwat yagan Onesim bo isawl. Mtowen gog Onesim isawl in, mo Pawl iban, ikatimlakay sinapun Yeisuw Kelis. Mtowen Onesim itam Yeisuw nakaleiwag waseg, mo iyekesiy. Mapuna Pawl ilel Pilimon nalet vagan Onesim bikow, beiyum binek natovek, bisek Pilimon nalet, bivin, mo beilub nuwan. Mata ge bikavikun.

Nakabsilamaw

¹ Yey Pawl, wədeil ases peinan Yeisuw Kelis angamag yey. Soug bwadag Timotiy nakases. Gunalet neiw, kukin. Kalin nuwem yəkoum Pilimon, peinan dawotets katanokwan.

² Kalin nuwem-vak numet Apiy, son Alikip. Taw townen soug yey nakatawtoun Yeisuw nawotet silmənin.

Kalin nuwem tayekelesiys babaw simwey kutitapwəlouls wambunatum.

³ Tamads Yowbad son daGuyaws Yeisuw Kelis bisiwyoubumi, mo beitaw nuwamiy.

Pilimon ansinap bwein

⁴⁻⁵ Tut babaw aninuweim-wan, annitoug vagan Yowbad bilabeim. Ikalin nuwag waseg Yowbad, peinan naligen bulagan musiwayoub waseg daGuyaws Yeisuw, o wasigeis natayekesiy babaw, sona mutoukum pines tasiyas sisiy daGuyaws Yeisuw.

⁶ Anitoug pines simwey, vagan kid bitakayasis amsinap bwein, mo bikakins Yeisuw nasiwayoub avakaiein wasigeis yakids.

⁷ Yeisuw angamag amnes singaya ibwein, peinan yəkoum bo nukusiwyoubus tasiyas; mapuna yey ikalin nuwag, amwasaw peinan aligen bulagan musiwayoub wasigeis tayekelesiys.

Pawl initoug vagan Pilimon beitam waseg Onesim

⁸⁻⁹ Peinan musiwayoub avakaiein, kweitan youd anitoug waseg yak. Kelis waseg bweina bakabtakeim, tage nag bayakeikay waseg yak; bayowal-wan. Yey Pawl tamwey yey, nases wədeil Yeisuw Kelis peinan.

¹⁰ Ayowal waseg yak silmənin natug Onesim. Yey ases wədeil bo avkek natug mtowen, peinan bo isimounid daGuyaws waseg.

¹¹ Kweiboug nag ilabeim bwein; tut gog townen singaya bilabeid bwein.

¹² Bo akayeb mtowen neiyum niwekeim, ikalin nuwag seikwan.

¹³ Sivinag kid bakayus natug townen, atimapum yəkoum, peinan ililabeig wədeil nases. O yey nases wədeil peinan takawein livənen Yeisuw yey.

¹⁴ Nag gog, awoum basilponay o bakayus gamag townen; awoum. Adok beivag sivinam mutouwat townen; awoum basimkineim vagan sinap to bwein bukuvag; tage tatoneim-wan bukutam, bo bwein.

¹⁵ Adok tut kadiyakus waseg niyamkwaneim mutouwat townen, vagan beiyum biwekeim mo bisesun bisigeg mugwamag bwanabwein townen.

¹⁶ E, mutouwat townen bo imlavag bwadam, peinan isimounid Yeisuw waseg. Yey-vak apwəkit waseg taw townen; tage yəkoum-vak kadiloka bukupwəkit peinan bwadam tatoneim. Bo iyekesiy, mo imlavag bwadam-vak daGuyaws waseg.

¹⁷ Kukin bweina bawekeim ambwabwal yey, kadiloka kutam waseg mtowen, peinan məwana yey.

¹⁸⁻¹⁹ Kukin aveiyag nises niyageg nanoum waseg, igaw yey mo bamop. O kukin aveiyag nibakew waseg yak, igaw yey mo bamop-vak.

Yey Pawl wanamag nalel, "Igaw bamop mo bikadilok."

Adok awoum batəlay waseg yak, kululuwam silmənin, peinan kweiboug nakatim-lakeim Kelis wayagan mo nukuyekelesiy.

²⁰ E, veiyoug yak, bweina buwanow ayagag, bukusiwyoub mtowen Onesim, daGuyaws Kelis yagan waseg, mo beitout nanoug.

²¹ Mulet towen nalel neiw. Akakin-wan bo bukwanow aygag, tage mo bukwatimweis musiwayoub bivakaein.

²² Youd kweitan-vak balivan waseg yak. Mukwanitoug waseg Yowbad, adok mo bilikugs, baw; sivinag ḁbag kwatineg wambunatum peinag yey.

²³ Epapil soug yey nakases wādeil, Yeisuw Kelis nawotet peinan; mtowen ikalin nuwan waseg yakoum. Anilivan māwan.

²⁴ Māwan-vak tasiyas sigwey nakawwotet, Mak, Alistak, Dimas, Luk.

²⁵ DaGuyaws Yeisuw Kelis bisiwyoub kululuwam yākoum.
Yey Pawl.

MIN-IBLIW

Nag takakins kal nilel let towen, pines min-Yudiy tasiyas nisimounids waseg Yeisuw Kelis. Let towen wanuwan ikatimlakay vagan bikakins Yeisuw Kelis nakaleiwag kweivaw bo ilisow min-Yudiy sikaleiwag kweiboug. Ilana, “Kadiloka bitatoukums, tasimounids Yeisuw waseg, vagan Yowbad mo bikalin nuwan yakids.”

Yowbad natun tatonen

¹ Kweiboug, tut babaw, ked kweitan kweitan waseg, Yowbad anilivan isekes tammwayas. Anilivan bo isekes tasiyas palopits mo ikatpeles, isekes tammwayas.

² Tage nakabiyokous tut, nagein waseg, anilivan bo isekeids Natun waseg. Bo isek Natun youd babaw nisesus, mamagina nakiyay tatonen. O tut kweiboug, Natun ileb Taman, mo ibun ven watinow.

³ Natun mititeilin ivag mamagina Yowbad yakawan, peinan askakin katanok-wan. Anilivan tawtoun waseg bo ikimtuwes youd babaw ven watinow o walbalab, vagan biwotets bwein. Bo iwid adsinaps kalbaleb ikous, mo isin Yowbad wanakatay walbalab.

⁴ E, Natun yagan imug; min-libalab asibabaw yiges ikuyeim. Natawtoun-vak bo imug wasigeis tasiyas min-libalab.

⁵ Yowbad nag teitan gum-libalab bidibek mamagina:

“Yak Natug, nagein bo kumlavag Natug”; nag.

Misinaka Natun tatonen idibek mawan. Kweitan-vak Yowbad anilivan, idibek Deibid mamagina:

“Yey bamlavag Taman tonen;

mtownen yej Natug.”

⁶ Kwatounun livan, misiyamun nisen Natun kunutaw ven watinow waseg, ilivan mamagina:

“Meiveks-wan min-libalab bweina bikululs wamatian.”

⁷ Livanen tasiyas Yowbad natakayobs ilivan mamagina:

“Bo ivages tasiyas natakayobs mamagina yag;

o natouwat tasiyas ivages mamagina mayen kov.”

⁸⁻⁹ Tage livanen Natun nises Bukitab waseg mamagina:

“O Yowbad, mukwaleiwag nag beikous.

O mukwaleiwag didumwal, bwanabwein.

Ivag sivinam sinap didumwal; sinap kaydodog kupiyev.

Mapuna Yowbad bo nisekeim mumwasaw singay.

Waseg nukwalisawes simwey.”

¹⁰⁻¹² Kweitan livan-vak mamagina:

“Guyaw yakoum, wankougwana nukusein ven watinow;

o libalab mukwabwabub yakoum.

Youd tasiyas igaw bipsapwas beikous,

tage yak bukusesun-wan.

Mawanana kweim kweiboug bisigsagob,

mo bukwatpum bukwatlow mawanana kweim tonen;

tage yak bukusesuna, bukusigeg.

Ambweilim nag beikous.”

¹³ Nag teitan gum-libalab idibek mamagina:

“Kusin wagunkatay mo bavag mukwaleiwag wasigeis tasiyas nikamliweims yakoum.

E, mo bimlavags mamagina mukwabtatet tasiyas.”

Nag. Misinaka Natun tatonen idibek mawan.

¹⁴ Peinan min-libalab mamagina kalisiy kululuwes tasiyas. Yowbad ikayyabes kid bim-takavateids gamag mwasanin yakids, kalisiy wasigeis yakids Yowbad mo bikatinabwes.

Yowbad nakatuneib

¹ Kadiloka bitaliganes bwein livan towen nisekeids. Awoum ge biyatuwen beikous.

² Kweiboug Yowbad natakayobs tasiyas asilivan mounid, o gamag mwasanin isiplaves ages bo imop asisinap kalbaleb.

³⁻⁴ Yakids mawan. Bitapiyaves Yowbad nakatuneib bwanabwein, mo singay bimop adsinaps kalbaleb. Nag binok nuwan yakids, nag.

DaGuyaws wanmugwana nikamtel nakatuneib towen. Tasiyas niliganes aygan wankuyeim mo ikatimlakeids yakids.

Yowbad-vak ikatimlakeids sinap towen mounid, peinan naman mulin nivag, singaya tawtoun nawotet kweitan kweitan; o peinan Kululuwan Townen Bwanabwein bo ilabeids, isekeids adsinaps kweitan kweitan, sivinan mawanana nanon towen.

Adtamumugs

⁵ Ven towen nitalivan igaw bitaban, Yowbad nag isekes min-libalab sikaleiwag vagan bikaliwages ven towen, nag.

⁶ Bo isek Natun nakaleiwag towen. Livanen gamag Bukitab waseg mamagina:

“E Yowbad, adok nag bukunuway gamag,
o adok nag bukumtakavet gimgilitoun towen.

⁷ Mukwaleiwag waseg, mo ibus gamag towen tut kayakus,
Min-libalab wanakaew, towen watinow,

Mo kusek nakaleiwag avakaein son yakawanan avakaein,

⁸ E, bo ikaleiwag wasigeis youd babaw.”

Bo isek gamag nakaleiwag wasigeis youd babaw. Nag kweitan bikabwag. Tut gog towen nag bitakaliwages youd babaw. Igaw.

⁹ Tage takines Yeisuw tut kayakus ibus im watinow, min-libalab wanakaew. Mo ikow nakaleiwag avakaein son yakawanan avakaein, peinan moumouvit ilivet, waseg imat, isimkwen kanig mouvitan peinads yakids. E, Yowbad nasiwayoub mawan.

¹⁰ Townen bo ibun youd babaw silmanin nawotet tatonen. E, sivinan babaw nitun beisiws mititeilin waseg. Kadilok-wan adtamumugs bilivet moumouvit vagan bikatinabweids, vagan biyakous ansinap bwanabwein meivek-wan. Yowbad nakaleiwag mawan.

¹¹⁻¹² Adtamumugs bo ivageids adsinaps ibwein, Townen inakabsilamaw Yowbad. Yakids-vak dakabsilamaws Yowbad. Mapuna idokeids budan yakids. Nag ivag anmwasin wasigeis yakids, peinan idibek Yowbad, ilivan mamagina:

“Bageiguy wasigeis budag; yagam yak waseg.

Mugwamag babaw bikatuyouns bimeis, bisiwunigs;

yey wanuwein mo bakavasim.”

¹³ Anilivan kwayuwein:

“Basimounid waseg towen.”

Kwatounun:

“Yey-aya sigwey budag tasiyas Yowbad nisekeig.”

¹⁴ Yeisuw budan yakids, peinan bo imlavag mawana yakids, won waseg, son buyavin, mawana yakids, vagan bikanig mo bigulek Seitan. E, Seitan son inakaleiwag bo igulekvak. Seitan nakaleiwag silmanin kanig bo ikous.

¹⁵ Peinan bo tawenes kanig, mamagina iyawanids tasesus bweilim babaw, mo ilikuds, ikatinabweids.

¹⁶ Nag ikatinabwes min-libalab, nag.

“Bilabeids, Ebelam delen yakids.”

¹⁷ Kadiloka bimlavag gamag mawana budan yakids, mo imlavag tanuwgwes-lun sitovek, inok nuwan yakids, o itoukum waseg Yowbad nawotet, mamagina iluns son Yowbad o iwid adsinaps kalbaleb, mo Yowbad ikalin nuwan yakids.

¹⁸ Ven watinow Yeisuw aban igeg, Seitan iyakwen, bo nag; mapuna ikadilok bilabeids yakids, avei-tut Seitan biyakwaneids.

Yeisuw bo ilisow Moses

¹ E sigwey, Yowbad inagamag yakamiy o yeys; peinan bo idaweids yakids silmanin libalab. Kadiloka taninuways mtownen Yeisuw, peinan Yowbad nikayeb neim, mamagina tanuwagan lun, datapwalouls waseg.

² Mawan Moses kweiboug itoukum Yowbad inabunatum waseg, e, Yeisuw-vak mawan, itoukum inawotet to Yowbad nisek.

³ Moses yakawanan kalamwey-nen, tage Yeisuw yakawanan singay avakaein, mawan yakawanan tawtelein bunatum. Tage bunatum yakawanan kalamwey kakit, mawan Moses yakawanan.

⁴ (Bunatum katanok katanok tawteleins nisesus, tage tawtelein youd babaw Yowbad.)

⁵ Yowbad nabunatum waseg, natouwat Moses kweiboug itoukum nawotet babaw waseg, mamagina takatimlakay, ilana, “Igaw Yowbad mo bikaleiwag mawan, mawan.”

⁶ Tage Kelis, inabunatum waseg, bo itoukum mamagina Natun. Yakids inabunatum yakids; magat bitakapwapouts silmanin youd siyas bwanabwein nilivnek.

Yowbad inagamag yakids bo bitayeiyas

⁷ E, kulinuways Kululuwan Bwanabwein ilivan mamagina:

“Nagein gog, avei-tut bukuligen aygan,

⁸ Awoum bikeikay ninoumiy mawan tasiyas kweiboug niyakwaneigs wanawoud, mo ipiyaves gunakaleiwag.

⁹ Peinan timmiyas iyakwaneigs, o ikines gunawotet tawtoun, bweilim sinawavas waseg.

¹⁰ Tage gamag tasiyas bo ivasiganigs, mo alana, ‘Tut babaw itapleileiys mav. Nag ikakins gunaked.’

¹¹ Kapasal nuwag, mo akawtunes, alana, ‘Tasiyas nag kadilok beisiws gunakabyeiwas waseg, nag.’ ”

¹² O sigwey, kuvnases amisinap beibwein. Awoum beivag ninoumiy kalbaleb, waseg bukupiyaves Tamwamov townen Yowbad, mo bukukwalouws waseg.

¹³ E, tut nagein, bweina kuggeiguis simsimiyas wasigeis yam katanok katanok, mata ge sinap kalbaleb bikatidavimiy mo bikeikay ninoumiy.

¹⁴ Mounid bitamsamwas Kelis waseg. Magat bitavvaluts idanamis waseg, mawan wanmugwana nitanmises. Kukin gog nag, bo bitadeivs.

¹⁵ Livanen nises mamagina:

“Nagein gog, avei-tut bukuliganes aygan, awoum bikeikay ninoumiy, mawan tasiyas kweiboug niipiyaves Yowbad.”

¹⁶ Kuninuways tasiyas nivasiganis Yowbad, peinan ipiyaves aygan, mtasiyas Moses nitokes ilisawes Yidipt, mo inounas siney.

¹⁷ Bo ivasiganis Yowbad sinawavas bweilim, mtasiyas takalbalebs; mo ikankanigs wanawoud.

¹⁸ E, Yowbad bo isek anilivan mounid mamagina:

“Nag baspuyeimiy wamikabyeiwas waseg, nag.”

Anilivan mawan, peinan singaya ikapidabs waseg.

¹⁹ E, taninuways. Tasiyas nag kadilok beisiws sikabyeiwas waseg, peinan nag isimounids.

¹ Kadiloka bitagoulus Yowbad. Anilivan nises waseg bitasiws dakabyeiwas waseg. Awoum biyamkwaneimiy mwasanin yakamiy.

² Anilivan bwanabwein bo isekteids mawan tasiyas. Tasiyas bo ikitliganes, tage anilivan nag ilabes, peinan nag isimounids waseg.

³⁻⁴ Yakids gog nitasimounids waseg Yowbad bo bitasiws idakabyeiwas waseg. Tasiyas nag. Anilivan silmanin tasiyas kweiboug mamagina:

“Kapasal nuwag, atabudabod, alana, ‘Tasiyas nag beisiws sikabyeiwas waseg, nag.’ ”

Kweiboug Yowbad ibun ven babaw ikous, mo iyakous nawotet towen. E, livanen nises mamagina:

“Yam kweinim katanok, Yowbad nawotet bo ikous, kwayuwein yam mo iyeiwas.”

⁵⁻⁶ Taninuways livan towen:

“Tasiyas nag beisiws sikabyeiwas waseg, nag.”

Gamag mwasanin beisiws waseg, tasiyas nag. Peinan nikatiliganes anilivan bwanabwein, tage nag isimounids.

⁷ E, kweiboug Yowbad nikatigik kweitan yam. Bweilim babaw wankuyeim mo ikatipel ansinap isek Deibid, ilivan mawan:

“Nagein gog, avei-tut igaw bukuliganes aygan,
Awoum bikeikay ninoumiy.”

⁸ Kukin Yosuw bisekes sikabyeiwas, wankuyeim Yowbad nag bikatigik kweitan yam. Tage Yosuw nag isekes, nag.

⁹ E, dakabyeiwas igaw nises waseg Yowbad, mamagina Sabat, inagamag igaw mo beisiws waseg.

¹⁰ Kukin bitasiws mo bitayeiwas dawotets waseg, mawan Yowbad kweiboug niyeiwas inawotet waseg.

¹¹ Kadiloka bitatoukums vagan bitasiws waseg. Awoum teitan bisiplev aygan mo bikalouw mawana tasiyas kweiboug.

¹² E, Yowbad Tamwamov anilivan tawtoun, singay kakat. Tage seis babeit; Yowbad anilivan kakat, peinan ibas wanuwads, itavid adtuvas waseg, kululuwad son mwamovad bein palatan, kaleivid son tatuwad bein palatan, o ikakina dakanuways, aveiyag sivinads.

¹³ Nag kadilok aveiyag bitasowm wamatian. Adsinaps babaw bo ikinbunik, datakaleiwags towen.

Yeisuw mamagina lun tanuwagan avakaein

¹⁴ Datoveks mamagina lun tanuwagan, Yowbad Natun, Yeisuw, bo nein walbalab peinads, kadiloka bitatoukums datapwalouls waseg, silmanin mtowen.

¹⁵ Tanuwgves lun mwasanin nag inok nuwes yakids adsinaps igwey. Tage Yeisuw ikakin abads, ikakin-vak adsinaps ven watinow. Kweiboug ven watinow, Seitan bo iyakwen Yeisuw nakabiyokon babaw waseg, mawan iyakwaneids yakids. Seitan iyyokon bo nag. Nag ivag ansinap kalbaleb.

¹⁶ Mapuna takapwapouts bitanekes datakaleiwags Yeisuw mo bisiwyoubuds. E, aveitut abads bigeg mo binok nuwan yakids, vagan bilabeids.

5

¹ Gamag yakids, tasiyas tanuwgves idaluns ikawes siwotet peinads gamag yakids, mamagina dasiwayoubs ikawes, isekes Yowbad, waseg bitaluns; peinan adsinaps kalbaleb.

² Tasiyas tanuwgves idaluns bikagmanums wasigeis tasiyas toubols sisiyas tasiyas talasisulins ked, peinan tanuwgves idaluns igwey asisinap tatineis.

³ E, peinan tougweys, tanuwgves lun tasiyas, o asisinap kalbaleb, kadiloka bilineiluns waseg Yowbad; o bilineiluns waseg Yowbad pines babaw gamag.

⁴ Tanuwagan lun nag tonena bikow nawotet towen, nag. Peinan Yowbad bidow silmanin wotet towen. Mawan kweiboug Elon nidow.

⁵ Kelis-vak nag tatonen iyamwen vagan bimlavag tanuwagan lun, nag. Yowbad gog bo isek nawotet towen. Anilivan mamagina:

“Yakoum Natug, nagein bo kumlavag Natug.”

⁶ Kweitan-vak anilivan mamagina:

“Bukusigeg tanuwagan lun yakoum, mawan tanuwagan lun towen Melkisidek.”

⁷ Misiyamun Yeisuw imlavag gimgeilin ven watinow, mo ininitou igilagel Yowbad waseg, iwkuwak ivvalam. Sivinan kid Yowbad bikatinob kanig waseg. Yowbad mo iligen, peinan Natun bo igoul.

⁸ Townen Yowbad Natun, tage gamag iyagages, ikanow aygan Taman, mo ikakin ked townen keikay.

⁹ E, youd babaw waseg ikanaway Taman aygan, mo imlavag takatinabweids yakids. Kukin bitakanawes aygan townen bo bitasesus bwein, tasigagas.

¹⁰ Peinan Yowbad bo isek nawotet tanuwagan lun, mawan Melkisedek kweiboug.

Awoum bitapiyaves livanen Yowbad

¹¹ Sinap townen livanen avakaein badibakeimiy, tage keikay, peinan ikawegweis woumiy.

¹² Tut townen waseg kadiloka bukumtakavates gamag mwasanin. Nag gog. Singay tagatogouwaw yakamiy. Kadiloka bakakamtilakeimiy vayuwein mo bukukwakins silawun Yowbad anilivan. Igawa kumwamoums sus. Ta-mawan kan bukukwams.

¹³ Yakamiy kusasus mawan tasiyas apwaw. Nag kukwakins livanen sinap didumwal.

¹⁴ Igaw bukuwkuvaka eins mo bukukwams kan, mamagina amisinap bimatuw, nionoumiy biwotet, mo bukukwakins aveiyag bwein, aveiyag kalbaleb.

6

¹⁻² Livanen Kelis nukuliganes kweiboug, adok kukwakins; sivinag bitalisawes, bisiw; mo bitaninuways sinap matatuw Kelis waseg. Sinapun Kelis kakolan-nen awoum bitawgawos bitakelays vayuwein. Kakolan bunatum mamagina: bitapiyev kweiboug sinap kalbaleb, bitasimounid waseg Yowbad, bitakakin sinapun kakay silmanin sinap kweivaw, o datuwaveks nimes bisenas wawoud, o livanen bitakanigs mo bitakits vayuwein, o mapun sinap kalbaleb mamyuan nag beikous.

³ E, kukin Yowbad nanon mawan, mo bitalisawes sinap tasiyas, taninuways sinap matatuw.

⁴⁻⁶ Kalisiy sivatan bikamnat ninous, bikamkwanes libalab anagin, bisimkwanes Kululuwan Bwanabwein, o Yowbad anilivan biliganes, bidokes bwein, o bikakinsa Yowbad nakaleiwag nimimeim son natawtoun; wankuyeim mo bipiyaves, ta-mawan bitaguyes tasiyas vagan bikanavin vayuwein ninous. Peinan tatineisa iweiys Yowbad Natun waklos, ikasigumis.

⁷ Kuninuways pwepway. Tut babaw iksikweis isiw wanuwan pwepway, isob kaeis tasiyas nisapwes; mo Yowbad bikalin nuwan waseg.

⁸ Kukin gog awuyow beisob son doudiw, bo bigak. Kakita biyageg pwepway townen; o awuyow bigob kov, peinan awuyow bo ikalawt.

⁹ Kalin nuwag yakamiy. Agulivan tawtoun; tage adok yakamiy amisinap bwein, mapun Yowbad mo bikatinabweimiy.

¹⁰ Inakaleiwag bwein. Nag binumlev miwotet bwein, o misiwayoub silmanin Yowbad, peinan nukulabes tasiyas tayakelesiys, o igawa nukuvvages mawan.

¹¹ Sivinag bukutoukums mawan, tatanok tatanok yakamiy, aveiyag nukunmises mo tut babaw bukubbanes minamis anagin.

¹² Awoum bukugweys yakamiy tage kuklawes amasinap, mamagina bukusimounids o bukwaptuleimiy mawana yakamey, mo bitabanes anagin townen Yowbad nilivnek.

Yowbad bo ilivnek

¹³ Kweiboug Yowbad anilivan tonen nilivnek, isek Ebelam, itabudaboda yagan tatonen waseg, peinan tavakaein tonen, ilivan mamagina:

¹⁴ "Mounid bo balabeim, bakatimweis mubod bibabaw."

¹⁵ Wankuyeim Ebelam ikaptulena oko mo iban anagin livan townen.

¹⁶ Gamag yakids tatabudabods waseg yagan townen tamumug, o kukin bitakamnimans, teitan gamag mo bitabudabod vagan anilivan bikamounid.

¹⁷ Yowbad mawan, sivinan bikamtilakeids anilivan mounid aveiyag igaw mo bisekeids, o peinan nag beivag nanon kweitan, mapun bo itabudabod.

¹⁸ E, mo takakins akweiy youd bisesuna bisigeg. Ta-mawan Yowbad biyaweid waseg, anilivan son tabudabod. Mapun bitanmises bwein anilivan waseg. Yakids nitasawls

silmanin Yowbad bikatinabweids. Mapuna tatawtouns vagan bitayousis youd towen nisen wamatads o tanamis waseg.

¹⁹⁻²⁰ Danamis towen mawana kululuwads analon, moumouvit, tawtoun. Waseg ikaliyow kweim towen nisilbwed palakakit Yowbad nabunatum tatonen. Bunatum towen Yeisuw bo iginisiw, nimug peinads, inek Yowbad. Bo imlavag tanuwagan lun vagan bisesuna bisigeg, mawan Melkisedek kweiboug.

7

Melkisedek tanuwagan-lun

¹ Town Melkisedek, min-Salem siking, tanuwagan lun Yowbad waseg. Melkisedek kweiboug ilivet Ebelam neiyum neim naviy waseg. Ebelam bo iwaweiys king babaw ikous, mo ilouvats son Melkisedek. Melkisedek isek anilivan bwanabwein waseg Ebelam.

² Ebelam mo ilog nawliyoug sinawatan lag. Kalgutan isek mtown Melkisedek. Melkisedek inawotet avakaein, sinap didumwal guyawun, takativin yagan bein aga-Muyuw waseg, "Sinap didumwal." Kwayuwein inawotet guyaw towen mamagina niwal, peinan naven yagan Salem, bitakativin bein aga-Muyuw, "Niwal."

³ Nag ivag taman o inan o delen, nag. Mwamovan tonen, nag ivag nakabsilamaw o nakabiyokous, tage mawana Yowbad Natun, bo isigeg tanuwagan lun mtown.

⁴ Singay guyaw avakaein towen, mapuna tabuds Ebelam bo ilog nawliyoug nikwey naviy wanawan, ilog sinawatan; kalgutan isek mtown Melkisedek.

⁵ Tasiyas gog Livay tibun, siwotet-vak tanuwgves lun, o sikaleiwag nises. Peinan gamag yakids talagus dawliyous sinawatan, kalgutan tasekes Livay tibun. Tasiyas o yakids katanoka dal, peinan tabuds anmwānet Ebelam.

⁶ To go Melkisedek delen kweitan, tage Ebelam isek nawliyoug kalgutan. Ikous, Melkisedek mo isek anilivan bwanabwein waseg Ebelam. Mtown Ebelam Yowbad nilivnek nasiwayoub waseg.

⁷ Kal imug? mtown tallivan? o adok mtown nisek anilivan bwanabwein waseg? Mounid tallivan imug. Mapuna takakins Melkisedek naguyaw waseg ikalisow Ebelam naguyaw.

⁸ Tut towen dawliyous talagus sinawatan mo kalgutan tasekes gamag tasiyas tanuwg-wes lun, tage mitiyamun towen kalgutan bo ikow mtown Melkisedek, nilivanes mtown tamwamov. Tut towen tanuwgves lun imtāmats, tage mtown tamwamov.

⁹⁻¹⁰ E, nagein tasekes kalgutan mo ikawes tasiyas Livay tibun, tage mitiyamun towen Livay tabun Ebelam bo isek kalgutan mo ikow Melkisedek, mamagina Livay isek Melkisedek waseg, peinan igaw tabun Ebelam wāwon nises.

¹¹ Tasiyas Livay tibun ikatimlakes min-Yisleil mo ikakins Yowbad nakaleiwag, tage nag ikidumwal asisinap biyakous. Peinan ikabwag sikaleiwag tasiyas, kadiloka teivaw teitan lun tanuwagan beim mo bikidumwāluds. Tanuwagan lun towen mawana Melkisedek, nag mawan Elon siney tibun.

¹² Kukin bikatilow tanuwagan lun, kadiloka bikatilow-vak kaleiwag, kweivaw bisen.

¹³ Kweivaw tanuwagan lun anakum kweitan, Yud. Kweiboug nag ivag tanuwagan lun kum Yud waseg.

¹⁴ Mounid takakins daGuyaws anakum Yud. Mtown kweivaw tanuwagan lun. Kweiboug Moses nag ikaluweg min-Yudiy siwotet mamagina tanuwgves lun, nag.

¹⁵ Bo ikamnat, mo takakins kweivaw tanuwagan lun, mamagina Melkisedek. Mtown Yeisuw.

¹⁶ Yeisuw nag imlavag tanuwagan lun peinan inaven o delen tanuwgves lun, nag. Yeisuw mwamovan nag beikous; waseg bo ikadilok wotet towen.

¹⁷ Livānen Yeisuw nises mamagina:

"Yak bukusigeg tanuwagan lun yakoum,
mawan tanuwagan lun mtown Melkisedek."

¹⁸⁻¹⁹ Kweiboug kaleiwag bo isem peinan igwey, o peinan Moses nakaleiwag nag kadilok bikidumwaluds. Tage kweivaw kaleiwag waseg mo bitanmises Yowbad beibwein mo bitasineikiks bitanekes Yowbad.

²⁰ Yowbad bo itabudabod waseg nakaleiwag towen.

²¹ Nag itabudabod wasigeis tanuwgves lun tasiyas kweiboug, tage itabudabod waseg Yeisuw mamagina:

“DaGuyaws bo itabudabod. Nanon nag bikanavin, nag.

Peinan yak bukusigeg tanuwagan lun yākoum.”

²² Mapuna takakins mounid, Yeisuw inakaleiwag kweivaw bo ilisow kaleiwag kweiboug.

²³ Kweiboug tanuwgves lun singay babaw. Imtāmats. Ta-mawan bisesus bisigagays.

²⁴ Tage Yeisuw tanuwagan lun nag beikous, peinan bises bisigeg.

²⁵ Mapun Yeisuw tut nag beikous ikadiloka bikatinabweids yākids kalisiy tanmiseins mtowen, mo bitanekes Yowbad. Peinan tut babaw nises tantougin Yowbad peinads yākids.

²⁶ Town bo ikadilok tanuwagan lun peinads. Ansinap kamnat, bwanabwein, gimagim. Nag mawan takalbalebs yākids. Yowbad bo iyamwen in walbalab.

²⁷ Kweiboug tanuwgves lun bo iwawaiys lun bulukwan yam katanok katanok, peinan asisinap tatineis kalbaleb, o pines babaw gamag asisinap kalbaleb. Yeisuw gog sivtanoka itam won tatonen, mo iweiys lun bulukwan towen. Bo misinak.

²⁸ Moses nakaleiwag waseg, tanuwgves lun tougweys gamags. Tage wankuyeim Yowbad itabudabod, mo ikaluweg Natun, imlavag tanuwagan lun, ansinap kamnat tut nag beikous.

8

Kweivaw kaleiwag

¹⁻² Silawun agulivan mawan: Tanuwagan lun avakaein datoveks Yeisuw nisin Yowbad nakabkaleiwag wanakatay walbalab; iwwotet Yowbad nabunatum mounid waseg. Gamag nag iwlules; Yowbad niwlul.

³ Tanuwgves lun babaw siwotet isiwayoubs o iluns waseg Yowbad. Town-vak, kadiloka kweitan youd bisek Yowbad.

⁴ Kukin bises ven watinow, gamag nag bisekes nawotet mamagina tanuwagan lun; peinan tanuwgves lun nisesus, igawa ivvaluts Moses nakaleiwag waseg.

⁵ Tasiyas sibunatum mamagina Yowbad nabunatum walbalab, peinan itakayasis. Kweiboug Moses sivinan biwlul kid Yowbad nabunatum, Yowbad mo idibek, ilana, “Kadiloka kuvakaes youd babaw mawan magin ankakin towen nakatimlakeim wākoy.”

⁶ Tage Kelis nakaleiwag bo ilisow Moses nakaleiwag. O nawotet-vak, ilisow tasiyas siwotet. Peinan sinap towen Yowbad nilivnek, singaya imug.

⁷ Kukin nag kweitan abkalouw bises waseg kaleiwag kweiboug, nag beivag sivinan kwayuwein.

⁸ Tage bo ikakin-wan asisinap bo ikābwag, ilana:

“MiGuyaw yey agulivan mawan:

Igaw tut wanakougwaw mo basek kweivaw kaleiwag wasigeis min-Yisleil sisiy min-Yud.

⁹ Nag mawan kaleiwag towen nasekes tibsiyas, misumkwey natokes, namgwayes, mo ilisawes Yidipt.

Tage bo ipiyaves gunakaleiwag towen, mapuna akamgwayes.”

Yowbad anilivan mawan.

¹⁰ E, ilana,

“Tut towen beikous mo basekes min-Yisleil sikaleiwag kweivaw.

Gunakaleiwag basein waninous o balel wakates mo bamlavag siYowbad, o tasiyas gungamag.

¹¹ Nag bikamtilakes sisiyas o budisiyas bilansa, ‘Kadiloka kukwakins Yowbad,’ nag. Peinan asibabaw bikakinsa yey Yowbad.

Tasiyas toul sisiyas guyawaw bikakinsa yey.

¹² Asisinap kalbaleb waseg bo binok nuwag, banumlev, mo beikous.”

¹³ Livānen kaleiwag kweivaw bo isek, mapuna ipiyev kweiboug kaleiwag. Kaleiwag kweiboug inawotet bo ikous. Kakita bikanig.

9

Buntuman tapwəloul

¹ Kweiboug kaleiwag waseg livānen tapwəloul kweitan kweitan, son livānen buntuman tapwəloul ven watinow.

² Bunatum kweim-wan waseg niwlules, maynatan watoulan, mwayniyuwein wanuwan isilbwed bunkakit. Bunvakaein gog abwodam wadadan teibol kweitan. Teibol waseg nisenas bled wamatān Yowbad. Bunatum town yagan ‘Bunatum Bwaboum.’

³ Mwayniyuwein kweim isilbwed buniyuwen bunatum yagan ‘Singay Bwaboum.’

⁴ Wanuwan bunatum town abeilun won goul-wan nises, waseg igabus gewuw, manisin singay bwein. Yowbad nadidawag, nises bunatum town, goul watoulan palanim palatanok isumweilisa ikous. Wanuwan nadidawag town Yowbad nakaleiwag nilel dakul waseg, son mana mwasanin wanuwan abmavin. Abmavin gog town goulwan, son Elon nakaytuk, kweiboug niyāsus yageivein.

⁵ Wakunuwatan didawag town mamagina anelos askakin kamnat, ingwanis didawag. Bunatum livānen nag kadilok bitalivan bitayakous tut town.

⁶ Youd tasiyas ikatinages ikous, tasiyas tanuwgwes lun mo isousiws Bunatum Bwaboum iwwotets.

⁷ Tage buniyuwen bunatum misinaka tanuwgwes lun sitovek, bweilim katanok katanok mo sivtanok beisiw. Tutan beisiw mo bikow buyav, beisiw. Mo beilun Yowbad waseg peinan ansinap kalbaleb, o pines babaw gamag.

⁸ Bunatum town waseg Yowbad Kululuwan ikatimlakeids sinap kweitan. Igaw Bunatum Bwaboum nises, ta-mawan bitasiw wanuwan Bunatum Singay Bwaboum.

⁹⁻¹⁰ Taninuways kabebay, waseg bunatum town silmanin gudwouvaws yakids. Kaleiwag kweiboug o bunatum kweiboug waseg isiyoubus Yowbad o iluns waseg Yowbad, tage nag kadilok bikidumwal ninous tasiyas sitapwəloul mawan. Misinaka bikambuvisis asisinap aveiyag igege waseg kan bwaboum o soup bwaboum, o kākay sinapun, o wouds kaleiwag-nen. Kaleiwag tasiyas kweiboug nisenas, nisesus ee... tutan bikatilow sinap, mo isen kweivaw.

¹¹⁻¹² Peinan Kelis bo isap, mtown tanuwagan lun silmanin damwāsaws tut town. E, datapwəlouls buntuman, gamag mwasanin nag iwlules ven watinow, tage singay avakaein, bwanabwein. Kelis bo isiw bunawen Bunatum Bwaboum, sivtanok neisiw bo misinak; bo ikow buyāvin tatonen. Nag buyvis mansiyas bulumakaw nitun o mansiyas gout. Tage ikow buyāvin tatonen, waseg iyamiyis kululuwads, vagan tut babaw bitasesus bwein.

¹³⁻¹⁴ Kukin woud bikibik peinan takabkwen aveiyag bwaboum, igaw bisiwlikeid buyvis gout o bulumakaw waseg son bulumakaw kudāvin pulikov-nen, mo bigimagim woud. Tage singay Kelis buyāvin biwid nanoud bigimagim, mo sinap bwaboum bitapiyev; o bitakanow aygan Tamwamov Yowbad. E, Kululuwan Bwanabwein tut babaw bo isigeg, mtown bo ileb Kelis mo itam won tonen kamnat mamagina lun bulukwan, silmanin Yowbad, vagan biwid adsinaps kalbaleb.

¹⁵ Mamagina bo isekeids kweivaw kaleiwag, waseg bitanekes Yowbad. Waseg bidaweids mo bisekeids mwamovads nag beikous, mawan nilivnek. Bo nitasiplaves kweiboug kaleiwag mapuna bitakanigs; togo bo ikanig peinads, mo ikatinabweids.

¹⁶ Kavel takanig igaw mwamov biled nakaleiwag silmanin nakiyay, mo bikanig wankuyeim, taliven bivinis mo bibkunis nakaleiwag.

¹⁷ Igaw mwamov, nag bikanawes. Tage bikanig, mo bitawtoun kaleiwag towen nikanlev.

¹⁸ Taninuways kaleiwag kweiboug. Aleis iweiys imtāmats, buyvis ikawes isiwlikes buk son gamag tasiyas silmānin kaleiwag towen bitawtoun.

¹⁹ E, Moses nakaleiwag babaw bo ikamtilakes tasiyas ikous, ikow buyvis bulumakaw nitsiyas son buyvis mansiyas gout, son yevagam. Mo ikow sip wunuwunun bwabwel son kaligweg yagan yisop, isow buyav, ikow, mo ikatsap wasigeis buk towen son gamags.

²⁰ Igawa isusow, ilana,

“Buyav towen silmānin Yowbad nakaleiwag nidibakeimiy.”

²¹ Mawan mo isow Bunatum Bwaboum son kwavsiyas kwavig silmānin tapwāloul.

²² Kweiboug kaleiwag singay ikatkiles waseg buyav; youd babaw bikibik bivāges bwein. Kukin buyav nag biwtāwout, ta-mawan biwid sinap kalbaleb beikous.

Kelis ikanig peinads

²³ Libālab wuliyougan itakayasis ivkasis watinow mo iwidis buyav waseg, tage youd tasiyas walbalab iwidis kweitan lun waseg. Lun towen singaya bwein.

²⁴ Kelis nag isiw Bunatum Bwaboum towen ven watinow, nag; tage bunatum bunawen nitakayasis mamagina bunatum mounid; tage bo isiw libālab tonen waseg. E, nises wamatān Yowbad tut towen peinads yakids.

²⁵ Nag tut babaw Kelis won bitatama-wan bimtāmat, nag. Sivtanok bo misinak. Tanuwgwas lun sitovek isousiw wanuwan Bunatum Singay Bwaboum bweilim katanok katanok, ikokew buyav (tage nag buyāvin tatonen, nag).

²⁶ Kukin Kelis tuta babaw bimtāmat peinads, adok kweiboug Yowbad nibun ven watinow mo bisilamaw, bweilim katanok katanok bimtāmat, ee... adok tut nagein bo mawan-wan. Tage sivtanoka bo isap, nakabiyokous tut, nagein waseg, itam won tonen, imat vagan bikow adsinaps kalbaleb, binow, bilavew. Mo beikous.

²⁷ Yowbad bo ikaliwageids gamag yakids sivtanoka bitakanigs mo bikatkin adsinaps, aveiyag bwein, aveiyag kalbaleb.

²⁸ Kelis mawan sivtanoka imat mamagina lun bulukwan vagan bikow adsinaps kalbaleb, babaw yakids. Igaw sivyuein mo bisap, nag vagan biwid sinap kalbaleb, tage bikatinabweids yakids, magat biseiw nuwads nakabeiyum towen waseg.

10

¹ Moses nakaleiwag waseg nag mwāsaw tatonen. Mwāsaw towen waseg igaw tut wanakougwaw, tage Moses nakaleiwag waseg, yagada mwāsaw. Moses nakaleiwag waseg iwawaiys lun bulukwan bweilim katanok katanok, pines gamag tasiyas ikanawes nakaleiwag, vagan binekes Yowbad; tage nag kadilok bivag asisinap beibwein.

²⁻³ Kukin bivag asisinap beibwein mo biyakousis mansiyas lun bulukwan, tage nag asisinap ibwein, mapuna ivvaluts bweilim katanok katanok waseg. Kukin lun towen biwid gamag tasiyas sikalbaleb, mo beikous asimwasin. Tage lun towen waseg bweilim katanok katanok ininuways; asimwasin, peinan asisinap kalbaleb nises.

⁴ Mapuna ilneiluns waseg mansiyas bulumakaw o gouts buyvis, tage nag kadilok biwidis sinap kalbaleb.

⁵ Wankuyeim Kelis neim ven watinow, ilana,

“Nag sivinan lun o aveiyag gamag bisekeims, nag. Tage woug nukusekeig.

⁶ Nag sivinan lun bulukwan bitagob beikous, o bitasekeim peinan adsinap kalbaleb; nag.

⁷ Mapun alana, ‘O Yowbad, kukineig nam bawtel muwotet, aveiyag sivinam.

Mawan livāneig nilel Bukitab sinbilbil waseg.’ ”

⁸ Peinan lelel wakunuwatan, ilana,

“Nag ikalin nuwam lun, o nag sivinam siwayoub silmānin lun,

o nag sivinam lun bulukwan bigabus beikous,

o nag sivinam lun silmānin sinap kalbaleb, nag!”

(Moses nakaleiwag waseg nisekes lun tasiyas.)

- ⁹ Mapuna Yeisuw ilana,
“Kukineig nam bawtel muwotet, aveiyag sivinam.”
Mamagina bo igidem kweiboug kaleiwag, vagan biseen kweivaw.
- ¹⁰ Yowbad nanon mawan, mo Yeisuw Kelis itam won mamagina lun bulukwan, sivtanoka imat, bo misinak. Ivageids mo tabweins, angamag yakids.
- ¹¹ Lun tanuwgves tatanok tatanok itamanaws iwwotets yam katanok katanok, ivvalutsa lun Yowbad waseg; tage nag kadilok biwid gamag asisinap kalbaleb.
- ¹²⁻¹³ Kelis gog sivtanoka ilun peinan adsinaps kalbaleb, bo kadilok lun towen silmanin bweilima babaw bisim bisigeg. Ilun ikous mo isin Yowbad wanakatay; ikayamat ee... igaw Yowbad mo bivages tasiyas astameiliw towen mo beibus bimlavags mamagina nakabtatet.
- ¹⁴ E, sivtanoka ilun; bo kadilok lun towen silmanin bweilim babaw bisim bisigeg. Lun towen waseg ivag adsinaps ibwein, angamag yakids.
- ¹⁵ Kululuwan Bwanabwein, towen-vak idibakeids; anilivan mawan:
- ¹⁶ “Yowbad ilana,
‘Yam tasiyas beikous, mo basek gunakaleiwag towen wasigeis tasiyas.
Basen gunakaleiwag wakateis,
O balel gunakaleiwag waninous.’”
- ¹⁷ Wankuyeim mo ilana:
“Nag vayuwein banuway asisinap kalbaleb.”
- ¹⁸ Peinan biwid adsinaps kalbaleb binumlev, mapuna mo biyakous lun silmanin sinap kalbaleb.

Bweina takapwapouts

- ¹⁹ E sigwey, Yeisuw buyavin neiwout peinads, mapuna takapwapouts mo bitasiws wanuwan Yowbad nabunatum.
- ²⁰ Ked towen kweivaw, mwamov silmanin. Tut kweiboug, kweim nisilbwed Yowbad nabunatum. Yeisuw bo ikaliyow vagan bitasiws yakids, peinan won iyagages peinads.
- ²¹ Tanuwagan lun towen datoveks avakaen, ikaleiwag Yowbad nabunatum waseg.
- ²² Bweina bitaskakins waseg, adsinaps didumwal, o bitasimounids vagan bitakapwapouts, mo beikous adpwatys waseg towen. Mamagina bisiwlik nanouds mo beikous dakanuways kalbaleb, o biwid wouds yevagam gimagim waseg.
- ²³ Bitayyousis livanen idanamis silmanin mw̄asaw. Awoum bitagweys. Towen nilivnek idamwasaws bo bitoukum silmanin.
- ²⁴ Kadiloka bitalabeids meiveka yakids, mo bitasiwayoubabaw yakids, o bitawotets bwein.
- ²⁵ Mwasanin nag ikatikunouks silmanin tapwaloul. Awoum bitapiyaves katikunouk mawan tasiyas. Tage bitalabeids meiveka yakids. E, igaw bitakines Yeisuw kakita beiyum beim, mo bitaguyeids vagan bitalabeids meiveka yakids.
- ²⁶ Kukin bitakakins Yowbad sinapun wankuyeim mo tatoneids bitavages adsinaps kalbaleb. Bo bigak! Nag kwayuwein lun nises silmanin adsinaps kalbaleb.
- ²⁷ Tage kadiloka bitawenes Yowbad igaw bikatimop, son kov tawtoun, waseg bigabus tasiyas astameiliw Yowbad.
- ²⁸ Kukin kal isiplev Moses nakaleiwag, asteiy o asteitoun ikamteles ansinap kalbaleb, nag inok nuwes, mo iweiys imat.
- ²⁹ Tage singay takalbaleb towen kavel bipiyev Yowbad Natun, o biyageg nakaleiwag. Kaleiwag towen buyavin biwidids, vagan beibwein adsinaps. Tage takalbaleb towen bo bikamliw Kululuwan towen nililabeids. Yowbad singay bimop ansinap gamag towen.
- ³⁰ Takakinsa Yowbad, peinan anilivan mamagina:
“Yey bamop asisinap kalbaleb; gunawotet towen.”
- Livanen kweitan mamagina:
“DaGuyaws igaw bikatukin nagamag asisinap, aveiyag bwein, aveiyag kalbaleb.”
- ³¹ Yowbad tamwamov bikaleiwag mo bimop adsinaps kalbaleb. Singaya bitawenes!

³²⁻³³ Kuninuways tut kweiboug, ninoumiy bo ikamnat waseg sinapun Yeisuw, wankuyeim abamiy mo ige singay, tage kwaptuleimiy-wan. Bo iyyageimiy o iyagageimiy wavtakon ven o simiyas bo mawan.

³⁴ E, bo inok nuwamiy tasiyas nisenas wadeil peinan Yeisuw angamag tasiyas. Gamag mwasanin niyagages miven, miwliyoug babaw ikawes ikous, tage bo nukumwəsaws-wan peinan nukukwakins miven bwanabwein walbalab nises isigeg.

³⁵ Awoum kid bukunumlaves minamis, peinan igaw maysamiy mo bukulivatus avakaein.

³⁶ Kadiloka bukuvaluts waseg miwotet aveiyag Yowbad sivinan, kuvvaluts ee... mo bukubanes youd towen nilivnek.

³⁷ Anilivan mamagina:

“Igaw tut kadiyakus, gamag towen nimimeim mo bisap. Nag biyouviy.

³⁸ Kavel gungamag towen tadidumwal, bo beimov peinan isimounid.

Kukin gog bikakiws won, nag bikalin nuwag waseg gamag towen; apiyev.”

³⁹ Tage yakids nag mawana tasiyas ikakiws wous, mo biyagages beikous. Yakids kweitan. Yakids tasimounids yakids, vagan kululuwads bises bwein.

11

Livanen simounid

¹ Kukin bitasimounid aveiyag bitaban mo bitanamis, mapuna takakin-wan. Tut towen nag bitakin youd tasiyas, tage tasimounids peinan takakinsa nisesus.

² Butus tammwayas bo taliganes, peinan isimounids waseg Yowbad.

³ Tasimounids mo takakins peinan ven babaw Yowbad nibun, anilivan waseg. Mamagina ikow youd tasiyas nag bitakin, waseg mo ibun youd babaw nitakin.

⁴ Kweiboug Ebel isimounid, mo ilun Yowbad waseg, Yowbad bo ikalin nuwan Ebel inalun waseg, tage tuwan inalun Yowbad nag ikalin nuwan. Mapuna Yowbad idok Ebel tadidumwal. Bo ikanig Ebel; tage livanen mtown nawotet igawa ikatimlakeids, peinan tasimounid towen.

⁵ Inok-vak isimounid, Yowbad mo ikow inow. Nag ikanig. Nag bibanes mtown ven watinow, nag; peinan Yowbad bo ikow inow. Kweiboug Inok nises ven watinow, ilivanes kid Yowbad ikalin nuwan waseg.

⁶ Kukin nag bitasimounid, ta-mawan Yowbad bikalin nuwan wasigeis yakids. Kukin kal binek Yowbad, bikakin-wan Yowbad mounid nises o bisimounid-vak Yowbad bisiwyoubus tasiyas ininekes.

⁷ Kweiboug Yowbad ikatimlek Now mo ikakin aveiyag igaw mo bivag. Now nag ikin youd tasiyas. Igaw-wan, tage bo isimounid, ivkaes inawag, waseg ikratob angamag. Now ansinap didumwal, waseg ikamtel gamag babaw asisinap kalbaleb, mo iyous ansinap didumwal, peinan isimounid.

⁸ Wankuyeim Ebelam isimounid Yowbad aygan, mo ikanaway, ilisow naven, inoun in silmanin ven kweivaw Yowbad nikatigik inaven. E, inoun in, tage nag ikakin avanuy bein.

⁹ Isimounid, mapuna isiwas ven towen Yowbad nikatigik siven, siney Aysak, Yekob. Mamagina bwabwal tasiyas. Sibunatum man kaleivin. E, Yowbad bo ilivnek siven tasiyas Ebelam natun son tabun, mawana nikatigik Ebelam inaven.

¹⁰ Ebelam bo inamis igaw beisiw ven tawtoun waseg, ven towen Yowbad nibun.

¹¹ Nakwav Sela bo ivnavek, tage isimounid, mo itawtoun won, isum, peinan ikakin towen nilivnek igaw mo bitoukum mawana nilivnek.

¹² E taninuways. Tatanok gamag Ebelam anbweilim bo ikous, mo ivag tibun singaya babaw, mawana wutun o alekel babiweis.

¹³ Tammwayas tasiyas isimounids ee... ikankanigs. Nag ibanes youd towen Yowbad nilivnek. Tage bo ikines kadiveiyov, ikalin nuwes peinan. Idokes tatineis sikabgobwaw mamagina bwabwal tasiyas igaw ven watinow nisesus.

¹⁴ Kukin kalisiy ninous mawan mo binineivs siven tatineis.

¹⁵ Kukin bininuways-wan ven towen nilisawes mo bibənes siked vagan beiyums.

¹⁶ Tage sivines kid kweivaw ven bwanabwein, walbalab nises. Mapuna Yowbad nag ivag anmwasin, peinan idokes siYowbad. E, bo ikatineg siven.

¹⁷⁻¹⁹ Kweiboug Yowbad niyakwen Ebelam, tage isimounid bwein, itam natun anmwānet, beiweiy mamagina lun bulukwan kid. Livānen towen Aysak, Yowbad nilivnek, ilana,
“Aysak waseg babun deleim yakoum.”

Tage Ebelam bo isimounid, itam natun towen. Idok Yowbad kadiloka biyakit takanig; mamagina kabebay waseg natun Aysak beimat, Yowbad mo biyakit vayuwein bisek Ebelam. E, Ebelam isimounid mo Yowbad ileb natun mwamovan silmānin.

²⁰ Wankuyeim Aysak isimounid mo ilivnek sikabmwāsaw Yekob son Isaw.

²¹ Wankuyeim Yekob kakita beimat, isimounid, anilivan bwein mo ikatigik pines Yosep nitun tawaw asteiy, igawa geg ikkulul wakunuwatan nakaytuk.

²² Wankuyeim Yosep, bo ikous anbweilim, mo ilivan livānen taliven min-Yisleil peinan bilisawes Yidipt beiyums, ilana,

“Tatuwag kukow, kunow, kudibwen wadiven.”

²³ Wankuyeim Moses inan nikop natun, isimounids son namwan mo isowmes kweitoun tibukon, peinan ikakinsa apwaw tamnabwein, o nag iwenes king inakaleiwag.

²⁴⁻²⁵ Wankuyeim Moses ivakaein, isimounid waseg Yowbad, nanon ilana,
“Awoum gamag ninous bilansa, ‘Adok inan manāwen Pelow natun’; awoum.”
Sivinan gog abes bigeg siney Yowbad nagamag. Nag sivinan bimwāsaw tut kayakus waseg sinap kalbaleb.

²⁶ Nanon ilana,
“Awoum bakow Yidipt wuliyougwan. Bweina biyagageigs peinan Kelis angamag ye. Townen waseg igaw mo bamwāsaw, mamagina maysan gunawotet.”

²⁷ E, isimounid mo itokes min-Yisleil ilisawes Yidipt. Nag iwen king towen nikawkun. Ivvalut-wan. Mamagina bo ikin Yowbad, tage matan nag ikin, tage bo isimounida-wan.

²⁸ Isimounid mo isagal, Kaltuwon sigeilin. Lāmiy buyāvin iwlik. Awoum ge towen tawayin gamags beisiw wasibunatum beiweiys kunitaws.

²⁹ Asbabaw isimounids mo ikallituwanis Yol Bwabwel, mamagina pwepway nibunab nikalituwanis. Wankuyeim min-Yidipt iyokons, bo nag; mo iwgweles.

³⁰ Wankuyeim tasiyas nisiwunis ven yagan Yelikow yam kweinim kweiy waseg, isimounids, nisiwunis ven towen, boul palatan palatan mo ikalativatow.

³¹ Wankuyeim nakubukwab manawen Leyab nisimounid ilabes Yosuw nagamag tasiyas asteiy takinwunins ven, manāwen Leyab nag iweiys; tage tasiyas takapidabs iwaweiys ikous.

³² Ta-mawan bitakavtagis yiges asbabaw tasiyas tasimounids, peinan singay babaw. Gidiyon, Bālak, Samson, Yeritak, Deibid, Samwel o tasiyas palopits.

³³⁻³⁴ Tasiyas isimounids mo naviy waseg itawtouns wasigeis ven kawkāveks, ikaleiwags asisinap didumwal waseg, ibānes youd tasiyas Yowbad nilivnek, ivāges mo ituk ninous mansiyas layon; nag igades; kov singay avakaein isiwmates; ikatinabwes tatineis naviy waseg; tougweys tasiyas mo itawtouns; itawtouns naviy waseg; ikawsapes takanaviys tasiyas nivvatays wasigeis.

³⁵ Vinay mwasanin asigamag bo ikits kanig waseg. Tasiyas takalbalebs ivvasiganis Yowbad nagamag mwasanin, ivvalutsa bo nag, peinan isimounids. Kukin bipiyaves Yowbad, mo beikous takalbalebs siaway wasigeis. Nag gog, isimounids-wan. Igaw bimtāmats, sivines beikits vayuwein mwāsaw avakaein waseg.

³⁶ Bo isibawes Yowbad inagamags mwasanin, mwasanin iwaweiys vatul waseg, mwasanin iyawanis nimes o kikeis vatul waseg, mwananin isenas wanuwan deil.

³⁷ Mwasanin iwaweiys dakul waseg. Mwasanin itāvis paley; mwasanin iwaweiys pulut tanmunun waseg. Yowbad nagamag mwasanin asikweim kulivis mansiyas sip o gouts, ininounasa-wan, ta-ivag siven, abes igege peinan gamag niybilebes.

³⁸ Ven watinow nag ibunakes, peinan kalbaleb. Gamag babaw ikamliwes, mapuna inounas ineis nawoud makaw waseg; mwasanin ineis wākoy; sibunatum mwasanin leg o mwasanin takunumwan.

³⁹ Butus asibabaw tasiyas bo taliganes, peinan isimounids waseg Yowbad. Tage nag ibānes youd towen nilivnek.

⁴⁰ Peinan youd towen bwanabwein Yowbad ikakin igaw mo bisekeids yakids. Sidayas tasiyas mo bitalivatus youd babaw bwanabwein.

12

¹ Taninuways asibabaw tasiyas kweiboug, isimounids bwein. Kadiloka yakids bitatoukums vagan bitasawls bwein, ked towen waseg. Kwanad moumouvit bitalev. Sinap kalbaleb bitapiyev peinan mouvitan isilbwadeid. E, kadiloka bitatoukums bitasawls bwein dakeds towen wamatads.

² Yeisuw takinbunikes, mtown datamumugs peinan isimounid bwein, mamagina absilamaw son abiyokous mtown. Kweiboug Yeisuw nises ven watinow, nanon nag inek libalab mwāsaw-nen, tage bo ikakin igaw tut wanakougwaw mo bimwāsaw. Mapuna itam klos mamyuyan-nen, musinan klos ikaptul; ikous, Yowbad mo isek aban wanakatay, inakabkaleiwag waseg.

Yowbad iyadumwāluds

³ E, taninuways Yeisuw. Takalbalebs singaya ikamliwes, tage nag ipiyev inawotet towen. Yakamiy māwan, awoum bikawegweis woumiy. Awoum bukusoumats, awoum.

⁴ Yakamiy nukuvvatays waseg sinap kalbaleb, tage nag kweitan bwabwagan kubānes wawoumiy, nag kukwanigs māwan Yeisuw, nag.

⁵ Adok kunumlaves inageiguy towen nidokeimiy nitun tonen, livānen nises mamagina: “Natug yak, kukin daGuyaws biyadumwālum, awoum kupiyev.

Kukin new bikow beiweim, awoum beivag ampwayat.

⁶ Kukin daGuyaws sivinan yakids, mo biyadumwāluds.

O kukin bitameid nitun yakid, mo bikow nanew beiweid.”

⁷ Kukin abamiy bigeg, bweina kutoukums, peinan iyadumwālumi. Yowbad idokeimiy nitun yakamiy. Peinan timdayas tasiyas bo iyadumwāluds nitsiyas yakids.

⁸ E, babaw yakids māwan. Kukin tamam nag biyadumwālum, adok nag natun tonen yakoum. Adok tobwag gamag natun yakoum.

⁹ E taninuways, timdayas ven watinow biyadumwāluds mo bitagoulus tasiyas. Ikadiloka bitagoulus beibwein Tamads walbalab, peinan kululuwads nises waseg towen. E, bitagoulus towen mo bitamovs.

¹⁰ Timdayas ven watinow tut kayakus waseg, kukin beitam ninous mo biyadumwāluds, tage Yowbad iyadumwāluds vagan bikatimweis adsinaps kamnat, mamagina ansinap tonen kamnat.

¹¹ Tut towen waseg biyadumwāluds mo bigidaged wouds; tage nag bikalin nuwads waseg. Igaw gog tut wanakougwaw anagids mo bitabānes, mamagina adsinaps didumwal son niwal. Kukin bikākin matads peinan abads igege tut towen, igaw wanakougwaw mo bitabānes anagids.

¹²⁻¹³ Kadiloka bukutawtouns, miked bukuvages vagan bukusawls beibwein, mo tasiyas takagayals nag bikalouws, tage beibwein kikeis tasiyas mo bitawtouns.

Awoum bitapiyev Yowbad nasiwayoub

¹⁴ Kutoukums vagan simiyas bibanes niwal wasigeis yakamiy. Kutoukums vagan amisinap bikamnat. Kukin gog nag, nag bukukines daGuyaws.

¹⁵ Kuvnāseimiy. Yowbad nasiwayoub awoum biyamkwen kavel wasigeis yakamiy. Awoum mwasanin bikameiliws mo biyagageimiy babaw yakamiy; māwan nugwed bitatom kan mo biyageg.

¹⁶ Awoum ge teitan bikanavay mav. Awoum teitan bipiyev sinapun Yowbad, mawan Isaw kweiboug, peinan nigimwal kan, sivtanok ikam, mo taman kiyayan isek bwadan, maysan kan.

¹⁷ Kukwakins tut wankuyeim Isaw mo ivag sivinan nakiyay towen; nag gog. Ta-mawan. Isaw singay sivinan bikatilow ansinap, ivvalam silmanin, tage nag kweitan ked iban.

¹⁸⁻¹⁹ Davanuys nitameis kweivaw. Nag mawana ven towen nitassikes, nag mawana kov nigidaged, nag mawana dadub son libgagay o bwaw, o bwagig aygan, o aygan towen tasiyas niliganes mo ilansa, "Awoum vayuwein aygan bisekeids mawan."

²⁰ Peinan bo iwenes Yowbad anilivan mamagina:
"Awoum gamag o aleimi bimeis wakoy. Kukin aleimi naтан beim, kuweiys dakul waseg, beimat."

²¹ E, youd towen nikines, singay ivag aspwayat. Moses-vak ilana,
"Itatat woug, agpwayat."

²²⁻²⁴ Yakids gog nitameis koy yagan Sayon, Yowbad Tamwamov inaven, Yelusalem walbalab. Min-libalab singay babaw katuyouns nimeis silmanin sagal avakaein, sisiyas Yowbad angamag babaw nigginsaps, yiges bo ilel walbalab, sisiy takalawagein youd babaw, mtown Yowbad, siney kululuwes-wan tasiyas tadiumwals bo nivages bwein asisinap tasiyas, sisiy Yeisuw, mtown nilivkaes kweivaw kaleiwag, buyavin tonen waseg isiwyoubuds, mamagina isiwlikeids vagan bitanekes Yowbad. Nag mawana buyavin Eibel kweiboug.

²⁵ Kuvnaseimiy. Awoum ge bukupiyaves mtown nidibakeimiy. Kweiboug gamag mwasanin ipiyaves towen niguyeids ven watinow, mo ilivatus kalbaleb. Magat bitapiyaves mtown walbalab niguyeids, singaya kalbaleb bitalivatus.

²⁶ Kweiboug aygan ivag mo igewn ven watinow. Tage nagein ilivnek mamagina:
"Sivyuein bavag mo beigewns ven watinow son libalab."

²⁷ Ilana, "Sivyuein," peinan beigewns mo beikous ven tasiyas, peinan nibunis. Tage youd mwasanin ta-mawan beigewns mo bisesus bisigagas.

²⁸ Kadiloka bikalin nuwads, peinan davanuys kweivaw singay tawtoun; ta-mawan beigewns. Takaleiwag ven towen Yowbad. Adsinaps bwein waseg mo bitayakawanes, bitagoulus, bitavnases beibwein.

²⁹ Peinan daGuyaws mamagina kov ikikayeil.

13

Sinap bwanabwein

¹ Awoum kupiyaves siwayoub simiyas wasigeis.

² Awoum kupiyaves amibwabwal. Kweiboug mwasanin itams asibwabwal wasigeis; nag ikakins min-libalab tasiyas.

³ Kuninuways tawlimiyas wadeil nisesus, kulabes, mamagina yakoum simwey tasiyas kusesus.

Kuninuways tasiyas abes igeg, peinan igaw gimgeilin ven watinow yakoum.

⁴ Babaw yakamiy, kadiloka kuvays beibwein. Awoum kusubwans, peinan igaw Yowbad bikatimop asisinap tasiyas taggeinawls peinan ikanavays mav.

⁵ Awoum bimwamon matam silmanin money. Aveiyag nises waseg yakoum bo kadilok. Awoum bukunineivs vayuwein. Peinan Yowbad anilivan mamagina:

"Nag balisaweim. Nag bapiyaveim, nag."

⁶ Mapuna takapwapouts talansa,
"GunGuyaw ilabeig.

Kukin gamag amawan binuwakeigs,
nag beivag agpwayat, nag."

⁷ Kuninuways asisinap mitamumugwas tasiyas nikamtilakeimiy livanen Yowbad. Kuninuways asisinap anagin bwanabwein, peinan nisimounids. E, kuvages mawana tasiyas.

⁸ Yeisuw Kelis ansinap katanok-wan, kweiboug, nagein, o igaw tut wanakougwaw. Ansinap katanok-wan.

⁹ Kukin takatimlakays tobwag bimeis, asisinap kweitan, awoum kuliganes ages. Tasiyas idokes bikatimlakeids sinapun kan kweitan kweitan, tage asisinap nag ilabes tasiyas. Misinaka Yowbad nasiwayoub bikimtuw kululuwads.

¹⁰ Dakabeiluns nises. Tanuwgves lun ven watinow nag kadilok beikams waseg dakabeiluns yakids.

¹¹ Town tanuwgves lun sitovek ikokew buyvis man mansiyas neiweiys o neiluns waseg Yowbad, peinan adsinaps kalbaleb. Ikow buyvis, isiw Yowbad wanbunatum wanuwan. Ikous, wous mansiyas man mo igabus watoulan ven. E, taninuways mansiyas man.

¹² Yeisuw-vak mawan neiweiys awkwedan ven watoulan, mamagina lun bulukwan buyavin iwidids angamag yakids.

¹³ Mapuna bitanekes Yeisuw watoulan ven. Gamag mwasanin mo bikasigumids yakids mawana town, Yeisuw.

¹⁴ Wadaban pwepway davanuys nag bises bisigeg, tage tanineivs davanuys, tut wanakougwaw silmanin.

¹⁵ Yeisuw bilabeids, vagan bitatams waseg Yowbad, mamagina bitaluns waseg. Mawan mo bitakavvasis Yowbad beibwin. E, yakids nitatams yagan waseg, wadouds waseg mo bitasiwyoubus Yowbad.

¹⁶ Awoum kupiyaves siwayoub. Mivavag waseg kusiwyoubus simiyas. Yowbad mo bikalin nuwan waseg, mawana lun.

¹⁷ Kwanawes ages mituwaveks, o kutams sikaleiwag waseg. Tasiyas siwotet imtakavates kululuwamiy. Igaw Yowbad bikatiganes siwotet silmanin. Kadiloka bukutams sikaleiwag waseg mo bimwasaws tasiyas; kukin gog bukukwabwags yakamiy mo bigeg ninous tasiyas.

¹⁸ Kunitougs pinem yakamey. Kakakin bwein mawotet kamnat. Sivinem amasinap beibwin youd babaw wasigeis.

¹⁹ Singay sivinag bukunitougs peinag, vagan nuwanaw mo baw.

Livan siwgyoub

²⁰⁻²¹ Yowbad waseg niwal nises. DaGuyaws Yeisuw neimat, tage Yowbad bo iyakit. Inakeleiwig town bises bisigeg. Buyavin waseg ikatinabweids o imtakavateids bwein, mawana alen sip yakids.

Yowbad bweina bisekeimiy youd babaw bwein vagan bukuwteles mawana town sivinan. Yeisuw Kelis talabein Taman mo iwgow nanouds mawana nanon town. E, mo bitayakawns waseg Kelis tut nag beikous. Eimen.

²² Sigwey, milet town kakit neiw. Let town waseg bo aguyeimiy. Awoum bigeg ninoumiy. Bweina kwaptuleimiy.

²³ Livan bwadads Timotiy bo kuliganes, peinan bo ilik wadeil, isap. Kukin nuwanaw beim, mo bakaw, bakalakwaneimiy.

²⁴ Amalivan siwayoub kusekes tasiyas mituwaveks sisiyas tasiyas tayeklesiys. Gamag tasiyas meinoy nimeis Italiy asilivan siwayoub wasigeis yakamiy.

²⁵ DaGuyaws bisiwyoubumiy amibabaw-wan. Eimen.

YEMES

Yemes nilel tayekelesiys silet towen; ilana, “Bweina bitasimounids Yeisuw Kelis waseg mo bitakanawes aygan. Bitasiwyoubus-vak tasiyas tasimavs. Kukin gog guyawaw bikayuses mayses tasiyas sitawwotet, wankuyeim Yowbad bimop asisinap kalbaleb. Ave-tut abads bigeg, bitakaptuleids, bitanitougs Yowbad waseg, mo bilabeids.”

Nakabsilamaw

¹ Kalin nuwag min-Yisleil yakamiy, amikum sinawatan akweiy, nukusikes ven babaw, ven kweitan kweitan wasigeis; gunalet neiw, kuvinis. Yey Yowbad natouwat, o daGuyaws Yeisuw Kelis natouwat yey, yagag Yemes.

Simounid son sinap

² Sigwey yakamiy, igaw bukulouvats mikabiyokon kweitan kweitan waseg, kadiloka kumwasaws silmanin.

³ Yowbad inakaleiwag mawan. Kukin abamiy bigeg, kadiloka kusimounids beibwein waseg Yowbad mo bukwapatuls o bukutawtouns.

⁴ Kadiloka bukwapatuleimiy beibwein, sinap bwein mo bukukawes beikous. Nag aveiyag bikabwag wasigeis yakamiy, nag.

⁵ Kal yak sinapun Yowbad nag kukwakin bwein, kadiloka kunitoug waseg Yowbad mo bisekeim, peinan singay tasiwayoub Yowbad. Mtowen nag bikaneim, nag.

⁶⁻⁸ Kukin bukunitoug waseg Yowbad kadiloka bukunmis bwein. Kukin nag bukunamis bwein nag aveiyag bukuban, peinan nanoum akweiy. Kukin kal ivag nanon akweiy, ansinap mamagina kaysay wayol ikivakuv ee... mo bikawot beim wakawalaw mo beikous. DaGuyaws nakaleiwag bo mawan, nag aveiyag bisek taw towen, nag; peinan nanon babaw isisawl palatan, nag aveiyag biban, nag.

Guyawaw o tasiyas tasimavs

⁹ Kadiloka bwadads tasimav teitan bimwasaw peinan Yowbad biyamwen.

¹⁰⁻¹¹ Tage kadilok tasiyas guyawaw bimwasaws peinan biyabus; mamagina awuyow lalan bikalayag, beikous. Peinan igaw beivag klas avakaein, mo beiyag awuyow, lahan bikalkalouws, sikamnabwein beikous. E, guyawaw mawan, igaw biwwotets-wan, nuwanaw mo bimtamats.

Dakabiyokons

¹² Kal yak mukwabiyokon waseg bukusesun-wan kwaptuleim, mo bukumasaw kid. Yowbad bisekeim mulalan, mamagina mwamovam. Ykids tasiwyoubus Yowbad, anili-van mounid bo bisekeids mwamovads.

¹³ Igaw mukwabiyokon waseg, awoum bukulivan, “Yowbad isimkineig”; awoum. Nag kal bisimkin Yowbad sinap kalbaleb silmanin; o Yowbad nag bisimkineid sinap kalbaleb silmanin, nag.

¹⁴ Tage nanoud tatoneid bisimkineid, igaw mo biseiw nuwad sinap kalbaleb silmanin.

¹⁵ Kukin nanoud waseg sinap kalbaleb, sinap towen bivakaein; nakabiyokous waseg bikop natun, yagan kanig.

¹⁶ Sigwey bwanabwein yakamiy, awoum teitan bikatidavimiy.

¹⁷ Tamads walbalab ansinap kamnat, mtowen issiwyoubuds youd babaw bwanabwein o sinap babaw bwanabwein. Nag teitan gamag bisiwyoubuds bwanabwein, nag. Yowbad anmwanet tut babaw ansinap katanok-wan, bwanabwein, kamnat.

¹⁸ Anilivan mounid waseg bo ivageids, vagan bitamugwas Yowbad inakabwabub waseg; peinan nanon bo mawan.

Kadiloka bitaliganes livqnen Yeisuw

¹⁹⁻²⁰ Sigwey bwanabwein yakamiy, kunages sinap towen. Nuwanaw kuliganes livan bwein, tage kadilok kuyouviys silmānin amilivan sona mikavikun. Ta-bukuwteles Yowbad nawotet mikavikun waseg, nag.

²¹ Kupiyaves geg sinap bikibik, son sinap babaw kalbaleb; kutams bwein waseg livānen Kelis. Livan towen mo beisiw waninoumiy, bikatinabwes kululuwamiy silmānin Yowbad.

²² Livan towen awoum bukuliganesa may, mogo bukwatidavimiy tatineimiy. Kadiloka kukwanawes livan towen.

²³⁻²⁴ Kukin kal binganega mav, mtowen mamagina gamag kavel ikin magin gilas waseg. Ikin ikous, inoun, mo inumlev ankakin amawan. Tasiyas nuwanaw binumlaves kaleiwag bwein.

²⁵ Tage kal yak bukukinbunik Yowbad nakaleiwag bwanabwein, waseg bilikuds mo taneis wamnat; o bukuvalut waseg kaleiwag towen, mo bukumwasaw mukwawotet waseg. Kadiloka bukwanow livan towen; awoum kwatlutega mav, adok mo bukunumlev kid.

²⁶ Kukin kal idok itapwāloul ibwein, tage nuwanaw wadon, bo ikatidavina tonen; itapwāloul mav.

²⁷ Tapwāloul bwanabwein o kamnat silmānin Tamads Yowbad, mamagina bitalabes tasiyas gumakey o nakwabs, peinan abes igege; o bitapiyaves ven watinow sinapun.

2

Awoum kuvnāses teitan o kupiyaves son

¹ Sigwey yakamiy, daGuyaws Yeisuw Kelis ansinap kamnat. Magat bukusimounids waseg Yeisuw, awoum bukwasigumis gamag mwasanin, o kuvnāses sisiy; awoum.

²⁻⁴ Kukin gamag asteiy bimeis wasinagog, wamitapwāloul, teitan anakweim maynamnabwein, antuwetuwanaman goul-wan; teitan gog tasimav, anakweim sigsagob, kukin bukuvñāses towen anakweim maynamnabwein, o kulansa, "Kum, kusin wanakaew wākeb," o kukin bukudibakes towen tasimav, kulana, "Kun, kusin watinow," adok peinan kwasigumis towen tasimav, kukwatukins gamag wasigeis; bo kalbaleb amisinap towen.

⁵ Sigwey bwanabwein yakamiy kunages agulivan. Yowbad sivinan tasiyas tasimavs vāgan bisimounids bwein waseg Yowbad. Anilivan mounid bo iseke, peinan isiwayoubs waseg; igaw mo beisiws wanakabkaleiwag. E, tasiyas tasimavs isimounids waseg Yowbad mo beisiws wanakabkaleiwag.

⁶ Tage nukuyagages tasiyas tasimavs. Asimwasin. Bo igak! Kalisiy tayakeikays wasigeis yakamiy? Kalisiy iyateleimiy? Adok tasiyas guyawaw mwasanin.

⁷ O tasiyas mwasanin iyages yagan datoveks Yeisuw.

⁸ Kukwakins datoveks nakaleiwag kweiboug, Bukitab waseg, mamagina, "Kadiloka bukuvnas soum, māwana kuvnāseim tatoneim."

Kukin bukwanawes livan towen beibwein, mo beibwein amisinap yakamiy.

⁹ Kukin gog bukuvñāses gamag mwasanin o bukwasigumis gamag mwasanin, bogo amisinap kalbaleb, peinan kusiplaves Yowbad nakaleiwag.

¹⁰ Kal yak bukuvnas Yowbad nakaleiwag babaw, tage sinap katanok waseg bukukwalouw, bo bigeg amsinap; mamagina youd babaw wasigeis bo nukukwalouw.

¹¹ Tamads gog nilivan, "Awoum kusubwan," nilivan-vak, "Awoum kuweiy gamag." Anmwāneta Yowbad anilivan tasiyas. Magat bukuweiy gamag, tage nag kusubwan, bogo takalbaleb yākoum, peinan bo kusipley Yowbad nakaleiwag.

¹²⁻¹³ Kadiloka bukuvñāses beibwein amilivan o amisinap. Yowbad nakaleiwag waseg bo ilikuds mo taneis wamnat. Igaw nakaleiwag towen waseg bo bikatkineids.

Kukin nag binok nuwam soum, Yowbad nag binok nuwan yākoum. Tage binok nuwam soum, Yowbad mo binok nuwan yākoum; nag bikamtānim, nag.

Bitasimounid waseg Yeisuw kadiloka bitakanow aygan

¹⁴ Sigwey yakamiy, kukin kal idoki bisimounid waseg Yeisuw, tage nag bikanow aygan, adok bo isimounid mav. Yeisuw nag bikatinob gamag towen.

¹⁵⁻¹⁶ Kal yak bukunek tayakelesiy teitan o nātan, anamoun isesuna, anakweim sigsagob, bukudibek kulana, "Amkweim kupwālum, bimuymuy woum; kam kukwam bukwamuweip, e mo kumwāsaw," tage nag kweitan kweim bukusek, o nag kweitan kan; adok bo kulivan mav yākoum.

¹⁷ Kukin bukusimounid, tage nag kwanow Yeisuw aygan, mo bukusimounid mav; magina simounid bo ikanig waseg yākoum.

¹⁸ Adok gamag teitan bidibakeim, bilana, "Yākoum kusimounid waseg Yeisuw; yey gog akanow aygan."

Kukin nag kweitan nawotet Yeisuw bukuwtel, amāwan bukusimounid? Tage yey asimounid, mapuna bukukines Yeisuw nawotet nawtel.

¹⁹ Adok kusimounids peinan Yowbad anmwānet nises. Bwein! Tage simounid sinap towen waseg nag kadilok. Tasiyas baloum-vak isimounids, to ivag aspwayata singay.

²⁰ Takabalāwein yak, adok bakatimlakeim makava simounid nag bilabeim. Anagin nag. Tage simounid son wotet bo bilabeim.

²¹ Kunuw tabuds Ebelam, ikanow Yowbad aygan; magina itam natun Aysak, isek Yowbad, nakabeilun waseg. Mapuna Yowbad idok tадidumwal towen.

²² Kuninuways Ebelam isimounid mo iwotet, o nawotet waseg takakin singay isimounid bwein.

²³ Sinap towen mamagina,

"Ebelam isimounid Yowbad waseg, mapuna idok Ebelam tадidumwal."

Mapuna idokes veiyon Yowbad, mtowen Ebelam.

²⁴ Taminuways igaw bitasimounids waseg Yeisuw, bitakawes nawotet mo Yowbad bidokeids tадidumwals yākids. Makava simounid nag bikadilok.

²⁵ Nakubukwab nāwen yagan Leyab kweiboug ansinap māwan, Yowbad idok nadidumwal peinan ileb Yosuw nagamag asteiy, ikidumwālus, mo itanouys bwein kweitan ked waseg.

²⁶ Takakins geg kal won ta-ivag kululuwan, mounida takanig tonen. Māwana simounid, ta-ivag nawotet, mounida kanig.

3

Awn

¹ Sigwey yakamiy, awoum bukumlavags takatimlakay babaw yakamiy. Takatimlakay yakamey kukin sivinem bakakatimlakay, o nag gog bakavag, Yowbad singay bimop sinap towen bo nakavag, o yakamiy-vak māwan.

² Tut towen tablabols yākids. Kukin kal nag beibol anilivan waseg, adok gamag towen singay bwein, peinan kadilok bikaluweg ansinap tonen.

³ Tasenas tanmunum son vitulen wawudous mansiyas hos wasigeis. Man mansiyas kawkaveks mo takavaveis takidumwālus, bitouvins bineis ampalawen sivinads.

⁴ O wag māwan, magat wag singay avakaein, o yag avakaein bitotow, tage kavaveis nag bivakaein, kakit; tage kadilok bitakavaveis, wag mo bisawl bein ampalawen sivinads.

⁵ E, awads bo māwan, woun wuliyougwan kakit, towen awn, tage natawtoun singaywan, bikaluweg youd babaw. Kov kakit kadiloka bivakanot bigob kay avakaein, beikous.

⁶ Awn gog mamagina kov, silawun kalbaleb singay-wan, kadiloka biyagages woun wuliyougwan babaw, adsinaps babaw biyageg beikous, peinan Seitan ivakanot youd babaw awads waseg.

⁷⁻⁸ Tawaw yākids kadilok bitakaleiwags wasigeis bulawud babaw, tasiyas wanawoud, tasiyas iyoyows wanakaew, tasiyas itatets wapwepway, o tasiyas wabwanit, e, bo takaleiwags wasigeis; tage nag kal kadilok bikaleiwag awan waseg, peinan kalbaleb singay-wan, mamagina pwātuw, kanig silmānin.

⁹ Kunages sigwey yakamiy, awads waseg takavasis Tamads wanakaew, mogo tayages gamag tasiyas Yowbad nibunis, migis māwana towen.

¹⁰ Awn katanok waseg isunap livan bwein son livan kalbaleb. Bo igak!

¹¹ Tabta yuyeil sivtanok beibwab yevagam son yol? Adok nag.

¹² Ta-mawan bukukil soup bwanabwein yuyeil yayan waseg, nag. Tabta yaveinun waseg bukulep oliv anagin? O bukulep anagin yaveinun kay yagan gleip waseg? Adok nag, peinan nag kweitan sinap mawan. Ta-mawan qwn kalbaleb bilivan bwein.

Sinapun libalab

¹³ Yakamiy tassinap o takatanaks yakamiy, awoum kwypamwes sinap. Kadiloka kuotets bwein. Gamag babaw mo bikakins amsinap bwein.

¹⁴ Tage kukin bimouvit dabam, o bukwamliw soum, nag kadilok bukwaypom sinap, peinan tayyaweid yakoum.

¹⁵ Sinap towen nag meinoy neim walbalab, nag; ven watinow sinapun, mamagina Seitan ansinap.

¹⁶ Kukin bukwayapams o bukwameiliws, mo bukutavileiys bukulivis bukumlavags bod babaw yakamiy, o sinap babaw kalbaleb bisap wasigeis yakamiy.

¹⁷ Tage sinapun libalab bwanabwein waseg bitasiwayoub, bitakagmānum, bitakanow kaeig, bikalin nuwad sod, o bitaleb sod; nag bitayaweid o bitakatidavidav, nag.

¹⁸ Kukin gog bitasiwayoub vāgan beikous kameiliw; wotet to didumwal; anagin wotet towen igaw beiuw, yagan sinap didumwal.

4

Kalbaleb sinapun ven watinow

¹ Aveiyag wawun kukwammeiliws o kuvvatays simsimiya wasigeis? Adok peinan amisinap yagan kayapam, to ivag ninoumiy babaw.

² Tamtimwamons yakamiy, kupwāktsa nag; mapuna kuweiys gamag. Kunineivs, tamāwan bukubānes, mapuna kukwammeiliws o kuvvatays. Bo igak! Nag kunitougs waseg Yowbad; mapuna nag bukubānes.

³ Kukin bukunitougs, nag kubānes, peinan mikanitoug kalbaleb. Mikanitoug kalbaleb peinan amisinap kayapam.

⁴ Takalbalebs yakamiy, adok kupiyaves datoveks Yowbad. Peinan kukwawes sinapun ven watinow, adok kupiyaves sinapun Yowbad. Kukin beivag sivinamiy ven watinow sinapun mo bukwamliwes Yowbad.

⁵ Awoum kudokes makava livan towen kweiboug nile mamagina, “Kululuwan, waseg towen Yowbad isen wanuwads singay ikalpwākit wasigeis yakids.”

⁶ Tage Yowbad singay ilabeids. Kweitan livan nises Bukitab waseg mamagina, “Tasiyas takayapams Yowbad isilbwades; tage tasiyas tammanums Yowbad bisiwyoubus kid.”

⁷ Kadiloka kutams Yowbad nakaleiwag waseg. E, kadiloka kupiyaves Seitan, mo bisawl.

⁸ Takalbalebs yakamiy, kusineikimas Yowbad waseg, Yowbad mo biwekeimiy yakamiy. Kuwidis amisinap kalbaleb; beivag ninoumiy katanok, sinap kamnat silmānin.

⁹⁻¹⁰ Kadiloka bigeg ninoumiy, peinan amisinap kalbaleb. Kuvvalams avakaein. Awoum kumwāsaws o kugagigs, awoum. Bweina kumanums wamatān Yowbad, igaw mo bilabeimiy, biyaweneimiy.

Awoum kuvtokays livan

¹¹ Sigwey, awoum kuvtokays livan simsimiya wasigeis; awoum. Kal yak bukuvtok livan soum, o bukuyeg soum, mamagina kuyeg Yowbad nakaleiwag. Awoum. Kukin bukuyeg Yowbad nakaleiwag adok bo kupiyev kaleiwag towen, o bo bukumlavag takaleiwag teitan yakoum. Awoum.

¹² Takaleiwag anmwānet-wan. Mtowen kadilok bikatinabweids o biyagageids. Makava gamag yakoum, awoum kuvtok livan soum.

Awoum kukwaypamwes sinap

¹³ Kunages agulivan guyawaw yakamiy. Awoum kulivans, “Nagein o nubweig bakay-wout bakan palatan, bakasesun katanoka bweilim, bakakow mavavag singay babaw, bakamey.” Awoum.

¹⁴ Peinan nag kukwakins aveiyag bukulivatus nubweig, o asinavin bukukwanigs. Mwamovads gog mamagina wob, bisesun tut nag biveiyov, mo beikous.

¹⁵ Kadiloka bukulivans, “Magat daGuyaws nanon mawan, bakasesuna mo bakawtel mawotet mawan mawan.”

¹⁶ Nagein gog kukwaypamwes amisinap, mamagina tagagas yakamiy. Sinap town kalbaleb.

¹⁷ Kukin kal bikakin aw-wotet bwein tage bipiyev wotet town, town gog ansinap kalbaleb.

5

Guyawaw sinapun

¹ Kunages agulivan guyawaw yakamiy, kadiloka bukuvalams avakaein peinan mouvit singaya bukulivatus.

²⁻³ Miwlioug babaw bipsapwas; man bikaboulis amikweim; mimoney bipwapop peinan kwayuses; anpwipop bimlavag mamagina panous, biggob woumiy, nakabiyokous tut waseg, peinan singay babaw kwayuses.

⁴ Mayses tasiyas tawteleins mibag bo kwayuses, igaw nises wamibunatum. Money town iwkuwak. Aygan bo iligen Tatawtoun Yowbad; mapuna bikatimop amisinap kalbaleb nukuvvages.

⁵ Nukumwasaws ven watinow waseg, nukukwamkwams mamagina misagal yam babaw waseg.

⁶ Nukuyateles tasiyas toubweins mo nukuweiys. Nag ikatimapus amilivan. Makava nukuybilebes. E, Yowbad bikatimop amisinap guyawaw yakamiy.

Kukwapatuls o kuninitougs Yowbad waseg

⁷ Sigwey, kadiloka kwaptuleimiy, kusesus-wan ee... igaw daGuyaws vayuwein bisap. E, kuninuways tabgubag ansinap, ikapatul, igaw kweis beikweis wuwal waseg, wankuyeim bulbweilim kweis, mo bitayoy kan singay avakaein.

⁸ Bitawtoun amisinap, kwapatuls, peinan nuwanaw daGuyaws bisap.

⁹ Awoum kuvtokays livan simsimmiyas wasigeis. Kukin bukvok livan soum, daGuyaws mo bikamtanim yak. Takaleiwag town igaw wakoukwed nises; nuwanaw bisap.

¹⁰⁻¹¹ Sigwey, kuninuways tasiyas palopit, kweiboug nikawes daGuyaws anilivan, abes singay ige, tage ikaptules-wan. Kukin bukusesus mawan, igaw mo bukumwasaws. Kweiboug Youb mawan, aban singay ige, tage isesun-wan, Yowbad ikalin nuwan, wankuyeim mo isiwyoob avakaein. Yowbad nuwanen wasigeis yakids singay avakaein.

¹² Sigwey yakamiy, livan town kuvnases beibwein, awoum kutabdabods; awoum kutabdabods kal yagan waseg, walbalab o watinow; awoum. Magat bukutam, misinaka kulana, “Ee”; magat bukupiyev, kulana, “Nag”. Kukin kweitan livan bukusen mo beivag sinap kalbaleb, o Yowbad bikatimop sinap town.

¹³ Kal yak abam ige, kadiloka kunitoug Yowbad waseg. Kal yak amnam ibwein, kadiloka kukwanuwel, kuyakawen Yowbad.

¹⁴ Kal yak bukukwatoun, kadiloka kudawes tasiyas mituwavek tayekelesiys bimeis binitougs silmanim, bisenas tagon wawoum, daGuyaws yagan waseg.

¹⁵ Magat bukusimounids waseg Yowbad, o bukunitougs takatoun silmanin, daGuyaws mo bikatinob gamag town, ankatoun mo beibwein. O magat ansinap kalbaleb, daGuyaws biwid, beikous.

¹⁶ E, kukwamats amisinap kalbaleb, kulavewas, kunitougs pines simiyas, mo bukubweins.

Kukin kal tadidumwal binitoug Yowbad waseg, Yowbad mo bitawtoun youd town silmanin.

¹⁷ Ilaytiy kweiboug gimgilitoun mawana yakids, itawtoun inanitoug Yowbad waseg vagan nag beikweis kweis, Yowbad mo isilbwed kweis. Ta-ikweis kweis kweitoun bweilim, kweinim katanok tibukon. Makava k̄las.

¹⁸ Ikous, Ilaytiy mo initoug vayuwein, e, mo ikweis kweis, pwepway ivag anagin.

¹⁹⁻²⁰ Sigwey yakamiy, kukin soum tayekelesiy teitan, ansinap bwein, mo bipiyev sinap mounid, wankuyeim mo bukukidumwal, vagan takalbaleb towen bipiyev sinap yaweid. E, kuninuways, bukukidumwal gamag towen bo bukwatinob kululuwan; nag biyageg; nag. Peinan Yowbad biwid ansinap; e, youd babaw kalbaleb biwid beikous.

1 PITA

Yeisuw Kelis ansinap bwein, tage singay igeg aban ven watinow waseg. Pita ilel tayekelesiys silet, ilana, “Kukin bitayekelesiys mounid, kabads bigeg mawana Kelis. Kukin gog bitannamis waseg Yowbad sona damwasaws, mo bilabeids.”

Kalin nuwag yakamiy

¹⁻² Yey Pita, takawein livanen Yeisuw Kelis yey. Kalin nuwag Yeisuw nagamag yakamiy, tasiyas takalbalebs nikayabeimiy mo kugals vena babaw ibekena - Ponit, Galetiy, Kapedosiy, Esiy, o Binitiy. Tamads Yowbad bo ikayuseimiy, o Kululuwan ikayuseimiy vagan bukukwanawes aygan Yeisuw Kelis, o vagan buyavin waseg bisouwumi.

Bweina bisiwyoubumi singay vagan beitaw nuwamiy.

Namis bwanabwein

³⁻⁴ Kalin nuwads Yowbad, mtownen daGuyaws Yeisuw Kelis Taman. Singay inok nuwan yakids, bo iyakit Yeisuw Kelis kanig waseg, mapuna tanmises mounid biyakituds yakids, mamagina mwamovads kweivaw nitabanes, o dakiyays nitakawes. Dakiyays bwanabwein, nag beipwas, nag. Bo bises bisigeg. Tut towen nises walbalab, peinads.

⁵ Tasimounids waseg Yowbad mo bimtakavateids natawtoun waseg, vagan bikatinabweids. Nakabiyokous tut waseg mo bitakines abkatuneib towen.

⁶⁻⁷ Mapuna kumwasaws tage tut kayakus waseg abamiy bigeg peinan mimouvit kweitan kweitan bivages. Abamiy kalbaleb waseg Yowbad biyakwaneimiy, bikin bukusimounids bwein, o nag? Mawan goul bitagob, simwan bivakayev, anagin mo bitakow. Tage goul nag bises bisigeg, nag. Goul kalamwey-nen bwein, tage kukin bukusimounids, sinap towen singaya bwein. Kukin bukusimounids bwein, igaw Kelis bikamat wadaban pwepway mo singaya bikavasimiy.

⁸ Nag kukines wamtamiy Yeisuw Kelis, tage bo nukupwakitsa waseg. Tut towen nag kukines, tage bo nukusimounids waseg, mo kumwasaws singay. Nag bitalivan!

⁹ Bweina kusimounida ee... igaw mo bikatinob kululuwamiy.

¹⁰⁻¹¹ Tasiyas palopits kweiboug nikatigikes Yowbad nasiwayoub wasigeis yakids; sivines kid bikakins amawan bikatinabweids, ikatugwans vagan bikakins. Kelis Kululuwan waninous ikatimlakes mo ikakins Kelis aban bigeg mo bimliguyaw wankuyeim, mapuna ikatugwans vagan bikakins kavel mtownen Kelis o asinavon bisap?

¹² Kweiboug Yowbad ikatimlakes tasiyas palopits mo ikakins, nag biwotets pines tatineis tage pinamiy yakamiy. Peinan asilivan bwanabwein anagin mwana ikamat wasigeis yakamiy. Yowbad nikayeb Kululuwan Bwanabwein, meinoy neim walbalab ilabes tasiyas takaweins livanen Yeisuw mo idibakeimiy livan towen bwanabwein. Minlibalab sivines bikakins, nag gog.

Yowbad ikayuseids sinap bwein silmanin

¹³ Yakamiy gog bweina ninoumiy bitawtoun, kuditoukums; bweina kunmises beibwein vagan Yowbad nasiwayoub bisekeimiy. Igaw Yeisuw Kelis bikamat wadaban pwepway mo bisekeimiy.

¹⁴ Nitug yakamiy, bweina bukwanawes Yowbad aygan. Kweiboug tatagouwaws yakamiy, amivikeiy nikaliwageimiy. Awoum kukikunis vayuwein; awoum.

¹⁵⁻¹⁶ Ansinap kamnat mtownen nikatigikeids angamag yakids, mapuna tatineimiy-nan beivag amisinap kamnat. Bukitab waseg Yowbad ilivan mamagina:
“Beivag amisinap kamnat, peinan yey Takamnat yey.”

¹⁷ Mtownen Yowbad igaw mo bikatukin wasigeis yakids, inakaleiwag katanok-wan bivkek gamag tatanok tatanok wasigeis. Magat dawotets bwein mo bikaleiwag dak-abmwasaws bisekeids; kukin gog kalbaleb, bo kalbaleb. Mtownen tadokes Tamads,

taninitougs waseg. Bweina bukugoulus mtowen, yam babaw nukusesus ven towen tobwag waseg.

¹⁸⁻¹⁹ Kweiboug kukikuns tammwayas sikaleiwag waseg, tage sinap towen nag ilabeimiy, tage Yowbad iyamiyiseimiy silmanin kweivaw ked. Nag iyamiyiseimiy moneyin ven watinow waseg, mamagina silib o goul; nag. Tage maysamiy buyavín Kelis, mamagina Lámiy lun bulukwan, singaya bwein ankakin, neiweiys pinamiy yakamiy. E buyavín Kelis nag bitamop mapun, nag.

²⁰ Kweiboug Yowbad nikatigik Kelis nawotet, wankuyeim gog mo ibun ven watinow, nagein gog nakabiyokous tut waseg, mo ikamat wadaban pwepway peinads yakids.

²¹ Kelis buyavín waseg niyamiyiseimiy mapuna kunmises vagan Yowbad bilabeimiy. Yowbad bo iyakit Kelis kanig waseg, isek naguyaw. Mtowen Yowbad kusimounids waseg, o kunmises vagan mo bilabeimiy.

²² Bweina bukwawes livan mounid mo kululuwamiy bikamnat, o bukusiwyoubus mounid tasiyas tayakelesiys. E, kusiwayoubs simiyas wasigeis, siwayoub mounid waseg.

²³ Yowbad bo isop anyoupeis, isob, mamagina mwamovads kweivaw. Youpeis towen nag beipwas, nag; peinan youpeis towen anilivan tatonen, o mwamovan nises waseg youpeis towen; waseg nag beikous, nag; bo bisesun-wan.

²⁴⁻²⁵ Livānen sinap towen Bukitab waseg nises mamagina:

“Gamag ven watinow mamagina awuyow.

Butus mamagina awuyow lālan.

Igaw awuyow bikalayag, mo lālan bitibtaboul bein watinow.

Tage Yowbad anilivan bises bisigeg.”

Anilivan towen bulagan bwanabwein nigeiguis wasigeis yakamiy.

2

Dakul mwamov-wan

¹ Bweina kupiyaves sinap kalbaleb, kameiliw, silponay, katidividav, silakod, wutokay livan.

² Kadiloka ninoumiy kuvages mawan apwaw yakamiy, vagan beivag sivinamiy sus bwanabwein silmanin kululuwamiy bitawtoun; bukumoums mo kululuwamiy bitubwes Yowbad nakatuneib silmanin.

³ Bo kusimkwanes daGuyaws nasiwayoub wasigeis yakamiy.

⁴ Kunekes Yeisuw, mtowen mamagina wululay, mwamov-wan. Gamag mwasanin bo ipiyaves, tage Yowbad singay sivinan; peinan bo ikatigik silmanin inawotet.

⁵ Yakamiy mawan wululay mwamov yakamiy, bweina kululuwamiy biwlul mamagina nabunatum, mamagina natalineiluns bwanabweins yakamiy, mo Yeisuw Kelis bilabeimiy vagan Yowbad beitam amilun waseg, mamagina kululuwamiy waseg bukuluns.

⁶ Livan nises Bukitab waseg mamagina:

“Bo batamnow gunkakol ven Sayon waseg, kakol bwana-bwein bo akatigik silmanin sol. Kukin kal bisimounid waseg gamag towen nag beivag anmwasin.”

⁷ Yakamiy tasimounid sivinamiy gamag towen, tage tasiyas nag isimounids, livnes nises mamagina:

“Wululay towen tawteleins bunatum nipyaves; tage bo imlavag anmwamwan buntum.”

⁸ Kweitan-vak livan mamagina:

“Gamag bikatpines kikeis wululay towen mo bikalouws.”

Bo bikalivatows peinan isiplaves anilivan. Yowbad bo ilivnek mawan.

⁹ Yakamiy gog Yowbad nikatigikeimiy angamag yakamiy, yakamiy tanuwgwas lun silmanin guyaw towen, yakamiy inabod bwanabwein, yakamiy Yowbad inagamag tatonen. Miwotet bukwamteles amawan nikatigikeimiy tadauds yakamiy, mo kusiws nakamnat avakaein waseg. E, bukwamteles nasiwayoub towen avakaein.

¹⁰ Kweiboug nag kweitan bod yakamiy, tage nagein bo nukumlavags Yowbad angamag yakamiy. Kweiboug nag inok nuwan yakamiy, nagein gog inok nuwan, ikatinabweimiy.

Yowbad natouwat yakamiy

¹¹ Sigwey, kadiloka kwtibomes woumiy anvikeiy, peinan biyageg kululuwamiy, peinan yakamiy mamagina taggobwaws yakamiy, o bwabwal yakamiy.

¹² Beivag amisinap bwein wamtes tadaudubs. Magat bivtokeimiy livan peinan bidokeimiy takalbalebs yakamiy, tage bikines miwotet bwanabwein, o yam towen Yowbad bilakwaneimiy mo biyakawns Yowbad waseg.

¹³⁻¹⁴ DaGuyaws angamag yakamiy, bweina bukutams waseg kaleiwag babaw ven watinow, magat tavakaein towen king, o takinew gabman tasiyas nikayabes silmanin bimapus takalbalebs o bikavasis tasiyas toubweins.

¹⁵ Yowbad sivinan beivag amisinap kamnat, mo bikineimiy tasiyas tatagouwaws, asilivan kabala Wein; tage bikineimiy amisinap bwein, mo bikapays.

¹⁶ Awoum beivag amisinap mawana tasiwun deil yakamiy, peinan yakamiy kunounas wamnat, ampalawen sivinamiy; tage awoum kunounas ked kalbaleb waseg, peinan Yowbad natouwat yakamiy.

¹⁷ Kuvnases gamag babaw. Kusiwyoubus tasiyas tayekelesiys. Kugoulus Yowbad. Kuvnases mtowen takaleiwag king avakaein.

Kelis aban igeg ven watinow waseg

¹⁸ Touwats yakamiy, kugoulus mituwaveks o kwanawes ages, takinew mituwaveks tasiwayoubs o tammanums, o takinew tayakeikays tasiyas, bweina bukwanawes ages.

¹⁹ Kukin kal toubwein, mwasanis gamag biyagages makaw, aban bigeg, tage binuway Yowbad, bikaptul, mo Yowbad bidok bwanabwein gamag towen.

²⁰ Tage kukin amsinap kalbaleb mapuna biwaweims mo bukwaptuleim, nag amsinap bwanabwein towen, nag. Kukin gog amsinap bwein mo biyagageims o bukwaptuleim, Yowbad mo bidokeim gamag bwanabwein yakoum.

²¹ Ked towen silmanin Yowbad nikatigikeids, Kelis gog igeg aban peinads, waseg ikatimlakeids amawan bitabwakuns waseg.

²² Nag ivag ansinap kalbaleb. Nag ikitidavis gamag, nag.

²³ Tasiyas niyyages Yeisu, tage nag ikitimop asilivan. Aban igeg, tage nag ikananeiy. Bo inamis waseg Yowbad, peinan ikakina Yowbad nakaleiwag didumwal.

²⁴ Yeisu anmwānet ikow adsinaps kalbaleb wakamweilok, won tatonen ikanig, vagan sinap kalbaleb bikanig wanuwads yakids, wankuyeim mo bitamwamovs silmanin sinap didumwal. Ibasis won Yeisu, mapuna yakids tasesus bwein.

²⁵ Kweiboug yakids mawana sip talasisulin ked, tage bo nitayums tanekes datamtakavatays mtowen takaymatein kululuwads.

Mwan o kwav

¹⁻² Vinay yakamiy bweina kwanawes ages mimwānas, vagan mwasinis mo bisimounids. Tut towen mwasinis nag ikanawes aygan Yowbad, tage bikineimiy amisinap bwanabwein, kamnat, mo bisimounids. Nag bukuguyes; misinaka amisinap bikines, mo bikanavin ninous.

³⁻⁴ Awoum kuninuways miguwāvin waseg bukusinats mo mikatubub bukusikams o dibeimiy bukutoumis bibabaw; tage bweina kuninuways amisinap manum wanuwamiy. Yowbad singay sivinan sinap towen; bises nag beikous.

⁵ Namumwey bwanabweins kweiboug asisinap mawān, inmises Yowbad bilabes o ikanawes simwānas ages; mamagina astubub bwanabwein towen.

⁶ Mawan Sela, ikanow aygan Ebelam, idok natovek towen; o yakamiy gog magat nag beivag amipwayat, o bukuwwotets beibwein mo bukumlavags Sela nitun yakamiy.

⁷ Yakamiy-vak tawaw, bweina bukumtakavates mikwavas, kuvn̄as̄es, peinan vinay nag ivag sitawtoun m̄awan yakamiy tawaw, tage asteiy son nakwav bib̄anes Yowbad nasiwayoub, mwamoves silm̄anin. E, kumtakavates mikwavas v̄agan nag aveiyag bisilbwed mikanitoug Yowbad waseg.

Amisinap bwanabwein mapuna abamiy bigeg

⁸ Kweitan livan nises, bweina bilaten ninoumiy tababaw yakamiy, bikalin nuwamiy kusiwayoubs simiyas wasigeis; kummañums o binok nuwamiy simiyas wasigeis.

⁹ Kukin kal biyagageim, awoum kumop. Kukin kal bitawyageim, awoum kutawyeg. Tage amilivan siwayoub kudibakes. Yowbad bo ikatigikeimiy silm̄anin sinap siwayoub son m̄anum, v̄agan mo bisiwyoubumi y beibwein.

¹⁰ “Kukin kal sivinan bimw̄asaw, tut babaw kadiloka bipiyev livan kalbaleb; awoum bikatidividav;

¹¹ Sinap kalbaleb bipiyev mo biwotet bwein; beivag sivinan sinap niwal, bitoukum silm̄anin.

¹² Tut babaw daGuyaws imtakavates tasiyas tadicumwals; inganeg sikanitoug. Tage bo bisilbwed tasiyas takalbalebs.”

¹³ Kukin biseiw nuwamiy silm̄anin sinap bwein, nag teitan biyagageim.

¹⁴⁻¹⁵ Kukin gog gamag mwasanin biyagageims, peinan amsinap didumwal, Yowbad mo bisiwyoubumi y beibwein. Awoum kuninuways tasiyas; awoum bikubukub nuwamiy. Tage waninoumiy kugoulus daGuyaws Kelis. Asin̄avin gamag mwasanin bikatiganeimiy bilansa, “Aveiyag silm̄anin kunnamis?” Bweina bukwatimapus ages, tage kuvn̄as̄es amilivan kwagm̄anums-wan.

¹⁶ Beivag amisinap bwein, kamnat. Mwasanin tasiyas bitawyageimiy, peinan kuwteles Kelis inawotet bwanabwein, tage bikines amisinap bwein, mo beivag asimwasin.

¹⁷ Kukin Yowbad nanon m̄awan, bweina bigeg abads peinan adsinaps bwein. Tage awoum bigeg abads sinap kalbaleb waseg.

¹⁸⁻²⁰ Kelis-vak sivtanok imat peinads yākids adsinaps kalbaleb. Mtowen toubwein; yākids gog takalbalebs. Bo ikanig peinads v̄agan bitokeids binaweids Yowbad waseg. Bo iweiys won, tage Yowbad iyakit kululuwan, mo inoun in iguyes kululuwes tasiyas wādeil nisesus. Tasiyas kweiboug nag isimounids, tage Yowbad ikaptules, ikayamat, Now mo ivakaes inawag ikous. Wanuwan wag towen mo ikatinabwes asteiyuy gamag, teinim teitoun misinak. E, bo ikatinabwes yevagam waseg.

²¹⁻²² Tut nagein baptays mamagina yevagam towen bikatinabweimiy, nag peinan biwid amibik nises wawoumiy, tage mamagina nitoug waseg Yowbad v̄agan biwid adsinaps beibwein, peinan bo iyakit Yeisuw Kelis, inoun in walbalab, nises Yowbad wanakātay, bo ikalliwages tasiyas takalleiwags kweitan kweitan nisesus walbalab.

4

Kutoukums, Yowbad ansinap waseg

¹⁻² Kelis gimgilítoun ven watinow ilivet mamayuy, kuninuways bigeg abamiy m̄awan, mo bukutawtouns. Kukin kal mamayuy bilivet mo beikous ansinap kalbaleb. Ven watinow vikeiyan nag bikaluweg, tage igaw Yowbad mo bikalawagena oko amibweilim beikous ven watinow.

³ Kweiboug amisinap dadub waseg, m̄awana sivines tasiyas tobwag ven gimgilis. Kweiboug amisinap kalbaleb bo misinak, tage tasiyas isisubwans, ikammeiliws, ikatuyouns v̄agan bimwamoums mo bikabalaweweins, o beivag asisinap kalbaleb, o tobwag yowbad siwotet biwteles.

⁴ Idokes yakamiy bukunekes silm̄anin bukwawnaweweins, silm̄anin sinap kalbaleb, nag gog. Mapuna igege ninous mo itawyageimiy.

⁵ Tage igaw bikatimapus aygan Yowbad peinan biyateles. E, igaw mo biyateles tasiyas tamwamovs sisiyas takanigs.

⁶ Mapuna anilivan bwanabwein bo isekes-vak tasiyas takanigs. Kweiboug igaw tamwamovs tasiyas wadaban pweppway imarus asisinap kalbaleb, tage kululuwes mo bimwamovs, mawan Yowbad.

⁷ Youd babaw sikabiyokous kakita bitalivatus ven watinow; mapuna kusinaps beibwein, kutitoukums silmanin bukunitougs bwein waseg Yowbad.

⁸ Bweina bukutoukums singay silmanin siwayoub simsimiwasigeis, peinan siwayoub biwid sinap kalbaleb babaw-wan.

⁹ Simiyas amibwabwal kuvnaseimiy beibwein. Awoum kusiganes.

¹⁰ Yowbad ansinap kweitan kweitan bo isiwyoub isekeimiy teitan teitan yakamiy. Bweina bukuwotets waseg, vagan bukulabes simiyas, mawan Yowbad natouwat bwanabwein yakamiy.

¹¹ Kukin kal bilivan, bweina bilivan mamagina Yowbad tonen anilivan. Kukin kal bilabes gamags, bweina bilabes mamagina Yowbad ikimtuw silmanin wotet towen. Mapuna youd babaw waseg, gamag bininuways Yeisuw Kelis mo biyakawanes Yowbad. Bweina bitakavasis takaleiwag towen tut nag beikous waseg. Eimen.

Abamiy bigeg, peinan tayekelesiys yakamiy

¹² Sigwey, awoum bisunasun ninoumiy peinan abamiy bigeg singay. Abamiy bigeg vagan biyakwaneimiy. Awoum kudokes kid tobwag ked makadewen.

¹³ Tage bweina bukumwasaws peinan kulatakes simiy Kelis aban nigeg waseg. Igaw tut wanakougwaw bisap son inakamat avakaein mo bukumwasaws singay.

¹⁴ Adok gamag mwasanin bitawyageimiy peinan Kelis angamag yakamiy, tage kumwasaws-wan, peinan Yowbad Kululuwan kamnat nises wasigeis yakamiy vagan bukutawtouns.

¹⁵ Tage awoum bukuweiys gamag, awoum bukuveinaws, awoum bukusilakods, o bukusilponays, awoum. Kukin gamag bimarus amisinap mawan kalbaleb, mo beivag amimwasin.

¹⁶ Tage kukin kal tayekelesiy ansinap kamnat mapuna gamag bitawyages, awoum beivag anmwasin. Bweina biyakawen Yowbad, Kelis yagan waseg.

¹⁷ Tut towen waseg, Yowbad bisilamaw bikatukin angamag wasigeis. Bo bimop adsinap kalbaleb, tage singaya bimop asisinap tasiyas tapiyaveins livanen Yowbad.

¹⁸ Livanen nises mamagina:

“Singay avakaein inawotet vagan bikatinabwes tasiyas tadiendumwals.

Tage takalbalebs tapiyaveins Yowbad, bo biyamkwanes tasiyas.”

¹⁹ Mapuna tasiyas abes igeg kadiloka beivag asisinap kamnat. Kukin gog Yowbad nakaleiwag vagan tayekelesiys mwasanin abes bigeg, tage kadiloka bikamat asisinap, o bweina bitames kululuwes vagan towen tabunin youda babaw mo bimtakavet, peinan tatoukum mtowen.

Kumtakavates Yowbad alen

¹⁻³ Tamumwey yakamiy, kumtakavates Yowbad alen. Yey tamwey mawan yakamiy, tage bo nakin Kelis ikanig waklos; o nakamat igaw bitakines sigwey yakamiy mo bitamwasaws. Mapuna aguyeimiy vagan bukumtakavates Yowbad alen tasiyas nisesus wasigeis yakamiy. Biseiw nuwamiy silmanin wotet towen, awoum bukubgumats silmanin wotet. Kadiloka kutoukums. Awoum kuninuways maysan wotet, awoum. Awoum kuyakeikays wasigeis tasiyas, tage kadiloka kuvages amisinap beibwein, vagan tasiyas bikaylasis amisinap.

⁴ Igaw towen tavakaein tamtakavatein alen mo bisap, mo bukubanes amilalan silmanin mikamat nag beikous.

⁵ Tabwabwats yakamiy kwanawes ages tammwayas. Kummanums tababaw yakamiy, simiyas wasigeis.

"Yowbad gog bisilbwades tasiyas takaypamweins sinap, tage bisiwyoubus tasiyas tam-
mānum."

⁶ Yowbad Tatawtoun bikaliwageimiy, bweina bukummañums wamatān, tutan ikakin-
wan mo biyamweneimiy.

⁷ Aveiyag silmānin ikubukub nuwamiy. Bweina kutāmes kululuwamiy vāgan Yowbad
bimtakavet, peinan ikalin nuwan wasigeis yakamiy.

⁸ Kumtakavateimiy, kutitoukums. Tasilbwadeimiy towen Seitan ininoun māwan lāyon
nakananeiy, sivinan kid beikam gamag.

⁹⁻¹⁰ Kusimounids beibwein waseg Yowbad, mo kusibwades mtowen Seitan. Kuk-
wakinsa tayekelesiys babaw ven watinow bo bigeg abes māwana yakamiy. Igaw abamiy
bigeg tut kayakus waseg, tassiwayoub towen Yowbad mo bikatilow abamiy beibwein,
bikimtuweimiy mo bukutawtouns, peinan bo ilivnakeimiy Kelis waseg silmānin nakam-
nat nag beikous.

¹¹ Kadilokena bikaleiwag tut nag beikous. Eimen.

Taneimiy-o

¹² Bwadads mtowen Saylos, akakina tatitoukum towen. Bo ilabeig mo kalel milet
towen kayakus, waseg bo aguyeimiy, akatimlakeimiy Yowbad nasiwayoub mounid
towen; bweina bukuvaluts nasiwayoub waseg.

¹³ Yowbad nikatigik-vak nātan vin manāwen nises Babilon. Manāwen vin anilivan
siwayoub wasigeis yakamiy. Natug Mak anilivan-vak māwan.

¹⁴ Misiwayoub waseg kumulouls simiyas wasigeis. Tababawa yakamiy, Kelis angamag
yakamiy, niwal bises wasigeis yakamiy.

Yey Pita.

2 PITA

Kukin tayakelesiys yakids bitatoukums mo beibwein adsinaps, vagan takatimlakays tasiyas tayyaweids bisaps bo bitapiyaves asisinap. Igaw gog Yowbad mo bimop asisinap kalbaleb.

Kalin nuwag

¹ Yey Saymon Pita, Yeisuw Kelis natouwat ye, takawein anilivan. Milet balel beiw kuvinis yakamiy, nukusimounids waseg Yeisuw mo nukumwasaws mawan yakamey. Nitasimounids peinan asteiy asisinap didumwal, daYowbads son Takatinabweids towen Yeisuw Kelis.

² Kadiloka bukukwakins Yowbad son daGuyaws Yeisuw vagan bisiwyoubumi singay mo beitaw nuwamiy.

³⁻⁴ Natawtoun waseg bo ilabeids mo isekeids youd babaw silmanin mwamovads o silmanin adsinaps kamnat. Bo ilabeids mawan mamagina ikatimlakeids mo takakins mtownen nikatigikeids silmanin nakamnat tatonen son ansinap tonen bwanabwein, o youd babaw nikatigik mo itam wasigeis yakids. Youd tasiyas singay bwanabwein, tawtoun, waseg bukulawes ven watinow bikibik-nen, towen meinoy neim advikeiys kalbaleb waseg. E, bukulawes ven watinow bikibik-nen vagan Yowbad ansinap bwanabwein bukukwawes.

⁵⁻⁷ Mapuna kutawtouns peinan tasimounids yakamiy, tage kadiloka misimounid bukwatimweisis wakunuwatan amisinap kamnat, mo kwatimweisis wakunuwatan sinap waninoumiy, mo kwatimweisis wakunuwatan kapatul, mo kwatimweisis wakunuwatan toukum, mo kwatimweisis wakunuwatan tapwoloul mounid, mo kwatimweisis wakunuwatan siwayoub sidayas wasigeis, mo kwatimweisis wakunuwatan siwayoub tatonen.

⁸ Kukin amisinap mawan bwanabwein bituwal-wan, mo bukukwakin beibwein daGuyaws Yeisuw Kelis, mo bukuwotets beibwein. Nag beigwey mikawotet, nag.

⁹ Tage kukin kal nag ivag ansinap mawan, towen mamagina toukwaw. Nuwanaw mo binumlev Yeisuw inawotet, waseg bo iwid ansinap kweiboug kalbaleb.

¹⁰ Mapuna sigwey, kutawtouns bwein, vagan bukusesus wanuwan Yowbad nikatigik-yay. Magat amisinap mawan, nag bukukwalouws, nag.

¹¹ Wankuyeim Yowbad mo beitam mounid vagan bukusius wanuwan nakakaleiwag mtownen takatinabweids, daGuyaws Yeisuw Kelis. Nakaleiwag towen nag beikous.

¹² Mapuna tut babaw ivag sivinag bagguyeimiy vagan bukuninuways sinap tasiyas. Tage kukwakins-wan, o Yowbad anilivan mounid bo itawtoun wanuwamiy yakamiy.

¹³ Igaw son mwamovag nases ven watinow kadiloka bagguyeimiy vagan bukuninuways mo bukutawtouns.

¹⁴ Akakin-wan, igaw tut kayakus waseg mo balisow woung towen, peinan daGuyaws Yeisuw Kelis nikatimlakeig mawan.

¹⁵ Bayokon gunawotet waseg vagan tutan bakanig ikous, mo bukuninuways youd tasiyas tuta babaw waseg.

Yowbad nikatigik Natun livanen

¹⁶ Kweiboug kakatimlakeimiy daGuyaws Yeisuw Kelis inatawtoun, o inakabsunap ven watinow waseg. Amilivan waseg nag kataleiliw tassinaps mwasanin sitaleiliw, nag. Tage wamitem nakakin inatawtoun mo kadibakeimiy mawan.

¹⁷⁻¹⁸ Peinan kweiboug simey Yeisuw, Yowbad inakoy wakunuwatan, Taman Yowbad mo isek naguyaw son nakamnat, o kaligen aygan meinoy neim walbalab mititeilin waseg, ilana, “Mtowen Natug bwanabwein, singay ibwein nanoug waseg.”

¹⁹ Mapuna kasimounid singay wasigeis tasiyas palopit asilivan, kweiboug nillivans. Tage yakamiy bweina bukunganegs beibwein, peinan mawana wodam mititeilin ked dadub bimteil. Kuninuways oko bikiv lalayis o kubwan beipel mo bimteil kululuwamiy.

²⁰ Kadiloka kukwakins wanamuñ tasiyas palopit asilivan Bukitab wanawan. Nag gamag anmwānet biban silawun palopit asilivan, nag.

²¹ Tasiyas palopit nag ilivans ninous tatineis waseg, tage Kululuwan Bwanabwein isek ninous, mo ilivans Yowbad anilivan.

2

Takatimlakays o tasiyas palopit mwasanin iyyaweids-wan

(Dud 4-13)

¹ Tage palopit mwasanin tayyaweids nisaps wasigeis gamag. Mawan-vak takatimlakays mwasanin bisilponays, bisaps wasigeis yakamiy mo bikatimlakays livan yaweid vagan biyagages gamags; bipiyaves-vak datoveks towen niyamiyiseids, mapuna bo bimop asisinap kalbaleb, biyagages.

² Asisinap kalbaleb, gamag kalamwey babaw mo bikaylasis, bibasims o bikannavays mav mawana tasiyas. Wankuyeim gamag kalisiy bikines asisinap kalbaleb mo biyagages, bilansa, “Tapwäloul towen kalbaleb, peinan tatapwälouls tasiyas asisinap singaya kalbaleb.” E, idakeds mounid, tage bo biyages tasiyas.

³ Mwamon mites tasiyas, asilivan yaweid mo bisilkodeimiy. Tut babaw sitakaleiwag ikayyamat vagan bimop asisinap kalbaleb. Nag imasis, nag. Igaw mo biyagages tasiyas.

⁴ Kweiboug min-libalab mwasinis asisinap kalbaleb, tage Yowbad nag inok nuwan wasigeis tasiyas. Ilaves kid bo ineis wəTum, ikaleiwag kid bisesusa wanawan leg dadub oko igaw anatut waseg mo bikatukin wasigeis.

⁵ Tammwayas-vak iyagages kweiboug tutan Now waseg. Tage Now Yowbad ikatinob, mtowen tageiguy silmanin sinap didumwal, siney tenim teiy, tage takalbalebs babaw ven watinow ivag yevagam avakaein iwgueles.

⁶ Kalbaleb ven wunsiyas Sodom o Gomol igob mo imlavags pulikov, ikaleiwag vagan beikous wunsiyas ven, o vagan takalbalebs babaw bikines mo bikākin mites.

⁷⁻⁸ Tage misinaka toubwein mtowen Lot Yowbad nikatinob, singaya igeeg nanon peinan ikaninavaysa mav sisiyas wasigeis o pwādaw biyagagays yam katanok katanok. Peinan yam babaw siney tasiyas nisesus ikin o iligen asisinap kalbaleb, mo igeeg nanon singay.

⁹ DaGuyaws gog ikakina amawan bikatinabwes tasiyas toubweins, sikabiyokon waseg; tage tasiyas takalbalebs Yowbad ikayus vagan bisesus sona sikalbaleb oko tut wanakougwaw mo bikamtanis igaw tutan bikatukin gamag wasigeis.

¹⁰ Singaya bo bimop asisinap kalbaleb tasiyas nibwakunis vikeiyan kanavay kalbaleb, peinan ikasigumis Yowbad nakaleiwag. Tagagas tasiyas, sona sigagas mo iwons itawyages min-libalab tasiyas nisesus wamnat. Nag iwenes, nag.

¹¹ Tage anelos mtasiyas bo ikalisawes sitawtoun takalbalebs, tage nag bitawyages takalbalebs wamatan Yowbad, nag.

¹² Takalbalebs tasiyas mawana bulawud, ta-ivag ninous; o ibwakuns asivikeiy waseg, silawun tasiyas vagan gamag bikwanes mo beikams; sinap itagouwawes tage iyages sinap towen. Igaw mo beiweiys tasiyas sisiyan man bulawuds.

¹³ E, bo biyagages tasiyas peinan asisinap kalbaleb. Tasiyas gog sivines bikalimwāsaws wudayam waseg. Simiyas tasiyas kamkwam siwayoub avanin waseg mo igoveks, imwamoums mo ikabalaw eins. Mawana bikibikin amikweim.

¹⁴ Mites babaw, taggeinawls tasiyas, nag bipit mites sikanavay waseg. Bo ivakabanis vinay nasiyas kululuwes igwey. Tatineisina ivvaluts vagan mites bimwamon singay. Yowbad bo bimop asisinap kalbaleb.

¹⁵⁻¹⁶ Ked bwanabwein bo ipiyaves, mo ilasisulis ked. Peinan bo ikikuns Balam inaked. Mtowen Biyol natun, sivinan gog maysan ansinap kalbaleb bikow. Tage nañtan donkiy ikatimlakay ansinap kalbaleb. Mansiyas donkiy nag ivag sikawsiyeg mawana gamag

yakids, nag. Tage mitiyamun towen manawein donkiy ivag aygan mawan gamag, igidem palopit towen ansinap kabalawein.

¹⁷ Gamag tasiyas mamagina yevagam sinkaviyeil, tage nag ivag sipinen. Mawan-vak bwaw bilakulok bimey tage nag ivag kulanan. Gamag tasiyas bo mawan. Yowbad bo ikatineg abes wanuwan leg dadub.

¹⁸ Kages avakaen, asilivan kabalawein, ikaypamwes sinap, sivines kid vikejyan wousiy bikaliwages silmanin sinap kalbaleb, mapuna ivakabanis gamag mwasanin mwana nipyaves sisiyas asisinap dadub.

¹⁹ Takalbalebs tasiyas asilivan, ilansa, “Ked towen bwanabwein, kamnat; nag kweitan absilabod nises,” tage bo ikikuns sinap kalbaleb waseg, peinan sinap kalbaleb bo itawtoun wasigeis tasiyas. Aw-sinap bitawtoun waseg gamag bo biyageg mamagina tasiwun deil towen.

²⁰ Kukin gog gamag mwasanin bikakins daGuyaws Yeisuw Kelis bikatinabwes, mo bilisawes ven watinow bikibik-nen, tage tut wankuyeim biwgawos asisinap kalbaleb, mamagina sinap kalbaleb bitawtoun waninous, sikabiyokous gamag tasiyas singaya kalbaleb. Sikabsilamaw kalbaleb, tage sikabiyokous singaya kalbaleb.

²¹ Kweiboug Yowbad bo isekes nakaleiwag bwanabwein, ked didumwal ikakins, wankuyeim mo ipiyaves. Kukin nag bikakins, mo bilivatus kalbaleb kalamwey; tage ikakins-wan mo nipyaves, mapuna kalbaleb singaya bilivatus.

²² Livanen tasiyas kabebay mounid wanuwan mamagina:
“Awuk binagob mo beikam vayuwein. Buluk kudavin bo iwid won ibwein, mo beiyum bein ikatetay wasposep.”

3

DaGuyaws beiyum beim

¹ Sigwey, vayuwein milet towen nalel. Let akweiy wanuwan akatimlakeimiy vagan bukuninuways sinap bwein, vagan mikanuway bikamnat.

² Kadiloka kulinuways aveiyag kweiboug Yowbad inapalopit nilivnakes, sona kweivaw kaleiwag nisekeids Takatinabweids mtown daGuyaws Yeisuw, peinan takaweins aniliwan yakamey bo nakakatipel kasekeimiy.

³⁻⁴ Wanmugwana kadiloka bukukwakins nakabiyokous tut waseg tassebaws bisibawes, bikikuns asivikei tatineis, bilansa, “Mtown nag beiyum vayuwein beim. Bo ilivan mav. Kweiboug youd babaw nakabeibub bo mawan, nises ee... timdayas ikankanigs, nises ee... tut towen bo mawan-wan.”

⁵⁻⁶ Sivines kid bitagouwawes Yowbad anilivan kweiboug peinan ibun libalab, yevagam wanuwan mo ibun pwepway, yevagam waseg. Wankuyeim ven towen ipop, yevagam waseg, iyageg.

⁷ Tut gog towen Yowbad anilivan mawan peinan sivinan libalab son ven watinow bisesus ee... igaw mo bigob kov waseg; igaw tutan bikatukin mo biyagages tasiyas takalbalebs.

⁸ Sigwey, awoum kunumlaves kweitan sinap towen, mamagina, peinan Yowbad idok katanok yam mamagina tawsan bweilim, o idok tawsan bweilim mamagina katanok yam.

⁹ Gamag mwasanin idokes Yowbad iyovi silmanin youd towen nilivnek. Nag gog, nag iyovi. Tage ikaptuleimiy. Nag sivinan biyamkwen teitan gamag. Sivinan kid babaw yakids bikativin nanouds bitanekes.

¹⁰ Tage Yam towen Yowbad inakaleiwag bisap mamagina tavveinaw bisap. Wankuyeim libalab bisawl beikous, aygan avakaen waseg; kov mo bigob youd babaw beikous, bigob-vak pwepway son wutalan babaw wakunuwatan.

¹¹⁻¹² Peinan babaw youd tasiyas beikous, amawan beivag adsinaps? Adok bweina beivag adsinaps bwanabwein, kamnat, yakamiy o yakamey. Kukwayamats Yowbad inayam bisap; kuymales vagan nuwanaw bisap. Yam towen libalab bigob beikous, o kov bigob youd babaw beikous.

¹³ Anilivan nilivnek mapuna takayamats vagan bisap libalab kweivaw son ven watinow kweivaw, sinap didumwal inaven.

¹⁴ Sigwey, kukwayamats youd tasiyas igaw mo bisaps, mapuna biseiw nuwamiy vagan Yowbad biban amisinap bwanabwein, kamnat, niwal waseg.

¹⁵⁻¹⁶ Bweina bukukwakins daGuyaws bikatinabweimiy, peinan ikaptuleimiy. Sods bwanabwein Pawl nakalelel mawan towen, peinan Yowbad ansinap nisek mo ilelel mamagina. Livanen sinap towen bo ilel inalet babaw wanuwan. Nakalelel gog mwasanin keikay. Nag nuwanaw bitakakins. Tasiyas tatagouwaws sisiyas tougweys ikatuvins mav Pawl anilivan towen, sivines kid tobwag sinap bikawes; Bukitab babaw ikatuvins mav, mapuna bo biyagages tatineis.

¹⁷ Sigwey, bo kukwakinса nanawan, kumtakavateimiy. Mata geg tasiyas tapiyaveins kalewag bivakabanimiy mo bukwaylasis assinap kalbaleb. Bukukwalous kid.

¹⁸ Kadiloka bukuninuways mtowen Takatinabweids, daGuyaws Yeisuw Kelis, mo bikkatimweis inasiwayoub wasigeis yakamiy, o bukukwakins mtowen beibwein. Bweina bitayakawanes tut towen o tut babaw ee... tut nag beikous waseg. Eimen.

1 YON

Yon nakalelel let towen waseg silawun siwayoub, o kamnat, o mwamovads nag beikous.

Livan silmgnin mwamov

¹⁻³ Wanamug mwamov livanen son Tamads nisesus. Wankuyeim yakamey watigem bo kaligen gamag towen; mitem kakin; nimem kakabkwen; peinan bo ikamat wadaban pwepway. Bo kakin mo kakamat kadibakeimiy livanen mwamov nag beikous; peinan gamag towen son Tamads nisesus mo ikamat wadaban pwepway. Nakakin kadibakeimiy, vagan bitamsamwas babaw yakids, peinan sidayas Tamads son Natun Yeisuw Kelis.

⁴ Let towen nalel neiw kuvinis, bukumwəsaws sigwey yakimi, mo bivakaein idamwasaw babaw yakids.

Yowbad kamnat tonen

⁵ Anilivan towen bwanabwein nakaligen, mo kadibakeimiy mamagina: Yowbad kamnat tonen. Nag kweitan dadub sinap Yowbad waseg.

⁶ Kukin bitalivan, “Tamsamwas sod Yowbad”, tage adsinap dadub, mogo tayyaweid yakid; peinan sinap mounid tapiyev.

⁷ Kukin gog amasinap kamnat, mamagina towen ansinap kamnat, mo tamsamwas sidsidayas wasigeis, peinan Yeisuw buyavin iwidiwid adsinaps kalbaleb biyakous.

⁸ Kukin gog bitalivan, talana, “Nag ivag adsinap kalbaleb”, mamagina takatidev nanoud tatoneid; peinan nag ivag sinap mounid wasigeis yakid, nag.

⁹ Kukin bitakamel adsinap kalbaleb, Yowbad biwid bilev, mo beikous. Peinan ansinap didumwal, itoukum wotet towen silmanin.

¹⁰ Kukin gog bitalivan, “Nag ivag adsinap kalbaleb”; mamagina talana, “Yowbad tayyaweid”. Bitalivan mawan, nag beivag ansinap wasigeis yakids.

2

Kelis veiyouds yakids

¹ Nitug yakamity, bo nalel milet towen vagan nag beivag amisinap kalbaleb. Kukin teitan bikalouw, o bivag ansinap kalbaleb, veiyouds nises, tadiendumwal; mtownen Yeisuw Kelis initoug peinads yakids, vagan Tamads biwid adsinaps kalbaleb.

² Mtownen lun bulukwan peinan sinap babaw kalbaleb, adsinaps yakids, sidayas ven babaw gimgilis.

³ Kukin bitavnases nakaleiwag mo bitakakins mounid veiyouds towen.

⁴ Kal yak bukulivan, “Akakin veiyoug towen,” tage nag bukuvnas nakaleiwag, singay tayyaweid yak.

⁵ Tage kukin bukuvnas aygan, mo bukusiwayoub beibwein, mawan Yowbad bo isiwayoub. Mapuna bitakakin angamag tonen yakid.

⁶ Kal yak bukulivan, kulana, “Soug Kelis kasesuna,” kadiloka beivag amsinap mawan Kelis ansinap tonen.

Kaleiwag kweivaw

⁷ Sigwey, kaleiwag kweivaw nag basekeimiy. Misinaka balel kaleiwag nises kweiboug wasigeis yakids. Livan towen nukuliganes.

⁸ Kweivaw mo balel kaleiwag towen pinamiy yakamiy. Anagin kaleiwag towen mounid ikamat waseg Kelis, o wasigeis yakids, peinan dadub bo ikous, kamnat mounid mo imteilids.

⁹ Kal yak bukulivan, kulana, “Yey agusinap kamnat,” tage bukwamliew soum, adok igaw tadaadub yakoum.

¹⁰ Kukin kal yak bukusiwyoub sod, amsinap kamnat. Nag kweitan amsinap waseg bukukwalouw, nag.

¹¹ Kukin bukwamluw soum, igaw tadaub yak. Dadub waseg kuminoun. Ta-mawan bukukin muked, peinan dadub bo isilbwed matam.

¹² Nalel sinap towen pinamiy yakamiy gamagal. Peinan yagan towen waseg bo inumlev amisinap kalbaleb.

¹³ Nalel sinap towen pinamiy tamumwey yakamiy. Peinan nukukwakins mtowen wanamug nises.

Nalel sinap towen pinamiy tabwabwat yakamiy. Peinan towen takalbaleb iyakwaneimiy, nag. Bo kutawtouns.

Nalel sinap towen pinamiy gamagal yakamiy. Peinan nukukwakins Tamads.

¹⁴ Nalel sinap towen pinamiy tamumwey yakamiy. Peinan nukukwakins mtowen wanamug nises.

Nalel sinap towen pinamiy tabwabwat yakamiy. Peinan nukutawtouns. Yowbad sinapun nises wasigeis yakamiy. Town takalbaleb iyakwaneimiy, nag. Bo kutawtouns.

¹⁵ Awoum kwalpwakits ven watinow youdanan waseg; awoum. Kal yakamiy bikalpwakit ven watinow waseg, ta-mawan bikalpwakit Tamads waseg.

¹⁶ Ven watinow youdanan meinoy neim ven watinow. Sinap tasiyas mamagina, aveiyag woun sivanan, o aveiyag mat sivinan, o kayyapam mwamov waseg. Sinap tasiyas nag inoy neim Tamads waseg, nag.

¹⁷ Ven watinow igaw beikous, mo beikous kalpwakit-nen; tage kavel y^akoum bukwablaway nanon Yowbad, bukuses bukusigeg.

Tapiyavein Kelis

¹⁸ Gamagal yakamiy, bo talivatus nakabiyokous tut. Nukuliganes tapiyavein Kelis mo bisap. Nagein gog babawa isaps tapiyaveins Kelis. Mapun takakins nakabiyokous tut nitalivatus.

¹⁹ Tasiyas meinoy niweis wasigeis yakids, tage nag sidayas mounid, nag. Tobwag gamag tasiyas. Magat mounida sidayas tasiyas nag bilisaweids. E, bo nilisaweids, mapuna takakins tobwag gamag tasiyas.

²⁰ Yakamiy nag mawan tasiyas, nag. Peinan Yowbad Kululuwan niwekeimiy mo kukwakins youd babaw.

²¹ Nalel sinap towen peinan nag tatagouwaw yakamiy.

Kukwakins gog sinap mounid; o kukwakins nag kweitan yaweid beinoy sinap mounid waseg, nag.

²² Kal mtowen tayyaweid? Adok towen bilivan bilana, "Yeisuw nag Mesay Kelis." Mtowen tapiyavein Kelis, ipiyev livanen Tamads son Natun.

²³ Kalisiy bipiyaves Yowbad Natun, Tamads nag ises wasigeis tasiyas. Kal yak bukutam waseg Yowbad Natun, Tamads nises waseg y^akoum.

²⁴ Sinap wanamug nukuliganes, sinap towen bweina bises wasigeis yakamiy, mo bukusesus bwein simiyas Tamads son Natun.

²⁵ Mtowen bo bisekeids mwamovads nag beikous, peinan bo ilivnek mawan.

²⁶ Livanen tasiyas takatidividavs bo nalel, neikous.

²⁷ Tage Kululuwan Yowbad niwekeimiy, nises wasigeis yakamiy. Nag ivag sivinamiy gamag teitan bikatimlakeimiy, nag. Kululuwan Town bikatimlakeimiy sinap babaw waseg. Mtowen ansinap mounid; nag biyaweid, nag. Simiy Town bukusesus bwein, mawan nidibakeimiy.

Yowbad nitun

²⁸ Budag yakamiy, tut nagein kadiloka Kelis waseg bukusesus. Igaw beiyum bimekeids mo bitakapwapouts; awoum beivag admwasins mtowen wamatian.

²⁹ Magat bukukwakins mtowen ansinap didumwal, mo bukukwakins nitun babaw asisinap didumwal.

3

¹ Tamads nasiwayoub singay avakaein wasigeis yakids peinan idokeids nitun tatonen yakids. E, nitun tatonen yakids. Mapuna ven watinow gimgilis nag ikakins kalisiy yakids; peinan nag ikakins Tamads.

² Sigwey yakamiy, tut towen Yowbad nitun yakids; o nag bitakakins aveiyag bitamlavags tut wanakougwaw. Misinaka takakins igaw daGuyaws beiyum beim, yakids mo bitamlavags mawan towen, peinan bitakines ankakin tonen.

³ Kal yak bukunamis silmanin nakabeiyum towen, mo bukuvnas amsinap beibwein; peinan Townen ansinap bwanabwein.

⁴ Kal ansinap kalbaleb mo bisiplev Yowbad nakaleiwag. Tasiplatein Yowbad nakaleiwag ansinap kalbaleb.

⁵ Kukwakins Kelis nisap vagan kid sinap kalbaleb bikow binow, bilev. Townen nag ivag ansinap kalbaleb, nag.

⁶ Kal yakamiy bisesuna Kelis waseg, nag beivag ansinap kalbaleb; nag. Townen gog kavel ansinap kalbaleb nag ikin Kelis, o nag ikakin towen, nag.

⁷ Budag yakamiy, awoum gamag mwasanin bikatidavimiy; awoum. Kal ansinap didumwal, tadiumwal towen. E, Kelis ansinap mawan, didumwal.

⁸ Kal towen takalbaleb, mamagina Seitan angamag; peinan misikena takalbaleb towen Seitan. Tage Yowbad Natun isap neim vagan kid bigulek Seitan nakaleiwag.

⁹ Kal nakabsilamaw waseg Yowbad nag beivag ansinap kalbaleb, nag. Peinan sinap kweivaw wanuwan nises. Ta-mawan beivag ansinap kalbaleb, peinan mwamovan nakabsilamaw Yowbad waseg.

¹⁰ Mapuna takakins kalisiy Yowbad nitun, o kalisiy Seitan nitun. Kal nag ivag ansinap didumwal nag meinoy neim Yowbad waseg, nag; o kal nag isiwyoub bwadan nag meinoy neim Yowbad waseg, nag.

Kusiwayoubs simsimiyas wasigeis

¹¹ Bulagan kweiboug nitaliganes mamagina:
“Kadiloka bitasiwayoubs sidsidayas wasigeis.”

¹² Awoum beivag adsinaps mawan Seitan angamag towen Kayin, peinan tawayin bwadan tonen. Aveiyag wawun iwei? Peinan Kayin ansinap kalbaleb, tage bwadan ansinap bwanabwein.

¹³ Sigwey yakamiy, ven watinow gimgilis mwasanin bikamliweimiy, tage awoum bisunasun ninoumiy.

¹⁴ Yakids gog tasiwayoubs wasigeis sidiyas, mapuna takakins nitalisawes kanig, mwamov nitabanes. Kukin kalisiy nag bisiwayoubs sisiyas wasigeis, tasiyas igawa son kanig nisesus.

¹⁵ Kukin kalisiy bikamliwes sisiyas, tasiyas mamagina tawayins gamag. Takakinsa tasiyas tawayins gamag nag ivag mwamoves bises bisigeg, nag.

¹⁶ Sinap towen yagan siwayoub takakins peinan Kelis nitam won tonen, ikanig peinads yakids. Kadilok bitatames wouds yakids pines sidiyas.

¹⁷ Kukin kal navavag sam, o ikin son tasimav teitan, tage nag bileb son, tabta Yowbad nasiwayoub nises waseg gamag towen? Adok nag.

¹⁸ Budag yakamiy, awoum wudoumiy mav bisiwayoub. Tage kadiloka kusiwayoubs amisinap mounid waseg.

Takapwapouts wamatan Yowbad

¹⁹ Bitasiwayoubs adsinaps mounid waseg mo bitakakins kamounid nises wasigeis yakids. Nag beivag admwasins wamatan Yowbad, nag.

²⁰ Magat tadoxes adsinaps kalbaleb mo beivag admwasins wamatan Yowbad; tage Yowbad bikaleiwag; nanoud tatoneid awoum bikaleiwag. Peinan Yowbad sinap babaw ikakin.

²¹ Budag yakamiy, magat nag beivag admwasins, mo bitakapwapouts wamatan Yowbad.

²² E, bitanitougs waseg Yowbad mo bitayousis youd tasiyas babaw, peinan tavnases nakaleiwag, o peinan dakawotets mawan towen sivinan.

²³ Nakaleiwag towen, bitasimounids livanen Natun, Yeisuw Kelis waseg, o bitasiwayoub sidayas wasigeis. E, Yeisuw nakaleiwag mawan.

²⁴ Kal yak bukuvnas nakaleiwag, mo bukuses waseg Town, o Town waseg yak. O Kululuwan Town nisekeids mo bikatimlakeids vagan bitakakins mtowen nises wasigeis yakids.

4

Kululuwan Yowbad o Kululuwan Tapiyavein Kelis

¹ Budag yakamiy, awoum bukusimounids kululuwan babaw wasigeis, awoum. Tage bukuyakwanes mo bukukines meinoy nimeis Yowbad waseg, o nag. Peinan tayyaweids babaw nisaps wadaban pwepway, mamagina palopits tasiyas; tage ikitidavis gamag.

² Kuyakwanes mawan. Kukin kal bilivan, bilana, "Mesay bo imlavag gamag ven watinow, yagan Yeisuw," kululuwan towen mounid meinoy neim Yowbad waseg.

³ Tage kal nag bisimounid waseg Yeisuw, kululuwan towen nag meinoy neim Yowbad waseg, nag. Town gog tapiyavein Kelis. Kweiboug nukuliganes mtowen beim. E, tut towen bo isap wadaban pwepway, towen tapiyavein Kelis.

⁴ Nitug, Yowbad angamag yakamiy, nukutakayways wasigeis tasiyas, peinan Town waseg yakids bo itawtoun waseg mtowen sisiv watinow gimgilis.

⁵ Gamag tasiyas siven watinow, mapuna illivans livanen ven watinow, o ven watinow gimgilis iligan ages.

⁶ Tage Yowbad angamag yakids. Kukin kal ikakin Yowbad mo biligen aygads; tage tapiyavein aygads tasiyas nag inoyes Yowbad inaked. Bitakin asisinap mo bitakakin awkululuwan mounid, awkululuwan yaweid.

Yowbad siwayoub wawun

⁷ Sigwey, kadiloka bitasiwayoub sidsidayas wasigeis, peinan siwayoub meinoy neim Yowbad waseg. Kukin bitanoy bitem Yowbad waseg, o bitakakin Yowbad, mo bitasiwayoub.

⁸ Kukin kal nag isiwayoub, towen nag ikakin Yowbad, peinan Yowbad siwayoub wawun.

⁹ Yowbad nikatimlakeids nasiwayoub wasigeis yakids, peinan nikayeb Natun anmwaniet-wan, neim watinow vagan kid biyamoveids.

¹⁰ Mapuna takakins siwayoub wawun. Nag peinan tasiwayoub waseg Yowbad; nag. Tage Yowbad nasiwayoub wasigeis yakids, to nitam Natun mamagina lun bulukwan, adsinaps kalbaleb silmanin.

¹¹ Sigwey, Yowbad nasiwayoub wasigeis yakids, kadiloka bitasiwayoub mawan sidsidayas wasigeis.

¹² Nag kweitan tut gimilitoun watinow ikin Yowbad, nag. Tage bitasiwayoub sidsidayas wasigeis, Yowbad sods mo bitasesus, o nasiwayoub mounid biton wasigeis yakids.

¹³ O peinan kululuwan tonen nisekeids, mapuna takakins nitasesus waseg Town, o Town waseg yakids.

¹⁴ Nakakin, mapuna kadibakeimiy o kukwakins Tamads nikayeb Natun, neim watinow, vagan kid bikatinabweids, ven watinow gimgilis yakids.

¹⁵ Kal yakamiy bisimounid, bilana, "Mounid Yeisuw Yowbad Natun," Yowbad mo bises waseg towen, o towen waseg Yowbad.

¹⁶ Mapuna takakins o tasimounids waseg Yowbad inasiwayoub wasigeis yakids.

Yowbad gog siwayoub wawun. Kal yak bukusiwayoub-wan, bukusesuna waseg Yowbad, o Yowbad waseg yak bises.

¹⁷ Kukin siwayoub mounid biton wasigeis yakids, mo bitakapwapouts yam towen igaw Yowbad bikatukin ven watinow gimgilis wasigeis. Peinan yakids mawan Town, ven watinow waseg.

¹⁸ Town tasiwayoub nag beivag anpwayat. Kukin siwayoub biton wasigeis yakid, mo beikous adpwayats. Tage kukin Yowbad bikatimop adsinap mo beivag adpwayat, o siwayoub nag iton wasigeis yakids.

¹⁹ Yakids tasiwayoubs peinan wanmugwana Town nisawyoub wasigeis yakids.

²⁰ Kukin kal bilivan bilana, "Yey asiwayoub waseg Yowbad," tage bikamliw son, singay tayyaweid towen. Son ikin, tage Yowbad nag ikin. Kukin nag isiwyoub son, amawan bisiwyoub Yowbad? Adok nag.

²¹ E, nakaleiwag towen; kukin kal bisiwayoub waseg Yowbad, kadiloka bisiwayoub son waseg.

5

Simounid bitakayway ven watinow waseg

¹ Kalisiy yakids tasimounids peinan Yeisuw Mesay Kelis, yakids Yowbad angamag; mamagina Yowbad nitun yakids. Kukin kal bisiwayoub waseg Tamads mo bisiwayoub Yowbad nitun wasigeis.

² Mapuna takakins tasiwayoubs Yowbad nitun wasigeis, peinan tasiwayoubs waseg Yowbad, o tavnases nakaleiwag.

³ Amawan bitasiwayoubs waseg Yowbad? Adok bitavnases nakaleiwag. Tage nag moumouvit nakaleiwag tonen, nag.

⁴⁻⁵ Kukin dakabsilamaws Yowbad waseg, mo bitakayways ven watinow sinapun waseg. Amawan bitatakayways? Adok peinan tasimounids Yowbad Natun, mtown Yeisuw. Nag kwayuwein ked waseg bitatakayways, nag.

Livanen Yowbad Natun

⁶ Mtown neim yevagam son buyav waseg, yagan Yeisuw Kelis. Nag misinaka yevagam, nag. Yevagam son buyav. Livanen sinap towen Yowbad Kululuwan ilivan; anilivan mounid-wan.

⁷⁻⁸ Asteitoun takaweins livanen Yeisuw, teitan Yowbad Kululuwan, kwayuwein yevagam, kwtounun buyavin; asilivan bo ilatan katanok-wan.

⁹ Kukin bitaliganes gamag asilivan, peinan tawtoun, kadiloka bitaliganes-vak Yowbad anilivan, peinan Tatawtoun singay; o Yowbad anilivan bo nikatimlakeids Natun Yeisuw livanen.

¹⁰ Kal yak bukusimounid waseg Yeisuw, bukusimkwen wakateim mounid Yowbad Natun towen. Kukin nag bukusimounid waseg Yowbad, mo bukudok tayyaweid Town Yowbad; peinan nag kusimounid anilivan, livanen Natun tonen.

¹¹ Yowbad anilivan mamagina, "Asekeimiy mwamovamiy nag beikous, Natug Yeisuw waseg."

¹² Kukin Yowbad Natun bises waseg yak, mwamovam bukuban; kukin gog nag, bo nag.

Bitakakins mwamovads bises bisigeg

¹³ Sinap towen bo nalel neiw, vagan bukukwakins mwamovamiy bises bisigeg; magat bukusimounids waseg livanen Yowbad Natun.

¹⁴ Town peinan takapwapouts wamatian Yowbad; o kukin aveiyag bitantougis, o nanon mawan, mo biligen.

¹⁵ E, bitakakins Yowbad biligen dakanitougs, mo takakins igaw bo bisekeids youd towen.

¹⁶ Magat yak bukukin bwadam ansinap bigeg, o sinap towen nag silmanin kanig, bweina kunitoug waseg Yowbad, peinan bwadam; Yowbad mo bisek mwamovan, peinan nag ivag ansinap kalbaleb silmanin kanig. Awoum kunitoug vagan Yowbad bileb tayuwein kavel kalbaleb ansinap silmanin kanig; awoum.

¹⁷ Aveiyag kalbaleb, sinap towen igege; tage sinap kalbaleb nises nag silmanin kanig.

¹⁸ Takakins Yowbad angamag yakids nag ivag adsinaps kalbaleb, peinan tavnases adsinaps, o towen takalbaleb nag biyousids, nag.

¹⁹ Takakins Yowbad angamag yakids; tage towen takalbaleb ikaleiwag ven babaw gimgilis wasigeis.

²⁰ Takakins Yowbad Natun neim, adsinaps nisekeids vagan bitawtusis Tadidumwal towen. E, tasesus waseg Town Tadidumwal, o waseg Natun Yeisuw Kelis. Mtowen Yowbad mounid; Town waseg mwamovads bitabanes nag beikous.

²¹ Budag yakamiy, kadiloka bukupiyaves tobwag yowbad.
Yey Yon.

2 YON

Yon nakalelel kwayuwein let towen waseg silawun sinap mounid.

Nakabsilamaw

¹ Yey tamwey, gunalet niwekeimiy bukuvinis numwey yak simwey nitum. Peinan Yeisuw angamag yakamiy. Singay ikalin nuwem yakamiy, sigwey tasiyas babaw isimounids Yeisuw waseg.

² Ikalin nuwads peinan sinap mounid nises wasigeis yəkids; e, wasigeis yəkids bises bisigeg.

³ Sivinag Tamads Yowbad binok nuwan wasigeis yakamiy, bisiwyoubumi, mo beitaw nuwamiy. Natun-vak Yeisuw Kelis mounid bilabeimiy, siwayoub waseg.

Kuyyousis Kelis nakaleiwag

⁴ Bo amwasaw peinan bo aban nitum asisinap kamnat, bwanabwein; iyyousis Tamads nakaleiwag, towen nisekeids.

⁵ Numwey yak, tut towen akagmānum waseg yak, kadiloka bukuvna kaleiwag towen wanmugwana nises. Nag balel kweivaw kaleiwag, nag; misinaka kaleiwag kweiboug mamagina bitasiwayoubs sidsidayas wasgeis.

⁶ Kukin bitasiwayoubs beibwein mo bitavnəses Town nakaleiwag. Nakaleiwag towen, wanmugwana nukuliganes, mamagina siwayoub waseg.

⁷ Tasiyas takatidavidavs babaw nisaps wadaban pwepway; asilivan kalbaleb; nag isimounids Mesay imlavag gamag towen Yeisuw. Tapiyaveins Kelis tasiyas.

⁸ Kadiloka bukutoukums; awoum bukuyamkwaneimiy maysan miwotet. Kadiloka meiveka bukuyousis.

⁹ Kukin kal bipiyev livanen Kelis, mo bipiyev Yowbad. Tage kal yak bukuyyous livānen Kelis waseg, Tamads Yowbad son Natun mo bukusesus simwey yəkoum.

¹⁰ Magat teitan beiw, tapiyavein livan towen, awoum kutam ambwabwal towen; awoum bukumuloul soum, awoum.

¹¹ Kukin bukumuloul soum mo bukuleb nawotet kalbaleb waseg.

Taneimiy-o

¹² Sinap babaw bakatimlakeimiy, adok awoum balel let towen waseg, peinan sivinag bawekeimiy bitakaypuls sigwey yakamiy, balivan wamitamiy; adok mo bitamwəsaws avakaein.

¹³ Bwadam nitun ikalin nuwes wasigeis yakamiy, bwadam towen Yeisuw angamag teitan. Taneimiy-o.

Yey Yon.

3 YON

Yon nakalelel kwatounun let towen-vak silawun sinap mounid.

Nakabsilamaw

¹ Tamwey yey, gunalet neiw waseg yəkoum Gayus. Kalin nuwag avakaein yəkoum. E, peinan Yeisuw angamag yəkoum, singay ikalin nuwag yəkoum.

² Gwade, kululuwam tawtoun, mapuna aninitoug Yowbad waseg vəgan bukumwəsaw, o bukuses bwein.

³ Bo amwəsaw avakaein peinan sidayas nimeis, nisekeigs livəneim yəkoum, peinan amsinap mounid, bwanabwein.

⁴ E, baligen livneimi yitug yakamiy, peinan sinap bwanabwein kuyyousis, mo bamwəsaw avakaein.

Mwasanin ilabeids; mwasanin gog isilbwadeids

⁵ Gwade, igaw bukulabes sidayas, o ambwabwal tasiyas bukumtakavates, singay bwein muwotet towen.

⁶ Tasiyas asilivan, ilansa, "Mtowen Gayus singay tasiwayoub wasigeis yakamey." Asilivan mawan nisekemas yakamey tayakelesiys. E, sidayas binounas, kadiloka bukutanes bwein, peinan takanaweins Yowbad aygan tasiyas.

⁷ Tasiyas bo ilisawes siven silmanin Yowbad nawotet; tage nag ininitougs kaeis wasigeis siyas tadaub, nag.

⁸ Kadiloka bitalabes sidayas, idawotets katanok silmanin sinap bwanabwein.

⁹ Sinap kweitan nael wagunalet niwekeimiy tayakelesiys yakamiy, tage towen Diyotilep ikaypom kaleiwag, isilbwed gunakaleiwag.

¹⁰ Igaw baw, mo bakamtel ansinap towen kalbaleb, o bakamtel anilivan towen makava ivtokeig livan. E, ansinap kwayuwein kalbaleb peinan nag itam sidayas tayekelesiys, o isilbwed siked tasiyas kalisiy sivines beitams tayekelesiys tasiyas wasigeis, mo ibob siyekesi ineis wamnat.

¹¹ Gwade, awoum kwabkun sinap kalbaleb; sinap bwanabwein kwabkun. Toubweins tasiyas Yowbad angamag; tage takalbalebs nag ikakins Yowbad.

¹² Dimitil ansinap bwein. Sidayas babaw ilivənes mawan. Tasiyas asisinap mounid ilivans, ilansa, "Mtowen ansinap bwein." Yey alivan mawan, o kukwakins agulivan mounid.

Taneim-o

¹³⁻¹⁴ Sivinag sinap babaw badibakeim, tage nag balel mulet waseg; peinan adok nuwanaw baw, mo bitakaypul soug yak, bitalivan aditeiy.

¹⁵ Kalin nuwag yəkoum. Sidayas wamapalatan ikalin nuwes waseg yak. Agulivan siwayoub kusekes sidayas katanok katanok wasigeis. Taneim-o.

Yey Yon.

DUD

Yud nilel let towen tayakelesiys silet, silmanin bilavates tasiyas takatimlakays kalbaleb, vagan bipiyaves.

Kalin nuwag yakamiy

¹ Yey Dud, Yeisuw Kelis natouwat yey. Yey tuwag Yemes.

Milet balel biwekeimiy mo kukines. Tamads Yowbad nikatigikeimiy angamag bwan-abwein yakamiy, ikayuseimiy-vak silmanin Yeisuw Kelis.

² Bweina binok nuwan wasigeis yakamiy, bikatimweis nasiwayoub wasigeis yakamiy, bivakaein, mo beitaw nuwamiy.

Takatimlakay mwasanin asisinap kalbaleb

(2 Pita 2:1-17)

³ Sigwey, singay sivinag liveanen dakinneibs balel beiw kuvinis. Tage kadiloka balel baguyeimiy vagan bukwayuses datapwalouls, peinan kweiboug Yowbad nisekeids datapwalouls wasigeis angamag yakids.

⁴ Peinan takalbalebs mwasanin bo ikitidavimiy mo isiws wasigeis yakamiy. Peinan Yowbad nasiwayoub wasigeis yakids bo ikitilawos, vagan bigigeinawls mo bipiyaves datoveks anmwanet, mtown daGuyaws Yeisuw Kelis. Nagwadiven nikatigik vagan bimop asisinap kalbaleb.

⁵ Sivinag bukunuwas sinap towen kweiboug nukuliganes. Kweiboug kuliganes bwein, tage badibakeimiy vayuwein, peinan kweiboug daGuyaws nikatinabwes nagamag ven Yidipt waseg, wankuyeim mo iyagages mwasanin tasiyas, peinan nag isimounids waseg.

⁶ Min-libalab-vak mwasanin tatineisina ikumumwanes, mo ilisawes siven tatineis, mapuna Yowbad iyawanis nisesus watinow, dadub waseg, yam babaw ee... tutan Yowbad bikatukin gamag babaw wasigeis.

⁷ Mawan-vak ven mwasanin kweiboug, Sodom, Gomol, sisiyas ven mwasanin walasin, gimgilis tasiyas-vak asisinap kalbaleb, asivikeiy silmanin kanavay kalbaleb, Yowbad mo imop asisinap kalbaleb kov waseg bigidaged nag beikous. Yakids, bitaliganes, mo bikakin matads.

⁸ Tage gamag tasiyas neisiws wasigeis yakamiy, asisinap mawan kalbaleb, ikammikons mo ivag asisinap kalbaleb, waseg iyagages wous tatineis. Kaleiwag ipiyaves. Iyages-vak min-libalab tasiyas takamnats.

⁹ Min-libalab sitovek Maykel kweiboug ikamnimans son Seitan, silmanin Moses won bikow, tage nag ikan Seitan, nag iyeg, nag. Deisina ilivan, ilana, "DaGuyaws bisilbwadeim."

¹⁰ Tage gamag tasiyas iyages aveiyag nag ikakins. Mawana bulawud tasiyas, ninous nag, siwotet mawana asivikeiy tatineis, mapuna iyagagesa tatineis.

¹¹ Singay kalbaleb bilivatus tasiyas. Isiked mawana Kayin kweiboug, sivines kid biguyaws, mo ipiyaves sinap bwein, iyousis gog Balam ansinap kalbaleb, mo imtamats, peinan ipiyaves kaleiwag, mawana Kolak kweiboug.

¹² Tasiyas misagal siwayoub tapwaloul waseg bo iyagages, peinan takamkwams tasiyas, tage nag ivag asimwasin. Sivines kid simwasawa tatineis; askakin mawana makava bwaw, nag ivag kweis wanuwan bwaw, makava yag iyatuwanes. Tasiyas mawan-vak amweilok kaytan, wuwal waseg nag beiwu, mapuna bigutes bilaves, vagan sivay beimat.

¹³ Tasiyas-wan mawana kaysay avakaein, poulun ivag, mawana asimwasin avakaein. Tasiyas mawana wutun ininounas mav, siven dadub watinow mo bisesus bisigagas.

¹⁴⁻¹⁵ Adam tabun tabun tabun gog yagan Inok, mtown kweiboug igeiguy, ilana, "Kukines daGuyaws bo isap, siney nagamag singay babaw. Bo bikaleiwag gamag babaw wasigeis. Tasiyas takalbalebs bikatimlakes vagan bikakins asisinap kalbaleb, o siwotet

babaw kalbaleb niwteles asisinap babaw kalbaleb waseg; o takalbalebs tasiyas bikakins asilivan babaw kalbaleb, waseg iyages Yowbad.”

¹⁶ Gamag tasiyas singay nuwanaw wudos, tavtokays live, peinan ikikuns asvikeiy tatineis; ikayyapams sinap asilivan tawtoun waseg. Asilivan kamnag wasigeis gamag mwasanin, vagan siwliyoug bib_ənes.

Kumtakavateimiy beibwein

¹⁷⁻¹⁸ Sigwey kulinuways, peinan tasiyas takaweins live_ənen daGuyaws Yeisuw Kelis bo ilivnakes asisinap kalbaleb, idibakeimiy, ilansa, “Nakabiyokous tut waseg gamag bipiyaves tap_{wəl}oul, bisib_əwes, peinan bikkuns asvikeiy kalbaleb waseg.”

¹⁹ Gamag tasiyas sivines bilivis tayekelesiys, bimlavags bod kweitan kweitan, sivines kid sinapun ven watinow. Peinan Yowbad kululuwan nag inekes tasiyas.

²⁰ Tage yakamiy bwanabwein, sivinag bukukimtuweimiy vagan mitap_{wəl}oul bitawtoun; o Yowbad kululuwan bilabeimi_y vagan bukunitougs beibwein Yowbad waseg.

²¹ Kuvn_əseimiy vagan tut babaw Yowbad bisiwyoubumiy. Kukwayamats, peinan daGuyaws Yeisuw Kelis ikalin nuwan wasigeis yakamiy; igaw mwamovamiy bisekeimiy nag beikous.

²² Gamag mwasanin nag isimounids bwein, kwatimlakes vagan mo bikakins bwein.

²³ Tage mwasanin gamag bweina kwatinabwes kululuwes, mamagina kov waseg kwatinabwes. Binok nuwamiy wasigeis gamag mwasanin son amip_{wəy}at, mapuna kupiyaves ven watinow vikeiyan; mata-ge biyabik amikweim.

Nakabiyokous

²⁴⁻²⁵ Town takatinabweids anmw_ənet bweina bimtakavateimiy; mata-ge bukukwalouws; igaw mo bispuyeimiy nakamnat wamatan, amisinap kamnat son mimwasaw avakaein. DaGuyaws Yeisuw Kelis ilabeids mo takavasis Tatawtoun Yowbad, peinan Takaleiwag tatonen, tut kweiboug, tut town, o igaw tut wanakougwaw nag beikous. Eimen.

IKAMAT

Nakabsilamaw

¹ Sinapun Yeisuw Kelis. Yowbad nisek Yeisuw ansinap towen, vāgan kid bikatimlakay nagamag wasigeis mo bikakins youd tasiyas igaw kakita mo bikamat wasigeis. Mapuna ikayeb natakayob gum-libalab teitan, im ikatimlek natouwat yagan Yon.

² Sinap towen Yon ikin ikous, mo ikamtel livan towen, livānen Yowbad o livānen Yeisuw Kelis.

³ Sinap towen nilivnek buk towen waseg. Kal yak bukuvin o bukuligen o bukuvnas sinap towen, mo bukumwāsaw yākoum, peinan igaw kakit mo bikamat youd towen.

⁴⁻⁵ Hey Yon gunalet towen beiw silmanin tayekelesiys yakamiy, amibod kwenim kweiy wawnuwan Esiy. Townen bisiwyoubumi mo beitaw nuwamiy; mtownen nises, kweiboug nises, o igaw bises bisigeg. Kululuwan kwenim kweiy wamatan nakabsis towen nisin wakunuwatan, tasiyas-vak bisiwyoubumi mo beitaw nuwamiy; mtownen anilivan mounid; kanig waseg, mtownen tamgwayein kit vayuwein; guyawaw watinow siguyaw tonen.

Mtownen nisiwyoubuds, nilikuds adsinaps kalbaleb waseg, peinan buyāvin niwtāwout peinads.

⁶ Mtownen nivageids mamagina guyawaw o tanuwgwes lun yākids, mamagina yākids tawteleins lun Taman Yowbad silmanin. Tayyākawns towen waseg, nakaleiwag tawtoun bises bisigeg. Eimen.

⁷ Kukwakins mtownen beibus wālov beim, matads babaw yākids bitakines, o tasiyas nigliyavis towen mo bikini, o ven babaw gimgilis bivalams peinan aspwāyat. E, māwan. Eimen.

⁸ DaGuyaws ilana, “Hey absilamaw son abiyokous yey. Hey Yowbad, nagein nases, kweiboug nases, igaw mo bases basigeg; yey Tatawtoun tonen.”

Ankakin Kelis

⁹ Yey tuwāmiy Yon, simiy yey tasitans katanoka keb, peinan Yeisuw angamag yākids. Idatakaleiwags towen ilabeids mo takaptuleids, peinan abads ige. Tasiyas nikamliweids iyousigs isenags wāsim yagan Patmos, peinan takanawein aygan Yowbad yey, o peinan nalivan livānen Yeisuw.

¹⁰⁻¹¹ DaGuyaws inayam waseg Kululuwan imekeig, kululuwag ilātans son, watibweloug mo aligen teitan aygan avakaein, māwana bwagig; ilana, “Aveiyag bukukin, kulel wābuk, mo kuwyeb bein tayekelesiys wasigeis, bod tasiyas kwenim kweiy, min-Epesos wasigeis, min-Simulin wasigeis, min-Peligam wasigeis, min-Tayatil wasigeis, min-Salidis wasigeis, min-Piladelpiy wasigeis, o min-Leyodisiy wasigeis.”

¹² Yey atouvin vāgan bakin kal nidibakeig, mo akin lamp kaban, magina goul tonen, kwenim kweiy.

¹³ Wanuwein gog magin māwana gimilitoun, anakweim aveiyov, wavtakon anakweim abvalag mamagina goul.

¹⁴ Kunun pwapwakāwun māwana wunuwunun sip, mamagina pwākaw. O matan mamagina kov igidaged.

¹⁵ Kaken mamagina tanmunum bigob bilabwabwel, ikavvikawn-wan. Aygan māwana yevagam avakaein ililātay.

¹⁶ Wanakātay iyous wutun kwenim kweiy. Wawadon mamagina pulut tanmunum, kudun kakat palatan palatan. Mtownen ankakin mamagina kalas mititeilin, yanay waseg.

¹⁷⁻¹⁸ Yey akin mo amasis akabalamat walasin kaken; togo isen nakātay wāwoug, ilana, “Awoum beivag ampwāyat. Yey absilamaw son abiyokous yey; amov-wan. Bo akanig mo amov; mwamovag gog bises bisigeg. Kadilokeig bakaleiwag kanig waseg, o bakaliyow takankānigs siven, bakaleiwag wasigeis.

¹⁹ “Kadilok kulel sinap towen nukukin, aveiyag nises tut towen, o aveiyag igaw mo bikamat.

²⁰ “Wutun kweinim kweiy kukin wanamag nisesus, o lamp abes kweinim kweiy. Wawun youd tasiyas bo ikawum. Wutun tasiyas kweinim kweiy mamagina guntakayob inineis silmanin tayekelesiys sibod kweinim kweiy. E lamp abes kweinim kweiy mamagina bod tasiyas kweinim kweiy.”

2

Min-Epesos silet

¹ Wankuyeim mo ilivan, ilana:

Guntakayob silmanin min-Epesos tayekelesiys kulel silet kusek towen; e, kulel mamagina, “Mtownen niyous wutun kweinim kweiy wanakatay o inoun wanuwein lamp abes tasiyas goul kweinim kweiy, mtownen ilivan;

² “Ilana, ‘Akakin amisinap o miwotet o mikapatul. Akakin nukupiyaves takalbalebs o tayyaweids tasiyas nilivans, ilansa, “Takaweins livanen Yeisuw yakamey.” Nukuyak-wanes tasiyas mo kukwakins iyyaweids-wan.

³ “‘Akakin nukwaptuleimiy; nukuvvaluts gunawotet waseg; na-ikawegweis woumiy.

⁴ “Tage adok kweitan youd nises, peinan kweiboug nukusiwyoubugs bwein; nagein gog bo ikabwag misiwayoub.

⁵ “‘Kadiloka kulinuways amawan nukukwalouws, mo beivag ninoumiy kweitan vagan kid bukuwotets bwein, mawana kweiboug. Kukin gog nag, bo bawekeimiy, bakablev milamp towena wakaban nises.

⁶ “‘Amisinap kweitan bwein, peinan kupiyaves siwotet tasiyas Nikoleit nagamag; o yej mawan apiyev siwotet tasiyas.

⁷ “‘Yakamiy tigamiy sam, kadiloka bukuliganes Yowbad Kululuwan anilivan nidibek tayekelesiys wasigeis. Igaw Seitan biyakwaneimiy, kavel yakamiy bitawtoun mo basek anagin kay mwamovan silmanin, kay makaywen nitatos Yowbad wanven.’”

Min-Simulin silet

⁸ Gunatakayob silmanin min-Simulin tayekelesiys kulel silet, kusek towen; e, kulel mamagina, “Towen absilamaw son abiyokous, mtownen nikanig mo imov vayuwein, ilivan;

⁹ “Ilana, ‘Akakin abamiy igege, o miwliyoug na-ibabaw (tage miwliyoug walbalab singay babaw); akakin iyageimiy tasiyas idokes min-Yudiy tatineis; iyyaweids gog, peinan Seitan nagamag tasiyas.

¹⁰ “Awoum beivag amipwayat peinan igaw abamiy bigeg. Igaw Seitan bo bikaleiwag mo gamag biyousimiy, bukuneis wadeil mwasanin yakamiy, vagan mtownen biyak-waneimiy sinawatan yam, singaya bigeg abamiy. Kadiloka kukwaptuleimiy. Kukin bukwaptuleimiy ee... bukukwarigs, mo basekeimiy lalan mwamovamiy silmanin.

¹¹ “‘Yakamiy tigamiy sam kadiloka bukuliganes Yowbad Kululuwan anilivan nidibek tayekelesiys wasigeis. Igaw Seitan biyakwaneimiy, kal yakamiy bitawtoun, mo bisesuna bwein, tutan gamag bimtamats sivyuein.’”

Min-Peligam silet

¹² Guntakayob silmanin min-Peligam tayekelesiys kulel silet, kusek towen; e, kulel mamagina, “Towen napulut tanmunum kudun kakat palatan palatan, ilivan;

¹³ “Ilana, ‘Akakin mikasis yakamiy, Seitan nakabkaleiwag waseg, nukuyousis yagag bwein; nag kupiyaves aygag, nag. Kweiboug mwasanin gamag neiweiys takanawein aygag, mtownen Antipas, igaw kweiboug simiy towen nukusesus Seitan nakabkaleiwag waseg, tage nag kupiyaves aygag, nag.

¹⁴ “Tage adok amisinap kakit igege, peinan simiyas tayyousins sinapun Balam, mtownen kweiboug nikatimlek Balak mo isen sikabkalouw wasigeis min-Yisleil. Ansinap ikawes, mo ikamkwams kan tasiyas igaw dadub waseg nimgamegs, o ikaninavays mav.

¹⁵ “ ‘Tasiyas-vak Nikoleit nagamag simiyas kusesus.

¹⁶ “ ‘Kadiloka beivag ninoumiy kweitan. Kukin gog nag, nuwanaw mo bawekeimiy bakanaviy wasigeis tasiyas, bəweysi gunpulut towen wawadoug nises.

¹⁷ “ ‘Yakamiy tigamiy sam kadiloka bukuliganes Yowbad Kululuwan anilivan nidibek tayekelesiys wasigeis. Igaw Seitan biyakwaneimiy, kal yakamiy bitawtoun, mo bavakam anamana bo nakawum; e, basek nadakul pwapwakaw, yagan kweivaw balel waseg. Nag tayuwein bikakin yeg towen; misinaka towen basek.’ ”

Min-Tayatil silet

¹⁸ Guntakayob silmanin min-Tayatil tayekelesiys, kulel silet kusek towen; e, kulel mamagina, “Yowbad Natun, matan tonen mamagina kov igidaged, o kaken mamagina tamnunum ilabwabwel, mtowen ilivan;

¹⁹ “Ilana, ‘Akakin-wan kuwotets, o kusiwayoubs, o kusimounids, o kutoukums, o kukwaptuleimiy, o miwotet nakabsilamaw bwein, nakabiyokous singay bwein.

²⁰ “ ‘Tage kweitan amisinap kalbaleb nises, peinan nukutams vin nəwen Yesebel; nəwen idok palopit tonen; nag gog, peinan ikatidavis gungamag, ikatimlakes mo ikaninavays mav o ikamkwams kan tasiyas igaw dadub waseg nimgamegs.

²¹ “ ‘Bo asek tutan bikanavin nanon; tagé nag, nag sivinan bilavew ansinap towen ikaninavay mav.

²²⁻²³ “ ‘Mapuna bo basek nəwen ankatoun; o tasiyas nisubwans sisiy, kukin nag bipiyaves nəwen ansinap kalbaleb, igaw mo basekes sikasis singay kalbaleb. O nitun bəweysi bikanigs. Tasiyas tayekelesiys asibod babaw mo bikakins yey akatukin gamag ninous o nuwes wasigeis. Tayekelesiys yakamiy amibod babaw mo bukukwakins yey akatukin ninoumiy o nuwamiy wasigeis, mo bakatimop miwotet tatanok tatanok yakamiy, kukin kalbaleb mo kalbaleb, kukin gog bwein bo bwein.

²⁴⁻²⁵ “ ‘Tage mwasanin min-Tayatil yakamiy nukupiyaves manəwen ansinap, o nag kukwakins Seitan ansinap moumouvit, mamagina mwasanin idokes: Seitan nakalbaleb singay-wan.

“ ‘Adibakeimiy nag basekeimiy kunamiy kweitan moumouvit; misinaka kuyyousis amisinap bwein ee... mo baw.

²⁶⁻²⁸ “ ‘Igaw Seitan biyakwaneimiy, kal yakamiy bitawtoun o bivvalut gunawotet ee... nakabiyokous tut, mo basek nakaleiwag vena babaw gimgilis wasigeis, məwan Tamag nisekeig gunakaleiwag tatoneig; e, bikow nakaytuk tanmunum bikalawages, mamagina loutan tonen bitaweyi bikatimkumuk bigayay.

“ ‘E, mo basek wutun towen yagan Utuyam.

²⁹ “ ‘Yakamiy tigamiy sam kadiloka bukuliganes Yowbad Kululuwan anilivan nidibek tayekelesiys wasigeis.’ ”

3

Min-Salidis silet

¹ Guntakayob silmanin min-Salidis tayekelesiys, kulel silet kusek towen; e, kulel mamagina, “Towen iysiyous Yowbad Kululuwan kweinim kweiy sisiyas wutun kweinim kweiy, mtowen ilivan;

“Ilana, ‘Akakin aməwan mikawotet; akakin gamag babaw ilansa: “Min-Salidis tasiyas imouvs-wan.” Tage nag; mamagina takanigs yakamiy.

² “ ‘Kukits, kutoukums, kutawtouns, peinan kakite nises wasigeis yakamiy; kukin gog nag, bo beikous, peinan bo akin miwotet bwein wamatan Yowbad bo ikəbwag.

³ “ ‘Kuninuways aməwan Yowbad nisiwyoubumi, o sinap towen nukuliganes; e, kuvnases sinap towen; sinap kalbaleb kupiyaves. Kukin nag bukutoukums, mo bawekeimiy məwana tavveinaw yey; tagé nag bukukwakins asinəvin baw.

⁴ “ ‘Amiteiyuy amikweim bwein, min-Salidis yakamiy, peinan nag kuybikis amikweim. Kadilokeimiy igaw sigwey yakamiy bitaninounas, amikweim pwapwakawa tonen, peinan amisinap bwein.

⁵ “Igaw Seitan biyakwaneimiy, kal yakamiy bitawtoun, mo basek anakweim pwapwākaw, o nag bawid yagan wābuk town silmānin mwamovamiy; tage bakavteg yagan wamatān Tamag o wamtes tasiyas natakayobs walbālab waseg.

⁶ “Yakamiy tigamiy sam kadiloka bukuliganes Yowbad Kululuwan anilivan nidibek tayekelesiys wasigeis.”

Min-Piladelpiy silet

⁷ Guntakayob silmānin min-Piladelpiy tayekelesiys kulel silet kusek town; e, kulel mamagina, “Tadidumwal town, Yowbad ikayus inawotet silmānin. Mtown iyous Deibid inakiy; bikaliyow, nag kal bikatibog; o bikatibog, nag kal mo bikaliyow; mtown ilivan;

⁸ “Ilana, ‘Akakin mikawotet. Bo asen koukwed wamtamiy bo ikaliyow; nag teitan kadilok bikatibog. Akakin mitawtoun kakite nises peinan kuvnāses agulivan, o tage nag kupiyaves yagag yey.

⁹ “Magen! Tasiyas Seitan nagamag idokes min-Yudiy tatineis, tage nag, iyyaweids-wan; yey bavages vagan kid bimekeimiy, bikululs wamtamiy, mo bikakins gunsiwayoub wasigeis yakamiy.

¹⁰ “Peinan nukwaptuleimiy o nukuysiyou agulivan, igaw mo bakatinabweimiy, peinan igaw abiyokon mo bisilamaw wasigeis ven watinow gimgilis vagan biyakwanes, ven katanok katanok wasigeis.

¹¹ “Nuwanaw baw. Kadiloka kuyousis beibwein youd town nises wasigeis yakamiy; awoum teitan beim biven lālan silmānin mwamovamiy.

¹² “Igaw Seitan biyakwaneimiy, kal yakamiy bitawtoun, mo bavag mamagina Yowbad nabunatum kakolan, vagan bises bisigeg. Nag bisap bein watoulan; nag. E, balel gunaYowbad yagan wāwon, o yagan naven tonen, Yelusalem kweivaw. Ven town beinoy walbālab, Yowbad waseg, mo beim watinow. O balel yey yagag kweivaw.

¹³ “Yakamiy tigamiy sam kadiloka bukuliganes Yowbad Kululuwan anilivan nidibek tayekelesiys wasigeis.”

Min-Leyodisiy silet

¹⁴ Guntakayob silmānin min-Leyodisiy tayekelesiys, kulel silet kusek town; e, kulel mamagina, “Town yagan Eimen, anilivan mounid, ansinap didumwal, mtown wawun Yowbad inakabwabub waseg, mtown ilivan;

¹⁵ “Ilana, ‘Akakin mikawotet; akakina yakamiy nag muyamuy tonen o nag loulun tonen. Bo igak!

¹⁶ “Peinan wanuweinan-wan yakamiy, o nag muyamuy tonen, o nag loulun tonen, mapuna bangabeimiwadoug waseg, bukuneis watoulan.

¹⁷ “Peinan kulivans, kulansa, “Mavavag babaw, bo nakamlavag guyawaw yakamey; nag aveiyag ikābwag wasigeis yakamey.” Tage nag kukwakins tasimavs yakamiy, o takatouns yakamiy, o toul yakamiy, o ikawkaw mitamiy o son mwadoyamiy kusesusa mav.

¹⁸ “Adibakeimiy, “Kadiloka bukugimwals waseg yey migoul town bwanabwein nigob kov waseg, bukuklawes migoul town mo bukuguyaws. Kadiloka bukugimwals waseg yey amikweim pwapwākaw vagan bukusikams; mata beivag amimwasin, peinan mwadoyamiya mav. Kadiloka bukugimwals waseg yey mikaybuy kwaybuyes mitamiy mo bukukins bwein.”

¹⁹ “Kukin kalisiy yakamiy basiwyoubumi, mo bakaneimiy o baydumwālumi. Kadilokena bukutoukums, ninoumiy bikanavin, bimekeig.

²⁰ “Magen! Atamanaw wamkoukwed agigipit. Kal yak bukuligen aygag mo bukwaliyow mukoukwed, igaw mo bāsiw bitakaypul soug yak, bitakam.

²¹ “Igaw Seitan biyakwaneimiy, kal yakamiy bitawtoun mo bātam bakases gunakabis, kaleiwag silmānin. Yey māwan bo atawtoun to nakases soug Tamag wanakabis, kaleiwag silmānin.

²² “‘Yakamiy tigamiy sam, kadiloka bukuliganes Yowbad Kululuwan anilivan, nidibek tayekelesiys wasigeis.’”

4

Min-libalab iyakawns Yeisuw waseg

¹ Wankuyeim mo akin koukwed kweitan ikaliyow walbalab. Aygan town wanmugwana aligen mamagina bwagig aygan, mo ilivan; ilana, “Kumwen kum, bakatimlakeim aveiyag igaw mo bikamat.”

²⁻³ Nuwanaw Yowbad Kululuwan ikaweig inaweig, mo akin teitan nakabsis walbalab, waseg issin ikalleiwag. Town wanakabsis ankakin mamagina dakul ikavvikawn. Dakul tasiyas yiges yasip o kaniliyan. Wuleil bo itoun nakabsis, magin mawana dakul bwanabwein, yagan emelalid, singay ankakin bwein.

⁴ Nakabsis watoulan isiwnis kabsis babaw, sinawey kweivas. Tamumwey sinawey teivas isinis waskabsis tasiyas, asikweim pwapwakaw; wakunus asipay goul tonen.

⁵ Kavikawn son palpal meinoy neim nakabsis waseg. Nakabsis wamatan wodam kweinim kweiy nigidaged; Yowbad Kululuwan kweinim kweiy tasiyas.

⁶ Nakabsis wamatan ankakin mamagina yol taligubok tagon biniwal avakaein. Ankakin bo mawan.

Kadiykusan nakabsis walasin, mwanavas man. Mites mawana bwaloug mites, singay babaw.

⁷ Mwanat mamagina layon, mwanyuwein mamagina bulumakaw, mwantounun ivag magin mawana gamag, mwanvasin mamagina bunibwan iyoyow.

⁸ Mansiyas mwanavas man pinnipeis kweinim katanok, mites singay babaw wakulivis o pinnipeis waskawan. Nag iyeiwas yam o boug waseg, illivans-wan; ilansa, “Kamnat, kamnat, kamnat, daGuyaws Yowbad Tatawtoun.

Kweiboug nises; nagein nises; igaw bises bisigeg.”

⁹⁻¹⁰ Mansiyas man ikavasis o iyakawanes o ikalin nuwes Town wanakabsis. Ga-ikavasis mtowne mwamovan bises bisigeg, tamumwey tasiyas sinawey teivas ga-ikululs wamatan, biyakawanes town mwamovan bises bisigeg.

Ilaves asipay ineis wamatan nakabsis, ilansa;

¹¹ “MaGuyaw Yowbad yak, kadiloka bakakavasim o bakayakawaneim. Mutawtoun avakaein waseg nukubun youd babaw, peinan nanoum waseg nukuvag bo babaw-wan tasiyasa nisesus.”

5

Buk ikatibil-wan

¹ Bo akin town nissin wakaban, wanakatay buk kweitan nikibil; lelel palatan palatan nises. Youd kweinim kweiy ikaplik waseg, youd tasiyas mamagina pwalsilas vagan nag bikaliyowes, yagan sil.

² Bo akin Yowbad natakayob tawtoun, aygan avakaein iwkuwak; ilana, “Kal kadilok bikablev anasil buk town waseg, vagan kid bilat?”

³ Nag gog; nag teitan gum-libalab, nag teitan gimgeilin ven watinow, nag teitan guma-Tum; na-ikadilokes bilates buk town o bikines wanuwan, nag.

⁴ O ye, bo avalam avakaein peinan nag iban teitan kal ikadilok bilat buk town o bikin wanuwan.

⁵ Tamumwey tasiyas nisesus; tamwey teitan idibakeig, ilana, “Awoum kuvalam. Teitan bo itakayway, mtowne mamagina layon tonen, anakum Yud, mamagina gidwalin Deibid waseg isob natun, mtowne bikablev buk town anasil kweinim kweiy, mo bilat.”

⁶ Bo akin nakabsis o mansiyas man mwanavas. Bo akin lamiy wanuwein mansiyas man o wanuwein tammwayas, itamanaw itow; mamagina bo iweiys imat. Anadog

kweinim kweiy; matan kweinim kweiy, tasiyas mamagina Yowbad Kululuwan teinim teiy nikayabes mo nineis vena babaw wadaban pwepway.

⁷ Im ikow buk towen nises wanakatay towen nissin wakaban.

⁸ Wankuyeim mansiyas man mwanavas sisiyas tamumwey sinawey teivas mo ikululs wamatan Lāmiy; aleis hap tatanok tatanok iwaways igilagel, o abmavin iysiyous, won goul-wan, bo ikalawt gewuw, nigob kov, manisin simasim seikwan. Youd towen mamagina sikanitoug Yowbad angamag, aveiyag initougs Yowbad waseg.

⁹⁻¹⁰ Asiwous kweivaw ikanunuwels mamagina:

“Kadilokeim bukukow buk towen;
kadiloka bukwablev sil nikapkik waseg;
peinan nikimateims, o buyavim waseg nukugimweles gamag silmanin Yowbad,
kum katanok katanok wasigeis,
kaeig katanok katanok wasigeis,
dal katanok katanok wasigeis,
o ven katanok katanok wasigeis,
nukusekes siwotet mamagina guyawaw o tanuwgwas lun,
vagan kid biwteles lun daYowbads silmanin.
Peinan bo bikaleiwags ven watinow waseg.”

¹¹ Mo akin, o aligen ages Yowbad natakayob singay babaw isiwnis nakabsis o mansiyas man o tammwayas; sikavnivin babiweis lakatum tawsan sisiyas singay babaw tawsans.

¹² Ages avakaein ilans; ilansa,

“Lāmiy towen neiweiys nikanig, kadilok towen bikow nakaleiwag avakaein, navavag
babaw, ansinap avakaein, o natawtoun, vagan kid gamag babaw biyakawns
waseg, bikavasis, asilivan bwanabwein waseg.”

¹³ Bo aligen ages Yowbad nakabwabub babiweis walbalab, o watinow, o pwepway
waskawan, o wabwanit, ilansa,

“Tayakawanes o takavvasis o takatitubaws Tatawtoun Towne wakaban son Lāmiy, tut nag
beikous.”

¹⁴ Mansiyas man mwanavas mo ilansa, “Eimen”; o tamumwey tasiyas mo ikululs,
itapwalouls waseg.

6

Sil tasiyas ikapkik buk towen

¹ Sil kweinim kweiy ikapkik buk towen. Bo nakin Lāmiy ikablev katanok sil. Mansiyas man mwanavas, mwanatān mo aligen, aygan māwana palāpal, ilana, “Kum, kukin.”

² Mo akin hos, pwapwakaw won. Towne isin watapwan nagipouy nises. Teitan isek andinākom, mo inoun itawtoun; igaw mo bitakayway.

³ Mo ikablev kwayuwein sil, maniyuwein man mo aligen, ilana, “Kum, kukin.”

⁴ Ilivan ikous, mo isap kweitan hos, won bwabwel. Towne isin watapwan ikow nakaleiwag mo beikous niwal wadaban pwepway, kanaviy bisilamaw, o ven watinow gimgilis biwaweiys sisiyas; e, avakaein napulut tanmunum wanaman ikow.

⁵ Mo ikablev kwatounun sil, mwantounun man mo aligen, ilana, “Kum kukin.” Mo akin hos, won gunugoun. Towne isin watapwan, ikow nakabtākon wanaman, vāgan bikin kan mouvitan.

⁶ Mo aligen aygan teitan wanuwein mansiyas man mwanavas, ilana, “Kalgutan wit bitatakwen katanok kina; kalgutoun bāliy bitatakwen katanok kina; tage awoum bukuklawes oliv tagon o sipinen gleip; awoum.”

⁷ Mo ikablev kwavasin sil, mwanvasin man mo aligen, ilana, “Kum kukin.”

⁸ Mo akin hos kalimwey-nen pwapwakaw. Towne isin watapwan yagan Kanig; watibwelon ven yagan Tum ikabwakun wankuyeim. Ven watinow gimgilis bilivis kweivas bod, beiweiys katanok bod; kweitoun bod bikatibomes bisesus; e, Yowbad isekes

sikaleiwag mo beiweiys bod kweitan naviy waseg, o asimoun waseg, o askatoun waseg, o bulawud man wasigeis.

⁹ Mo ikablev kwanimen sil, mo akin abeilun waskawan, kululuwes takanigs nisesus, tasiyas neiweiys peinan takanaweins aygan Yowbad o takaweins livanen Yowbad tasiyas.

¹⁰ Kages avakaein ilivans, ilansa, “O Guyaw bwanabwein, Tadidumwal yākoum, asinavin bukumop asisinap ven watinow gimgilis tasiyas nikatimatemas. Tut singay kadiveiyov.”

¹¹ Mo isekes tatanok tatanok tasiyas asikweim pwapwakaw, idibakes, ilana, “Kuyewas tut nag biveiyov. Igaw simiyas tasiyas iwwotets Yeisuw nawotet waseg, ven watinow gimgilis mo beiweiys mwasanin, māwan yakamiy kweiboug. Mikavnivin babāwan mo bikadilok.”

¹² Mo akin ikablev sil towen kweinim katanok, nik mo ivag avakaein, kālas mo ilagunugoun mititeilin mamagina putakun gungounan, o tibukon ilabwabwel ikous mamagina buyav bwabgelan.

¹³ O wutun tasiyas walbalab ikalkalouws inineis wadaban pwepway mawana nuy anagin ikalkalouws mamagina yag itow.

¹⁴ Libālab ilakanig mamagina sag aveiyov ikatibil ikous. Koy babaw o sim babaw mo ilisawes kabes.

¹⁵ Mo ivag aspwayat tasiyas king babaw ven watinow, o tasiyas guyawaw, o tasiyas takanaviys situwāveks, o tasiyas sivavag babaw, o tasiyas tatawtouns, o gamag babaw, takinew toul o takinew guyaw, tatanok tatanok mo itoupans wanuwan takunumwan o koy dikudākul waseg.

¹⁶⁻¹⁷ E, idibakes koy son dakul ilansa, “Kwalivatows wawom yakamey, awoum bakakin magin Town isin wakaban, o mata kakin Lāmiy town ankavikun. Peinan ankavikun inayam avakaein bo isap wasigeis yakamey; bo bimop adsinaps. Nag kal kadilok bitamanaw wamatān, nag.”

7

Isenas inasil wawous min-Yisleil

¹ Wankuyeim mo akin Yowbad natakayob asteivas itamanaws itonas ven watinow matan palavas, iyousis yag kweivas, awoum ge beitow yag waven, awoum beitow yag wayol, awoum beitow yag wanawoud; makava niwal.

² Yowbad natakayob tanimen mo isap wanuvid, im; wanaman ikow nasal Yowbad Tamwamov. Iwak, aygan avakaein, idibek natakayobs teivas tasiyas nikawes sikaleiwag vagan kid biyagages ven son yol;

³ Ilana, “Kukwayamats tut kadiyakus; igaw bakasen daYowbads inasil inagamag wadibes; ikous, mo bukuygages ven o yol o nawoud wasigeis.”

⁴ Mo aligen sikavnivin babāwan isenas Yowbad nasal wadibes min-Yisleil asikum katanok katanok wasigeis, babiweis gog lakututan sinawatas kweivas tawsans.

⁵ Isenas nasal wadibes tasiyas asikum Yud sinawatan kweiy tawsans.

Tasiyas asikum Luben sinawatan kweiy tawsans.

Tasiyas asikum Gad sinawatan kweiy tawsans.

⁶ Tasiyas asikum Asel sinawatan kweiy tawsans.

Tasiyas asikum Naptal sinawatan kweiy tawsans.

Tasiyas asikum Mānas sinawatan kweiy tawsans.

⁷ Tasiyas asikum Simyon sinawatan kweiy tawsans.

Tasiyas asikum Livay sinawatan kweiy tawsans.

Tasiyas asikum Isakal sinawatan kweiy tawsans.

⁸ Tasiyas asikum Seblon sinawatan kweiy tawsans.

Tasiyas asikum Yosep sinawatan kweiy tawsans.

Tasiyas asikum Binyamin sinawatan kweiy tawsans, isenas nasal wadibes.

Meiveka ven gimgilis singay babaw

⁹⁻¹⁰ Wankuyeim akinew mo aban gamag singay babaw, nag kadilok bitavinis, gimgilis ven babaw, o kum babaw, o dal babaw, o kaeig babaw wasigeis, itamanaws wamatan Yowbad nakabsis o Lāmiy wamatan, asikweim pwapwākaw, molay wanimes, ages avakaein illivans-wan, ilansa, “Abkatuneib nises waseg daYowbads towen wanakabsis, o lāmiy waseg.”

¹¹ Yowbad natakayobs min-libalab babaw itamanaws isiwnis nakabsis sineyas tammwayas o mansiyas man mwanāvas, mo ikululs avakaein mamagina imasis kantuks wamatan Yowbad, ilivans;

¹² Ilansa, “Eimen. DaYowbads waseg, anilivan bwanabwein, nakamnat, o ansinap, o nasiwayoub, o yakawan, o natawtoun avakaein, bises bisigeg-wan. Eimen.”

¹³ Tamwey teitan mo idibakeig, ilana, “Kalisiy tasiyas asikweim pwapwākaw? O avanuy meinoy nimeis?”

¹⁴ Akatimop anilivan, alana, “O, tamwey, adok yakoum kukwakin.”

Mo idibakeig, ilana, “Tasiyas nilisawes abes singay kalbaleb, niwidis asikweim Lāmiy buyāvin waseg mo ilapupwākaw tonen.

¹⁵ “Mapuna nisesus wamatan Yowbad nakabsis ikannawes aygan yam waseg o boug waseg wanbunatum tonen; o Towen wanakabsis siney tasiyas nissikes-yay, bimtakavates.

¹⁶ “Nag beivag vayuwein asimoun o asidak, nag; kālas avakaein nag bilapulikas wous, o kov avakaein nag bilamyamuy wous; nag.

¹⁷ “Tage Lāmiy towen Yowbad nakabsis wanuwan misik, mtowen imtakavates, mamagina tamtakavatein alen bimtakavates tasiyas, bikatimlakes vāgan beimoums yevagam towen ibwabwab mwamov silmañin; o Yowbad mo bitanob mitingis.”

8

Sil towen nakabiyokous waseg

¹ Ikous, Lāmiy towen ikablev sil towen kwenim kweiy, libalab mo isesun mav tut kayakus, nag ivag butun, nag ivag aygan.

² Mo akin Yowbad natakayobs teinim teiy tasiyas nitamanaws wamatan, mo isekes asbwāgig kwenim kweiy.

³ Natakayob teitan mo isap, itamanaw wamatan abeilun, nakabmovin goul-wan wanaman. Yowbad mo isek gewuw bigob kov vāgan kid bivag manisin bisimasim; e, Yowbad bo isek babaw vāgan bisen wanuwan abmovin towen wakunuwatan abeilun towen goul-wan, nises wamatan Yowbad əban; e, bisen youd towen son tayekelesiys babaw sikanitoug.

⁴ E, musewun gewuw towen son tayekelesiys sikanitoug meinoy nimeis abmovin towen natakayob wanaman, inekes Yowbad.

⁵ Natakayob mo ikow nakabmovin mo ideg kov towen nigidaged abeilun waseg, in wanuwan abmovin, mo ilev kov in wadaban pwepway ven watinow waseg; mo ivag palapal son avikawn, son gamag ages agavek, son nik avakaein.

Bwāgig iyikis

⁶ Natakayobs teinim teiy mo ikawes asibwāgig ikayamats vāgan biykiyiks.

⁷ Teitan iyik, mo ikweis kweis kalivtuvat magina dakul, son kov, ikalivatow son buyav, ininein wapwepway, ven palatanok son amlokan igob iyakous; awuyow babaw igob ikous, tage ven paley nag igob.

⁸⁻⁹ Natakayob tayuwein mo iyik, mamagina koy avakaein kov-wan mo ikalouw in wabwanit, yol palatanok imlavag buyav; tage paley bwein. In o bwāloug yol palatanok waseg imtamats, o wag yol palatanok waseg igulgwaleks; tage babaw nisesus bwein.

¹⁰⁻¹¹ Natakayob tatounun mo iyik, wutun avakaein walbalab igidaged mititeilin mamagina wodam ikalouw in watinow, iwei yevagam ven palatanok waseg o yuyeiw ven palatanok waseg imlavag mamagina pwātuw, peinan wutun yagan Pwātuw; tage yevagam babaw bwein, ven paley waseg. Gamag babaw ikankanigs peinan asiyvagam son pwātuw imwamoums.

¹² Natakayob tavasin mo iyik, mo iyagages k^alas son tibukon, migis palatanok waseg iladadub, tage paley bwein. O niladadub wutun lib^alab palatanok waseg, tage paley bwein. Wudayam ivag abilivis kweitoun, kweitan iladadub, akweiy bwein. Boug m^awan, ivag abilivis kweitoun, kweitan iladadub, akweiy bwein.

¹³ Mo akin bunibwan iyoyow wanakaew, aygan avakaein, ilana, “Eew, eew, eew! Kalbaleb bilivatus ven watinow gimgilis peinan Yowbad natakayobs teitoun igaw mo biyikis asibwagig.”

9

¹ Natakayob tanimen iyik; mo akin wutun walbalab ikalouw in watinow; inakiy ikow vagan bikaliyow wadon leg towen singay avakaein.

² Ikaliyow wadon leg, mo isap musewun avakaein, mamagina pwagadon bwawun, ven son k^alas ilagunugoun peinan musewun singay avakaein.

³⁻⁵ Musewun towen waseg mo isaps kulipaw inounas wadaban pweppway, isekes sikalei-wag mamagina mansiyas kadilayuy, idibakes mamagina, “Awoum kuybilebes awuyow wadaban pweppway, o kay o kaligweg aveiyag nitatos, awoum. Misinaka kuybilebes gamag kalisiy nag ivag Yowbad inasil wadibes. Kadiloka kubasis gamag tasiyas kuvages simamayuy bivakaein, kweinim tibukon wasigeis; awoum kuweiys bikanigs, misinaka mamayuy bilivatus.” Mansiyas man mamyuyan bivages mamagina kadilayuy.

⁶ Tut towen waseg gamag tasiyas bininevs sikanig, tage nag bibanes. Singay gog beivag sivines beimats. Ta-m^awan. Nag bibanes abkanig.

⁷ Mansiyas kulipaw askakin mamagina hos ikatinages naviy silmanin; wakunus asipay mamagina goul; o migis mamagina gamag migis.

⁸ Kunus mansiyas man vayvayov mamagina vinay kunus; o kudus mamagina kudus mansiyas layon.

⁹ Silsilis ivag mamagina tanmunum. Butun pinpineis avakaein mamagina butun wag babaw hos babaw bibiteilis, bisisawls naviy silmanin.

¹⁰ Yiyus ivag mamagina kayal, m^awana kadilayuy yiyus; kadiloka bibbasis gamag, mamyuyan bivag kweinim tibukon.

¹¹ Siguyaw ikaleiwag wasigeis, mtowen leg tanuwagan, yagan ag-Ibluw waseg, Abadon, aga-Gilis waseg Apoliyon; tage aga-Muyuw Baloum.

¹² Youd moumouvit katanok ikous, akweiy igaw.

¹³ Natakayob tenim bo ikous, teitan mo iyik, mo aligen aygan teitan meinoy neim abeilun anadog wasigeis. Abeilun towen won goul-wan nises wamatian Yowbad.

¹⁴ Aygan towen waseg idibek Yowbad natakayob towen mwana neiyik, ilana, “Kulikus Yowbad natakayobs tasiyas asteivas, niyousis waseg lay avakaein towen Ewplates.”

¹⁵ Mapuna ilikus, peinan bo ikayamats silmanin tut towen beiweiys kalamwey babaw gamag. E, tut towen, o yam towen, o tibukon towen, o bweylim towen silmanin bo ikayamats mo beiweiys gamag. Mamagina ven babaw gimgilis bilivis, bivages kweitoun bod. Katanok bod beiweiys bikatimates, akweiy bod bikatibomes.

¹⁶ Bo aligen sikavnivin tasiyas imwens hos wakunuwatan isisawls naviy silmanin, lakatuy miliyon, singay babaw tasiyas.

¹⁷ Peinan nanoug isisawl mamagina agmikon waseg, bo akin mansiyas hos sisiyas tawaw tasiyas neimwens watapwes. Tawaw wavtukous tanmunum ivaligaves, bwabwel, kudikwad, tigitag. Hos migis mamagina layon migis; wudous waseg kov son musewun kov o panous isipsaps.

¹⁸ Youd tasiyas kweitoun meinoy nimeis wawdous mansiyas hos, mo iweiys gamag babaw, ikatimates; mamagina gamag babaw ilivis, ivages kweitoun bod; katanok bod mo ikatimates.

¹⁹ Hos wudous o yiyus kadiloka biyablebes gamag, peinan yiyus mamagina mwatet, kunus ivag ibibasis gamag.

²⁰ Gamag mwasanin ikankānigs youd tasiyas wasigeis; tage gamag tasiyas nisesus nag ipiyaves asisinap kalbaleb, nag ipiyaves siyowbad tobwag, o nag ipiyaves simeg baloum waseg, o nag ipiyaves siyowbad nibunis goul waseg, o silib waseg, o tanmunum bwabwel waseg, o dakul waseg, o amweilok waseg; siyowbad tasiyas nag kadilok bikines, o biliganes livan, o binounas; nag.

²¹ E, gamag tasiyas igaw son mwamoves nag ipiyaves waway, o nag ipiyaves bwagaw, o nag ipiyaves subwan o veinaw, nag.

10

Yowbad natakayob son nabuk kakit-wan

¹ Mo akin Yowbad natakayob teitan meinoy neim walbalab; mtownen tawtoun, anakweim māwana lov, wuleil isob wakunuwatan, magin ankakin māwana kālas, kaken mamagina mayen kov kaliboleb.

² Nabuk kakit bo ilat wanaman nises. Kaken nakatay isen wayol, nakimaw waven.

³ Iwak, aygan avakaein, mamagina aygan layon, mo palāpal iway, ivag ages kweinim kweiy.

⁴ Palāpal ages kweinim kweiy ivag ikous, mo asilamaw bālel; tage aygan teitan walbalab aligen, ilana, “Kwayus ages palāpal tasiyas kweinim kweiy, bweina bises wanano. Awoum kulel bein wābuk; awoum.”

⁵⁻⁷ Yowbad natakayob towen nakin nitet wayol son ven, mo itamnow nakatay in wanakaew, itabudabod wayagan towen nises isigeg, o nibun libālab son youd babaw nises waseg, o nibun pwepway son youd babaw nises waseg, o nibun yol son youd babaw nises waseg; e, itabudabod, ilana, “Bo beiyakous tut, peinan bwāgig kweinim katanok niyikis ikous, katanok nises; igaw gum-libalab biyik nabwāgig towen, Yowbad mo bivag mawan nanon tonen. Gamag babaw nag ikakins nanon, tage kweiboug nidibakes natouwat tasiyas palopits.”

⁸ Aygan towen walbalab vayuwein mo aligen, ilana, “Kunek gum-libālab towen nitet wayol son ven, kukow nabuk towen kakit nilat wanaman niysiyous.”

⁹ Mo anek gum-libālab towen, adibek, alana, “Kusekeig buk towen.”

Ilana, “Kukow, kukwam; kayoum bilakamnag, mamagina kitoul, tage bukusimkwen wanuwam mo bimunmwawanawl.”

¹⁰ Mo akow buk towen kakit wanaman towen, əkam, kayoug mo ilakamnag māwana kitoul, tage wankuyeim asimkwen nuwag mo imunmwawanawl.

¹¹ Mo idibakeig, ilana, “Kadilok vayuwein bukulivan gamag babaw livneis, siven kweitan kweitan, ages kweitan kweitan, o guyawaw babaw livneis.”

11

Takaweins livanen Yowbad asteiy

¹ Teitan mo isekeig kaligweg didumwal vāgan batakwen ovavin bunatum vayovan, ilana, “Kun kutakwen Yowbad nabunatum tapwāloul, kutakwen abeilun, o kuvin teivin gamag babiweis nitapwālouls wanuwan.

² “Awoum bukutākon bunatum anakal; awoum. Peinan bo ətam ven babaw gimgilis kikeis bivakwanes wanuwan kal towen, o gunaven Yelusalem wanuwan; e, kikeis bivakwanes ven towen sinawavas kweiy tibukon.

³ “Gungamag asteiy basekes siwotet mo bigeiguis livāneig, asikweim gunugoun kalbaleb. E, yam lakatunim lakatunim lakatuy sinawanim sinawatan bigeiguis-wan.”

⁴ Gamag tasiyas mamagina kay akiy yagan oliv, o mamagina lamp abes akweiy nitatos wamatān ven watinow guyawun tonen.

⁵ Kukin kal sivinan biyagages tasiyas asteiy, kov mo bisap wawdous tasiyas, binek gamag towen, bigob; e, bikanig gamag towen.

⁶ E, kadilokesa bisilbwades kweis igaw tutan bigeiguy; o kadilokesa yevagam bivages bilabwabwel bimlavag mamagina buyav, o magat sivines kadiloka beiweiys ven; youd babaw kalbaleb mo bisap waseg.

⁷ Livānen Yowbad billivans beikous, mo bulawud man manawen meinoy neim leg avakaein waseg, mo bivatay wasigeis tasiyas, bitawtoun, bikatimates tasiyas.

⁸ E, takanigs tasiyas asteiy immasis wapwepway wavytakon ven. Kabebay nises waseg ven towen. Yagan mamagina Sodom o Yidipt. Ven towen avakaein neiweiys siguyaw waklos, neimat.

⁹ Yam kweitoun kwavasin yanay waseg gamag babaw bikikines wous tasiyas asteiy nimmasis wavytakon ven; e gamag babaw bikines, asikum katanok katanok waseg, ages kweitan kweitan, isidal kweitan kweitan o siven kweitan kweitan; ipiyaves andabwan, ilansa, "Awoum kutakus wakalawag."

¹⁰ Peinan kweiboug Yowbad nagamag tasiyas asteiy sigeiguy waseg bo iyageg ninous ven watinow gimgilis tasiyas; wankuyeim ikanigs, mo ibwein ninous tasiyas, imwāsaws, siwliyoud iwayabs tawlisyas wasigeis o ivvageins-vak sisiyas wasigeis, peinan singay imwāsaws.

¹¹ Yam kweitoun ikous, kwavasin yanay waseg, nakabiyatun Yowbad mo binekes, bitamanaws; e, gamag mwasanin bikines mo beivag aspwāyat, nag bikakit vagan.

¹² Mo biliganes aygan avakaein teitan walbalab, bidibakes, bilana, "Kumwens, kumeis." Mo beimwens bineis walbalab, lov waseg, o tasiyas nikamliwes bo bikines.

¹³ Tut towen mo ivag nik avakaein; o ven towen palatanok waseg bunatum babaw igulek, tage palanim palavas bwein; kweinim kweiy tawsan gamag nikatimates, o tasiyas son mwamoves nisesus, mo beivag aspwāyat, mapuna bivnāses Yowbad towen walbalab.

¹⁴ Youd moumouvit akweiy bo ikous, k watounun nuwanaw beim.

Bwāgig towen nakabiyokous waseg

¹⁵ Bwāgig kweinim katanok iyikis bo ikous, tayuwein mo iyik. Mwasanin walbalab ages avakaein ilivans, ilansa, "DaGuyaws son naKelis Yeisuw, bo ikow nakaleiwag ven watinow waseg; e, nakaleiwag bises bisigeg."

¹⁶ Tamumwey tasiyas sinawey teivas wamatan Yowbad wakabes misikes, e tasiyas mo ikululs avakaein, imasis kantukov wamatan Yowbad, itapwaloulis waseg;

¹⁷ Ilansa, "Kalin nuwem maGuyaw Yowbad Tatawtoun yakoum, peinan nukuses, o kusesuna, o mutawtoun avakaein waseg nukusilamaw mukwaleiwag."

¹⁸ "Ven babaw gimgilis ikapasal nuwes; tage amkwavikun mo isap, tutan bukwatukin takanigs wasigeis, mayses bukusekes mutouwat, tasiyas palopit, o tayekelesiys, o tasiyas igoulus yagam yak, takinew guyaw o takinew toul, e bukuvgages tasiyas tayagageins ven watinow."

¹⁹ E, Yowbad nabunatum walbalab mo ikaliyow; wanuwan mo akin Yowbad nadidawag towen nakaleiwag livānen nises wanuwan. Mo ivag avikawn son palāpal; nik avakaein ivag; o kweis avakaein bo ikalivtuvat, ikweis mamagina dakul.

12

Vin son man bwabwel

¹ Youd singay tawtoun mo akin walbalab, mamagina nātan vin anakweim kālas; tibukon nises waskawan kaken; o wakunun anapay wutun sinawatan kweiy.

² Vin manawen kakudāpom, nuwan igidaged, ivvalam avakaein peinan bo itup; sivinan kid bitapouy naman.

³ Tawtoun youd kwayuwein mo akin walbalab, mamagina man avakaein, bwabwel won, kunun kweinim kweiy, anadog sinawatan, anapay tanmunum kweinim kweiy nisenas wakunun kweiy.

⁴ Yayun itaneiv libālab palatanok waseg, wutun ikalkalouws inineis ven watinow. Tage walbalab paley nisesus bwein.

Man towen itamanaw item wamatan vin manawan nitup; igaw bitapouy naman mo beikoum natun.

⁵ E, mo ikop natun kudataw; igaw bivakaein, nakaytuk tanmunum wanaman mo bikaleiwag ven babaw wasigeis. Tage Yowbad ikow inow apwaw towen, imwen inek Yowbad, nakabsis warnatan.

⁶ Manawan vin mo isawl in wanawoud, nisik ven towen Yowbad nikatigik naven, mo ivakam yam lakatunim lakatunim sinawanim sinawatan wasigeis.

⁷⁻⁹ Mo isilamaw naviy walbalab. Anelos towen Maykel sen natakayobs ikaninaviys sisiyas man towen bwabwel sen natakayobs; tage bo ikous sitawtoun, bo ikous siven walbalab waseg, peinan bo ilaves man towen avakaein, in watoulan, mtown mwatet kweiboug nises, yagan Bwagaw o Seitan, nikatidavis ven babaw gimgilis; e, mtown ilaves in ven watinow siney natakayobs.

¹⁰ Mo aligen teitan walbalab, aygan avakaein, ilana, “Tut towen Yowbad bikaleiwag, natawtoun waseg bikatinabwes nagamag; o Kelis bo ikow nakaleiwag tonen. Bo igulek nakaleiwag towen nivtokes livan sidayas tayekelesiys, peinan nivtokes livan wamatan Yowbad, yam katanok katanok waseg o boug kakanok katanok waseg. E, bo ikous nakaleiwag mtown takalbaleb.

¹¹ “Tage sidayas tasiyas isimounids waseg buyavin Lamiy niwtawout pines; livanen Lamiy illivans; o nag ikayuses mwamoves tatineis. Asisinap mawan mo itakayways waseg man towen.

¹² “Mapuna kumwasaws libalab waseg, misikena gimgilis yakamiy; tage bukuvalams yakamiy wadaban pwepway o wayol, peinan Seitan ikalivatow, biwekeimiy, kapasal nuwan, peinan ikakin inatut nuwanaw mo beikous.”

¹³ Man bwabwel ikakin ikalivatow in wadaban pwepway, mo ikawsep vin nawen nikop natun kudataw.

¹⁴ Tage Yowbad isek vin bunibwan pinpenen paley kavkavek, vagan beiyow bein wanawoud wanven tatonen, mo bivakam bweilim kweitoun kwavasin watapwan-wan, wanven towen; mwatet awoum biyous.

¹⁵⁻¹⁶ Mwatet mo igus wadon sipinen mamagina bilateg avakaein, vagan kid binek vin biyatuwen; tage pwepway ileb, pwepway ikaliyow wadon ikanpwen yevagam towen man nigus wadon.

¹⁷⁻¹⁸ Man towen bwabwel mo ikawkun vin, inoun in vagan bivvatays siney vin nitun tasiyas nisesus, tasiyas gog takanaweins aygan Yowbad o takaweweins livanen Yeisuw; e, man towen mo itamanaw iton wakawalaw.

13

Man mwanay

¹ Mo akin mwaniyuwein man igalag wayol, anadog sinawatan, kunun kweinim kwei, anadog waseg anapay sinawatan bwanabweins, o kunun katanok katanok wasigeis yagan kalbaleb nileles.

² E, man manawen magina puskat singay avakaein, kaken magina bey kaken, wadon magina layon wadon.

Man bwabwel mo isek mwaniyuwein man natawtoun vagan bikaleiwag tawtoun waseg.

³ Kunun palatan pulut bwabwagan singay avakaein, magina bo beimat; tage mo ibwein ansasok towen wakunun. Ven watinow gimgilis asibabaw bo isom ninous, ibukunis manawan man.

⁴ Bo ikululs man bwabwel wamatan, peinan nisek nakaleiwag mwaniyuwein man towen, o ikululs manawan man wamatan, ilansa, “Nag kal ivag natawtoun mawana manawan man; o nag kal ikadilok bivatay waseg; nag.”

⁵ Mo isek anilivan tawtoun, singay kalbaleb, o nakaleiwag tawtoun isek sinawatas kwei yibukon wasigeis.

⁶ E, ikaliyow wadon, iyeg Yowbad, iyeg yagan, iyeg naven, mamagina iyeg libalab gimgilis.

⁷ Bo ikow nakaleiwag vagan bikawpunawes tayekelesiys, bitakayway wasigeis, o bikalawages ven babaw gimgilis, asikum katanok katanok wasigeis, isidal katanok katanok wasigeis, kaeig katanok katanok wasigeis, o ven katanok katanok wasigeis.

⁸ Ven babaw gimgilis mo ikululs wamatan manawen man; e, gamag tasiyas yiges Yowbad nag ilel Lamiy wanabuk; Lamiy towen neiweiys o gamag mwasanin nile yiges wanabuk towen igaw tutan niginbun ven babaw waseg, peinan tasiyas mwamoves bibanes.

⁹ Kal yak teigam sam kadiloka bukuligen.

¹⁰ Kukin kal gamag biyousis, mo biyousis, bisenas wadeil. Kukin kal biaway napulut waseg, gamag mo beiweiys mtowen sipulut waseg. Kadiloka Yowbad angamag bikaptules, o bitoukums.

¹¹ Mo akin mwantounun man imwen isap wadaban pwepway anadog paley, mamagina lamiy anadog, tage aygan mamagina aygan man bwabwel.

¹² Nakaleiwag wamatan man manawen nimug neim; e, nikaluweg mawana nawen; e, nivag ven palatan palatan misikena gimgilis mo ikululs wamatan manawen man nimug neim, antatay mulin singay avakaein mo neibwein.

¹³ Naman mulin tawtous ivag, ivag kov meinoy neim walbalab ikalivatow im wapwep-way wamtes gamag watinow.

¹⁴ E, nakaleiwag tonen ikow, mo ivag naman mulin tawtous wamatan mwaniyuwein man, ikatidavis ven watinow gimgilis, idibakes, ilana. “Kuvag youd magin mawana man manawen neiweiys pulut waseg, antatay singay avakaein, tage na-imat, mwamov-wan; e, mo kutapwalouls wamatan youd towen bukubunis.”

¹⁵ E, nakaleiwag tonen ikow, mo youd towen mamagina man, mwamovan isek, imov mo ilivan, youd towen gamag nibunis; e ikaleiwag vagan bikatimates gamag kalisiy nag ikululs wamatan youd towen.

¹⁶ Mo ikaleiwag gamag babaw wasigeis, takinew toul o takinew guyaw, takinew navavag babaw o navavag nag, takinew tamwey o takinew touwat, nakabivatus mo isen katanok katanok wanakatay o wadaban waseg.

¹⁷ Kukin kalisiy nag ivag sikabivatus, nag kadilok bigimwals, bisesus-wan; e, sikabivatus man manawen yagan, o man yagan ananamb.

¹⁸ Sinap towen nises. Kukin sam ninoumiy kadiloka kuvinis man ananamb, peinan gamag teitan ananamb, lakatumim lakatutan sinawanim sinawatan kweinim katanok.

14

Singay babaw gamag ikannuwels

¹ Akinew mo akin Lamiy itamanaw iton wakunuwatan koy yagan Sayon, siney itamanaws lakatutan sinawavas kweivas tawsan gamag, wadibes nile yagan tonen, son Taman yagan.

² Mo aligen butun meinoy neim walbalab, mamagina butun yevagam avakaein ililatay, o mamagina butun palapal avakaein, o mamagina butun tawayins hap iwaways aleis hap wasigeis.

³ E, aligen wous kweivaw ikannuwels Yowbad nakabsis wamatan, o man mwanawas wamtes, o tammwayas wamtes. Nag kadilok gamag babaw bikakins wous towen, misinaka tasiyas lakatutan sinawavas kweivas tawsan; Yowbad nigimwel tasiyas wadaban pwepway.

⁴ Gamag tasiyas kamnat wous, nag iyabikis kululuwes vinay wasigeis; ikabkunis Lamiy ampalawen binoun. Yowbad nigimwel gamag tasiyas, mo ilisawes gamag babaw, mamagina bwawaw tasiyas, Yowbad silmanin, o Lamiy silmanin. Tasiyas mawana bwawaw, babaw gamag wankuyeim.

⁵ Nag biyaweids gamag tasiyas, asisinap bwein-wan.

Asilivan Yowbad natakayoub asteitoun

⁶ Mo akin Yowbad natakayob teitan iyoyow wanakaew, illivan anilivan bwanabwein, livanen Yowbad tut babaw silmanin ven watinow gimgilis, siven katanok katanok wasigeis, asikum katanok katanok wasigeis, ages katanok katanok wasigeis, sidal katanok katanok wasigeis.

⁷ E, aygan avakaein ilana, “Kadiloka kugoulus Yowbad, kuyakawns waseg, peinan tutan Yowbad bikatukin bo isap. Kukululs wamatan towen nibun libalab, o ven watinow, o yol, o yevagam babaw.”

⁸ Natakayob tayuwein mo ikabkun, ilana, “Aee! Ven avakaein Babilon bo ikalouw, peinan niwmwamwes ven babaw gimgilis yvgamun geinawl waseg.”

⁹⁻¹⁰ Natakayoub tatounun mo ikabkunis tasiyas, aygan avakaein ilana, “Kukin kalisiy bikululs wamatan man manawen, o wamatan youd towen nibunis magin mawana man manawen, o beitams nakabivatus bisenas wadibes o wanimes; e, tasiyas mo bimwamwes yvgamun ankavikun Yowbad, peinan bivgog bikalawt askwavig, ankavikun waseg; sona biwmwamwes; e, kov son dikudakul muyamuy bininekes wous, singay bigidaged wous wamtes Yowbad natakayob bwanabweins sisiy Lamiy towen.

¹¹ “Igaw bigidaged wous, musewun kov towen tut babaw bivavag. E, yam babaw nag biyeiwas, o boug babaw nag biyeiwas, peinan bo ikululs wamatan manawen man, o wamatan youd towen nibunis magin mawana manawen man, o peinan itams yagan nakabivatus wawous.”

¹² Kadiloka Yowbad angamag bikaptules, tasiyas tavnaseins nakaleiwag, peinan isimounids waseg Yeisuw tasiyas.

¹³ Mo aligen aygan teitan walbalab, ilana, “Kulel, ‘Tasiyas igaw beimats Yeisuw waseg, mo bimwasaws.’”

Yowbad Kululuwan ilivan mawan; ilana, “Magen! Igaw mo biyeiwas siwotet waseg, mo bikamat asisinap bwein.”

Igaw bitayoys ven watinow waseg

¹⁴ Akinew mo akin lov pwapwakaw; lov wakunuwatan nissin mamagina gimgilitoun, wakunun anapay goul, wanaman naseis kakat.

¹⁵ Yowbad natakayob teitan meinoy neim wanbunatum, aygan avakaein mo idibek mtownen nissin walov, ilana, “Kukow museis, kutayoy kan, peinan bo iyebwel kan, bo imatuw ven watinow waseg.”

¹⁶ Mapuna towen walov, mo ikow naseis, itayow kan ven watinow, iyakous.

¹⁷ Yowbad natakayob teitan meinoy neim wanbunatum walbalab, mtownen-vak ikow naseis kakat.

¹⁸ Yowbad natakayob teitan mo isap, meinoy neim wanakabeilun waseg, mtownen nakaleiwag kov waseg, aygan avakaein mo idibek towen nikokew naseis kakat, ilana, “Museis waseg katalog gleip anagin; ven watinow bigulen gleip katalog, peinan bo imatuw.”

¹⁹⁻²⁰ Mapuna isek naseis, italog gleip angis ven watinow, ilaves ineis Yowbad wanakas avakaein wanuwan; Yowbad ikawkunes, ipwel sipinen iwtawout. E, Yowbad nagamag ivvanis gleip tasiyas watoulan ven, iwtawout mamagina buyav ililatay, inoun ee... lakatuy viet; mansiyas hos bigapels buyav towen waseg, mo biwlik vitulen hos wakayous.

15

Youd moumouvit mwasanin

¹ Mo akin youd singay tawtoun walbalab, isom nanoug waseg. Akin Yowbad natakayob teinim teiy, ikokews youd moumouvit kweinim kweiy, Yowbad ankavikun nakabiyokous waseg. Youd kweinim kweiy biyagages ven, bo misinak.

² Mo akin mamagina yol, magina gilas son kov; akines tasiyas nitakayways waseg man son yagan ananamb, o nitakayways waseg youd towen nibunis magin mawana manawen man; e, gamag tasiyas itamanaws wadadan yol towen, Yowbad alen hap wanimes.

³⁻⁴ E, ikanweles Moses anawous, mtowen Yowbad natouwat; son L^amiy anawous, ilansa,
 “MaGuyaw Yowbad, Tatawtoun yak,
 muwotet kavk^ävek, tawtous;
 amsinap mounid, didumwal,
 ven babaw maGuyaw yak.
 O guyaw, gamag babaw bigoulums yak,
 bikavasis yagam toneim,
 peinan ammw^anet amsinap kamnat y^acoum;
 mapuna ven babaw gimgilis bimeis, bikululs wamatam,
 peinan bo ikamat mukwaleiwag didumwal.”

⁵⁻⁶ Ikous, mo akin ikaliyow Yowbad nabunatum walba^älab, magin maw^ana nabunatum kweiboug nakaleiwag nilel nises waseg; e, akin ikaliyow nabunatum towen walba^älab, mo isaps Yowbad natakayob teinim teiy, nikokews youd moumouvit kweinim kweiy, asikweim pwapwakawa tonen singay gimagim, wavyakous abvalag mamagina goul.

⁷ Mwan^avas man nisesus, mwantanok mo iseke tasiyas teinim teiy sikabmavin won goul tatonen, kweinim kweiy, boumsiyas abmavin ikalawt waseg ankavikun Yowbad, mtowen nises bo isigeg.

⁸ Yowbad natawtoun o nakamat mo ivag mamagina musew, ikalawt nabunatum. Takanal beisiw bein wanuwan nabunatum. Igaw beikous youd moumouvit kweinim kweiy nikokews natakayob teinim teiy, gamag mo beisiws Yowbad wanbunatum.

16

Abmavin waseg ikalawt Yowbad ankavikun

¹ Mo aligen teitan aygan avakaein meinoy neim Yowbad wanbunatum, idibek Yowbad natakayob teinim teiy, ilana, “Kuneis, kukawes mikabmavin kweinim kweiy, kuligabos Yowbad nakavikun bein wapwepway watinow.”

² Teitan imug, ikow nakabmavin, iligob in watinow, mo ivag asisasok singay kalbaleb, gamag tasiyas nikawes man nakabivatus wawous, o nikululs wamatam youd towen nibunis magin mawana manawen man; e, bo ivag asisasok.

³ Tayuwein ikow nakabmavin, iligob in wayol mo ilabwabwel mamagina takanig buyav^a, youd babaw wabwanit mo ikous mwamoves.

⁴⁻⁶ Tatounun ikow nakabmavin iligob in wabilateg babaw iyableb, in lay babaw iyableb, yevagam imlavag buyav; mo aligen Yowbad natakayob silmanin yevagam ilana, “Takamat y^acoum kuses o kweiboug nukuses, mukwaleiwag towen bwein. Gamag tasiyas neiweiys tayekelesiys sisiyas tasiyas palopit, buyvis niwtawout, mapuna nukusekes asibuyav beimoums. Bo ikunakes.”

⁷ Mo aligen wakabeilun aygan teitan, ilana, “E, mounid o didumwal mukwaleiwag, Guyaw, Yowbad, Tatawtoun y^acoum.”

⁸ Tavasin ikow nakabmavin, iligob, inek k^alas; kabmavin natawtoun mo ikow k^alas ilamuyamuy gamag wawous, kovan waseg.

⁹ Gamag wous iy^alay k^alas avakaein waseg, mo iyages yagan Yowbad peinan nikaluweg youd tasiyas moumouvit; tage nag ivag ninous kweitan v^agan bigoulus Yowbad, nag.

¹⁰⁻¹¹ Tanimen ikow nakabmavin iligob, inek man nakabsis, mo iladadub nakabkaleiwag waseg, misikesa gimgilis mamayuy avakaein, mapuna ikakkilis kumtus, iyages Yowbad walba^älab peinan mamayuy avakaein, o asisasok avakaein; tage nag ikanavin ninous, nag ipiyaves siwotet kalbaleb; nag.

¹² Teitan ikow nakabmavin iligob inek lay avakaein yagan Ewplates, mo imad, v^agan bivag ked silmanin king mwasanin wanuvid mo bimeis.

¹³ Mo akin aluw asteitoun isaps. Teitan isap wawadon man bwabwel; tayuwein isap wawadon kweitan man kalbaleb; tatounun isap wawadon palopit towen tayyaweid, aluw tasiyas migis mawana kumew.

¹⁴ Tasiyas gog Seitan natouwat, nimes mulin tawtous nivages, inekes king babaw wadaban pwepway sisiyas sitakanaviy, ikatiyounis tasiyas silmānin naviy, Yowbad Tatawtoun inayam avakaein waseg.

¹⁵ (Magen. Bo baw, mamagina tavveinaw yey. Yakamiy bukumwāsaws magat bukuk-waymateigs o bukutoukums, o bukuvnāses amikweim beibwein; mata son amimwasin bukunounas o gamag bikineimiy amimwasin; awoum.)

¹⁶ Aluw tasiyas mamagina kumew bikatiyounis king babaw sisiyas sitakanaviy bimeis waven, yagan ag-Ibliw waseg Amagedon.

¹⁷ Tayuwein ikow nakabmovin, iligob, in yiginen ven watinow waseg; teitan aygan avakaein Yowbad wanbunatum, meinoy neim wanakabsis, ilana, “Bo ikous!”

¹⁸ Mo ivag kavivikawn, son palapal, son nik singay avakaein; tut babaw gamag misikes wapwepway nag ivag nik avakaein māwana towen.

¹⁹ Nik towen ikatuv ven towen avakaein imlavag palatoun; o ven babaw gimgilis siven igulekxes. Yowbad inuw ven avakaein, yagan Babilon, mo isek ankwavig yayan vagan beimoums, bo ikālawt ankavikun waseg.

²⁰ Tut towen waseg, sim babaw isisawls inineis; o nag kweitan koy bitaban, nag. Peinan bo ikous koy.

²¹ Kweis bo kalivtuval mo ikweis, ikalkālouws mamagina dakul kavkāveks, vakanes māwana bwaloud vakanes, ikalkālouws walbalab, ininekes gamag; mo iyages Yowbad peinan kweis towen kalbaleb, singay moumouvit wasigeis tasiyas.

17

Vin manāwen ikaninavay mav

¹ Yowbad natakayob tasiyas nikokews abmovin teinim teiy, teitan gog im, idibakeig, ilana, “Kum, bakatimlakeim mo bukukin mapun ansinap singay kalbaleb manāwen vin, peinan ikaninavay mav. Manāwen nakabsis yevagam babaw wakunuwanan.

² “E, guyawaw ven watinow nisisubwans waseg vin manāwen, mo ven watinow gimgilis imwamoums sinap towen yvgamun, mo immasis kabalawein tasiyas.”

³ Kululuwag mo ikow inow, an wanawoud, mo akin vin nātan nisin watapwan man mwanātan. Man singaya bwabwel; won meivek-wan yeg kalbaleb nises, kunun kweinim kweiy, anadog sinawatan.

⁴ Vin manāwen anakweim bwabwel limwelem, won iguwāvin goul waseg, o wasigeis dakul bwanabwein migis, o lap wasigeis; wanaman ankwavig goul-wan, bo ikālawt alokay son sinap kalbaleb, peinan manāwen vin ikaninavay mav.

⁵ Wadaban gog nilel yagan, mamagina kabebay, yagan Babilon avakaein, nitun babaw wadaban pwepway ikaninavays mav o ikallokays-wan.

⁶ Bo akin manāwen vin ikabalawein, peinan nimoum buyvis Yowbad angamag son buyvis tasiyas neiweiys peinan takaweins livanen Yeisuw tasiyas.

Akikin; bo isom nanoug.

⁷ Yowbad natakayob mo idibakeig, ilana, “Aveiyag wawun isom nanoum? Yey bakatimlakeim silawun vin, o silawun manāwen man ipep vin watapwan, kunun kweinim kweiy o anadog sinawatan.

⁸ “Man towen kukin, kweiboug nises, tage bo ikanig; igaw mo bisunap leg avakaein waseg, mo bein bikatimates bikanig.

“Igaw-o kweiboug tutan nakabeibub ven, Yowbad nilel yiges gamag wābuk mwamoves silmānin; tage ven watinow gimgilis mwasanin nag ilel yiges buk towen waseg. Tasiyas gog bikines man manāwen bo beisom ninous, peinan nises mo ikanig, o igaw mo bisap vayuwein.

⁹ “Kal yak amsinap sam, kuninuway. Kunun kweinim kweiy, mamagina koy kweinin kweiy, vin nakabsis waseg; o mamagina king teinim teiy.

¹⁰ “King teinim bo ikalouws; teitan nises; tayuwein igaw. Igaw towen beim, anatut kadiyakus-wan bises.

¹¹ “Manawen man kweiboug nises mo ikanig. Teinim teiy bo ikous; mtowen tatounun, peinan nises wasigeis tasiyas teinim teiy. Igaw mo bikatimates bikanig.

¹² “Anadog sinawatan nukukin, tasiyas king sinawatan, tut towen nag isilamaws sikaleiwag; igaw sisiy manawen man bikaleiwags tut kayakus waseg.

¹³ “Ninous katanok, mapuna itimakes sitawtoun son sikaleiwag, manawen man natawtoun o nakaleiwag.

¹⁴ “Tasiyas bikaninaviys sisiy Lamiy, tage Lamiy bitakayway, peinan mtowen guyawaw siGuyaw o king babaw siking towen, o nagamag siney nidawes nikatkines, singaya itoukums.”

¹⁵ Mo idibakeig, ilana, “Yevagam uwysiwas nukukin, vin kalbaleb nakabsis wakunuwatan, yol towen mamagina gamag singay babaw, asibod babaw, siven babaw o ages babaw.

¹⁶ “Manawen man son anadog sinawatan tasiyas bikamliwas manawen vin kalbaleb, e, binibwis anakweim, bisimav-wan, bisesuna son mwadoyan, viniyonan beikams, o bigabus kov mo biyakousis manawen vin.

¹⁷ “Peinan Yowbad nisekes ninous mawan, nanon Yowbad mo ikamat, mo iwteles mawan; peinan tasiyas ninous katanok-wan bo neitams sikaleiwag iseikes manawen man, ikokew nakaleiwag ee... mo bikamat youd babaw Yowbad nilivnek.

¹⁸ “Vin manawen nukukin, mamagina ven avakaein; manawen nikaleiwag wasigeis king babaw wadaban pwepway.”

18

Babilon ikalouw

¹ Wankuyeim mo akin Yowbad natakayob teitan meinoy neim walbalab, nakaleiwag tawtoun, ankakin kamnat, waseg imteil ven babaw.

² Iwak, aygan avakaein, ilana,

“Babilon bo ikalouw; ven towen avakaein bo ikalouw.
Bo imlavag aluw siven.

Bo imlavag baloum siven.

Bo imlavag man siven, mansiyas bwaboum, o mansiyas askakin kalbaleb.

³ “Peinan iwmwamwes ven babaw gimgilis yvgamun geinawl waseg;
o guyawaw watinow nisisubwans sisiy;
o takalwelews ven watinow singay ikunakuns waseg manawen, mapuna itawtouns singay.”

⁴ Aygan teitan walbalab aligen, ilana, “Agugwamag yakamiy, kadiloka kulisawes Babilon; awoum kulatans simiyas takalbalebs tasiyas; mata kukawawes asisinap kalbaleb, simouvit biwekeimiy yakamiy.

⁵ “Asisinap kalbaleb kalgutan talog ee... mo bein-o walbalab, peinan singay babaw, o Yowbad ininuway asisinap singay avakaein, kalbaleb.

⁶ “Ven towen gimgilis bo iyagages gamags, kadiloka kuyagages tasiyas mawan. Aveiyag bo inuwakes, kadiloka kuvag sivay waseg ven towen. O peinan kwavig yayan nisekes gamag beimoums, kadiloka kuvgog ven towen askwavig sivay beimoums.

⁷ “Kusek mamayuy son valam, bikatimop kayapam son gidukis. Peinan wananon ininuway mamagina, ilana, ‘King nakwav yeys asesun-wan bwein. Nag basikam sewed; nag bavalam; nag.’

⁸ “Mapuna yam katanok mo bilouvat inamouvit avakaein, kanig, valam, moun, o kov bigob waseg. Peinan tawtoun guyaw Yowbad nakaleiwag towen.”

⁹ O guyawaw tasiyas nikaninavays sisiy, o nimsamwas sisiy, igaw bikines musewun kov towen igob waseg, mo bivalams.

¹⁰ E, aspwayat peinan mamayuy nilouvat waseg, itowas kadiveiyov, ilansa, “Eew, eew, ven towen avakaein; ven towen Babilon tawtoun, singay nuwanaw mo ilouvat ankabaleb.”

¹¹ Tasiyas takalwelews ivālams silmānin ven towen, peinan sikabeikun bo ikous.

¹²⁻¹³ Bo ikous sikabeikun waseg goul, silib, dakul ankakin bwanabwein, lap, kweim mwaynsiyas bwabwel, kudikwad, pwapwākaw, o kweim kalālav, kay kasiyas manisin bwanabwein, youd kavsiyas elefant anadog, o kaligweg bwanabwein, o tanmunum bwabwel, o tanmunum tonen, o dakul pwapwākaw, atanoun, sisayal, gewuw, mul, pilankinsens, gleip sipinen, tagon, pwalaw, wit, bulumakaw, sip, hos, wag, gamag vagan biwteles siwotet.

¹⁴ Gamag bidibakes ven towen, bilansa, “Anagin to sivinam, bo ilisaweim. Muvavag son yakawanam bo ikous; nag vayuwein bukuban, nag.”

¹⁵⁻¹⁶ Takalwelews tasiyas, kweiboug sikabeikun avakaein waseg ven towen, aspwayat peinan ven towen mamyuyan nilivet, itowas kadiveiyov, ivvālams, ilansa, “Eew, eew, ven towen avakaein, tawtoun, nisikam anakweim pwapwākaw, bwabwel, kudikwad, niguwāvin goul waseg, o dakul bwanabwein magin waseg, o lap waseg.

¹⁷⁻¹⁸ “Singay nuwanaw ven towen bo iyagages wuliyougan meivek-wan.”

O taginiwags babaw o wunataws babaw itowas kadiveiyov-o, aspwayat peinan ikines musewun ven towen nigidaged kovanen. Tasiyas ages avakaein ilivans, ilansa, “Ta-kweitan ven ankakin māwan towen.”

¹⁹ E, mo ikumus kunus, ivālams avakaein, ilansa, “Eew, eew, ven towen avakaein; babaw yākids dawags sam, nitayuwouts mo nitabānes youd babaw ven towen waseg; nagein gog singay nuwanaw niyagages.”

²⁰ Mapuna kumwāsaws min-libālab yakamiy; simiyas Yowbad angamag ven watinow o takaweins livānen Yeisu, o palopit tasiyas; peinan ven towen niyageimiy, mapuna Yowbad bo imop mikalbaleb; iyageg ven towen.

²¹ Yowbad natakāyob teitan tawtoun mo ikow dakul singay avakaein, ilev, in wabwanit, ilana,

“Māwana dakul towen, singay tawtoun to nalev, in watinow,
ven towen avakaein Babilon bikalouw bo māwan.

Nag kal biban vayuwein, nag.

²² “Nag kal biligen sal o wous.

Nag aleis vayuwein biwaways o biykiyiks, nag.

Nag kal biban takatanak o tabbalal; nag.

Nag kal biligen kalouniw butun ven towen waseg, nag.

²³ “Lamp mititeilin beikous ven towen waseg.

Ages taveivays beikous ven towen waseg.

Peinan guyawaw ven towen bo nimugwas wadaban pwepway; tage bo ikatidavis ven
babaw gimgilis sibwagaw waseg, o simeg waseg.”

²⁴ O ven towen waseg neiweiys palopits sisiyas Yowbad angamag babaw, tasiyas neiweiys wadaban pwepway.

19

¹ Wankuyeim mo aligen butun avakaein, mamagina ages singay babaw gamag walbalab, ilansa, “Aleluya! DaYowbads waseg katuneib o kamnat son natawtoun,

² “Peinan nakaleiwag mounid-wan, bo imop ansinap kalbaleb manāwen vin, peinan ikaninavay mav, o peinan niyageg ven babaw gimgilis, ansinap kalbaleb waseg. Peinan niwawiysi tasiyas Yowbad natouwat, mo imop nakalbaleb vin manāwen.”

³ Vayuwein mo ilansa, “Aleluya; ven towen igaw ighbugwab, musewun nag beikous.”

⁴ Tamumwey tasiyas sinawey teivas sisiyas man mwanāvas mo ikululs avakaein wamatān Yowbad nissin wanakabsis, ilansa, “Eimen, Aleluya!”

Lamiy naveivay amkwamun

⁵ Aygan teitan Yowbad wanakabsis ilana, “Kuyakawanes Yowbad, natouwat yakamiy kugoulus, takinew toul yak, o takinew guyaw yak.”

⁶ Bo aligen mamagina gamag babaw ages, o mamagina butun bilateg babaw, o mamagina butun palapal tawtoun, ilana, “Aleluya! Peinan bo ikaleiwag, Tatawtoun townen, daGuyaws Yowbad.

⁷ “Kadiloka tamwəsaws avakaein, tayakawanes Yowbad, peinan Ləmiy bo beivays; nakwav tonena iguwəvin.

⁸ “Bo isek anakweim bwanabwein pwapwəkaw, singay gimagim, vəgan kid bisikam, naveivay silmənin.”

Kweim townen pwapwəkaw mamagina Yowbad angamag asisinap didumwal.

⁹ Mo idibakeig, ilana, “Kulel, ‘Singay bimwəsaws tasiyas Ləmiy bidawes naveivay amkwamun silmənin.’”

E, mo idibakeig, ilana, “Livan townen mounid, anilivan Yowbad tonen.”

¹⁰ Mo akulul avakaein wamatān Yowbad natakayob townen, batapwaloul waseg, townen gog idibakeig, ilana, “Awoum! Soug yak, o sidayas budam tasiyas takaweins livənen Yeisuw; dawotets katanok-wan. Kukulul wamatān Yowbad. Peinan takaweins livənen Yeisuw, kululuwes tasiyas mamagina kululuwes tasiyas palopit kweiboug.”

Teitan imwen watapwan qəlen hos pwapwəkaw inoun

¹¹ Mo akin libəlab ikaliyow, akin-o hos mwanatan, won pwapwəkaw. Watapwan hos isin townen yagan Mounid, o Didumwal; ikaleiwag ansinap didumwal waseg, o ikanaviy ansinap didumwal waseg.

¹² Matan mamagina kov igidaged-wan, andinakom babaw; yagan nilel, gamag nag bikines, nag. Townen anmwənet bikin.

¹³ Anakweim isikam bo idal buyav waseg; idokes yagan tonen, “Yowbad anilivan.”

¹⁴ Natakanaviys min-libəlab tasiyas ikabwəkuns, neimwens watapwes hos pwapwəkaw, asikweim bwanabwein, pwapwəkaw, gimagim.

¹⁵ Wadon waseg igogewn pulut kakat tanmunum, vəgan kid biwawaiys ven babaw gimgilis; mtownen tatawtoun takalawagein ven babaw gimgilis, nakaytuk tanmunum wanaman; mtownen tavvanin gleip anagin wanuwan Yowbad inakas. Tatawtoun tonen, sipinen ipupwel mamagina Yowbad ankavikun takalbalebs wasigeis.

¹⁶ Anakweim waseg, o wakuvənen, yagan nilel, “King babaw siking, o guyawaw siguyaw.”

¹⁷⁻¹⁸ Mo akin Yowbad natakayob teitan itamanaw kalas waseg, iwak, aygan avakaein idibakes mansiyas man iyoyows wanakaew, ilana, “Kwatuyouns, kumeis, amkwam avakaein Yowbad bisekeimi kukuwams; kukwams guyawaw vinyones, kukwams takanaviys situwəvek vinyones, kukwams tatawtouns vinyones, kukwams hos vinyones, kukwams vinyones tamnəmwens hos watapwes, kukwams vinyones babaw gamag, takinew guyawaw o takinew toul, tasiyas sivavag babaw o tasiyas tasimavs, e kukwams babaw-wan.”

¹⁹ Mo akin manəwen man kalbaleb siney guyawaw ven watinow, sisiyas sitakanaviys, ikatuyouns kid vəgan bikanaviys townen watapwan qəlen hos, siney natakanaviys tonen.

²⁰ Ikanaviys ee... mo iyousis manəwen man kalbaleb son tayyaweid townen mamagina palopit, naman mulin nivag wamatān manəwen man, mamagina ikatidavis tasiyas neitams man nakabivatus waseg o nikululs wamatān youd townen nibunis magin mawāna man townen. Tasiyas asteiy son mwamoves ilaves ineis wanuwan leg kweitan, ikəlawt kov nigidaged dakul singay muyamuy waseg.

²¹ Tage townen isin watapwan qəlen hos, napulut tanmunum wawadon igogewn iwawaiys gamag babaw. Man babaw mo iyoyows imeis, ikamkwams, bo ikambinaks.

Bweilim lakatunim lakatunim

¹ Mo akin Yowbad natakayob meinoy neim walbalab, neibus neim; wanaman ikow leg avakaein anakiy, son vatul tanmunum avakaein.

² Mo iyous manawen man bwabwel won, mtowen mwatet kweiboug-o, yagan Bwagaw o Seitan, mo iyawen, bisesun-wan bweilim lakatumim lakatumim waseg.

³ E, ilev in leg towen avakaein wanawan, ikatibog ikous, mo ikow kweitan youd kapkikay, iwlik awkwedan vagan kid bikapkip; mata ge igaw bikatidavis ven babaw gimgilis. Bisesuna ee... bweilim lakatumim lakatumim ikous, kadiloka mo bilik bein wamnat anatut kayakus waseg.

⁴ Mo akin absis babaw, kaleiwag silmanin, o Yowbad isek sikaleiwag gamag mwasanin, mo isinis absis tasiyas wasigeis. E, akin kululuwes tasiyas nibwabwes kayes peinan takaweins livanen Yeisuwan tasiyas, o peinan ikanawes Yowbad anilivan; o akin tasiyas nag ikululs wamatan manawen man kalbaleb, o nag ikululs wamatan youd towen nibunis magin mawana manawen man, o ipiyaves nakabivatus wadibes o wanimes. Tasiyas iyamoves vayuwein mo ikaleiwags sisiv Kelis bweilim lakatumim lakatumim waseg.

⁵ Tasiyas wanamug beikits vayuwein, gamag babaw wankuyeim. Bweilim lakatumim lakatumim beikous, takanigs babaws mo beikits vayuwein.

⁶ Gamag tasiyas beikits wanamug, bo bimwasaws, takamnats tasiyas; nag bikanigs vayuwein; nag. Tage tasiyas tobwag gamag bo bikanigs vayuwein. Tasiyas takamnats bimlavags kid tanuwgwes lun silmanin Yowbad son Kelis; sisiv mtowen mo bikaleiwags bweilim lakatumim lakatumim waseg.

⁷ Bweilim lakatumim lakatumim ikous, mo bilik Seitan nises wadeil.

⁸ Mo bisap, binek gamag babaw, siven palavas wadaban pwepway, bikatidavis vagan bikatuyouns naviy silmanin, wunsiyas ven Gog o Megog, gamag singay babaw, nag bitavin, mamagina alekel wakawalaw singay babaw.

⁹ Tasiyas babaw ikanpeles ven bidakwab kavkavek, mo isiwnis Yowbad angamag, sikabmasis waseg, wasiven towen isiwayoub waseg. Kov mo ikalivatow, meinoy neim walbalab, igabus takalbalebs ikous.

¹⁰ Bwagaw towen nikatidavis tasiyas, ilev in waleg towen ikalawt kov, dakul singay muyamuy waseg. Leg towen waseg man manawen kalbaleb son tayyaweid towen idok palopit tonen. Tasiyas asteitoun asimamayuy yam babaw o boug babaw bo bisigeg, tut nag beikous.

Yowbad bikaleiwag wanakabsis avakaein pwapwakaw

¹¹ Mo akin absis avakaein, pwapwakaw. Teitan nissin wanakabsis waseg. Wamatan towen mo pwepway son libalab isawls, ineis; nag bibanes ven vagan bisikes, nag.

¹² Mo akin takanigs babaw, tasiyas guyawaw sisiyas tasiyas toul, itamanaws wamatan nakabsis, mo ikaliyw buk babaw, ivin. Kweitan buk ikaliyw, buk towen silmanin mwamov. Mo ikaleiwag takanigs wasigeis; siwotet amawan nilel wanawan buk siyas, mo ikaleiwag mawan; kukin siwotet bwein mo bikaleiwag bwein, kukin gog kalbaleb mo kalbaleb.

¹³ E, mo isaps tasiyas tamkumukuls nikankanigs wabwanit, o takanigs waTum o takanigs babaw-wan mo isaps, ikaleiwag wasigeis; kukin siwotet amawan mo bikaleiwag mawan.

¹⁴ Mo bilev kanig son Tum bineis waleg towen kov ikalawt. Leg towen mamagina kanig vayuwein.

¹⁵ Kukin kal nag biban yagan wabuk towen mwamov silmanin, mo bilev bein waleg. Leg towen kov ikalawt.

Libalab kweivaw son pwepway kweivaw

¹ Mo akin libalab kweivaw son pwepway kweivaw; peinan libalab kweiboug bo ikous, o pwepway kweiboug bo ikous, o yol bo ikous.

² Akin ven kweivaw, Yelusalem, ven kamnat, ibus im, meinoy neim walbalab Yowbad waseg, bo ikawyamis igwawines, mamagina vin biguwawin vagan kid beivays son namwan.

³⁻⁴ Mo aligen teitan aygan avakaein walbalab, ilana, “Magen, Yowbad siney gamag bisisitans, peinan bimlavags angamag tasiyas, o towen siney tasiyas bisesus, biwes mitingis wamtes tasiyas, peinan kanig beikous, youd moumouvit beikous, valam beikous, mamayuy beikous; youd babaw kweiboug bo beikous.”

⁵ Towen go nisin wanakabsis mo ilivan, ilana, “Youd babaw bo bavag kweivaw.”

Wankuyeim mo ilivan, ilana, “Kulel, peinan livan towen mounid-wan.”

⁶ Mo idibakeig, ilana, “E, bo ikamat. Yey A son Z yey; yey nakabsilamaw son nakabiyokous. Kal yak ivag amdak mo basekeim amsoup, nillatay mwamov silmanin, bukumoum. Maysan nag.

⁷ “Kukin bukutakayway waseg Seitan, youd babaw mo bukuyous, bukumlavag natug o yey muYowbad yey.

⁸ “Tasiyas gog tabwabweis, o tayyaweids, o takalbaels, o tawayins gamag, o taggeinawls, o tabbwagaws, o tamgamegs, tasiyas tayyaweids babaw bineis bisikes leg towen ikalawt kov son dakul muyamuy, mamagina sikanig vayuwein leg towen muyamuy waseg.”

Yelusalem kweivaw

⁹ Yowbad natakayob teinim teiy nikokews abmin bomanim bomey ikalawt youd kalbaleb kweinim kweiy, ven watinow kalbaleb-nen nakabiyokous silmanin; teitan mo idibakeig, ilana, “Kum bakatimlakeim vin manawen beivays son Lamiy.”

¹⁰⁻¹¹ E, kululuwag ikow inow wanakaew-o nakan koy singay avakaein, aveiyov, mo akin ven kamnat yagan Yelusalem ibus, meinoy neim walbalab Yowbad waseg, yakawan Yowbad immiteil waseg, mamagin mititeilin dakul bwanabwein ikavivikawn mawana kelas, o mamagina dakul yagan yasip magin mawana gilas tonen.

¹² Boul dakul nitoumis avakaein, aveiyov. Awkwedan gog sinawatan kweiy, koukwed katanok katanok Yowbad natakayob teitan nises, o yagan nile; koukwed yiges sinawatan kweiy, yiges min-Yisleil asikum sinawatan kweiy.

¹³ Wanuvid koukwed kweitoun, wabomat kweitoun, wayals kweitoun, wayavat kweitoun.

¹⁴ Boul waseg kakol sinawatan kweiy; takaweins livanen Lamiy sinawatan teiy nile kakol waseg sinawatan kweiy.

¹⁵ Towen nakalivan soug wanaman kaligweg didumwal vagan bitakwen vayovan ven son awkwedan o boul-nen; tage kaligweg makaywen won goul-wan.

¹⁶ Ven towen palavas, vayovan son kopkopan katanok-wan. Nakaligweg waseg mo itakwen ven. Vayovan katanok tawsan lakatum veit; vayovan mamagina Nugin. Vayovan son kopkopan sona vakaeinan katanok-wan.

¹⁷ Iwov boul vayovan, sinawatoun ovanim ovatan. Naman Yowbad natakayob towen vayovan mawana gamag naman.

¹⁸ Ven anaboul nitoumis dakul yagan yasip waseg, o ven goul-wan, ankakin gimagim mawana gilas.

¹⁹⁻²⁰ Ven towen kakolan ilabwes dakul babaw bwanabweins waseg, kweitan yasip, kwayuwein sapail, kwatounun kalisidon, kwavasin emlalid; kwanimen sadoniks, kweitan koneliyan, kwayuwein kalisolait, kwatounun beilil, kwavasin topas, kwanimen kalaysopaleis, kweitan tekwous, kweiyuwein amitis. Dakul tasiyas babawan sinawatan akweiy, askakin singaya bwanabwein.

²¹ Awkwedan ven lap sinawatan kweiy, kweitan koukwed katanok lap, kweitan koukwed kweitan lap; babiweis lap sinawatan kweiy. Vitakon ven goul tonen, mamagina gilas, gimagim seikwan.

²² Ven towen waseg ta-akin Yowbad nabunatum tapwoloul silmanin; nag. Peinan towen Tatawtoun Yowbad son Lamiy mamagina buntuman tapwoloul tasiyas.

²³ Ven towen nag ivag sivinan kelas o tibukon vagan bimteilis; nag. Peinan Yowbad nakamnat bo ivanoum, imteil ven; o Lamiy mamagina lamp ven towen silmanin.

²⁴ Ven babaw gimgilis binounas mititeilin towen waseg. Guyawaw ven watinow binawes sikamnat ven towen waseg.

²⁵ Wudayam nag bikatibagus ven towen awkwedan, o nag beivag boug.

²⁶ Ven babaw gimgilis bikawes yakawanes o bulages binawes ven towen walbalab.

²⁷ O ven towen nag beisiw aveiyag bwaboum o kalbaleb o yaweid; nag. Misinaka tasiyas yiges nilel Lāmiy wanabuk mwamov silmanin.

22

¹⁻² Ikatimlakeig mo akin lay uwyatan, sipinen mwamov silmanin, māwana gilas; lay uwyawen meinoy neim nakabsis Yowbad son Lāmiy. E, ilatay mo in wavytakon ven. Wadadan lay kay nitatos anagin mwamov silmanin. Anagin sinawatan kweiy, kweitan magin, kweitan magin; katanok tibukon anagin kweitan imwanoug, kweitan tibukon anagin kweitan imwanoug. Yageivein gog ven babaw sikaybuy.

³⁻⁴ Nag aveiyag Yowbad nipiyev mo beisiw ven towen waseg, nag.

Nakabsis Yowbad son Lāmiy bises ven towen; o natouwats bikanawes aygan, bikikines magin tonen, o yagan biley wadibes.

⁵ Boug nag beivag; tage nag sivines wodam o kālas vāgan bimtei ven, peinan bo ivanoum mititeilin siGuyaw Yowbad; o angamag tasiyas bikaleiwags, tut nag beikous.

Igaw Yeisuw Kelis beiyum beim

⁶⁻⁷ Mo idibakeig, ilana, “Livan towen mounid-wan. Guyaw Yowbad kweiboug ikatipel kululuwan isekes tasiyas palopit; nagein gog mo ikayeb gum-libalab teitan vāgan bikitimlakeimiy nagamag yakamiy, bukukwakins aveiyag nuwanaw mo bikamat. Nuwanaw bayum baw. Kal yak bukwanow aveiyag buk towen nilivnek, mo bukumwāsaw.”

⁸ Yey Yon aligen o akin youd tasiyas. Akin, aligen ikous, mo akulul avakaein wamatan Yowbad natakāyob towen nikatimlakeig youd tasiyas.

⁹ Mtowen nidibakeig, ilana, “Awoum! Soug yak, o sidayas budam tasiyas takanaweins aygan Yowbad, babaw yakids; o yey māwana budam tasiyas palopits, o tasiyas takanaweins livan towen nises buk towen waseg. Anmwanet Yowbad kukulul wamatan.”

¹⁰ Mo idibakeig, ilana, “Awoum kwayus livan buk towen nilivnek, peinan tut kayakus mo bikamat.

¹¹ “Towen ansinap kalbaleb, nakalbaleb bisesun-wan. Towen ansinap bikibik, e nabikibik bisesun-wan. Towen ansinap didumwal, nadidumwal bisesun-wan; o towen ansinap kamnat, gamag towen nakamnat bisesun-wan.

¹² “Nuwanaw baw, maysamiy bakow basekeimiy katanok katanok māwan miwotet yakamiy.

¹³ “Yey A son Z, yey; yey nakabsilamaw, o yey nakabiyokous. Yey amug; yey akuyeim.

¹⁴ “Bo bimwāsaws tasiyas kalisiy biwidis o bivkalines asikweim, kadilokes mo beikams makaywen kay mwamoves silmanin; bweina beisiws ven towen awkwedan waseg.

¹⁵ “Watoulan nisesus awuk babaw, o tabbwagaws, o tassubwans, o tawayins gamag, o tamgamegs, sisiyas tasiyas sivines biyyawehids.

¹⁶ “Yey Yeisuw, bo akayeb guntakayob vāgan kid bikatimlakeimiy sinap towen, tayekelesiys babaw yakamiy. Yey Deibid delen yey, Deibid gidwalin yey bo asunap; mititeilig avakaein māwana Utuyam yey.”

¹⁷ Yowbad Kululuwan son Lāmiy nakwaw ilansa, “Kum.”

Kukin tanganeg yak, kulana, “Kum.”

Kal yak amdak, kukin sivinam soup, mwamovam silmanin, bweina kum kumoum makaw.

¹⁸ Adibakeim yak, kal yak bukuligen livan buk towen nilivnek, awoum bukwatimweis. Kukin bukwatimweis, o kweitan livan bukusen, Yowbad mo bikatimweis moumouvit waseg yak; bisekeim youd babaw moumouvit, livānen nises wanuwan buk towen.

¹⁹ Awoum gog bukwablev livan kweitan buk towen nilivnek. Kukin bukwalbev, Yowbad mo bigidem waseg yak kam waseg makaywen kay mwamov silmānin, o bigidem mukwasis ven towen kamnat waseg, livānen nises buk towen waseg.

²⁰ Takawein livan towen ilana, “Mounid, nuwanawa baw.”

Eimen; bweina bukum Guyaw Yeisuw.

²¹ Tut towen daGuyaws Yeisuw bisiwyoubumi yayekelesiys yakamiy.

Read the New Testament daily

January

date	Scripture
1	Matiw 1:1-2:12
2	Matiw 2:13-3:6
3	Matiw 3:7-4:11
4	Matiw 4:12-25
5	Matiw 5:1-26
6	Matiw 5:27-48
7	Matiw 6:1-24
8	Matiw 6:25-7:14
9	Matiw 7:15-29
10	Matiw 8:1-17
11	Matiw 8:18-34
12	Matiw 9:1-17
13	Matiw 9:18-38
14	Matiw 10:1-23
15	Matiw 10:24-11:6
16	Matiw 11:7-30
17	Matiw 12:1-21
18	Matiw 12:22-45
19	Matiw 12:46-13:23
20	Matiw 13:24-46
21	Matiw 13:47-14:12
22	Matiw 14:13-36
23	Matiw 15:1-28
24	Matiw 15:29-16:12
25	Matiw 16:13-17:9
26	Matiw 17:10-27
27	Matiw 18:1-22
28	Matiw 18:23-19:12
29	Matiw 19:13-30
30	Matiw 20:1-28
31	Matiw 20:29-21:22

February

date	Scripture
1	Matiw 21:23-46
2	Matiw 22:1-33
3	Matiw 22:34-23:12
4	Matiw 23:13-39
5	Matiw 24:1-28
6	Matiw 24:29-51
7	Matiw 25:1-30
8	Matiw 25:31-26:13
9	Matiw 26:14-46
10	Matiw 26:47-68
11	Matiw 26:69-27:14
12	Matiw 27:15-31
13	Matiw 27:32-66
14	Matiw 28:1-20
15	Mak 1:1-28
16	Mak 1:29-2:12
17	Mak 2:13-3:6
18	Mak 3:7-30
19	Mak 3:31-4:25
20	Mak 4:26-5:20
21	Mak 5:21-43
22	Mak 6:1-29
23	Mak 6:30-56
24	Mak 7:1-23
25	Mak 7:24-8:10
26	Mak 8:11-9:1
27	Mak 9:2-29
28	Mak 9:30-10:12

date	Scripture
1	Mak 10:13-31
2	Mak 10:32-52
3	Mak 11:1-26
4	Mak 11:27-12:17
5	Mak 12:18-37
6	Mak 12:38-13:13
7	Mak 13:14-37
8	Mak 14:1-21
9	Mak 14:22-52
10	Mak 14:53-72
11	Mak 15:1-47
12	Mak 16:1-20
13	Luk 1:1-25
14	Luk 1:26-56
15	Luk 1:57-80
16	Luk 2:1-35
17	Luk 2:36-52
18	Luk 3:1-22
19	Luk 3:23-38
20	Luk 4:1-30
21	Luk 4:31-5:11
22	Luk 5:12-28
23	Luk 5:29-6:11
24	Luk 6:12-38
25	Luk 6:39-7:10
26	Luk 7:11-35
27	Luk 7:36-8:3
28	Luk 8:4-21
29	Luk 8:22-39
30	Luk 8:40-9:6
31	Luk 9:7-27

date	Scripture
1	Luk 9:28-50
2	Luk 9:51-10:12
3	Luk 10:13-37
4	Luk 10:38-11:13
5	Luk 11:14-36
6	Luk 11:37-12:7
7	Luk 12:8-34
8	Luk 12:35-59
9	Luk 13:1-21
10	Luk 13:22-14:6
11	Luk 14:7-35
12	Luk 15:1-32
13	Luk 16:1-18
14	Luk 16:19-17:10
15	Luk 17:11-37
16	Luk 18:1-17
17	Luk 18:18-43
18	Luk 19:1-27
19	Luk 19:28-48
20	Luk 20:1-26
21	Luk 20:27-47
22	Luk 21:1-28
23	Luk 21:29-22:13
24	Luk 22:14-34
25	Luk 22:35-53
26	Luk 22:54-23:12
27	Luk 23:13-43
28	Luk 23:44-24:12
29	Luk 24:13-53
30	Yon 1:1-28

date	Scripture
1	Yon 1:29-51
2	Yon 2:1-25
3	Yon 3:1-21
4	Yon 3:22-4:3
5	Yon 4:4-42
6	Yon 4:43-54
7	Yon 5:1-23
8	Yon 5:24-47
9	Yon 6:1-21
10	Yon 6:22-40
11	Yon 6:41-71
12	Yon 7:1-29
13	Yon 7:30-52
14	Yon 7:53-8:20
15	Yon 8:21-30
16	Yon 8:31-59
17	Yon 9:1-41
18	Yon 10:1-21
19	Yon 10:22-42
20	Yon 11:1-53
21	Yon 11:54-12:19
22	Yon 12:20-50
23	Yon 13:1-30
24	Yon 13:31-14:14
25	Yon 14:15-31
26	Yon 15:1-27
27	Yon 16:1-33
28	Yon 17:1-26
29	Yon 18:1-24
30	Yon 18:25-19:22
31	Yon 19:23-42

date	Scripture
1	Yon 20:1-31
2	Yon 21:1-25
3	Wotet 1:1-26
4	Wotet 2:1-47
5	Wotet 3:1-26
6	Wotet 4:1-37
7	Wotet 5:1-42
8	Wotet 6:1-15
9	Wotet 7:1-29
10	Wotet 7:30-50
11	Wotet 7:51-8:13
12	Wotet 8:14-40
13	Wotet 9:1-25
14	Wotet 9:26-43
15	Wotet 10:1-33
16	Wotet 10:34-48
17	Wotet 11:1-30
18	Wotet 12:1-23
19	Wotet 12:24-13:12
20	Wotet 13:13-41
21	Wotet 13:42-14:7
22	Wotet 14:8-28
23	Wotet 15:1-35
24	Wotet 15:36-16:15
25	Wotet 16:16-40
26	Wotet 17:1-34
27	Wotet 18:1-21
28	Wotet 18:22-19:12
29	Wotet 19:13-41
30	Wotet 20:1-38

date	Scripture
1	Wotet 21:1-16
2	Wotet 21:17-36
3	Wotet 21:37-22:16
4	Wotet 22:17-23:10
5	Wotet 23:11-35
6	Wotet 24:1-27
7	Wotet 25:1-27
8	Wotet 26:1-32
9	Wotet 27:1-20
10	Wotet 27:21-44
11	Wotet 28:1-31
12	Lom 1:1-17
13	Lom 1:18-32
14	Lom 2:1-24
15	Lom 2:25-3:8
16	Lom 3:9-31
17	Lom 4:1-12
18	Lom 4:13-5:5
19	Lom 5:6-21
20	Lom 6:1-23
21	Lom 7:1-14
22	Lom 7:15-8:6
23	Lom 8:7-21
24	Lom 8:22-39
25	Lom 9:1-21
26	Lom 9:22-10:13
27	Lom 10:14-11:12
28	Lom 11:13-36
29	Lom 12:1-21
30	Lom 13:1-14
31	Lom 14:1-23

date	Scripture
1	Lom 15:1-21
2	Lom 15:22-16:7
3	Lom 16:8-27
4	1 Kolinit 1:1-17
5	1 Kolinit 1:18-2:5
6	1 Kolinit 2:6-3:4
7	1 Kolinit 3:5-23
8	1 Kolinit 4:1-21
9	1 Kolinit 5:1-13
10	1 Kolinit 6:1-20
11	1 Kolinit 7:1-24
12	1 Kolinit 7:25-40
13	1 Kolinit 8:1-13
14	1 Kolinit 9:1-18
15	1 Kolinit 9:19-10:13
16	1 Kolinit 10:14-11:1
17	1 Kolinit 11:2-16
18	1 Kolinit 11:17-34
19	1 Kolinit 12:1-26
20	1 Kolinit 12:27-13:13
21	1 Kolinit 14:1-17
22	1 Kolinit 14:18-40
23	1 Kolinit 15:1-28
24	1 Kolinit 15:29-58
25	1 Kolinit 16:1-24
26	2 Kolinit 1:1-11
27	2 Kolinit 1:12-2:11
28	2 Kolinit 2:12-17
29	2 Kolinit 3:1-18
30	2 Kolinit 4:1-12
31	2 Kolinit 4:13-5:10

date	Scripture
1	2 Kolinit 5:11-21
2	2 Kolinit 6:1-13
3	2 Kolinit 6:14-7:7
4	2 Kolinit 7:8-16
5	2 Kolinit 8:1-15
6	2 Kolinit 8:16-24
7	2 Kolinit 9:1-15
8	2 Kolinit 10:1-18
9	2 Kolinit 11:1-15
10	2 Kolinit 11:16-33
11	2 Kolinit 12:1-10
12	2 Kolinit 12:11-21
13	2 Kolinit 13:1-14
14	Galetiy 1:1-24
15	Galetiy 2:1-16
16	Galetiy 2:17-3:9
17	Galetiy 3:10-22
18	Galetiy 3:23-4:20
19	Galetiy 4:21-5:12
20	Galetiy 5:13-26
21	Galetiy 6:1-18
22	Epesos 1:1-23
23	Epesos 2:1-22
24	Epesos 3:1-21
25	Epesos 4:1-16
26	Epesos 4:17-5:2
27	Epesos 5:3-33
28	Epesos 6:1-24
29	Pilipay 1:1-26
30	Pilipay 1:27-2:18

date	Scripture
1	Pilipay 2:19-3:6
2	Pilipay 3:7-4:1
3	Pilipay 4:2-23
4	Kolos 1:1-20
5	Kolos 1:21-2:7
6	Kolos 2:8-23
7	Kolos 3:1-17
8	Kolos 3:18-4:18
9	1 Tesalonik 1:1-2:9
10	1 Tesalonik 2:10-3:13
11	1 Tesalonik 4:1-5:3
12	1 Tesalonik 5:4-28
13	2 Tesalonik 1:1-12
14	2 Tesalonik 2:1-17
15	2 Tesalonik 3:1-18
16	1 Timotiy 1:1-20
17	1 Timotiy 2:1-15
18	1 Timotiy 3:1-16
19	1 Timotiy 4:1-16
20	1 Timotiy 5:1-25
21	1 Timotiy 6:1-21
22	2 Timotiy 1:1-18
23	2 Timotiy 2:1-21
24	2 Timotiy 2:22-3:17
25	2 Timotiy 4:1-22
26	Titos 1:1-16
27	Titos 2:1-14
28	Titos 2:15-3:15
29	Pilimon 1:1-25
30	Min-Ibliw 1:1-14
31	Min-Ibliw 2:1-18

date	Scripture
1	Min-Ibliw 3:1-19
2	Min-Ibliw 4:1-13
3	Min-Ibliw 4:14-5:14
4	Min-Ibliw 6:1-20
5	Min-Ibliw 7:1-19
6	Min-Ibliw 7:20-28
7	Min-Ibliw 8:1-13
8	Min-Ibliw 9:1-10
9	Min-Ibliw 9:11-28
10	Min-Ibliw 10:1-18
11	Min-Ibliw 10:19-39
12	Min-Ibliw 11:1-16
13	Min-Ibliw 11:17-31
14	Min-Ibliw 11:32-12:13
15	Min-Ibliw 12:14-29
16	Min-Ibliw 13:1-25
17	Yemes 1:1-18
18	Yemes 1:19-2:17
19	Yemes 2:18-3:18
20	Yemes 4:1-17
21	Yemes 5:1-20
22	1 Pita 1:1-12
23	1 Pita 1:13-2:10
24	1 Pita 2:11-3:7
25	1 Pita 3:8-4:6
26	1 Pita 4:7-5:14
27	2 Pita 1:1-21
28	2 Pita 2:1-22
29	2 Pita 3:1-18
30	1 Yon 1:1-10

date	Scripture
1	1 Yon 2:1-17
2	1 Yon 2:18-3:2
3	1 Yon 3:3-24
4	1 Yon 4:1-21
5	1 Yon 5:1-21
6	2 Yon 1:1-13
7	3 Yon 1:1-14
8	Dud 1:1-25
9	Ikamat 1:1-20
10	Ikamat 2:1-17
11	Ikamat 2:18-3:6
12	Ikamat 3:7-22
13	Ikamat 4:1-11
14	Ikamat 5:1-14
15	Ikamat 6:1-17
16	Ikamat 7:1-17
17	Ikamat 8:1-13
18	Ikamat 9:1-21
19	Ikamat 10:1-11
20	Ikamat 11:1-19
21	Ikamat 12:1-18
22	Ikamat 13:1-18
23	Ikamat 14:1-20
24	Ikamat 15:1-8
25	Ikamat 16:1-21
26	Ikamat 17:1-18
27	Ikamat 18:1-24
28	Ikamat 19:1-21
29	Ikamat 20:1-15
30	Ikamat 21:1-27
31	Ikamat 22:1-21